


Wakità Zəzagəla Wakitə Aṅa Makəs Vok Slawda

Mawga (Cameroun)



Matal: Wakitə Zəzagəla Wakitə Aṅa Makəs Vok Slawda Mawga
(Cameroun) (New Testament)

**Wakità Zəzagəla Wakitə Aŋa Makəs Vok Slawda
Mawga (Cameroun)**

**Matal: Wakitə Zəzagəla Wakitə Aŋa Makəs Vok Slawda Mawga
(Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 13 Jul 2024 from source files dated 29 Jan 2022
03efbf2f-98ca-5534-8610-0be3a8c4b974

Contents

Mata	1
Mark	43
Luka	68
Yuhana	112
Sləray	141
Rom	178
1Korintiya	198
2Korintiya	216
Galatiya	228
Efedəya	235
Filipiya	242
Kolosəya	247
1Tesaloniki	252
2Tesaloniki	256
1Timotawus	259
2Timotawus	264
Titus	268
Filemon	271
Ibəranənkowen	272
Yakuba	287
1Piyer	292
2Piyer	298
1Yuhana	302
2Yuhana	307
3Yuhana	308
Yahuda	309
Mafətala	311

GAY MARABƏJ UWANA MATA ATSETSER Evangile selon Matthieu

*Sləm anja azlababa madzidziga anja Yesu Kristu
(Luka 3.23-38)*

¹ Aganay sləm anja azlababa madzidziga anja Yesu Kristu, bəzi anja David, bəzi anja Abərahəm. ² Abərahəm ayya Isak; Isak ayya Yakuba; Yakuba ayya Yahuda la azladedə anja; ³ Yahuda ayya Farəs atə la Zara, (Sləm anja iyə anjatə Tamar); Farəs ayya Esərom; Esərom ayya Aram; ⁴ Aram ayya Aminadab; Aminadab ayya Naheson; Naheson ayya Salmon; ⁵ Salmon ayya Bowas, (Iyə anja kə Rahab); Bowas ayya Obed, (Iyə anja kə Rut); Obed ayya Isay; ⁶ Isay ayya sufəl David.

David ayya Salomon, (Iyə anja kə mis anja Uriya); ⁷ Salomon ayya Rehəbehəm; Rehəbehəm ayya Abiya; Abiya ayya Asa; ⁸ Asa ayya Yosafat; Yosafat ayya Yoram; Yoram ayya Ozəya; ⁹ Ozəya ayya Yotam; Yotam ayya Ahaz; Ahaz ayya Hesəkiya; ¹⁰ Hesəkiya ayya Manase; Manase ayya Amon; Amon ayya Yosəya; ¹¹ Yosəya ayya Yekoniya atə la azladedə anja, la mok uwana təhəl azlabəza Isərayəl ə Babila.

¹² Mok uwana tədələ atə bokuba azlaməyə ə Babila kə, Yekoniya ayya Salatiyə; Salatiyə ayya Zorobabel; ¹³ Zorobabel ayya Abiyud; Abiyud ayya Eliyakim; Eliyakim ayya Azor; ¹⁴ Azor ayya Sadok; Sadok ayya Akim; Akim ayya Eliyud; ¹⁵ Eliyud ayya Eleyazar; Eleyazar ayya Matan; Matan ayya Yakuba; ¹⁶ Yakuba ayya Yusufu, zil anja Mariyama uwana ayya Yesu, uwana Kristu tagədal.

¹⁷ Kiya uwaga kə dagay Abərahəm tsərəh ə David mayyi ə tsəh ala kulo gəl anja ufad, nğaha kulo gəl anja ufad dagay David tsərəh ə uwana tədələ atə ə Babila, nğaha aya kulo gəl anja ufad tsərəh ə mayyi Yesu uwana Kristu.

*Mayyi Yesu Kristu
(Luka 2.1-7)*

¹⁸ Kiya uwaga apakə vok anja mayyi Yesu Kristu. Iyə anja, Mariyama agə mawda anja Yusufu, ama dagay uwana tagagamay dadən aw kə, Mariyama agə la bəzi la huđ, uwaga kə Masasəđok Zəzagəla la uwana adəllə ə huđ. ¹⁹ Ama Yusufu mawda anja kə dza dziriga, asal masəla ə uda la dazuwəya la huma ə azladza aw, adzəg w masak ə mawda anja la səbəh. ²⁰ Mok uwana adzəg w uwaga kə masakal kə, malika anja Zəzagəla apəhalla vok la masesinay agədal: "Yusufu, mayyi ə tsəh ala anja David, guba akəs ka kə mazəb Mariyama mawda anjak aw, kə uwana la ndzəda anja Masasəđok Zəzagəla la uwana akud bəzi uwaga la huđ anja. ²¹ Masla adəyyi bəzi zilga, uwana kadəvəl sləm Yesu, uwana adəbəl tsəhay anja la tsakana anjatə la abə gesina."

²² Tatak uwaga gesina apakə vok kə magəđ ə afik bokuba uwana Sufəl Zəzagəla apəh ə ahəl anja azlaməna mapəh ə atə gay ə ahəl kə mapəh ə azladza:

²³ 'Dahalay uwana asəl zil aw, adəzəb bəzi ə huđ, adəyyi bəzi zilga, tədəvəl sləm Ema-nuyel.' (Uwana asal magəđay: Zəzagəla la ahən j la anu) *

²⁴ Mok uwana Yusufu adatsən ala kə, adəhən bokuba uwana malika anja Sufəl Zəzagəla apəhal la masesinay, nğaha azəb Mariyama mawda anja kə mis. ²⁵ Ama Yusufu ahənə ə ahən j la masla tsərəh ə mayyi kona anja, uwana Yusufu avəl sləm Yesu, aw.

2

Azlaməna masəl tatak tasa ə afik la mas ə afik afats

¹ Kiya uwaga tayya Yesu la gudən Betəlehəm, la kutso anja Yahudiya la abə la zamana anja sufəl Herod. Uwana tayyay kə, azlaməna masəl tatak uwana tanərəzəh azlatsetsilin təsə ə afik la mas ə afik afats, təsə ə Urusalima. ² Tanəv: "Anjala bəzi uwanay tayya la ahəl ə ahəl ə uwana adəgay Sufəl anja azla Yahudiya la? Mənənən tsetsilin anja apəhla vok ala la mas ə afik afats, maslə gə la uwaga məsə ə afik kə makəđədal ə ahən."

³ Kay, mok uwana sufəl Herod atsən uwaga, guba akəs, gəl akədal ə vok la azlaməna madz ə ahən j la Urusalima gesina. ⁴ Ahamə gay azlamənğa anja azlaməna mav tatak

* 1:23 1.23 Yesayya 7.14

à Zəzagəla à vok la azlaməna matapla wakità aña Musa à azladza, anav à atà gay ala naka tayyi Kristu ma à uwala asla tak la? ⁵ Tagodfal: “La Betelehem, la kutso Yahudiya la abà.” Kà uwana aganay azlaməna mapəh à atà gay à ahàl tatsetsèr:

⁶ ‘Kak Betelehem la kutso Yahudiya la abà,

Katsəh azlagudəñ aña Yahudiya à tsəh aw,
Kà uwana la kak la abà

La uwana masla humà uwana adəguw tsəhay gulo Isərayel à huma adàs à uda.’ ^{*} Zəzagəla agodf. ⁷ Kiya uwaga Herod azàl azlaməna masəl tatak uwaga la gəl à gəl, ngaha anàv à atà kaslà mapəhla vok ala aña tsetsilin uwatà la gay ala. ⁸ La lig la ahəñ aslèlla atà à Betelehem: “Dàw, kayahaw bəzi uwatà, baña kadaβəzawwal kà, kadàpəhaw à gi ala babay, kà gi aña maday aña makədədàl à ahəñ suwan”, agodf à atà.

⁹ Mok uwana tatsəb sləm à mapəhay aña sufəl uwaga kà, tahàd, tanəñà tsetsilin uwana tanəñəñ la mas à afik afats, aga la huma añaatà, ama mok uwana adabəz à slaka uwana bəzi la ahəñ kà, tsetsilin atsizl à ahəñ. ¹⁰ Uwana tanəñəñ kiya uwaga kà, tahən ala la marabay mənğa. ¹¹ Tada à gày, tanəñəñ bəzi vərna la iyà aña Mariyama. Takədədàh à ahəñ, tazlèbà bəzi, tapàlla kazlana añaatà ala, ngaha tavàhal azlatatak: Luwàluwà, matərsin, ngaha la mir. ¹² La lig la ahəñ Zəzagəla apəh à atà vok à abà la masesinay kà atà aña maguway la slaka sufəl Herod aya aw. Kiya uwaga tanəfà tetəvi anik kà mawul à gudəñ añaatà.

Mahoy à gudəñ Misəra

¹³ Mok uwana azlaməna masəl tatak tadiy añaatà, malika aña Sufəl Zəzagəla apəhla vok à Yusufu la masesinay, agodfal: “Sà à afik, zəb bəzi la iyà aña, ngaha hōy à gudəñ Misəra, kadàdz à ahəñ la abatà tsərəh à uwana: ‘Wùlla à wan’, gədàgodf à ka, kà uwana Herod adəyah makəd bəzi.”

¹⁴ Hadzak, Yusufu atsizilla ala, azəb bəzi la iyà aña, ngaha ahōy la atà la vəd à kutso Misəra. ¹⁵ Adzà à ahəñ la abatà tsərəh à mamətsay aña Herod, uwaga apakà vok kà magodf uwana à afik Sufəl Zəzagəla apəh la pañaw aña azlaməna mapəh à atà gay à ahàl kà mapàh à azladza:

‘Gəzàl à bəzi gulo à uda la kutso Misəra.’ ^{*}

Makad bəza

¹⁶ Mok uwana Herod asəl kà azlaməna masəl tatak tavavarəñ kà, apək ləv kaykay, avà tetəvi kà makad azlabəza zilga la gudəñ Betelehem gesina dagay la azlavərnaga tsərəh à mavay səla. Dagay la matsən gay mapəhla vok ala aña tsetsilin, uwana atsənəñ la slaka azlaməsəl tatak uwaga. ¹⁷ Kiya uwaga agodf à afik, uwana masla mapəhal gay à ahàl Yeremiya agodf:

¹⁸ ‘Hulolo atsən la Rama, matuway la mawiyay mənğa.

Uwaga kà Rahilu la uwana atùw azlabəza aña,
Asal matasla ala gay à ahəñ aw, kà uwana tamatsay.’ ^{*}

Mawul à wan la kutso Misəra

¹⁹ Mok uwana Herod adamətsay, malika aña Sufəl Zəzagəla apəhla vok à Yusufu la masesinay la Misəra. ²⁰ Agodfal: “Lagwa kà, sà à afik, zəb bəzi la iyà aña, wùlāw à kutso Isərayel, kà uwana azladza uwana tayàh makəd bəzi kà tadamətsay.”

²¹ Kiya uwaga Yusufu atsizilla ala, azəb bəzi la iyà aña, ngaha tawul à Isərayel. ²² Ama atsənəñ kà Arkelawus la uwana, azùw sufəl aña baba aña la Yahudiya kà, guba akəs kà mawul à kutso uwatà à abà. Ama uwana adatsən Zəzagəla apəhal la masesinay la abà aya kà, ahàd, abək vok à makoray aña Galili à abà, ²³ ngaha añał gày aña à bəzi gudəñ uwana à abà, sləm aña Nazaret. Adəhəñ kiya uwanay kà, kà magodf à afik gay uwana azlaməna mapəh à atà gay à ahàl tapàh, tagodf kà: ‘Tadàzalalla zil Nazaret.’

3

Gay aña Yuhana masla madàh batem

(Mark 1.1-8; Luka 3.1-18; Yuhana 1.19-28)

¹ La zamana uwatà kà, Yuhana masla madàh batem apəhla vok ala la fəta aña Yahudiya la abà, ngaha adzəkà mazàh sayda. ² “Pəhàw gay la ləv ala, kà uwana makoray Sufəl Zəzagəla kà nekwa atsa à wan”, agodf à atà. ³ Yuhana kà dza uwana masla mapəhal gay à ahàl Yesayya apəh lakəl aña agodf:

‘Uwaga kuda aña dza la uwana awiyay la fəta la abà:

'Slàdàw tetèvi anja Sufèl Zəzagəla,

Tsìzllàw azlatetèvi manalabahayga ala gesina", * agòd. ⁴ Lukut anja Yuhana kà madefhəŋga la anjizd anja zlugumi, ŋgaha awəf parapara anja zlap à tsəh, tatak may anja kà hayyaw, la zuway mazuway la fəta. ⁵ Azlaməna madz à ahəŋ la Urusalima, la azlauwana la kutso Yahudiya ŋgaha la azlauwana la makəla anja mukwà Urdun gesina tasà à waŋ à slaka anja. ⁶ Tapàh tsakana anjatà à uda la dazuwaya, ŋgaha adfahà à atà batem la mukwà Urdun la abà.

⁷ Ama mok uwana Yuhana anəŋà azla Farisəya la azla Sadukiya anjuvaw tatsà à waŋ à slaka anja kà madahatəŋ batem kà, agòd à atà: "Maham à ahəŋ anja matsapa: uwa apəh à akul kà kadətəfaw à seriya anja Zəzagəla uwana la gay ala, adasa à waŋ aw uwa? ⁸ Lagwa kapəhawla sləray anjul uwana ala, apəhla ala kà kadasakaw à sləray anjul uwana uwarà kadahəhawwəŋ. ⁹ ŋgaha kà kadzugwaw kà mats zlapay la gəl anjul: 'Abəraham kà baba gami madzizdiga', kagodaw aw. Haday, gəpəh à akul kà, Zəzagəla aslala vok apak azlaakur ala kà mayyi à tsəh ala anja Abəraham. ¹⁰ Lagwa kà, gosla kà madefhəŋ à ahəŋ gə nekwa kà mahərats la tsəh à ahəf à afik. Kəla ahəf uwana av mayyay delga aw, agay manats à ahəŋ gə ŋgaha maduw à akəl à tsəh. ¹¹ Gi kà, gədfahakulla batem kà la iyaw, kà mapəhla ala kà kadapəhaw gay la ləv ala pəra. Ama dza uwana adàs à waŋ la lig gulo la ahəŋ kà adəfahakulla batem kà la Masasəfok Zəzagəla, ŋgaha la akəl. Masla kà, aduwa gi la maslay ndzer, gi kà, gəsla kà mapaləŋ ala amiyaka bə zuwic kwimik anja babay aw. ¹² Kətsaw maduw hi anja la ahəl kà maduwla hi kà mavəh hi ala la tafər. Hi kà atsək à vəda anja à abà, ama tafər kà aduwal à akəl uwana à tsəh adəmatsila la abà aw."

Macfəh batem anja Yesu

(Mark 1.9-11; Luka 3.21-22)

¹³ Kiya uwaga Yesu atsizlla ala la gudəŋ Galili asà à Urdun à slaka Yuhana kà madəhalla batem. ¹⁴ Ama gəl akəf à Yuhana à vok, agòdal: "Gi la uwana ganuəkudə anja batem la slaka anjak aya kə pəra, katsà à slaka gulo kà madəh à ka batem aya ay?" ¹⁵ Ama Yesu awuləlla: "Kəs, apakà vok kiya uwanay dadəŋ, kə uwana kiya uwanay la uwana məhəhaw uwana ala Zəzagəla apəh à anu ala la uwana anəv anu gesina." ¹⁶ La lig la ahəŋ adəhəlla batem. Uwana Yesu adasa à uda la iyaw la abà kà, zagəla apəzlla à ama ala, anəŋà Masasəfok anja Zəzagəla atsà à ahəŋ, adzà à gəl anja bokuba habakoku. ¹⁷ ŋgaha kiya uwaga aya, kuda atsən à ahəŋ la zagəla la afik: "Dza uwanay kà bəzi gay ləv gulo, gəf marabay gulo la madzugway gulo kà à masla à afik", agòd. *

4

Seteni apapat Yesu

(Mark 1.12-13; Luka 4.1-13)

¹ Kiya uwaga Masasəfok Zəzagəla adəla Yesu à fəta à abà kà seteni anja mapapatay. ² Mok uwana Yesu adəfəh mavakay dzik ufəf, la mahəhaw dzik ufəf kà, may akəs masla. ³ Kiya uwaga seteni azà vok à slaka anja la magòdal: "Baŋa kak Kona anja Zəzagəla ndzer kà, 'Pək kaf!', gòd à akur uwanay." ⁴ Yesu awuləlla à uda: "Uwaga kà matsetserayga: 'Dza adzadzər vok kà la kaf pəra aw, ama la kəla gay gesina uwana atsa à waŋ la paŋaw anja Zəzagəla la awtəy.'" *

⁵ Kiya uwaga seteni adəla masla à Urusalima, à gudəŋ tsidəŋaga à abà, adəla à gəl anja məŋ gəy Zəzagəla à afik, ⁶ agòdal: "Baŋa kak Kona anja Zəzagəla ndzer kà: Vəl à ahəŋ la abanay, kə uwana uwaga kà matsetserayga:

'Dəw!', Zəzagəla adəgòd à azlamalika anja lakəl anjak kà mazlak ka ŋgaha tadəkəs ka la matsaw ka kà, kə akur anja mazləl ka asik aw.'" *

⁷ Yesu awuləlla: "Tatsetsər à wakitə à abà la slaka anik babay kà: 'Kapapata Sufèl Zəzagəla anjak aw.'" *

⁸ La lig la ahəŋ seteni adəla à gəl gudəŋ matsəkakəfayga à afik aya, apəhalla makoray anja gudəŋ à vok gesina la mazləbəy anja. ⁹ "Gədəvə à ka uwaga gesina, à baŋa kakəfəd à gi à ahəŋ kasləkaw gi", agòdal.

¹⁰ Yesu agòdal: "Zà vok, kak seteni! Haday, tatsetsər à wakitə Zəzagəla à abà kà: 'Zləbà Sufèl Zəzagəla anjak, ŋgaha dəhalla sləray kà masla kokudə gəl anja pəra.'" *

¹¹ La abatə seteni asəkəl à ahəŋ. Azlamalika tasà à waŋ à slaka Yesu kà mazlakəŋ.

* 3:3 3.3 Yesayya 40.3; 57.14; 62.10 * 3:17 3.17 2Musa 22.2; Mahabay 2.7; Yesayya 42.1 * 4:4 4.4 5Musa 8.3

* 4:6 4.6 Mahabay 91.11-12 * 4:7 4.7 5Musa 6.16 * 4:10 4.10 5Musa 6.13

Yesu adzəka sləray aŋha la kutso Galili

(Mark 1.14-15; Luka 4.14-15)

- ¹² Mok uwana Yesu atsənənŋ tadūw Yuhana à daŋay kà, atsizilla ala, adà aŋha à Galili.
¹³ Asàk à madz à ahəŋ la Nazaret, ahàd kà madz à ahəŋ la Kapernahum, gudəŋ uwana la gay dərəv aŋa Galili, la makoray aŋa Zabulon la Neftali la abà. ¹⁴ Apakà vok kiya uwaga kà, kà gay aŋa masla mapəhal gay à ahəl Yesayya aŋa magəɔf à afik:
¹⁵ 'Kutso aŋa Zabulon la aŋa Neftali,
 Uwana la gay mukwà, la kutso uwana la dərəv à uda anik aŋa mukwà Urdun,
 Nŋgaha la Galili uwana azladza uwana azla Yahudiya aw, tadz à ahəŋ la abà.
¹⁶ Tsəhay uwana adz à ahəŋ la mələs la abà,
 Adànəŋ magol ufaka.
 Azlauwana tadz à ahəŋ la dzəgay aŋa mamətsay la abà bay,
 Ufaka adəpəhatàla vok.'^o
¹⁷ Dagay la kaslà uwatà, Yesu adzəkà mapəh gay Zəzagəla, agəɔf à atà: "Pəhàw gay la ləv ala kà uwana makoray aŋha kà nekwa."

Yesu azal azlaməna matapla matera la slaka aŋha

(Mark 1.16-20; Luka 5.1-11)

- ¹⁸ Mok uwana Yesu auguzahay la gay mukwà aŋa Galili kà, anəŋà Səmon uwana tazallala Piyer atà la deda aŋha Andəre, uwana tadàw dzarawa aŋatà à iyaw à abà; kà uwana atà azlaməna makas kilfi. ¹⁹ Yesu agəɔf à atà: "Nəfaw gi, nŋgaha gəɔdəpakakulla kà azlaməna makas azladza." ²⁰ Katskats tasàk à dzarawa aŋatà à ahəŋ nŋgaha tanəfà masla.
²¹ Adà à huma à gay kərkər zwek, tanəŋà Yakuba atà la Yuhana deda aŋha, azlakona aŋa Zebede. Tagà la kəslah iyaw aŋatà la afik la baba aŋatà Zebede, tadfah dzarawa aŋatà, Yesu azəl atà. ²² La katskats tasàk à kəslah iyaw aŋatà à ahəŋ la baba aŋatà gə, tanəfà Yesu.
²³ Yesu auguzàh la kutso Galili gesina, atapàhla azladza la azlagəy madəv kuɔfa la aku, azahà à ata gay marabəŋ lakəl aŋa makoray Zəzagəla, nŋgaha awarà azladza ala la azlatsəhay dʉvats anik anik, la azladeri gesina. ²⁴ Azladza tatsənənŋ tapəhay lakəl aŋha la makoray aŋa Səriya gesina, nŋgaha tasàhla azlaməna dʉvats anik anik à waŋ gesina uwana tas nŋərpə, la azlamasəɔk mawisiga, la azladeri nŋgaha awarà atà ala.
²⁵ Maham à ahəŋ dza aŋuwaw anəfà masla, tasà à waŋ la kutso Galili, la makoray aŋa gudəŋ kulo, la Urusalima, la Yahudiya nŋgaha la gay makwi aŋa dərəv à uda aŋa mukwà Urdun.

5

Mapəh gay Zəzagəla la gudəŋ la afik

- ¹ Mok uwana Yesu anəŋà maham à ahəŋ dza uwaga, ahàd à gudəŋ à afik adzà madzay la abatà, azlaməna matapla aŋha tasà à waŋ à slaka aŋha. ² Nŋgaha Yesu adzəkà matapatàla la kiya uwanay:

Barka

(Luka 6.20-23)

- ³ "Marabay agay la azladza uwana tasəl la gəl aŋatà kà azlaməna kuɔfa, kà uwana makoray Zəzagəla kà aŋatà!
⁴ Marabay agay la azlauwana atà la mazaw la gəl la abà, kà uwana Zəzagəla adàtasl à atà gay à ahəŋ!^o
⁵ Marabay agay la azlauwana azlatələmma, kà uwana tadàbəz kutso uwana Zəzagəla apəhà ahəŋ!^o
⁶ Marabay agay la azlauwana tawoya madz à ahəŋ bokuba uwana asa à Zəzagəla, kà uwana Zəzagəla adàhatəŋ lela!^o
⁷ Marabay agay la azlauwana vok aham à atà kà azladza anik, kà uwana vok adàham à Zəzagəla kà atà suwaŋ!
⁸ Marabay agay la azlauwana azlasətaka la ləv aŋatà la tsəh, kà uwana tadànəŋ Zəzagəla!^o
⁹ Marabay agay la azlauwana tatsala lapiya à tataka aŋatà à abà, kà uwana Zəzagəla adàzal atà ala azlabəza aŋha!
¹⁰ Marabay agay la azlauwana tatəərəf atà, kà uwana tadəhəŋ kà uwana asà à Zəzagəla, makoray Zəzagəla kà adəgay kà aŋatà ndzer!

^o 4:16 4.16 Yesayya 8.23; 9.1-2 ^o 5:4 5.4 Yesayya 61.2 ^o 5:5 5.5 Mahabay 37.11 ^o 5:6 5.6 Yesayya 55.1-2

^o 5:8 5.8 Mahabay 24.3-4

- 11 Marabay agay la akul, à banja azladza tatsək à akul magoƒahay à gəl, takal akul gay à vok, tapəh à akul azlamawisiga à vok gesina babay, kà uwana akul azlaməna matapla la slaka gulo.
- 12 Vələhàw à zagəla, rəbàw kà uwana masik mənɣa akud akul la zagəla. La kità bay tatə̀rə̀bàhàŋ azlaməna mapəh à atà gay à ahəl kà mapəh à azladza, uwana tadzà à ahəŋ uwarà.”

Gay lakəl aŋa slugul la uƒaka
(Mark 9.50; Luka 14.34-35)

13 “Akul la uwana akul azlaslugul aŋa gudəŋ à vok. Ama banja slugul azlaƒay aya aw ma, la mana tazlaƒəŋ ala aya ma? Akəsà vok aya aw, say mafətəkw ala pəra, ŋgaha azladza tamələŋ à tsəh.”

14 “Akul la uwana akul azlaudfaka aŋa gudəŋ à vok. Hud ƒudəŋ uwana maŋal à gəl gudəŋ à afik gə, kà ahəƒ vok à ahəŋ aw. 15 Tavàts fənəs aŋa maf à tsəh tasà aw, ama tafay kà à slaka masərət fənəs à ahəŋ, kà mav uƒaka à azladza gesina, uwana la kay uwaga. 16 Kiya uwaga la uwana uƒaka aŋkul aƒay la huma aŋa azladza gudəŋ à vok kəla suwaŋ, kà azladza gudəŋ à vok aŋa manəŋ sləray aŋkul kà delga, ŋgaha atà tadəzləb Baba aŋkul uwana la zagəla la afik.”

Mahən mapəhay ala

17 “Kadzugwaw kà gəsà à waŋ kà masläh mapəhay aŋa Musa ala, ŋgaha la mapəhla ala aŋa azlaməna mapəh à atà gay à ahəl kagoƒaw aw, ama gəsà à waŋ kà, kà masəla godega aŋha à uda pəra ndzer. 18 Haƒay, gəpəh à akul la dziriga: Tsəràh à uwana zagəla la kutso adədəv à gay, amiyaka bə bəzi manəhay aŋa mapəhay uwanay adəkəƒ vok aw, ŋgaha tsəràh à makəƒ gəl à ahəŋ aŋa tatak gesina. 19 Kà uwaga kəla dza uwana apəsew bəzi manəhay aŋa mapəhay uwaga, ŋgaha atapla azladza anik kà madehəŋ kiya aŋha kà, masla kà adəgay bəzi gə la makoray Zəzagəla. Ama dza uwana akəs mapəhay uwaga, ŋgaha atapla azladza kà madehəŋ kiya aŋha kà, masla kà adəgay mənɣa la makoray Zəzagəla. 20 Ndzer, gəgoƒ à akul: Banja dziriga aŋkul aƒuw aŋa azlaməna mapəhla wakità seriya ala, ŋgaha la azla Farisəya aw kà, kadaw à makoray Zəzagəla aw.”

Matapla lakəl aŋa mapak ləv

21 “Katsənàw uwana tapəh à azlababa aŋkul madzidziga: ‘Kakəƒ dza aw, dza uwana akəƒ dza kà tadala à huma seriya.’[✧] 22 Ama gi gəgoƒ à akul kà: Kəla uwabeyuwi uwana apək ləv lakəl aŋa deda aŋha kà, ad à huma seriya. Dza uwana: ‘Kak bada’, agəƒ à deda aŋha kà, tadala à huma seriya aŋa azlamasiga. Dza uwana: ‘Kak kusoŋu’, agəƒ à deda aŋha kà, azlayla vok ad à akəl à abà. 23 Lagwa kà, banja kadzəka makəƒ tatak à Zəzagəla, ŋgaha awul à ka à gəl kà gay la ahəŋ la tataka aŋkul la abà la deda aŋak kà, 24 sàk à tatak aŋak à ahəŋ la abatà, hād, katsənà vok gay la deda aŋak dadəŋ, ŋgaha banja gay adədəv à gay kà, wùl à waŋ, kakəƒ tatak aŋak à Zəzagəla adagay zla!”

25 “Banja dza apuwà à ka gudzi à gəl, pəra khamàw à tetəvi à ama kà mad à seriya kà, mərə vok kà akul aŋa matsən vok gay la mok uwana akul la tetəvi la ama dadəŋ, kà masla aŋa maf ka à ahəl aŋa masla seriya aw, ŋgaha babay kà masla seriya aŋa maf ka à azlaslodzi à ahəl, ŋgaha atà aŋa maduw ka à danjay aw. 26 La dziriga gəgoƒ à ka, tetuwa kadàsa à uda la abatà aw say banja kadətsetsekwah azlakalamay aŋak à waŋ gesina dadəŋ.”

Matapla lakəl aŋa à gəl gaw

27 “Katsənàwwàŋ bokuba uwana apəhà vok kà: ‘Kada à gəl gaw aw.’[✧] 28 Ama gi kà, gəgoƒ à akul kà: Kəla dza uwana anəŋ à mis aŋa dza anik à adi la makəƒal à adi vok la ləv aŋha la tsəh kà, adadà à gəl gaw. 29 Banja kà yewdi ahəl kaf aŋak la uwana katəƒ à tsakana à abà kà, bəƒ à adi ala, məl ala kərkər, kà uwana ŋuləm kà manəbay vok aŋak tekula azà ala, kà kak aŋa mad à gəy akəl à abà la vok aŋak gesina. 30 Iyay, banja ahəl kaf aŋak la uwana apapat ka à tsakana à abà kà, nàts à vok ala, ŋuləm kà aŋak kà manəbay vok aŋak tekula azà ala, à kà vok aŋak gesina aŋa mad à gəy akəl à abà.”

Matapla lakəl aŋa makudək mis
(Mark 10.11-12; Luka 16.18)

31 “Apəhà vok aya babay kà: ‘Dza uwana akudək mis aŋha kà, say avəl wakità aŋa mavàh vok ala à ahəl dadəŋ.’[✧] 32 Ama gi kà, gəgoƒ à akul kà: Kəla uwabeyuwi uwana akudək mis aŋha, uwala aƒəzal à gəl la mazaƒ zil la tsəh aw kà, masla à zil uwaga

kà adada à gəl gaw, à baŋa azəb mis anik, ŋgaha dza uwana azəb mis makudəkay gā babay kà, adàda à gel gaw, suwanj.”

Matapla lakəl aŋa mazuw mawaɗay

³³ “Bà gotənaŋ katsənàwwàŋ tapəh à azlababa gami madzidziga babay kà: ‘Kazuw mawaɗay la fida aw, ama hənà mawaɗay aŋak ala kà la Sufəl Zəzagəla la afik pəra.’
³⁴ Ama gi kà, gəgəɗ à akul kà: Kazuwaw mawaɗay aw! Kazuwaw mawaɗay baməɾaka la zagəla aw, kà uwana uwaga kà kursi aŋa Sufəl Zəzagəla. ³⁵ Baməɾaka la kutso aw, kà uwana uwaga kà slaka maf asik à ahəŋ aŋha, adagay la Urusalima bay aw, kà uwana uwaga kà mənəŋ gudəŋ aŋa Sufəl.* ³⁶ Kazuw mawaɗay la gəl aŋak aw, kà uwana kaslala vok, kà mapak aŋidz gəl aŋak tekula ala kà medekuga, baŋaw kà marsiga aw. ³⁷ Ama gəɗaw pəra kà: ‘Iyay’, baŋaw ‘Awanj’, kà uwana kəla tatak uwana dza aziŋ à uwaga à gəl kà, aguwa à uda kà la slaka masla mawisiga.”

Matapla lakəl aŋa mawal ala kà vok mawisiga

(Luka 6.29-30)

³⁸ “Katsənàwwàŋ bokuba uwana apəhà vok kà: ‘Yewdi mapəlay la yewdi, slif bay mapəlay la slif.’* ³⁹ Ama gi kà, gəgəɗ à akul kà: Kawulawlə mawisiga à dza uwana asal maɗahakulla mawisiga à vok aw. Baŋa dza abək à ka ahàl à paŋaw ahàl kaf kà, gəlla paŋaw ahàl gudzay à awtəy aya. ⁴⁰ Baŋa dza akəl à ka gay à vok, kà mazəb tsempe aŋak kà, sàkal azəb dawara gā aya babay. ⁴¹ Baŋa dza afa à ka gasa à gəl kà mazəbal tatak mahanayga, kà mazəbalaŋ dahoy pəlis tekula kà, dàlla mahoy pəlis səla. ⁴² Və à dza uwana anav à ka tatak; kagola lig à dza uwana à gay asal makəl goder la slaka aŋak aw!”

Mawoy azlaməna məzam

(Luka 6.27-28,32-36)

⁴³ “Katsənàwwàŋ bokuba uwana apəhà vok kà: ‘Wòyà masla magay aŋak ŋgaha pəšəw masla məzam aŋak.’* ⁴⁴ Ama gi kà, gəgəɗ à akul kà: Wòyàwwàŋ azlaməna məzam aŋkul, dəvəw kuɗa kà aŋa azladza uwana tatəɾəb akul. ⁴⁵ Kà akul aŋa magay azlabəza aŋa Baba aŋkul uwana la zagəla la afik. Kà uwana avəɗ afats à azlaməna tsakana, kiya aŋa azladza dziriga babay. Ŋgaha asuw iyaw à azladza dziriga, asuw à azlaməna tsakana babay. ⁴⁶ Iyay, baŋa kawoyawwanj kà azlauwana tawoyà akul pəra ma, kà mana kakudaw maɓəz tatak la slaka Zəzagəla aya ma? Amiyaka azlaməna mazəb hadama babay kà, kiya uwaga taɗəhəŋ aw takay? ⁴⁷ Ŋgaha baŋa kaɗahawwanj ‘Ayyi’ kà azladeda aŋkul pəra ma ‘Delga məɗaɗəhəŋ’, kagəɗaw takay? Bà azladza uwana tasəl Zəzagəla aw babay kà, kiya uwaga la uwana taɗəhəŋ. ⁴⁸ Kità kà, gāw sətaka, bokuba Baba aŋkul uwana la zagəla la afik sətaka, suwanj.”*

6

Matapla lakəl aŋa mazlak à azlaməna kuɗa

¹ “Baŋa kaɗahaw dziriga kà, kaɗahawwanj kà huma yewdi aŋa azladza aw. Baŋa kiya uwaga kaɗahawwanj kà, kaɗəbəzaw masik la slaka Baba aŋkul uwana la zagəla aw.”

² “Baŋa asa à ka mav sili à masla kuɗa anik kà, kahama kà dza à ahəŋ dàŋ kà mavàl aw, bokuba uwana azlaməna magolla dza taɗəhəŋ la azlagəy maɗəv kuɗa la aku, ŋgaha la azlamakalapa tetəvi la ama aw. Taɗəhəŋ kiya uwaga kà, kà azladza aŋa mazləb atà. La dziriga gəpəh à akul, atà kà taɓəz masik aŋatà tsewwa adagay. ³ Ama kak kà, baŋa kav sili à masla kuɗa kà, ɗahà uwaga la kiya uwanay: Amiyaka bà slawda aŋak nekwa gā babay kà, asəl uwaga aw, ⁴ kà mavəy aŋak aŋa magay masəlay gā aw. Say Baba aŋak, uwana la zagəla la afik, la uwana asəl tatak uwaga pəra, ŋgaha masla adəwulla à ka ala mənəŋga aya.”

Matapla lakəl aŋa maɗəv kuɗa

(Luka 11.2-4)

⁵ “Baŋa kaɗəvaw kuɗa kà, kaɗahawwanj bokuba aŋa azlaməna magolla dza aw: Kà uwana atà kà, asa à atà maɗəv kuɗa kà la slaka matsizilla ala la azlagəy maɗəv kuɗa la aku, ŋgaha la azlamakalapa tetəvi la ama kà azladza gesina aŋa manəŋ atà. La dziriga gəpəh à akul: Atà kà, taɓəz masik aŋatà, tsewwa adagay. ⁶ Ama kak kà, baŋa asa à ka maɗəv kuɗa kà, həd à gəy, tsàk à vok à ama, ŋgaha dəv kuɗa à Baba aŋak, uwana la zagəla la afik, ŋgaha Baba aŋak uwana asəl uwana kaɗəhəŋ la ləv aŋak la tsəh, adav à ka masik aŋak.”

* 5:35 5.35 3Musa 19.2; Mahabay 48.2; Yesayya 61.1 * 5:38 5.38 2Musa 21.24; 3Musa 24.20 * 5:43 5.43 3Musa 19.18 * 5:48 5.48 3Musa 19.2; 5Musa 18.13

⁷ “Banja kadəvwaw kufda kà, katsalahaw azlagay deydayga à gay pəra, bokuba anja azladza uwana tasəl Zəzagəla aw, aw, tadzugw kà la mavats gay wadza wadzaga uwaga kà, ‘Zəzagəla adətsəb à anu sləm’, tagod. ⁸ Kadfahawwanj kiya uwaga aw, kà uwana Baba anjul uwana la zagəla la afik asəl tatak uwana kanavaw kufda anja dagay uwarà, à mok uwana kadanavawal dadənj aw. ⁹ Aganay tetəvi anja madəv kufda: Baba gami uwana la zagəla la afik.

Dahənj kà azladza gesina tazləbfa sləm anjak tsikaslasga.

¹⁰ Makoray anjak atsà à wanj.

Mawoyənj anjak apaka vok la vədah,

Bokuba uwana la zagəla.

¹¹ Və à anu tatak may, uwana asla à anu lakana.

¹² Bəs à anu mawisiga uwana mədəhənj gesina,

Bokuba uwana məbasanj à azladza uwana tadfahà à anu mawisiga à vok babay suwanj.

¹³ Təfà à anu kà seteni anja mapapat anu, kà anu anja masak à madinjal gel à vok aw,

Ama təfà à anu la ahəl anja seteni.” ((Kà uwana makoray, maslay ngaha la mazləbaw kà la ahəl anjak anja tsəràh à awtəy. Amen!))

¹⁴ “Banja kabasawwanj à azladza anik uwana tadfahəkulla mawisiga à vok, Baba anjul uwana la zagəla la afik adəbasakulanj suwanj. ¹⁵ Ama banja kabasawwanj à azladza anik uwana tadfahəkulla mawisiga à vok aw kà, Baba anjul uwana la zagəla adəbasakulla mawisiga anjul uwana kadfahəwwənj suwanj aw.”

Matapla lakəl anja makəs nəlay

¹⁶ “Banja kakəsaw nəlay kà, pəhəwla huđ adi anjul ala, üzlədfaw kà kiya anja azlaməna magolla dza uwanay tadəhənj aw: Atà kà, tabəđla huđ adi, kà azladza gesina anja masəlay kà atà la nəlay la abà. ¹⁷ Ama kak kà, banja kakəs nəlay kà, pəl adi anjak lela, wəz gel anjak à uda, ¹⁸ kà azladza anja masəlay kà kak la nəlay la abà aw. Say pəra kà Baba anjak uwana la slaka mahad vok à ahənj gə la zagəla, la uwana asəlay pəra, ngaha Baba anjak uwana anənja uwana kadəhənj adəvə à ka masik anjak.”

Ləmana dziriga la zagəla

(Luka 12.33-34)

¹⁹ “Kahamaw ləmana à gudənj uwanay la vok aw, kà uwana mamən akəsay, marzaw akəsay, azlaməna à gəl bay tazləlay, tazəbay. ²⁰ Ama hāməw ləmana anjul kà à zagəla à afik, la abatà mamən la marzaw akəsay aw, azlaməna à gəl bay taslala vok anja mazləlay kà mazəbay aw. ²¹ Kà uwana la slaka uwana ləmana anjak la abatà, la abatà ləv anjak la abatà, suwanj.”

Uđaka anja vok

(Luka 11.34-36)

²² “Yewdi kà uđaka anja vok: Banja yewdi anjak kà wurwur kà, vok anjak gesina kà uđaka; ²³ ama banja yewdi anjak la đuvats kà, vok anjak gesina la mələs la abà. Banja uđaka uwana la kak la abà mələs gə, mələs uwaga adəgay tabadamma kaykay.”

Zəzagəla ngaha sili

(Luka 16.13)

²⁴ “Dza aslala kà atsəp à azlamənjga à huma à gay səla aw: Adəpəseyaw anik, ngaha adakəs gay anja anik, adəh dziriga à anik, ngaha adəkweska anik. Kaslawwalla vok kà matsəp Zəzagəla à huma la sili aw.”

Maf madzugway à Zəzagəla à afik

(Luka 12.22-31)

²⁵ “Kà uwaga à uwana gəpəh à akul: Kafəw gəl à ahənj kà tatak may la tatak masay uwana kanawkufda anja, kà madzadzarla kà vok aw, baməraka lakəl anja lukut uwana asa à akul kà anja matsokw à vok anjul, sifa kà aduwa tatak may, ngaha ma vok babay kà aduwa lukut aw takay? ²⁶ Nərəzəw azladijanj uwana tahoyay la zagəla tsi: Tasləkay ngaha tatsəđay tatak babay aw, taham tatak à vədə à abà babay aw, ama Baba anjul uwana la zagəla la afik adzadzar atà. Iyay zla, akul ma kaduwwənj azladijanj aw takay? ²⁷ Uwa la tataka anjul la abà aslala vok anja maziñ à mavay anja sifa anja à adi amiya njuv la aslasl à gəl anja uwa?”

²⁸ “Ngaha ma, kà mana kafaw gel à ahənj kà lukut zlə ma? Akul nərəzəw madz à ahənj anja azlamawuratatay tsi: Tadəh sləray aw, ngaha tavavəd lukut babay aw. ²⁹ Tsa baməraka Salomon la mazləbay anja gesina kà, abəzà à lukut delga kiya mawuratatay

uwaga aw.*³⁰ Zəzagəla adəw lukut à azlakəsaf uwana à vok la fəta bay lakana, tekedika lebəŋ kà tadəyakats à akəl à abə: ŋgaha ma azlayla kà vok aduwa à akul à vok dafuwa aŋatə babay aw takay? Akul kà madiŋal gel à vok à tsəh kà akul ala.³¹ Kiya uwaga kà, kafəwla kà gəl à ahəŋ la mağofay: 'Mana mədəzuway lebəŋ mi? Mana mədəsəy mi? La mana mədəduw à vok mi?', kağofaw aw!³² Uwaga kà, azlauwana tasəl Zəzagəla aw, la uwana tayəh tatak uwaga koksikoksi. Ama Baba aŋkul uwana la zagəla kà, asəl tatak uwana kanawkuɖa aŋha.³³ Fəw gəl à ahəŋ dadəŋ teraŋa kà la makoray Zəzagəla, ŋgaha la madz à ahəŋ la sifa dziriga uwana la abanay anavay, ŋgaha Zəzagəla adəkəs akul à ahəl ala gesina uwana kayhaw.³⁴ Kiya uwaga kà kafəwla kà gəl à ahəŋ kà aŋa lebəŋ aw: Kà uwana lebəŋ uwaga kà, masla la uwana adəf gəl à ahəŋ kà akul, kà uwana ŋgərpa uwana apəhla vok ala kəla mavakay kà aŋa mavakay uwaga pəra."

7

Madəh seriya à azladza anik à gəl aw
(Luka 6.37-38,41-42)

¹ "Kadəhaw seriya à azladza anik à gəl aw, ŋgaha Zəzagəla aŋa madəhakulla seriya à gəl suwaŋ aw.² Kà uwana Zəzagəla adəɖahakulla seriya à gəl, kalkal bokuba uwana kadəhawwəŋ à azladza anik, adəzəbay daram uwana kazəbaw kağurawla azladza anik bay!³ Kà mana kanəzəy kəsaf uwana la yewdi aŋa deda aŋak la awtəy, ama kak kanəŋa mağol tsakuɖ tsakuɖ uwana la aŋak la awtəy aw ma?⁴ Kakay kağodiya à deda aŋak: Sək à gi, gəzəb à ka kəsaf uwaga la adi ala, tsa kak la mağol tsakuɖ tsakuɖ la yewdi ma?⁵ Kak masla mağolla dza, zəb tsakuɖ tsakuɖ uwaga la adi ala dadəŋ, ŋgaha kadənəŋla lela kà aŋa mazəb aŋa deda aŋak!"

⁶ "Kavəw tatak tsidəŋaga à azlakəda aw, kà aŋa mağolla à akul ala afaɖ à gəl kà makohəh akul ala aw, kafəw slərkodzka aŋkul à azlanamzi aw à huma à gay aŋa mahabəŋ ala aw."

Nəvəw ŋgaha tadəv akul
(Luka 11.9-13)

⁷ "Nəvəw ŋgaha kadəbəzawwal; yəhəw ŋgaha kadəbəzawwal, zələhəwəŋ ŋgaha tadəpəzl akul gamagəy.⁸ Kəla dza uwana anavay abəzal, dza uwana ayahay abəzal, ŋgaha dza apəzl gamagəy à dza uwana azalahay.⁹ Dza la ahəŋ la tataka aŋkul av akur à bəzi aŋha à baŋa anaval kà kaf takay?¹⁰ Awma avəl ma bebi à baŋa anaval kà kilfi ay?¹¹ Iyay, akul azlamawisiga nəma, ama kasəlaw mavəy tatak delga à azlabəza aŋkul, ŋgaha ma asa à mərəka Baba aŋkul uwana la zagəla ay? Aduwa à akul la mav tatak delga à azladza uwana tanaval tatak!"

¹² "Uwana asa à akul azladza anik tadəhakulaŋ kà, akul babay kà dəhawwəŋ kiya uwaga à azladza bay suwaŋ, kiya uwaga à uwana mapəhay aŋa Musa apəhay la azlawakitə aŋa azlaməna mapəh à atə gay à ahəl là abə kà mapahay à azladza."

Gamagəy slərkuts kutsga
(Luka 13.24)

¹³ "Gəw à gay la gamagəy slərkutskutsga! Kà uwana baŋŋaga uwanay kà, gamagəy butu gə, ama adala dza kà à mazila, azladza aŋuwaw la tetəvi uwatə la tsəh.¹⁴ Ama slərkutskutsga uwanay kà gamagəy zlazladəga, ama masla la uwana adala dza à sifa à abə, ama azladza kà dəŋ la tetəvi uwatə la ama aw!"

Masəl ahəf kà la mayyay aŋha la vok
(Luka 6.43-44)

¹⁵ "Dahəw haŋkəli kà azlaməna mapəh à atə gay à ahəl fida gə. Kà uwana tatsa à wan à slaka aŋkul la mapəhla vok aŋatə ala bokuba azlatuwaŋ, ama la huɖ gə kà azlakəda fəta.¹⁶ Kadəsəlaw atə kà la madəhəŋ aŋatə la vok. Tadəzl mayyay matavəruk la atə la vok aw, ŋgaha babay tadəzl gudəv la mazləb la vok aw.¹⁷ Ahəf delga avəy mayyay delga, ahəf mawisiga avəy mayyay mawisiga babay.¹⁸ Ahəf delga aslala vok aŋa mayyi mawisiga aw, ŋgaha ahəf mawisiga aslala vok aŋa mayyi delga aw.¹⁹ Kəla ahəf uwana ayyi delga aw kà, tahərats à ahəŋ, taduwal à akəl à tsəh.²⁰ La kitə babay kà, kadəsəlaw azlaməna mapəh à atə gay à ahəl figa gə la madəhəŋ aŋatə la abə gesina."

Gəsəl akul bə kà tetuwa aw
(Luka 13.25-27)

²¹ "Azlauwana, 'Sufəl, Sufəl!', tağof à gi, la uwana tadəda à makoray aŋa Zəzagəla gesin pəra aw, ama azlauwana tadəhəŋ tatak uwana asa à Baba gulo uwana la zagəla.

²² Mok uwana mavakay anja seriya adàzlanjalay, anjuvaw tadàgodf à gi 'Sufəl, Sufəl, la sləm anjak la uwana məzahà gay Zəzagəla à azladza, la sləm anjak la uwana məkudəkàh azlamasəfok mawisiga, la sləm anjak la uwana məfahàhà azlanadzipo anjuvaw aw uwa?' ²³ Kiya uwaga gədagodf à atà: Tetuwa gəsəl akul aw, zàw vok la slaka gulo, akul uwana kafahàw tsakana!"[✧]

Azlagày səla

(Luka 6.47-49)

²⁴ "Dza uwana atsəna gay uwana gəpəh, ngaha af uwaga à ahəj, masla kà kalkal la dza hanəkəli gə, uwana anjal gày anja à təhus à afik. ²⁵ Iyaw adzəkà masuway, ahənà à mukwà à afik, afad adəf la ndzəfa, ama gày akalàh à ahəj aw, kà uwana matatukway anja kà aga kà la təhus la afik. ²⁶ Ama kəla dza uwana atsəb sləm à gay uwanay gədapəhay la abanay, ngaha atsəna uwaga aw kà, gəgagazləla kà la dza kusoŋu gə, uwana anjal gày anja kà à wuyyan à afik. ²⁷ Iyaw adzəkà masuway, ahənà à mukwà à afik, afad adəf la ndzəfa, ngaha gày atəf à ahəj gərim, matəf à ahəj anja kà panàhhà."

Masley anja Yesu

²⁸ Mok uwana Yesu adakəf gəl à matapla gay anja à azladza kà, maham à ahəj dza gesina kà ləv aval à atà à gay, kà tsəhay matapla anja uwana atəpətala. ²⁹ Kà uwana masla kà atəpətala kà bokuba azlaməna mapəhla wakità seriya anjatà ala aw, ama apəhətala kà la maslay anja.

8

Yesu awurà masla akəl zagəla ala

(Mark 1.40-45; Luka 5.12-16)

¹ Mok uwana Yesu adasa à ahəj la gudəj la afik, maham à ahəj dza anjuvaw tanəfà masla. ² Kiya uwaga masla akəl zagəla anik, azà vok à slaka anja, akəfəf à huma anja la magodəy: "Məngga, banja asa à ka, kaslala vok mawur gi ala." ³ Yesu abiyà ahəl ala, adəbani, ngaha agodf: "Asa à gi, wūr ala." Katskats dza uwaga awur ala la akəl zagəla anja la abà. ⁴ Kiya uwaga Yesu agodf: "Tsənəj lela, kapəh uwaga à dza anik aw. Ama kəla kà, həd kadəpəhla vok anjak à masla mav tatak à Zəzagəla, ngaha babay kavà tatak uwana Musa apəh kà masəlay anja azladza gesina kà kawur ala!"

Yesu awurà magamza anja mənnga anja azlaslodzi ala

(Luka 7.1-10)

⁵ Mok uwana Yesu adada à Kapernahum à abà, mənnga anja azlaslodzi dzim anja azla Rom la abà, azà vok à slaka anja la magodəy: ⁶ "Məngga, magamza gulo la slaka mahən à ahəj la mtəga, masla maməts à afik gə sanja, ngaha as ngərpə mənnga mənnga." ⁷ Yesu agodf: "Gəda à awtəy, gədawurəj ala." ⁸ Ama mənnga anja azlaslodzi uwaga awulàlla, agodf: "Məngga, gəsəla kà kak anja mad à gày gulo aw. Ama pəh gay tekula la tsəh ala pəra kà, magamza gulo adəwur ala." ⁹ Gi bay kà, azlamənnga la ahəj lakəl gulo, ngaha gi babay, gi lakəl anja azlaslodzi anik suwan. Gəslala vok anja magodəy à tekula anjatà: 'Həd kà', aday. Gəgodf à anik aya: 'Sà à wan kà', atsa à wan; ngaha gəgodf à magamza: 'Dahà uwanay kà', adəhəj." ¹⁰ Mok uwana Yesu atsən gay uwaga, akəsəl à gəl kayakay, ngaha agodf à azlauwana tanəfay la tsəh: "Hadəy la dziriga gəgodf à akul kà: Didi gədanəj madinjal gəl à vok uwanay la tataka azla Isərayel la abà aw. ¹¹ Gəpəh à akul la dziriga kà, azladza anjuvaw tadàsa à wan la mas à afik afats la matəf à ahəj afats, ngaha tadədzah madzay la tatak may lakəl la azla Abərahəm, Isak, Yakuba la makoray Zəzagəla. ¹² Ama azlauwana naka tagay azlaanja makoray uwaga kà tadəuts atà à mələs à abà la uda, la abatà kà mapad slid la matuway adəgay la ahəj anja koksikoksi." ¹³ Kiya uwaga Yesu agodf à mənnga anja azlaslodzi: "Dà anjak à mtəga, uwana kanav la madinjal gəl à vok adəpaka à ka vok!" Ngaha magamza anja mənnga anja azlaslodzi awur ala la kaslə uwana: 'Dà anjak', Yesu agodf.

Yesu awar azlaməna dıvats ala anjuvaw

(Mark 1.29-34; Luka 4.38-41)

¹⁴ La abatà Yesu ahəd à mtəga Səmon Piyer. Abəz à mənjay anja Piyer à gəl, la slaka mahən à ahəj, akəl la vok. ¹⁵ Yesu adəbani la ahəl, ngaha akəl vok asəl à vok ala; asà à afik, adzəkà mazlak à atà.

¹⁶ Mok uwana mokokhu adasa à wan tasəhla azlaməna zagəla zagəla anjuvaw à Yesu à wan. La gay anja uwana apəh, Yesu akudəkàh azlazagəla zagəla gesina, ngaha la

mawar azlaməna dʒuvats anik anik gesina ala. ¹⁷ Adahəŋ kà aŋa magəɔf gay uwana à afik, masla mapəhal gay à ahəl Yesayya agodf:
 'Masla azəb maru vok à ahəŋ gami la dʒuvats gami gesina à gəl aŋha.'^{*}

*Azlawana tayəh manəf Yesu
 (Luka 9.57-62)*

¹⁸ Uwana Yesu anəŋəŋ kà maham à ahəŋ dza adahamal à adi, agodf à azlaməna matapla la slaka aŋha kà: "Məhəd à gay dərəv à uda anik." ¹⁹ Masla mapahla mapəhay ala anik, azà vok à slaka aŋha, agodf: "Məŋga, à kəla slaka uwana kadadəy kà, gədənəf ka." ²⁰ Yesu awuləlla: "Azlamayaka kà, afək aŋatà la ahəŋ, azladıyən babay gay aŋatà la ahəŋ, ama Kona aŋa dza kà, bə slaka mahən gəl à ahəŋ aŋha la ahəŋ kà maduw ləv aw." ²¹ Dza anik la tataka azlaməna matapla aŋha la abà, agodf: "Məŋga, v à gi tetəvi kà gi aŋa mal baba gulo dadəŋ." ²² Ama Yesu agodf: "Nəfà à gi, ŋgaha sàk azlamazimnekidf taləh vok aŋatà."

*Yesu atsizl kular à ahəŋ
 (Mark 4.35-41; Luka 8.22-25)*

²³ Yesu ahəd à kəslah iyaw à afik, azlaməna matapla la slaka aŋha tanəfəh. ²⁴ Katskats, magol kular məŋga atsizlla ala la gəl dərəv tsəràh à uwana magantsay aŋa iyaw azà kəslah ala. Ama Yesu kà, adatəɔf à madzəhal à abà la godega kəslah iyaw. ²⁵ Azlaməna matapla la slaka aŋha tazà à vok à slaka aŋha, tatsənəŋ ala la magodf: "Sufəl, təfà anu, maslā la uwaga məməts à gay!" ²⁶ Yesu awuləlla à atà ala: "Kà mana guba azà akul ma? Madiŋal gel à vok aŋkul kà matsihila gə." Ngaha atsizlla ala, asləl məl à kular à gəl, ŋgaha tsiriya, iyaw atsà à ahəŋ titi. ²⁷ Ləv avələh atà à gay gesina aŋatà, ŋgaha tagodf: "Təshay dza mana à uwanay à amiyaka kular la iyaw lakəl babay kà atsəna gay aŋha la?"

*Yesu awara azladza səla uwana ala atà la masasəɔfok mawisiga
 (Mark 5.1-20; Luka 8.26-39)*

²⁸ Mok uwana Yesu adabəz à gay dərəv à uda anik, la kutso aŋa azla Gadareniya la abà kà, azladza səla tasà à waŋ kà magagamay la masla, azladza uwatà kà tasà à lag kà la zəvay la aku, atà la azlamasəɔfok zagəla zagəla lakəl, azlamaksafər, bə dza bay kà aslala vok aŋa maguw à awtəy la tetəvi uwatà aw. ²⁹ Tadzəka mawiyay: "Kona aŋa Zəzagəla, ma kawoyəŋ la slaka gami ma? Kasà à abanay kà mazàh anu ala, tsa kaslā adəslay dadəŋ aw takay?" ³⁰ Maham à ahəŋ namzi la ahəŋ la abatà la gay anik, tayəh huɔf aŋatà à gay. ³¹ Azlamasəɔfok mawisiga tadəv kuɔf à Yesu la kiya uwanay, tagodf: "Baŋa asa à ka makudək anu kà, sləl anu à azlanamzi à awtəy à gəl zla!" ³² "Dəw!" Yesu agodf à atà. Kiya uwaga tasà à azladza səla uwaga lakəl ala, ŋgaha tahəd à azlanamzi uwatà à gəl. Katskats maham à ahəŋ namzi ahəy à ahəŋ la madəguruh la afik, tatsəh gəl à iyaw à abà, tasufəh à abà. ³³ Azlaməna manəŋla azlanamzi tahəy aŋatà à huɔf gudəŋ à abà, ŋgaha tadzəkà mapəh à azladza à gay aŋa tatak uwaga apakà vok gesina, lakəl aŋa azladza səla uwaga la masasəɔfok mawisiga. ³⁴ Kiya uwaga azlaməna gudəŋ uwatà gesina tasà à uda kà mad à slaka Yesu. Mok uwana tanəŋəŋ kà, tadəval kuɔf kà maz à vok la kutso aŋatà la abà.

9

*Yesu awurà dza makaləh à vədəh gə ala
 (Mark 2.1-12; Luka 5.17-26)*

¹ La lig aŋa uwaga la ahəŋ kà, Yesu ahəd à kəslah iyaw à afik, aguwà à uda la dərəv la abà, ŋgaha ahəd à huɔf gudəŋ aŋha à abà. ² La abatà tasəlla à waŋ dza makaləh à vədəh gə la kəslah. Mok uwana Yesu anəŋəŋ madiŋal gəl à vok aŋatà, agodf à dza makaləh à vədəh gə uwaga: "Wəɔf vok à uda bəzi gulo! Tsakana aŋak adamatsila!" ³ Kiya uwana azlaməna mapəhla wakitə seriya ala taŋəŋuz la tataka aŋatà la abà, tagodf: "Dza uwanay kà, apəh mawisiga lakəl aŋa Zəzagəla, ndzer." ⁴ Yesu asəl madzugway aŋatà, ŋgaha agodf à atà: "Kà mana aku la madzugway mawisiga kiya uwanay dza? ⁵ Tak ma ŋuləm magodfay: Tsakana aŋak adamatsila, awma: Sà à afik, həd aŋak takay?! ⁶ Ama asa à gi kasəlaw, kà Kona aŋa dza la maslay la gudəŋ uwanay la vok kà mamats tsakana aŋa azladza ala." Kiya uwaga agodf à dza makaləh à vədəh gə uwaga: "Sà à afik, zəb kəslah aŋak, kadà aŋak à mtəgal!" ⁷ Zil uwaga asà à afik ahəd aŋha à mtəga. ⁸ Mok uwana maham à ahəŋ dza adanəŋ uwaga kà, ləv avəl atà à gay kaykay, ŋgaha tazləbà Zəzagəla kà ndzəɔfa uwaga avà à azladza.

* 8:17 8.17 Yesayya 53.4

*Yesu azal Mata**(Mark 2.13-17; Luka 5.27-32)*

⁹ Yesu atsizlla ala la abata, mok uwana aday kerkor ka aneha dza anik uwana slom anha Mata la gay mazeb hadama la aku, agodal: "Nefa a gi!". Mata asa a afik anefa masla.

¹⁰ Mok uwana Yesu adadza a tatak may a adi la mtoga Mata la azlamona matapla la slaka anha ka, azlamona mazeb hadama, la azladza uwana tetovi anata delga aw, la azlamona tsakana tasaa wan, tadzah a tatak may a gel ata nna. ¹¹ Uwana azla Farisoya taneh uwaga, tagod a azlamona matapla la slaka anha: "Ka mana monga ankul azuw tatak may la azlamona mazeb hadama la azladza uwana tetovi anata ka delga aw ma?"

¹² Uwana Yesu atsena uwaga ka, agod a ata: "Azladza uwana duvats az ata aw ka, tayah dokwtar aw, say azlamona duvats la uwana tayahay para. ¹³ Daw, katapawla uwana matsetseray ga la wakita la aba:

'Gowoyan ka dziriga, awka makad a gi tatak aw'*

ka uwana gesa a wan ka mayahay ka azladza uwana: 'Anu azladziriga' tagod aw, ama azlauwana: 'Anu azlamona tsakana', tagod."

*Manavay lakel anja makos nelay**(Mark 2.18-22; Luka 5.33-39)*

¹⁴ Azlamona matapla la slaka Yuhana masla madah batem taza a vok a slaka Yesu, ngaha tagodal: "Ka mana anu la azla Farisoya ka moksah nelay, tsa azlamona matapla la slaka anjak ka takasah nelay aw ma?" ¹⁵ Yesu awulla ata ala: "Kadzugwaw ma azladza uwana tazala ata a mazeb vok a aba, takos nelay, la kasla uwana masla mazeb mis la tataka anata la aba takay? Awan! Ama kasla adasa a wan a uwana masla mazeb mis adagay la tataka anata la aba aya aw ka, la mok uwaga la uwana tadakos nelay suwan."

¹⁶ "Dza aslala vok anja matsap a lukut maviyaga a lukut mawga a vok aw, ka uwana lukut mawga uwaga adakwoh maviyaga uwaga a tsah kayak aya. ¹⁷ Ngaha babay ka, tadaw iyaw matavruk mawga a kiwa iyaw maviyaga a agu aw, ka uwana iyaw matavruk mawga adaslak kiwa iyaw maviyaga ala, say tadaw iyaw matavruk mawga ka a kiwa iyaw mawga a agu suwan, ngaha kiwa iyaw anja makos iyaw matavruk uwaga lela."

*Dugu anja Yayrus ata la mis uwana adobani lukut anja Yesu**(Mark 5.21-43; Luka 8.40-56)*

¹⁸ Mok uwana Yesu apoh a ata gay uwaga, monga anik la tataka azla Yahudiya la aba asa a wan, akoded a Yesu a huma la magodal: "Dugu gulo adametsay ba lagonay, sa a wan, bokal ahah anjak a vok, ngaha adadza a ahon la sifa aya!" ¹⁹ Yesu asa a afik tanefa ata la azlamona matapla la slaka anha.

²⁰ Mis anik la ahon aniz akelal a tsah ala, dagay mavay kulo gel anha sela, agoba a awtay la lig anja Yesu adobani gay lukut anha. ²¹ Ka uwana agod la gel anha ka: 'Bana godobani ba gay lukut anha para ka, godayur ala.' ²² Yesu agola vok anehal a adi, agodal: "Wad vok a uda dugu gulo, ka uwana madinal gel a vok anjak awur ka ala", ba la kasla uwata, mis uwaga awur ala.

²³ Uwana Yesu abeh a mtoga ana monga uwata, aneha azlamona mats segela, la azlamona mataway gesina ²⁴ ngaha agod a ata: "Daw a uda, dugu ka adametsay aw, adzahal para." "Uwaa...", takodaslal. ²⁵ Uwana takudakah maham a ahon dza a uda ka, Yesu ahad a gay uwata a agu, akos bezi dugu la ahah, atsenan ala ngaha asa a afik. ²⁶ Gay uwata atsan la kutso uwata la aba gesina.

Yesu awara azlagulof sela ala

²⁷ Yesu atsizlla ala la abata ada anha, uwana ada anha ka, azlagulof sela tanefa la tseh la mawiyay: "Kona anja David, Kona anja David, vok ahama ka ka anu!" ²⁸ Mok uwana Yesu adabeh a mtoga ka, azlagulof sela uwaga taza a vok a slaka anha, ngaha agod a ata: "Kadinawwal gel a vok ka goslala vok gedah uwaga ay?" "Iyay, monga gami, madinal gel a vok ka kak la ndzoda." ²⁹ Kiya uwaga Yesu adobani yewdi anata la magod a ata: "Delga, uwaga akos aku la vok bokuba uwana kadinawal gel a vok."

³⁰ Ngaha yewdi anata apazlla a ama ala adagay. Yesu afaha a ata akur a lig, agod a ata: "Tsanawwanj lela, kapohaw uwaga a dza anik aw." ³¹ Ama tahad, tazaha tatak uwana Yesu adahatanj la kutso uwata la aba gesina.

Yesu awura bada uwana ala zagala zagala lakel

³² Mok uwana Yesu adatsizlla ala adiy anja kà, tasèlla dza anik uwana à wanj, aslala vok kà mabafma aw, ngaha aya kà, aga la masasəfok mawisiga. ³³ Uwana Yesu adakudək masasəfok uwaga kà, dza badaga uwaga adzəkà mabafma. Ləv avàläh à maham à ahəj dza à gay gesina, ngaha tagòf: “Didi, didi mədanəj dzəba gə uwana la Isərayel aw!” ³⁴ Ama azla Farisəya tagòf kà: “Sufəl anja azlamasəfok mawisiga la uwana avəl maslay kà makudəkàh azlamasəfok mawisiga uwaga!”

Vok aham à Yesu kà maham à ahəj dza

³⁵ Yesu auguzàhàh la azlahud gudəj la abà, la azlabəza gudəj gesina, atapàhàtala la azlagəy madəv kuɖa anjətà la aku, azà gay marabəj anja makoray Zəzagəla, la mawar azlaməna dıvats ala gesina, amiyaka tsəhay gə uwala beyli, ngaha la azlaməna takàläh à vədah gesina. ³⁶ Vok ahamà à Yesu kà maham à ahəj dza uwana tayahay, kà uwana azladza uwatà tayàh vok adagay, ngaha bokuba azlatuwəj uwana masla manəjla atà la ahəj aw. ³⁷ Kiya uwaga agòf à azlaməna matapla la slaka anja: “Matsəf tatak la ahəj mənəgə, ama azlaməna sləray kà atà dəj aw. ³⁸ Kiya uwaga kà: Dəvəw kuɖa à dza anja tatak, kà masla anja masləl azlaməna sləray à wanj kà matsəfal tatak anja!”

10

Azlaməna matapla kulo gəl anja səla
(Mark 3.13-19; Luka 6.12-16)

¹ Yesu azàl azlaməna matapla la slaka anja kulo gəl anja səla uwatà, ngaha avà à atà ndzəɖà à ahəl kà makudəkàh azlamasəfok mawisiga la mawar azlatsəhay dıvats anik anik ala, ngaha la azlauwana takàläh à vədah gesina. ² Aganay sləm anja azlaməna matapla kulo gəl anja səla uwatà la slaka Yesu. Teraña dadəj kà Səmon uwana tazàllala Piyer; atà la deda anja Andəre; Yakuba bəzi anja Zebede atà la deda anja Yuhana; ³ Filip atà la Barlelemi; Tomas atà la Mata, masla mazəb hadama; Yakuba, kona anja Alfe atà la Tade; ⁴ Səmon uwana tazàlal ala Zəlot atà la Yudas Iskariyot, masla uwana adàta kaf à Yesu à gəl.

Yesu asləl azlaməna matapla kulo gəl anja səla uwaga
(Mark 6.7-13; Luka 9.1-6)

⁵ Yesu asləl azlaməna matapla kulo gəl anja səla uwaga la mapəh à atà gay uwanay à vok à abà: “Gudəj uwana azla Yahudiya tadza à ahəj la abà aw kà, kadaw à abà aw, kadaw à gudəj anja Samariya à abà babay aw. ⁶ Ama dāw kà à tataka azlatuwəj mazelhla à abà la tsəhay Isərayel pəra. ⁷ La tetəvi anjul la ama kà, zāw sayda, gòɖāw kà: ‘Makoray Zəzagəla kà nekwa atsa à wanj.’ ⁸ Wārāw azlaməna dıvats ala, wālāwla azlamazimnekid à uda, wārāw azlaməna akəl zagəla ala, kuɖəkàhāw azlamasəfok mawisiga. Kabəzaw à uwaga kà deyday, vāw à atà deyday suwanj. ⁹ Kazəbaw luwāluwā à ahəl banjaw gursu, banjaw sili la zliba la aku aw. ¹⁰ Amiyaka kiwa, amiyaka matsəp lukut, amiyaka kwimik, bā amiyaka agəla kà anja mauguzahay anjul aw. Kà uwana azlayla kà vok, kà masla sləray kà azlayla vok azuw tatak may!”

¹¹ “Mok uwana kadəbəzaw azlaməj gudəj à abà banjaw azlabəza gudəj à abà, yàhāw kà dza uwana akəs akul la ahəl səla, ngaha dzāw à ahəj la mtəga anja tsərəh à uwana katsaw à uda la gudəj uwatà la abà. ¹² Mok uwana kadaw à gāy, gòɖāw dadəj terañja kà: ‘Lapiya agay la akul.’ ¹³ Banja azlaməna huɖ gāy uwatà takəs akul la ahəl səla kà, ‘Ayyi’ anja lapiya anjul uwana kadāhāw wātəj kà, adza à ahəj lakəl anjətà, ama banja takəs akul aw kà, wūllāw ‘Ayyi’ anja lapiya anjul à tsəh la slaka anjətà. ¹⁴ Banja la huɖ gāy anik banjaw la gudəj anik la abà, takweska akul anja makəs akul banjaw anja matsəb akul sləm kà, dāw anjul la abatà, dēdāw à atà à adi burburu anja kutso anja gudəj anjətà uwana agəɖ à akul à asik. ¹⁵ La dziriga gəpəh à akul: La vuɖ seriya kà njułəm kà anja azlaməna gudəj Sodom la Gomor kà azlaməna gudəj uwaga.”

Azlamətərbəy uwana tadāsa à wanj la huma à gay
(Mark 13.9-13; Luka 21.12-17)

¹⁶ “Lagwa kà, aganay gosləl akul bokuba akul azlatuwəj, à tataka azlakəda fəta à abà. Kiya uwaga kà, gāw mahanay gə bokuba azlabebi, gəgòɖ à akul, ngaha gāw tələmma bokuba akul azlahabakoku. ¹⁷ Dāhāw hanjəli kà uwana azladza tadəɖahla akul à huma seriya, ngaha tadəzlabəh akul la kurpi la gāy madəv kuɖa anjətà la aku. ¹⁸ Tadəpahla akul ala la huma anja azlaməna makoray ngaha la huma anja azlasufəl, kà uwana kawoyəw gi, kà akul anja maz sayda gulo la huma anjətà, ngaha la huma anja azlauwana azla Yahudiya aw. ¹⁹ Mok uwana tadədala akul à huma seriya kà, kadədzugaw lakəl anja uwana kadəpəhaw aw, la uwana kadəwulawla à uda, gay uwana kadəwulawla à uda kà, adàda à panjaw anjul à awtəy la kaslə uwatà. ²⁰ Gay uwaga kà adəgay kà

madzugway ankul aw, ama Masasəfok anja Baba ankul Zəzagəla la uwana adəguway la akul la abà la kaslà uwatà.”

²¹ “Deda adàvə deda anja aslasl gəl anja kà makəfay, baba bay adəfəhən kiya uwaga la bəzi anja; azlabəza babay tadəgola afad' à azlababa anjatà à gəl kà makəf atà. ²² Azladza gesina tadəpəsew akul kà uwana kawoyaw gi. Ama dza uwana adəgəf dziriga à afik tsərəh à makəf gəl à ahən kà adəbəlay. ²³ Banja tatərəb akul la gudən anik la abà, hōyàw à huɸ gudən anik à abà. La dziriga gəpəh à akul: Kadədəvaw mauguzahay à gay la gudən İsrəyel gesina dadən kà mas à wən anja Kona anja Zəzagəla aw.”

²⁴ “Masla asik aduw mənğa anja tetuwa aw, magamza aduw dza uwana adəhalla sləray aw. ²⁵ Say aslay kà masla asik apakay bokuba mənğa anja la masəlay dən, nğaha magamza agay bokuba mənğa anja dən. Banja tazàla à zil gəy Belzəbul kà, sləm uwana tadàv à azlaməna huɸ gəy kà adəgay delga aw adəfuwa à gay anja zil gəy la mawisiga.”

Dza uwana azlayla vok məhoy guba anja
(Luka 12.2-7)

²⁶ “Guba akəs akul kà azladza asik zlà ma aw. Tatak mahad' à ahən gə gesina adəgay mapəhla vok ala gə, nğaha tatak nasiri gə gesina adəgay masəlay gə la dazuwaya. ²⁷ Kəla tatak uwana gəpəhakulla la mələs la abà, pəhəw uwaga la ufaka ala; nğaha tatak uwana katsənawwanj la à gəl à gəl kà, dəw kà wiyawla la gay zən. ²⁸ Guba akəs akul kà azlauwana takəf sləb vok aw, kà uwana taslala vok anja makəf dokvadzi anja sifa aw, guba akəs akul kà, kà Zəzagəla uwana aslala vok anja maduw dokvadzi la sifa la sləb vok gesina à gəy akəl à abà. ²⁹ Taslala vok anja maduw dəgtsetsek səla ala kà anja sili tekula aw takay? Amiyaka tekula anjatà azila la masəlay anja Baba aw kà aga la ahən aw. ³⁰ Amiyaka anidz takasagəl ankul gesina kà, Zəzagəla asəl la tekula tekula gesina anja. ³¹ Tsa kità kà, guba akəs akul aw, kà uwana akul kaduwaw azladəgtsetsek uwaga gesina la manən akul à adi.”

Mapəhla Yesu ala
(Luka 12.8-9)

³² “Banja dza apəhla gi ala la huma azladza la dazuwaya kà, gi babay gədəpəhla masla ala la huma anja Baba gulo, uwana la zagəla la afik: Masla kà anjulo, gədəgəfay. ³³ Ama banja dza agəfən à afik kà asəl gi aw la dazuwaya la huma azladza kà, gi babay gədəgəfən à afik la dazuwaya la huma Baba gulo kà: Gəsəl masla aw, gədəgəfay bay, suwanj.”

Lapiya aw ama mavəhla
(Luka 12.51-53)

³⁴ “Iyay, kadzugwaw kà lapiya la uwana gəsəlla à gudən à vok, kagəfaw aw: Gəsəlla lapiya à wən aw ama mavəhla. ³⁵ Gəsà à wən kà masəh gəl à azlabəza zil gə à vok la azlababa anjatà, azladəgam à vok la azlaiyà anjatà, nğaha azlamis à vok la azladzedzi anjatà. ³⁶ Mazan vok à gəl adəgay la tataka azlaməna huɸ gəy la abà.”

³⁷ “Dza uwana awoya baba anja banjəw iyə anja kà gi kaykay kà, akəs gi vok aw, dza uwana awoya bəzi anja zilga banjəw dugu anja gə kaykay kà gi kà, akəs gi vok aw. ³⁸ Dza uwana akəs maməts à ahəf à adi anja, nğaha anəf gi aw kà, masla akəs gi vok aw. ³⁹ Kəla dza uwana asal matuw sifa anja, adəzinj ala; ama dza uwana atuw sifa anja aw kà gi kà, adəbəzal.”

Dza uwana akəs akul kà, akəs gi
(Mark 9.41)

⁴⁰ “Dza uwana akəs akul kà, akəs gi babay, nğaha dza uwana akəs gi, akəs dza uwana asləl gi à wən babay. ⁴¹ Dza uwana akəs masla mapəhal gay à ahəl anja Zəzagəla, à kà uwana masla mapəhal gay à ahəl anja kà, adəbəz masik uwana maf à ahən gə kà anja azlaməna mapəh à atə gay à ahəl, nğaha dza uwana akəs dza dziriga la huma anja Zəzagəla, kà uwana masla dziriga la huma anja, adəbəz masik uwana maf à ahən gə kà anja azladza dziriga. ⁴² Haday, gəpəh à akul la dziriga: Kəla dza uwana atəf iyaw mataslay gə à tekula la tataka azlabəza uwanay la abà, à kà uwana masla mataplə la slaka gulo kà, adəbəz masik anja.”

11

Manavay anja Yuhana masla madəh batem
(Luka 7.18-35)

¹ Mok uwana Yesu adadəv mapəhla à tatak azlaməna matapla la slaka anja kulo gəl anja səla uwaga, atsizlla ala la slaka uwatà kà mad matapla tatak à azladza la azlahud gudəŋ la kutso uwatà la abà.

² Mok uwatà kà Yuhana masla madàh batem kà, agà la danj. Uwana atsənà gay anja sləray anja Yesu Kristu, sləl azlaməna matapla azlaanik anja à slaka Yesu ³ kà manavay à gay ala: “Kak dza uwana məkuday awmà kak dza anik kəla ay?” ⁴ Yesu agòf à atà: “Daw, kadəpəhaw Yuhana à tatak uwana katsənàwwəŋ la uwana kanəŋəwwəŋ gesina: ⁵ Azlaguləf tanəŋla, azladeri taday, azlaməna akəl zagəla tawarla, azlamadagazlam bay tatsən sləm, azlamazimnekid tawal à uda, azlaməna kuɗa babay tatsən gay marabay.” ⁶ Marabay agay la azladza uwana tasak à madin gi gəl à vok aw.”

Sayda lakəl anja Yuhana masla madàh batem

⁷ Mok uwana azlaməna matapla anja Yuhana tadiy anjatà, Yesu adzəkà mapəhay à maham à ahəŋ dza lakəl anja Yuhana la magoɗay: “Mana à uwana kadaw kà mayahay la kəsaf la abà ma, mazuwa uwana afad abəlakəŋ ay? Awanj, uwaga aw. ⁸ Kətà zla, mana kadaw kà anja manəŋəŋ ma? Awma dza uwana atsəkəw à lukut mahəɗayga à abà kəla ay? Ama azlauwana tatsəkəwəh à lukut mahəɗayga à abà kà, atà kà la huɗ gay sufəl. ⁹ Mana kadaw kà anja manəŋəŋ ma? Masla mapəhal gay à ahəl anja Zəzagəla kəla ay? La kità kà, gəgòf à akul kà, Yuhana aduwa masla mapəhal gay à ahəl, ¹⁰ kà uwana tatsətsər lakəl anja:

'Aganay, gəsəl à awtəy masləlay gulo à huma anjak'
Zəzagəla agòf,

'Kà madàh tetəvi à ahəŋ.'^{*}

¹¹ La dziriga gəpəh à akul: La tataka azladza asik la abà kà, dza mayyayga la ahəŋ aduwa Yuhana masla madàh batem uwanay aw, tekeɗika, dza uwana mabəziga bəziga la makoray Zəzagəla kà, aduwa Yuhana uwaga. ¹² Dagay la mok uwana Yuhana masla madàh batem azà sayda tsərəh à lakana, kà tadàh gasa à makoray Zəzagəla à gəl, ngaha azlaməna məzam tayahay kà mazəbay lakana. ¹³ Azlaməna mapəh à atà gay à ahəl gesina la mapəhay anja Musa tapəh gay lakəl anja makoray Zəzagəla tsərəh à mas à wan anja Yuhana, masla madàh batem. ¹⁴ Banja asa à akul kà madin gi gəl à vok kà, Yuhana kà Eliya uwana wakitə apəhla mas à wan anja ala dagay uwarà. ¹⁵ Dza uwana sləm lakəl kà, atsəbal sləm lelə!”

¹⁶ Yesu agòf aya: “Ma la mana lagwa gəgəgazləla azladza anja zamana uwanay lakana ma? Gəgəgazləla atà la azlabəza uwana tadzàh madzay la vadavaday kasukwa la afik, tazlələh vok kà atà kà atà, ¹⁷ la magoɗay, anu mətsà à akul talakway, ama akul kahà-bəwwal à tsəh aw, məhàb à akul dəs kuɗa, ama katəwəw la mats hulolo aw. ¹⁸ La kità Yuhana asà à wan, azuww aw, asà aw, ngaha azladza tagòf kà: ‘Masla la masasəɗok mawisiga.’ ¹⁹ Kità aya babay kà, Kona anja dza asà à wan, azuway, asay, ngaha azladza tagòf kà: ‘Nərəzəw dza uwanay tsi, masla huɗ. Afa sləm à kà à mazuway la masay anja pəra’, tagòf. ‘Kafaw masla kà à tataka anja azlaməna mazəb hadama à abà, la azlaməna tsakana, ngaha la azladza uwana madz à ahəŋ anjatà kà lela aw.’ Ama tekeɗika matsihila anja Zəzagəla apəhla vok ala la sləray anja la abà.”

Gudəŋ uwana akweska makəs Yesu

(Luka 10.13-15)

²⁰ Kiya uwaga Yesu adzəkà masläh məl à azlagudəŋ uwana à gəl, adəhàhà azlanadzipo kaykay gə la abà, kà uwana azlaməna madz à ahəŋ la abà kà tapəh gay la ləv ala aw. ²¹ Agòf: “Ngərpa lakəl anjak à kak Korazən! Ngərpa lakəl anjak à kak Betsayda! Kà uwana agay nadzipo uwana adəhà à ahəŋ la tataka ankul la abà, agay kà la gudəŋ Tir la Sədon kà, naka dagay uwarà azlaməna madz à ahəŋ la abà kà, tatsəh kutso akəl à vok ngaha la madaw abuh à vok, kà mapəhla ala kà atà tapəh gay la ləv ala.” ²² Kà uwaga à uwana gəgòf à akul kà: La vuɗ seriya kà, seriya uwana adəbəz azlaməna gudəŋ Tir, la azlaməna gudəŋ Sədon kà njułəm kà anjatà à kà anja gudəŋ ankul. ²³ Ngaha kak Kapernahum kadzugw kà: ‘Gəɗəzigəŋay tsərəh à zagəla,’ kagòf takay? Awanj, tadəɗukwa kà à vəɗəh à gay akəl à abà, kà uwana azlanadzipo uwana adəhàhəŋ la kak la abà, agay la Sədom kà, naka gudəŋ uwatà kà agay la ahəŋ tsərəh à lakana. ²⁴ Kiya uwaga kà, gəpəh à akul kà la vuɗ seriya kà, azlaməna Sədom tadəgay njułəm kà kak.”

Saw à wanj à slaka gulo, kà akul anja mabəz maduw ləv

(Luka 10.21-22)

^{*} 11:5 11.5 Yesayya 35.5-6; 61.1 ^{*} 11:10 11.10 Malaki 3.1 ^{*} 11:21 11.21 Yesayya 23.1-18; Hezəkijel 26.1-28.26

²⁵ La mok uwatà Yesu agòd: “Iyay Baba, Sufəl ana zagəla ngaha aña vədah, ‘Kikay’, gəgod fə ka, kà uwana kafatəla à azlabezaga la à ama ala tatak nasiri gə uwana kahād à azlaməna masəl tatak uwana à adi, ‘Mədawur gəl’, tagòd. ²⁶ Iyay, Baba gəzləb ka kà uwaga.”

²⁷ “Baba gulo abək à gi tatak gesina. Dza la ahənj asəl Kona aw, say Baba pəra asəl gi, dza la ahənj asəl Baba aw, say gi Kona aňha pəra, ngaha la azlauwana Kona apəhatəla Baba aňha pəra.”

Mazalay aña Yesu

²⁸ “Saw à wanj à slaka gulo akul gesina, akul uwana kayaw vok la mazəb mahanay, gədavà à akul maduw ləv. ²⁹ Zəbaw zelənj zukw kuda gulo, ngaha kəsaw matapla gulo, kà uwana gi kà gi dzanjdzanj aw, gi tələmma, ngaha kadàbəzaw maduw ləv aña ləv aňkul.* ³⁰ Kà uwana zukw kuda uwana asa à gi mav à akul kà zlazladza kà mazəbay aw, mahanay uwana gədafa à akul à gəl babay kà tsafsaf.”

12

Gay lakəl aña vuđ maduw ləv (Mark 2.23-28; Luka 6.1-5)

¹ Mok uwana uwaga adadà à lig kà, Yesu la azlaməna matapla la slaka aňha tagùw à uda la guf nalkama la abà, (uwana bokuba hi), la vuđ maduw ləv. Azlaməna matapla la slaka aňha uwaga kà may akəs atà, tadzəka makalay kà mazuway. ² Uwana azla Farisəya tanənjə uwaga kaf, tagòd à Yesu: “Nerəz, azlaməna matapla la slaka aňak tadəh tatak uwana mapəhay gami avərə gay kà madəhənj la vuđ maduw ləv tsi!” ³ Yesu awùlla atà ala: “Kadzənjaw à tatak uwana David adafahənj vərđi anik la mok uwana may akəs la azlaməna aňha aw uwà? ⁴ Ahàd à gày Zəzagəla à agu, kà mazəb tatak may tsikaslağa uwana maf à ahənj gə. Tekedika tetəvi la ahənj kà mazuway aňha aw, baməraka azlamənalay aňha babay aw, say à azlaməna mav tatak à Zəzagəla pəra, la uwana tetəvi la ahənj.* ⁵ Awma kadzənjaw la mapəhay aña Musa la abà kà, azlaməna mav tatak à Zəzagəla tadəh sləray la gày Zəzagəla la aku amiyaka la vuđ maduw ləv, ngaha tatugw mawisiga lakəl aňatà aw kà, kasəlaw aw takay?* ⁶ La dziriga gəpəh à akul kà, dza uwana aduwa mənj gày Zəzagəla uwaga kà aga la abanay. ⁷ Agaynja kasəlaw, uwana matsetseray uwanay asal magodəy kà: ‘Vok mahamay la uwana asa à agi, awkà tatak makadəy gə aw’,* naka kadükwəw seriya à azladza uwana à gəl, atà kokudə tsakana aw. ⁸ Kà uwana Kona aña dza kà masla la uwana mənğa aña vuđ maduw ləv.”

Dza la ahəl mamətsay gə (Mark 3.1-6; Luka 6.6-11)

⁹ Yesu atsižilla ala la abatà, azà à vok, ahàd à gày madəv kuđa aňatà à agu. ¹⁰ Dza anik la ahənj la abatà, uwana agə la ahəl mamətsayga. Azladza uwana la gày uwatà la aku tanavà à Yesu: “Mapəhay gami ma avà tetəvi kà mawur dza ala, la vuđ maduw ləv takay?”, kà atà aña maβəzal à tsəh kà mapuwal gudzi à gəl. ¹¹ Ama Yesu awùlla atà ala: “Baňa dza la ahənj la tataka aňkul la abà la tuwanj tekula pəra, ngaha tuwanj uwaga atəd à suwa à abà la vuđ maduw ləv, ma aday kà mazəb à uda la abà aw takay? ¹² Ngaha dza ndzer, ma aduwa tuwanj aw takay? Kà uwaga à uwana mapəhay gami avà tetəvi à dza kà madəh delga la vuđ maduw ləv.” ¹³ Kiya uwaga Yesu agòd à dza uwatà: “Biyə ahəl ala!” Abiyə ahəl ala, ngaha ahəl aňha adawurla bokuba anik uwahà. ¹⁴ Azla Farisəya tadə aňatà, takəs sawaray kà maβəz tetəvi kà makədla Yesu.

Masla sləray uwana Zəzagəla akəsani

¹⁵ Mok uwana Yesu atsnə uwaga kà, asà à uda la slaka uwatà la abà, ngaha maham à ahənj dza aňuwaw tanəfə. Awarə azlaməna dıvats ala gesina. ¹⁶ Ama afah à atà akur à lig la ndzəda kà atà aña mapəh uwana apakà vok aw. ¹⁷ Adafahənj kiya uwanay kà, kà gay aña masla mapəhal gay à ahəl Yesayya aña magəd à afik. ¹⁸ Zəzagəla agòd: ‘A aganay masla sləray gulo uwana gəkəsani,

Uwana gəwoyənj ngaha marabay gulo lakəl aňha.

Gədəsləl Masasədok gulo à gəl aňha,

Ngaha adəz gay seriya gulo à azlatsəhay gudənj à vok gesina.

¹⁹ Masla adəgazlay la dza aw, adəwiyyay aw,

Ngaha dza adətsən mawiyay aňha la azlatetəvi la ama aw.

²⁰ Adədavla à gay à mazuwa manəlfahayga à vok aw,

Ngaha akàl fənəs uwana atəm à ahəj ɲuliza bay kà, adàdøvla à gay à vok aw.

Masla adàdz à ahəj kiya uwanay tsərəh à madàh dziriga à gudəj à vok gesina.

²¹ Azlatsəhay gudəj à vok gesina tadàf manəwəj anjata à masla à afik',^{*}
agòd aya.

Mapəh mawisiga lakəl anja Masasəđok tsikasлага

(Mark 3.22-30; Luka 11.14-23)

²² Kiya uwaga la abata tasələ dza à Yesu à waɲ, guləf badaga, la masasəđok mawisiga lakəl. Yesu awurà dza uwatà ala tsərəh à uwana dza aslala vok anja mabadma, ɲgaha la manəɲla. ²³ Ləv avàläh à maham à ahəj dza à gay gesina, ɲgaha tagòd: "Masla kà Kona anja David tēga aw ay?" ²⁴ Ama uwana azla Farisəya tatsənà uwaga kà, tagòd: "Kona uwaga akudəkahay azlamasəđok mawisiga kà, kà uwana Belzəbul, sufəl anja seteni avàl ndzəfa kà makudəkähla." ²⁵ Ama Yesu asəl madzugway anjata ɲgaha agòd à atà: "Baɲa azladza gudəj tekula tatsàkla, ɲgaha guvəl la tataka anjata la abà, makoray anja gudəj uwatà kà azila. Huf gudəj, baɲaw huf gày, uwana tap guvəl la tataka anjata la abà, aslala vok anja madz à ahəj aw. ²⁶ Baɲa seteni akudək seteni, masla la gəl anja adatsakla, ma kakay à makoray anja adàdza à ahəj ma? ²⁷ Iyay, akul kadzugwaw kà Belzəbul la uwana avà à gi ndzəfa kà makudəkäh azlamasəđok mawisiga uwaga, kagòdaw. Kità ma, uwa adav ndzəfa à azlabəza ankul kà makudəkahay uwa? Kà uwaga à uwana tadəgah azlaməna seriya ankul. ²⁸ Ama tsa baɲa la Masasəđok Zəzagəla la uwana gəkudəkäh azlamasəđok mawisiga uwanay kà, tsa kətà kà, gòdāw kà makoray anja Zəzagəla kà adabəz akul à vok lakana, gòdāw zla."

²⁹ "Dza la ahəj ad à gày la mtəga anja dza ndzəfa-ndzədaga kà mad à gəl aw, say atsà à vok à abà, akəs dza uwaga, awadəj dāɲ, ɲgaha la lig la ahəj aslala vok anja mazuw gày anja à gay."

³⁰ "Dza uwana anu səla aw kà, masla məzam gulo. ɲgaha babay kà dza uwana azlak gi kà maham ala gay à vok aw kà, masla kà masla madàdasin ala. ³¹ Kà uwaga gəgòd à akul haday kà: Maham à ahəj tsakana la azlagay mawisiga anja azladza gesina kà agay mamatsila gə, ama kəla kà, dza uwana apəh mawisiga la matsək magòdahay à Masasəđok Zəzagəla à gəl kà, masla kà, abəz mamatsila anja tsakana aw. ³² Kəla dza uwana apəh mawisiga lakəl anja Kona anja dza adàmatsalarɲ ala, ama kəla dza uwana agòdāh à Masasəđok Zəzagəla kà, masla adəbəzal mamatsila tsakana anja la zamana uwanay, ɲgaha la mələ uwana adàsa à waɲ babay aw."

Ahàf la mayyay anja

(Luka 6.43-45)

³³ "Baɲa ahàf delga kà, mayyay anja bay kà delga. Ahàf mawisiga bay kà, mayyay anja kà mawisiga. Kà uwana tasəl ahàf kà la mayyay anja uwana la vok ayyay. ³⁴ Akul azlabəza anja matsapa, kakay kapəhaw azlatatak delga, tsa akul azlamawisiga ma? Uwana gay apəhay kà uwana adahən ləv ala. ³⁵ Dza delga atsalla tatak delga à uda la ləmana delga anja la abà; dza mawisiga bay atsalla tatak mawisiga à uda la ləmana anja mawisiga la abà babay. ³⁶ Iyay, gəgòd à akul kà: La vuđ seriya kà, azladza tadāwulla à uda la gəl anjata lakəl anja azlagay deyday gə uwana tapàh gesina. ³⁷ Kà uwana la afad gay anjak la uwana seriya adəpəh à vok, ɲgaha adəpəhla ala kà kak dziriga baɲaw azlayla ka aw."

Masəlay anja masla mapəhal gay à ahəl Yonas

(Mark 8.11-12; Luka 11.29-32)

³⁸ Kiya uwaga azlaanik la tataka anja azlaməna mapəhla mapəhay ala la azla Farisəya tagòd à Yesu: "Məɲga, asa à anu kà kadəhəj nadzipo tekula mənəɲəj." ³⁹ Kiya uwaga Yesu awùlla atà ala, agòd: "Azladza anja zamana uwanay azlamaksafər, tadàh mabila, tanāv nadzipo, ama nadzipo la ahəj tanəɲəj aw, say anja masla mapəhal gay à ahəl Yonas uwatà pəra. ⁴⁰ Bokuba uwana Yonas adàhà mavakay makər la mahənay makər la huf anja kilfi babay kà, kiya uwaga adəpaka vok la Kona anja dza uwana adəfah mahənay makər la mavakay makər la zəvay la aku babay. ⁴¹ La vuđ seriya kà, azladza anja gudəj Niniv tadəgola afad à azladza anja zamana uwanay à gəl, ɲgaha tadəpuwa à atà gudzi à gəl, à kà uwana azlaməna madz à ahəj la Niniv tapəh gay la ləv ala, à mok uwana tatsən sayda anja Yonas. Uwana aduwa Yonas aganay la abanay. ⁴² La vuđ seriya kà, sufəl mis gə uwana la gəl la aku adəgola afad à azladza anja zamana uwanay à gəl, ɲgaha adəpuwa à atà gudzi à gəl, kà uwana asà à afik la tsəh la ahəj la makəd gəl à ahəj gudəj à vok, kà matsəb sləm à hanjəli anja Salomon. Uwana aduwa Salomon kà aganay la abanay."

^{*} 12:21 12.21 Yesayya 42.1-4

*Mawul à waɲ aɲa masasəɖok mawisiga
(Luka 11.24-26)*

⁴³ “La mok uwana masasəɖok mawisiga adasa à uda la dza la abà kà, aday auguzahay la azlaslaka deydayga gesina, ayàh slaka madu wəv. Ama baɲa abəzal aw kà, ⁴⁴ agodəy la gəl aɲha kà: ‘Lagwa kà, gəday, gədawul à slaka gulo uwana à abà gəsà à uda la abà. Nɣaha awulay abəzal à gəl kà masladayga lela, madəhəɲ à ahəɲ gə dzəba aɲha səla aw.’ ⁴⁵ La abatà kà aday, ayahay azlamasasəɖok mawisiga anik à tsəh mədəf, azlauwana taduwa masla la dzaɲdzaɲ, tatsa à waɲ atà nna, tadza à ahəɲ la abatà. Kiya uwaga kà, madz à ahəɲ aɲa dza uwaga agay mawisiga dafuwa uwana uwarà. Kiya uwaga adəgay la azladza mawisiga aɲa zamana uwanay.”

*Iyà la azladedə aɲa Yesu
(Mark 3.31-35; Luka 8.19-21)*

⁴⁶ La mok uwana iyà la azladedə aɲa Yesu tasà à waɲ kà, Yesu abadma à maham à ahəɲ dza. Tatsàzl à uda, asà à atà mabadalma. ((⁴⁷ Dza anik agodəf à Yesu: “Iyà la azladedə aɲak la uda, asà à atà mabadakamal!”)) ⁴⁸ Yesu awùlla à dza uwatà: “Uwa à iyà gulo la azladedə gulo uwa?” ⁴⁹ Nɣaha apəhla azlaməna matapla la slaka aɲha ala la magodəy: “Atà nnay azlaiyà la azladedə gulo. ⁵⁰ Kəla dza uwana adəh uwana asa à Baba gulo uwana la zagəla la afik kà, masla kà deda gulo, baɲaw iyà gulo.”

13

*Gay la gay la abà aɲa masla maslək tatak
(Mark 4.1-9; Luka 8.4-8)*

¹ La mavakay uwatà Yesu asà à uda la kay, nɣaha ahəd adzà madzay la gay dərəv kà matapla tatak à azladza. ² Magol maham à ahəɲ dza ahəmal à adi. Masla ahəd à kəslah iyaw à afik, adzà madzay la afik, maham à ahəɲ dza babay tatsàzlla à gay dərəv. ³ Apəhàtəla azlatatak aɲuvaw la azlagay la gay la abà, nɣaha agodəf à atà:

“Masla maslək tatak asa à uda kà mad à maslək tatak. ⁴ La mok uwana aslək hi la guf aɲha la abà, azlafofulo anik tanis à tetəvi à ama, azladɲay tasa à waɲ tazuw à gay. ⁵ Azlaanik aya tanis à pala akur afik, bokuba uwana kutso la pala akur lakəl mənɣa aw kà, hi as à uda katskats, kà uwana kutso aga la ahəɲ mənɣa aw. ⁶ Nɣaha uwana afats adədzəka mavəday la ndzəda, agulla fofulo tsatsadəda ala, kà uwana abək sliləh kà à pala akur à afik. ⁷ Bə gotənaɲ azlafofulo anik tanis à atək à abà, uwana atək azigənaɲ, akəd mas uda aɲa fofulo à tsəh. ⁸ Bə gotənaɲ azlafofulo anik tanis à kutso delga gə à abà, nɣaha tavə mayyay lela: Azlaanik tayya à adi zazuw səla, azlaanik aya zuɲ, nɣaha azlaanik huməts.” ⁹ Yesu azatələn à gəl agodəf: “Tsəbəwwal sləm lela à baɲa sləm aga à akul lakəl.”

*Kà mana Yesu apəhay kà la gay la gay la abà ma?
(Mark 4.10-12; Luka 8.9-10)*

¹⁰ Kiya uwaga azlaməna matapla la slaka aɲha tazə vok à slaka aɲha: “Kà mana kapəhatəla gay la gay la abà ma?”, tagodəf. ¹¹ Yesu agodəf à atà: “Akul kà, kabəzaw masəl nasiri aɲa makoray Zəzagəla, ama atà kà tabəzal aw. ¹² Kà uwana dza uwana la tatak tadəvəlla à gəl aya, nɣaha adəsəg gəl ala. Ama kà aɲa dza uwana la tatak nɲv kà, kà tadədəvəlla à ahəl ala. ¹³ Kà uwaga à uwana gəpəhatəla gay la gay la abà, kà uwana tanənaɲ ama tanəzənaɲ ala aw, nɣaha tatsənaɲ ama bokuba tatsəbal sləm la matsənaɲ aw, ¹⁴ kà gay aɲa masla mapəhal gay à ahəl Yesayya aɲa magodəf à afik: ‘Akul la matsəbal sləm, ama katsənaɲaw aɲa;

kanənaɲaw aɲa matsəkəl yewdi à gay, ama kanənaɲaw aɲa.

¹⁵ Kà uwana tsəhay uwanay kà adədzadzə gəl aɲha ala,

Danakàh à sləm à ama.

Tatsakàh à yewdi aɲatà à ama

Kà yewdi aɲatà aɲa manəɲ aw

Kə sləm aɲatà aɲa matsənaɲ aw,

Nɣaha kà atà aɲa masəl tatak la ləv aɲatà la tsəh aw,

Kà atà aɲa mawul à waɲ à slaka gulo, kà gi aɲa mawuratəla aya aw, Zəzagəla agodəf.*[†]

¹⁶ Ama akul kà, marabay agay la akul, kà uwana yewdi aɲkul kà anəhla, nɣaha sləm aɲkul atsənà tatak. ¹⁷ La dziriga gəpəh à akul: Aɲuvaw azlaməna mapəh à atà gay à ahəl kà mapəhla à azladza, la azladza dziriga aɲa Zəzagəla, tayàh kà manənaɲ uwana kanənaɲaw aɲa, ama tanənaɲ aw, kà matsən uwana katsənaɲaw aɲa, ama tatsənaɲ aw.”

Yesu apəh godega aɲa gay la gay la abà

*anja maslæk tatak uwatà à uda**(Mark 4.13-20; Luka 8.11-15)*

¹⁸ “Iyay, tsənàwwàn godega anja gay la gay la abà anja masla maslæk tatak, uwana asal magodfay zla. ¹⁹ Azlauwana tatsəna gay marabəŋ lakəl anja makoray Zəzagəla ngaha takəsan aw, atà kà kalkal la gay tetəvi uwana azlafofulo tanis ala à ama: Ngaha mawisiga atsa à waŋ, atsatsam uwana à uda tasləka à ləv anjata à tsəh. ²⁰ Azlaanik kalkal la pala akur, uwana azlafofulo tanis à afik, tatsəb sləm à gay, takəs la marabay katskats, ²¹ ama tadala slilih la atà la abà aw. Takəs kà anja kaslə ŋuv pəra. Mok uwana matərabəy, la mas ŋgərpa adətsizlla ala kà gay Zəzagəla kà, katskats tasak madinjal gəl à vok anjata la tsəh ala. ²² Azlaanik kalkal la gày atək uwana azlafofulo tanis à abà: Tatsəna gay Zəzagəla, ama madzugway la adi anja gudəŋ à vok uwanay, la matsiday anja, la mapapatay anja lakəl anja ləmana asufa gay uwana ala la ləv anjata la tsəh, ngaha ahən aw. ²³ Azlaanik kalkal la kutso delga uwana azlafofulo tanis à abà: Tatsəb sləm à gay, ngaha tatsənanj. Ngaha tahən lela, azlaanik tayya à adi zazunj səla, azlaanik zunj, azlaanik aya huməts.”

Gay la gay la abà lakəl anja maŋaviya la guf la abà

²⁴ Yesu apəh à atà gay la gay la abà anik, agodf à atà: “Aganay tatak uwana məgagazləla la makoray Zəzagəla. Dza anik asləkə fofulo delga à guf anja à abà. ²⁵ La vəd la abà vərđi anik, à mok uwana azladza gesina la madzəhal la abà, masla məzam anja dza uwatà asà à waŋ, akokos maŋaviya à guf hi uwatà à abà, ngaha adà anja. ²⁶ Mok uwana hi adazigənanj, adzəkà matsa à gəl ahənanj kà, maŋaviya apəhla vok ala babay. ²⁷ Azlamagamza anja dza anja guf tasà à waŋ tagodfal: ‘Məŋga, kasləkə kà fofulo delga à guf anək à abà mi ya, maŋaviya uwanay ma asà à waŋ ma lala aya la?’ ²⁸ Agodf à atà: ‘Uwaga kà masla məzam gulo la uwana adfahà kiya uwaga’. Kiya uwaga azlamagamza tanəval, tagodfal: ‘Lagwa ma, asa à ka məday mədətəsdəf à ahəŋ ay?’ ²⁹ ‘Awanj’, agodf à atà: ‘Baŋa la katsədaw maŋaviya à ahəŋ kà, zlahaw kà, kadətsədawla hi gə, ³⁰ sàkəwwal, tahən la slaka gə tsərəh à matsəd tatak. La kaslə uwatà kà, gədogodf à azlaməna matsəd tatak: Tsədəfaw kà maŋaviya dadəŋ, wədəhəwəŋ təmtətem kà matəl à gay, ngaha la lig la ahəŋ kà, dəwgəla hi gulo à mtəga, gədogodf à azlaməna matsəd tatak.’”

*Gay la gay la abà anja tsəhay hamadz**(Mark 4.30-32; Luka 13.18-19)*

³¹ Yesu apəh à atà gay la gay la abà anik aya, agodf à atà: “Makoray Zəzagəla kà, məgagazləla kà la tsəhay hamadz uwana atsa à uda la lig gəy anja dza. ³² Masla la uwana à tsəh azlatsəhay anik anik à tsəh gesina, ama baŋa adazigənanj kà, masla la uwana aduwa azlaahəf anik, apak magol ahəf tsərəh à uwana azladifanj tasaha à waŋ kà maŋaləh gay anjata à afik.”

*Gay la gay la abà anja tatak maməsl tatak ala**(Luka 13.20-21)*

³³ Yesu apəh à atà gay la gay la abà anik aya, agodf à atà: “La mana gəgagazləla makoray Zəzagəla ma? Makoray Zəzagəla kà kalkal la tatak maməsl tatak ala, uwana mis akotsinj à pəhəw dogum zlo à tsəh uwana adəh kilo dzik səla gəl anja səla, tsərəh à uwana aməsl magol pəhəw uwaga ala gesina.”

*Kà mana Yesu apəhay kà la gay la gay la abà ma?**(Mark 4.33-34)*

³⁴ Yesu apəh uwaga gesina à maham à ahəŋ dza kà la gay la gay la abà. Apəh à atà gay la kokudə la gay la gay la abà aw, ³⁵ kà gay anja masla mapəhal gay à ahəl anja mapəhla à azladza anja magodf à afik:

‘Gədəpaha à atà kà la gay la gay la abà,

Gədəpəhatəla tatak mahadf vok à ahəŋ gə uwana agə dagay madzəka vok anja gudəŋ à vok.’^{*}

*Yesu apəhla godega anja gay la gay la abà**anja maŋaviya uwatà ala*

³⁶ La lig la ahəŋ Yesu asək à maham à ahəŋ dza à ahəŋ, awul à mtəga. Azlaməna matapla la slaka anja tazə vok à slaka anja kà manəval godega anja gay la gay la abà uwatà: “Pəhanula gay la gay la abà anja maŋaviya uwana la guf hi la abà!” ³⁷ Yesu awulla atà ala la kiya uwanay: “Iyay, dza uwana asləkə fofulo delga kà, uwaga kà Kona anja dza, ³⁸ guf kà, uwaga kà gudəŋ à vok, fofulo delga kà, azladza uwana azlaanə

makoray Zəzagəla, ɲgaha maɲaviya bay kà, azlaaɲa masla mawisiga. ³⁹ Masla məzam uwana akokos maɲaviya uwaga kà seteni; təla matsəf tatak uwaga, kà madəv à gay gudəɲ à vok, azlaməna matsəf tatak kà azlamalika. ⁴⁰ Bokuba uwana tawəfəh maɲaviya à akàl à gay kà, kiya uwaga adəpaka vok la madəv à gay gudəɲ à vok babay. ⁴¹ Kona aɲa dza adəsəl azlamalika aɲha à ahəɲ, ɲgaha tadətsatsam à uda la makoray aɲha la abà azladza uwana tasokw dza à tsakana à abà gesina, la azladza uwana tadəh mawisiga. ⁴² Tadəwuts atà à gudùh akàl uwana à abà, matuway la mapəf slid la tsəh ala terawawa la abà. ⁴³ Ama azlauwana takəs gay aɲa Zəzagəla kà, atà kà tadəudəy bokuba afats la makoray aɲa Baba Zəzagəla la abà. Tsəbəwwal sləm lela, à baɲa sləm aga lakəl.”

Gay la gay la abà aɲa ləmana mahadəɲ à ahəɲ gə

⁴⁴ “Makoray Zəzagəla kà kalkal la ləmana uwana mahadəɲ à ahəɲ gə la guf la abà. Dza anik abəz à ləmana uwaga, ɲgaha ahadəɲ à ahəɲ aya. Masla arab, ahad madawla uwana akoray gesina, ɲgaha asukwla guf uwatà.”

Gay la gay la abà aɲa tatak bəðə

⁴⁵ “Makoray Zəzagəla kà, kalkal la masla matsakalay uwana ayəh azlatatak bəðə delga delga gə. ⁴⁶ Mok uwana adabəz tatak bəðə uwana delga gə, tsakalay aɲha zlazladə kà, aday, adawul tatak uwana akoray gesina, ɲgaha asukw la tatak bəðə uwatà.”

Gay la gay la abà aɲa dzarawa

⁴⁷ “Makoray Zəzagəla kà kalkal la dzarawa uwana aduway à iyaw à abà uwana ahəl tsəhay tatak anik anik gesina. ⁴⁸ Mok uwana adahən ala, azlaməna makas kilfi tabiyən à uda, ɲgaha tadzəh madzay kà makəs kilfi delga delga à takosə à abà, ama uwana delga aw kà, tafətukw ala. ⁴⁹ Kiya uwanay à uwana adəpak à vok la makəf gəl à ahəɲ gudəɲ à vok: Azlamalika tadəsa à ahəɲ kà mavəh azlamawisiga ala la azladelga, ⁵⁰ ɲgaha tadəfətukw azlamawisiga à gudùh akàl à abà. Tadətaway la mapəfəh slid la tsəh ala, la abatà.”

Ləmana mawga la ləmana maviyaga

⁵¹ “Katsenaw uwaga gesina nəma ay?”, Yesu agəf à atà. “Iyay”, tagəfədal. ⁵² ɲgaha agəf à atà: “Kiya uwanay zla, kəla masla mapəhla wakitə mapəhay uwana ala apək masla asik aɲa makoray Zəzagəla kà, masla kà bokuba zil gəy uwana ahəl à uda la ləmana aɲha la abà azlatatak mawga la azlamaviyaga.”

Azlaməna gudəɲ Nazaret tadin gəl à Yesu à vok aw

(Mark 6.1-6; Luka 4.16-30)

⁵³ Mok uwana Yesu adadəv azlagay la gay la abà uwaga à gay kà, adə aɲha la abatə. ⁵⁴ ɲgaha awul à gudəɲ uwana à abà azigən la abà, adzəkə matapatəla azlatatak la gəy madəv kudə anatə la aku, ɲgaha azladza gesina kà ləv avələh à atà à gay gesina, tagəf: “Haɲkəli uwanay ma abəzal ma lala? Kakay asla kà madəhəɲ azlanadzipo uwanay ma? ⁵⁵ Masla kà bəzi aɲa masla mapəf ahəf təga aw uwə? Mariyama la uwana iyə aɲha aw takay? Yakuba, Yusufu, Səmon, ɲgaha Yahuda la uwana azladedə aɲha təga aw takay? ⁵⁶ Azladedə aɲha dəgam gə bay kà, atə la abanay kəla mavakay aw takay? ɲgaha ma lala abəzal ndzəfəda uwaga zlam la?” ⁵⁷ Kà uwaga à uwana tadin gəl à masla à vok aw. Ama Yesu agəf à atà: “Masla mapəhal gay à ahəl kà lala beyli kà takəs gay aɲha, ama la gudəɲ aɲha uwana tayyà à abà baɲaw la huɖ gəy aɲha kà, takəs gay aɲha aw.” ⁵⁸ La abatə kà Yesu adahə azlanadzipo ɲv pəra kà uwana tadin gəl à masla à vok aw.

14

Madzugway aɲa Herod lakəl aɲa Yesu

(Mark 6.14-29; Luka 9.7-9)

¹ La zamana uwatə, Herod sufəl aɲa Galili avərə gay kà mapəhay lakəl aɲa Yesu. ² Agəf à azlaməna magamza aɲha: “Yuhana masla madəh batem kà, adawul à uda la mamətsay, kà uwaga à uwana aga la maslay kà madəh azlanadzipo kiya uwanay.”

Makəf Yuhana masla madəh batem

³ Tekəfik kà, Herod la uwana avə tetəvi kà makəs Yuhana, awəfəɲ, ɲgaha adùw à danay kà lakəl aɲa mis aɲa dedə aɲha Filip, uwana sləm aɲha Herodiya. ⁴ Kà uwana Yuhana agəf à Herod: “Azlayla kà, kà kak aɲa mazəb Herodiya kà aɲa mis aw.”^{*} ⁵ Herod asəl makəf Yuhana, ama guba akəs kà azla Yahudiya, kà uwana gesina anatə tanəɲə Yuhana kà bokuba masla mapəhal gay à ahəl aɲa Zəzagəla kà mapəhla azladza.

* 14:4 14.4 3Musa 18.6; 20.21

⁶ Mok uwana mavakay uwana tayyà Herod adadəbà, tahàb madəvaday la mavakay uwatà. Dugu aña Herodiya ahàb dəs la huma aña azladza uwana tazàlàh atà. Dəs uwatà, adà à ləv aña Herod à tsəh, aràbàñ, ⁷ tsəràh à uwana azùw mawafay kà mav tatak à dugu uwaga kəla tatak uwana anavay gesina. ⁸ La mapəhal aña iyà aña, agòf à sufəl: “Nàts gi gəl aña Yuhana à tasà à abà, kavà à gi.” ⁹ Kay, uwaga azà à sufəl mənğa, ama kà mazuw mawafay aña, ngaha la azladza uwana azàlàh atà kà, avà tetəvi kà madfàh uwaga. ¹⁰ Asləl dza kà mad manats gəl aña Yuhana masla madfàh batem à wañ la danay. ¹¹ Tasələ gəl uwatà à wañ la tasà la abà, tavà à dahalay, masla bay adàla à iyà aña. ¹² La lig la ahəñ azlaməna matapla la slaka Yuhana masla madfàh batem, tasà à wañ, tazəb vok aña kà mad malay. La lig la ahəñ, tahàd kà mapəh tatak uwana apakà vok à Yesu.

Yesu avà tatak may à zil dəbow zlo

(Mark 6.30-44; Luka 9.10-17; Yuhana 6.1-14)

¹³ Mok uwana Yesu atsənà uwaga, atsizlla ala la abatà la kəslah iyaw, kà mad aña à kəsaf à abà kokuđa gəl aña. Ama uwana maham à ahəñ dza atsən uwaga kà, tasà à uda la gudəñ la abà, ngaha tanəfà Yesu la maguway la gay gərdza. ¹⁴ Mok uwana Yesu adasa à ahəñ la kəslah iyaw la afik, anəñà maham à ahəñ dza anjvaw. Vok ahàmal kaykay kà azladza uwaga, ngaha adzəkà mawar atà ala la đuvats anjatà la abà gesina.

¹⁵ Uwana mokokhu adasa à wañ kà, azlaməna matapla la slaka aña tazà vok à slaka aña, tagòfal: “Vəf adagay, ngaha slaka uwana kà fəta aya. Sàk à maham à ahəñ dza tadà anjatà à huđ gudəñ, kà atà aña mayàh huđ anjatà à gay.” ¹⁶ Yesu awùlla atà ala: “Akəsa vok kà atà aña madiy anjatà aw, akul la gəl anjul, vaw à atà tatak may.” ¹⁷ Ama tagòfal: “La abanay kà kaf gay bərsəw zlo la kilfi səla pəra aga anu la ahəl.” ¹⁸ Yesu agòf à atà: “Səwgəla à wañ à abanay dadəñ.” ¹⁹ Yesu agòf à maham à ahəñ dza: “Dzàw madzay la kəsaf la afik!” Ngaha masla ahəl kaf gay bərsəw zlo la kilfi səla uwatà, anəñà à zagəla, “Kikay”, agòf à Zəzagəla. Atsəkà kaf ala, avà à azlaməna matapla la slaka aña, ngaha azlaməna matapla uwaga tavàh à maham à ahəñ dza uwatà bay. ²⁰ Kiya uwaga kəla uwabeyuwi azùw, kəla aña may aña. Azlaməna matapla tahamà à gay à matəm à atà à ahəl gə à vok, takosà kulo gəl aña səla à uwana atəmal à atà à ahəl la kaf zlo la kilfi səla uwaga la abà. ²¹ Matugway aña azlazil uwana tazùw kaf kà, aslay dəbow zlo kokuđa matugw azlamis la azlabəza.

Yesu aday la gəl dərəv

(Mark 6.45-52; Yuhana 6.15-21)

²² Kiya uwaga Yesu agòf à azlaməna matapla la slaka aña kà: “Dàw à kəslah iyaw à afik, katsəvokaw à gay dərəv à uda anik kà gi, gi kà: ‘Mada anjulo zlà’, gəgòf à maham à ahəñ dza.” ²³ Uwana tavàh vok ala, ahàd à gudəñ anik à afik kokuđa gəl aña kà madəv kufa. Vəf abəzal à gəl la abatà. ²⁴ Kəslah iyaw babay kà adaday kà kərker. Afad atərəbà atà, kà uwana tagolà à huma à gay. ²⁵ Zvek la huma la gay la matuway gotsak teraņa, Yesu adà à awtày à slaka azlaməna matapla aña la maday lakəl iyaw. ²⁶ Ama mok uwana tanəñəñ aday la gəl iyaw kà, tsəkùläh à tsəh ala kà guba, “Uwaga kà tatak mavavat dza”, tagòf, ngaha tadzəkà mawiyay guba. ²⁷ Ama katskats Yesu abadfatàmà: “Karuwaw vok à ahəñ aw, gi njuwà, guba akəs akul aw!”, agòf à atà. ²⁸ Piyer abadfalma, agòfal: “Sufəl, baņa kak dziri kà: ‘Sà à wañ’, gòf à gi, gəda à awtày la gəl iyaw!” ²⁹ “Sà à wañ”, Yesu agòfal. Piyer asà à ahəñ la kəslah iyaw la afik, adzəkà maday la gəl iyaw kà mad à slaka Yesu. ³⁰ Ama uwana anəñəñ afad adzəkà madəfay kà, adzəkà masəkulay la mad à iyaw à abà, adzəkà mawiyay: “Sufəl, bəlla gi!” ³¹ Katskats Yesu abiyà ahəl ala, akəs la ahəl, ngaha agòfal: “Kayyà, madiñal gəl à vok anjak kà à tsəh ala, kà mana kadzurkway la ləv anjak la tsəh ma?” ³² Tadà à kəslah iyaw à afik atà səla, ngaha afad adəf aya aw, adzà à ahəñ titi. ³³ Kiya uwaga azlaməna matapla uwana la kəslah iyaw la afik takədəf à ahəñ la huma aña Yesu, tagòfal: “Ndzer, kak Kona aña Zəzagəla.”

Yesu awar azlaməna đuvats ala la kutso Genesaret

(Mark 6.53-56)

³⁴ Mok uwana tadà à uda la dərəv la abà kà, tabəz à makoray aña Genesaret à abà. ³⁵ Bokuba uwana azladza la gudəñ uwatà tasəl Yesu kà, tazàhà gay aña mas à wañ aña la huđ gudəñ gesina, ngaha tahamàhla azlaməna đuvats à wañ gesina. ³⁶ Tadəv kufa à Yesu kà azlaməna đuvats tabəz tetəvi kà madəbani amiyaka gay aña lukut aña pəra, ngaha dza gesina uwana adəbani kà awur ala la đuvats aña la abà.

15

*Matapla uwana asa à wanj la slaka azlababa madzidziga
(Mark 7.1-13)*

¹ Azla Farisøya la azlamøna matapla mapøhay anja Zøzagøla tasà à wanj la Urusailima, tasà à slaka Yesu la magodfal: ² “Kà mana azlamøna matapla la slaka anjak kà takès mapøhay anja azlababa madzidziga aw ma? Kà mana tapalàh ahàl bokuba uwana matapla gami apøhay kà mazuw tatak may aw ma?” ³ Yesu awùlla atà ala, agodf à atà: “Akul ma, kà mana kakø saw mapøhay anja Zøzagøla aw, kanøfaw kà matapla anja gøl anjukul ma?” ⁴ Tekedik kà Zøzagøla agodf kà:

‘Zlèbà baba anjak la iyà anjak’

ngaha

‘Dza uwana apøh mawisiga lakøl anja baba anja banjaw anja iyà anja kà azlayla mamøtsay.’⁵

⁵ Ama akul kà kagodfaw kà: ‘Banja dza agodf à baba anja banjaw à iyà anja: Humà tatak gulo, uwana gøfàhla sløray kà, annaka gøslala vok anja mav à ka mazlak ka, uwaga kà tatak maf à ahøj gà kà anja Zøzagøla.’ ⁶ Kiya uwaga kà, dza uwaga anøkudfa kà mazlakay baba anja banjaw iyà anja aya aw. Kiya uwaga à uwana kakølaw mapøhay anja Zøzagøla ala, kà akul anja manøf matapla anja gøl anjukul. ⁷ Akul azlamøna magolla dza, azlawla Yesayya masla mapøhal gay à ahàl apøh lakøl anjukul, agodf:

⁸ ‘Azladza uwanay kà tazløb gi la panjaw deyday pøra.

Ama løv anjatà kà kørkør la gi.

⁹ Makødedf à ahøj uwana azladza uwanay takødedf à gi à ahøj kà deyday,

Kà uwana atà tapàhla ala kà masølay anja gøl anjatà, uwana mapøhay anja dza pøra.’¹⁰

Uwana adfah àläh à dza à vok

(Mark 7.14-23)

¹⁰ La lig la ahøj Yesu azàl à maham à ahøj dza agodf à atà: “Tsønawwàn, fawwal sløm lela: ¹¹ Tatak mazuway uwana ada à gay à awtày, la uwana adfah àläh à dza aw, ama uwana atsa à wanj la gay la awtày, la uwana adfah àläh à dza.”

¹² Azlamøna matapla anja Yesu tazà à vok à slaka anja, tagodfal: “Kasøl kà gay anjak uwanay kà azin azla Farisøya à gøl kaykay aw takay?” ¹³ Awùlla à atà la magodfay: “Kela fofulo uwana Baba gulo uwana la zagøla la afik aslèkà aw kà, adàgay mabødf à ahøj gà. ¹⁴ Sàkàw atà, atà azlamøna makas azlaguløf à ahàl. Ama banja akø guløf anik à ahàl kà, atà sèla nna tadàsokw à aføk à abà.” ¹⁵ Piyer atsøval gay anja à gay, agodfal: “Sànula à uda à gay la abà uwaga!” ¹⁶ Yesu agodf à atà: “Akul babay kà kaslaw matsøn uwanay aw takay? ¹⁷ Kasølaw kà kèla tatak uwana ad à huf anja dza kà aguw à uda la godega aw takay? ¹⁸ Ngaha babay kèla tatak uwana aguwa la gay anja dza kà asà à uda kà la løv la tsøh, uwaga la uwana adfah àläh à dza à vok. ¹⁹ Kà uwana la løv la tsøh la uwana madzugway mawisiga atsa à uda adàla dza à makødf dza à abà, à gøl gaw à abà, à mabila à abà, à limlim à abà, à gøl à abà, à fida à abà, ngaha à mapàh mawisiga lakøl anja azladza anik à abà babay. ²⁰ Uwaga la uwana adfah àläh à dza à vok, ama mazuw tatak la kokuða mapal ahàl bokuba uwana manøbay anjukul agodf kà, adfah àläh à dza à vok aw.”

Yesu atà la mis uwana asøl Zøzagøla aw

(Mark 7.24-30)

²¹ Yesu atsizilla ala la abatà, ahàd à kutso uwana à abà nekwa la gudøj Tir la Sødøn. ²² Mis Kananiya uwana adzà à ahøj la gudøj uwatà, asà à wanj à slaka anja, adøval kuða: “Møjga, Kona anja David, vok aham à ka kà gi. Dugu gulo la zagøla zagøla lakøl møjga, uwana atørbøj kaykay.” ²³ Ama Yesu apakwà gay møslek aw. Kiya uwaga azlamøna matapla la slaka anja tasà à wanj, tagodf à Yesu: “‘Dà anjak’, godf à mis uwaga, anof anu la tsøh la gay.” ²⁴ Yesu awùlla à uda: “Gi kà gøga masløl gi à wanj kà, kà anja azlatuwanj mazàhla gà Isørayel pøra.” ²⁵ Ama mis asà à wanj, akødedf à ahøj la huma anja la magodfal: “Møjga, kamkam zlàk à gi.” ²⁶ Yesu awùlla à uda, agodfal: “Delga kà mazøb kaf anja azlabøza kà mamøl à azlakøda à ahøj aw.” ²⁷ “Iyay nøma, Møjga”, mis agodfal. “La kità babay kà, azlakøda kà tatsatsàm mapøtsèh pøtsèhga uwana atad kà azlamøjga à vøfah.” ²⁸ Kiya uwaga Yesu awulàlla, agodfal: “Hay, mis, madinjal gøl à vok anjak kà møjga, tatak uwana kayahay kadàbøzal.” Ngaha dugu anja awür ala la kaslà uwatà.

Yesu awar azlaməna d'uvats ala anjvaw

²⁹ Yesu adà anja la abatà, ahàd à gay dərəv anja Galili, à gudəŋ à afik, adzà madzay la abatà. ³⁰ Maham à ahəŋ dza anjvaw tasà à wanj à slaka anja, tasàhla azlaməna d'uvats à wanj; Azladeri, azlaguləf, azlamakalàh gə, azlabada, ŋgaha azlatsəhay anik anik gesina babay. Tahamà atà à huma anja Yesu, ŋgaha awarətàla. ³¹ Ləv avàlàh à azladza à gay mənja, kà uwana tanəŋà kà azlabada tavats gay, azlamakalàh gə tawàrla, azladeri tadà, ŋgaha azlaguləf bay tanəŋla. Tadzəka mazləb Zəzagəla anja Isərayel.

Yesu avà tatak may à zil dəbow ufaɸ
(Mark 8.1-10)

³² Yesu azàl azlaməna matapla la slaka anja ŋgaha agòd à atà: “Kay, vok aham à gi kà azladza uwanay, kà uwana mahənay makər atà la slaka gulo, ŋgaha tatak may adadáv kà atà à gay, asa à gi maduw atà à gəl la may gə aw, kà uwana may adàkad atà asik à gəl, tadətəf à ahəŋ la tetəvi la ama.” ³³ Azlaməna matapla la slaka anja tanàval à gay ala: “Lala məbəz tatak may mənja kà anja azladza kat uwanay la kəsaf uwanay la abà la?” ³⁴ Yesu anàv à atà gay ala, agòd à atà: “Kaf gay bərsew nna aga à akul la ahàl ma?” Tagòdal: “Gay bərsew mədəf, la azlabəza kilfi ŋuv ŋuv.” ³⁵ “Kiya uwaga dzàhàw madzay”, agòd à maham à ahəŋ dza. Maham à ahəŋ dza tadzàhà à madzay. ³⁶ La lig la ahəŋ ahəl kaf mədəf la azlabəza kilfi uwatà, “Kikay”, agòd à Zəzagəla, akàlàhəŋ ala, ŋgaha avà à azlaməna matapla la slaka anja, kà atà anja mavàh à maham à ahəŋ dza. ³⁷ Kəla uwabeyuwi anətà azùw kəla may anja. Matam à atà à ahàl gə kà, azlaməna matapla tahàmalla à gay à vok takosà mədəf aya. ³⁸ Azlaməna mazuw tatak uwaga kà zil dəbow ufaɸ kokudà matugw azlamis la azlabəza. ³⁹ Mok uwana “Dàw wurwur”, Yesu adagodiya à maham à ahəŋ dza kà, ahàd à kəslah iyaw à afik kà maday à kutso anja Magadan à abà.

16

Azla Farisəya la azla Sadukiya tanav nadzipo
(Mark 8.11-13; Luka 12.54-56)

¹ Azla Farisəya la azla Sadukiya tazà à vok à slaka Yesu, kà mavavarəŋ, tanàv à Yesu kà mapəhatàla la nadzipo la abà kà ndzəɸa anja kà atsa à ahəŋ kà la Zəzagəla. ² Ama Yesu awùlla atà ala: “La matəf à ahəŋ afats kagodəw kà: ‘Banja məlo, atəv à tsəh la matəf à ahəŋ afats kà, lebəŋ kà məl adàhəɸay’, kagodəw. ³ Ama la gay bebəŋ gə kà kagodəw: ‘Iyaw adasuway lakana, kà uwana zagəla atəv à tsəh’. Akul kà, kasəlaw mavàh məlo anja zagəla ala, ama kà mana kasəlaw mavàh masəlay anja zamana uwanay ala aw ma? ⁴ Azladza anja zamana uwanay kà azlamaksafər, azlamabila la huma Zəzagəla aw, tanavay azlanadzipo, ama nadzipo la ahəŋ aw, say masəlay anja Yonas pəra”. La lig la ahəŋ asək atà à ahəŋ, adà anja.

Tatak may avika à azlaməna matapla kà mazəb à ahəl
(Mark 8.14-21)

⁵ Mok uwana azlaməna matapla taguway la gay dərəv à uda kà avikà à atà kà mazəb tatak may à ahəl. ⁶ Kiya uwaga Yesu agòd à atà kà: “Dahàw hanjəl, nənàwla gəl anjul kà tatak maməsl tatak ala anja azla Farisəya la azla Sadukiya.” ⁷ Azlaməna matapla tadzəka magodəy kà atà kà atà: “Iyay, apəh kiya uwanay kà, kà uwana məzəb tatak may à ahəl aw”, tagòd. ⁸ Yesu atsənà madzugway anətà, agòd à atà: “Kà mana kavàtsəw gay la tsəh ala kà akul à akul ma? Kà uwana tatak may aga à akul la ahəl aw takay? Madiŋal gel à vok anjul kà à tsəh ala. ⁹ Tsəràh à lakana babay kà, katsənawwan aw takay? Dzùgwàw lakəl anja kaf gay bərsew zlo uwana gətsəkəŋ ala kà anja azlazil dəbow zlo tsi. Kasəlaw ma takosà nna atəmal à tsəh ala ma? ¹⁰ Dzùgwàw lakəl anja kaf mədəf uwana gətsəkəŋ ala kà anja azlazil dəbow ufaɸ aya tsi. ŋgaha ma takosà nna atəmal à tsəh ala babay aya ma? ¹¹ Kà mana katsənawwan kə gəpəh à akul kà lakəl anja tatak may aw ma? Nənàwla gəl anjul kà tatak maməsl tatak ala anja azla Farisəya la azla Sadukiya.” ¹² Kiya uwaga kà, azlaməna matapla tatsənəŋ kà apəh à atà kà lakəl anja manəŋla vok kà tatak maməsl tatak ala aw, ama kà mapàhla ala anja azla Farisəya la azla Sadukiya.

Piyer apəhla ala kà: Yesu kà Kristu
(Mark 8.27-30; Luka 9.18-21)

¹³ Yesu ahàd à kutso uwana à abà nekwa la Zəsare anja Filip, anəv azlaməna matapla la slaka anja la gay ala: “Mana azladza tapəhay lakəl anja Kona anja dza ma?” ¹⁴ Tawulàlla: “Azladza anik tagod kà: ‘Kak Yuhana masla madəh batem’, azlaanik tagod kà: ‘Kak Eliya’, ŋgaha azlaanik aya tagod kà: ‘Kak Yeremiya, banjaw masla mapəhal gay à ahəl

anik' ", tagòd. ¹⁵ "Iyay zla, akul ma gi uwa kagodaw tak uwa?", Yesu agòd à atà. ¹⁶ Sèmon Piyer awùlla à uda agòdàl: "Kak Kristu, Kona anja Zèzagèla uwana la sifa anja tsèràh à awtày." ¹⁷ Kiya uwaga Yesu agòdàl: "Kak la marabay, Sèmon kona anja Yuhana, kà uwana dza asik à uwana apèhakala dziriga uwaga aw, ama Baba gulo uwana la zagèla la afik la uwana apèhakala uwaga. ¹⁸ Ngaha gi, gogòd à ka: Kak Piyer, uwana asal magodày kà: Dzègèla, ngaha la dzègèla uwanay la afik la uwana gèdànjàl maham à ahènj mèna gay Zèzagèla gulo, bà mamètsay bay kà, adàslal à vok aw. ¹⁹ Gèdàv à ka tsèkurè m anja makoray Zèzagèla à ahàl: Uwana kawadènj la wèdah adàgay mawadèngà la zagèla, uwana kapèlènj ala la wèdah adàgay mapèlènj ala gè la zagèla la afik babay." ²⁰ La lig la ahènj Yesu afah akur à azlamèna mataplà à lig la slaka anja, kà atà anja mapèhay à dza anik kà masla Kristu aw.

Yesu apèh gay mamètsay anja à ahènj

la mawul à uda anja la mamètsay

(Mark 8.31-9.1; Luka 9.22-27)

²¹ Dagay la kaslà uwatà Yesu adzèkà mataplà azlamèna mataplà à slaka anja la dazuwaya la magodày: "Azlayla kà vok kà, gèdà à Urusalima, ngaha kà gi anja mas ngèrpa mènja la abatà la ahàl anja azlamasiga, la azlamadzahaga anja azlamèna mav tatak à Zèzagèla, ngaha aya la azlamèna mapàhla mapèhay ala. Tadàkèd gi, ngaha la mahènjay mamakèr gèdàwul à uda la mamètsay." ²² Kiya uwaga Piyer akès à fèta à awtày ngaha adàl à gèl, agòdàl: "Zèzagèla anènjla ka Sufèl, uwaga adàbèz à ka aw!" ²³ Ama Yesu agolà vok, agòd à Piyer: "Zà à gi vok kèrkèr, kak seteni, kak masla matsalla à gi matekwid la tetèvi gulo la ama, kà uwana madzugway anjak kà anja azladza wèdah awkà uwana asà à Zèzagèla aw." ²⁴ Ngaha la lig anja uwaga la ahènj Yesu agòd à azlamèna mataplà la slaka anja: "Banja dza asal manèf gi kà, asak à maf slèm à gèl anja, ngaha azèb ahàf mamètsay anja, ngaha anèf gi. ²⁵ Dza uwana asal matèf gèl anja, adàzìnj ala, ama dza uwana az gèl anja ala kà gi, adàbèl gèl anja. ²⁶ Mana akès vok à dza, uwana akor gudènj à vok gesina, ngaha masla adàz gèl ala la huma la gay bawbaw ma? Tatak la ahènj dza avà y kà masukwla sifa anja takay? ²⁷ Kona anja dza adàsa à wanj la mazlèbay anja Baba anja la abà la azlamalika anja, ngaha adàpèlay à kèla dza la tsèhay madèhènj anja uwana adahàhènj. ²⁸ Hadày, gèpèh à akul la dziriga: Azladza anik la tataka anjukul la abà la abanay kà, tadàmatsay dènj aw, say banja tanènj Kona anja dza atsa à wanj la makoray anja."

17

Mabèdla vok anja Yesu la gudènj la afik

(Mark 9.2-13; Luka 9.28-36)

¹ Mahènjay mukwa la lig anja la ahènj, Yesu azèb Piyer, Yakuba ngaha Yuhana, deda anja Yakuba, ngaha adàla atà à gèl gudènj kèrkèr gèl à afik, kokudà gèl anjatà. ² Abèdla vok la huma yewdi anjatà, huf adi anja anjèràzlla atà à adi bokuba afats, ngaha lukut anja aùd tälla. ³ Ngaha azlamèna mataplà makèr uwaga tanènjà Musa atà la Eliya, tavàts gay la Yesu. ⁴ Kiya uwaga Piyer agòd à Yesu: "Sufèl delga à uwana mèga la abanay zla. Banja asa à ka gèts safsaf makèr à abanay, tekula anjak, tekula anja Musa, tekula anja Eliya." ⁵ La mok uwana Piyer abadma, habaga akèl atà, mèlès magol magodugodu à adi tabadamma, la habaga uwatà la abà kà kuda atsèn la magodày: "Uwanay kà bèzi gay lèw gulo, gèrabay mènja, mènja kà masla. Tsèbàw slèm à masla lela." ⁶ Mok uwana azlamèna mataplà tatsèn kuda uwaga kà, guba akès atà, takèdèd à ahènj la huma anja Yesu. ⁷ Yesu azà à vok à slaka anjatà, ngaha abàk atà à ahàl à gèl: "Tsizlàwla guba akès akul aw", agòd à atà. ⁸ Tawàlla gel à afik, ama tanènjà dza anik aw say Yesu kokudà gel anja pèra.

⁹ Mok uwana tatsàh à ahènj la gudènj la afik, Yesu afahà à atà akur à lig: "Kapèhaw à dza lakèl anja tatak uwana kanènjàwwanj tsèràh à mok uwana Kona anja dza adàwul à uda la mamètsay aw."

¹⁰ Ngaha kiya uwaga azlamèna mataplà tanènj à Yesu: "Kà mana azlamèna mapàhla mapèhay ala tagod kà: 'Eliya adàtsa à vok à wanj ma?'" ¹¹ Awùlla à atà ala: "La dziriga Eliya atsa à wanj kà madàh tatak à ahènj la tetèvi anja. ¹² Ama gogòd à akul kà, Eliya kà adasa à wanj dagay uwarà, ama azladza tasèl kà masla aw, tadahàlènj à vok bokuba uwana asà à atà. Kiya uwaga babay tadàfèhènj à Kona anja dza la gel anja."

¹³ Kiya uwaga à uwana azlamèna mataplà tatsènj à uwana apèh à atà gay lakèl anja Yuhana masla madàh batem.

✧ 17:5 17.5 1Musa 22.2; Mahabay 2.7; Yesayya 42.1

Yesu awur bæzi uwana ala la masasəḏok mawisiga lakəl

(Mark 9.14-29; Luka 9.37-43)

¹⁴ Mok uwana tabəzay à slaka uwana maham à ahəŋ dza la ahəŋ, dza anik azà à vok à slaka Yesu akəḏəḏal à huma, ¹⁵ agòḏal: “Məŋga, vok aham à ka, kà bæzi gulo uwana la dʻuvats tatagà akasay, atərəḑ à ahəŋ kaykay, ŋgaha babay atadàh à akəl à abà, à iyaw à abà aya babay. ¹⁶ Gəsəlla à azlaməna matapla la slaka anjak à waŋ, ama taslilà vok anja mawurəŋ ala aw.” ¹⁷ Yesu agòḏ à atà: “Kayyà, akul azladza dzanjdzanŋa, ŋgaha mawisiga, dagay mbà məḏəḏz à ahəŋ anina ma? Tseràh mbà, gəḏàbasahakulaŋ ma? Lagwa sàwŋəla bæzi uwatà à abanay!” ¹⁸ La abatà Yesu aslèh məl à masasəḏok mawisiga à gəl, ŋgaha masasəḏok mawisiga uwaga asà à uda la bæzi uwaga la abà, awur ala la mok uwatà.

¹⁹ La lig la ahəŋ, azlaməna matapla la slaka anja tazà à vok à slaka anja, tanàval à gay ala: “Kà mana məsəlla vok, kà masəlla masasəḏok mawisiga uwaga à uda aw ma?” ²⁰ Yesu agòḏ à atà: “Kà uwana madiŋal gəl à vok ankul asla aw! Haday, la dziriga: Agay madiŋal gel à vok ankul à gay la ahəŋ bə kat tsəhay hamadz kà, naka kaslawwala vok anja magòḏ à dadəgwal uwanay: ‘Zà à vok la abanay!’, ŋgaha masla aslala vok anja maz à vok. Tatak la ahəŋ adəḏ à akul gay à ahəŋ aw. ((²¹ Ama say la madəv kuḏa la makəs nəlay la uwana, dza aslala vok anja masəla à tsəhay masasəḏok mawisiga uwanay à uda!))”

Yesu apəh gay mamətsay anja la mawul à uda anja kà masəla

(Mark 9.30-32; Luka 9.43-45)

²² Vuḏ tekula, mok uwana azlaməna matapla la slaka anja tagà la kutso Galili, Yesu agòḏ à atà: “Kona anja dza kà taməvay à ahəl anja azladza. ²³ Tadəkəḏay, ama la mahənay mamakər adəwul à uda la mamətsay.” Azlaməna matapla tadzà à ahəŋ la mazaw la gel la abà məŋga, kà gay uwaga.

Mapəl hadama anja məŋ gəy Zəzagəla

²⁴ Mok uwana Yesu la azlaməna matapla la slaka anja tabəz à Kapernahum, azlaməna mazəḑ hadama anja məŋ gəy Zəzagəla tazà à vok à slaka Piyer, kà manaval à gay ala: “Piyer, məŋga ankul ma apəl hadama anja məŋ gəy Zəzagəla aw takay?” ²⁵ “Iyay, apəlay”, Piyer agòḏal. Mok uwana Piyer adà à gəy la kay, Yesu adzəkà gay teranja, agòḏal: “Mana kadzugway ma Səmon? Azlauwana tapəlay hadama banjaw tapəl gəl à azlasufəl anja gudəŋ à vok uwanay uwà? Azlaməna gudəŋ takay awma azlamələk dza takay?” ²⁶ “Azlamələk dza”, Piyer agòḏal. Yesu agòḏal: “Tsa kiya uwaga kà, azlaməna gudəŋ tapəlay aw. ²⁷ Ama kà mazin à atà à gəl aw kà, hād à dərəv à abà, dʻaduw kodzar anjak à iyaw à abà, kilfi uwana kadətsa à vok à makəsay kà, kadəpakw à gay anja kadəbəzal gursu la paŋaw anja la awtəy kà, kadəhəlay, ŋgaha kadəbək à atà kà anjami anu səla.”

18

Uwa məŋga gə uwa?

(Mark 9.33-37; Luka 9.46-48)

¹ La kaslā uwatà azlaməna matapla tazà à vok à slaka Yesu ŋgaha tanàval: “Uwa, məŋga gə la makoray Zəzagəla uwa?” ² Yesu azàla bæzi ŋuv gə, atsizllatəŋ à huma à gay, ³ agòḏ à atà: “Gəpəh à akul la dziriga: Banja kapakaw bokuba bæzi ŋuv gə uwanay aw kà, kadəḏaw à makoray Zəzagəla aw. ⁴ Dza uwana tələmmaga bokuba bæzi uwanay kà, masla la uwana dza məŋga gə la makoray Zəzagəla. ⁵ ŋgaha: Dza uwana akəs bæzi ŋuv gə uwanay kà sləm gulo kà, akəs gi babay.”

Madukw mabəziga bəziga à tsakana à abà

(Mark 9.42-48; Luka 17.1-2)

⁶ “Dza uwana adukw mabəziga bəziga uwanay adiŋ gi gəl à vok, à tsakana à abà kà, ŋuləm kà anja kà tawadəl magol dzəgla à kuda, ŋgaha taduw à dərəv à abà. ⁷ Kayyà ŋgərpa kà anja gudəŋ à vok uwanay, kà uwana aga la azlatatak uwana adala dza à tsakana à abà. Dza aslala vok kà madəḏ gay à uwaga à ahəŋ aw, ama ŋgərpa agay la dza uwana abiy uwaga à waŋ.”

⁸ “Banja ahəl anjak banjaw asik anjak la uwana adala ka à tsakana à abà kà, nàtsàh à tsəh ala, wùtsla kərkər la kak, ŋuləm kahàd à sifa dziriga à abà la ahəl tekula banjaw la asik tekula, à kà kak anja mad à gəy akəl uwana à abà amatsila aw la azlaahəl anjak la azlaasik anjak gesina anja koksikoksi. ⁹ Banja kà yewdi anjak la uwana adala ka à tsakana à abà kà, bəḏ à adi ala, məlla kərkər, ŋuləm kahàd à sifa à abà ŋizliŋa ŋizliŋ la yewdi, kà kak anja mad à gəy akəl uwana à abà amatsila aw anja koksikoksi la yewdi səla nna.”

¹⁰ “Dahàw hanjëli kà mapəseyaw tekula aña azlabəza uwanay, kà uwana gəpəh à akul à vok à abà kà, la zagəla kà azlamalika aña tətəzəz à ahəj koksikoksi la huma aña Baba gulo, kà aña tətəzəz.” ((¹¹ Kà uwana Kona aña dza asa à wanj kà mayàh mabəl azlauwana tazahla.)

Gay la gay la abà aña tuwanj mazila gə ngaha la uwana tabəzal
(Luka 15.3-7)

¹² “Mana kadzugwaw à baña dza akor tuwanj dzim, ngaha tekula aña tətəzəz azilə, asək azladzik ladəga gəl aña ladəga gə uwana la gudəj la afik, kà mad mayàh uwana azalə aw takay?”¹³ Gəgod à akul baña adabəzal kà, arabay mənğa kaykay à kà azladzik ladəga gəl aña ladəga uwana tazah ala aw.¹⁴ Kiya uwaga babay, Baba aña kul uwana la zagəla la afik kà, asal amiyaka tekula la tataka azlabəza gə uwaga la abà azila aw.”

Maday la maham gay à vok la abà

¹⁵ “Baña deda aña adahà à ka tsakana à vok, hād à slaka aña, pəh alla mawisiga aña, ama gaw kà akul səla səla pəra. Baña atsəb à ka sləm kà, kabəz deda aña aya.¹⁶ Ama baña akwes kà matsəb à ka sləm kà, zəl à dza tekula à tsəb banjaw səla, kà mapəhay lakəl aña gay uwaga gesina, kà magay la sayda aña azladza səla la afik banjaw aña azladza makər bokuba uwana matsəteray apəhay.¹⁷ Ama baña akweska matsəb à atə sləm kà, pəh uwaga à azlaməna madinjal gəl à vok gesina; ngaha baña atsəna à atə aw kà, pəkaw dza uwaga ala bokuba dza uwana asəl Zəzagəla aw, banjaw kiya masla mazəb hadama.”

Makweska banjaw makəsay

¹⁸ “La dziriga gəpəh à akul uwana kawafawwanj la wəfah, adəgay mawafəngga la zagəla, uwana kapələwwanj ala la wəfah, adəgay mapələnj ala gə la zagəla la afik babay.”

Madəv kudfa la maham gay à vok la abà

¹⁹ “Iyay, gəpəh à akul babay aya kà, baña azladza səla la tataka aña kul la abà, tətəzəz wok gay kà manavay amiyaka bə mana beymi la madəv kudfa la abà kà, Baba gulo uwana la zagəla la afik adəvə à atə.²⁰ Kà uwana la slaka uwana azladza səla banjaw makər taham gay à vok la sləm gulo kà, gi la tataka aña tətəzəz la abà”, Yesu agəd.”

Gay la gay la abà aña

magamza uwana akweska mamatsinj à dza anik ala

²¹ Kiya uwaga Piyer azə à vok à slaka Yesu, anəvalla gay ala: “Sufəl, asik nna gədə-matsinj à deda gulo ala à baña asəkiyə à madəhəj mawisiga à wok aw ma? Tsərah à asik mədəf ay?”²² “Awanj”, Yesu agəd: “Asik mədəf gəgod à ka aw, ama tsərah à asik dzik mədəf asik mədəf.”²³ Kiya uwaga à uwana məgagazləla makoray Zəzagəla la Sufəl anik uwana asal masəl madz à ahəj aña tatak aña la slaka magamza aña.²⁴ Mok uwana tadzəh madzay kà matugway kà, tasəlla dza uwana à wanj anəfay la sili ləfu gə, azlamillion aña waw la wok.²⁵ Dza uwatə agə la tatak kà mapəlla sili uwatə aw. Mənğa aña agəd: Məduw masla ala bokuba mayə, ngaha maduw mis aña ala la azlabəza aña gesina, ngaha kəla tatak uwana akoray gesina, kà mapəlla goder uwana la wok gesina.²⁶ Magamza uwaga akədəf à ahəj la huma aña mənğa aña: ‘Kamkam, bəsəgəj, gədəpəla à ka gesina’, agəd. ²⁷ Kiya uwaga wok aham à mənğa aña: Asə-kalla goder aña uwaga la wok gesina, adəwal gəl, adə aña.”

²⁸ “Magamza maduwal gəl gə uwaga, asə à uda anənjə dza uwana tadəfahə sləray atə səla, uwana goder aña la wok aña sili akur akurga dzim. Uwana adanənjə kà, akəs la kuda agəd: ‘Pəl à gi goder gulo uwana aga à ka la wok.’²⁹ ‘Kamkam, kamkam’, manalay aña akədəfəla à ahəj la magəd: ‘Bəsəgəj, gədəpəla à ka goder aña gesina’, agəd. ³⁰ Ama akəs aw, adəw à danay tsərah à uwana apəl goder aña dən.³¹ Mok uwana azlamagamza anik tanənjə uwaga apəkə wok, tapəkəh ləw mənğa kà uwaga, ngaha tahəd, tapəh uwaga à mənğa aña tətəzəz. ³² Kiya uwaga mənğa aña tətəzəz azalə magamza uwaga. ‘Kak magamza makəsəfər gə, gi gəsək à ka ala goder gulo uwana agə à ka la wok gesina, kà uwana kadəv à gi kuda aw takay?’³³ Naka wok aham à ka kà manalay aña suwanj, bokuba uwana wok ahamə à gi kà kak aw takay?’³⁴ Mənğa uwaga apəkə ləw mənğa lakəl aña, adəw magamza uwaga à danay tsərah à uwana apəl goder aña gesina suwanj.”³⁵ Kiya uwaga Yesu azalənj à gəl: “Baba gulo uwana la zagəla la afik adəfahəkul aña kiya uwaga babay, à baña tekula aña kul amatsənj à deda aña ala la ləw aña gesina aw zla!”

19

*Yesu apahla gay lakəl anja makudək mis ala
(Mark 10.1-12)*

¹ Mok uwana Yesu adakəf gəl à gay uwaga, asà à uda la Galili kà mad à makoray anja Yahudiya uwana à abà la gay dərəv uda anik anja mukwà Urdun. ² Maham à ahəŋ dza anjувaw tanəfà, ngaha awarà azlaməna dufvats anjatà ala gesina.

³ Azla Farisəya anik tazà à vok à slaka Yesu kà matap masla, tanəval: “Hadəy, ma mapəhay gami avà tetəvi à dza kà makudək mis la kəla gay uwala beyli takay?” ⁴ Yesu awùlla à uda, agòd: “Kadzəŋəw uwana matsetseray apəhay aw takay? La madzəka Zəzagəla anjəl zil atà la mis. ⁵ Kà uwaga à uwana zil adəsak à baba anja à ahəŋ, ngaha à iyà anja à ahəŋ kà madz à ahəŋ atà la mis anja, atà səla nna tadəgay vok tekula pəra. ⁶ Kiya uwaga kà, atà səla aya aw, atà tekula pəra, kità kà, dza avàh tatak uwana ala Zəzagəla adahamalla à atà ala gay à vok aw.” ⁷ Azla Farisəya tanəv: “Kà mana zlà ma Musa agòd kà, zil av wakità mavàh vok ala à ahəl anja mis kà atà anja mavàhla, agòd zla ma?” ⁸ Yesu awùlla à uda: “Musa avà à akul tetəvi kà, kà uwana akul azladzandzan. Awkà dagay la madzəka kà, agà kiya uwanay aw. ⁹ Gəpəh à akul la dziriga: Banja dza akudək mis anja, tsa la mazab zil la tsəh aw kà, masla kà adàda à gəl gaw, à banja azəb mis anik.”

¹⁰ Azlaməna matapla la slaka anja tagòdal: “Iyay, banja gay anja zil atà la mis adagay kiya uwanay kà, njuləm mazəb mis aw pəra.” ¹¹ Yesu awùlla à atà ala: “Azladza gesina taslala vok anja makəs mapəhay uwanay aw, say azlauwana Zəzagəla avà à atà maslay pəra. ¹² Tatak anik anik la ahəŋ à uwana adəf gay à dza à ahəŋ, kà mazəb mis dagay la mayyay. Azladza anik kà azladza la uwana tadəhatəŋ à vok, tadadəslàh atà, kà anja azladza anik babay kà tapak kiya uwanay kà makoray Zəzagəla. Dza uwana asla kà makəsəy matapla uwanay kà, akəs!”

*Azladza tasàhla azlabəza à slaka Yesu
(Mark 10.13-16; Luka 18.15-17)*

¹³ Azladza tasàhla azlabəza à slaka Yesu kà masla anja mabək à atà ahəl à gəl, ngaha kà madəv kudə lakəl anjatà. Ama azlaməna matapla la slaka Yesu tavərə atà gay. ¹⁴ Yesu agòd à atà: “Sàkàw azlabəza njuv njuvga tasa à waŋ à slaka gulo, kavəraw atà gay aw, kà uwana makoray Zəzagəla kà anja azlatsəhay gə uwaga”, agòd à atà. ¹⁵ Masla abək à atà ahəl à gəl ngaha adà anja la abatà.

Bəzi kohana galepi gə

(Mark 10.17-31; Luka 18.18-30)

¹⁶ Dza anik azà à vok à slaka Yesu, anəv: “Məŋga, mana à delga gədfəhəŋ, kà gi anja mabəz sifa adəv à gay aw ma?” ¹⁷ Yesu agòd: “Kà mana kanəv à gi lakəl anja delga ma? Dza tekula pəra, delga. Banja asa à ka, kà mabəz sifa adəv à gay aw kà, say kakəs mapəhay gesina.” ¹⁸ “Tsəhay gə uwala?”, agòd à Yesu. Yesu agòd: “Kakəf dza aw, kada à gəl gaw aw, kad à gəl aw, kapəh mawisiga lakəl anja dza aw, ¹⁹ sləkàw baba anjak la iyà anjak, wòyà masla magay anjak bokuba uwana kawoya gəl anjak.” ²⁰ Bəzi kohana agòd: “Uwaga kà, dagay la bəziga la uwana gəkəs uwaga gesina. Mana gə à uwana gədfəhəŋ aya ma?” ²¹ Yesu agòd: “Banja asa à ka anja magay sətaka kà, həd, dāw tatak uwana ala kakoray gesina, ngaha vāh sili gə à azlaməna kudə, kiya uwaga kadəbəz ləmana la zagəla, ngaha sà à waŋ kanəf gi!” ²² Ama mok uwana bəzi kohana atsənà gay uwaga kà, adà anja la mazaw la gəl gə, kà uwana galepi gə kayakay.

²³ Kiya uwaga Yesu agòd à azlaməna matapla la slaka anja: “Gəpəh à akul la dziriga, zlazladə kà anja galepi kà mad à makoray Zəzagəla. ²⁴ Ngaha gəpəh à akul uwanay aya: Njuləm zlugumi aguw à uda la afək lepiri, à kà galepi anja mad à makoray Zəzagəla.”

²⁵ Mok uwana azlaməna matapla la slaka anja tatsən gay uwaga kà, ləv avàlāh atà à gay kayakay la magòd: “Tsa kiya uwanay zlà ma, uwa aslala vok anja mabəlay uwa?”

²⁶ Yesu anəv atà la magòd à atà: “Zlazladə la slaka azladza, ama zlazladə la slaka Zəzagəla aw.”

Masik anja masla asik anja Yesu

(Mark 10.28-31; Luka 18.28-30)

²⁷ Kiya uwaga Piyer agòd: “Tsənəŋ, anu mədəsak à tatak à uwana ahəŋ məkòr gesina, ngaha kà manəf ka. Mana adəpaka vok kà anjami ma?” ²⁸ Yesu agòd à atà: “Gəpəh à akul la dziriga kà: Mok uwana Kona anja dza adədzə madzay la kursi anja mazləbəy anja la afik kà, akul kulo gəl anja səla uwana kanəfaw gi, akul babay kà,

kadádzaw madzay la kursi la afik, kà madàh seriya à tsəhay kulo gəl aŋha səla aŋa Isərayel à gəl. ²⁹ Nŋaha azlauwana gesina tasàk azlagəy aŋatà à ahəŋ baŋaw azladedə aŋatà à ahəŋ, à azladedə aŋatà dəgam gə à ahəŋ, à azlababa aŋatà à ahəŋ, à azlaiyà aŋatà à ahəŋ, à azlabəza aŋatà à ahəŋ, à azlaalàk aŋatà à ahəŋ kà gi, tadàbəzal aŋuvaw asik dzim aya, nŋaha la huma aya sifa uwana adəv à gay aw. ³⁰ Ama aŋuvaw azlaməna huma lagonay, tadəgay azlaməna lig gə, nŋaha aŋuvaw azlaməna lig gə lagonay, tadəgay azlaməna huma.”

20

Azlaməna sləray guf matavərək

¹ “Aŋanay, gəgagazləla makoray Zəzagəla la dza uwana asà à uda la gay bebəŋ bəŋ, kà mahəl azlaməna sləray à guf aŋha à abà. ² Akəs kà mapəl à atà sili aŋa mavakay: Gursu tekula, nŋaha asləl atà à guf à abà. ³ Asà à uda la zil gosila aya, anəŋà azladza anik tatsəzl à ahəŋ la vadavaday la afik kokuɗa sləray. ⁴ Agòɗ à atà: ‘Akul babay, dāw à guf gulo à abà, gədəpəl okul bokuba uwana akəs à vok’. ⁵ Nŋaha tahəd. Kona uwaga asà à uda la tataka afats, nŋaha la afats dat magovagova gərewni delga aya, nŋaha adəhəŋ kiya uwana adəhəŋ aya. ⁶ Nŋaha asà à uda afats dābək agər à abà, abəz azladza anik à gəl uwana tatsəzl à ahəŋ la vadavaday la afik deyday aya. Anāv à atà à gay ala: ‘Kà mana kavakaw à abanay kokuɗa madàh sləray ma?’ ⁷ ‘Dza la ahəŋ ahəl anu aw’, tagòɗal. Agòɗ à atà: ‘Akul bay, dāw à guf gulo à abà!’ ”

⁸ “Mok uwana mokokhu adasa à waŋ, dza aŋa guf agòɗ à kohana aŋha: ‘Zəl azlaməna sləray kà, pəl à atà sili aŋatà, dzəkà la azlaməna ligga, tsəràh à azlauwana tasà à waŋ gay bebəŋ’. ⁹ Azlauwana tadzəkà sləray la afats dābək agər à abà tasà à waŋ, kəla uwabeyuwi aŋatà tabāz à gursu tekula tekula. ¹⁰ Mok uwana tazəl azlaməna mahəl atà teraŋa, tasà à waŋ, tadzūgw kà tadəbəzal kà aduwaŋ à azladza anik, tagòɗ. Ama kəla uwabeyuwi aŋatà tabāzà gursu tekula tekula pəra. ¹¹ La mok uwana takasay kà takokətàhə gəl lakəl aŋa dza aŋa guf. ¹² Nŋaha tagòɗ: ‘Azlaməna sləray uwana tadəhə sləray kà sa tekula pəra kà, kapəl atà kà kalkal la aŋami uwana məbas may vok aŋa mavakay lis à marabak ala ma?’ ¹³ Ama dza aŋa guf awùlla à tekula aŋatà: ‘Slawda gulo, gəvavarà ka aw. ‘Aya’, kagòɗ, kà madàh sləray aŋa mavakay lakəl aŋa gursu tekula aw takay? ¹⁴ Kəs sili aŋak nŋaha kà, dā aŋak. Asa à gi mav à dza uwana gəzəb la lig aŋak la ahəŋ bokuba aŋak suwaŋ. ¹⁵ Kagòɗ ma, gəslala vok aŋa madəhəŋ la sili gulo bokuba uwana asa à gi aw takay? A uwana kadàh à adi ma, kà uwana gəɗahə delga takay?’ ¹⁶ Kiya uwanay azlauwana azlaməna ligga tadəgay azlaməna huma, nŋaha azlaməna huma tadəgay azlaməna ligga”, Yesu agòɗ à atà.

Yesu awulla gay aŋa mamətsay aŋha à tsəh

la mawul à uda aŋha kà maməkər

(Mark 10.32-34; Luka 18.31-34)

¹⁷ Yesu adà à Urusalima à afik. Ahəl azlaməna matapla aŋha kulo gəl aŋha səla uwaga à fəta à awtəy, nŋaha apəh à atà gay la asik lakəl: ¹⁸ “Tsənàwwəŋ, məda à Urusalima lagwa, nŋaha tadāv Kona aŋa dza à ahəl aŋa azlamədzahaga aŋa azlaməna makad tatak à Zəzagəla la ahəl aŋa azlaməna mapəhla mapəhay ala. Tadədukw ala mamətsay à gəl. ¹⁹ Nŋaha tadəvəy à ahəl aŋa azladza uwana azla Yahudiya aw, atà tadəkədəslal, tadəzlabay la kurpi nŋaha tadətataslay à ahəf à adi. Ama la mahəŋay makər kà, adəwul à uda la mamətsay.”

Manavay aŋa iyà aŋa Yakuba la Yuhana

(Mark 10.35-45)

²⁰ Kiya uwaga iyà aŋa azlabəza aŋa Zebede azà à vok à slaka Yesu la azlabəza aŋha, akədəɗ à huma aŋha kà manawal tatak. ²¹ “Mana asa à ka ma?”, Yesu agòɗal. Agòɗ: “Và à gi tetəvi, kà azlabəza gulo səla uwanay kà, tadədzah madzay tekula la ahəl kaf aŋak nŋaha anik la ahəl gudzay aŋak lakəl la makoray aŋak!” ²² “Kasəlaw tatak uwana kanavaw aw”, Yesu agòɗ, “Kaslawwalla vok kà mas tatak à uda la kətsaw nŋərpa uwana la abà gədəsay ay?” “Məslala vok”, tagòɗal. ²³ “Ndzer kadəsaw la kətsaw nŋərpa gulo”, Yesu agòɗ à atà. “Ama la ahəl gulo kà magoɗay lakəl aŋa madz madzay la slaka gulo, anik la ahəl kaf, anik la ahəl gudzay aw. Slaka uwatà kà, kà aŋa azlauwana Baba gulo adəhatəŋ à ahəŋ pəra.”

²⁴ Uwana azlaməna matapla kulo anik uwanay tatsənà uwaga kà, taŋoŋuz lakəl aŋa azladedə səla uwanay. ²⁵ Kiya uwaga Yesu azàla atà gesina, agòɗ: “Kasəlaw kà azlasufəl aŋa gudəŋ à vok tadəhə gasa à azladza à gəl, nŋaha azlaməŋga tapəh la ndzəɗa aŋatà ala. ²⁶ Ama uwaga kà apaka vok kiya uwaga la tataka aŋkul la abà aw, baŋa tekula

la tataka anĵul asal magay mənġa kà, say agay masla mazəb dagum à azladza anik, ²⁷ ngaha baŋa tekula la tataka anĵul asal magay masla huma, say agay mayà anĵul. ²⁸ Amiyaka gi Kona aŋa dza kà, ġəsà à waŋ kà azladza aŋa mazlək gi aw, ama ġəsà à waŋ kà mazlək azladza, la mav sifa gulo bokuba tatak mapəlla ġəl à ahəŋ aŋa azladza anĵuwaw.”

*Yesu awar azlaguləf səla ala
(Mark 10.46-52; Luka 18.35-43)*

²⁹ Mok uwana tasà à uda la gudəŋ Yeriko la abà, maham à ahəŋ dza anĵuwaw tanəfà Yesu. ³⁰ Azlaguləf səla la ahəŋ tadzàh madzay la gay tetəvi tatsənàŋ kà Yesu adà à awtày la abatà, tadzəkà mawiyay: “Mənġa, Kona aŋa David, vok aham à ka kà anu!” ³¹ Maham à ahəŋ dza tasläh à atà məl à ġəl la magodəy: “Dzàw à ahəŋ titi!”, ama tazà kuda à zagəla la mawiyay aya kaykay: “Mənġa, Kona aŋa David, vok aham à ka kà anu!” ³² Yesu atsizilla à ahəŋ, azəl atà, ngaha anàv à atà gay ala: “Mana asa à akul, kà ġədahakulan ma?” ³³ Tagodəl: “Mənġa, kà yewdi gami aŋa manəŋla.” ³⁴ Vok ahamà à Yesu, adəbani yewdi anətà; katskats azladza səla uwaga tanəŋ ala, ngaha tanəfà Yesu.

21

*Yesu ada à Urusalima à abà
(Mark 11.1-11; Luka 19.28-40; Yuhana 12.12-19)*

¹ Kiya uwaga mok uwana tazlábəz kà Urusalima la gudəŋ Betfaze, la gudəŋ kuvu la afik, Yesu asləl azlaməna matapla la slaka aŋha səla à huma à gay. ² Agod à atà: “Dàw à gudəŋ uwatáy à abà la huma anĵul, kadəbəzaw à ziwŋŋu à ġəl mawadəŋ à ahəŋ ġə la bəzi aŋha, pəllaw masla, ngaha sawġəla à waŋ à abanay. ³ Baŋa dza apəh à akul gay “Kà mana mi kà”, ġodəwwal kà, Sufəl awoyəŋ, ngaha tadəsak à akul aŋa masəlla à waŋ.”

⁴ Uwaga apakà vok kà aŋa magodəf à afik aŋa gay aŋa masla mapəhal gay à ahəl aŋa mapəh à azladza uwana agodəf:

⁵ Ġodəw à azlaməna madz à ahəŋ la Səyon kà:
Nəŋəŋ Sufəl anjak atsa à waŋ à slaka anjak
La masləkaway mənġa la ziwŋŋu la afik,
Nġaha la bəzi ziwŋŋu la afik.*

⁶ Azlaməna matapla tadəhəŋ bokuba uwana apəh à atà. ⁷ Tasləlla ziwŋŋu à waŋ la bəzi aŋha, ngaha tadawal azladebdebi anətà à lig. La lig la ahəŋ Yesu adzà à afik.

⁸ Maham à ahəŋ dza anĵuwaw tadawal azladebdebi anətà à tetəvi à ama, ngaha azlaanik tasläh babasl aŋa azlaahəf, à tetəvi à ama kà mazləb masla. ⁹ Azladza uwana taguwà à huma aŋa Yesu tawiyà la marabay: “Mazləbay agay la Kona aŋa David, ngaha Zəzagəla apis gay à dza uwana à vok, atsa à waŋ la sləm aŋa Sufəl Zəzagəla. Mazləbay agay la Zəzagəla uwana kərkər la zagəla la afik!”*

¹⁰ Mok uwana adabəz à Urusalima à abà, azladza gudəŋ uwaga gesina tavədzàh ala. Tanàv à vok: “Uwa à dza uwaga uwa?” ¹¹ “Masla mapəhal gay à ahəl Yesu, zil Nazaret, uwana la Galili”, maham à ahəŋ dza agodəf.

*Yesu la mənġ gày Zəzagəla la aku
(Mark 11.15-19; Luka 19.45-48; Yuhana 2.13-22)*

¹² Uwana tabəz à Urusalima, Yesu ahəd à mənġ gày Zəzagəla à agu, ngaha akudəkàh azlaməna madaw tatak ala la azlaməna masukw tatak à lag la mənġ gày Zəzagəla uwatà la aku. Adakwà table aŋa azlaməna maɓad sili à ahəŋ, ngaha la azlakursi aŋa azlaməna madaw habakoku ala, ¹³ agodəf à atà: “Tatsetsər à wakitə Zəzagəla à abà kà:

‘Gày gulo kà tazallala kà gày madəv kuda. Ama akul kà, kadapakawwan ala kà katsakur aŋa azlaməna à ġəl.’*¹⁴

¹⁴ Kiya uwaga azlaguləf la azladeri tazà à vok à slaka aŋha la mənġ gày Zəzagəla la aku, ngaha awarà atà ala. ¹⁵ Azlamadzahaga aŋa azlaməna mav tatak à Zəzagəla, la azlaməna mapəhla mapəhay ala kà, ġəl akad atà à vok à mok uwana tanəŋ tatak uwana adəhəŋ kà, la mawiyay aŋa azlabəza uwana la mənġ gày Zəzagəla la aku: “Mazləbay agay la Kona aŋa David”, tawiyà. ¹⁶ Kiya uwaga tagodəf à Yesu: “Katsəna uwana tapəhay ay?” “Iyay, ġətsənəŋ”, Yesu agodəf à atà. “Akul kà, kadzəŋəw uwana la matsetseray la abà aw ay? A uwana agodəf kà: Azlabəza la *** azlabəza verna tazləbay, aw takay?”* ¹⁷ Nġaha asà à uda, asək à atà à ahəŋ kà mad à Betaniya kà mahən à abatà.

* 21:5 21.5 Zakari 9.9 * 21:9 21.9 Mahabay 118.25-26 * 21:13 21.13 Yesayya 56.7 * 21:16 21.16 Zakari 9.9
* 21:16 21.16 Mahabay 118.25-26 * 21:16 21.16 Yesayya 56.7 * 21:16 21.16 Mahabay 8.2

Yesu atsafla gudəv
(Mark 11.12-14,20-24)

¹⁸ La bəŋ, mok uwana awül à huđ gudəŋ à abà, may akəs Yesu. ¹⁹ Anəŋà gudəv la gay tetəvi, azà à vok à tsəh aŋha, ama mayyay la vok aw, say babasl pəra. Masla agòđ à gudəv: “Tetuwa kadəyyay aya aw!” La kirim yewdi gudəv uwaga agül à afik, sanlatta. ²⁰ Azlaməna matapla la slaka aŋha tanəŋəŋ, ŋgaha ləv avàl à atà à gay kayka, tanəv à Yesu: “Kakay gudəv uwanay adagula sanlatta la kirim yewdi ma?” ²¹ Yesu agòđ à atà: “Gəpəh à akul la dziriga: Agay mađiŋal gəl à vok aŋkul la ahəŋ, ŋgaha katsaw gay la ləv aŋkul la tsəh aw kà, naka akul kà, kəfahawwanəŋ uwanay gəđahəŋ à gudəv uwanay pəra aw, naka kaslawal à vok aŋa magođay à dadəgwal uwanay: ‘Bəđ à vok la abanay, həđ, katsà gəl à dərəv à abà!’ Kà uwaga apakà vok, hadəy. ²² Baŋa kadiŋawwal gəl à vok kà tatak uwana kanavaw gesina la madəv kuđa la abà kà, kadàbəzawwal.”

Ndzəda aŋa Yesu ma atsa à waŋ ma lala?
(Mark 11.27-33; Luka 20.1-8)

²³ Yesu ahəd à məŋ gəy Zəzagəla à agu, ŋgaha adzəkà matapla tatak. Azlamadzahaga aŋa azlaməna mav tatak à Zəzagəla la azlamasiga aŋa azla Yahudiya tazà à vok à slaka aŋha, ŋgaha tagòđal: “La tetəvi ma uwala kadàh azlatatak uwanay la? Uwa avà à ka ndzəda uwanay uwa?” ²⁴ Yesu agòđ à atà: “Gi babay lagwa kà gənav akul manavay tekula, baŋa kawulaw gi ala manavay uwanay kà, gəđəpəhakulla ndzəda uwana gəđahləŋ tatak uwanay. ²⁵ Uwa à uwana asləl Yuhana masla madàh batem à waŋ uwa? Zəzagəla awma azladza takay?” Ama tadzəkà mabay vok gay la tataka aŋatà la abà, ŋgaha tagòđ: “Baŋa məgođ kà Zəzagəla la uwana asləl à waŋ, adəgođ à anu: ‘Kà mana zlə ma kadiŋaw gəl à masla à vok aw ma?’ ²⁶ Ama baŋa məgođ: ‘Azladza la uwana tasləl à waŋ’, bay kà, guba aza à anu kà maham à ahəŋ dza, kà uwana azladza gesina tasəl kà masla mapəhal gay à ahəl aŋa Zəzagəla kà mapəhay à azladza.” ²⁷ Kiya uwaga tawùlla à Yesu: “Məsəl aw!”. ŋgaha agòđ à atà: “Tsa kətà kà, gi babay kà, gəpəh à akul la ndzəda uwana gəđàhla tatak uwanay babay suwan aw!”

Gay la gay la abà aŋa azlabəza səla

²⁸ Yesu adà à huma à gay la mapəhay: “Mana kadzugaw lakəl aŋa uwanay ma? Dza anik agà la azlabəza səla. Adà à slaka matera, agòđal: ‘Bəzi gulo, həđ, kadàdaha sləray la guf la abà lakana.’ ²⁹ ‘Gəday aw’, agòđal, ama zwek la huma la gay kà, abəđla madzugway aŋha, ahəd, adəhà sləray. ³⁰ Baba ahəd à slaka aŋa anik, apəhal. Masla kà, ‘Ayà, Baba’, agòđal, ama ahəd aw. ³¹ Uwa lala tataka aŋatà la abà adəhà uwana asà à Baba uwa?” “Matera”, tagòđal. Yesu agòđ à atà: “Gəpəh à akul la dziriga: Azlaməna mazəb hadama, la azlaməna mazəb zil tadətsa à vok à makoray Zəzagəla kà akul, ³² kà uwana Yuhana asà à waŋ à slaka aŋkul la mapəhakulla tetəvi dziriga, ama kadiŋawwal gəl à vok aw, kakwesawka. Ama azlaməna mazəb hadama la azlaməna mazəb zil kà, takəs, tadiŋal gəl à vok, bə amiyaka tanəŋà uwaga dadəŋ aw. Ama akul kà, kanəŋaw uwaga, ama kabədawla vok dagay la huđ gə kà mađiŋ gəl à masla à vok aw!”

Gay la gay la abà aŋa azlaməna sləray guf makəsəfər gə
(Mark 12.1-12; Luka 20.9-19)

³³ “Tsəbàw sləm à gay la gay la abà anik. Zil gəy anik la ahəŋ, atsəb guf matavəruk, akəsəl zlagam à adi, ŋgaha alà afək, kà makudits iyaw aŋa mayyay ahəf aŋha à abà, ŋgaha aŋəl gəy mad à afik maday, kà aŋa masla manəŋla guf, asàkla guf uwatà à azlaməna sləray la ahəl. ŋgaha adà aŋha à mauguzahay kərkək.” ³⁴ Mok uwana təla mahəŋay tatak adaslay, asləl azlamagamza aŋha à slaka azlaməna sləray guf kà mazəbəl humà mahəŋay aŋa tatak aŋha. ³⁵ Ama azlaməna sləray takəs à atà, tazlāb anik, takəđ anik, tatsəh anik la akur. ³⁶ Ama masla guf asləl azlamagamza anik aya, uwana atà dəŋ kà azlauwana uwarà, ama azlaməna sləray guf tadəhà à atà à vok bokuba uwana tadəhəŋ azlamatera à vok. ³⁷ La lig aŋa uwaga la ahəŋ, asləl bəzi aŋa huđ aŋha, agòđ kà: ‘Tadəsləkaw masla’. ³⁸ Ama mok uwana azlaməna sləray guf tanəŋ bəzi aŋha, tagòđ kà atà kà atà: ‘Yewwa, masla la uwana adəgay dza aŋa tatak bəwbaw. Məkəđ masla, ŋgaha mədàbəđal à gəl!’ ³⁹ Takəs, tadüw à uda la guf la abà, takəđ.”

⁴⁰ Yesu anəv: “Iyay zla, baŋa dza aŋa guf adəsa à waŋ, ma mana adədehəŋ la azlaməna sləray uwaga ma?” ⁴¹ Tagòđal: “Adəkəđ azlaməna sləray mawisiga uwaga à gay, ŋgaha adəvə guf à ahəl aŋa azlaməna sləray anik, uwana tadəvəhal mahəŋay aŋa tatak aŋha la mok uwana asəl.” ⁴² “Iyay”, Yesu agòđ à atà: “Kadzəŋəw didi à uwana matsetseray apəhay aw takay?

‘Akur uwana azlaməna maŋal gəy taməl ala kà,

Masla la uwana adapak akur mawad gay,

Kiya uwaga la uwana Sufel adfehøj,

Nghaha uwaga ka akosa a vok ka anjami ka manøj uwaga!"*⁴³

⁴³ Ka uwaga Yesu azaløj a gøl: "Haday, la dziriga, gøpøh a akul, makoray Zøzagøla adagay mazøbakullanj ala ga, ka mav a tsøhay anik uwana adavà mayyay a møjga anha. ((⁴⁴ Køla dza uwana atød a akur uwanay a afik ka, adakalahla. Ama banja akur la uwana atød a dza a gøl ka aslørødøj ala kødenna.))"*

⁴⁵ Azlamadzahaga anja azlamøna mav tatak a Zøzagøla la azla Farisøya tatsønà gay la gay la abà uwaga ka Yesu ka apøhay ka lakøl anjata. ⁴⁶ Kiya uwaga tayah dabaray ka makøsay, ama guba akøs atà ka maham a ahøj dza, uwana tapakà Yesu ala ka masla mapøhal gay a ahål ka mapähla a azladza.

22

Gay la gay la abà anja møj tatak may ka mazøb mis

(Luka 14.15-24)

¹ Yesu apøhatàla la gay la gay la abà, agød a atà: ² "Aganay tatak uwana møgagazløla la makoray anja Zøzagøla: Sufel anik atà magøl tatak may ka mazøb mis anja bøzi anha.

³ Asløl azlamagamza anha ka mazalläh azladza uwana azalläh atà ka anja tatak may uwaga, ama asà a atà mas a waj aw. ⁴ Asløl azlaanik aya, la mapøhay uwanay la ahål: "Gødaw a azladza uwana gøzalläh atà ka: Tatak may gulo ka adahønay adagay, azlakokur gulo, la azlatatak gulo magag seyga gødakadafy gesina, adahønay. Säv a waj a tatak may mazøb mis a gøl!" ⁵ Ama azlamøna mazala atà ka, tafäl sløm aw, tafähøj a atà a azlaudøra anjata anik anik. Anik ahåd a guf anha a abà, anik bay a matsakalay anha. ⁶ Azlaanik takøs azlamagamza, tatørøbähà atà, nghaha takad azlaanik. ⁷ Kiya uwaga Sufel apak løv møjga, asløl azlaslodzi anha ka makad atà la mababøh gudøj anjata a gay la akål. ⁸ Nghaha agød a azlamagamza anha: "Tatak may anja mazøb mis ka adagay nekwa, ama azlamøna mazala atà ga ka tadabøzal aw. ⁹ Lagwa ka, däv a azlabøza tetøvi a ama gesina, uguzähaw, säwla a waj køla dza uwana kabøzawwal a tatak may a gøl." ¹⁰ Azlamagamza tahåd a azlabøza tetøvi a ama, nghaha tahamà gay azlauwana a vok tabøzal gesina, azlamawisiga, la azladelga nghaha kiya uwaga a uwana gay madøvaday ahønà ala la dza."

¹¹ "La lig la ahøj Sufel asà a gay ka manørøz azladza uwana tazalläh atà, nghaha anøj dza uwana lukut mazøb mis la vok aw. ¹² Sufel agødäl: 'Slawda gulo, kakay kaslà ka mas a gay uwanay a agu, kokudä lukut mazøb mis la vok ma?' Ama dza uwaga asläla vok ka mabadma aya aw. ¹³ Nghaha Sufel agød a azlamagamza anha: 'Tsørøkäv azlaahål anha la azlaasik anha nghaha düwäv a møløs a abà la uda, la abatà la uwana mawiyay la mapad slif la tsøh ala la ahøj, ¹⁴ ka a uwana azlamøna mazal atà ga anjuvaw, ama azlamøna matsatsamani atà ga ka døj aw'."

Mapøl hadama a møj suføl

(Mark 12.13-17; Luka 20.20-26)

¹⁵ Azla Farisøya tahåd, takøs sawaray ka atà anja masølayla: "Kakay a uwana møslala vok anja mabøzal a tsøh la manavay mi?", tagød. ¹⁶ Tasløl azlakohana anjata la azlaanik la tataka maham a ahøj matsøn vok gay anja Herod la abà, tahåd ka magod a Yesu: "Møjga, møsøl ka dziriga la uwana katapla a azladza anja madz a ahøj uwana asà a Zøzagøla, kurit yewdi agod a ka, ka madfehøj anja azladza uwana tadzugway aw, ka uwana kadäh tatak la mahoy adi uwana dza adfehøj aw. ¹⁷ Lagwa ka: Pøh a anu uwana kadzugw lakøl anja uwanay zla: Mapøhay gami ma, avà a anu tetøvi ka mapøl hadama a møj suføl anja azla Rom takay, awma kakay ma?" ¹⁸ Ama Yesu asøl madzugway mawisiga anjata, agød a atà: "Azlamøna magolla dza, ka mana asa a akul anja mabøz gi a tsøh ma?" ¹⁹ Pøhäv gi ala sili uwaga kapølawla hadama tsi!" Tapøhalla akur sili. ²⁰ Nghaha Yesu anäv a atà: "Gøl la sløm uwanay ma anja uwa la sili uwanay la afik uwa?" ²¹ "Anja møj suføl", tagødäl. Kiya uwaga Yesu agød a atà: "Kità ka, pøläw a møj suføl Zøsar tatak uwana anha, nghaha pøläw a Zøzagøla uwana anha suwanj!"

²² Mok uwana tatsøn mawulla a uda anja Yesu kiya uwaga, løv aväläh a atà a gay kaykay, tasakal, tadà anjata.

Manavay lakøl anja mawul a uda la mamøtsay

(Mark 12.18-27; Luka 20.27-40)

²³ La mavakay uwatà, azla Sadukiya, atà uwana mawul a uda la mamøtsay la ahøj aw tagod, tasà a waj a slaka Yesu, ka manaval. ²⁴ Tanäväl: "Møjga, a aganay uwana

Musa apèh: Banja dza amèts anja mis ala kokudfa maβez bèzi kà, say deda anja azèb à uda la gày kudfa ngaha atsilla tsèhay anja ala. ²⁵ Azladza la ahøj, atà mèdèf, la azladede anjatà la tataka gami la abà la abanay. Magolga azèb mis, amètsal à kèl ala kokudfa maβezal bèzi, ngaha asàkla mis kudfa à deda anja. ²⁶ Apakà vok kalkal la uwaga la deda masèla bay, ngaha kiya uwaga la mamaker aya, ngaha kà mèdèf nna gesina apakà vok kiya uwaga. ²⁷ La lig anjatà la ahøj gesina kà, mis amèts. ²⁸ La vuf uwana azlamèna mazimnekid tadawul à uda ma, atà mèdèf uwaga ma mis adàgay ma anja uwa? Kà uwana gesina anjatà kà, tazàb?" ²⁹ Yesu agòd à atà: "Kazawla, haday zla, kà uwana kasèlaw bà amiyaka matsetserayga, bà amiyaka ndzèdfa anja Zèzagèla aw. ³⁰ Kà uwana mok uwana azladza tadawul à uda la mamètsay kà, mazèb vok adàgay la ahøj aya aw. Tadàdza à ahøj kà bokuba azlamalika uwana la zagèla. ³¹ Lakèl anja azlamazimnekid uwana tadawul à uda la mamètsay kà kadzenjaw à uwana Zèzagèla apèh lakèl anja aw ay? Agòd:

³² 'Gi Zèzagèla anja Abèraham, gi Zèzagèla anja Isak, gi Zèzagèla anja Yakuba'✧
Zèzagèla azàlàng à gèl Zèzagèla kà anja azladza uwana la sifa, kà anja azlamazimnekid aw."

³³ Maham à ahøj dza uwana tatsènà uwaga kà, lèv avàlàh à atà à gay møjnga kà matapla anja.

Mapèhay uwana aduwa azlaanik gesina
(Mark 12.28-34; Luka 10.25-28)

³⁴ Mok uwana azla Farisèya tatsènàng Yesu adamèl gèl à azla Sadukiya à ahøj la gay kà, tahamà gay à vok. ³⁵ Ngaha tekula anjatà uwana atapla mapèhay à azladza asàl kà makèsal asik la tsèh ala, anàval à gay ala: ³⁶ "Møjnga, mapèhay gami ma uwala à uwana aduwa azlaanik gesina ala?" ³⁷ Yesu agòd: "Wòyà Sufèl Zèzagèla anjak la lèv anjak gesina, la sifa anjak gesina, la hanjèli anjak gesina, ngaha la masasèdèk anjak gesina bay. ³⁸ Uwaga la uwana mapèhay uwana aduwa azlaanik. ³⁹ Ngaha aganay masèla anja uwana tazlà à gay kalakal: Wòyà masla magay anjak bokuba gèl anjak. ⁴⁰ Mapèhay anja Musa la azlamatapla anja azlamèna mapèh à atà gay à ahàl gesina tapèh kà lakèl anja mapèhay sèla uwaga."

Kristu atà la David

(Mark 12.35-37; Luka 20.41-44)

⁴¹ Uwana azla Farisèya tahamà gay à vok kà, Yesu anavà à atà gay uwanay: ⁴² "Mana kadzugwaw lakèl anja Kristu ma? Aga ma mayyi à tsèh ala ma anja uwa?" "Mayyi à tsèh ala anja David!", tagòd. ⁴³ Yesu agòd à atà: "Kakay zlà ma, David uwana masasèdèk Zèzagèla aguwà la masla la abà, aslàla vok azàlèl Sufèl ma? Kà uwana David agòd:

⁴⁴ 'Sufèl Zèzagèla agòd à Sufèl gulo:

Dzà madzay la ahàl kaf gulo lakèl,

Tsèràh à uwana gèbèk à kà azlamèna mèzam anjak à tsèh asik.'✧

⁴⁵ Iyay zla, banja David azàlèl ala Sufèl gulo ma, kakay Kristu apak kona anja ma?" ⁴⁶ Dza la ahøj aslàla vok kà mawulla gay uwaga à uda amiyaka tekula aw, ngaha dagay la mavakay uwatà, dza aslàla vok kà manaval manavay aya aw.

23

Yesu agòd: "Dahàw hanjèli kà azla Farisèya la azlamèna mapàhla mapèhay ala"
(Mark 12.38-39; Luka 11.43,46; 20.45-46)

¹ La lig la ahøj, Yesu agòl à huma à slaka maham à ahøj dza la azlamèna matapla la slaka anja ² agòd à atà: "Azlamèna mapàhla mapèhay ala la azla Farisèya, slèray anjatà kà mapàhla mapèhay anja Musa à azladza. ³ Kiya uwaga kà, kèsaw gay anjatà, ngaha hanàw uwana ala tapèh à akul gesina, ama kadahawwanj bokuba madèhøj anjatà aw, kà uwana atà takès uwana tatapla à azladza anik aw. ⁴ Tawàdàh tatak mahanayga kà mafàh à azladza anik à gèl, ama atà kà takès aw, amiyaka bà gay gèl ahàl anjatà babay kà tadèbèlani aw. ⁵ Ama tadàh slèray anjatà gesina kà la huma yewdi anja azladza pèra. Tawàdàhla azlalaya à vok la azlagabaga bèzlèh bèzlèhnga à vok, uwana matsetser à ahàl azlamapèhay anik anik anja wakità Zèzagèla à adi, ngaha la azlagwazazuv duksuffa la azlalukut anjatà la gay. ⁶ Asa à atà kà azlaslaka teranja la azlagày madèv kudfa la aku, la azlatatak may lakèl kà manøj à atà anja azladza. ⁷ Asa à atà bay kà azladza tadàhaha à atà 'Ayyi' la azlavadavaday la afik, la mazalàhatàla azlamøjnga. ⁸ Ama akul kà, kayahaw mazalakulla azlamøjnga aw, kà uwana akul gesina kà akul azladede, ngaha møjnga anjuk kà tekula ahàl pèra. ⁹ Kazalawla Baba à dza asik babay aw, kà uwana

akul kà Baba ankul kà tekula à ahàl pèra, masla uwana la zagèla la afik. ¹⁰ Ngaha aya kayahaw mazalakulla sufèl babay aw, kà uwana Sufèl ankul kà tekula à ahàl pèra, uwaga kà Kristu. ¹¹ Mazèb gèl gá ankul kà, agá kà bokuba masla mazèb à akul dogum. ¹² Dza uwana azigèy gèl kà tadàwulla à wèdàh, ngaha dza uwana awulla gèl à wèdàh kà, tazigèyèy.

*Yesu aslèh vok à azlamèna matapla mapèhay la azla Farisèya
(Mark 12.40; Luka 11.39-42,44,52; 20.47)*

¹³ “Ngørpa agay la akul, akul azlamèna matapla mapèhay, la akul azla Farisèya. Akul azlamèna magolla dza. Katsakaw à gamagày anja makoray Zèzagèla à ama kà azladza. Tekedfik kà, akul la gèl ankul kà asa à akul mad à gày aw, azlauwana tayàh mad à gày bay kavàw à atà tetèvi aw.”

((¹⁴ “Ngørpa agay la akul, akul azlamèna matapla mapèhay la akul azla Farisèya, akul azlamèna magolla dza. Kazawaw azlamis kudà à uda gesina, ngaha aya kavakaw à madèw kudà à abà kà mapèhla gèl ankul ala la huma azladza. Kà uwaga à uwana kadàbèzaw seriya uwana aduwa anja azladza anik.”))

¹⁵ “Ngørpa agay la akul, akul azlamèna matapla mapèhay la akul azla Farisèya, akul azlamèna magolla dza. Kauguzahaw dawali dawali gesina la gudèy la vok, amiyaka la kèsлах iyaw babay, kà akul anja maèz masla mapèh gay la lèw ala tekula. Ngaha banja kabèzàwwal aya kà, kapakàwwàl ala kà bèzi anja gày akàl daðuwa à gay akul asik sèla.”

¹⁶ “Ngørpa agay la akul, akul azlamèna maguwàh azlagulèf à huma. Kagodaw kà: ‘Banja dza azuw mawadáy la mèn gày Zèzagèla kà, uwaga kà deyday’, kagodaw. ‘Ama banja azuw mawadáy kà la luwàluwà uwana la gày Zèzagèla la aku kà, mawadáy adànéfay’, kagodaw. ¹⁷ Akul azlakusòju, akul azlagulèf! Uwa la à uwana mènja gá la? Luwàluwà ay awma mèn gày Zèzagèla uwana masla la uwana agèy luwàluwà uwaga sètaka takay? ¹⁸ Kagodaw aya kà: ‘Banja dza azuw mawadáy la slaka makèf tatak kà, uwaga kà deyday’, kagodaw, ‘Ama dza uwana azuw mawadáy la tatak makèdayga uwana la afik kà, mawadáy adànéfay’, kagodaw. ¹⁹ Akul azlagulèf, uwa la à uwana mènja gá la? Tatak makèdayga ay awma slaka makèf tatak uwana agèy tatak makèdayga sètaka takay? ²⁰ Kà uwaga kà, dza uwana azuw mawadáy la slaka makèf tatak kà azuw mawadáy la tatak makèdayga uwana la afik babay. ²¹ Dza uwana azuw mawadáy la mèn gày Zèzagèla kà, azuw mawadáy la mèn gày Zèzagèla ngaha la Zèzagèla uwana adz à ahèy la aku babay. ²² Dza uwana azuw mawadáy la zagèla kà, azuw mawadáy la kursi Sufèl anja zagèla, ngaha la masla uwana adz à ahèy la afik babay.”

²³ “Ngørpa agay la akul, akul azlamèna matapla mapèhay, ngaha la akul azla Farisèya, akul azlamèna magolla dza, kavàw makulo anja tatak ankul, bamèraka la azlatsèhay alàl anik anik gesina, ama kapèsewaw uwana aduwa à vok la mapèhay la abà, bokuba madèhèy delga la tølèmma, ngaha la madinjal gèl à vok. Uwaga la uwana akèsà à vok kà makèsay la kokuda kapèsewaw azlaanik uwanay. ²⁴ Akul azlamèna maguwàh azlagulèf à huma, kazabaw slaslam à uda la tataka masay ankul la abà, ama zlugumi kà kadàguwa à gay.”

²⁵ “Ngørpa agay la akul, akul azlamèna matapla mapèhay, la akul azla Farisèya, akul azlamèna magolla dza, kapalaw lig anja kètsaw la azlakèslad ankul, ama la huð ankul kà kahènwala la makèsafèr dzèbanja, ngaha la gèl la adi gesina. ²⁶ Kak zil Farisèya gulèf gá, pàl huð kètsaw dadàn, ngaha lig gá adàgay kuzekaka babay.”

²⁷ “Ngørpa agay la akul, akul azlamèna matapla mapèhay, la akul azla Farisèya, akul azlamèna magolla dza. Akul kà bokuba akul azlazèvay uwana tawodènjla, ahèd la lig gá, ama la huð gá kà, mahènlaga la azlatatak mazinga vanvavan. ²⁸ Akul babay kà la lig gá kà, kapèhawla vok ala kà kiya uwaga: ‘Anu azladza delga’, kagodaw, ama la huð kà kahènwala la magolla dza ngaha la mawisiga”, Yesu agòd à atà.

*Seriya uwana lakèl anja azlamèna magolla dza
(Luka 11.47-51)*

²⁹ Yesu ahàd à huma à gay la magodáy: “Ngørpa agay la akul, akul azlamèna matapla mapèhay, la akul azla Farisèya, akul azlamèna magolla dza, kanjàhàw zèvay anja azlamèna mapèh à atà gay à ahàl kà mapèhla à azladza ala kà lela. Kadahàw azlatatak bèdà à azlazèvay anja azlauwana à vok tadzà à ahèy la dziriga la abà. ³⁰ ‘Aganay mògay la ahèy la zamana anja azlababa gami madzidziga kà naka mèdàh slèray anina kà makèf azlamèna mapèh à atà gay à ahàl kà mapèh à azladza aw’, kagodaw aya. ³¹ La gèl ankul kà, kasèlaw kà akul azlamayyi à tsèh ala anja azladza uwana takàdàh azlamèna mapèh à atà gay à ahàl uwaga. ³² Kètà zlà kà, dàw à huma à gay kadèwawla slèray uwana à

gay azlababa an̄kul tadzəkà mad̄ehəñ zla! ³³ Akul azlabəza matsapa: ‘Kakay mədətəf seriya an̄a gày ahal̄ la gay ala?’, kagod̄aw ma!”

Gay makədf̄ gəl à ahəñ

³⁴ Ngaha agod̄f̄ aya: “Kà uwaga katsənàwəwəñ lela, gədàsləl̄ akul à azlaməna mapəh à atà gay à ahəl̄ à wəñ, la azlaməna han̄kəliga, ngaha la azlauwana tasəl̄ mapəhay. Kadàkad̄aw azlaanik, azlaanik aya kà, kadàtataslaw atà à ahəf̄ à adi, azlaanik kadà-zlabahaw atà la kurpi la gày madəv̄ kud̄a la aku, ngaha aya kadənəfahaw la gudəñ la gudəñ kà makədf̄ atà. ³⁵ Kiya uwaga à uwana an̄iz an̄a azladza dziriga uwana takàdf̄ah̄h̄h̄ atà dadzəka à vok la Abel, dza dziriga uwana takədf̄, tsərəh̄ à makədf̄ Zakari, kona an̄a Baraki uwana kakədf̄aw la tataka an̄a azlagaȳ tsifan̄aga à abà la slaka makədf̄ tatak. ³⁶ Had̄ay, gəpəh̄ à akul la dziriga kà, kà uwaga gesina adətədaȳ kà à gəl an̄a azladza an̄a zamana uwanay lakana.”

*Yesu atà la Urusalima
(Luka 13.34-35)*

³⁷ “Urusalima, Urusalima, kak la uwana kakədf̄ azlaməna mapəh̄ à atà gay à ahəl̄ uwana à gay, ngaha katsəh̄ azlauwana Zəzagəla aslala kà atà à wəñ la akur. Gəday vok kà mən̄ga, kà maham gay à vok an̄a azladza an̄ak la slaka gulo, bokuba gotsak uwana aham gay azlabəza an̄ha à vok la tsəh̄ gogozlāh̄ an̄ha, ama kakəsaw aw. ³⁸ Ngaha zla, lagwa kà, gày an̄kul adəgaȳ n̄vagay. ³⁹ La kità gəpəh̄ à akul kà: Dagay lakana kadənəñaw gi aya tsərəh̄ à uwana: ‘Məpis gay à vok à gay la dza uwana atsa à wəñ la sləm an̄a Sufəl’,[✠] kadəgod̄aw”, Yesu agod̄f̄.

24

*Gay lakəl̄ an̄a madəv̄ à gay gudəñ à vok
(Mark 13.1-3; Luka 21.5-6)*

¹ Kiya uwaga Yesu asà à lag la mən̄ gày Zəzagəla la aku. Uwana adiy an̄ha kà, azlaməna matapla la slaka an̄ha tazà à vok à slaka an̄ha kà mapəhalla man̄alay an̄a mən̄ gày Zəzagəla uwatà. ² Kiya uwaga Yesu awùlla à uda, agod̄f̄ à atà: “Kanəñaw uwaga gesina takay? Had̄ay gəpəh̄ à akul la dziriga kà, amiyaka akur tekula babay kà adəgədal̄ à gay aw, tadàkalah̄ à ahəñ gesina.”

Azlan̄gərpa uwana tadàtsa à vok à wəñ

*kà madəv̄ à gay gudəñ à vok
(Mark 13.3-13; Luka 21.7-19)*

³ Yesu adzà madzay la gudəñ kuvu la afik, la abatà azlaməna matapla la slaka an̄ha tazà à vok à slaka an̄ha, tanəval̄ à gay ala: “Pəhanula: Mbà uwaga adəpaka vok ma, masəlay ma uwala adəpəhanula kaslā mas à wəñ an̄ak la makədf̄ gəl à ahəñ gudəñ à vok la?”

⁴ Yesu awùlla à atà ala: “Dahəw han̄kəli kà an̄a mapapatakulla aw. ⁵ Kà uwana azladza an̄uvaw tadàsa à wəñ la sləm gulo, ngaha: ‘Gi Kristu!’, tadəgod̄f̄ay, ngaha tadəvavarah̄ azladza an̄uvaw à bada à abà. ⁶ Kadàtsənaw azlamawiyay an̄a guvəl̄, ngaha azlagay lakəl̄ an̄a guvəl̄. Guba adəkəs akul aw, uwaga kà, say leri apaka vok, ama uwaga kà makədf̄ gəl à ahəñ gudəñ à vok dadəñ aw. ⁷ Azladza tsəhay anik tadəp guvəl̄ la azlatsəhay anik, ngaha makoray anik adəp guvəl̄ la makoray anik, azlamay tadəgahay la ahəñ, ngaha azlaməbəl̄akāh̄ vok an̄a kutso tadəgahay la ahəñ la azlaslaka anik anik. ⁸ Ama azlatatak uwaga gesina adəpaka vok kà bokuba madzəka mazay an̄a huđ bəzi.”

⁹ “Azladza tadəvāh̄ akul à ahəl̄ an̄a azladza anik kà matərəbāh̄ akul, ngaha tadəkədf̄ah̄ akul. Azlatsəhay gudəñ à vok gesina tadəpəsew akul kà uwana kawoyaw gi. ¹⁰ La kaslā uwatà, azladza an̄uvaw tadəsak à madiñal̄ gəl à vok la tsəh̄ ala, ngaha tadətah̄ à vok kaf à gəl, ngaha tadəzin̄ vok à vok ala kà atà à atà. ¹¹ Azlaməna mapəh̄ à atà gay à ahəl̄ fida gə tadəpahla vok ala la tataka an̄kul la abà, tadəvavarah̄ azladza anik an̄kul an̄uvaw. ¹² Mawisiga la uwana adəsəl̄h̄ gəl à ahəñ à kà delga, azladza gay mən̄ga tadəwadəh̄ vok à uda la uwaga la abà à kà delga. ¹³ Ama dza uwana adəbasin̄ tsərəh̄ à makədf̄ gəl à ahəñ la tetəvi an̄a Zəzagəla à ama kà, adəbəlay. ¹⁴ Gay marabəñ an̄a makoray Zəzagəla adəgay mapəhayga la gudəñ la vok gesina, kà mazin̄ gə à azlatsəhay gudəñ à vok gesina. Ban̄a adatsanay kiya uwaga kà, madəv̄ à gay gudəñ à vok adəzlan̄jalay.”

*Məzam an̄a dza uwana Zəzagəla afəl̄ dzakwa à gəl
(Mark 13.14-23; Luka 21.20-24)*

¹⁵ “Mok uwana kadànéñaw masla mēzam anja Kristu, uwana masla mapəhal gay à ahàl Daniyel apəh, à uwana atsižl à slaka tsikasla gā à abà kà, (kəla dza uwana adzeñ uwaga kà, adàha hanjkəli lela!) ¹⁶ Kiya uwaga kà azlauwana la kutso Yahudiya kà, tadàhoy à gudəñ à afik. ¹⁷ Dza uwana la gəl gày babay, adàsa à ahəñ kà mad à gày kà mahəl azlatatak uwana la huđ gày anja aya aw. ¹⁸ Nğaha dza uwana la fəta, adàwul à mtəga kà mahəl dəbdəbi anja la mtəga anja aw. ¹⁹ Kay, nğərpa mənğa adəgay la azlamis uwana la bəza la huđ, nğaha la azlauwana bəza vərna aga la atà la ahàl la mavakay uwatà! ²⁰ Dəwəw kuđa à Zəzagəla kà mavakay mawisiga uwaga anja matəđ à təla anasl à abà banjaw à vuđ maduw ləv à abà aw. ²¹ La kaslā uwatà kà, nğərpa mənğa adəgay la ahəñ uwana adapakà vok dagay uwana Zəzagəla adàhà gudəñ à vok tsərah à lakana aw, uwana adəpaka vok bokuba uwaga aya dikiđiki aw. ²² Agayna Zəzagəla atetuwa mavakay uwaga aw kà, naka dza la ahəñ abəlay aw, ama Zəzagəla atetuwa mavakay uwaga kà, kà azlaanja uwana atsatsəmàni atà.”

²³ “Banja ‘Kristu kà à aganay, la abanay, à agatà la abatà’, tagođ à akul kà, kakəsaw gay anjatà aw. ²⁴ Kà uwana azlakristu fidaga, la azlaməna mapəh à atà gay à ahàl fida gā tadəpahahla vok ala. Tadəđah azlamagol nadzipo kà mavavarla azladza amiyaka bā azlauwana Zəzagəla atsatsəmàni atà. ²⁵ Tsəbəwwal sləm kà uwana gədapəh à akul à vok à abà.”

²⁶ “Kità kà, banja: ‘A agatà la kəsaf la abà, la abatà’, tagođ à akul kà, kadaw aw! Banjaw dza agođ à akul: ‘Aganay adada à gày à abà la abanay’, tagođ à akul kà, kakəsaw gay anja aw. ²⁷ Bokuba habaga uwana awutsəđ à uda la ləv zagəla la abà dagay la tsəh la ahəñ tsərah à gəl à agu kà, kiya uwaga à mas à wan anja Kona anja dza babay. ²⁸ La slaka uwana tatak mamətsayga la ahəñ la uwana azlakwatsamu tahəm gay à vok la abata.”

Mas à wan anja Kona anja dza

(Mark 13.24-27; Luka 21.25-28)

²⁹ “La katskats la lig mapak vok anja nğərpa uwaga la ahəñ kà, afats adəufay aya aw, təla bay adəv udaka anja aya aw, azlatsetsiliñ tadəsokw à ahəñ la zagəla, nğaha ndzəđa anja zagəla adəbəlaka vok. ³⁰ Nğaha masəlay anja Kona anja dza adəpəhla vok ala la zagəla la afik. Kiya uwaga azladza à vəđah gesina tadətaway, tadənəñ Kona anja dza atsa à ahəñ la habaga la abà la ndzəđa mazləbay mənğa la zagəla. ³¹ Magol mapara mənğa adətsənay, nğaha tadənəñ azlamalika la gay tər gudəñ ufađ anja kutso, tadəham gay azlauwana à vok atsatsəmàni atà la azlagay tər gudəñ à vok uwaga.”

Uwana gudəv apəhla ala

(Mark 13.28-31; Luka 21.29-33)

³² “Tsənəw uwana gudəv apəhakulla: Mok uwana gudəv agəgəray babasl anja adəy kà, sələw kà madara kà nekwa. ³³ Kiya uwaga kà, banja kadənéñaw uwaga gesina kà, sələw kà, kaslā mas à ahəñ anja Sufəl kà adaslay. ³⁴ Hađay, gəpəh à akul la dziriga kà: Kà azladza anja zamana uwanay tadəməts à gay dadəñ gesina, kà mas à wan anja makoray Zəzagəla aw. ³⁵ Zagəla la kutso kà adəđəv à gay, ama gay gulo kà, adəđəv à gay aw!”

Zəzagəla kokuđa gəl anja la uwana asəl madəv à gay gudəñ à vok pəra

(Mark 13.32-37; Luka 17.26-27,34-36)

³⁶ “Dza la ahəñ asəl kaslā la mavakay, banjaw sa anja mapaka vok anja tatak uwaga aw, amiyaka azlamalika uwana la zagəla, amiyaka Kona anja babay aw, say Baba kokuđa gəl anja pəra la uwana asəl. ³⁷ Tatak uwana apakà vok la zamana anja Nuhu kà, adəpaka vok kalkal la uwaga aya à mok uwana Kona anja dza adəsa à wan. ³⁸ La kità, à mok uwana mavakay anja iyaw, uwana azà dza ala, aləg à wan kà, azladza tazūw, tasəh tatak, tazəb mis, tadəh à zil tsərah à mavakay uwana Nuhu adà à kəslah iyaw à abà. ³⁹ Tadzūgw tatak dikiđiki tsərah à uwana iyaw asà à wan, azətəla gesina aw. Kiya uwaga adəpakay la vuđ mas à wan anja Kona anja dza babay. ⁴⁰ La kità, azladza səla tadəgay la fəta, tekula adəgay mazəbay gā, anik adəgay masakal gā. ⁴¹ Azlamis səla tadədzam vəl, tekula adəgay mazəbay gā, anik adəgay masakal gā. ⁴² Dzəw à ahəñ la adi, kà uwana kasəl aw mavakay uwana Kona anja dza adəsa à wan aw. ⁴³ Tsəbəw sləm à uwanay lela: Anja zil gày asəl kaslā uwana masla à gəl atsa à wan kà mazlə gày anja la vəđ kà, adzəhal aw, ahən à ahəñ la adi kà masla gəl anja mad à gày anja aw. ⁴⁴ Kà uwaga: Dəhəw vok à ahəñ, akul babay, kà uwana Kona anja dza adəsa à wan kà la kaslā uwana manəwəñ anjkul lakəl aw.”

Gay la gay la abà lakəl anja azlamagamza səla

(Luka 12.41-48)

⁴⁵ “Uwa à magamza dziriga uwana la hanjëli gâ uwa? Uwaga kâ dza uwana mënğa anğa afâ à gël anğa azlamëna slëray anik, kâ masla anğa mavâha à atâ tatak may la sa uwana asâ à atâ. ⁴⁶ Marabay agay la magamza uwana mënğa anğa awul à wan, abëzal à gël la slëray anğa la abâ. ⁴⁷ Hadây, gëpëh à akul la dziriga: Zil gâý adâv lëmana à magamza anğa uwanay à ahâl gesina. ⁴⁸ Ama banğa magamza uwaga mawisiga kâ, agodây la gël anğa kâ: Mënğa gulo kâ adâsafay, ⁴⁹ adzëka mazlabâh azlamanzlay anğa slëray, nğaha azuway la azlamëna guzu, ⁵⁰ kiya uwaga zil gâý adâzlanjalay la vudf uwana magamza uwaga la makuday la abâ aya amiyaka anğa sa tekula aw. ⁵¹ Zil gâý adâfahla seriya zlazladfaga à gël, nğaha adâvâl masik anğa kâ la tataka anğa azlamëna magolla dza la abâ, la abatâ la uwana adâtuway, la mapadf slidf la tsëh ala tërrawawa”, Yesu agodf.

25

Gay la gâý la abâ lakël anğa azladëgam kulo

¹ “Kiya uwaga makoray Zëzagëla kâ kalkal la gay anğa azladëgam kulo uwana tasâ à uda, tahël fënës anjatâ, tahäd kâ magagamay la masla mazëb mis. ² Azladëgam zlo la tataka anjatâ la abâ kâ, azlakusonju gâ. Azlazlo anik uwanay kâ, azlamëna masël gël gâ. ³ Azlakusonjuga uwaga tahël fënës anjatâ kokudfa matëdani amâl à koloba à agu kâ madla la ahâl. ⁴ Ama azlamasël gël gâ uwanay kâ tatadëdani amâl à koloba à agu, tadâla la ahâl gesina la fënës anjatâ. ⁵ Hay, masla mazëb mis asâf kâ mas à wan, azladëgam kulo uwaga tadzehâl.”

⁶ “La tataka vëdf mawiyay atsën: ‘Masla mazëb mis vok adazlanjalay, sâw à afik, mëgägâm la masla zla!’ ⁷ Kiya uwaga azladëgam kulo uwaga tatsânla, nğaha tavâtsâhâ fënës anjatâ. ⁸ Azlakusonjuga uwanay tagodf à azlamasël gël gâ uwanay: ‘Kamkam, dzëslâhâw à anu amâl ankul, kâ uwana fënës gami adâmatsahla, sëlëwk sesëlëwk tsi!’ ⁹ Azlamasël gël gâ tagodf à atâ: ‘Awan, adâsla anu aw, dâw à kanti à agu, kadâsukwaw!’ ¹⁰ Kiya uwaga azlakusonjuga uwaga tahäd kâ masukw amâl la kanti, ama la sa uwaga masla mazëb mis asâ à wan, azladëgam zlo masël gël gâ uwatâ tadâ à gâý la slaka gâ, à gâý mazëb vok à agu, kâ uwana tagâ nekwa, nğaha tatsâk à gamagây à ama la tsëkurëm tërrëzl. ¹¹ Zëwk, la huma la gay, azladëgam anik uwanay tasâ à wan, tadzëkâ mazalahay: ‘Mënğa, pëzl à anu gamagây!’ ¹² Ama masla mazëb mis agodf à atâ: ‘Hadây, gëgodf à akul la dziriga: Tetuwa gësël akul aw!’ ”

¹³ Yesu azâlân à gël, agodf à atâ: “Dzâw à ahëj la adi, kâ uwana kasëlaw mavakay, amiyaka sa uwatâ aw!”

Gay la gay la abâ lakël azlamagamza makër

(Luka 19.11-27)

¹⁴ “Adagay kalkal la dza uwana ad à mauguzahay. Azâlâh azlamagamza anğa, abëk à atâ à gël anğa tatak anğa gesina. ¹⁵ Anik anjatâ avâl gursu dëbow, à anik aya gursu dadërmokw ufad, à mamakër gâ avâl gursu dadërmokw sëla. Avâ à atâ la këla ndzëdâ anğa dza suwan, nğaha la lig la ahëj adâ anğa à mauguzahay. ¹⁶ Magamza uwana abëzâ gursu dëbow, ahäd, atsâkâlla, nğaha abëzal riba anğa gursu dëbow anik aya. ¹⁷ Masla anğa mabëzal gursu dadërmokw ufad adâhân kiya uwaga babay suwan, nğaha abëz riba anğa gursu dadërmokw ufad anik aya. ¹⁸ Ama dza uwana abëzâ gursu dadërmokw sëla, ahäd, alâ à afëk à uda, nğaha ahäcf à sili uwatâ à agu mënğa anğa avâl.”

¹⁹ “Uwana adâsafay mënğa kâ, mënğa anjatâ awül à wan la mauguzahay, nğaha adzâ madzay, kâ matugway lakël anğa sili anğa. ²⁰ Magamza uwana abëzâ gursu dëbow atsâ à vok à wan à slaka mënğa anğa, apëhal gursu dëbow anik uwana ayyâ à tsëh. ‘Mënğa, kavâ à gi kâ gursu dëbow tekula, tëga aw uwâ ay? Nënân tsi, aganay gursu dëbow uwaga ayyâ à tsëh ala gursu dëbow anik aya.’ ²¹ Mënğa anğa agodfal: ‘Delga, kak magamza dziriga, kagâ dziriga la azlabëza tatak deyday gâ la abâ, gëdâfa à ka à gël anğa azlatatak uwana aga la ndzëdâ, sâ à wan à marabay gulo à abâ.’ ²² Magamza uwana abëzâ gursu dadërmokw ufad, azâ à vok à awtây babay, agodf: ‘Mënğa, kavâ à gi gursu dadërmokw ufad aw uwâ ay? Nënân, aganay dadërmokw ufad anik uwana ayyâ à tsëh.’ ²³ Mënğa anğa agodfal: ‘Delga, kak magamza dziriga, kagâ dziriga la azlabëza tatak deydayga la abâ, gëdâfa à ka à gël anğa azlatatak mënğa gâ. Sâ à wan à marabay gulo à abâ.’ ²⁴ La lig la ahëj magamza uwana abëzâ à gursu dadërmokw sëla azâ à vok à awtây, agodf: ‘Mënğa gulo, gësël kâ kak dza dzandzanğa. La guf uwana la abâ kaslëkâ tatak à abâ babay aw kâ, katsëdây, nğaha la guf uwana la abâ kaslëkâ aw kâ, kalay. ²⁵ Guba akës à gi kâ uwaga à uwana, gëhäd, gëlä sili anjak uwaga à afëk à agu. Nënân, aganay à tatak anjak!’ ²⁶ Mënğa anğa awulâlla: ‘Kak magamza mawisiga, nğaha masaga, kasël kâ gëtsëdây nğaha gëlay la guf uwana la abâ gëslëkâ aw, kagodf, äââ?!’ ²⁷ Kâ mana

kafà sili gulo à gày makal goder aw, naka mok uwana gødawul à waŋ kà naka gøday, gøhøl sili la iyaw la tsøh la abatà aw ma? ²⁸ Hølàwla gursu dadørmøkøw søla gà uwaga ala, ŋgaha bøkàw à dza aŋa gursu dæbow à vok. ²⁹ Kà uwana køla dza uwana akoray kà, tadàvalla à vok, ama dza uwana akoray aw kà, bà bæzi gà uwatà agà la ahàl kà, tadàdøval à ahàl ala aya. ³⁰ Ama magamza mawisiga uwaga kà dūwàw à uda à mæløs à abà, la abatà matuway la mapad' slif adàpaka vok! ”

Seriya makød' gøl à ahøŋ

³¹ “Mok uwana Kona aŋa dza adàsa à ahøŋ mas Suføl Suføl, la azlamalika aŋha gesina kà, adàdza à kursi mazløbay aŋha à afik. ³² Azlatsøhay gudøŋ à vok gesina tadàham gay à vok la huma aŋha, ŋgaha adàväh azladza ala, bokuba uwana masla manøŋla azlatatak aväh azlatuwaŋ ala la azlaawäk. ³³ Adàbøk azlatuwaŋ à ahàl kaf aŋha à gøl, ŋgaha azlaawäk à ahàl gudzay aŋha à gøl. ³⁴ Kiya uwaga Suføl adàgøday à azlauwana la ahàl kaf aŋha lakøl: ‘Sàw à waŋ akul uwana Baba gulo adapis okul gay à vok, ŋgaha bøkàw à makoray uwana aga madàhakullaŋ à ahøŋ gà dagay madzøka gudøŋ à vok. ³⁵ Kà uwana may azà à gi, kavàw à gi tatak may, nøløy akøs à gi, katødfaw gi iyaw gøsà, gøgà møløk gà, kakøsaw gi la ahàl søla. ³⁶ Gøgà la godega deyday, kadūwàw à gi lukut à vok, gøgà la dūvats gà, kasàw à waŋ kà manøŋ gi à gày la à gi sløm, gøgà la danjay, kasàw waŋ kà manøŋ gi à gày.’ ³⁷ Kiya uwaga azladza uwana azladziriga taulàlla: ‘Suføl, mbà mønøŋà ka la may gà, ŋgaha møvà à ka tatak may banaw la nøløy gà ŋgaha mètød' à ka iyaw masay ma? ³⁸ Mbà mønøŋà ka kak møløk gà, ŋgaha møkøs kà la ahàl søla, banaw mønøŋà ka la godega deyday ŋgaha møduwà à ka lukut à vok ma? ³⁹ Mbà mønøŋà ka dūvats azà ka, mbà la danjay maslà mødà à awtày kà manøŋa ka à gày la?’ ⁴⁰ Suføl awulla à atà ala: ‘Haday, la dziriga gøpøh à akul: Uwana kadàhàhàwwàŋ à tekula la tataka azlabøza uwanay la abà gesina kà, uwaga kà, kadàhàwàŋ kà gi!’ ”

⁴¹ “Ŋgaha la lig la ahøŋ Suføl adàgød' à azlauwana la ahàl gudzay aŋha: ‘Zàw gi à vok, akul uwana Zøzagøla adàtsafla akul! Dàw à akàl uwana à abà adàmats ala aw uwana madøhøŋ à ahøŋ gà, kà aŋa seteni la azlamalika aŋha gesina! ⁴² Kà uwana may azà à gi, kavàw à gi tatak may aw, nøløy akøs à gi, katødfaw à gi iyaw gøsà aw, ⁴³ gøgà møløk gà, ama kakøsaw gi aw, gøgà la dūvats ŋgaha gøgà la danjay kafaw gi sløm babay aw.’ ⁴⁴ Kiya uwaga taulàlla: ‘Suføl, mbà mønøŋà ka la may gà banaw la nøløy gà, banaw kagà møløk gà, banaw la godega deyday, banaw la danjay ŋgaha maslà møzlakà ka aw la?’ ⁴⁵ Suføl awulla à atà ala: ‘Haday, gøpøh à akul la dziriga: Køla tatak uwana kadàhàhàwwàŋ à azlabøzaga uwanay gesina kiya uwaga aw kà, bà kadàhàhàwwàŋ à gi babay aw.’ ⁴⁶ Kiya uwaga tadàdala atà à seriya uwana à abà adàdøv à gay aw. Ama azladza dziriga kà tadàbøz sifa uwana adøv à gay aw”, Yesu agød' zlà.

26

Azlamøŋga takøs sawaray kà makøs Yesu

(Mark 14.1-2; Luka 22.1-2; Yuhana 11.45-53)

¹ Haday, mok uwana Yesu adadøvla gay aŋha à gay kà, agød' à azlamøna matapla la slaka aŋha: ² “Sølàw kà madøvaday uwana sløm aŋha Paska adàgay la ahøŋ la mahønay søla la abà, ŋgaha tadàv Kona aŋa dza à ahàl aŋa azladza kà matatasl à ahàf à adi.”

³ Kiya uwana azlamadzahaga aŋa azlamøna mav tatak à Zøzagøla, la azlamasiga aŋa azla Yahudiya tahamà gay à vok la mtøga aŋa Kayyif, møn madzahaga aŋa azlamøna mav tatak à Zøzagøla. ⁴ Takøs matsøn vok gay la gøl la gøl, kà makøs Yesu, ŋgaha kà makøday. ⁵ Tagød': “Møslala vok kà makøsay la madøvaday la abà aw, kà uwana maham à ahøŋ dza adàvødzahla”, tagød'.

Mis adzadzab amàl matørsin à Yesu à gøl

(Mark 14.3-9; Yuhana 12.1-8)

⁶ Mok uwana Yesu la Betaniya, la mtøga aŋa Sømøn masla akàl zagøla uwatà kà, ⁷ mis anik asà à waŋ à slaka aŋha la dørew amàl la ahàl mahønлага la amàl matørsin zlazladaga. Adzadzab amàl matørsin uwatà à Yesu à gøl la mok uwana tazøw kaf. ⁸ Uwana azlamøna matapla la slaka aŋha tanøŋà uwaga kà, gøl akàd' à atà à vok, tagød': “Kà mana awis tatak ala kiya uwanay ma? ⁹ Agayŋa avà à anu amàl matørsin uwaga tsakalay aŋha zlazlada: møduw ala, kà mav sili gà à azlamøna kudfa, kà ŋuløm.” ¹⁰ Yesu kà asøl uwana tapøhay, agød' à atà: “Kà mana katørebaw mis uwaga ma? Kà uwana adàhàgøŋ kà dzøba aŋha søla aw? ¹¹ Kà uwana azlamøna kudfa tadàgay la ahøŋ koksikoksi, ama gi kà mødàgay la ahøŋ anina koksikoksi aw. ¹² Kà uwana amàl uwanay adzadzab à gi à vok kà, madàh amàl à mazimnekif uwana à vok kà mazøb à uda. ¹³ Haday, gøpøh à akul la dziriga: Køla slaka, uwana dza adàpøh gay matsifayga uwanay la gudøŋ la vok

gesina kà, tadàpahay lakəl anja uwana mis uwanay ađahàn, kà mis uwanay anja mawul à atà à gəl.”

Yudas asal mav Yesu à ahàl anja azlaməna mav tatak à Zəzagəla
(Mark 14.10-11; Luka 22.3-6)

¹⁴ Mok uwana uwaga adada à lig kà, tekula la tataka azlaməna matapla kulo gəl anja səla uwaga la abà, uwana sləm anja Yudas Iskariyot, ahàd kà maβəz à azlamadzahaga anja azlaməna mav tatak à Zəzagəla à vok, ¹⁵ agòd à atà: “Mana kadàvəw à gi, à banja gəfa à akul Yesu à ahàl ma?” Nğaha tatùgwal gursu dzik makər à ahàl. ¹⁶ Dagay la mok uwatà Yudas ayàh tetəvi kà maf à atà Yesu à ahàl.

Yesu azuw tatak may anja Paska

la azlaməna matapla anja kulo gəl anja səla
(Mark 14.12-21; Luka 22.7-14; Yuhana 13.21-30)

¹⁷ La mavakay teranja anja madəvaday pain uwana kokudfa tatak makəslin, azlaməna matapla tasà à wan, tanàv à Yesu: “Lala asa à ka məday kà madàh tatak madəvaday Paska à ahəj la?” ¹⁸ Kiya uwaga Yesu agòd à atà: “Dàw à huđ gudəj à abà à slaka dza uwahà: Məngga agòd à ka, ‘Kaslà gulo adaslay kà gi anja mazuw tatak may anja Paska la azlaməna matapla gulo la mtəga anjak’, agòd, gòdàwwal.” ¹⁹ Azlaməna matapla tahàd, tadahà uwana Yesu apəh à atà à ahàl, nğaha tadahà tatak may anja madəvaday Paska à ahəj.

²⁰ Mok uwana mokokhu adasa à wan kà, Yesu adzà à tatak may à adi la azlaməna matapla la slaka anja kulo gəl anja səla uwatà. ²¹ Mok uwana tazùw tatak may, Yesu agòd à atà: “Haday, gəpəh à akul la dziriga, tekula ankul adàta à gi kaf à gəl.” ²² Uwaga abək mazawla à gəl à azlaməna matapla məngga, tadzəkà manavahal la tekula, tekula: “Sufəl, gi zlak uwà, gi zlak uwà?”, tagòfal. ²³ Yesu awùlla à uda, agòd à atà: “Dza uwana mədəb ahàl à kaf à gəl anu səla la kəsəf la abà, la uwana adàta à gi kaf à gəl. ²⁴ Haday, Kona anja dza adàmətsay la tsəhay gə uwana matsəteray, apəhay la wakitə la abà lakəl anja, ama nğərpa adəgay la dza uwana adàta kaf à Kona anja dza à gəl! Agaynə tayyay aw kà, naka nɟuləm kà anja.” ²⁵ Yudas masla matal kaf à gəl, uwaga agòd la manaway: “Məngga, gi la magay zlak uwà?” Yesu awulàlla, agòfal: “Kak Yudas, kapəh!”

Tatak may tsikasla gə
(Mark 14.22-26; Luka 22.15-20; 1 Korintiya 11.23-25)

²⁶ La mok uwana tazùw tatak may, Yesu azəb kaf, “Kikay”, agòd à Zəzagəla, atsakanj ala, avà à azlaməna matapla la slaka anja la magòday: “Uwanay kà vok gulo, zəbàw, kazùwwàw!” ²⁷ Nğaha azəb kətsaw mahənla gə la tatak masay gə, “Kikay”, agòd à Zəzagəla, avà à atà la magòday: “Sàw uwaga gesina ankul, ²⁸ kà uwana uwaga kà aniz gulo, aniz makəs vok slawda, uwana masokw à vədah gə, kà anja azladza anjəwaw, kà maβəz mamatsila tsakana. ²⁹ Gəpəh à akul uwaga la dzahhà: Dagay lakana gədəsəy iyaw mayyay ahəf uwanay aw, tsəràh à uwana mədəsəy anina la makoray anja Baba gulo aya.” ³⁰ La lig anja mahab mahabay mazləbəy à gay, tadà anjatà à gudəj kuru à afik.

Yesu atà la Piyer
(Mark 14.27-31; Luka 22.31-34; Yuhana 13.36-38)

³¹ Kiya uwaga Yesu agòd à azlaməna matapla la slaka anja: “La huđ anja vəd uwanay lakana kà, kadəsakaw gi à ahəj gesina ankul, bokuba uwana mədzenəy la matsəteray la abà:

‘Gədəkəd masla manəjla azlatuwan, nğaha maham à ahəj tuwan gesina adəsləh gəl à ahəj.’[✧]

³² Ama mok uwana gədàwul à uda kà, gədàtsəvokay kà akul à Galili.” ³³ Piyer agòfal: “Amiyaka azladza anik gesina tasək à kak à ahəj kà, gi kà, gədəsək à ka à ahəj tetuwa aw!” ³⁴ Yesu awulàlla: “Haday, gəpəh à ka la dziriga: Bə la vəd uwanay kà, guraynə mewgdzagaləj awiyay kà, kadəgòday asik makər, kà kasəl gi aw, kà uwaga Piyer.” ³⁵ Piyer agòfal: “Dikidiki: Gəsəl kak aw, gədəgòday aw, amiyaka bə makits aga à gi la kuda bay!” Azlaməna matapla uwana la slaka anja tapəh bokuba anja Piyer uwaga babay.

Yesu adəv kudfa la Getseməne
(Mark 14.32-42; Luka 22.39-46)

³⁶ Kiya uwaga Yesu abèz à slaka anik à abà uwana slòm anja Getsemane, ngaha agòd à azlamèna matapla anja: “Aga, gəday, gədadəv kuɖa la abatəy kà, dzàhàw madzay la abanay.” ³⁷ Adàla Piyer, ngaha azlabəza anja Zebede səla la tsəh, adzəkà maskulay la mazaw la gəl. ³⁸ Agòd à atà: “Ləv gulo adahənla la mazaw la gəl anja mamətsay, dzàw à ahəj la abanay, dzàw à ahəj la adi kiya gi.” ³⁹ Masla adàni kərkəw zewk, atsəj gəl à ahəj, ngaha adəv kuɖa la kiya uwanay: “Baba gulo, agayŋa uwanay abəz à vok kà naka, kazəbğəj kətsaw ngərpa uwanay ala, amiyaka bə la uwaga babay kaɖahan bokuba uwana asa à ka, awkà bokuba uwana asa à gi aw!”

⁴⁰ La lig la ahəj awul à waŋ à slaka azlaməna anja makər uwaga, abəz atà à gəl kà tadzəhal. Agòd à Piyer: “Kaslawwalla vok kà madz à ahəj la adi la gi, amiyaka sa tekula aw uwà?” ⁴¹ Dzàw à ahəj la adi, dəvəw kuɖa kà akul anja matəf à mapapatay à abà aw. Masasəɖok anja dza asal manəfay nəma, ama vok kà guɖguɖ.”

⁴² Azà à atà vok la vok ala kà masəla, ngaha adəv kuɖa kiya uwanay: “Baba gulo, baŋa akəs à vok kà kətsaw uwanay azəf vok à uda kiya uwanay aw, sàk à gi kà gi anja mas à uda la abà, ngaha masal anjak apaka vok zla.”

⁴³ Masla awul à waŋ aya à slaka azlaməna matapla anja uwaga, abəz atà à gəl kà tadzəhəl aya, taslalla vok anja madz à ahəj la adi aw. ⁴⁴ Yesu azà à atà vok la vok ala aya kà mamakər, adəv kuɖa la kiya uwana uwarà. ⁴⁵ La lig la ahəj, awul à waŋ à slaka anjatà, agòd à atà: “Kadzewhal gotənan, kaduwaw ləv anjul pəra ay? Nəŋəwəwəŋ sa kà adaslay adagay, ngaha Kona anja dza adagay mavəyga à ahəl anja azlaməna tsakana. ⁴⁶ Sàw à afik, məhəd! Dza uwana adata à gi kaf à gəl kà aganay la abanay!”

Makəs Yesu

(Mark 14.43-50; Luka 22.47-53; Yuhana 18.3-12)

⁴⁷ Ngaha bokuba uwana Yesu à lig la maɖadma la abà, à mok uwana Yudas, tekula la tataka azlaməna matapla kulo gəl anja səla la abà, asà à waŋ la maham à ahəj dza anjəwaw la tsəh, katsakar la azlaazəva agà à atà la ahəl. Azlamadzahaga anja azlaməna mav tatak à Zəzagəla, la azlamasiga anja azla Yahudiya la uwana tasləl atà à waŋ. ⁴⁸ Yudas, uwana adata kaf à Yesu à gəl apəh à atà uwana à vok à abà, adəfəhəj kà mapəhatàla Yesu: “Lagwa kà, dza uwana gəɖəkəs vok kà, masla gə la uwaga à uwana kayahaw, kadavalahawka pəra”, agòd à atà. ⁴⁹ Yudas azà à vok à slaka Yesu la katskats: “Ayyi, məŋga gulo”, agòɖal, la makəs à vok. ⁵⁰ Yesu agòɖal: “Slawda, uwana kasà à waŋ kà madfəhəj kà, dfaŋj katskats!” Kiya uwaga azladza anik tasà à waŋ, tavalàhàka Yesu, takəs. ⁵¹ Tekula uwana agà la Yesu abəɖ katsakar anja à uda, ngaha adəɖla magamza anja məj madzahaga, anətsal sləm lakəl ala. ⁵² Yesu agòɖal: “Kay, wulla katsakar anjak à gəy anja à agu, kà uwana azladza uwana tahəl katsakar kà, tadəkaf atà la katsakar babay. ⁵³ Kasəl kà anja asa à gi kà gəzal à Baba gulo kà mazlak gi aw takay, ngaha asləl gi azlamalika à ahəj manjəlanjəl kulo gəl anja səla aw takay? ⁵⁴ Ama baŋa kiya uwaga ma kakay à uwana tatsetsər à wakitə à abà, agòd à afik ma? Kà uwana wakitə agòɖ kà: Say uwanay adəpaka vok kiya uwanay, agòɖ.”

⁵⁵ Ngaha Yesu agòɖ à maham à ahəj dza: “Kasàw à waŋ kà makəs gi la azlakatsakar, la azlaazəva la ahəl bokuba gi masla nabəra takay? Kəla mavakay gədzàhà madzay la məj gəy Zəzagəla la aku kà matapla tatak à azladza, uwala kakəsàw gi aw! ⁵⁶ Ama uwaga gesina apakà vok kà gay anja masla mapəhal gay à ahəl uwana la wakitə la abà anja magəɖ à afik.”

Ngaha azlaməna matapla tasàkal à ahəj, tahəy anjatà gesina.

Yesu la huma à azlamasiga anja gay zil

(Mark 14.53-65; Luka 22.54-55,63-71; Yuhana 18.13-14,19-24)

⁵⁷ Azladza uwana takəs Yesu, tadàla masla à huma anja Kayyif, məj madzahaga anja azlaməna mav tatak à Zəzagəla, la azlaməna mapəhla mapəhay ala, la azlamasiga uwana tahamà gay à vok la abatà. ⁵⁸ Piyer anəfà Yesu la tsəh makəda kəda. Tsərah à gəl akəl anja məj madzahaga, adà à gəy, adzà madzay la slaka anja azlamənəjla, kà manərez tatak uwana apaka vok la Yesu.

⁵⁹ Azlamadzahaga anja azlaməna mav tatak à Zəzagəla, la azlamasiga anja gudəj tayəh mapuw gudzi à Yesu à gəl, amiyaka bə la fida uwala beyli, kà maɖəzal à tsəh kà makəɖay. ⁶⁰ Ama tabəzal aw, amiyaka bə la uwala beyli, bə la abatà azladza tasəhla azlagay deyday gə à waŋ lakəl anja. Bə la kitə babay azladza səla tapəhla vok ala. ⁶¹ Tagòɖ: “Dza uwanay agòɖ kà: ‘Gəslala vok, gəkaləh məj gəy Zəzagəla uwanay à ahəj, ngaha gəwulla à afik la mahənay makər la abà’, agòɖ.”

⁶² Məj madzahaga asà à afik, agòɖ à Yesu: “Kawulla gay à uda aw takay? Mana à uwanay azladza uwanay tapəhay lakəl anjak tak ma?” ⁶³ Ama Yesu adzà à ahəj titi. Məj madzahaga uwaga agòɖal aya: “La sləm anja Zəzagəla uwana la sifa, kamkam

wùlla gay à uda: Ma kak, Kristu Kona aña Zəzagəla takay?" ⁶⁴ Yesu awulàlla: "Iyay, bokuba uwana kapəh. Nğaha aya gəpəh à akul la dziriga: Dagay lakana kadənəwaw Kona aña dza adädza madzay la ahəl kaf aña Zəzagəla lakəl la ndzəda, kadənəwawwaw adäsa à ahən la habaga la abà babay." ⁶⁵ Kiya uwaga mən madzahaga akwàhà lukut aña à vok agòd: "Apəh mawisiga à Zəzagəla à vok, asà à anu azlaməna sayda anik aya aw, katsənəw uwana adapəhay lakəl aña Zəzagəla təga aw way? Mana kadzugwaw aya ma?", agòd. ⁶⁶ "Azlayla kà, say makəday pəra!", azlaməna matsəbal sləm tagòd.

⁶⁷ Nğaha tadzəkà matafal sleslib à adi, azlāb la mamits à ahəl, azlaanik tazlāb à pañaw à abà, ⁶⁸ tagòdal: "Pəhanula dza uwana adəf ka, à baña kak Kristu zla!"

Gəsəl Yesu aw, Piyer agod

(Mark 14.66-72; Luka 22.56-60; Yuhana 18.15-25,27)

⁶⁹ Piyer adzà madzay la uda la gəl akəl. Magamza misga aña mən madzahaga azà à vok à slaka aña, agòdal: "Kak babay kà, kadzàw à ahən la Yesu zil Galili uwaga." ⁷⁰ Ama Piyer adahà fida la huma aña azladza gesina la magòday: "Gi kà, gəsəl uwana asa à ka mapəhay aw!" ⁷¹ Kiya uwaga asà à afik la abata, azà à vok à gay gamagay. Magamza misga anik, anənəw aya, nğaha agòd à azlaməna madz à ahən la abata: "Iyay, dza uwanay kà adzà à ahən la Yesu zil Nazaret." ⁷² Ama Piyer adahà fida kà masəla la magòday aya: "Zagəla, gəsəl dza uwaga kapəhaw aw!" ⁷³ Mok uwana tasəfani aya, azladza uwana la abata la slaka Piyer, tazà à vok à slaka aña, tagòdal: "Ndzər kà, kak tekula aña, məsəl ka la kuda aña, à slaka uwana kasà à waw la abà." ⁷⁴ Kiya uwaga Piyer adzəkà magòday: "Baña fida gəpəhay kà, Zəzagəla adahà à gi seriya à gəl. Gədzəwuwa à akul mawəday kà, gəsəl dza uwaga aw, gəgòd à akul, aw takay?" Apəh uwatà la gay ala, tsatsokw yokwəkw mewgdzagalan adawiyay. ⁷⁵ Nğaha awil à Piyer à gəl à gay uwana Yesu apəhal: "Gurayna mewgdzagalan adawiyay asik makər kà, kasəl gi aw, kadəgəday Piyer!", Piyer asà à uda, atùw la iyaw tugwi.

27

Tadala Yesu à huma Pilatus

(Mark 15.1; Luka 23.1-2; Yuhana 18.28-32)

¹ Mok uwana uwaga adada à lig kà, bən la zay la tsəh, azlamadzahaga, la azlamasiga takəs sawaray la slaka gə kà makəf Yesu. ² Tawadən, tadala, tava à Pilatus gumna aña azla Rom à ahəl.

Mamətsay aña Yudas

(Sləray 1.18-19)

³ Mok uwana Yudas masla mat kaf à Yesu à gəl anənəw kà, seriya adətəf à Yesu à gəl kà, awùlla sili gursu dzik makər uwaga à slaka azlamadzahaga, la azlamasiga. ⁴ Agòd à atà: "Gədahà tsakana, kà uwana gətə kaf à dza uwana à gəl kokudə tsakana", agòd. Ama tagòdal: "Anu kà, gay gami la abà aya aw. Uwaga adagay kà abəz ka à kak pəra!" ⁵ Yudas adùw sili uwaga à mən gəy Zəzagəla à agu. La lig la ahən, ahəd, akəf vok aña la madəb vok aña à zagəla.

⁶ Azlamadzahaga tazəb sili uwaga, tagòd: "Makoray gami avà tetəvi kà mazəbay sili uwanay kà maf à sahar aña gəy Zəzagəla à agu aw, kà uwana uwanay kà sili aña aña." ⁷ Mok uwana tatsən vok gay la tataka aña, abà lakəl aña kà, tasùkw guf aña masla mañaləh tatak la sili uwatà, kà atà aña maləh azlaməlok dza à abà la abata. ⁸ Kà uwaga à uwana tsərəh à lakana kà tazallala: Guf aña, à guf uwatà. ⁹ Kiya uwanay à uwana gay aña masla mapəhal gay à ahəl Yeremiya agòd:

"Tahəl gursu dzik makər uwaga. (Sili uwaga azla Isərayel tatsəna vok gay lakəl aña kà masukwla)

¹⁰ Tasukwla guf aña masla mañaləh tatak, bokuba uwana Sufəl Zəzagəla apəh.*

Pilatus anav gay à Yesu la gay ala

(Mark 15.2-5; Luka 23.3-5; Yuhana 18.33-38)

¹¹ Yesu la huma aña gumna kà manaval gay la gay ala: "Kak la uwana kak Sufəl aña azla Yahudiya ay?" "Iyay, bokuba uwana kapəh", Yesu agòdal. ¹² Uwana azlamadzahaga, la azlamasiga tapùwla gudzi à gəl kà, awùlla gay à uda aw. ¹³ Kiya uwaga Pilatus agòdal: "Kak katsənə azlagay uwaga gesina tatugway lakəl aña aw, takay?" ¹⁴ Ama Yesu awulàlla gay amiyaka tekula aw, tsərəh à uwana ləw avàl à gumna à gay.

Seriya mamətsay atəf à Yesu à gəl

(Mark 15.6-15; Luka 23.13-25; Yuhana 18.39-19.16)

¹⁵ Bâ kœla madəvaday Paska kâ, gumna adawah gœl à masla danay tekula uwana asà à maham à ahœj dza kâ uwana adagay zagœla anha. ¹⁶ La mok uwatà kâ, dza anik la ahœj la danay, masla mawisiga kaykay, slœm anha kâ Barabas. ¹⁷ Kiya uwaga Pilatus anàv à maham à ahœj dza la gay ala: “Uwa à uwana asa à akul gœduw à akul ala à gœl uwa: Barabas ay awma Yesu uwana Kristu ay?”, agœd à atà. ¹⁸ Kâ uwana Pilatus asœl ndzer kâ tafàl Yesu à ahàl kâ, kâ maœor.

¹⁹ Uwana gœl akàd à Pilatus à vok kâ gay anja seriya, kâ mis anha aslœl dza à slaka anha agœdal: “Katapa à ahàl à dza uwaga à vok tetuwa aw, kâ uwana masla kâ adàhà tsakana aw, gœsày nœrpa mœnga la masesinay la vœdà lakœl anja gay anha.”

²⁰ Mœj madzahaga la azlamasiga tagœd à azladza kâ: Say tanav à masakay kâ Barabas, nœgaha takœd Yesu. ²¹ Gumna anàv à atà à gay ala aya: “Uwa la tataka anja azladza sœla uwanay la abà asa à akul kâ gœduw à akul la gœl ala?” Tagœdal: “Dœw à anu gœl à Barabas!” ²² Anàv à atà: “Mana gœdehœj la Yesu, uwana Kristu tagœdal zlà ma?” Gesina anjàt tagœd: “Zlœl à ahàf à adi!” ²³ Pilatus anàv à atà aya: “Slœray mawisiga ma uwala adàhàj là?” Ama tazà kuda à zagœla la ndzœda, tagœd: “Zlœl à ahàf à adi!” ²⁴ Uwana Pilatus anœnàj kâ aslœla vok adàh tatak anik aw say mawiyay pœra tazinj à zagœla kâ, atœdani iyaw, apàl ahàl anha la huma anja azladza gesina, agœd: “Tsakana anja makœd kona uwanay kâ, abœz kâ gi aw, uwaga kâ say gay lakœl ankul pœra.” ²⁵ Azladza gesina tagœd: “Tsakana makœd masla kâ awulla à anu à gœl la azlabœza gami!” ²⁶ Nœgaha Pilatus adœw gœl à Barabas, aslahà Yesu ala la kurpi, avà à atà à ahàl kâ mazlœl à ahàf à adi.

Azlaslodzi takœdasl à Yesu

(Mark 15.16-20; Yuhana 19.2-3)

²⁷ Azlaslodzi anja Pilatus tadàla Yesu à mtœga anja gumna, nœgaha maham à ahœj slodzi gesina ahàmàl à adi. ²⁸ Tasœrœtalla la ahàl lukut anha la vok ala, tadœwal diri mativga à vok. ²⁹ Taslàslœp gabaga anja atàk, tafàl à gœl, tafàl azœva gulakay à ahàl kaf, nœgaha takœdœdal à huma à gay, takœdàslal la magœday: “Ayyi, Sufœl anja azla Yahudiya!” ³⁰ Tatàfal sleslif à vok, tazœb azœva uwatà la ahàl anha, tazlàbla à gœl. ³¹ Mok uwana takœdàslal tsewwa kâ, tasœrœtal diri mativga uwatà la vok ala, tadœwal lukut anha à vok, tadàla masla kâ mazlœl à ahàf à adi.

Mazlœl Yesu à ahàf à adi

(Mark 15.21-32; Luka 22.26-43; Yuhana 19.17-27)

³² La mok uwana tadœw à uda la gudœj à abà kâ tagagam la dza anik slœm anha Sœmon, zil Sœren. Azlaslodzi tafàl leri à gœl kâ mazœb ahàf uwana tadàzlœl Yesu à adi. ³³ Tabœz à slaka anik uwana slœm anha *Golgota*, bokuba magœday: Slaka hœranj gœl. ³⁴ La abatà la uwana tatœd à tatak masay hamhamga à Yesu, atapàj nœz yewdi kâ, akweskà.

³⁵ Tazlœl Yesu à ahàf à adi, nœgaha tavàhà lukut anha la tataka anjàt la abà la matsal tsatsa lakœl. ³⁶ Nœgaha tadzàh madzay la abatà kâ manœjla. ³⁷ Tafà matseseray à gœl anha à afik à abatà kâ mapœhla godega anja makœday anha ala: DZA UWANAY KÀ, YESU SUFœL ANJA AZLA YAHUDIYA. ³⁸ Tatatàslàh azlamœna nabœra sœla à ahàf à adi babay, anik la ahàl kaf, anik la ahàl gudzay.

³⁹ Azladza uwana tauguwàh à awtày la abatà takokôtàhà gœl, tatsàk atà magœdahay à gœl, ⁴⁰ tagœdal: “Kak uwana kayàh makal mœj gày Zœzagœla à ahœj, nœgaha kâ mawulla à afik la mahœnay makœr kâ, bœl gœl anjak à baœa kak Kona anja Zœzagœla, sà à ahœj la ahàf uwaga la adi zla!” ⁴¹ Kiya uwaga babay azlamadzahaga anja azlamœna mav tatak, la azlamœna mapàhla mapœhay ala, la azlamasiga takœdàsl à masla, tagœd: ⁴² “Masla kâ abàlähà azladza anik, ama aslœla vok anja maœœl gœl anha aw takay? A tsa masla kâ Sufœl anja azla Isarayel ay? Lœgwa kâ, sà à ahœj la ahàf la adi zlà pœra, anu bay mœdinj à ka gœl à vok. ⁴³ Masla afà madzugway anja à Zœzagœla à afik, nœgaha apœhla lela: ‘Gi Kona anja Zœzagœla’, agœd! Iyay zla, mœnœnœj à baœa Zœzagœla abœœj lagonay zla!’, tagœd. ⁴⁴ Azlamœna nabœra uwana tazlœl à makœla anha tatsœkal magœdahay à gœl kiya uwaga babay.

Mamœtsay anja Yesu

(Mark 15.33-41; Luka 23.44-49; Yuhana 19.28-30)

⁴⁵ La tataka afats, mœœs apakà vok la kutso la abà gesina, tsœràh afats dat magovagova gœrewni delga. ⁴⁶ La afats dat magovagova gœrewni delga uwatà, Yesu awiyà la ndzœda, agœd: “*Eli, Eli lema sabachthani?*”^{*} (Bokuba magœday: Zœzagœla gulo, Zœzagœla gulo, kâ mana kasàk gi ma?) ⁴⁷ Azlaanik uwana tadzà à ahœj la abatà tatsnœj uwaga, tawiyà: “Azalay kâ à Eliya!”, tagœd. ⁴⁸ Katskats tekula anjàt ahœy, azœb sawsaw, adœw à iyaw hamhamga à abà, afà à gulakay à gay, adziyla à Yesu, kâ masla anja makokuzay. ⁴⁹ Ama

^{*} 27:46 27:46 Mahabay 22.1

azlaanik tagòd: “Mækuda, à banja Eliya atsa à wanj kà mabèløj kà mənəñøj tak zlà!”
⁵⁰ La lig la ahøj Yesu awiyà la ndzəda aya, ñgaha aməts.

⁵¹ La sa uwatà bafta uwana tanəlla mən gày Zəzagəla ala akohàla tsəràd tsəràh à afik tsəràh à vədàh. Kutso abèlākà à vok, ñgaha azladzəgla tapəsłàkàh ala. ⁵² Azlazəvay tapəzlla à ama ala ñgaha anjvaw azlaməna madiñal gəl à Zəzagəla à vok tawàlla à uda la mamətsay. ⁵³ Tasàhà à lag la zəvay la aku, ñgaha la lig mawul à uda anja Yesu la ahøj, tahàd à huđ gudøj tsidəñaga à abà, azladza anjvaw tanəñà atà.

⁵⁴ Azlaslodzi anja azla Rom, la mənğa anjatà tanəñla Yesu. Uwana tanəñà mabèlak à vok anja kutso la tatak uwana apakà vok gesina kà, guba mənğa akəs atà, tagòd: “Ndzer masla kà, Kona anja Zəzagəla!” ⁵⁵ Azlamis anjvaw tagà la abatà, tatsəzl à ahøj kərkə; tanərozəy atà. Tanəfà Yesu à wanj dagay la Galili, kà atà anja mazlak masla à sləray à abà. ⁵⁶ Mariyama uwana dəg zla Magdala, Mariyama iyà anja Yakuba atà la Yusufu, la iyà anja azlabəza anja Zebede tagà la tataka azlamis uwaga la abà.

Mazəb Yesu à uda

(Mark 15.42-47; Luka 23.50-56; Yuhana 19.38-42)

⁵⁷ Uwana mokokhu adasa à wanj kà, dza galepi anik uwana la Arimate asà à wanj, sləm anja kà Yusufu, masla bay kà masla asik anja Yesu. ⁵⁸ Ahàd, abəz à Pilatus à vok kà manaval vok anja Yesu. Kiya uwaga Pilatus avà tetəvi à Yusufu kà mazəb vok anja Yesu. ⁵⁹ Yusufu asà à wanj, azəb vok anja Yesu à ahøj, afafədàl à bafta mawga à adi. ⁶⁰ Ñgaha afà à zəvay anja aslasl gəl anja uwana à agu, alà à təhus à afik, atakəslal magol bəlam à gay, kà matsakal à ama, ñgaha adà anja. ⁶¹ Mariyama dəg zla Magdala atà la Mariyama anik uwanay tadzàhà madzay la abatà la magohla à huma à zəvay à adi.

Azlaməna manəñla zəvay

⁶² La vuđ maduw ləv anja azla Yahudiya bəñ azlamadzahaga anja azlaməna mav tatak à Zəzagəla, la azla Farisəya tahàd à slaka anja Pilatus, ⁶³ tagòdàl: “Arveri, awùlla à anu à gəl kà, masla fida uwanay kà, uwana aləg mamətsay kà, agòd kà: La mahəñay makər kà, gədàwul à uda, agòd. ⁶⁴ Nuləm kà, gòd, kà tanəñla zəvay anja mahəñay makər, kà azlaməna matapla anja anja mas à wanj kà mazəb à lag la aku aw, ñgaha kà atà magòdày à azladza kà adawul à uda la mamətsay aw. Kà uwana fida uwaga adàduw fida anja uwarà.” ⁶⁵ Pilatus agòd à atà: “Azlaslodzi kà atà la uwanay, dàw, kanəñawla zəvay bokuba uwana kaslawwala vok gesina.” ⁶⁶ Tahàd tabək azlaməna manəñla zəvay à ahøj, tafà masəlay à akur uwana à vok tatsakla zəvay à ama, ñgaha tabək azlaslodzi à ahøj kà manəñla.

28

Mawul à uda anja Yesu

(Mark 16.1-10; Luka 24.1-12; Yuhana 20.1-10)

¹ La lig anja vuđ maduw ləv anja azla Yahudiya la ahøj, à vuđ ladu la bəñ gà, Mariyama dəg zla Magdala, atà la Mariyama anik uwatà, tahàd kà manəñ à gəl zəvay. ² La katskats kutso abèlākà à vok la ndzəda, malika anja Sufəl Zəzagəla asà à ahøj la zagəla, atakəslà à bəlam uwana ala tatsàkla à zəvay à ama, ñgaha adz à afik la abatà. ³ Masla awutsəday bokuba mawutsəday habaga, lukut anja babay təlla bokuba slewzi. ⁴ Mok uwana azlaməna manəñla zəvay tanəñan kà, guba akəs atà kaykay, atà tasəkùläh, tapàkàh iyaw. ⁵ Malika agòd à azlamis uwatà: “Akul kà, guba akəs kul aw, kà uwana gəsəl kà kayhaw kà Yesu uwana tazləl à ahəf à adi. ⁶ Aga la abanay aw, adawulla à uda la mamətsay, bokuba uwana apəh à kul uwarà. Sàw à wanj, kagovàlāw slaka uwana tahən à ahøj tsi. ⁷ Dàw katskats kadəpəhaw à azlaməna matapla la slaka anja kà masla adawulla à uda la mamətsay. Lagwa adàtsəvokay kà kul à kutso Galili. Kadənəñawwanj kà la abatà, uwaga la uwana gəpəh à kul zla.”

⁸ Katskats azlamis uwaga tatsizlla ala la gəl zəvay la guba la vok, ama la marabay mənğa babay. Tahàd la mahoyay kà madla gay uwaga à azlaməna matapla anja Yesu. ⁹ Katskats Yesu asà à wanj agagam à atà nna, agòd à atà: “Ayyi, gəgòd à kul”. Azlamis uwaga tazà à vok à slaka anja, takàs à asik anja à ahəl, takədəl à ahøj, ñgaha tasləkàw masla. ¹⁰ Kiya uwaga Yesu agòd à atà: “Guba akəs kul aw. Dàw, kadəgòdàw à azladedà gulo kà, tahàd à kutso Galili, la abatà la uwana tadənəñ gi”, agòd à atà.

Azlaməna manəñla

¹¹ Mok uwana azlamis uwanay tadà anjatà kà, azlaanik la tataka anja azlaslodzi uwana la abà tanəñla zəvay uwaga, tahàd à huđ gudøj à abà. Tapəh tatak uwana apakà vok à azlamadzahaga anja azlaməna mav tatak gesina. ¹² Azlamadzahaga takəs sawaray la azlamasiga. Mok uwana tatsən vok gay, tavà sili à azlaslodzi uwatà mənğa. ¹³ Tagòd à

atà: “Kadàgodfaw kà azlaməna matapla la slaka aṅha tasà à waṅ la vəf, tazəb vok aṅa Yesu la gəl à gəl, la mok uwana mədatəf à madzəhal à abà. ¹⁴ Kiya uwaga baṅa atsən à gumna, məsəl dabaray uwana mədàbəzal à tsəh, ṅgaha akul kadàsaw à uda la gay la abà gesina.” ¹⁵ Azlamanəṅla tahəl sili, ṅgaha tafahəṅ bokuba uwana tatəp à atà ala kà madəhəṅ gesina. Kiya uwaga gay uwaga azahà vok la tataka azla Yahudiya la abà tsərəh à lakana.

Yesu apəhla vok à azlaməna matapla la slaka aṅha

(Mark 16.14-18; Luka 24.36-49; Yuhana 20.19-23; Sləray 1.6-8)

¹⁶ Kiya uwaga azlaməna matapla kulo gəl aṅha tekula uwaga, tawùl à gudəṅ Galili à dadəgwal uwana à afik, Yesu apəhatàla. ¹⁷ Mok uwana tanəṅəṅ kà, tasləkəw masla, azlaanik la tataka aṅatà la abà tabək gəl à ahəṅ səla. ¹⁸ Yesu azà à vok à slaka aṅatà, agəd à atà: “Lagwa kà ndzəfa uwana la zagəla, ṅgaha la uwana la vəfah kà agay mav à gi gə. ¹⁹ Dəw à slaka azladza gudəṅ à vok gesina, kapakahawatàla kà azlaməna matapla gulo, kadəfahaw à atà batem la sləm aṅa Baba, la sləm ana Kona, ṅgaha la sləm aṅa Masasəfok tsikasla. ²⁰ Tapawatàla kà atà aṅa manəf uwana gətəpəkulla gesina. Sələw kà, gədəgay la ahəṅ la akul koksikoksi, tsərəh à makəf gəl à ahəṅ gudəṅ à vok.”

GAY MARABƏJ UWANA MARK ATSETSÈR Evangile selon Marc

Mapəhay anja Yuhana masla mad'ah batem.

(Mata 3.1-12; Luka 3.1-18; Yuhana 1.19-28)

¹ Aganay gay delga uwana adzəka à vok lakəl anja Yesu, Kona anja Zəzagəla, uwana mafal dzakwa à gəl gə. ² La wakità uwana la abà Yesayya atsetsèr, Zəzagəla agòd:

"Aganay gəsləl à awtəy masləlay gulo, la huma anjak kà mad'ahkarj tetəvi à ahəj."*

³ Uwaga kà kuda anja dza uwana awiyay la fəta la abà:

"Dahəwla azlatetəvi à Sufəl Zəzagəla à ahəj tərta."**

⁴ Kiya uwaga Yuhana apəhla vok ala la fəta la abà. Az gay Zəzagəla, anavà azladza uwana tasà à wañ à slaka anja: "Kəsəw batem, uwana apəhla ala kà kadapəhaw gay la ləv ala, ngaha Zəzagəla adəmamatsakula tsakana ala."⁵ Azladza la makoray masla Yahudiya, la azladza la Urusalima gesina, tasà à wañ à slaka anja, uwana tasəlla tsakana anjatà à uda. Yuhana adəhà à atà batem la mukwà Urdun la abà.

⁶ Yuhana adüw lukut madəhəngga à vok la anjiz anja zlugumi, rəts awadà vok ala la parapara zlap, tatak may anja kà hayyaw la zuway mazuway. ⁷ Apəh à azladza, agòd à atà: "Dza uwana atsa à wañ la lig gulo la ahəj kà, adüwa gi la məngga, gəsla gay kà makəl gəl à ahəj anja mapəl zuwid kwimik anja ala aw. ⁸ Gi kà, gədfahakulla batem kà la iyaw, ama masla kà adəhakullanj kà la Masasəfok Zəzagəla."

Yuhana ad'ah batem à Yesu

(Mata 3.13-17; Luka 3.21-22)

⁹ La abatà Yesu asà à wañ la gudəj Nazaret la kutso Galili. Yuhana adəhalla batem la mukwà Urdun la abà. ¹⁰ Mok uwana Yesu asà à uda la iyaw la abà, anəjə à zagəla kà, zagəla mapəzl à ama ala gə. Anəjə Masasəfok Zəzagəla atsà à ahəj à gəl anja bokuba habakoku. ¹¹ Ngaha tatsənà kuda uwana atsən à ahəj la zagəla: "Kak bəzi gay ləv gulo, gərabay məngga kà kak."**

Sufəl anja mawisiga apapat Yesu

(Mata 4.1-11; Luka 4.1-13)

¹² La lig la ahəj, katskats Masasəfok Zəzagəla adala Yesu à fəta à abà. ¹³ Adzà à ahəj la abatà mavakay dzik ufad, ngaha seteni apapat masla. Yesu adzà à ahəj la tataka azlatatak fəta la abà, ngaha azlamalika tazlak masla bay.

Yesu azal azlaməna makas kilfi ufad

(Mata 4.12-22; Luka 4.14-15; 5.1-11)

¹⁴ Tadüw Yuhana à danjay, kiya uwaga Yesu ahəd à kutso Galili, kà maz gay matsidəyga anja Zəzagəla. ¹⁵ Agòd: "Kaslà adaslay à dagay kà Zəzagəla adzəka makoray anja. Pəhəw gay la ləv ala, diñəw gəl à gay matsidəyga anja Zəzagəla à vok!"

¹⁶ Mok uwana Yesu anəf à gay dərəv anja Galili, anəjə azlaməna makas kilfi səla, Səmon la deda anja Andəre. Tadəw dzarawa à iyaw abà kà makasla kilfi. ¹⁷ Yesu agòd à atà: "Səw à wañ, nəfəw gi, gədəpakakulla kà azlaməna makas azladza." ¹⁸ Katskats tasək à dzarawa anjatà, tanəfə masla.

¹⁹ Uwana adada à huma à gay juv, anəjə azlabəza anja Zebede, Yakuba atà la Yuhana, atà la kəslah iyaw la abà tadəh dzarawa anjatà. ²⁰ Katskats Yesu azəla atà, tasək à baba anjatà à ahəj la azlaməna sləray anja la kəslah iyaw la afik, ngaha tanəfə Yesu.

Dza la masasəfok mawisiga

(Luka 4.31-37)

²¹ Yesu la azlaməna matapla la slaka anja tahəd à Kapernahum. La vud maduw ləv anja azla Yahudiya, Yesu adà à gəy madəv kudə anjatà à agu kà matapatəla. ²² Azladza uwana tatsənə gay anja kà, ləv avəl atà à gay, kà uwana atapatəla kà bokuba azlaməngga anja azlaməna madzəj wakità Zəzagəla aw, ama bokuba dza uwana akor ndzəfa.

²³ Mok uwatà, dza la masasəfok mawisiga apəhla vok ala la gəy madəv kudə uwatà la aku, awiyà: ²⁴ "Mana à gay anjak la anu ma? Yesu, kak zil Nazaret! Kasà à wañ kà mazanula ay? Gəsel kà, kà kak Tsikaslagə uwana Zəzagəla asləl kak à wañ." ²⁵ Yesu asləh məlo à masasəfok uwatà à gəl: "Dzà à ahəj titi! Sà dza uwaga lakəl ala!" ²⁶ Ngaha

masasəđok mawisiga abəllakà dza uwatà la ndzəđa, awiyà la kuda mənğa, nğaha asàlla à kəl ala. ²⁷ Ləv avàl atà à gay gesina. Tanàvàhà à vok: “Mana gay mawga uwanay asal magodəy ma? Mana uwaga ma, akor azlamasasəđok mawisiga la ndzəđa, nğaha azlamasasəđok mawisiga bay tafa à gəl à gay anğa?” ²⁸ Katskats azladza tazàhà gay lakəl anğa Yesu la kutso Galili gesina.

*Yesu awar azlaməna đuvats ala anjvaw
(Mata 8.14-17; Luka 4.38-41)*

²⁹ Uwana tasà à uda la gày madəv kudfa la aku kà, katskats Yesu ahàd atà la Yakuba nğaha la Yuhana à mtəga anğa Səmon la Andəre. ³⁰ Mənğay anğa Səmon la akəl la vok la slaka mahən à ahən. Mok uwana Yesu abəz atà à vok kà, tapəhal gay lakəl anğa. ³¹ Yesu ahàd à slaka anğa, akəs la ahàl, atsizllən ala, nğaha akəl vok asàlla vok ala. La lig la ahən mis uwatà azlək atà.

³² La mokokhu, mok uwana afats adatəđ à ahən, azladza tasàhla azlaməna đuvats anjvaw à wañ à slaka Yesu, la azlauwana la masasəđok mawisiga. ³³ Azladza gudən uwatà tahamà gay à vok la gay gamagay anğa. ³⁴ Yesu awarən ala azladza anjvaw uwana tas nğərpa la azladfuvsat anik anik gesina, la makudəkàh azlamasasəđok mawisiga, afàhà à atà akur à lig kà mapəhlan ala aw, kà uwana atà: “Məsəl Yesu”, tagəđ.

*Yesu auguzahay la kutso Galili
(Luka 4.42-44)*

³⁵ Lebənğ gə bənğ, afats à lig mas à afik, Yesu atsizlla ala, nğaha asà à uda la kay, ahàd anğa à fəta à abà nğaha adəv kudfa la abatà. ³⁶ Səmon atà la azlamanalay anğa tahàd kà mayàh masla. ³⁷ Uwana tabəzəl à vok, “Azladza gesina tayàh kà!”, tagəđal. ³⁸ Ama Yesu agəđ à atà: “Məhàd à azlagudən anik anik, gəđapəhay gay Zəzagəla la abatà babay, kà uwana gəsà à wañ kà madfàh sləray uwaga.” ³⁹ Kiya uwaga auguzàhàh la kutso Galili gesina. Apàh gay matsidəyga la azlagay madəv kudfa anjatà la aku, nğaha akudəkàh azlamasasəđok mawisiga à uda.

*Yesu awura masla akəl zagəla ala
(Mata 8.1-4; Luka 5.12-16)*

⁴⁰ Masla akəl zagəla asà à wañ à slaka Yesu, akədəđal à huma à gay, anàval: “Kamkam, banja asa à ka kà, kaslala vok kà mawur gi ala!” ⁴¹ Vok ahàm à Yesu, abiyà ahàl ala, adəbani, nğaha agəđal: “Asa à gi, wùr ala!” ⁴² Katskats akəl zagəla asàl à vok ala, awùr ala. ⁴³ La lig la ahən, Yesu awùl à masla la mafahal akur à lig, agəđal: ⁴⁴ “Tsonənğ lela, kapəh uwaga à dza anik aw, ama hàd kadapəhla vok à masla mav tatak à Zəzagəla, kà kadawurla, nğaha và tatak uwana Musa apəh à ahən kà masəlay kà kawur ala.”^{*} ⁴⁵ Ama dza uwatà ahàd, adzəkà mapəhay à azladza gesina lakəl anğa mawurla anğa. Gay gə la uwaga à uwana Yesu aslala vok kà mad gudən à abà la dazuwaya aw. Kà uwaga à uwana Yesu adzà à ahən la uda la fəta la abà, la abatà bay, azladza tadàh à awtày à slaka anğa la kəla slaka gesina.

2

*Yesu awur dza makalàh à vəđah gə ala
(Mata 9.1-8; Luka 5.17-26)*

¹ La lig mahənay njv Yesu ahàd à Kapernahum aya. Uwana tatsənənğ Yesu la kay kà, ² azladza anjvaw tahamà ahənğ tsərəh à uwana slaka atəm à ahənğ baməraka la gəl akəl aw, apəh à atà gay Zəzagəla. ³ Nğaha azladza anik tasà à wañ à slaka anğa, tasəlla dza makalàh à vəđah gə à wañ, azladza ufad la tsəh tazəbay. ⁴ Ama tabəz à tetəvi kà madla à slaka Yesu aw, kà uwana maham à ahənğ dza anjvaw la ahənğ, tadala à gəl gày à afik, tapokwà gəl gày uwana Yesu la kay la afik, uwana tapokwənğ tadzilà dza makalàh à vəđah gə uwatà à gày la kəslah gə. ⁵ Uwana Yesu anənənğ madiñal gəl à vok anjatà mənğa, agəđ à dza makalàh à vəđah gə uwaga: “Bəzi gulo, tsakana anjak adàmatsilal!” ⁶ Ama azladza anik la tataka azlaməna mapàhla wakità seriya la abà la slaka madzàh madzay la abatà, tadzüğw la gəl anjatà: ⁷ “Kà mana dza uwanay apəhay mawisiga lakəl anğa Zəzagəla kiya uwaga ma? Dza aslala vok anğa mamats tsakana à dza ala aw, say Zəzagəla pəra!” ⁸ Katskats Yesu asəl uwana tadzüğway la ləv anjatà la tsəh, agəđ à atà: “Kà mana kadzüğwaw kiya uwanay la ləv ankul la tsəh ma? ⁹ Butu mala zlazladfa magodəy: gədàmats à ka tsakana anjak ala takay? Awma: Sà à afik, zəb kəslah anjak, hàd anjak takay? ¹⁰ Ama asa à gi kasəlaw, kà gi kona anğa dza, nğaha kà gi la masəlay anğa mamats tsakana anğa azladza gudən à vok ala: ¹¹ Sà à afik, zəb kəslah anjak, hàd mtəga anjak! Gəgəđ à kak”, Yesu agəđ à dza makalàh à vəđah gə. ¹² Katskat

asà à afik, azèb kèsлах аҥһа. Uwana azladza gesina tanəṅəṅ adin aṅһа, ləv avàl à atà à gay gesina, tazləbà Zəzagəla, tagòd: “Mədanəṅəṅ dikiđiki kiya uwanay aw!”

Yesu azala Levi

(Mata 9.9-13; Luka 5.27-32)

¹³ Yesu awùlla à gay dərəv aya, sləm aṅһа kà dərəv Galili. Azladza aṅuvaw tahamà à waṅ à slaka aṅһа, ṅgaha atəpatàla. ¹⁴ Uwana adà à awtày, anəṅəṅ Levi, kona aṅһа Alfe, adadza madzay la gày mazəb hadama la aku. Yesu agòdàl: “Sà à afik, nəfà à gi!” Levi asà à afik, anəfà.

¹⁵ La lig la ahəṅ Yesu la azlaməna matapla aṅһа tahàd à mtəga Levi kà mazuw tatak may. Azlaməna mazəb hadama aṅuvaw la azlaməna tsakana aṅuvaw, tadzàhà madzay atà nna, kà uwana azladza tsəhay gə uwaga aṅuvaw tanəfà atà aya. ¹⁶ Azlaanik la tataka azlamadzahaga aṅһа wakità seriya aṅһа Zəzagəla la abà, uwana la tataka aṅһа azla Farisəya la abà, tanəṅəṅ kà Yesu azùw tatak may la slaka gə la azlaməna mazəb hadama la azladza tsakana, tagòd à azlaməna matapla la slaka aṅһа: “Kà mana azuw tatak may la azlaməna mazəb hadama la azlaməna tsakana ma?” ¹⁷ Uwana Yesu atsənà uwaga, agòd à atà: “Azladza uwana dıvats aza à ata aw, kà tayàh mad dokwtar aw, say azlaməna dıvats pəra. Gi, gəsà à waṅ kà mazalay azladza uwana tadzugw kà azladziriga aw, ama gəsà à waṅ kà, kà mazal azlaməna tsakana.”

Manavay lakəl aṅһа makəs nəlay

(Mata 9.14-17; Luka 5.33-39)

¹⁸ Azlaməna matapla aṅһа Yuhana, masla madfàh batem la azla Farisəya takasàh nəlay la azlakasla anik anik. Azladza anik tasà à waṅ à slaka Yesu, tanəval: “Kà mana azlaməna matapla aṅһа Yuhana, masla madfàh batem, la azla Farisəya kà takas nəlay, ama kà mana azlaməna matapla la slaka aṅһа kà takas nəlay aw ma?” ¹⁹ Yesu agòd à atà: “Baṅa dza azəb mis azlàh azlaslawda aṅһа kà mazuw tatak may, ma tasàk tatak may la mavakay uwatà aṅһа makəs nəlay takay? Awaṅ, tasàkal aw, tazuway. ²⁰ Ama mok uwana zil mis adədin aṅһа la slaka aṅatà, la uwana tadàkas nəlay adəgay la mok uwatà.”

²¹ Yesu agagəzlla atà ala la matapatla mawga aṅһа uwanay: “Dza atsap lukut mawga à maviyaga à vok aw. Baṅa adəhəṅ kità kà, lukut mawga akwàh maviyaga à tsəh, ṅgaha makwàhla aṅһа azàh à tsəh aya. ²² Dza adəw iyaw aṅһа mayyay ahàf mawga à kiwa iyaw maviyaga à agu aw, kà uwana à baṅa amsəlila kà, akwàh kiwa ala. Ṅgaha iyaw aṅһа mayyay ahàf la kiwa iyaw tadəuwisila. Ama aduwa à vok kà tadəw iyaw aṅһа mayyay ahàf mawga à kiwa mawga à agu, suwaṅ.”

Manavay lakəl aṅһа vuđ maduw ləv

(Mata 12.1-8; Luka 6.1-5)

²³ Vərdi anik la vuđ maduw ləv, Yesu aguwa à awtày la gay guf nalkama. Azlaməna matapla la slaka aṅһа tadzəkà mabərədahay nalkama la tetəvi la ama. ²⁴ Azla Farisəya tagòd à Yesu: “Kà mana azlaməna matapla la slaka aṅһа tadfàh tatak uwana azlayla kà à vok aw ma? Kà uwana wakità seriya gami avəra gay kà tatak uwaga la vuđ maduw ləv.” ²⁵ Yesu awùlla à atà ala: “Kadzəṅəw dikiđiki aw uwana David adəhəṅ la mok uwana may akəs la azladza uwana la slaka aṅһа aw uwà? ²⁶ Ahàd à gày Zəzagəla à agu, azəb kaf uwana tafàh à huma aṅһа Zəzagəla, azùw. Mok uwatà kà, Abiyatar la uwana məṅga aṅһa azlaməna mav tatak à Zəzagəla. Wakità seriya gami kà, avà tetəvi kà azlaməna mav tatak à Zəzagəla kà mazuway pəra. Ama David azəb, azùw, ṅgaha avàh à azlaməna aṅһa bay.” ²⁷ Yesu agòd à atà aya: “Zəzagəla adəhà vuđ maduw ləv kà, kà madz à ahəṅ delga aṅһa dza, awkà Zəzagəla adəhà dza kà aṅһa vuđ maduw ləv aw. ²⁸ Gay gə la uwaga gi Kona aṅһa dza la uwana Sufəl aṅһa vuđ maduw ləv.”

3

Yesu awur dza uwana ala la ahàl mamətsayga

(Mata 12.9-14; Luka 6.6-11)

¹ La vərđi anik, Yesu ahàd à gày madəv kuđa à agu aya. La gày uwatà la aku kà, dza la ahəṅ uwana ahàl aṅһа mamətsayga. ² Azladza la ahəṅ la gày madəv kuđa la aku, tanərəz Yesu à baṅa awur dza ala la vuđ maduw ləv, kà atà mabəzəl à tsəh la gay la abà, kà uwana akəs mapəhay lakəl aṅһa vuđ maduw ləv aw. ³ Yesu agòd à dza uwana ahàl aṅһa mamətsayga: “Sà à afik, sà à waṅ à huma azladza gesina!” ⁴ Ṅgaha anəv azladza uwana tatsəkal yewdi à gay: “Mana wakità seriya gami apəh à anu ma? Tetəvi

la ahøj kà madàh delga la vuđ maduw løy takay? Awma madàh mawisiga takay?" Asà à atà mawulla gay à uda aw. Takwès. ⁵ Yesu atsèkà à atà yewdi à gay la mazinal à gøl. Ama apàk løy møjga kà madzugway mawisiga anjata. Kiya uwaga agòđ à dza uwatà: "Biyà ahàl ala!" La kirim yewdi awür ala. ⁶ Batsàrà, uwana azla Farisøya tanøj uwaga kà, tasà à uda la gày Zəzagəla la aku, tahàd, tahamà gay à vok la azladza maham à ahøj gà uwana tatsən vok gay la Herod kà anja magòđ uwana à afik azlayla makòđla Yesu.

Maham à ahøj dza asa à wanj à slaka Yesu

⁷ Yesu la azlaməna matapla anja tazà vok. Tahàd à gay dərəv anja Galili, maham à ahøj dza anjuvaw tanəfà atà. Azladza tasàhà à wanj la makoray Galili, la Yahudiya, ⁸ la Urusalima dagay la gay dzika makoray anja Idumiya tsəràh à gay dzika anja dərəv uda anja mukwà Urdun, la azladza uwana tadzà à ahøj nekwa la gudəŋ Tir la Sədon. Magol maham à ahøj dza tasàhà à wanj à slaka Yesu kà uwana tatsənəŋ lakəl anja tatak uwana adàhàhəŋ. ⁹ Yesu agòđ à azlaməna matapla la slaka anja: "Yàhàw à gi bəzi kəslah iyaw, kà maham à ahøj dza anja marjisl gi aw." ¹⁰ Yesu awurà azladza ala anjuvaw, gay gà la uwaga azladza uwana tasà nğərpa la azladuvats anik anik tavàhà vok kà madəbani masla. ¹¹ La mok uwana azladza uwana la azlamasasəđok mawisiga tanøjə masla, tatəđal à humà la mawiyay, tagòđal: "Kak, Kona anja Zəzagəla!" ¹² Ama Yesu aslèhà atà məl à gøl la ndzəđa, kà mapəhla masla ala aw.

Yesu akasani azlaməna matapla kulo gəl anja səla

(Mata 10.1-4; Luka 6.12-16)

¹³ Yesu ahàd à dadəgwal à afik, nğaha azàl azladza uwana asàl, kà tatsà à wanj à slaka anja. ¹⁴ Yesu akàsani azladza kulo gəl anja səla, nğaha azàla atà ala azlaməna matapla la slaka anja, agòđ à atà: "Gəkàsani akul kà madz à ahøj la slaka gulo, nğaha gədàslal akul kà mapàh gay Zəzagəla. ¹⁵ Gəwà à akul maslay kà makudəkàh azlamasasəđok mawisiga." ¹⁶ Aganay azladza kulo gəl anja səla uwana akàsani atà: Səmon uwana Yesu avàl sləm Piyer; ¹⁷ Yakuba la deda anja Yuhana, azlabəza anja Zebede. (Yesu avà à atà sləm Bowanergəs, asal magòđay: maslèh məl anja habaga, kà uwana tasaf à mapak løy aw) ¹⁸ La Andəre; Filip; Bartelemi; Mata; Tomas; Yakuba, bəzi anja Alfe; Tade; Səmon zil Kananan ¹⁹ nğaha Yudas Iskariyot, uwana adàda kà məzam à Yesu à gøl.

Azlaməna huđ gày anja Yesu asa à atà anja madla Yesu à mtəga

²⁰ Yesu ahàd à mtəga anja dza anik. Maham à ahøj dza tahamà gay à vok aya, kà uwaga à uwana Yesu la azlaməna matapla la slaka anja tabəzà tetəvi kà mazuw tatak may aw. ²¹ Mok uwana azlaməna huđ gày anja tatsən uwaga, tahàd kà masəla à mtəga, kà uwana azladza tagòđ kà: "Gəl adakəđal à vok!"

Azladza tatsəđ gay à Yesu à tsəh nğaha awulla atà ala

(Mata 12.22-32; Luka 11.14-23; 12.10)

²² Azlamadzahaga anja wakità seriya tasà à ahøj la Urusalima tagòđ: "Masla la Belzəbul, sufəl anja zagəla zagəla!", asal magòđay sufəl anja azlamasəđok mawisiga. Azlaanik tagòđ: "Sufəl anja azlamasəđok mawisiga avàl maslay kà makudək azlamasəđok mawisiga." ²³ Yesu azàl azladza à slaka anja, agòđ à atà: "Kakay sufəl anja masasəđok mawisiga aslala vok anja makudək seteni à uda aya ma? Akəsà vok aw. ²⁴ Baŋa azladza la makoray tekula tatsak ala kà, makoray sufəl uwatà kà aslala vok madz à ahøj aw. ²⁵ Baŋa azladza la huđ gày tatsak ala kà, huđ gày uwatà aslala vok madz à ahøj aw. ²⁶ Baŋa seteni ap guvəl à vok anja à adi kà, makoray anja adavahla, aslala vok anja madz à ahøj aw, ama makoray uwaga adədəv à gay. ²⁷ Dza aslala vok anja mad à gày anja masla ndzəđa kà mazəb tatak anja aw, say atsərkwinj dadəŋ, nğaha aslala vok kà mahəl tatak anja gesina. ²⁸ Gəpəh à akul la dziriga: Tsakana gesina la gay mawisiga gesina uwana azladza tapəhay, Zəzagəla adàmatsatəŋ ala. ²⁹ Ama dza uwana apəh mawisiga lakəl anja Masasəđok Zəzagəla kà, tsakana uwaga adàmatsila đikidiki aw, ama tsakana uwaga adədza à ahøj anja koksikoksi." ³⁰ Yesu apəh kiya uwaga kà, kà uwana azlaanik tagòđ kà: "Masla la masasəđok mawisiga", tagòđ.

Iyà la azladedə anja Yesu

(Mata 12.46-50; Luka 8.19-21)

³¹ Iyà la azladedə anja Yesu tasà à wanj, tasləl dza kà mazal à atà la uda. ³² Azladza anjuvaw tadzàhà madzay la makəla anja Yesu, tagòđal: "Iyà la azladedə anjak la uda, tazala ka!" ³³ Yesu awùl à atà ala: "Uwa iyà gulo la azladedə gulo uwa?" ³⁴ Nğaha Yesu anərəz azladza uwana la makəla anja lakəl, agòđ à atà: "Aganay azlaiyà la azladedə gulo la abanay. ³⁵ Kà uwana kəla uwabeyuwi uwana adàh mawoyəŋ anja Zəzagəla la uwana azladedə gulo la azlaiyà gulo."

4

*Gay la gay la abà aña masla maslæk hi
(Mata 13.1-9; Luka 8.4-8)*

¹ Yesu atàpla à maham à ahəŋ dza la gay dərəv aña Galili aya. Anjuvaw tahamà gay à vok la slaka aña. Kà maham à ahəŋ dza, Yesu adà à kəslah iyaw à afik, adzà madzay. Ama maham à ahəŋ dza la gay dərəv. ² Yesu apəhatàla azlatatak anjuvaw la gay la gay la abà, ŋgaha agòd à atà la matapla aña la abà: ³ “Tsəbàwwal sləm!”, Yesu agòd à atà, “Dza anik asà à uda kà mad maslæk hi. ⁴ Mok uwana adadzəka maslæk hi à guf aña à abà, fofulo anik tanis à gay tetəvi, azladfiyan tasà à wan, tazùw à gay. ⁵ Azlaanik aya tanis à pala akur à afik uwana kutso lakəl mənŋa aw, katskats asà à uda, kà uwana kutso la pala akur lakəl mənŋa aw. ⁶ Mok uwana afats adadzəka mavəday la ndzəda agulà hi ala kà uwana abək sliih kà à pala à akur à afik. ⁷ Gotənanj fofulo anik tanis à atək à abà. Uwana atək azigənay akəd à tsəh, atsà à gəl aw. ⁸ Bə gotənanj fofulo anik tanis à kutso delga gə à abà. Asà à uda lela azigən lela, ŋgaha atsà gəl lela. Anik abək à adi huməts, anik abək à adi zun, ŋgaha anik aya bay zazuŋ səla.” ⁹ Yesu agòd à atà: “Tsəbàwwal sləm lela, wədəw vok à uda kà mafal sləm!”

*Kà mana Yesu apəhay la gay la gay la abà ma?
(Mata 13.10-17; Luka 8.9-10)*

¹⁰ Mok uwana Yesu kokudə aña, azladza uwana tatsəbəl sləm, la azlaməna matapla la slaka aña kulo gəl aña səla, tasà à wan à slaka aña, ŋgaha tanəv godega aña gay la gay la abà uwatà. ¹¹ Yesu agòd à atà: “Akul kà, Zəzagəla avà à akul nasiri aña makoray aña, ama azladza anik tatsən tatak gesina kà say la gay la gay la abà pəra. ¹² Kà uwaga à uwana: “Tanərzay la yewdi anjatà babay, ama tanənanj la dziriga aw, Tatsəbəl sləm la sləm anjatà babay, ama tatsənanj la dziriga aw, Kiya uwaga kà atà aña mawul à slaka Zəzagəla aw, ŋgaha Zəzagəla aña amatsa à atà tsakana anjatà ala aw!”[✧]

*Yesu apəh godega aña gay la gay la abà uwaga à uda
(Mata 13.18-23; Luka 8.11-15)*

¹³ Ŋgaha Yesu anəv à atà gay ala: “Katsənəw gay la gay la gay la abà uwanay aw takay? Kakay kadatsənaw gay la gay la abà anik zla ma? ¹⁴ Masla masləkay kà masla mapəh gay Zəzagəla. ¹⁵ Azladza anik kà bokuba gay tetəvi uwana fofulo anis ala ama: Mok uwana tatsənən, katskats seteni asa à wan, abəf atà à ləv ala gay uwana tasləkà à ləv à tsəh. ¹⁶ Kiya uwaga bay la azladza anik tadəbani slaka pala akur gə, à uwana gay anis à afik, katskats uwana tatsən gay kà takəs la marabay. ¹⁷ Ama tasəkəl adàla sliih la ləv anjatà la tsəh aw, tafəl sləm la lela aw, takəs kà aña kaslā ŋuv pəra. La mok uwana ŋgərpə la matərəbəy adabəz atà kà gay Zəzagəla kà, katskats tasək madin gəl à vok anjatà la tsəh ala. ¹⁸ Azladza anik aya kà tadəbani à vok la gəy atək uwana fofulo anis à abà. Tatsəbəl sləm à gay. ¹⁹ Ama adi aña gudəŋ à vok uwanay la matsidəy aña uwana apapət azladza, adà à ləv anjatà à tsəh, akəd gay masləkayga uwaga à tsəh, ŋgaha azladza uwaga tav mayyay aw. ²⁰ Azladza anik aya gotənanj kà tadəbani à vok la kutso uwana fofulo anis à abà. Atà tatsəbəl sləm à gay lela, tafəl sləm lela, tavə mayyay, anik abək à adi huməts, azlaanik zun, azlaanik aya gotənanj zazuŋ səla.”

*Gay la gay la abà aña fənəs la tsəh gogozläh
(Luka 8.16-18)*

²¹ Yesu agòd à atà aya: “Dza af fənəs à tsəh tasə takay, awma à tsəh gogozläh ay? Awan, aduwa vok kà dza af fənəs à slaka dzəgamma gə. ²² Bokuba magodəy, tatak mahadəŋ à ahəŋ gə ada à gay mapəhla à vok ala gə. Ŋgaha nasiri gesina, azladza tadəsəlay. ²³ Tsəbàwwal sləm lela à baŋa sləm aga akul lakəl.” ²⁴ Yesu agòd à atà aya: “Dahəw hanəkəli lakəl aña tatak uwana katsənawwanj la uwana kadəhawwanj. La daram uwana kagoraw la azladza, Zəzagəla adəgor akul la uwaga la mazakullanj à gəl suwanj. ²⁵ Kà uwana dza uwana af sləm à uwana Zəzagəla avəl, adəbəzal mənŋa aya. Ama dza uwana af sləm à tatak aw, tadədəvalla à ahəl ala ŋuv gə uwatà Zəzagəla avəl aya babay.”

Gay la gay la abà aña fofulo uwana atsa à uda

²⁶ Yesu agòd à atà aya: “Məsəlala vok magagazləla makoray Zəzagəla kà la dza uwana asləkə fofulo à guf aña à abà. ²⁷ La lig la ahəŋ kà say madzəhal aña kəla mahənanj pəra. La kaslā uwana fofulo adas à uda azigən la kokudə masəlay aña. ²⁸ Kutso

azigəna makəl gay aŋa tatak: Teraŋa kavak gə, ŋaha masəh gəl à uda, la mabək bəza adi. ²⁹ Mok uwana tatak adahənay, dza adzəka sləray la mavaw aŋha, kà uwana matsədf tatak adasa à waŋ.”

Gay la gay la abà aŋa tsəhay fofulo uwana bəziga gə la tataka azlafofulo anik anik la abà

(Mata 13.31-32,34; Luka 13.18-19)

³⁰ Yesu anəv à azladza la gay la: “La mana makoray Zəzagəla adəbani vok ma? La gay la gay la abà ma uwala məgagazləla makoray aŋha la? ³¹ Adəbani vok kà la tsəhay uwana bəziga gə la tataka azlatsəhay fofulo anik la abà gesina bokuba tsəhay hamadz. ³² Ama baŋa azigənay kà, aduwa azlababasl anik anik gesina. Azigənay mənğa, aduwa azlaahəf anik, azlə ahəl mənğa, ŋaha azladfiyan tadza à ahəŋ la dzəgay aŋha la abà.”

³³ Kiya uwaga Yesu apəh à atà gay Zəzagəla la azlagay la gay la abà aŋuwaw bokuba uwanay. Apəh à atà kà bokuba uwana azladza taslala vok aŋa matsənəŋ. ³⁴ Apəh à atà kà bə la gay la gay la abà pəra. Ama uwana masla la azlaməna matapla la slaka aŋha kokufa gəl aŋatà kà, apəh à atà ala tatak gesina la paraka.

Yesu atsizlla kular à ahəŋ

(Mata 8.23-27; Luka 8.22-25)

³⁵ La mokokhu vuđ uwatà, Yesu agədf à azlaməna matapla la slaka aŋha: “Məhəd à gay dərəv uda anik.” ³⁶ Kiya uwaga tasək à maham à ahəŋ dza à ahəŋ, azlaməna matapla la slaka aŋha tadà à kəslah iyaw uwana à afik, Yesu atsà à vok à afik. Azlakəslah iyaw anik la ahəŋ la abatà bay aw. ³⁷ Magol kular adzəkà madəfəy. Magaŋtsay aŋa iyaw adàh à kəslah iyaw à abà, kiya uwaga kà ahənəŋ ala. ³⁸ Yesu agə la godega kəslah iyaw la madzəhal gə, afə gəl à tatak maf gəl à afik à afik. Azlaməna matapla la slaka aŋha tatsənəŋ ala la magəfal: “Mənğa, məzləmətsay, kafa à anu gəl aya aw, takay?” ³⁹ Yesu atsənəŋ ala, asləh mələ à kular à gəl. Apəh la ndzəfà à magaŋtsay aŋa iyaw: “Dzà à ahəŋ titi!” Kular atsizl à ahəŋ, iyaw adzà à ahəŋ titi, magaŋtsay aŋa iyaw la ahəŋ aya aw, tsiriya. ⁴⁰ La lig la ahəŋ agədf à azlaməna matapla la slaka aŋha: “Kà mana guba akəs à akul ma? Kadiŋaw gi gəl à vok aw ay?” ⁴¹ Guba akəs atà mənğa tagədf kà atà kà atà: “Uwa à dza uwanay, amiyaka afad la iyaw bay kà takəs gay aŋha uwa?”

5

Yesu akudək masasəfok mawisiga à dza lakəl ala

(Mata 8.28-34; Luka 8.26-39)

¹ La lig la ahəŋ tabəzà à gay dərəv uda aŋa gay dərəv aŋa Galili uwana la kutso Gerasəniya la abà. ² Uwana Yesu adasa à ahəŋ la kəslah iyaw la afik, batsàrà dza anik anəŋə Yesu kərkər, asà à waŋ kà magagamay səla. Dza uwaga asà à waŋ kà la gəy zəway la abà, dza uwatà kà zagəla zagəla lakəl. ³ Adzà à ahəŋ kà la mabuwaŋ zəway la aku. Dza aslala vok aŋa mawadəŋ à ahəŋ ba amiyaka la mazakazak aw. ⁴ Aŋuwaw tawədfəhalla ahəl à ahəŋ la azlamatatasla ahəl, la sasala asik la azlamazakazak aŋa ada. Ama aslā-həhəŋ ala la azlamanal sasala ala. Dza aslala vok kà makəsiniŋ à ahəŋ aw. ⁵ Koksikoksi kəla mahənay la mavakay auguzahəhay la azlagəl zəway la azlamatəkukuruh la afik la mawiyay la masəh vok aŋha la akur.

⁶ Dza uwatà anəŋə Yesu kərkər ŋaha ahəd la mahoyay à huma aŋha, atədf à Yesu à huma. ⁷ Awiyà la ndzəfà: “Masak à ama Yesu, Kona aŋa Zəzagəla uwana la afik. Kamkam gənava à ka, kà la sləm aŋa Zəzagəla: Sək à gi, bəsak, kavà à gi ŋgərpa aw.” ⁸ Apəh uwaga kà, kà uwana Yesu afəl gay à gəl: “Kak zagəla zagəla: Sà à dza uwaga la kəl ala.” ⁹ La abatà Yesu anəval: “Uwa sləm aŋak uwa?” Masla zagəla zagəla agəfal: “Sləm gulo kà maham à ahəŋ, kà uwana anu aŋuwaw. ¹⁰ Kamkam mədəv à ka kudfa, kakudək anu la gudəŋ uwanay aw!”

¹¹ Maham à ahəŋ namzi la ahəŋ la abatà uwana tadzadzàr à vok nekwa la matəkukuruh la afik. ¹² Azlamasəsəfok mawisiga tanəv à Yesu, tagəfal: “Sləl anu à maham à ahəŋ namzi à abà pəra, və à anu tetəvi, məda à atà à gəl.” ¹³ “Aya, dāw!” Yesu agədf à atà. La kità azlazagəla zagəla tasà à dza uwatà lakəl ala, ŋaha tahəd à azlanamzi à gəl gesina. Batsàrà, tahöy à ahəŋ, tavələh à iyaw à abà, ŋaha tasufəh à abà. Azlanamzi uwaga gesina kà taslā dəbow səla.

¹⁴ Azlaməna manəŋla azlanamzi tahöy aŋatà, tadàla gay uwaga kà maziŋ azladza bəza gudəŋ la azlahud gudəŋ gesina la makoray uwatà. Azladza tasəhà à uda, tasà à waŋ kà manəŋ tatak uwana adfahə vok. ¹⁵ Uwana tabəz à slaka Yesu tanəŋə dza uwana agə la maham à ahəŋ zagəla zagəla lakəl, madza madzayga la lukut la vok, haŋkəli adawulla à gəl. Ləv avəl à azladza à gay. Guba akəs atà. ¹⁶ Azlaməna manəŋ uwana

apakà vok gesina kà, tazàhà gay aña dza uwana la zagèla zagèla lakèl uwarà la aña azlanamzi gesina bay. ¹⁷ La abata tagòf à Yesu: “Kamkam, sà à uda la makoray gami.” Yesu asà à afik, ahàd à slaka kèsлах iyaw.

¹⁸ Mok uwana adà à kèsлах iyaw à afik, dza uwana agà la azlazagèla zagèla lakèl uwarà, agòf à Yesu: “Kamkam, asa à gi mèdaw sèla.” ¹⁹ Ama Yesu avàl tetèvi aw: “Wùl à huf gày anjak, zàhàtàn uwana Sufèl Zèzagèla adfahàkàn gesina lakèl aña uwana vok ahàmàl kà kak!”, agòfàl. ²⁰ Dza uwaga adà aña zla, ngaha adzèkà mapahay la makoray uwana slèm aña gudøn kulo, à tatak uwana Yesu adfahàlàn gesina. Azladza gesina uwana tatsèb slèm à gay uwaga, gesina anjatà, lèv avàl atà gay.

*Dugu aña Yayrus atà la mis uwana adèbani lukut aña Yesu
(Mata 9.18-26; Luka 8.40-56)*

²¹ Yesu awùl à wañ la gay dèrèv uda anik la kèsлах iyaw. La mok uwana adatsizl à ahøn la gay mukwà, maham à ahøn dza anuvaw ahamàl à adi. ²² Mønğa aña gày Zèzagèla asà à wañ, slèm aña Yayrus. Uwana anønàn Yesu akèfèf à makèla asik aña. ²³ Anàval, agòfàl: “Bèzi dugu gulo azlèmètsay. Kamkam, sà à wañ, kabèk ahàl à bèzi à vok kà masla mawur ala ngaha kà masla abèz sifa aña aya.” ²⁴ Yesu asà à afik, tahàd atà sèla, maham à ahøn dza anuvaw tanjisl Yesu.

²⁵ Mis anik la ahøn la abata, anjiz akèllal à tsèh ala dagay mavakay kulo gèl aña sèla. ²⁶ Aday vok mønğa la madàh à slaka azlamèna mavàh yohof, az lèmana aña ala kà anuvaw. Ama aga njulèm aw: say mavèdzehøn ala pèra. ²⁷ Vèrdi anik atsønàn tapèhay lakèl aña Yesu, kiya uwaga afà à vok à maham à ahøn dza à abà. ²⁸ Adzùgw la gèl aña: “Banja gèdèbani lukut aña pèra kà, gèdàwurla”, agòf. Aguwa la lig aña Yesu, adèbani lukut aña. ²⁹ Batsàrà makèlay anjiz aña atsizl à ahøn, atapà vok aña kà adawur ala la dufvats aña la abà. ³⁰ La mok uwatà Yesu atapà kà ndzèfà asà à uda la vok aña. Agolà vok à maham à ahøn dza à abà la magòfay: “Uwa à uwana adèbani lukut gulo uwa?” ³¹ Azlamèna matapla la slaka aña tagòfàl: “Nønà maham à ahøn dza tanjisl ka tsi, pèra kanav madèbìn ka aya ay?”

³² Yesu anønà à makèla gèl kà masèl dza uwana adfahà uwaga. ³³ Anasl adadiya à mis à vok kà uwana asèl uwana adfahà vok la masla. Asà à wañ, atèf à makèla asik aña Yesu, apèhal dziriga aña gesina. ³⁴ Yesu agòfàl: “Dugu gulo, madiñal gèl à vok anjak awurà ka ala. Hàd la wurwur, kadawurla la ngèrpa anjak la abà!”

³⁵ Mok uwana Yesu apèh gay uwaga kà, azlamèna maslèlay tasà à wañ la mtèga aña Yayrus, mønğa aña gày madèv kudà, tagòfàl: “Dugu anjak kà adamètsay, kà mana katèràb Sufèl aya ma?” ³⁶ Ama Yesu afà slèm à gay anjatà aw, agòf à Yayrus: “Lèv avàl à kak à gay, kasak à madiñal gèl à vok aw!” ³⁷ Avà tetèvi à dza kà malakøn aw, say Piyer, Yakuba la deda aña Yuhana pèra. ³⁸ Mok uwana abèz à mtèga aña mønğa aña gày madèv kudà, Yesu atsønà hulolo aña azladza, la mataway, la mawiyay mønğa. ³⁹ Yesu adà à gày, agòf à atà: “Kà mana kadzudèfèkaw la mataway ma? Dugu uwanay kà, adamètsay aw, ama adzèhal pèra!” ⁴⁰ Uwana azladza tatsønà uwaga: “Uwàà...”, tasakwà à ahøn, takèfàslal. Kà uwaga: “Dàw à uda gesina!”, agòf à atà. Say Baba la iyà aña dugu la azlamèna matapla la slaka aña makèr uwatà pèra tagòf à gày. Uwana tahàd la gày uwana la aku tahønà dugu à agu. ⁴¹ Yesu akès bèzi dugu la ahàl, agòfàl: “*Talitha koum*” (Bokuba magòfay: Bèzi dugu sà à afik, gègòd à ka) ⁴² Katskats bèzi dugu asà à afik, adzèkà maday. (Mavay aña kà kulo gèl aña sèla) La mok uwana tanønà uwaga kà, lèv avàl à atà à gay kaykay. ⁴³ Ama Yesu afahà à atà akur à lig kà anuvaw, kà atà mapèh à dza anik aw. Ngaha agòf à atà: “Vàwwal tatak may!”

6

*Azlamèna gudøn Nazaret tadiñ gèl à Yesu à vok aw
(Mata 13.53-58; Luka 4.16-30)*

¹ Yesu azà vok la slaka uwatà, awùl à gudøn aña, uwana azigøn la abà. Azlamèna matapla la slaka aña tanèfà. ² Uwana vuf maduw lèv adasa à wañ, adzèkà matapla tatak à azladza la gày madèv kudà la aku. Maham à ahøn dza anuvaw la abata. Uwana tatsèbal slèm gesina kà, lèv avàl à atà à gay, tagòf: “Lala abèzà tsèhay gay uwanay la? Dzèba matsihila mana gà à uwanay abèzal ma? Kakay adfèhøn à tsèhay tatak dzèba aña sèla aw gè uwanay ma?” ³ Dza uwanay kà masla mapèd kèsлах aw takay? Kona aña Mariyama, ngaha deda aña Yakuba, la Yosès, la Yahuda, la azla Sèmon aw ay? Azladeda aña degagamga bay atà la uwanay anina la abanay aw takay?” Kà uwaga à uwana tadiñal gèl à vok aw. ⁴ Yesu agòf à atà: “Tazlèb masla mapèhal gay à ahàl aña Zèzagèla bamèraka la mali, ama la gudøn aña kà tazlèb masla aw, la tataka azlayaga aña la abà, azlamèna gày aña kà tazlèbay aw!” ⁵ Yesu aslèla vok kà madfah nadzipo

la abatà dɛɲ aw, say abək ahàl à azlaməna dɛvats anik à gəl ɲgaha awàr atà ala. ⁶ Løv avàlal à gay kà uwana madɲal gəl à vok anjatà la ahəɲ aw.

Yesu asləl azlaməna matapla la slaka anja kulo gəl anja səla,

la səla səla

(Mata 10.5-15; Luka 9.1-6)

La lig la ahəɲ Yesu auguzàh la gudəɲ la abà gesina kà matapla gay Zəzagəla à azladza. ⁷ Yesu azàl azlaməna matapla la slaka anja kulo gəl anja səla, adzəkà masləl atà la səla səla, avà à atà maslay kà makor azlamasasədok mawisiga. ⁸ Afàh à atà akur à lig, agòd à atà: “Kazəbaw tatak à ahàl kà anja tetəvi aw, tatak may aw, kiwa aw, sili la zliha la aku aw, say azəva pəra. ⁹ Bəkàw kwimik à asik, ama katsəpaw lukut səla à vok aw!” ¹⁰ Agòd à atà bay: “Banja kadaw à gudəɲ à abà kà, dzàw à ahəɲ la mtəga anja dza uwana akəs akul lela tsərəh à uwana kadaw ankul la abatà. ¹¹ Azladza gudəɲ uwana takəs akul aw, ɲgaha tatsən akul aw kà, kadaw ankul la abatà, dèdàw burburu la asik ala kà mapəh à atà ala kà tadàh mawisiga.” ¹² Azlaməna matapla la slaka anja tahàd mapəh gay Zəzagəla, kà à azladza anja mapəh gay løv ala, kà atà tasak à tsakana anjatà. ¹³ Takudəkàh azlamasasədok mawisiga anjvaw, tadàhàn amàl à azlaməna dɛvats à gəl, anjvaw tawàr ala.

Mamətsay anja Yuhana masla madàh batem

(Mata 14.1-12; Luka 9.7-9)

¹⁴ Sufəl Herod atsənà gay anja Yesu, kà uwana azladza tasəl sləm anja baməraka la mali, tagòd: “Yuhana masla madàh batem adawul à uda, gay gà la uwaga aslala vok anja madàh nadzipo”, tagòd. ¹⁵ Azlaanik tagòd aya: “Uwaga kà Eliya”, azlaanik bay: “Uwaga masla masləl à wanj anja Zəzagəla bokuba tekula la tataka anja azlaməna mapəh à atà gay à ahàl uwana la abà uwarà”, tagòd.

¹⁶ Uwana Herod atsnà gay uwaga, agòd: “Uwaga Yuhana masla madàh batem uwana gəsləl dza kà manats gəl anja, masla la uwana adawul à uda la mamətsay.” ¹⁷ Kà uwana Herod la gəl anja apəh gay makəs Yuhana dagay uwarà, kà anja mawodəɲ à gày danjaj à agu. Adahàn kiya uwaga kà gay anja Herodiya, mis anja deda anja Filip, uwana Herod azəb. ¹⁸ Ama Yuhana agòd à Herod: “Uwaga kà delga aw, kà anja mazəb mis deda anjak aw!” ¹⁹ Kà uwaga Herodiya apək løv lakəl anja Yuhana, ayàh kà makəd masla. Ama abəzà à tetəvi aw kà Herod. ²⁰ Kà uwana guba azà Herod kà Yuhana, asəl kà masla dza dziriga ɲgaha sətaka gà, anəɲla masla lela, asəl matsən gay anja Yuhana, ama uwana adatsen gay anja gesina kà, hanjeli anja awisa ala.

²¹ Mavakay delga anja Herodiya adasa à wanj, uwaga mavakay anja mayyi Herod. Masla atà kaf à uda kà anja azlaməna anja, kà azlamənga anja azlaslodzi la azlamənga anja kutso Galili. ²² Bəzi dugu anja Herodiya adà à gày, ahàb dəs, arabà løv anja Herod la azladza uwana tadzàh madzay atà nna. Sufəl Herod agòd à dahalay: “Mana asa à ka gəvə à ka ma? Nəv uwana asa à ka gesina, gəvə à ka”, agòdal. ²³ Azùwal mawadafay: “Uwana kanav à gi gesina gəvə à ka, amiyaka tenma anja makoray gulo bay.” ²⁴ Dahalay asà à uda, agòd à iyà anja: “Mana gənavay ma?” Agòdal: “Nàval gəl anja Yuhana masla madàh batem.” ²⁵ Katskats amərə vok kà mad à slaka sufəl, anəv la magodafay: “Asa à gi kanəl gi gəl anja Yuhana masla madàh batem à tasà à abà.” ²⁶ Uwaga kà azà à sufəl la løv mənja, ama kà mazuw mawadafay anja uwana azùw la huma anja azladza kà, aslala vok kà makosal aw. ²⁷ Katskats sufəl asləl slodzi kà manəl gəl anja Yuhana, kà anja masəlla à wanj. Slodzi ahàd à gày danjaj à agu, anəl gəl anja Yuhana. ²⁸ Asəlla gəl anja Yuhana à wanj la tasà la abà, avà à dahalay. Dahalay bay adàla à iyà anja. ²⁹ Mok uwana azlaməna asik anja Yuhana tatsən uwaga, tasà à wanj kà mazəb vok anja, kà malay.

Yesu avà tatak may à azladza dəbow zlo

(Mata 14.13-21; Luka 9.10-17; Yuhana 6.1-14)

³⁰ Azlaməna matapla la slaka anja tawul à wanj à slaka Yesu. Tapəhal uwana tadàhàn, la uwana tatəpla à azladza. ³¹ Azladza anjvaw tasà à wanj, anjvaw tadàɲ atà, kiya uwaga Yesu la azlaməna matapla la slaka anja tabəzà à tetəvi kà mazuw tatak may aw. Gay gà la uwaga Yesu agòd à atà: “Məhàd kokudà gami à fəta a abà, kà anu anja maduw løv ɲuv.” ³² Tahàd la kəslah iyaw kokudà gəl anjatà à fəta à abà. ³³ Ama azladza anjvaw tanəɲà atà à uwana tadaj, anjvaw tasəl atà. Tasàhà à uda la gudəɲ la abà gesina tamərə vok la asik ɲgaha tatsà vok à huma kà Yesu la azlaməna matapla la slaka anja.

³⁴ Uwana Yesu adasa à ahəɲ la kəslah iyaw la afik kà, anəɲà azladza anjvaw. Vok ahàmàl kà atà, kà uwana anəɲà atà kà bokuba azlatuwanj uwana masla manəɲla atà la

ahəŋ aw. Adzəkà matapatàla tatak aŋuvaw. ³⁵ Uwana afats adatəf à ahəŋ, azlaməna matapla aŋha tasà à waŋ à slaka aŋha tagòfal: “Afats adatəf à ahəŋ ŋgaha uwanay bay kà anu la fəta. ³⁶ Wùlla azladza kà taday à bəza gudəŋ à abà la azlahuɔf gudəŋ kà tasukw tatak may aŋatà.” ³⁷ Yesu awùlla à uda, agòf à atà: “Akul vət à atà tatak may tazuw!” Tagòfal: “Lala məbəz tatak may kà madzadzarla azladza kət uwanay la?” ³⁸ Yesu anàv atà: “Kaf ma katay aga la akul la ahəl ma? Dəw, kanəŋəwəŋ!”

Uwana tanəŋəŋ uwaga: “Kaf gay bəsew zlo la kilfi səla.” tagòfal.

³⁹ Yesu agòf à azlaməna matapla la slaka aŋha, kà azladza tadzàhà madzay la dzibokw dzibokw la kəsaf biyaga la afik. ⁴⁰ Tadzàhà madzay la dzibokw dzibokw, azlaanik dzim, azlaanik bay dzik zlo, dzik zlo. ⁴¹ Yesu ahəl kaf zlo la kilfi səla uwatà, anəŋà à zagəla, “Kikay”, agòf à Zəzagəla, ŋgaha atsəkà kaf ala, avà à azlaməna matapla la slaka aŋha kà mavàh à azladza. Kiya uwaga ahəlla kilfi səla uwatà ala bay, tavàh à maham à ahəŋ dza gesina. ⁴² Atà gesina tazuw, asläh atà. ⁴³ La lig la ahəŋ azlaməna matapla la slaka aŋha tahamà gay mapətsəh pətsəh aŋa kaf uwana à vok atəmal à tsəh ala la kilfi səla uwatà, kà aɔhà takosà kulo gəl aŋha səla. ⁴⁴ Matugway aŋa azladza uwana tazuw kaf kà taslà zil dəbow zlo.

Yesu aday lakəl dərəw mənŋa

(Mata 14.22-33; Yuhana 6.15-21)

⁴⁵ Yesu afà à gay à azlaməna matapla aŋha à gəl kà tadiyà à kəslah iyaw à afik kà matsəvokay kà masla à gay dərəw uda anik, nekwa la Betsayda, mok uwana: ‘Dəw aŋkul!’, agodiyà à maham à ahəŋ dza. ⁴⁶ La mok uwana tavàhla atà nna kà, Yesu adà aŋha à gudəŋ à afik kà madəv kuɔfa. ⁴⁷ Uwana vəf adasa à waŋ, mok uwaga kəslah iyaw bay adabəzay à tataka iyaw à abà, ama Yesu aləg la vəfah kokuɔfa gəl aŋha. ⁴⁸ Anəŋəŋ azlaməna matapla la slaka aŋha kà atà la ŋgərpa la abà kà madla kəslah iyaw, kà uwana afaf awùl à atà à adi. Uwana azlagay matuway gotsak, Yesu adà à awtəy à slaka aŋatà lakəl iyaw. Asal matsəvkay kà atà. ⁴⁹ Uwana tanəŋəŋ aday lakəl iyaw kà, atà tadzūgw kà tatak mavavat dza, tadzəkà mawiyay, ⁵⁰ kà uwana atà gesina tanəŋəŋ, ŋgaha guba akəs atà. Ama katskats Yesu abafatəmà, agòf à atà: “Wəɔfəw vok à uda, uwaga kà gi ŋwà!”

⁵¹ Ahəd à kəslah iyaw à afik la slaka aŋatà, afaf akəsà à asik. Azlaməna matapla la slaka aŋha tahàn ala la madzugway mənŋa, ləv avàl à atà à gay. ⁵² Kà uwana tasəl godega aŋa nadzipo aŋa kaf uwatà aw, kà uwana hanjəli aŋatà aslà kà aŋa matsən godega aŋa tatak uwatà aw.

Yesu awar azlaməna dıvats ala la Genesaret

(Mata 14.34-36)

⁵³ Uwana taduw à uda à gay dərəw anik kà, tawəɔfà kəslah iyaw aŋatà à gay gərdza, tabəz à kutso aŋa Genesaret à abà. ⁵⁴ Mok uwana tasà à ahəŋ la kəslah iyaw la afik kà, katskats azladza tasəl Yesu. ⁵⁵ Tadzàh à gudəŋ à abà la mahoyay, tadzəkà masàhla à waŋ azlaməna dıvats la kəslah la slaka gesina. ⁵⁶ Bə kəla slaka uwana Yesu adà à abà, baməraka la azlaməŋ gudəŋ la abà, la azlabəza gudəŋ la abà gesina azladza tasàhla azlaməna dıvats aŋatà à waŋ à vadavaday kasukwa à afik, ŋgaha azlauwana tadəvəhal kuɔfa kà madəbani amiyaka gay aŋa lukut aŋha, tawàr ala.

7

Matapla aŋa azlababa madzidzi gə

(Mata 15.1-9)

¹ Azla Farisəya la azlaanik la tataka aŋa azlamadzahaga aŋa wakità seriya aŋa Zəzagəla la abà tasà à waŋ à gudəŋ Urusalima, tahamà gay à vok la slaka Yesu. ² Tanəŋəŋ azlaanik la tataka azlaməna matapla aŋa Yesu la abà tazuw tatak may la kokuɔfa matsuf manəfay aŋatà.

³ Kà uwana azà à azla Farisəya la azla Yahudiya gesina takəs lakəl aŋa matapla aŋa azlababa aŋatà madzidziga, tazuw tatak may kokuɔfa mapal ahəl aw. ⁴ Baŋa tawùl à waŋ la kasukwa tazuw tatak may dən aw, say baŋa tapəl vok lela. Takəs gay aŋa azlababa madzidziga kà mənŋa. Uwana azlababa madzidziga tafahàhən delga bokuba mapalal azlakətsaw, la azlamasik, la azlatasà vərzegani ŋgaha la kəslah mahən à afik aŋuvaw.

⁵ Azla Farisəya la azlamadzahaga aŋa wakità seriya aŋa Zəzagəla tanàv à Yesu: “Kà mana azlaməna matapla la slaka aŋak tatsuf gay aŋa azlababa gami madzidziga aw ma? Tazuw tatak la ahəl àlähga ma?” ⁶ Yesu awùlla à atà ala: “Hay! Azlayla masla mapəhal gay à ahəl aŋa Zəzagəla Yesayya asəl madzugway aŋkul lela. Akul azlaməna magolla dza, bokuba uwana tatsetsər à wakità Zəzagəla à abà, Zəzagəla agòf:

'Azladza uwanay tazlæb gi la gay pæra, ama lœv anjatà kà kærkær la gi!

⁷ Tagodf kà, tawoya gi, ama gay anjatà kà deyday pæra, kà uwana tapàh mapøhay anja azlababa anjatà kà bokuba mapøhay anja Zøzagøla."^{7*}

⁸ Yesu agòd à atà: "Kasakaw à mapøhay anja Zøzagøla, ngaha kanøfaw matapla anja azladza!"

⁹ Ngaha Yesu agòd à atà aya: "Hay, kasølaw makweska gay makoray anja Zøzagøla kà makæs mapøhla ala ankul. ¹⁰ Musa agòd:

'Zlèbà baba anjak la iyà anjak. Dza uwana adaha à atà mawisiga à vok, say makøday.'⁸

¹¹ Ama akul kagodfaw kà: Baña dza agòd à baba anja banjaw à iyà anja: 'Tenma anja tatak gulo uwana asa à gi mav à ka kà mazlak kà, kà uwaga kà *Korban*.' (Bokuba magodfaw, tatak maviyàga à Zøzagøla) ¹² La lig la ahøj kasakaw dza uwana azlak baba banjaw iyà anja dikidiki aya aw. ¹³ Kiya uwaga kawisewwøj gay Zøzagøla ala la gay matapla ankul. Uwana kazàhàwwøj vok gesina, ngaha kapàkàw ankul ala kà gay Zøzagøla."

Azlatatak uwana tadàla àlàh à dza à vok

(Mata 15.10-20)

¹⁴ La abatà Yesu azàla à maham à ahøj dza aya, agòd à atà: "Tsèbàw gi slœm gesina ankul, tsønàw gay uwanay", agòd à atà, ¹⁵ "Tatak uwana dza azuway kà adàh àlàh à dza à vok aw, say uwana atsa à uda la lœv anja dza la tsøh la uwana adàh àlàh. ¹⁶ Tsønàwwøj lela, baña slœm aga à akul lakøl anja matsønøj!"

¹⁷ Mok uwana Yesu adasak à maham à ahøj, adà à gày, azlamøna matapla la slaka anja tanàval gay lakøl anja gay la abà uwatà. ¹⁸ Ngaha Yesu agòd à atà: "Akul babay, kaslawal à vok anja matsønøj aw ay? Tatak uwana adiya à huç anja dza atsa à uda aslala vok madfah àlàh à dza à vok aw, ¹⁹ kà uwana adiya à lœv à tsøh aw, ad à huç, atsa à uda!" (La gay uwaga la abà Yesu apøh kà dèwdèw tatak may gesina kà, azuw vok) ²⁰ Ngaha agòd à atà aya: "Uwana atsa à uda la lœv anja dza la tsøh la uwana adàhla àlàh. ²¹ Kà uwana la lœv anja dza la uwana madzugway mawisiga atsa à uda uwana adala dza à mabila à abà, mad gøl, makøf dza, ²² à gøl gaw, adi, maksafør, demdem, manjor, mapøh mawisiga lakøl anja dza anik, zlapay, masøl gøl aw. ²³ Dèwdèw tatak mawisiga uwanay gesina atsa à uda la lœv anja dza la tsøh, uwaga la uwana adàhla tsakana."

Yesu atà la mis uwana asøl Zøzagøla aw

(Mata 15.21-28)

²⁴ Ngaha Yesu atsizlla ala la abatà, ahàd à gay makwi anja gudøj Tir. Adà à gày anik à abà, asàl kà azladza tasøl slaka uwana masla la abà aw, ama aslala vok anja mahadf vok à ahøj aw. ²⁵ Mis anik uwana dugu anja la masasødok mawisiga lakøl atsonà gay lakøl anja Yesu. Katskats asà à wanj à slaka anja, akødèdal à makøla asik anja. ²⁶ Mis uwaga kà møløk gä, tayyà à gudøj Fenesøya uwana la kutso Søriya la abà. Adøv kufda à Yesu kà makudøk masasødok mawisiga à dugu anja lakøl ala. ²⁷ Ama Yesu agòd: "Sàk azlabøza tahanla dadøj, mazøb tatak may anja azlabøza manamøl à azlakøda à ahøj kà delga aw." ²⁸ Mis awùlla à uda: "Suføl gulo, azlakøda kà uwana la makøla køslef atáf kà azlabøza à vøfah, la uwana tatsatsamay!" ²⁹ Yesu awulàlla: "Kà gay anjak uwanay kà, dà anjak à mtøga, masasødok mawisiga adasiya à dugu anjak lakøl ala!" ³⁰ Awùl anja à mtøga, abøz à bøzi anja à gøl mahøn à ahøj gä la azlav la afik, masasødok mawisiga adasal à køl ala.

Yesu awura dza bada gä ala, ngaha madagzlam aya

³¹ Ngaha Yesu asà à uda la kutso anja Tir. Aguwà la Sødon, ngaha awùl à gay dørøv Galili, aguwà la makoray anja azlagudøj kulo la abà. ³² Tasàlla dza madagzlamga uwana à wanj, aslala vok mabafma aw, tadøval kufda kà mabøkøl ahàl à gøl kà mawurij ala. ³³ Yesu adàla à uda la tataka maham à ahøj dza la abà, atsizllàn à ahøj kokufda anja, adüwal gay gøl ahàl à slœm à abà, atøf sleslif à ahàl, adøbani alàh anja. ³⁴ Anjønà à zagøla, abàs vok la tsøh ala, agòd à dza: "*Ephphatha!*" (Bokuba magodfaw: Pøzlla à ama ala!) ³⁵ La kirim yewdi slœm anja asläh ala. Katskats tatak uwana awàdla alàh à ahøj, apøzlla, abafmà lela. ³⁶ Yesu afahà à atà akur à lig, kà tapøh à dza aw. Ama bà la mafah à atà akur à lig, uwaga tapàh gesina. ³⁷ Lœv avàl à azladza à gay møjga, tagòd: "Adahanj kà dzøba anja søla aw, adahanj kà azlamadagzlam anja matsøn slœm, azlauwana taslala vok anja mabafma aw bay tafafma adagay!"

8

*Yesu avà tatak may à zil dëbow ufad
(Mata 15.32-39)*

¹ La vuuf uwatà maham à ahəŋ dza aŋuvaw tahamà gay à vok aya la slaka Yesu. Uwana tatak may aŋatà la ahəŋ aw, Yesu azàla azlaməna matapla à slaka aŋha, agòd à atà: ² “Kay, vok aham à gi kà azladza uwanay, kà uwana anina dagay mahənay makər lagwa, tatak may aŋatà bay adadəv kà atà à gay. ³ Barja gəwulla atà à mtəga anatà la may gà kà, tadàtad à ahəŋ la tetəvi la ama, kà uwana azlaanik kà tasà à wanj kà kərəkər.” ⁴ Azlaməna matapla la slaka aŋha tagòdal: “Lala məbəz tatak may kà aŋa azladza gesina uwanay la kəsaf la abà la?” ⁵ Yesu anəv à atà gay ala: “Kaf gay bərsew nna aga à akul la ahəl ma?” “Gay bərsew mədəf”, tagòdal.

⁶ Yesu agòd à azladza: “Dzàhàw madzay!” Nŋaha ahəl kaf gay bərsew mədəf uwatà, “Kikay”, agòd à Zəzagəla, atsakà kaf ala, avà à azlaməna matapla la slaka aŋha, ŋgaha azlaməna matapla aŋha tavàhà à atà. ⁷ Kilfi bəziga la ahəl aŋatà aya, Yesu ahəl, “Kikay”, agòd à Zəzagəla, avà à azlaməna matapla la slaka aŋha kà mavàh à azladza. ⁸ Gesina aŋatà tazūw, aslàh à atà. Azlaməna matapla la slaka aŋha tahàm à gay mapətsəh pətsəhga à vok takosà mədəf à uwana atəm à atà à ahəl. ⁹ Azladza uwana tazūw kaf uwaga taslà dëbow ufad. Nŋaha adəgay kà: “Dàw à mtəga aŋkul!”, Yesu agòd à atà. ¹⁰ Katskats ahàd à kəslah iyaw à afik la azlaməna matapla la slaka aŋha, tahàd à kutsò Dalmanuta.

*Azla Farisəya tanav nadzipo
(Mata 16.5-12)*

¹¹ Azla Farisəya anik tadà à awtəy, tadzəkà mabay vok gay la Yesu. Asà à atà makəsay, gay gà la uwaga tanəv nadzipo la slaka aŋha, kà mapəhatàla, ŋgaha atà aŋa masəlay kà ndzəfa aŋha asà à wanj kà la slaka Zəzagəla. ¹² Yesu abəv vok la ndzəfa, ŋgaha agòd: “Kà mana azladza aŋa lakana tanav à gi nadzipo ma? Gəpəh à akul la dziriga: Gədapəhakulla nadzipo dīkidiki aw.” ¹³ Nŋaha asàk atà à ahəŋ, ahàd à kəslah iyaw à afik aya, ahàd à gay məŋ dərəv anik.

*Tatak makəsl tatak ala aŋa azla Farisəya la aŋa Herod
(Mata 16.5-12)*

¹⁴ Avika azlaməna matapla aŋa Yesu kà mahəl kaf à ahəl. Tatak may la ahəŋ la slaka aŋatà la kəslah iyaw la afik aw, say kaf gay bərsew tekula pəra. ¹⁵ Yesu afahà à atà akur à lig, agòd à atà: “Dàw haŋkəli kà tatak makəsl tatak ala aŋa azla Farisəya la aŋa Herod.” ¹⁶ Azlaməna matapla la slaka aŋha tavəts gay la tsəh ala kà atà kà atà la tataka aŋatà la abà, tagòd: “Apəh uwaga kà, kà uwana kaf aga anu la ahəl aw.” ¹⁷ Yesu asəl uwana tadzugway, anəv atà gay ala: “Kà mana kavatsaw gay la tsəh ala ma? Kà uwana kaf aga akul la ahəl aw ay? Kəsəlaw tatak uwanay gotənaŋ aw uwà? Katsəwaw godega aŋha aw, bə gotənaŋ ay? Matsihila aŋkul ma matsak à ama à gay ay? ¹⁸ Yewdi aga à akul la vok, ama kanəŋawla aw ay? Sləm aga à akul lakəl, ama katsəwawla aw? Awul akul à gəl gotənaŋ aw ay?” ¹⁹ Kaf gay bərsew zlo uwana gətsəkəŋ ala kà aŋa azladza dëbow zlo, ma takosà nna à mapətsəh pətsəhga à uwana kahaməwla gay à vok ma?” “Kulo gəl aŋha səla”, tagòdal. ²⁰ Nŋaha Yesu anəv à atà gay ala aya: “Kaf gay bərsew mədəf uwana gətsəkəŋ ala kà aŋa azladza dëbow ufad bay, ma takosà nna à mapətsəh pətsəhga à uwana kahaməwla gay à vok ma?” “Mədəf”, tagòdal. ²¹ “La kità”, Yesu agòd à atà: “Kakay katsəwaw godega aŋha aw gotənaŋ zlà ma?”

Yesu awur guləf ala la Betsayda

²² Uwana tabəz à gudəŋ Betsayda, tasàlla guləf à wanj. Tadəval kuɖa kà aŋa madəbani guləf, kà masla mawur ala. ²³ Yesu akəs guləf à ahəl, adàla à uda la gudəŋ la abà, ŋgaha adəbəl slesliɖ à yewdi, afəkal ahəl à gəl, ŋgaha anəv à dza uwaga: “Kanəŋa tatak ay?” ²⁴ Guləf anəŋ à zagəla, agòd: “Gənaŋa azladza, ama gənaŋa atà kà bokuba azlaahəf uwana taday.” ²⁵ Bə gotənaŋ, Yesu adəbani yewdi aŋa guləf aya. Masla atsək yewdi à uda la ndzəfa, anəŋla, anəŋà azlatatak gesina la paraka. ²⁶ Nŋaha la lig la ahəŋ, Yesu agòdal kà: “Hàd à mtəga aŋak, kada à gudəŋ à abà aw!”

Piyer apəhla kà Yesu ala,

*kà dza uwana Zəzagəla afəl dzakwa à gəl
(Mata 16.13-20; Luka 9.18-21)*

²⁷ La lig la ahəŋ, Yesu ahàd à azlabəza gudəŋ uwana à abà la kutso Zəsare, uwana la makoray aŋa Filip la azlaməna matapla la slaka aŋha. Yesu anàv à atà gay ala la tetəvi la ama: “Azladza ma uwa tagòd kà gi ma?” ²⁸ Tawùlla à uda: “Azadza anik tagòd, kà kak Yuhana masla mačàh batem, azlaanik tagòd, kà kak Eliya, azlaanik aya tagòd, kà kak tekula la tataka azladza uwana la abà, Zəzagəla aslāl atà à waŋ uwarà.” ²⁹ “Iyay zla! Ama akul ma, gi uwa kagòdaw uwi?” Yesu anàv à atà. Piyer awùl à uda, agòdal: “Kak, dza uwana Zəzagəla afà à ka dzakwa à gəl.” ³⁰ Yesu afahà à atà akur à lig la magòd à atà: “Kapəhawla gi ala la slaka azladza aw!”

*Yesu apəh gay mamətsay aŋha à ahəŋ la mawul à uda aŋha
(Mata 16.21-28; Luka 9.22-27)*

³¹ La lig la ahəŋ, Yesu adzəkà matapla azlaməna matapla la slaka aŋha: “Say Kona aŋa dza as ŋgəra mənŋa. Azlaməŋga, azlamasiga, la azlaməna mav tatak à Zəzagəla, la azlamadzahaga aŋa wakità seriya aŋa Zəzagəla tadəkwasika, ŋgaha tadəkəda. La lig aŋa mahənay makər adàwul à uda la mamətsay.” ³² Apəh à atà gay uwaga la paraka. Piyer akəs Yesu à ahəŋ kokuɖa aŋha, adzəkà mafahal akur à lig la magòday: “Kapəh kiya uwaga aw!” ³³ Mana akəsa vok à dza uwana abəza tatak aŋa gudəŋ à vok gesina, ama az adzəkà maslāh məl à Piyer à gəl, agòdal: “Zà à vok la slaka gulo, kak seteni, kà uwana madzugway aŋak kà bokuba aŋa Zəzagəla aw, ama kiya aŋa azladza.”

³⁴ Ŋgaha Yesu azàl à maham à ahəŋ dza, la azlaməna matapla la slaka aŋha, agòd à atà: “Baŋa dza asal manəf gi kà, say asak maf gəl à azlatatak aŋha à tsəh, azəb ahəf mamətsay aŋha, ŋgaha anəf gi, bokuba uwana gədəzəbay suwaŋ. ³⁵ Kà uwana uwabeyuwi, uwana asal maɖəl sifa aŋha la ahəl aŋha, az gəl aŋha ala. Ama uwabeyuwi, uwana az sifa aŋha ala kà gi, ŋgaha kà gay matsiɖayga aŋa Zəzagəla kà, masla adàbəl sifa aŋha. ³⁶ Mana akəsa vok à dza uwana abəza tatak aŋa gudəŋ à vok gesina, ama az sifa aŋha ala ma? ³⁷ Tatak la ahəŋ, dza avàv kà masukwla sifa aŋha takay? ³⁸ Gay gə la uwaga, baŋa ziruwu az dza kà gi, ŋgaha kà gay gulo lakana la tataka azladza uwana takəs gay aŋa Zəzagəla aw la abà, ŋgaha tadəhəŋ mawisiga, kiya uwaga kà Kona aŋa dza ziruwu adəkəsay kà masla suwaŋ, la mok uwana adàwul à waŋ la mazləbay aŋa Baba aŋha la abà la azlamalika aŋha.”

9

¹ Yesu agòd à atà aya: “Haday, gəgòd à akul, azladza anik uwana la abanay kà, tadəmətsay ðikidiki aw, say baŋa tanəŋ makoray Zəzagəla atsa à waŋ la ndzəɖa.”

*Maɖəɖla vok à ahəŋ aŋa Yesu uwana la gəl gudəŋ la afik
(Mata 17.1-13; Luka 9.28-36)*

² Uwana mahənay mukwa adada à lig, Yesu ahəl azla Piyer, Yakuba, Yuhana ŋgaha tahàd à matsəkəkəɖay gudəŋ à afik kokuɖa gəl aŋatà. La abatà abəɖla vok à ahəŋ la huma yewdi aŋatà. ³ Lukut aŋha apək medəkuga mawutsəɖayga təlla. Dza la ahəŋ la gudəŋ la vok awuɖ lukut ala kiya uwatà aw. ⁴ Ŋgaha azlaməna matapla la slaka aŋha makər uwatà tanəŋà Eliya la Musa taɖadma la Yesu. ⁵ Piyer agòd à Yesu: “Sufəl gulo, delga kà anu la abanay. Sək anu mədàh safsaf makər, tekula aŋak, tekula aŋa Musa, tekula aŋa Eliya.” ⁶ Piyer asəl tatak uwana anakə apəhay aw, kà uwana guba akəs masla la azlaməna matapla anik səla uwanay. ⁷ Habaga asà à waŋ, akəl atà mələs à adi. La habaga uwatà la abà kà tatsənà dza abadma la abà: “Uwaga kà bəzi gay ləv gulo uwana gəwoyan, tsəbàwal sləm!” ⁸ Katskats azlaməna matapla makər uwatà tanəŋla, ama tanəŋà dza aw, say Yesu kokuɖa gəl aŋha la slaka aŋatà pəra.

⁹ Uwana tatsà à ahəŋ la gudəŋ la afik, Yesu afàh à atà akur à lig kà atà aŋa mapəh tatak uwana tanəŋəŋ à dza aw, say baŋa Kona aŋa dza adàwul à uda la mamətsay dadəŋ. ¹⁰ Takəs gay uwatà, ama tanəvəhə vok kà atà kà atà: “Mana asal magòday mawul à uda la mamətsay ma?” ¹¹ Gay gə la uwaga tanəv la slaka Yesu: “Kà mana à azlamadzahaga aŋa wakità seriya Zəzagəla tagòd kà, say Eliya atsa à vok à waŋ dən ma?” ¹² Agòd à atà: “La dziriga, say Eliya atsa à vok à waŋ, adàɖah tatak à ahəŋ gesina. Ama kà mana zla ma tatsetsər à wakità Zəzagəla à abà bay kà, say Kona aŋa dza as ŋgəra mənŋa ma, ŋgaha azladza tanəvəz kà bokuba dza delga aw ma?” ¹³ Ama gəgòd à akul: Eliya asà à waŋ, ŋgaha azladza tadəhəŋ à vok uwana asà à atà gesina, bokuba uwana tatsetsər à wakità Zəzagəla à abà lakəl aŋha.”

*Yesu awur bəzi uwana ala la masasəɖok mawisiga
(Mata 17.14-21; Luka 9.37-43)*

¹⁴ Mok uwana tabèziyà à azlamèna matapla anik à vok, tanèjà maham à ahèj dza anjuvaw uwana takès atà gay à adi. Azlamadzahaga anja wakità seriya anja Zèzagèla tabày vok à gay la azlamèna matapla anja. ¹⁵ Uwana azladza tanèjà Yesu kà, tadzà à ahèj titi. Katskats tadà à awtày à slaka anja la mahoyay kà maskuwij. ¹⁶ Yesu anàv à azlamèna matapla la slaka anja la gay ala: “Kà mana kabayaw vok gay akul nna ma?” ¹⁷ Dza tekula la tataka maham à ahèj dza la ahà awùlalla: “Møjga, gəsàla bëzi gulo zilga à waj, kà uwana masla la masasəfok uwana avàl tetəvi anja mabəfma aw. ¹⁸ Baməraka la mali beli masasəfok akəsàh, amàlal gəl à ahèj, huzlöv asàhal à gay ala la mapaf sliɸ la tsəh ala. Vok anja apakahay dzanɸdzan. Gədəv kuɸa à azlamèna matapla la slaka anjak kà makufək masasəfok mawisiga uwaga, ama taslala vok aw.” ¹⁹ Yesu agòɸ à atà: “Kay, madiɸal gəl à vok ankul la ahèj aw takay? Dagay mbà gədadzà à ahèj la akul ma? Dəgay mbà gədəbasakulan ma? Səwğəla bëzi à waj!” ²⁰ Tasəlla bëzi à slaka Yesu, mok uwana bëzi adanèj Yesu, katskats masasəfok abiyà bëzi, atəɸ à vəɸah, abàbal, huzlöv asàl à gay ala. ²¹ Yesu anàv à baba anja bëzi: “Dagay mbà tatak uwanay azèj ma?” Baba agòɸal: “Dagay la vèrnaga. ²² Anjuvaw masasəfok mawisiga uwaga amàlāhal à gəl akàl à abà, à iyaw à abà kà makəɸay. Ama kamkam, banja kaslala vok mazlak anu, kà vok aham à ka, kà anu!” ²³ Yesu agòɸal: “Kà mana kagof kà: Banja kaslala vok ma? Dza uwana adiɸal gəl à vok aslala vok kà madəh tatak gesina.” ²⁴ Katskats baba anja bëzi awiyà: “Gədiɸal gəl à vok, ama zlàk à gi, kà uwana madiɸal gəl à vok gulo kà à tsəh ala!”

²⁵ Yesu anèjà maham à ahèj dza tatsà à waj à slaka anjatà, aslèh məl à masasəfok uwana à gəl, adəɸ gay à dza à ahèj anja mabəfma la matsən sləm: “Kak, masasəfok madagazlamga, sà à dza uwanay lakəl ala, gəgof à ka, kadàdal à gəl ɸikiɸiki aya aw!”

²⁶ Masasəfok awiyà, agodzàlla bëzi, asà à uda la masla la abà. Bèzi apək bokuba mamətsayga. Kiya uwaga azladza anjuvaw uwana la abatà tagòɸ kà adamətsay. ²⁷ Ama Yesu akəs bëzi la ahəl, atsizllān ala, dzawwa bëzi agòɸ à zagəla à tsəh.

²⁸ La lig la ahèj, mok uwana Yesu adawul à gày, azlamèna matapla la slaka anja tanàvla gəl à gəl: “Kà mana anu kà, məsłala vok anja makufəkay aw ma?” ²⁹ Yesu agòɸ à atà: “Makufək tsəhay masasəfok uwanay kà, say la madəv kuɸa. Ndzəɸa anik la ahèj aw.”

Yesu apəh à atà gay mamətsay anja

*la mawul à uda anja kà masəla
(Mata 17.22-23; Luka 9.43-45)*

³⁰ Tadà anjatà la abatà, taguwà à uda la kutso Galili la abà. Yesu kà asàl kà dza asəl slaka madz à ahèj anja aw, ³¹ kà uwana atapəlà azlamèna matapla la slaka anja, agòɸ à atà: “Kona anja dza tadəviya à ahəl anja azladza. Atà tadəkəɸay, ama la lig la ahèj gədəwul à uda la mamətsay la mahənay makər.” ³² Azlamèna matapla la slaka anja tatsənà godega anja gay uwatà aw, nğaha guba akəs atà bay kà manaval.

*Møjga la tataka gami la abà, ma zlà uwa?
(Mata 17.22-23; Luka 9.46-48)*

³³ Tabèz à gudəj Kapernahum. Uwana tadà à gày, Yesu anàv à azlamèna matapla la slaka anja: “Kà mana kabàyaw vok gay la tetəvi la ama ma?” ³⁴ Ama tadzà à ahèj titi, kà uwana la tetəvi la ama kà, tabayà à vok à gay haday, tagòɸ: “Uwa møjga la tataka gami la abà uwa?” ³⁵ Yesu adzà madzay, azàl azlamèna matapla la slaka anja kulo gəl anja səla, agòɸ à atà: “Banja dza asal mapak mazəb gəl gə kà, say apək mabəziga bəziga anja azladza gesina, apək masla mazəb à atà kiwa.” ³⁶ Yesu azəb bëzi njuvga à ahəl, atsizllā atà à huma à gay. Akəs bëzi la ahəl, agòɸ à azlamèna matapla la slaka anja: ³⁷ “Uwabeyuwi uwana akəs bëzi njuvga uwanay kà sləm gulo kà, akəs gi. Nğaha uwabeyuwi uwana akəs gi kà, akəs gi pəra aw, ama akəs masla masləl gi à waj.”

*Dza uwana masla məzam gami aw kà masla slawda gami
(Luka 9.49-50)*

³⁸ Yuhana agòɸ à Yesu: “Sufəl gulo, mənèjà dza anik uwana akufək masasəfok mawisiga la sləm anjak, ama mədəɸal gay à ahèj, kà uwana anəɸa anu aw.” ³⁹ Ama Yesu agòɸ à atà: “Kadəɸawwal gay à ahèj aw, kà uwana dza la ahèj adəh nadzipo la sləm gulo pəra, la lig la ahèj kà, atugw à gi gay à vok aw. ⁴⁰ Kà uwana uwabeyuwi uwana masla məzam gami aw, kà slawda gami. ⁴¹ Səllaw kà, dza uwana adəv à akul kətsaw iyaw, kà uwana akul anja dza uwana Zèzagəla afəl dzakwa à gəl kà, adəbəz à masak anja.”

*Gay lakəl anja zlazlada anja tsakana**(Mata 18.6-9; Luka 17.1-2)*

⁴² “Dza uwana adukw tekula anja azlabəza uwanay à ahəŋ à tsakana à abà, tadin̄ gi gəl à vok kà, masla kà n̄ləm tawad̄al n̄vol akur à kuda, taməla à d̄erəv à abà. ⁴³ Baŋa kà ahəl an̄ak la uwana katəf à tsakana à abà, n̄ats à tsəh ala, n̄ləm kà kabəz à sifa la ahəl tekula, kà magay la ahəl s̄əla nna, uwana ad̄adala kà à ḡay akəl uwana à abà ad̄aməts ala aw. ((⁴⁴ La abatà maduwari uwana azuw vok amətsay aw, ŋgaha akəl bay amats ala aw.)) ⁴⁵ Baŋa kà asik an̄ak la uwana katəf̄iya à tsakana à abà kà, n̄ats à tsəh ala. N̄ləm kabəz à sifa la asik tekula, kà mad à gudūh akəl à abà la asik s̄əla nna, uwana amats ala d̄ikidiki aw. ((⁴⁶ La abatà maduwari uwana azuw vok ad̄amətsay aw, ŋgaha akəl amats ala aw.)) ⁴⁷ Baŋa kà yewdi an̄ak la uwana adala ka à tsakana à abà, b̄əf̄ à wan̄, n̄ləm kabəz à sifa la yewdi tekula ḡà à ka magay la yewdi s̄əla kà madiya à gudūh akəl à abà. ⁴⁸ La abatà maduwari uwana azuw vok ad̄amətsay aw, ŋgaha akəl la abà kà madzad̄ atà ala ad̄amats ala aw. ⁴⁹ Kà uwana dza gesina tad̄ətəka atà slugul à adi la akəl, bokuba uwana tatək slugul à tatak à adi kà matsef̄əŋ.”

⁵⁰ “Kà uwana slugul kà tatak delga, ama baŋa slugul azlad̄ay aw, ma kakay kazlad̄awwan̄ ala ma? Ḡaw la slugul la l̄əv an̄kul la tsəh, dzàv à ahəŋ la wurwur, kad̄ahawa à magazlay la tataka an̄kul la abà aw!”

10*Yesu apahla gay ala lakəl anja makudək mis**(Mata 19.1-12; Luka 16.18)*

¹ Yesu asà à afik la abatà, ahəd à gay makwi anja kutso Yahudiya la gay d̄erəv uda anik anja Urdun. B̄a ḡotən̄an̄ maham à ahəŋ dza tahamà gay à vok la slaka an̄ha aya. Ŋgaha at̄apat̄ala bokuba uwana ad̄ahàh̄an̄ koksikoksi. ² Azla Farisəya anik tasà à wan̄ à slaka Yesu, asà à atà kà makasal maləkaw à ahəŋ kà gay an̄ha: “Wakit̄a seriya gami ma avà tetəvi à dza kà makudək mis an̄ha takay?” ³ Yesu awulla à atà ala la magod̄ay: “Mana Musa agod̄ à akul ma?” ⁴ Tagod̄al: “Musa avà tetəvi à dza kà matsetser wakit̄a makudək mis, ŋgaha m̄əsakiya à mis uwat̄a.” ⁵ Ama Yesu agod̄ à atà: “Musa ap̄əh à akul kiya uwat̄a kà, kà dzan̄dzan̄ anja l̄əv an̄kul. ⁶ Ama dagay madzəka gudəŋ à vok, mok uwana Zəzagəla ad̄ahà tatak gesina kà, an̄əl zil la mis p̄əra. ⁷ Gay ḡà la uwaga zil as̄akiyà à baba an̄ha à ahəŋ la iyà an̄ha, kà madz à ahəŋ la mis an̄ha. ⁸ Atà s̄əla nna tapək vok tekula. Kiya uwaga atà s̄əla aya aw, ama tagay kà vok tekula p̄əra. ⁹ Dza avah̄an̄ ala uwana Zəzagəla aham̄ala gay à vok aw.”

¹⁰ Mok uwana atà la kay, azlaməna matapla la slaka an̄ha tanàv̄a Yesu lakəl anja gay uwat̄a aya. ¹¹ Masla agod̄ à atà: “Baŋa dza akudək mis an̄ha, azəb̄ anik, ad̄ah̄ à gəl gaw la mis teran̄a ḡà uwat̄a. ¹² La kit̄a babay kà, baŋa mis akweska zil an̄ha teran̄a, ŋgaha ad̄iya à zil anik, ad̄azab̄ zil.”

*Yesu apis gay à azlabəza à vok**(Mata 19.13-15; Luka 18.15-17)*

¹³ Azladza tasàhla azlabəza ŋuv ŋguvga à Yesu à wan̄, kà madəb̄ani atà la mapis à atà gay à vok. Azlaməna matapla la slaka an̄ha tasl̄ah̄ m̄əl à azladza à gəl. ¹⁴ Uwana Yesu an̄ən̄a uwaga, azinal à gəl, agod̄ à azlaməna matapla la slaka an̄ha: “S̄ak̄aw azlabəza ŋuv ŋuvga tasa à wan̄ à slaka gulo. Kad̄əfaw atà gay à ahəŋ aw, kà uwana makoray Zəzagəla kà anja azladza uwana bokuba atà uwaga. ¹⁵ Had̄ay, ḡəgof̄ à akul: Uwabeyuwi uwana akas makoray Zəzagəla bokuba b̄əzi ŋuvga aw, ad̄ada à abatà d̄ikidiki aw.” ¹⁶ Ŋgaha azàb̄ azlabəza à ahəl, afah̄à à atà ahəl an̄ha à gəl, la tekula tekula an̄at̄a gesina, apis à atà gay à vok.

*B̄əzi kohana galepi ḡà**(Mata 19.16-30; Luka 18.18-30)*

¹⁷ Uwana Yesu adatsizlla kà maday an̄ha, dza anik asà à wan̄ la mahoyay, akod̄ed̄al à ahəŋ, agod̄al: “Kak Sufəl, kak delga, mana gəf̄eh̄ən̄ kà gi an̄a mab̄əz sifa ad̄əv à gay aw ma?” ¹⁸ Yesu agod̄al: “Kà mana kagod̄, kà gi delga ma? Dza delga la ahəŋ aw, say Zəzagəla p̄əra. ¹⁹ Kasəl mapəhay anja Zəzagəla bay: Kakəf̄ dza aw, k̄əs gay anja azlababa an̄ak la anja iyà an̄ak.” ²⁰ Masla agod̄: “M̄əŋga, ḡədakəs mapəhay uwaga dagay la b̄əzi ḡà.” ²¹ Yesu an̄əz masla la mawoyən̄, agod̄al: “Tatak tekula aləg kà ka: H̄ad̄, kadaw azlatatak an̄ak ala gesina, v̄ah̄ sili ḡà à azlaməna kud̄a, kad̄ab̄əz l̄əmana la zagəla la

✧ 9:48 9.48 Yesayya 66.24 ✧ 10:4 10.4 5Musa 24.1-4 ✧ 10:6 10.6 1Musa 1.27; 5.2 ✧ 10:8 10.8 1Musa 2.24

✧ 10:19 10.19 2Musa 10.12-16; 5Musa 5.16-20

afik. Ngaha kà, sà à warj, kà nɔfà à gi!" ²² Ama uwana atsənà uwaga, lɔv azəŋ kà gay uwatà, ngaha adà aŋha la mapak lɔv gà, kà uwana tatak aŋha aŋuwaw.

²³ Yesu anəŋà azlaməna matapla la slaka aŋha à adi, agòf à atà: "Zlazladfa kà aŋa dza galepi kà mad à makoray Zəzagəla!" ²⁴ Lɔv avàl à atà à gay kà gay uwaga. Ama Yesu agòf à atà aya: "Azlabəza gulo, madiya à makoray Zəzagəla kà zlazladfa!" ²⁵ Nuləm zlugumi agwu à uda la afik lepiri, kà galepi aŋa mad à makoray Zəzagəla." ²⁶ Lɔv avàl à azlaməna matapla aŋha à gay kaykay aya kà gay uwaga, tagòf kà atà kà atà: "Tsa baŋa kiya uwaga ma: Uwa aslala vok aŋa mabəlay uwa?" ²⁷ Yesu anəŋà à atà à adi, agòf: "Zlazladfa la slaka azladza, ama la slaka Zəzagəla kà zlazladfa aw, kà uwana masla aslala vok kà madfah tatak gesina."

²⁸ Piyer agòfal: "Nəŋəŋ, mɔdasak à tatak gesina à ahəŋ, mɔdanəfa ka." ²⁹ Yesu agòfal: "Dziriga, gi bay gəgòf à akul: Uwabeyuwi uwana asakiya gay aŋha à ahəŋ, baŋaw azladeda aŋha, la azlaiyà aŋha, la azlababa aŋha, baŋaw azlabəza aŋha à ahəŋ, amiyaka guf aŋha kà gi, ngaha kà gay matsidəyga kà, ³⁰ Zəzagəla adavàl, adabəz tatak aŋha asik dzim aya, la mok aŋa madz à ahəŋ la gudəŋ la vok: azlagəy, azladeda, azlaiyà, azlabəza, azlaguf, azlamatəŋəbay bay, kà la huma la gay, adabəzal sifa adəv à gay aw la zagəla la afik aya. ³¹ Ama aŋuwaw uwana tatsà vok à huma, tadəpakah azlaməna à lig, ngaha azlaməna à lig bay tadəpakah azlaməna à huma."

Yesu awulla gay mamətsay aŋha à tsəh kà mamakər

la mawul à uda aŋha

(Mata 20.17-19; Luka 18.31-34)

³² Uwana atà la tetəvi la ama kà mad à Urusalima, Yesu aguwà à huma, guba akəs azlaməna matapla la slaka aŋha, azladza uwana tanəfà atà guba akəs atà babay. Ngaha Yesu ahəl azlaməna matapla kulo gəl aŋha səla uwatà aya, kokudfa aŋatà, adzəkà mapəh à atà gay uwana adabəzal. ³³ Agòf à atà: "Tsənəwəwəŋ, mada à Urusalima. La abata tadavà Kona aŋa dza à ahəl aŋa azlaməŋga aŋa azlaməna mav tatak à Zəzagəla, la azlamadzahaga aŋa wakitə seriya aŋa Zəzagəla. Tadədukwa seriya mamətsay à gəl, tadəməliya à ahəl aŋa azladza uwana tasəl Zəzagəla aw. ³⁴ Tadatsəkəl magodəhay à gəl, tadətəfal sleslif à vok, tadəzlabay la golba, tadəkəfay. Ama la mahəŋay mamakər adawul à uda la mamətsay."

Manavay aŋa Yakuba la Yuhana

(Mata 20.20-28)

³⁵ La lig la ahəŋ Yakuba la Yuhana, azlabəza aŋa Zebede, tazà vok à slaka Yesu, tagòfal: "Məŋŋa gami, tatak la ahəŋ à uwana mənava à gay ala." ³⁶ Yesu agòf à atà: "Mana asa à akul gədhakulləŋ ma?" ³⁷ Tawulàlla: "Baŋa kadadza madzay la kursi mazləbay aŋak la afik kà, vā à anu tetəvi kà madza madzay tekula la ahəl kaf aŋak ngaha tekula la ahəl gudzay aŋak!" ³⁸ Yesu agòf à atà: "Kasəlaw tatak uwana kanavaw aw, kaslawwal à vok kà mas tatak à uda la kətsaw ŋgərpa uwana la abə gədasay ay? Kadəbəzaw batem aŋa ŋgərpa uwana tadəfah gi à ahəŋ ay?" ³⁹ Ngaha tawulàlla: "Iyay, məslala vok." Yesu agòf à atà: "Hadəy, kadəsaw tatak à uda la kətsaw ŋgərpa uwana la abə bokuba gi, kadəbəzaw batem uwana tadəfahgəŋ bay. ⁴⁰ Ama slaka madza madzay la ahəl kaf gulo ŋgaha la ahəl gudzay gulo kà, gay gulo aw. Slaka uwaga kà, Zəzagəla la uwana adəhan à ahəŋ kà aŋa azladza uwana atsətsəmāni à atà."

⁴¹ Uwana azlaməna matapla anik kulo tatsən gay uwaga kà, taŋəŋuz lakəl aŋa Yakuba atà la Yuhana. ⁴² Gay gā la uwaga Yesu azəl à atà gesina à slaka aŋha, agòf à atà: "Kasəlaw kà azlawana tanəŋla à atà bokuba azlasufəl aŋa kutso kà takor azladza, ŋgaha azlaməŋ dza aŋatà, tadəha à atà ndzəda à gəl. ⁴³ Ama uwaga apaka vok la tataka aŋkul la abə aw. Ama baŋa tekula la tataka aŋkul la abə asal mapak məŋga kà, say agay masla mazəb kiwa à azlaanik. ⁴⁴ Dza uwana asal mapak dza teraŋa gā la tataka aŋkul la abə kà, say apak mayə aŋa azlaanik aŋkul gesina. ⁴⁵ Amiyaka Kona aŋa dza kà, asà à warj kà mazlakəŋ aŋa azladza aw, ama asà à warj kà mazlak azladza, ŋgaha kà mav sifa aŋha bokuba tatak mapəlla gəl à azladza aŋuwaw à ahəŋ."

Yesu awur Bartime guləf ala

(Mata 20.29-34; Luka 18.35-43)

⁴⁶ Uwana tabəz à gudəŋ Yeriko, Yesu la azlaməna matapla aŋha la maham à ahəŋ dza aŋuwaw tasà à uda la gudəŋ uwatà la abə. Dza guləfga la slaka madza madzay la gay tetəvi atsətsəh tatak. Sləm aŋha Bartime, kona aŋa Time. ⁴⁷ Uwana atsənəŋ kà Yesu zil Nazaret la uwana adà à awtəy kà, adzəkə mawiyay: "Yesu, Kona aŋa David, vok aham à kak kà gi!" ⁴⁸ Azladza aŋuwaw tasləhal məl à gəl kà madz à ahəŋ titi, ama masla awiyà la ndzəda aya: "Kona aŋa David, vok aham à kak kà gi!" ⁴⁹ Yesu atsizlla à ahəŋ, agòf:

“Zäläwwall!” Tazälalla, tagöfal: “Wädf vok à uda, sà à afik, azàla ka!” ⁵⁰ Ngaha gulëf awits peteli ala, avàl à afik, asà à wanj à slaka Yesu. ⁵¹ Yesu anàval la gay ala: “Mana asa à ka gëdfahakanj ma?” Gulëf agöfal: “Mønnga, asa à gi gëbëz yewdi gulo.” ⁵² Ngaha Yesu agöfal: “Häd, madinjal gël à vok anjak adawur kak ala!” Katskats abëzà à yewdi anjha, anëfà Yesu.

11

Yesu adiya à gudëj Urusalima à abà

(Mata 21.1-11; Luka 19.28-40; Yuhana 12.12-19)

¹ Mok uwana atà nekwa la Urusalima, bokuba la bëza gudëj Betfaze la Betaniya, tabëzà à gudëj kuvu à afik. (Uwana tazalalla la gay nasara gudëj Oliviyë) Yesu aslël azlamëna matapla anjha sëlà à huma, agöf à atà: ² “Dàw à gudëj uwaga à abà la huma ankul. Kadäbëzaw à ziwëjju njvga mawadëj à ahëj gä uwana dza adadza à afik dikiidiki aw. Pëläw, kasawgëla à wanj! ³ Banja dza agöf à akul: ‘Mana kadahawlanj mi?’, kagodawwal: ‘Asa à Sufël gami, aduällalla à wanj katskats’.”

⁴ Tahäd, tabëzà à ziwëjju mawadëj à ahëj gä à gël la gay gamagày, la gay tetëvi. Uwana tapël ziwëjju uwatà kà, ⁵ azladza anik uwana la abatà, tanäv à atà gay ala: “Mana kadahawllan ma? Kà anja ma kapëlaw bëzi ziwëjju uwaga ma?” ⁶ Tawül ala bokuba uwana Yesu apëh à atà, njgaha azladza tasàk atà. ⁷ Tasëlla bëzi ziwëjju uwatà à Yesu à wanj, tabëkal lukut anjata à lig, njgaha Yesu adà à afik. ⁸ Azladza anjvaw tadàw lukut anjata à tetëvi à ama, azlaanik tatsädf babasl biyaga uwana la guf la abà, tasläh à tetëvi à ama kà maslökaway. ⁹ Azlauwana la huma anja Yesu, la azlauwana tanëfay la tsëh, tawiyà la magodfay: “Delga kà azladza tazlëb Zëzagëla, mapis gay à vok agay la dza uwana tsà à wanj la slëm anja Sufël.” ¹⁰ Zëzagëla apis gay à makoray anja baba gami David à vok, uwana adadzëka vok lagwa. Mëzlëbà Zëzagëla uwana la zagëla la afik kerkër!”

¹¹ Kiya uwaga Yesu ahäd à gudëj Urusalima, kà mad à gày Zëzagëla à agu, ananjà azlatatak gesina lela. Uwana gay mokokhu adagay, ahäd à gudëj Betaniya la azlamëna matapla anjha kulo gël anjha sëlà uwatà.

Yesu atsafla gudëv

(Mata 21.18-19)

¹² Lebëj gä, uwana tsà à uda la gudëj Betaniya, may akës Yesu. ¹³ Anënjà gudëv la babasl la vok, njgaha ahäd kà mayäh mayyay la vok anjha. Ama uwana adabëziya à tsëh anjha kà, abëzà mayyay la vok anjha aw, say babasl përa, kà uwana kaslà anja gudëv dadàn aw. ¹⁴ Yesu agöf à gudëv: “Dza adäzuw mayyay la vok anjak anja tetuwa aya aw!”

Azlamëna matapla la slaka anjha tatsënë gay uwaga.

Yesu akudëkäh azlamëna tsakalay à lag la gày Zëzagëla la aku

(Mata 21.12-17; Luka 19.45-48; Yuhana 2.13-22)

¹⁵ Uwana tabëz à Urusalima, Yesu ahäd à mën gày Zëzagëla à agu. Adzëkà makudëkäh azlamëna tsakalay à uda, la azlamëna masukw tatak la gày Zëzagëla la aku. Adakwà azlatable anja azlamëna mabadfla sili à ahëj la azlaslaka madza madzay anja azlamëna madaw habakoku ala. ¹⁶ Asà kà dza bamëraka tekula anja mad à gày Zëzagëla à agu la tatak lakël aw. ¹⁷ Atapla tatak à azladza, agöf: “Aganay uwana tatsetsër à wakità à abà, Zëzagëla agöf:

‘Slëm anja gày gulo kà uwaga gày madëv kudä anja azladza gudëj à vok gesina. Ama akul kà, kadapakawwanj ala kà bokuba tsakur anja azlamëna gël.’”¹⁸

¹⁸ Azlamënjga anja azlamëna mav tatak à Zëzagëla, la azlamadzahaga anja wakità seriya anja Zëzagëla tatsënë gay uwatà. Gay gä la uwaga tayäh Yesu kà mazinj ala. Ama guba akës atà kà masla, kà uwana lëv avàl à azladza à gay gesina kà gay anjha.

¹⁹ Uwana mokokhu adasa à wanj, Yesu la azlamëna matapla la slaka anjha, tsà à uda la gudëj la abà.

Gay lakël anja gudëv uwana agul afik

(Mata 21.20-22)

²⁰ La gay bebëj bën uwana tadüw à awtäy la abatà, tanënjà gudëv uwatà aya, adagul à afik la slilih gä gesina. ²¹ Awül à Piyer à gël, agöf à Yesu: “Mønnga gulo, nënjà gudëv uwana katsäfla, kà adagul à afik tsi!” ²² Yesu awülla à atà ala: “Hadfay, gëgodf à akul, banja kadinjaw gël à Zëzagëla à vok kà, ²³ kaslawwal à vok anja magodfay à gudëj

uwanay: Zà vok la abanay, tsà gəl à dəröv à abà. Baŋa kadzurkaw la ləv aŋkul la tsəh aw, kadɪŋawwal gəl à vok la ləv aŋkul la tsəh kà, uwaga adàpakakulla vok haday. ²⁴ Gay gà la uwaga gəgəf à akul, baŋa kadəvaw kuɖa kà manav tatak anik la sləm gulo kà, dɪŋawwal gəl à vok kà kadabəzawwal, ŋgaha tadàvəkulla. ²⁵ Mok uwana katsizlāwla kà madəv kuɖa kà, baŋa gay la ahəŋ la ləv aŋkul la tsəh la dza anik kà, matsalanə mawisiga aŋha ala ŋgaha Baba aŋkul, uwana la zagəla la afik amatsakulanə ala bay. ((²⁶ Ama baŋa kamatsawwanə azladza anik ala aw kà, Baba aŋkul uwana la zagəla la afik adàmatsakulanə ala bay aw.))”

Uwa avà maslay à Yesu uwà?

(Mata 21.23-27; Luka 20.1-8)

²⁷ Tawùl à Urusalima aya. Mok uwana Yesu auguzahay la gày Zəzagəla la aku kà, azlaməŋga aŋa azlaməna mav tatak à Zəzagəla, la azlamadzahaga aŋa wakità seriya aŋa Zəzagəla, la azlamasiga tasà à waŋ à slaka Yesu. ²⁸ Tanāv à Yesu la gay ala: “La maslay ma uwala kadàh sləray uwanay la? Uwa avà à ka tetəvi kà madàh sləray uwanay uwa?” ²⁹ Yesu awùlla à atà ala: “Gi bay, gənav à akul manavay tekula. Baŋa kawulawgəla, gi bay gədapəhakulla maslay uwana gəfàhla sləray. ³⁰ Uwa avà tetəvi à Yuhana kà madàh batem uwa? Zəzagəla ay? Awma azladza takay? Wùlāwgəla!” ³¹ Ama takəs sawaray kà atà kà atà, tagəf: “Baŋa məgəf kà: Zəzagəla la uwana avàl tetəvi kà, adəgəf à anu: Ka mana kadɪŋawwal gəl à vok aw zlà ma? ³² Ama baŋa məgəf kà, azladza tavàl tetəvi tsa kità aw kà...” (Guba akəs atà kà azladza, kà uwana azladza gesina tanəŋà Yuhana kà masla kà dza uwana Zəzagəla asləl à waŋ la dziriga) ³³ Kà uwaga tagəf à Yesu: “Məsəl aw.” Yesu agəf à atà: “Ayyà, gi bay, gəpəhakulla dza uwana avà à gi tetəvi aŋa madàh tatak uwanay suwanə aw.”

12

Gay la gay la abà aŋa azlamagamza makəsafər gə

(Mata 21.33-46; Luka 20.9-19)

¹ Yesu apəh à atà gay la gay la abà, agəf: “Dza anik atsəb matavəruk à guf aŋha à abà, akəsəl zlagam à adi; adahà slaka à ahəŋ kà makudits iyaw mayyay matavəruk uwatà à abà, aŋəl gày kà aŋa masla manəŋla guf. Asàkla à azlamagamza aŋha la ahəl, adà aŋha à mauguzahay anik kərkər.” ² Uwana tala mahənyay tatak adasa à waŋ, asləl kohana aŋha à slaka azlamagamza uwatà kà, mavàl humà tatak aŋa guf aŋha suwanə. ³ Ama atà takəs magamza uwatà, tazlāb, takudək la ahəl deyday. ⁴ Dza aŋa guf asləl kohana anik à slaka aŋatà aya. Azlamagamza tatsàh à gəl, ŋgaha tatsəkəl magəfahay à gəl. ⁵ Dza aŋa guf asləl magamza anik aya. Masla kà takəf. Tadafahəŋ azlamagamza anik à vok aŋuwaw kalkal kiya uwaga, tazlābàh azlaanik, ŋgaha azlaanik bay takəf atà. ⁶ Atəm kà dza aŋa guf à ahəŋ kà dza tekula pəra, bəzi gay ləv aŋha uwana awoyəŋ məŋga. La madəvla à gay, asləl à slaka aŋatà, adzūgw kà: ‘Tadzəzəb kona gulo haday aw ay’, agəf. ⁷ Ama atà tagəf kà atà kà atà: ‘Aganay dza uwana adəzuw gày. Sàw à waŋ, məkəf ŋgaha guf adəgəf à anu!’ ⁸ Takəs masla, takəf masla, taməl à uda la guf la abà.”

⁹ Yesu agəf: “Iyay zla, mana dza aŋa guf adəfəhəŋ ma? Adàsə à waŋ, adəkəf azlamagamza makəsafərga uwatà, adàvə guf uwatà à azlaanik. ¹⁰ Haday, kadzəŋəw gay uwanay la wakità Zəzagəla la abà:

‘Akur uwana azlaməna maŋal gày taməlla kà, masla la uwana adapak akur mawəf gày.

¹¹ Aganay uwana Sufəl Zəzagəla adafahəŋ uwaga kà nadzipo la huma yewdi gami!’”^{*}

¹² Azlamadzahaga aŋa azla Yahudiya tayàh kà makəs Yesu, kà uwana atà tasəl, kà Yesu apəh gay la gay la abà uwaga kà lakəl aŋatà. Ama guba akəs atà, kà maham à ahəŋ dza, kà uwaga à uwana tasəkəl, tadà aŋatà.

Mapəl hadama à məŋ sufəl

(Mata 22.15-22; Luka 20.20-26)

¹³ Ama katskats azlaməna mav tatak à Zəzagəla, la azlamadzahaga aŋa wakità seriya aŋa Zəzagəla, la azlamasiga tasləl azla Farisəya anik, la azlaanik la tataka aŋa maham à ahəŋ matsən vok gay la sufəl Herod kà magəf uwana à afik, azlayla kà vok kà makəsla.

¹⁴ Tasà à waŋ, tagəf à Yesu: “Məŋga, məsəl kà kapəhay kà say dziriga pəra, la madz à ahəŋ bokuba uwana asà à Zəzagəla, pəh à anu wakità seriya gami, ma avà à anu tetəvi aŋa mapəl hadama à məŋ sufəl Zəsar takay? Awma məpələl aw takay?” ¹⁵ Ama Yesu asəl kà madzugway aŋatà kà mawisiga, agəf à atà: “Kà mana kavavaraw gi kiya uwaga ma? Sàwgəla sili uwaga à waŋ gəŋəŋəŋ.” ¹⁶ Tasàlla sili à waŋ. Agəf à atà: “Gəl la

* 12:1 12.1 Yesaya 5.1-2 * 12:11 12.11 Mahabay 118.22-23

slöm uwanay la sili la afik ma aña uwa?" Tagòdal: "Aña Zesar." ¹⁷ Yesu awùlla à atà ala: "Delga, vāv à mēñ sufəl Zesar tatak uwana aña, vāv à Zəzagəla bay tatak uwana aña Zəzagəla." Ləv avàl à atà à gay kà gay aña, məslək la ahəñ aw.

Manavay lakəl aña mawul à uda la mamətsay

(Mata 22.23-33; Luka 20.27-40)

¹⁸ Azlaanik la tataka aña azla Sadukiya la abà, tasà à wañ à slaka Yesu. (Atà kà, mawul à uda la mamətsay la ahəñ aw, tagòd) ¹⁹ Tagòd à Yesu: "Məñga, Musa atsetsər à anu mapəhay uwanay: 'Baña dza anik amətsay, asàkiya à mis aña à ahəñ kokufa bəzi, say deda aña azəb mis à uda la gay kuða la abà. Nğaha abəziya azlabəza la mis uwatà kà à huma aña deda aña uwana aməts.'* ²⁰ Azladedə zilga mədəf la ahəñ. Magolga aña azəb mis, nğaha aməts kokufa mayyay bəzi. ²¹ Masəla azəb à uda la gày kuða la abà, amətsalàñ ala kokufa mayyi bəzi aya. Kiya uwaga apakà vok la maməkər aña bay. ²² Kiya uwaga atà mədəf nna mis atsetsər à atà à gay, taməts kokufa mayyi bəzi la masla. La lig la ahəñ, mis aməts suwañ. ²³ Nğaha tak ma, la mok uwana azladza tadawul à uda la mamətsay ma, mis ma adəgay ma aña uwa tak uwa? Kà uwana agà mis aña mədəf nna!" ²⁴ Yesu awùlla à atà ala: "Kazawla haɗay zla! Kasəlaw wakità Zəzagəla aw, kasəlaw maslay aña babay aw. ²⁵ Kà uwana la vud uwana azlamazimnekid tadawul à uda la mamətsay kà, azlamis la azlazil tadazaɓ vok aya aw, ama tadapakahay kà bokuba azlamalika, uwana la zagəla la afik pəra. ²⁶ Lakəl aña azlamazimnekid, uwana tawul à uda la mamətsay kà, kadzəgəw ɗikidiki la wakità la abà aw uwa? Pañaw ma uwala abadlamà à Musa la aləl aña akəl la abà, la gay kuswekuswe la abà ala? Agòdal: 'Gi Zəzagəla aña Abəraham, gi Zəzagəla aña Isak, nğaha gi Zəzagəla aña Yakuba bay.'* ²⁷ Uwaga bokuba magoɗay kà Masla kà Zəzagəla aña azlamazimnekid aw, ama aña azlauwana la sifa. Gay gə à uwaga kazahawla la dziriga."

Mapəhay aña Zəzagəla uwana aɗuwa à vok

(Mata 22.34-40; Luka 10.25-28)

²⁸ La kaslā uwatà madzahaga aña wakità seriya aña Zəzagəla la ahəñ la abatà, atsəbà à atà sləm kà tabay vok à gay. Atsənəñ kà Yesu awùlla à azla Sadukiya kà lela. Azà vok à awtəy, anàval à gay ala: "Mapəhay ma uwala à uwana aɗuwa vok ala?" ²⁹ Yesu awulàlla: "Aganay uwana aɗuwa azlaanik gesina: 'Tsənəwwəñ akul azladza Isərayel! Sufəl Zəzagəla gami kà, masla Sufəl kokufa gəl aña. ³⁰ Wòyà Sufəl Zəzagəla aña la ləv aña gesina, la sifa aña gesina, la hanjəli aña gesina, nğaha la ndzəɗa aña gesina.' ³¹ Aganay mapəhay masəla: 'Wòyà masla magay aña bokuba gəl aña!' Mapəhay uwanay la uwana aɗuwa azlaanik gesina." ³² Məñ dza uwatà agòdal: "Delga Sufəl, kapəh dziriga, Zəzagəla tekula, anik la ahəñ aw, say azladza takəs gay aña. ³³ Say dza awoy Zəzagəla la ləv aña, la hanjəli aña, la ndzəɗa aña gesina, nğaha bay awoy masla magay aña babay bokuba gəl aña. Manəf mapəhay səla uwaga la uwana aɗuwa tatak gesina uwana mədawal à akəl à tsəh kà aña Zəzagəla, la uwana məvəl gesina."* ³⁴ Yesu anəñəñ kà madzahaga aña wakità seriya uwatà awùlla à uda la hanjəli, nğaha agòdal: "Kak kà, kərkər la makoray Zəzagəla aw."

La lig la ahəñ guba akəs atà gesina kà manaval gay anik.

Dza uwana Zəzagəla afəl dzakwa à gəl ma Kona ma aña uwa?

(Mata 22.41-46; Luka 20.41-44)

³⁵ Mok uwana Yesu atəpatàla la gày Zəzagəla la aku, anàvə à atà gay uwanay: "Kakay azlamadzahaga aña wakità seriya tagoɗay kà: Dza uwana tafəl dzakwa à gəl, kà mayyi à tsəh ala aña David ma? ³⁶ Kà uwana Masasəɗok Zəzagəla la uwana aguwa la David la abà, à uwana apəh la gəl aña: 'Sufəl agòd à Sufəl gulo:

'Dzà madzay la ahəl kaf gulo lakəl, nğaha gəɗàbək azlaməna məzam aña kà tsəh asik aña.'*"

³⁷ David la gəl aña azàlal Sufəl, nğaha ma kakay Kristu kà agay mayyi à tsəh ala aña David ma?"

Dahəw hanjəli kà azlaməna wakità seriya aña Zəzagəla

(Mata 23.1-36; Luka 20.45-46)

Maham à ahəñ dza anuwaw tatsənə gay aña Yesu la marabay. ³⁸ Agòd à atà la matapla aña la abà: "Dahəw hanjəli kà azlamadzahaga aña wakità seriya! Asa à atà mauguzahay la dawarawa məñga la vok, asa à atà kà azladza tasokw à atà la slaka maham gay

* 12:19 12.19 5Musa 25.5 * 12:26 12.26 2Musa 3.6 * 12:33 12.33 3Musa 19.18; 5Musa 4.35; 6.4-5; Hosəya 6.6

* 12:36 12.36 Mahabay 110.1

à vok. ³⁹ Tayahay kà slaka madza madzay delga la gày mazuw tatak may la aku. ⁴⁰ Tazàf tatak à azlamis kufà ala, ngaha la madèw kufà zinjzinga kà azladza aña magodfay kà atà azladza dziriga. Atà tadàbèzal seriya dzanjdanza.”

Mav tatak à Zèzagèla aña mis kufà
(Luka 21.1-4)

⁴¹ Yesu adzà madzay nekwa la sahar sili, la gày Zèzagèla la aku, ngaha anòjà uwana azladza tabàk sili à sahar à agu. Azlagalepi anik anuwaw tavàh mènnga. ⁴² Mis kufà gà asà à wanj, awits nini sèla à agu. ⁴³ Yesu azàl azlamèna matapla la slaka aña, agòf à atà: “Gègodf à akul: mis kufà uwanay kà, avà sili uwana aduwa à azladza anik gesina, ⁴⁴ kà uwana atà kà, tavà sili aña lèmana anjata mènnga, ama mis kufà uwanay avà gesina, anik aña la ahòj kà mazuway aw.”

13

Makal gày Zèzagèla à ahòj
(Mata 24.1-2; Luka 21.5-6)

¹ Uwana Yesu adasa à uda la gày Zèzagèla la aku, tekula la tataka aña azlamèna matapla la slaka aña agòfal: “Mènnga gulo, nèrèz azlaakur aña gày uwanay tsi, atà dzèbà aña sèla aw!” ² Yesu awulàlla: “Kanènga gày mènnga uwanay ay? Amiyaka akur tekula kà, adàgòfal à gay aw. Azlamèna mèzam tadàbazlah à ahòj gesina.”

Madzèka vok aña ngòrpa
(Mata 24.3-14; Luka 21.7-19)

³ Yesu ahàd à gudòj à afik, adzà madzay la gudòj kuvu la afik, la huma magol gày Zèzagèla. Azla Piyer, Yakuba, Yuhana la Andòre uwana kokufà gèl anjata, tanàval: ⁴ “Pèhanula, mbà tatak uwanay adàpaka vok ma? La mana mèdànòjòj madèw à gay aña tatak uwaga adàsa à wanj ma?” ⁵ La abata Yesu adzèkà mapàhla ala la magodfay: “Dahàw hanjèli, dza avavar akul aw!” ⁶ Kà uwana azladza anuwaw tadàsa à wanj la slèm gulo, tadàgòfay: ‘Gi la uwana, gi dza uwana Zèzagèla afàl dzakwa à gèl’. Tadàzah azladza ala anuwaw. ⁷ Banja kadàtsènwaw gay guvèl la slaka nekwa gè, ngaha uwana la slaka kèrkèr gè kà, guba akès akul aw. Say uwaga adàpaka vok leri, ama uwaga kà makòf gèl aña dadànj aw. ⁸ Kà uwana azladza kutso anik tadàp guvèl la azladza kutso anik, makoray aña sufèl anik tadàp guvèl la makoray aña sufèl anik. Kutso adàbèlaka vok la slaka anik anik, ngaha may mènnga adàsa à wanj. Uwaga madzèka vok aña ngòrpa bokuba mazay aña huf bèzi pèra.”

⁹ “Ama akul kà, dàhàw hanjèli kà gèl anjku, kà uwana tadàkasah akul, ngaha tadàfahla akul à huma seriya. Tadàzlabah akul la gày madèw kufà la aku. Tadàtsazlah akul à huma azlamènnga, la azlasufèl kà gay gulo, ngaha kadàpahaw gay gulo la huma anjata. ¹⁰ Say dza gesina la gudòj la vok tadàtsèn gay Zèzagèla dadànj. ¹¹ Banja takas akul, tadala akul à huma seriya, guba adàkas akul dadànj, kà gay uwana kadàpèhaw à atà à adi aw. Ama banja kaslà adàsa à wanj, gay uwana kadàpèhaw kà kadàbèzawwal la lèw anjku la tsèh, kà uwana gay uwanay kà, gay aña gèl anjku aw, ama Masasèfok Zèzagèla adàv à akul! ¹² Azladza tadàvah azladedà anjata la ahàl anjata kà makaf atà. Baba bay adàva bèzi aña kà aña makòfay, azlabèza bay tadàgohla afad à azlababa anjata à gèl, ngaha tadàkad atà. ¹³ Azladza gesina tadàpèsewah akul lakèl aña gay gulo. Ama dza uwana adàbasinj tsèràh à awtày la tetèvi Zèzagèla la ama kà, masla kà adàbèlay.”

Masla mèzam aña dza uwana Zèzagèla afàl dzakwa à gèl
(Mata 24.15-28; 21.20-24)

¹⁴ Yesu agòf bay: “Kadànènwaw dza uwana tazala: Mèzam aña Zèzagèla adàdza madzay la slaka uwana azlayla aw, (Dza uwana adzèj uwaga kà atsènòj lela!), azlauwana la Yahudiya tadàhoy à gudòj à afik. ¹⁵ Dza uwana la gèl gày, adàsa à wèfah, ama adàda à gày kà mahèl tatak aña aya aw. ¹⁶ Dza uwana la guf la abà, adàwul à mtèga kà mahèl lukut aña bay aw. ¹⁷ Ngòrpa kà aña azlamis uwana la bèza la huf, ngaha azlamis uwana bèza vèrna aga à atà la ahàl, la mavakay uwatà. ¹⁸ Dèwàw kufà à Zèzagèla kà tatak uwaga aña mapak vok la tèla anasl aw. ¹⁹ La kaslà uwatà kà, ngòrpa mènnga adàgay la ahòj, uwana adapak vok dagay uwana Zèzagèla adàh gudòj à vok tsèràh à lakana aw, adàpaka wok bokuba uwaga aya diki diki aw. ²⁰ Ama Zèzagèla adag azlamavakay uwatà desl kà azladza aña uwana adatsatsamani à atà. Banja kiya uwaga aw, kà dza adàbèlay diki diki aw.”

²¹ “Kiya uwaga, banja dza anik agòf à akul: ‘Aganay dza uwana Zèzagèla afàl dzakwa à gèl la abanay, à agatày, la abatày’, kadinjawwal gèl à vok aw! ²² Kà uwana azlamèna

mapəh à atə gay à ahəl fidağa tadəsaha à waŋ, tadəpahla azlanadzipo anik ala, kà maz azladza uwana ala Zəzagəla adatsatsamni atə, à baŋa taslala vok. ²³ Akul zlə kà, dəhàw haŋkəli! Gədapəh à akul tatak uwaga à vok à abà dagay uwarà.”

Mawul à waŋ aŋa Kona aŋa dza
(Mata 24.29-31; Luka 21.25-28)

²⁴ “La mavakay uwatà, la lig aŋa ŋgərpa la ahəŋ, afats adətəf à zagəla, təla adəudəy aya aw. ²⁵ Azlatsetsiliŋ tadəsokw à ahəŋ la zagəla, azlamaslay uwana la zagəla la afik tadəbəlaka vok. ²⁶ Ŋgaha azladza gesina tadənəŋ Kona aŋa dza atsa à ahəŋ la habaga la abà, la ndzəda ŋgaha la mazləbəy mənŋga. ²⁷ Adəsləl azlamalika aŋha à slaka gesina, kà maham à gay azladza uwana à vok Zəzagəla atsatsəmàni atə, dagay la gay tər gudəŋ à vok ufad.”

Uwana gudəv apəhla ala
(Mata 24.32-35; Luka 21.29-33)

²⁸ “Tapawla gay la gay la abà aŋa gudəv: Baŋa azləl ahəl mawga babasł adəy, kasələw kà təla madara kà nekwa. ²⁹ Kiya uwaga babay, baŋa kanəŋaw tatak uwaga apakà vok gesina, səlāw kà, Kona aŋa dza kà nekwa la gay gamagəy kà mas à waŋ. ³⁰ Hadəy, gəgod à akul: Azladza aŋa zamana uwanay tadədəv à gay dadəŋ aw, say baŋa tatak uwanay adəpaka vok gesina dadəŋ. ³¹ Zagəla la kutso tadədəv à gay, ama gay gulo kà, adədəv à gay dikidiki aw.”

Zəzagəla pəra asəl kaslə madəv à gay
(Mata 24.36-44)

³² “Ama dza asəl mavakay uwatà, baŋaw kaslə uwatà aw, azlamalika uwana la zagəla la afik tasəl aw, Kona aŋa dza bay asəl aw, say Baba kokuđa gəl aŋha pəra. ³³ Dəhàw haŋkəli, kadzəwhal aw, kà uwana kasələw mok uwana tatak uwaga adəpaka vok aw. ³⁴ Adəpakay kà bokuba dza uwana ad à mauguzahay, asàkiyə à gəy aŋha à ahəŋ, aviyà à ahəl aŋa azlamagamza aŋha, avàhà à atə sləray ala, ŋgaha agəd à masla manəŋla gamagəy: ‘Say kanəŋla lela, kadzəhal aw!’ ³⁵ Kà uwaga dzəw à ahəŋ la adi, kà uwana kasələw mok uwana zil gəy adəwul à waŋ aw, bi la mokokhu, bi la tataka vəd, bi la mawiyay gotsak, bi məl palaha. ³⁶ Baŋa atsa à waŋ katskats, abəza akul à gəl la madzəhal la abà aw. ³⁷ Tatak uwana gəgod à akul, gəgod à azladza gesina babay: Dzəw à ahəŋ la adi!”

14

Azlaməŋga tadəha dabaray kà makəs Yesu
(Mata 26.1-5; Luka 22.1-2; Yuhana 11.45-53)

¹ A lig mavakay sala kà aŋa madzəka madəvaday Paska uwana azladza tazuw Pain kokuđa tatak makəsliŋ, azlaməŋga aŋa azlaməna mav tatak à Zəzagəla, la azlamadzahaga aŋa wakitə seriya aŋa Zəzagəla tayəh tetəvi la vuđ uwatà, kà makəs Yesu la dəmədəm, ŋgaha aŋa makədəy. ² Tagod: “Mədəkəs la vuđ madəvaday aw, kà azladza aŋa madzəka magazlay aw.”

Mis adzadzəb aməl matərsin à Yesu à gəl

³ Uwana Yesu la gudəŋ Betaniya, la kay aŋa Səmon, masla akəl zagəla, mok uwana adadza madzay kà mazuw tatak may kà, mis anik asà à waŋ la aməl matərsin la ahəl la koloba gə, sləm aŋa aməl uwatà kà nar. Tsakalay aŋha kà zlazladə. Mis uwatà apəzl koloba, adzadzəb matərsin uwatà à Yesu à gəl. ⁴ Azladza anik uwana la abatà kà, aziŋ atə à gəl, tagod: “Kà mana awis aməl matərsin aŋha ala deyday ma? ⁵ Agayŋa aduw matərsin gə ala aŋa sili dadərmokw makər, ŋgaha avàh sili gə azlaməna kuđa la uwana aduwa à vok.” Kiya uwaga taŋəŋuz à tsəh ala lakəl aŋha. ⁶ Ama Yesu agəd à atə: “Sàkəwwal! Kà mana kavərawla gay ma? Adəh à gi sləray delga gə. ⁷ Azlaməna kuđa kà, atə la slaka aŋkul koksikoksi, kaslawwala vok aŋa madəha à atə delga koksikoksi bokuba uwana asa à akul. Ama gi gədədzə à ahəŋ la akul koksikoksi aw. ⁸ Mis uwanay adəhà uwana aslāla vok. Masla adəh gi aməl matərsin à vok kà, kà madəh gi à ahəŋ aŋa maf gi à zəvay à agu. ⁹ Hadəy, gəgod à akul: La gudəŋ la vok gesina, uwana tadəpah gay marabəŋ, tadəpəhay bay tatak uwana mis uwanay adəhəŋ, ŋgaha mis uwanay adəwul à atə à gəl.”

Yudas asal mat kaf à Yesu à gəl
(Mata 26.11-16; Luka 22.3-6)

✧ 13:26 13.26 Yesayya 13.10; Yoyel 2.10,31; Daniyel 7.13

¹⁰ La lig la ahøj, Yudas Iskariyot, tekula la tataka aña azlamøna matapla kulo gøl aña søla la abà, ahàd à slaka azlamadzahaga aña azlamøna mav tatak à Zøzagøla kà mat kaf à Yesu à gøl. ¹¹ Uwana tatsønà uwaga kà, taràb, tagòfal: “Mødàv à ka sili.” Dagay kaslà uwatà, Yudas ayàh tetøvi kà mapøhla Yesu ala.

Yesu azuw tatak may aña Paska

la azlamøna matapla la slaka aña kulo gøl aña søla

(Mata 26.17-25; Luka 22.7-14; Yuhana 13.21-30)

¹² La mavakay teraņa aña madøvaday Pain kokuða tatak makøslin, vud makad magadzaw aña Paska, azlamøna matapla aña tanàval à gay la: “Lala asa à ka kà møday kà madàh à ka tatak may aña madøvaday Paska à ahøj la?” ¹³ Yesu asløl azladza søla la tataka aņatà la abà, agòf à atà: “Dàw à gudøj à abà, dza la ahøj la tuguzl lakøl, la iyaw gà, kadàgagamaw akul nna. ¹⁴ Nøfaw à gày uwana à abà adàda à agu, gòdàw à zil gày uwatà kà: Møjga gami agòf à ka: ‘Lala à gày gulo, uwana gødàzuw tatak may aña Paska la aku la azlamøna matapla gulo li? agod’, gòdàwwal. ¹⁵ Masla adàpøhakulla gày møjga uwana la afik gà, slaka madfehøj à ahøj gà gesina. La abatà la uwana kadàfahaw vok à ahøj gesina kà aņami.” ¹⁶ Azlamøna matapla la slaka aña tahàd, tahàd à hud gudøj à abà, tabøzà tatak à gøl bokuba uwana Yesu apøhatàla. Uwana tadàh tatak may Paska à ahøj kà, tawùl à slaka Yesu.

¹⁷ Uwana mokokhu adasa à waņ kà, Yesu abøz à abatà la azlamøna matapla aña kulo gøl aña søla. ¹⁸ Mok uwana tadzà madzay, tazùw tatak may, Yesu agòf à atà: “Haday, gøgòf à akul, tekula la tataka aņkul la abà uwana møzuw tatak may søla adàta à gi kaf à gøl.” ¹⁹ Azlamøna matapla la slaka aña tadzøkà mazawla à gøl, tagòfal la tekula tekula aņatà: “Gi zlæk uwà? Gi zlæk uwà?”

²⁰ Yesu agòf à atà: “Dza tekula la tataka aņkul la abà, uwana mødøb alàl à kaf à gøl anu søla, la uwana adàta à gi kaf à gøl. ²¹ Ndzer gi, gi Kona aña dza gødàmøtsay bokuba uwana tatsetsèr à wakità à abà lakøl gulo. Ama nğørpa adàgay la dza uwana adàtøg kaf à gøl aña Kona aña dza agay, tayyi dza uwaga aw kà njuløm kà masla.”

Tatak may tsikasłaga

(Mata 26.26-30; Luka 22.15-20; 1 Korintiya 11.23-25)

²² La mok uwana tazùw tatak may, Yesu azøb kaf, atsàkàn ala, ‘Kikay’ agòf à Zøzagøla, nğaha avà à azlamøna matapla la slaka aña, agòf à atà: “Zùwàw uwaga kà vok gulo!” ²³ Nğaha azøb køtsaw la iyaw mayyay ahàf gà, ‘Kikay’, agòf à Zøzagøla, avà à atà, atà gesina tasà à uda la abà, ²⁴ nğaha agòf à atà: “Uwaga kà aņiz gulo, aņiz makøb vok slawda la Zøzagøla, uwana asokw à vøfah kà aña azladza aņuwaw. ²⁵ Haday, gøgòf à akul, gødàsa iyaw mayyay ahàf uwanay aya aw, tsøràh à uwana mødàsay anina aya la makoray Zøzagøla.” ²⁶ Tazløbà Zøzagøla la mahabay, nğaha tasà à uda, tadà aņatà à gudøj kuvu à afik.

Yesu atà la Piyer

(Mata 26.31-35; Luka 22.31-34; Yuhana 13.36-38)

²⁷ Yesu agòf à azlamøna matapla la slaka aña: “Akul gesina kadàsakaw gi à ahøj, kadàhøy à waņ akul, kà uwana uwaga kà matsetserayga la wakità Zøzagøla la abà: ‘Gødàkøf masla manøjla azlatuwan, azlatuwan tadàvah gøl à ahøj.’” ²⁸ Ama la lig la ahøj, gødàwul à uda la mamøtsay, gødàtsøvokay kà akul kà mad à Galili.” ²⁹ Piyer agòfal: “Amiyaka azladza gesina tasak à kak à ahøj kà, gi kà, gødàsak à kak à ahøj aw.” ³⁰ Nğaha Yesu awùllal ala: “Haday, gøpøh à ka, la vud uwanay lakana, gurayņa mewgdzagalan awiyay asik søla kà, kà kak Piyer kadàgøfay kà, kà kasøl gi aw, asik makøb.” ³¹ Ama Piyer agòf la ndzøfa aya: “Gødàpøh tsøhay gay uwaga aw, gømøtsay ndzer la kak!” Atà gesina tagòf kiya uwaga babay.

Yesu adøv kuða la Getsemane

(Mata 26.36-46; Luka 22.39-46)

³² Tabøz à slaka anik uwana sløm aña Getsemane. Yesu agòf à azlamøna matapla la slaka aña: “Dzàw à abanay, gøda à madøv kuða!” ³³ Yesu ahøl azla Piyer, Yakuba la Yuhana kà maday atà nna. Adzøkà maskulay la mazaw la gøl. ³⁴ Agòf à atà: “Mazaw la gøl akøf gi. Ama dzàw la abanay, dzèwhàl aw!” ³⁵ Azà à atà vok la vok ala njuv, atøf à vøfah, adøv kuða à Zøzagøla: “Banja kaslala vok, và à gi tetøvi, kà kaslà aña nğørpa ada aña la slaka gulo. ³⁶ Iyay Baba gulo, kaslala vok kà madàh tatak gesina. Zøbagøj køtsaw nğørpa uwanay ala la slaka gulo. Ama bokuba uwana asa à gi aw, say bokuba uwana asa à ka.”

³⁷ Ngaha awùl à wanj, abəzà azlaməna matapla anja makər uwatà à gəl, atà la madzəhal gə. Agòd à Piyer: “Səmon, kadzəhal ay? Kaslala vok anja madz à ahənj la adi sa tekula aw ay? ³⁸ Akul gesina dzəw à ahənj la adi, dèwàw kudfa kà matədiya à mavavaray à abà aw. Haday, masasəfok anja dza asal makəs gay, ama vok anja la nzdəfa aw!”

³⁹ Ngaha adà anja aya. Adəv kudfa kalkal uwana uwarà. ⁴⁰ Uwana awùl à wanj, abəzà atà à gəl la madzəhal gə. Taslala vok anja madz à ahənj la adi aw. Tasəl uwana tawùllal ala aw.

⁴¹ Uwana awùl à wanj à slaka anjatà anja mamakər anja, agòd à atà: “Kadzəwəhal, kaduwaw ləv ay? Diga adagay, sa kà adaslay. Lagwa azlaməna tsakana takəs Kona anja dza. ⁴² Səw à afik, məhəd adagay, aganay dza uwana atəg à gi kaf à gəl kà adazlanjaj”, Yesu agòd à atà.

Makəs Yesu

(Mata 26.47-56; Luka 22.47-53; Yuhana 18.3-12)

⁴³ Mok uwana Yesu avətə gay dadənj, Yudas, tekula la tataka anja azlakulo gəl anja səla la abà, asà à wanj. Maham à ahənj dza anjwaw tanəfà à wanj la katsakar, la zəva. Mənj madzahaga anja azlaməna mav tatak à Zəzagəla, la azlamadzahaga anja wakità seriya anja Zəzagəla, la azlamasiga la uwana tasləlla atà. ⁴⁴ Yudas uwana atəl kaf à gəl apəhla dabaray à maham à ahənj dza kà makəs Yesu. Agòd: “Dza uwana gədəsəkwiņ maslawda slawda kà, masla la uwana kayahaw, kadà, kəsəw, dɔwùlla nənjəwla.” ⁴⁵ Uwana adabəz à abatà, katskats ahəd à slaka Yesu, agòd: “Mənjga gulol”, akəsà vok. ⁴⁶ Azladza takəs Yesu, tawəsləhənj à ahənj. ⁴⁷ Ama tekula la tataka azlaməna matapla la abà, atsizilla ala, abəfə katsakar anja à lag, adəfə magamza anja mənjga anja azlaməna mav tatak à Zəzagəla, anətsal sləm lakəl ala. ⁴⁸ Yesu agòd à maham à ahənj dza: “Kà mana katsəw à wənj la katsakar ngaha la zəva la ahəl kà anja makəs gi ma? Gi masla nabəra ay? ⁴⁹ Kəla mavakay gədzà à ahənj la aku la mənj gəy Zəzagəla la aku, gətəpakulla tatak, aku bay kakəsəw gi aw. Ama uwaga apaka vok kà madəvənj à gay tatak uwana azlaməna mapəh à atə gay à ahəl tapəh dagay uwarà.” ⁵⁰ Ngaha azlaməna matapla la slaka anja gesina tasakal à ahənj. Tahəy anjatə.

⁵¹ Kohana anik la ahənj, anəfə Yesu la peteli la vok pəra. Tayəh kà makəsəy. ⁵² Ama asəkətəla peteli à ahənj, ahəy anja ala diga.

Yesu la huma seriya

(Mata 26.57-68; Luka 22.54-55; Yuhana 18.13-14,19-24)

⁵³ Maham à ahənj dza tadəla Yesu à slaka mənjga anja azlaməna mav tatak à Zəzagəla, la azlamagol dza la azlamadzahaga anja wakità seriya anja Zəzagəla. Gesina tahamə gay à vok. ⁵⁴ Piyer anəfə atà la lig kərkəj, adà à kodal anja mənjga anja azlaməna mav tatak à Zəzagəla à abà, adzà madzay la azlaslodzi à wəfa akəl à vok.

⁵⁵ Azlamənjga anja azlaməna mav tatak la azlamadzahaga gesina tayəh dabaray anja makəsalla fida à gəl anja madukwla seriya mamətsay à gəl, ama tabəzà à mawisiga anja aw. ⁵⁶ Kà uwana uwabeyuwi atəgw gay fida lakəl anja, ama fida anjatà akəsà vok aw. ⁵⁷ Azlanik anjatà tasà à afik ngaha tatsəfal azlafida anik anik à gəl gesina. ⁵⁸ “Mətsənənj agòd kà: ‘Gədəkəl magol gəy Zəzagəla uwanay à ahənj, uwana azladza tanjəl la ahəl la mahənay makər, gədəhənənj ala kokuɔfa maf ahəl à abà anja azladza’, agòd.” ⁵⁹ Baməra ka la madəh fida uwatà, gay anjatà akəs à vok aw.

⁶⁰ Mənjga anja azlaməna mav tatak asà à afik, atsizilla ala la tataka azladza la abə gesina, anavə Yesu la gay ala: “Kawulla gay à uda aw takay? Mana à uwana tatugw kà gəl tak ma?” ⁶¹ Ama Yesu adzà à ahənj titi. Awùlla gay à uda aw. Mənjga anja azlaməna mav tatak anavə Yesu aya: “Kak Kristu, Kona anja Zəzagəla uwana tazləbay ay?” ⁶² Yesu agəfal: “Bà kiya uwaga, kadənənjaw Kona anja dza madza madzayga la ahəl kaf anja Zəzagəla lakəl la maslay, la mazeləbay mənjga, ngaha atsa à ahənj la habaga zagəla la abà.” ⁶³ Mənjga anja azlaməna mav tatak akwəhə lukut anja ala, agòd: “Məwəya sayda anik lakəl anja aya aw! ⁶⁴ Katsənəw uwana apəh mawisiga lakəl anja Zəzagəla. Mana kadzəgwaw ma?” Gesina anjatə tadükwla seriya mamətsay à gəl.

⁶⁵ Azladza anik la tataka anjatə la abà tadzəkà mataf sleslib à Yesu à adi. Tatsakal à yewdi à ama, tazləb la mamits ahəl, ngaha tagəfal: “Pəhanula, uwa à uwana adəfə à ka uwa?” Azlaslodzi takəs Yesu, ngaha tabakəlla ahəl à sləm à abà.

“Gəsəl Yesu aw”, Piyer agod

(Mata 26.69-75; Luka 22.56-62; Yuhana 18.15-18,25-27)

⁶⁶ Piyer la gəl akàl dadànj, à uwana dugu madzadzaray anja mənğa anja azlaməna mav tatak asà à wanj. ⁶⁷ Uwana anənjə Piyer à vədə akàl à vok kà, anərèz, agòd: “Kak bay, kadzà à ahənj la Yesu, zil Nazaret.” ⁶⁸ Ama Piyer adahà fida, agòd: “Gəsəl aw, gətsəna gay uwaga asa à ka magodəy aw!” Nğaha asà à uda, adà anja à dzogdzog à abà. Mok uwatà mewgdzagalan awiyà. ⁶⁹ Dugu madzadzaray anənjə Piyer aya, agòd à azladza uwana la abata aya: “Dza uwanay kà tekula anətə bay!” ⁷⁰ Ama Piyer agòd aya: “Awanj, gi tekula anətə aw.” La lig la ahənj njuv, azladza uwana la abata tagòd à Piyer: “Hadəy, kak bay, kak tekula anətə, kà uwana kak zil Galili.” ⁷¹ Piyer adzəkà magodəy: “Banja gəfàh fida, say Zəzagəla avà à gi nğərpa zagəla. Gəsəl dza uwaga kapəhaw gay anja dikiđiki aw!” ⁷² La mok uwatà mewgdzagalan awiyà kà masəla. Gay uwana Yesu apəh, awùl à Piyer à gəl: ‘Mok uwana mewgdzagalan awiyay asik səla dadənj aw, kadəgodəy asik makər kà, kasəl gi aw.’ Piyer adzəkà matuway.

15

Yesu la huma Pilatus

(Mata 27.1-2; 11-14; Luka 23.1-5; Yuhana 18.28-38)

¹ Bənj la zay la tsəh, azlamənğa anja azlaməna mav tatak takəs sawaray la azlamadza-haga anja wakità seriya anja Zəzagəla gesina, tatsurkà Yesu, tadàlla, tavà à Pilatus à ahàl à afik. ² Pilatus anavà Yesu la gay ala: “Kak Sufəl anja azla Yahudiya ay?” Yesu awulàlla: “Iyay, bokuba uwana kagòd.” ³ Azlamənğa anja azlaməna mav tatak, takəl gay à Yesu à vok anjuvaw. ⁴ Pilatus anavà Yesu aya: “Kawulla à gay à uda aw uwà? Tsəna makəl à ka gay à vok anətə tsi.” ⁵ Ama Yesu awùlla à gay à uda aw. Ləv avàl à Pilatus à gay kà uwaga.

Seriya mamətsəy atəf à Yesu à gəl

(Mata 27.15-26; Luka 23.13-25; Yuhana 18.39-19.16)

⁶ Kəla madəvadəy Paska, Pilatus aduwatàla gəl à masla dənjay tekula, uwana maham à ahənj awoyənj. ⁷ La mok uwatà, dza tekula la ahənj la dənjay la aku, sləm anja Barabas. Masla tekula anja azlaməna mازلəl guvəl à gumna à adi, takəd dza la magazlay la abà. ⁸ Maham à ahənj dza ahəd à mtəga Pilatus kà anja manav uwana Pilatus adahàhətənj viya viya. ⁹ Pilatus anavà atà à gay ala: “Asa à akul kà gəduwakulla gəl Sufəl anja azla Yahudiya ay?” ¹⁰ Kà uwana asəl kà azlamənğa anja azlaməna mav tatak tadàla Yesu à slaka anja kà manor pəra. ¹¹ Ama azlamənğa anja azlaməna mav tatak tavədzàhà à tsəh azladza à afik kà Pilatus aduwatàla gəl kà Barabas. ¹² Pilatus agòd à maham à ahənj dza aya: “Mana asa à akul gədfəhənj à dza uwanay à vok kazalawla ala Sufəl anja azla Yahudiya ma?” ¹³ Tawulàlla la mawiyay: “Zləl masla à ahəf à adi!” ¹⁴ Pilatus anavà atà: “Mana mawisiga anja uwana adahənj ma?” Ama tazàla mawiyay à gəl aya: “Zləl masla à ahəf à adi!” ¹⁵ Pilatus awoyə marab ləv anja azladza. Kà uwaga à uwana aduwà à atà gəl à Barabas. Nğaha agòd à azlaslodzi kà tasläh Yesu ala la kurpi, avà à atà masla à ahàl kà mازلəliya à ahəf à adi.

Azlaslodzi takəfasl à Yesu

(Mata 27.27-31; Yuhana 19.2-3)

¹⁶ Azlaslodzi tadàla Yesu à gəl akàl anja Pilatus, tazàlähà azlaslodzi gesina. ¹⁷ Tadùwal dawara mativga à vok, taslähsləp atək, tatsefədəl à gəl magabaga gabaga anja sufəl kà makədəslal. ¹⁸ Nğaha tasukwà masla: “Ayyi, Sufəl anja azla Yahudiya!” ¹⁹ Tadəf əd ə gəl la kavak, tatəfal sleslīb à vok, takədəf ə ahənj la huma anja bokuba sufəl kà madzedzinay. ²⁰ Uwana tadəv makədəslal à gay, tasərətəl dawara mativga uwatà la vok ala, tawùllal lukut anja à vok, nğaha tadàla à uda kà anja mازلəl à ahəf à adi.

Tazləl Yesu à ahəf à adi

(Mata 27.32-44; Luka 23.26-43; Yuhana 19.17-27)

²¹ La tetəvi la ama, tagagəm la dza, uwana zil gudənj Səren, sləm anja Səmon baba anja Alekəsander atà la Rufus. Masla atsà à wanj la guf anja la abà. Azlaslodzi tafəl ndzəfà à gəl anja mazəb ahəf anja Yesu. ²² Tadàla Yesu à slaka uwana sləm anja *Golgota*. (Bokuba magodəy: slaka aslasl takasa à gəl) ²³ La abata asà à atà anja maval iyaw hamhamga uwana tatəfəlla mir à tsəh, kà mataslala maziñ ala, ama Yesu akweskà kà masay. ²⁴ Nğaha tatatəsl Yesu à ahəf à adi. Tavàhà lukut anja la tataka anətə la abà, tatsəl tsatsa lakəl, kà uwana asà à atà masəl tatak uwana uwabeyuwi anətə abəzəl. ²⁵ Mok uwana tatəsl Yesu à ahəf à adi kà zil gosela. ²⁶ Tatsetsər à gəl anja gay seriya tapəhla ala la magodəy gay uwana takəf ə ala: SUFƏL ANJA AZLA

YAHUDIYA. ²⁷ Tatatäsl azlamëna nabëra sëla à ahàf à adi la Yesu, tekula la ahàl kaf anha, tekula bay la ahàl gudzay anha. ((²⁸ Kiya uwaga agay bokuba uwana tatsetsër à wakità Zëzagëla à abà:

Tatugw masla à tataka anja azlamëna haypa à abà.))^{*}

²⁹ Azladza uwana taguwähà à awtày la abatà takëdäslal, takokòtähà gël, tagòfal: “Nënjàn zla! Kak uwana kagòf kà, asa à ka makal magol gày Zëzagëla à ahëj, anja manjalay anik la mavakay makër, kagòf.”³⁰ Sà à ahëj la ahàf la adi, bëlla gël anjak tak zla!”³¹ Kiya uwaga babay azlamënga anja azlamëna mav tatak takëdäslal la azlamadzahaga anja wakità seriya anja Zëzagëla la slaka gä, tagòf kà atà kà atà: “Abëlä azladza anik, ama aslala vok anja mabël gël anha aw uwà?”³² Say mënjënjëj Mesi, Sufël anja Isëräyel atsa à ahëj la ahàf la adi dadän, njgaha mëdijnal gël à vok.” Azladza uwana tatatäsl à ahàf à adi tatsëkal magodahay à gël babay.

Mamëtsay anja Yesu

(Mata 27.45-56; Luka 23.44-49; Yuhana 19.28-30)

³³ La tataka afats, mëlës apakà vok la kutso la abà gesina, tsëräh afats dat mogova gova gërewni delga. ³⁴ La afats dat magova gova gërewni delga uwatà, Yesu awiyà la ndzëdä, agòd: “Eloyyi, Eloyyi, lema sabachthani?”^{*} (Bokuba magoday: Zëzagëla gulo, Zëzagëla gulo, kà mana kasak gi ma?)³⁵ Azlaanik uwana tadzà à ahëj la abatà tatsënà uwaga, tagòf kà: “Aganay azalay à dza uwana Zëzagëla apöhäl gay à ahàl à uwana slëm anja Eliya.”³⁶ Dza tekula ahöy à awtày la abatà, ahënà sawsaw ala la iyaw hamhamga, afà sawsaw à gay kavak, avàl kà makokuzay, agòd: “Tsetsi mëdzà à ahëj titi, mënjënjëz à banja Eliya atsa à wanj kà anja mazëb à ahëj la ahàf la adi!”³⁷ Ama Yesu awiyà la ndzëdä, njgaha amëts.

³⁸ Ama bafta mënga uwana la gày Zëzagëla la aku, akohàla tsëräd, tsëräh à afik, tsëräh à vëdäf.^{*} ³⁹ Mënjënga anja azlaslodzi dzim, uwana atsizl à huma anja Yesu, anënjà mamëtsay anha, à uwana adawiyay, agòd: “Hadäy, dza uwanay kà Kona anja Zëzagëla!”

⁴⁰ Azlamis uwana tanënjà à awtày kërker la ahëj, la abatà la tataka anjatà la abà, Mariyama dëg zla Magdala, la Mariyama iyà anja Yakuba uwana bëziga la Yosës, la Salome. ⁴¹ Tauguzähäh la azla Yesu, à mok uwana agä la gudënj Galili. La abatà bay azlamis anik anjuvaw tahäd la azla Yesu la slaka gä à Urusalima à afik.

Maf Yesu à zëvay à agu

(Mata 27.57-61; Luka 23.50-56; Yuhana 19.38-42)

⁴² Lagwa kà mokokhu adagay, uwaga mavakay madäh vok à ahëj bokuba magoday vuf madäh vok anja vuf maduw lëv. ⁴³ La gay mokokhu, Yusufu zil Arimate asà à wanj, masla tekula la tataka anja azlamasiga la abà. Masla kà aküd makoray Zëzagëla babay. Kurit yewdi agòfal kà madiya à slaka Pilatus aw. Anäv vok anja Yesu. ⁴⁴ Ama lëv avàl à Pilatus à gay, kà uwana atsonënj kà Yesu adamëtsay katskats. Azàla mënjënga anja azlaslodzi dzim, anäv la slaka anha: “Amëts ma uwarà ay?”⁴⁵ Uwana adatsën dziriga la slaka mënjënga anja azlaslodzi dzim, avà tetëvi à Yusufu kà mazëb vok anja Yesu. ⁴⁶ Yusufu asükw bafta, azëb vok anja Yesu à ahëj la ahàf la adi, afafäd à bafta uwatà à abà, afà à zëvay à agu, zëvay kà tàlla kà à tsakur à abà. Njgaha ataköslal mënj abëlam à ama. ⁴⁷ Mariyama dëg zla Magdala, la Mariyama iyà anja Yosës tanënjà zëvay uwana tafä Yesu à agu

16

Mawul à uda la mamëtsay anja Yesu

(Mata 28.1-8; Luka 24.1-12; Yuhana 20.1-10)

¹ Uwana mavakay maduw lëv adada à lig, Mariyama dëg zla Magdala, la Mariyama iyà anja Yakuba, la Salome tasükw amäl matërsin kà anja madla anja madähiya à Yesu à vok. ² Bënj la zay la tsöh, vuf ladu uwana afats à lig mas à afik, tahäd à gël zëvay. ³ Tagòf kà atà kà atà: “Uwa adätakosl anu à bëlam à zëvay la ama ala uwa?” ⁴ Kà uwana bëlam uwatà kà mënjënga. Ama tanënjà à awtày kà, tanënjà bëlam matakosl à ama ala gä tsewwa. ⁵ Tahäd à zëvay à agu. Tanënjà bëzi kohana uwana adzà madzay la abatà la ahàl kaf lakël, la lukut medekuga la vok. Guba akës atà. ⁶ Agòf à atà: “Guba akës akul aw! Kayahaw Yesu zil Nazaret, uwana tatatäsl à ahàf à adi. Aga la abanay aw, avàl à uda la mamëtsay. Aganay slaka anha uwana tahënjënj à ahëj. ⁷ Lagwa kà, däv, kadägòdäw à azlamëna matapla anha, kaykay gä kà à Piyer à gay uwanay: Yesu

^{*} 15:28 15.28 Yesayya 53.12 ^{*} 15:29 15.29 Mahabay 22.7 ^{*} 15:34 15.34 Mahabay 22.1 ^{*} 15:36 15.36 Mahabay 69.21 ^{*} 15:38 15.38 2Musa 26.31-33

atsavokkay kà akul kà mad à Galili. La abatà kadàñawwan bokuba uwana agòd à akul.”

⁸ Azlamis tasà à uda la zəvay la aku, tahòy. Ləv avàl atà à gay la guba mənğa. Taɓadma à dza aw kà uwana guba akəs atà.

*Yesu apəhla vok à Mariyama dæg zla Magdala
(Mata 28.9-10; Yuhana 20.11-18)*

⁹ Uwana Yesu adawul à uda la mamətsay, bən vuɗ ladu apəhla vok à Mariyama dæg zla Magdala dadən. (Mis uwana akudəkak azlamasəɗok mawisiga mɛɗɛf lakəl ala)

¹⁰ Mariyama ahəd kà mapəh uwaga à azladza uwana tadzàhà à ahən la Yesu, tazəwla gəl, ɲgaha tatəw. ¹¹ Ama mok uwana tatsənà uwana apəh à atà kà, Yesu aga la ahən la sifa kà, ɲgaha kà masla anənən gəl, atà tadinjal gəl à vok aw.

*Yesu apəhla vok à azlaməna matapla aɲha səla
(Luka 24.13-35)*

¹² La lig la ahən, Yesu apəhla vok à azlaməna matapla aɲha səla. La mok uwana atà tahəd à mauguzahay à bəzi gudən anik à abà. ¹³ Tawul à Urusalima à abà, tapəh à azladza anik, ama atà bay kà, tadinjal gəl à vok aw.

*Yesu apəhla vok à azlaməna matapla aɲha kulo gəl aɲha tekula
(Mata 28.16-20; Luka 24.36-49; Yuhana 20.19-23; Sləray 1.6-8)*

¹⁴ La lig la ahən, Yesu apəhla vok à azlaməna matapla la slaka aɲha kulo gəl aɲha tekula, la mok uwana atà la tatak may lakəl. Agòd à atà kà, atà la madiɲal gəl à vok aw, atà la ləv dzanɗzanɲga. Kà uwana tadin gəl à azladza uwana à vok, tagòd à atà kà tadanən la sifa aw. ¹⁵ Yesu agòd à atà: “Dàw à gudən à vok gesina, zàwən, pəhàw gay Zəzagəla à azladza gesina! ¹⁶ Dza uwana adiɲal gəl à vok adàhalla batem, adəbəlay. Dza uwana adiɲal gəl à vok aw Zəzagəla adəfahalla seriya à gəl. ¹⁷ Aganay azlanadzipo la maslay uwana azlaməna madiɲal gəl à vok tadəfah à ahən la sləm gulo: Tadəslala vok makudəkək azlamasəɗok mawisiga, tadəvatsah azlagay mələk gə, ¹⁸ tadəkas azlabebi la ahəl amiyaka tadəsa magur bay kà, aza à atà aw. Tadəbak ahəl à azlaməna dɛvats à gəl, ɲgaha tadəwur ala.”

*Yesu awul à slaka Zəzagəla
(Luka 24.50-53; Sləray 1.9-11)*

¹⁹ La mok uwana Sufəl Yesu adadəv gay aɲha à gay, adə aɲha à zagəla, adzà madzay la ahəl kaf aɲa Zəzagəla lakəl. ²⁰ Azlaməna asik aɲha, tahəd à gudən à vok gesina aɲa maz gay matsidəyga aɲa Sufəl Zəzagəla. Sufəl Yesu adəhà sləray la atà aya gotənən, apəhla dziriga aɲa gay aɲatà ala la madəh nadzipo aɲuwaw.

GAY MARABƏJ UWANA LUKA ATSETSÈR Evangile selon Luc

¹ Deda Tewofil.

Azladza anjувaw tawàf vok à uda, kà matsetser gay uwana apakahà vok la tataka gami la abà. ² Tatsetseràh azlatatak uwana tatsənàj la slaka azladza uwana tanəjəj la yewdi anjatà, dagay la madzəka, ngaha tafà à atà kà mapəhay gay uwaga à ahàl. ³ Gi babay gəkəs tetəvi anja manəraz tatak uwaga gesina, dagay la madzəka, kà gi anja mapəhla uwaga ala, la tekula tekula à kak mənğa Tewofil. ⁴ Uwana gəfahà uwaga kà, kà kak anja matsən dziriga anja matapla uwana kabəzal gesina.

Malika apəhla gay anja mayyi Yuhana masla madəh batem ala

⁵ La mok uwana Herod agà Sufəl anja Yahudiya kà, masla mav tatak à Zəzagəla anik la ahəj, uwana sləm anja kà Zakari; masla kà tsəhay anja azlaməna mav tatak à Zəzagəla, la huf gəy anja Abiya. Sləm anja mis anja kà Elisabet, masla kà mayyi à tsəh ala anja Haruna, mən madzahaga anja azlaməna mav tatak à Zəzagəla uwarà. ⁶ Atà səla nna kà, azladza dziriga la huma anja Zəzagəla, ngaha takəs gay anja Sufəl Zəzagəla la ləv tekula, tanəfə mapəhay anja la dziriga bay. ⁷ Ama bəzi anjatà la ahəj aw, Elisabet aslala vok anja mabəz bəzi aw, kà uwana tadapak makoz.

⁸ Vərdi anik, Zakari adəh sləray anja makaf tatak à Zəzagəla, kà uwana à ahəl iyaw anja kà madəhəj. ⁹ Bokuba uwana zagələ anjatà anja mazəbani vok la ahəl iyaw la ahəl iyaw, kà masəl dza uwana adəh sləray la mavakay uwatà la tsəh, ngaha atəf à Zakari à gəl kà mabək kidzidzi la gəy Sufəl Zəzagəla la aku. ¹⁰ La mok uwana abək kidzidzi kà, maham à ahəj dza tadəv kufə. ¹¹ La abatà malika anja Sufəl Zəzagəla apəhla vok à Zakari, atsizl à ahəl kaf anja slaka mabək kidzidzi à gəl. ¹² Guba akəs Zakari à mok uwana anəjəj askulla à tsəh ala kaykay. ¹³ Ama malika agəfal: “Zakari, guba akəs ka aw, kà uwana Zəzagəla adatsən madəv kufə anjak. Elisabet mis anjak adəyya à ka bəzi, kadəvəl sləm Yuhana. ¹⁴ Kak kadəhənlə la marabay, ngaha azladza anjувaw tadərabay lakəl anja mayyi masla. ¹⁵ Kà uwana adəgay mən dza la huma yewdi anja Sufəl Zəzagəla. Tetuwa adəsa guzu aw, amiyaka bə mana beymi uwana maməslga bay kà adəsay aw. Adəgay mahənlə à la Masasəfok Zəzagəla dagay la huf anja iyə anja. ¹⁶ Adəwulla azla Isərayel anjувaw à huma Sufəl Zəzagəla. ¹⁷ Masla la gəl anja adətsa vok à awtəy à huma Zəzagəla la ndzəfa anja Masasəfok, ngaha la ndzəfa anja masla mapəhal gay à ahəl Eliya uwana uwarà, kà matsən vok gay azlababa la azlabəza anjatà, adəwulla azlaməna makəs gay aw à hanəkəli anja azladza dziriga à abà, adəfəh tsəhay à ahəj kà mas à wəj anja Sufəl Zəzagəla.” ¹⁸ Ama Zakari agəfal: “Kakay gədəsəlay kà uwaga kà dziriga ma? Tsa mədapakah makoz la mis gulo mi”, agəfal. ¹⁹ Kiya uwaga malika agəfal: “Gi kà sləm gulo kà Gabəriyel. Gi la uwana Zəzagəla afà à gi à huma anja à gay, kà gi anja mazlakəj, masla asləl gi à wəj kà mapəh à ka gay uwaga. ²⁰ Ama kadin gəl à gay gulo uwana à vok gəpəh à ka, adəpaka vok gəgəf à ka aw kà, kà uwaga kapakay bada, kabadma aya aw, tsərəh à uwana tatak uwana gəpəh à ka adəpaka vok dandan la uwana kadəbadma.”

²¹ La kaslə uwatə, azlaməna madijal gəl à vok takud Zakari la uda, ngaha ləv avəl atà à gay mənğa, kà uwana asəf mənğa la gəy mabək kidzidzi la aku. ²² Ama mok uwana adasa à uda kà, aslala vok anja mabədatəma aya aw, azladza tadzəgw kà: Anəjə nadzipo anik la gəy la aku, tagəf. Abədatəmə kà la ahəl pəra, kà uwana aslala vok kà mabədatəma aya aw.

²³ Mok uwana Zakari adadəv kaslə anja à gay kà mabək kidzidzi la mən gəy Zəzagəla la aku kà, awəl à mtəga anja. ²⁴ Zwek la huma la gay kà, bəzi adà à Elisabet, mis anja, à huf, ngaha masla Elisabet ahadə bəzi la huf tsərəh à təla zlo. Agəf la gəl anja: ²⁵ “Iyay, aganay tatak uwana Sufəl Zəzagəla adəfəhəj kà anjulo, Zəzagəla asəl anja mahəlla gi zirui lakəl ala la huma azladza gesina.”

Malika apəhla gay mayyi Yesu ala

²⁶ La təla mukwa, Zəzagəla asləl malika Gabəriyel à gudəj Galili, uwana sləm anja Nazaret, ²⁷ à slaka dahalay anik, uwana mawfa anja Yusufu, masla kà la mayyi à tsəh ala anja sufəl David la abà. Sləm anja dahalay uwatə bay kà Mariyama. ²⁸ Malika adəgay à slaka anja agəfal: “Ràb, kà uwana Zəzagəla adəhənkala la vok mahamay anja,

Sufəl Zəzagəla la ahəŋ la kak.”²⁹ Mariyama kà gəl akàdàl à vok kà gay uwaga. Anavà gəl anha agòd: ‘Mana asal magòday ayyi marabay gà uwanay ma?’³⁰ Kiya uwaga malika agòd: “Mariyama, guba akəs ka aw, kà uwana kadabəz vok mahamay anja Zəzagəla.”³¹ Kadàgay la bəzi la huɸ ŋgaha kadàyyi bəzi zilga, uwana kadàvəl sləm Yesu.³² Masla adàgay mən dza, ŋgaha tadàzallalla Kona anja Zəzagəla, uwana kerkər la afik. Sufəl Zəzagəla adàpakəŋ ala kà mən sufəl, bokuba uwana adəhən à David, baba anha madzidziga.³³ ŋgaha adàkor tsəhay Isərayel anja koksikoksi; makoray anha adəkəd gəl à ahəŋ aw.”³⁴

³⁴ Mariyama agòd à malika: “Kakay uwaga adàpaka vok, tsa gi la zil dadən aw ma?”

³⁵ Malika agòd: “Masasəɸok tsikasla adàsa à ahəŋ à gəl anjak, ŋgaha ndzəɸa anja Zəzagəla uwana kerkər la afik, adàsa à ka à gəl, bokuba dzəgay, kà uwaga à uwana bəzi uwana kadàyyi kà, tadàzallalla: Tsikasla, Kona anja Zəzagəla uwana la zagəla la afik.³⁶ Elisabet dæg tsin anjak babay kà, bəzi la huɸ, tekeɸida adagay makoz babay, azladza kà ‘Dəgər’, tagòd, ama lagonay kà bəzi la huɸ anja təla mukwa.³⁷ Kà uwana tatak la ahəŋ adəw kà Zəzagəla à gəl aw.”³⁸ Kiya uwaga Mariyama agòd: “Gi kà, gi mayà anja Sufəl Zəzagəla; apakà à gi vok, bokuba uwana kapəh lagwa zlà.” Kiya uwaga malika asàkal à ahəŋ.

Mariyama aday kà anja manəŋ à Elisabet à gay

³⁹ La kaslà uwatà, Mariyama atsizlla ala, amərənə vok, kà mad à gudəŋ anik à abà, la gudəŋ la afik la kutso Yahudiya.⁴⁰ Ahàd à gày anja Zakari, “Ayyi”, agòd à Elisabet.⁴¹ La mok uwana Elisabet atsənà madàh ‘Ayyi’ anja Mariyama kà, bəzi abəlakà vok la huɸ anha. Elisabet adàhənla la Masasəɸok Zəzagəla,⁴² awiyà la ndzəɸa: “Zəzagəla apis à ka gay à vok kaykay la tataka azlamis anik la abà gesina, ŋgaha mapis gay à vok anha adàdza à ahəŋ lakəl anja bəzi, uwana kadabəzal.⁴³ Gi ma gi uwa, à uwana iyà anja Sufəl gulo atsa à wən à mtəga gulo uwa? ⁴⁴ Kà uwana mok uwana gətsənà ‘Ayyi’ anjak kà, bəzi abəlakà vok la huɸ gulo la marabay.⁴⁵ Lapiya agay la kak, kà uwana kadin gəl à tatak uwana à vok, Sufəl Zəzagəla apəh à ka uwaga apaka vok.”

*Mahabay marabay anja Mariyama*⁴⁶

⁴⁶ Kiya uwaga Mariyama agòd:
 “Masasəɸok gulo azləb mənğa anja Sufəl Zəzagəla,
⁴⁷ Ləv gulo adahənla la marabay à kà Zəzagəla masla mabəl gi.
⁴⁸ Kà uwana vok ahaməl kà gi à uwana anən gi kà kiya gi mayà anha tələmmaga.
 Iyay, dagay lakana azladza tagòday kà, gi kà gi mapis gay à vok gà.
⁴⁹ Kà uwana Zəzagəla, uwana tsikasla, adəhà tatak gesina dzəɸa anja səla aw kà anjulo.
 Sləm anja Zəzagəla kà tsikasla.
⁵⁰ Mawoyəŋ anha adàgay la ahəŋ
 Lakəl anja azladza gesina, uwana tahoy yewdi anha koksikoksi.
⁵¹ Ahənà azlasləray mənğa mənğa ala, la ndzəɸa anja ahəl anha.
 Awits azlaməna zlapay gə ala.
⁵² Adakwà azlasufəl à ahəŋ la kursi anjatà la afik, adawalla atà à vəɸah;
 Ama azigənàhà azlaməna tələmmaga.⁵³
⁵³ Ahanà azlaməna may ala la azlatatak delga, delga gə,
 Akudəkàh azlagorobu la ahəl deyday.
⁵⁴ Asà à wən, azlək tsəhay anha Isərayel, masla sləray anja
 Avikən kà mapəhla delga anha ala aw,
⁵⁵ La slaka Abəraham, ŋgaha la mayyi à tsəh ala anha kà anja koksikoksi,
 Bokuba uwana apəh à azlababa gami madzidziga.”⁵⁶
⁵⁶ Mariyama adzà à ahəŋ la Elisabet nekwa nekwa təla makər; la lig la ahəŋ, awul à mtəga anha.

Mayyi Yuhana masla madàh batem

⁵⁷ Kiya uwaga mok uwana kaslà masewk à ahəŋ anja Elisabet adaslay kà, ayyà bəzi zilga.⁵⁸ Azlaməna magay anha la azlatsəhay anha tatsənən kà Sufəl Zəzagəla adadəhalla delga, ŋgaha atà tarəb la slaka gə.⁵⁹ Mok uwana bəzi adadəh kasukwa tekula kà, tadala kà makədəv à uda, atà kà, asà à atà kà mavəl sləm anja baba anha, Zakari.⁶⁰ Ama, “Awan”, iyà anha agòd; “Sləm anha kà mavəl kà Yuhana.”⁶¹ “Awan”, dza la ahəŋ la tsəhay anjak la abà, à uwana tavəl tsəhay sləm uwanay”, tagòd. ⁶² Kiya uwaga tanavà baba anha mabada bada, kà masəl sləm uwana asəl mav à bəzi.⁶³ Zakari anav

✧ 1:33 1.33 2 Samuyel 7.12-13,16; Yesayya 9.7 ✧ 1:37 1.37 1Musa 18.14 ✧ 1:45 1.45 Dzən 1 Samuyel 2.1-10 bay
 ✧ 1:52 1.52 Job 5.11; 12.19 ✧ 1:55 1.55 1Musa 17.7 ✧ 1:59 1.59 3Musa 12.3

tatak kà manəhal à adi, ngaha kiya uwanay à uwana anəh: ‘Yuhana, la uwana sləm anha.’ Ləv avəl atà à gay gesina anətà. ⁶⁴ Katskats la abata Zakari adzəkà mapokw gay kà mabafma, adzəkà mazləb Zəzagəla la kuda zləkkà. ⁶⁵ Kiya uwaga guba akəs azlaməna magay anha gesina, ngaha azlaməna madz à ahəj la gudəj uwatà la afik gesina tapəh tatak uwana apakà vok. ⁶⁶ Azladza gesina uwana tatsənà uwana tapəhay kà, awül atà à gəl, ngaha tanàvəh à vok: “Tsa bəzi uwanay ma adəgay ma uwa tak uwa? Ndzər, maslay anə Sufəl Zəzagəla la ahəj lakəl anha, hafay!”

Mahabay anə Zakari:

masla mapəhal gay à ahəl anə mapəh à azladza

⁶⁷ Zakari, baba anə bəzi uwaga, agà mahənlaga la Masasədok Zəzagəla, adzəkà mazin kiya uwanay:

⁶⁸ “Mazləbay agay kà la Sufəl, uwana Zəzagəla anə azla Isərayel

Kà uwana afə sləm à azladza anha, abəlla atà.

⁶⁹ Masla apəhanula maslay la mav à anu masla mabələj dziriga,

Uwana la mayyi à tsəh ala anə Sufəl David la abà, uwana magamza anha.

⁷⁰ Uwaga la uwana apəh uwarà la paɲaw anə azlaməna mapəh à atà gay à ahəl kà mapəh à azladza:

⁷¹ ‘Gədətəf akul la ahəl anə azlaməna məzam ankul agòd,

Ngaha la ahəl anə azlauwana tapəsew anu gesina.’

⁷² Masla adəpəhla mawoyəj anha à azlababa gami madzidziga ala,

Ngaha gay makəs vok slawda anha tsikaslaga uwatà adəwulal à gəl.

⁷³ Kà uwana Sufəl Zəzagəla azūw mawadəy à baba gami madzidziga Abəraham.

⁷⁴ Kà masla anə mapəlanula la ahəl anə azlaməna məzam gami,

Ngaha kà anu anə madəhala sləray la kokuɗa kurit yewdi.

⁷⁵ Kà anu anə magay sətaka, ngaha la dziriga la huma anha koksikoksi.

⁷⁶ Ngaha kak, bəzi gulo kadəgay masla mapəhal gay à ahəl anə dza uwana kərkər la afik anə koksikoksi.

Kà uwana kak la uwana kadəguway la huma anə Sufəl kà madəhallan tetəvi à ahəj.*

⁷⁷ Ngaha kà mapəhla à azladza anha ala kà, adəbəl atà la mamats atà tsakana anətà ala.

⁷⁸ Hafay, Sufəl Zəzagəla gami kà, adahənla la vok mahamay, ngaha la lapiya,

Adasləl à anu udəka à ahəj à gəl gami gesina, bokuba udəka anə afats uwana atsa à afik.

⁷⁹ Kà masla anə manəj azladza uwana ala, atà la mələs la abà, ngaha la azladza uwana la dzəgay anə mamətsay la abà,

Ngaha masla anə manəjla asik gami la tetəvi anə lapiya la tsəh.**

⁸⁰ Bəzi azigən, ngaha hanəkəli anha bay azàla vok à gəl. Adzà à ahəj la fəta la abà, tsərah à mavakay uwana apəhla vok ala la huma tsəhay Isərayel.

2

Mayyi Yesu

(Mata 1.18-25)

¹ La zamana uwatà Awgustus, məj sufəl anə azla Rom agòd kà: ‘Say tatugw dza la makoray gulo gesina’, agòd. ² Uwaga kà matugw dza matera, uwana apakà vok la zamana anə Kwiriniyus gumna anə kutso Səriya. ³ Azladza gesina tadəh kà matsetser atà, kəla uwabeyuwi adà à gudəj anha.

⁴ Yusufu babay atsizlla ala la Nazaret la kutso Galili, kà maday à kutso Yahudiya, à huɗ gudəj uwana à abà, Betelehem tagòdal, à slaka uwana tayyà sufəl David à abà. Kà uwana masla kà mayyi à tsəh ala anə David. ⁵ Tahəd kà matsetser sləm anətà, la mawɗa anha, Mariyama, uwana akud kaslā masewk à ahəj. ⁶ Kiya uwaga, mok uwana tabəzay, kaslā masewk à ahəj anha adaslay. ⁷ Ngaha ayyà bəzi zilga, malkwoy anha, afafədal lukut à adi, ngaha ahənənə à danjor à abà, kà uwana slaka la ahəj kà anətà la gəy mələk dza la aku aw.

Malika apəhla vok à azlaməna manəjla azlatatak

⁸ La gudəj uwatà, azlaməna manəjla azlatatak la ahəj uwana tahanay la fəta kà manəjla azlatatak anətà. ⁹ Malika anə Sufəl Zəzagəla apəhatàla vok, ngaha mazləbay anə Sufəl Zəzagəla awùɗla slaka anətà. Guba akəs atà gesina anətà. ¹⁰ Ama malika

agòf ò atà: “Guba akès akul aw, kà uwana gèsà à akul à wanj kà gay matsidafyga, uwana adàrab azlatsəhay gesina. ¹¹ La huɗf anja wəf uwanay la abà, la huɗf gudənj anja David la abà kà, tayyà à akul masla maɓəl akul: Masla Kristu, Sufəl. ¹² Aganay tatak uwana adàpəhakulla: Kadànənjaw bəzi wərna mafafàɗal lukut à adi gà, mahənənj à ahənj gà la danor la abà.”

¹³ Katskats, maham à ahənj malika la zagəla tahamà gay à vok la malika uwatà, taslèkàw Zəzagəla tagòf:

¹⁴ “Mazləɓay aga la Zəzagəla uwana la zagəla,

Lapiya aga la gudənj la vok la slaka azladza uwana Zəzagəla awoya atà, ŋgaha azlauwana tawoya masla babay!”

Azlaməna manəjla azlatatak tahàd à gudənj Betelehem

¹⁵ Mok uwana azlamalika tasàk atà à ahənj, tawùl anjatà à zagəla kà, azlaməna manəjla azlatatak tagòf à vok kà atà à atà: “Məhàd tsərəh à Betelehem zlà, delga kà mənənj tatak uwana apakà vok, mədànənj Sufəl Zəzagəla apəhanula zlà”, tagòf. ¹⁶ Ŋgaha atà tamərəà vok kà maday, taɓèz à Mariyama à vok atà la Yusufu, ŋgaha la bəzi wərna, uwana mahənənj à ahənj gà la danor la abà. ¹⁷ Mok uwana tanənjənj, tatùgw gay uwana tanənjənj, la uwana tatsənà la slaka anja malika lakəl anja bəzi. ¹⁸ Azladza uwana tatsəɓ sləm à azlaməna manəjla azlatatak uwaga kà, ləw avàl atà à gay gesina, kà uwana tatsənà uwaga. ¹⁹ Ama Mariyama kà, aɓɓək uwaga gesina à gəl anja à afik, adzùgw uwaga la lela. ²⁰ La lig la ahənj, azlaməna manəjla azlatatak takès tetəvi kà mawul anjatà la mazləɓ Zəzagəla. Tazləɓà masla kà azlatatak uwana tatsənənj, la uwana tanənjənj, kà uwana uwaga gesina kà, apakà vok bokuba uwana malika apəh à atà.

Mapəhla Yesu ala la mənənj gày Zəzagəla la aku

²¹ Mok uwana kasukwa tekula adadà à lig kà, mahənay adaslay kà makədəw Yesu à uda, tawàl sləm Yesu, sləm uwana malika apəhla ala à mok uwana iyà anja aləg mazəɓ à huɗ dadənj.*

²² Ŋgaha bokuba uwana gay anja maɗfàh mavəlàh adadəw à gay kà, bokuba uwana mapəhay anja Musa agòf, tadàla Yesu à Urusalima kà mapəhla masla ala la huma anja Sufəl Zəzagəla, ²³ bokuba uwana tatsətsər à mapəhay anja Sufəl à abà:

‘Kəla malkwoy zilga kà, uwaga tatak matsufay gà anja Sufəl Zəzagəla la fəta la awtəy tsikasla.’

²⁴ Takadàh azlatatak uwana kadàw, wakità mapəhay agòf:

‘Azlahabakoku fəta səla banjaw azlazlabara habakoku mtəga səla.’*

Mahabay anja Səmeyyon

²⁵ Dza anik la ahənj la Urusalima uwana sləm anja Səmeyyon. Zil uwatà kà dza dziriga, akès gay anja Zəzagəla, ŋgaha akudà dza uwana naka atsa à wanj, kà maɓəl azladza Isərayel. Masla kà agà la Masasəɗok Zəzagəla. ²⁶ Ŋgaha Masasəɗok Zəzagəla apəhla à vok à abà kà, adàmətsay dadənj aw, say banja adànənj huɗf adi anja Kristu, uwana Sufəl Zəzagəla adàsləl à ahənj dadənj. ²⁷ Masasəɗok Zəzagəla adàla masla à mənənj gày Zəzagəla à agu, la mok uwana azlababa tasəlla Yesu à wanj, kà maɗfahallaŋ bokuba uwana: ‘Dahàwwànj’, wakità seriya agòf. ²⁸ Səmeyyon azəɓ bəzi à ahàl, ŋgaha ‘Kikay’, agòf à Zəzagəla la magòɗay:

²⁹ “Sufəl, lagonay kà mapəh à ahənj anjak kà adagəɗf à afik,

Sàk à mayà anjak aməts anja la lapiya adagay zlà,

³⁰ Kà uwana lagwa kà, gədanənj maɓəlay anjak la yewdi gulo,

³¹ Uwana kadahənj à ahənj kà anja tsəhay gesina.

³² Uwaga la uwana uɗaka uwana adapəhla ka ala la huma azladza gudənj à vok gesina, Uwaga la uwana adavà mazləɓay à tsəhay anjak Isərayel.”*

Mapəh à ahənj anja Səmeyyon

³³ Baba la iyà anja atà səla nna ləw avàl atà à gay kà gay uwana Səmeyyon apəh lakəl anja. ³⁴ Səmeyyon apis à atà gay à vok, ŋgaha agòf à Mariyama iyà anja Yesu: “Zəzagəla akəsàni bəzi uwanay kà, kà matsalla matekwid, ŋgaha kà anja matsizilla azladza anjuvaw ala la tataka ala Isərayel la abà. Adagay tatak manəjla adi anja Zəzagəla, uwana azladza tadàkweska. ³⁵ Ŋgaha adəpəhla madzugway anja azladza gesina ala la uɗaka la abà la dazuwaya, ŋgaha kak babay kà, katsakar adàzləl madzugway anjak ala kà madzugway anja tsəh ləw anjak mas à uda la dazuwaya.”

Mahabay anja Hana, masla mapəhal gay ahàl misga

* 2:21 2.21 3Musa 12.3

* 2:24 2.24 2Musa 13.2,12; 3Musa 12.6-8

* 2:32 2.32 Yesayya 42.6; 49.6; 52.10

³⁶ Agà la ahəŋ babay masla mapəhal gay ahəl misga uwana sləm anja kà Hana, dugu anja Fanuyel uwana la tsəhay anja Asər. Masla adagay makoz, zil dahalay anja uwana ahəd kà, taɖfahà mavay mədəf atà səla, ³⁷ adzà à ahəŋ bokuba mis kuɖa tsərəh à mavay dzik mtəgis gəl anja ufad. Masla azàhà vok la gày Zəzagəla la aku aw, la mavakay la mahanay gesina, azlàkàh Zəzagəla, ŋgaha akàs nələy la madəv kuɖa babay. ³⁸ Asà à waŋ la kaslà uwatà, “Kikay”, agòɖ à Zəzagəla, ŋgaha apəh gay anja bəzi à azladza gesina uwana atà takudà kà Zəzagəla anja maβəl Urusalima.

Mawul à gudəŋ Nazaret

³⁹ Mok uwana azlababa anja Yesu tadàva tatak uwana à gay: “Dahəwwəŋ”, wakità mapəhay anja Sufəl Zəzagəla agòɖ kà, tawul anjatà la masla à Galili à gudəŋ Nazaret. ⁴⁰ Bəzi adà à huma à gay la mazigəŋay, azàla ndzəɖa à gəl aya, ahənlà la matsihila. Ŋgaha vok mahamay anja Sufəl Zəzagəla agà lakəl anja.

Yesu la mən gày Zəzagəla la aku

mavay anja kulo gəl anja səla

⁴¹ Kəla mavay azlababa anja tadàhah à Urusalima kà anja madəvaday Paska.[✠] ⁴² La mok uwana adafah mavay kulo gəl anja səla kà, tasəl à waŋ la tsəh, kà uwana zagələ anjatà. ⁴³ Mok uwana madəvaday adadəv à gay kà, tawul anjatà, la kokuɖa masələy anja azlababa, kà Yesu agòɖ à Urusalima. ⁴⁴ Madzugway anjatà kà: “Yesu kà aga la tataka anja azlamanalay anja la abà”, tagòɖ, ŋgaha la mok uwana lis tavək asik à gəl kà, tadzəkà mayahay la tataka anja dugum tsinj anja la abà, ŋgaha la azlamanalay anja la abà babay. ⁴⁵ Ama tabəzal aw, kà uwaga à uwana azlababa anja tawul à Urusalima kà mayahay. ⁴⁶ La mavakay mamakər tabəzal à gəl la mən gày Zəzagəla la aku. Masla adadza madzay la tataka anja azlaməna matapla tatak à azladza la abà, atsəb à atà sləm, la manavàh atà tatak. ⁴⁷ Azladza gesina uwana tasəbal sləm, ləv avəl atà à gay kà hanəkəli anja, ŋgaha kà azlamawul à uda anja aya. ⁴⁸ Mok uwana azlababa anja tanəŋ kà, takəs gəl la ahəl səla, ŋgaha iyə anja agòɖal: “Bəzi gulo, kà mana madàh à anu a ahəŋ kiya uwanay ma? Nəŋəŋ tsi, anu la baba anək kà, mədayəh ka kà mənja, la iyaw tugwi la adi.” ⁴⁹ Agòɖ à atà: “Kà mana kayàhəw gi ma? Kasəlaw kà, azlayla gi, anja madz à ahəŋ la gày anja baba gulo la aku, kà madàh sləray anja aw takay?” ⁵⁰ Ama atà kà tatsənà tatak uwana apəh à atà aw. ⁵¹ Kiya uwaga Yesu awul à mtəga atà nna à gudəŋ Nazaret, akəs atà gay la ahəl ala. Ama iyə anja kà akəsən lakəl à mad vok anja azlatatak gesina uwana apakà vok. ⁵² Yesu azigəŋ, maslay anja adà à huma à gay, masla ahəɖ à Zəzagəla à adi, ŋgaha à azladza gesina à adi babay.

3

Sayda anja Yuhana masla madàh batem

(Mata 3.1-12; Mark 1.1-8; Yuhana 1.6-8,19-28)

¹ La mavay makulo gəl anja zlo anja makoray anja mən sufəl anja azla Rom, uwana sləm anja Tiber Zəsər, Pontsəyus Pilatus agà gumna anja Yahudiya, Herod bay akòr Galili, ŋgaha deda anja Filip akòr Ituriya la Tərakoniya, ŋgaha Lisaniyas akòr Abilen. ² La kaslà uwatà kà, Hanas atà la Kayyif atà tagà azlaməŋ madzahaga anja azlaməna mav tatak à Zəzagəla. La mok uwaga gay anja Zəzagəla atsənà à Yuhana, kona anja Zakari la kəsaf la abà. ³ Yuhana augüzàh la kutso uwana la abatà la makəla anja Urdun gesina. Azatəŋ, agòɖ: “Pəhəw gay la ləv ala, ɖahəw batem ŋgaha Zəzagəla adàmatsakulla tsakana anjukul ala.” ⁴ Uwaga kà bokuba uwana tatsetsər à wakità anja masla mapəhal gay à ahəl Yesayya à abà:

“Uwaga kà kuda anja dza uwana awiyay la fəta la abà:

Sləɖəw tetəvi à Sufəl à ahəŋ,

Tsàzləw azlatetəvi manalabahayga ala gesina!

⁵ Azlazləlok gesina adafahà,

Azlagudəŋ la azladadəgwal tapakàh vadavaday,

Azlamanalabay anja barama tatsazl ala,

azlatetəvi uwana malàh à uda gə, taɖfahàbà takakarra.

⁶ Kiya uwaga azladza gesina tadənəŋ maβəl anu anja Zəzagəla.[✠]

⁷ Maham à ahəŋ dza anjvaw asà à waŋ à slaka Yuhana, kà atà anja maβəz batem. Masla agòɖ à atà kà: “Akul azlabəza anja matsapa, uwa à uwana agòɖ à aku kà kadətəfaw à mapak ləv anja Zəzagəla la gay la à uwana adàsa à waŋ bawbaw uwa?” ⁸ Lagwa kà, ɖahəwwəŋ sləray uwana apəhla ala kà kadàbədəfawla kà vok, kà kapəhaw gay la ləv ala

zlà, kadzugwaw la løy ankul la tsøh kà: 'Abøraham baba gami madzidziga', kagodaw aw. Kà uwana hadfay gøpøh à akul kà, Zøzagøla aslala vok aña mapak azlaakur uwanay ala, kà magay azlabøza aña Abøraham. ⁹ Lagwa kà goslka kà madfehøy à ahøy gà, kà mahørats la tsøh à ahàf à afik. Køla ahàf uwana av mayyay delga aw kà, tanats à ahøy, ngaha taduwa à akàl à tsøh."

¹⁰ Kiya uwaga maham à ahøy dza anàv: "Mana ma à uwana mødfehøy zlà ma?"
¹¹ Masla awùlatàla, agòd: "Dza uwana akor lukut søla tavàhàn la dza uwana aña la ahøy aw, ngaha dza uwana la tatak may babay tatsàkàn la dza uwana aña la ahøy aw." ¹² Azlamøna mazøb hadama tasà à wan aña madahatàn batem suwan, ngaha tanavà Yuhana: "Mønga, mana ma à uwana mødfehøy ma?" ¹³ Kiya uwaga agòd à atà: "Kafaw à azladza à gøl kà mapølay mønga ðuwa uwana pølàw, tagòd aw." ¹⁴ Kiya uwaga azlaslodzi tanav suwan: "Anu ma, kakay anu babay zlà ma?" Agòd à atà: "Kahalaw sili azladza ala la gasa aw, banaw la tetøvi fida gà aw, ama kùdàw kà masik ankul uwana kadàbøzawwal."

¹⁵ Ama uwana maham à ahøy dza gesina tagà la manøwøh la abà lakøl aña Yuhana kà, 'Zlahaw kà, masla la uwana Kristu' tagòd. ¹⁶ "Gi", Yuhana agòd à atà gesina kà, "Gødfahakulla batem kà la iyaw. Ama dza anik la ahøy atsa à wan la lig gulo la ahøy kà, bà gi babay kà gøsla mapøzl zuwif kwimik aña ala babay aw. Masla kà adàfahakulla batem kà la Masasødok tsikasla, ngaha la akàl. ¹⁷ Køtsaw madula hi aña la ahàl, kà masøhla hi, kà mavàh à atà ala la tafarga. Hi aña kà adàtsak à vødà aña à abà, ama tafarga kà, aduwal à akàl uwana à tsøh adàmats ala ðikidiki aw!"

¹⁸ La mapøh à atà azlagay anik anik anuvaw aya, la uwana Yuhana azà gay matsidafya à azlatsøhay uwaga. ¹⁹ Yuhana asløhà vok à Herod à kà uwana azøb Herodiya, mis aña deda aña, ngaha kà uwana adàhà azlamawisiga anik anik anuvaw aya. ²⁰ Kiya uwaga Herod azàla mawisiga aña à gøl aya la maduw Yuhana à danay.

Madàh batem aña Yesu

(Mata 3.13-17; Mark 1.9-11; Yuhana 1.32-34)

²¹ Kiya uwaga Yesu asà à wan, à mok uwana azladza gesina tabøz batem, aøzà à batem aña suwan. La kaslà uwana adøv kufà, zagøla apøzl à ama ala, ²² ngaha Masasødok Zøzagøla asà à ahøy à gøl aña bokuba habakoku. Ngaha bay kufà atsøn à ahøy la zagøla la magodfay: "Kak bøzi gay løy gulo; marabay gulo gesina kà la kak la afik."^o

Azlamadzidziga aña Yesu

(Mata 1.1-17)

²³ La mok uwana Yesu adzøkà sløray aña, kà adàfah mavay dzik makø: La madzugway aña azladza kà: 'Kona aña Yusufu' tagòd, à uwana agà kona aña Heli. Aganay madzøka vok mayyi à tsøh ala aña azlababa madzidziga uwana adà à huma à gay.

²⁴ Heli kona aña Matat, kona aña Levi, kona aña Melki, kona aña Yanay, kona aña Yusufu,

²⁵ kona aña Matat, kona aña Amos, kona aña Nahum, kona aña Esøli, kona aña Nagay,

²⁶ kona aña Mat, kona aña Matat, kona aña Sømeyyi, kona aña Yosøk, kona aña Yoda,

²⁷ kona aña Yohanan, kona aña Resa, kona aña Zorobabel, kona aña Salatiyel, kona aña Neri,

²⁸ kona aña Melki, kona aña Adi, kona aña Kosam, kona aña Elmadam, kona aña Er,

²⁹ kona aña Yesu, kona aña Eliyezø; kona aña Yorim, kona aña Matat, kona aña Levi,

³⁰ kona aña Sømeyyon, kona aña Yahuda, kona aña Yusufu, kona aña Yonam, kona ana Eliyakim,

³¹ kona ana Meleyya, kona aña Mena, kona aña Matata, kona aña Natan, kona aña David,

³² kona aña Yese, kona aña Yøbed, kona aña Boz, kona aña Sala, kona aña Naheson,

³³ kona aña Aminadab, kona aña Adømin, kona aña Arøni, kona aña Esørom, kona aña Farøs, kona aña Yahuda,

³⁴ kona aña Yakuba, kona aña Isak, kona aña Abøraham, kona aña Tara, kona aña Nakor,

³⁵ kona aña Søruk, kona aña Ragaw, kona aña Falek, kona aña Eber, kona aña Sala,

³⁶ kona aña Kaynam, kona aña Arøfakøsad, kona aña Søm, kona aña Nuhu, kona aña Lamek,

³⁷ kona aña Matusala, kona aña Enok, kona aña Yared, kona aña Maleleyel, kona aña Kaynan,

³⁸ kona anja Enos, kona anja Sæt, kona anja Adama, uwana agà la gəl anja kona anja Zəzagəla.

4

Mapapat Yesu

(Mata 4.1-11; Mark 1.12-13)

¹ Yesu ahənla la Masasəđok Zəzagəla, awùlla à waŋ la gay mukwà Urdun. Nğaha Masasəđok Zəzagəla adàlla à fəta à abà. ² La abatà adahən mavakay dzik ufađ, azùw tatak aw, la mok uwaga seteni apapət masla kà, uwana masla la may gà.

³ Kiya uwaga seteni agòđal: “Baŋa kak bəzi anja Zəzagəla kà, pakà akur uwanay ala kà kaf.” ⁴ Yesu awulàlla: “Iyay, uwaga kà matseseray gà: ‘Ama dza adzadzar vok kà la kaf pəra aw.’”^{*}

⁵ Seteni adàlla à afik kərkər aya, apəhla azlamakoray anja gudəŋ à vok. ⁶ Nğaha agòđal: “Gədàvə à ka maslay uwana la abà la tatak uwana la gudəŋ uwanay la vok gesina, kà uwana uwaga kà anjulo, nğaha gi babay kà gəslala vok anja mav à dza uwana asa à gi. ⁷ A baŋa kak kasləkaw gi, la makəđ à gi à ahən, kà uwaga gesina kà adəgay kà anjak.”

⁸ Yesu agòđal: “Wakitə agof kà: ‘Sufəl Zəzagəla anjak la uwana kanəfay pəra, nğaha masla kokudə gəl anja la uwana kazlakəŋ pəra.’”^{*}

⁹ Kiya uwaga seteni adàla masla à Urusalima, adàla masla à gəl mən gəy Zəzagəla à afik, agòđal: “Baŋa kak bəzi anja Zəzagəla kà, vəl à ahən la abanay! ¹⁰ Kà uwana uwaga kà matseseray gà:

‘Dəw, Zəzagəla adəgof à azlamalika anja, kà manəŋla ka!’

Nğaha aya kà: ¹¹ ‘Atà kà, tadəkəs kà ahəl, kà kak anja mazləl asik à akur la adi aw.’”^{*}

¹² Yesu agòđal: “Wakitə Zəzagəla agof kà:

‘Katapa Sufəl Zəzagəla anjak aw.’”^{*}

¹³ Mok uwana seteni adəv mapapat Yesu à gay la azladabaray anik anik gesina kà, asəkàl à ahən, adà anja, say kà afats anik.

Yesu adzəka sləray anja la kutso Galili

(Mata 4.12-17; Mark 1.14-15)

¹⁴ Yesu awùlla à Galili mahənlaga la ndzəđa ana Masasəđok Zəzagəla. Tadzəkà mavats gay lakəl anja la makoray uwatà la abà gesina. ¹⁵ Atəpla tatak à azladza la azlagəy madəv kudə la aku. Azladza gesina tatsəbal sləm, tazləbə masla.

Azlaməna gudəŋ Nazaret takweska Yesu

(Mata 13.53-58; Mark 6.1-6)

¹⁶ Yesu awùlla à gudəŋ Nazaret à slaka uwana à abà azigən. La vud maduw ləv anja azla Yahudiya, ahəd à gəy Zəzagəla à agu bokuba uwana adagay zagələ anja. Atsizilla ala kà madzən wakitə. ¹⁷ Tavəl à ahəl wakitə anja Yesayya, masla mapəhal gay à ahəl, à ahəl, apapəs wakitə uwatà à uda nğaha abəz à slaka anik uwana tatsesər kà:

¹⁸ ‘Masasəđok ana Sufəl Zəzagəla lakəl gulo,

Akəsəni gi, kà gi anja madla gay matsidəyga à azlaməna kudə.

Asləl gi à waŋ kà, kà gi anja mapəh gay mapəlla à azlaməna danay,

Kà mavəh yewdi à azlaguləf,

Nğaha kà mataf azlauwana tas nğərpa.

¹⁹ Kà mapəhla ala mavəy uwana vok mahamay anja Sufəl Zəzagəla adəpəhla vok ala.”^{*}

²⁰ Nğaha kiya uwaga Yesu akəl wakitə à abà, awùlla à ahən, adzə anja madzay. Dəwdəw dza uwana la gəy uwatà la aku tatsəkàl yewdi à gay gesina. ²¹ La lig la ahən, adzəkà magof à atà: “Lakana kà, matseseray uwanay kà, adagəđ à afik à uwana mədzəŋ la abanay la sləm anjul.” ²² Atà gesina takəs gay anja, ləv avəl atà à gay, kà gay anja dzəbə anja səla aw gə uwaga apəh à atà. Tagòđ: “Masla kà kona anja Yusufu aw takay?” ²³ Yesu agòđ à atà: “Dzer, asa à gi kapəhaw gi gay la abà uwanay: ‘Dokwta wurə gəl anjak ala!’ kadəgəđaw gi babay: ‘Anu mətsənə uwana kadahən la Kapernahum gesina, dahən uwaga la huđ gudəŋ anjak babay zlə!’ ” ²⁴ Nğaha aya agòđ à atà: “La dziriga gəpəh à akul, đikidiki masla mapəhal gay à ahəl la ahən tawoyəŋ, la huđ gudəŋ anja uwana tayyà abà aw. ²⁵ Iyay la dziriga gəpəh à akul: La zamana anja Eliya, azlamis kudə la ahən anjəwaw la gudəŋ Isərayel, la mok uwana iyaw anəđ à ahən la zagəla aw mavay makər la təla mukwa. Nğaha magol məl may mənğa apakà vok

^{*} 4:4 4.4 5Musa 8.3 ^{*} 4:8 4.8 5Musa 6.13 ^{*} 4:11 4.11 Mahabay 91.11-12 ^{*} 4:12 4.12 5Musa 6.16 ^{*} 4:19 4.19 Yesayya 61.1-2

la gudəŋ uwatà gesina.*²⁶ Ama Zəzagəla asləl Eliya à mtəga aŋa tekula aŋa tekula aŋa azlamis uwaga aw, say à slaka aŋa mis kuɗa uwana la Sarepəta, la makoray aŋa Sədon la abà pəra.²⁷ Agà la ahəŋ babay azlaməna akəl zagəla aŋuvaw la gudəŋ Isərayel la zamana aŋa Elise, masla mapəhal gay à ahəl, amiyaka bə tekula aŋatà kà awür ala aw, say Naman zil Səriya pəra.”²⁸ Mok uwana tatsənà gay uwaga, azladza gesina la gày madəv kuɗa la aku tapakàh à ləv.²⁹ Tasà à afik, takàs masla, tabàyan à uda la gudəŋ aŋatà la abà, tadàlla à dadəgwal uwana à afik taŋəlàhal gày aŋatà à makəla, ŋgaha kà atà aŋa maməl à ahəŋ la afik la abatà.³⁰ Ama masla, kussàh, asà à uda la tataka aŋatà la abà, adà aŋha.

*Dza uwana atərəbay la ahəl aŋa masasəɗok mawisiga
(Mata 4.13-16; Mark 1.21-28)*

³¹ Yesu ahəd à gudəŋ Kapernahum, uwana la kutso Galili la abà. Ŋgaha adzəkà matapla tatak à azladza la vuɗ maduw ləv.³² Ləv avəl atà à gay mənŋa kà mapàhla ala aŋha, kà uwana atəpatàla kà lela, ŋgaha la maslay.³³ La gày madəv kuɗa uwatà la aku kà, dza anik la ahəŋ uwana masasəɗok mawisiga atərəbəhəŋ, adzəkà mawiyay la ndzəɗa.³⁴ “Kayyà, kak Yesu, zil Nazaret, mana gay aŋak la anu ma? Kasà à waŋ ma, kà mazàh anu ala takay? Gəsəl la dziriga kà, kak tsikaslaga uwana Zəzagəla asləl kà à waŋ!”³⁵ Yesu aslèh məl à masasəɗok mawisiga uwaga à gəl la ndzəɗa, agòɗal: “Dzà à ahəŋ titi, sà à dza uwaga lakəl ala!”, masasəɗok mawisiga aməl gəl à dza uwaga à ahəŋ la humà aŋa azladza gesina, ŋgaha asəl à kəl ala, kokuɗa madəhal amik à vok.³⁶ Azladza gesina kà, ləv avəl à atà à gay, tavàts gay la tsəh ala kà atà kà atà: “Kakay, à tsəhay gay uwanay ma? Masla akor azlamasasəɗok mawisiga la ndzəɗa, ŋgaha azlamasasəɗok takəs gay aŋha, tasàh azladza lakəl ala ma?”³⁷ Ŋgaha azladza tadzəkà mapəhay lakəl aŋa Yesu la makoray uwatà la abà gesina.

*Yesu awar azlaməna ɗuvats ala aŋuvaw
(Mata 8.14-17; Mark 1.29-34)*

³⁸ Yesu asà à lag la gày madəv kuɗa la aku, ŋgaha ahəd à mtəga aŋa Səmon. Məŋay aŋa Səmon la akəl à vok mənŋa, mənŋa. La abatà tanavà Yesu kà mawurəŋ ala.³⁹ Yesu atsəŋ à masla ɗuvats à gəl, apəh gay la tsəh ala la ndzəɗa, “Sàkal!”, agòɗ à ɗuvats. ɗuvats asàk à mis uwaga, katskats asà à afik kà mazlak atà à sləray à abà.

⁴⁰ La mok uwana afats adatəɗ à ahəŋ, tasàhla azlaməna ɗuvats à waŋ, la azladɗuvats anik anik gesina, kà mabak à atà ahəl à gəl la tekula, tekula aŋatà gesina, awarà atà ala.⁴¹ Azlagəla zagəla la azlamasasəɗok mawisiga tasàh à azlaməna ɗuvats lakəl ala aŋuvaw la mawiyay: “Kak la uwana kak Kona aŋa Zəzagəla!” Ama Yesu apəh à atà gay la ndzəɗa, ŋgaha adəɗ à atà gay à ahəŋ kà mavats gay la ndzəɗa, kà uwana tasəl kà, masla kà Kristu.

*Yesu apəh gay Zəzagəla la kutso Galili
(Mark 1.35-39)*

⁴² Mok uwana məl adawulla, Yesu asà à uda la gudəŋ la abà, adà aŋha à fəta à abà kokuɗa gəl aŋha. Maham à ahəŋ dza aŋuvaw tadzəkà mayàh masla. Mok uwana tabəzal à vok kà, asà à atà asàk atà à ahəŋ aya aw.⁴³ Ama Yesu agòɗ à atà: “Say gəz gay matsidəyga aŋa makoray Zəzagəla à azlagudəŋ anik gesina bay, kà aŋa uwaga à uwana Zəzagəla asləl gi à waŋ.”⁴⁴ Ŋgaha apəh gay Zəzagəla la azlagəy madəv kuɗa la aku la kutso Galili gesina.

5

*Yesu azal azlaməna matapla la slaka aŋha teraŋa
(Mata 4.18-22; Mark 1.16-20)*

¹ Vərdi anik Yesu atsizilla à gay dərəv aŋa dərəv Genesaret, ŋgaha magol maham à ahəŋ dza tahamà à slaka aŋha kà matsəb sləm à gay Zəzagəla.² Yesu anəŋà azlakəslah iyaw səla la gay gərdza, azlaməna makas kilfi tasà à ahəŋ la afik, tapalàh dzarawa aŋatà.³ Yesu ahəd à kəslah iyaw à afik, uwana agà aŋa Səmon, agòɗal: “Zà à gi à gəl iyaw ŋuv.” Ŋgaha adzà madzay la kəslah iyaw la afik, adzəkà matapla tatak à maham à ahəŋ dza uwaga.

⁴ Mok uwana adadəv matapatàla à gay kà, agòɗ à Səmon: “Zàw vok à gəl dərəv lela, ŋgaha kak la azlamanalay aŋak kadawaw dzarawa aŋkul à iyaw à abà, kà makas kilfi.”

⁵ Səmon agòɗal: “Mənŋa, huyip, mədahənal à gəl kà madaw à abà, ama mədəkəs tatak aw. Ama bokuba uwana kapəh kà, gəkweska gay aŋak aw, gəduw à abà aya kità.”

* 4:25 4.25 1 Sufəl 17.1

⁶ Kiya uwaga atà tadùw dzarawa anjàtá à abà, ahèl kilfi à agu anjvwaw tsèràh à uwana dzarawa anjàtá awòy maslahàhla, kà magay mənğa anja kilfi uwana la aku. ⁷ La abatà atà tafatakàhà azlamanalay anjàtá, uwana la kəslah iyaw anik la afik, kà atà anja mas à wanj anja mazlak atà, tadà à awtày tazlak atà, tahanà kəslah iyaw ala sèla nna la kilfi tsèràh à uwana azlakəslah iyaw uwaga tawòy madàh à huf iyaw, kà mahanay anja azlakilfi uwaga. ⁸ Uwana Səmon Piyer anənjə uwaga kà, akədéd à huma anja Yesu la magodfal: “Sufəl, zà à gi vok la vok ala, kà uwana gi kà gi masla tsakana!” ⁹ Guba akəs masla, la azladza uwana atà nna gesina, kà magol kilfi uwana takàs. ¹⁰ Azla Yakuba la Yuhana, azlabəza anja Zebede, uwana sləray anjàtá tekula la Səmon, ləv avàl atà à gay babay. Ama Yesu agòd à Səmon: “Guba akəs ka aw, dagay lakana gədàpaka ka ala kà masla makas azladza.” ¹¹ Mok uwana tadàla azlakəslah iyaw anjàtá à gay gərdza kà, tasàk à tatak gesina à ahəj, tanəfà Yesu.

Yesu awura masla akàl zagəla ala

(Mata 8.1-4; Mark 1.40-45)

¹² Yesu agà la gudəj anik la abà, à uwana masla akàl zagəla asà à wanj kà magagamay la masla, uwana adanənjəj atəd à huma asik anja la magodfal: “Mənğa, banja asa à ka kà, kaslala vok mawur gi ala!” ¹³ Yesu abiyà ahàl ala, adəbani masla la magodfay: “Asa à gi, kawur ala!” Akàl zagəla asà à dza uwatà la vok ala katskats. ¹⁴ Aganay mafahal akur à lig, uwana Yesu afàhàl à lig: “Kapəh gay uwanay à dza aw. Ama hād, kadəpəhla vok anjak à mənğa anja azlaməna mav tatak à Zəzagəla, nğaha kavà tatak uwana Musa apəh la wakità seriya la abà, kà azladza gesina anja masəlay kà kawurla!”¹⁵ Amiyaka bà la uwaga gesina kà, gay anja Yesu atsənla la slaka azladza gesina. Maham à ahəj dza anjvwaw tasàhəw à wanj à slaka anja kà matsəbal sləm, nğaha tawəràh ala la azladvats anjàtá la abà gesina. ¹⁶ Ama Yesu asà à uda la tataka anjàtá la abà, adà anja à fəta à abà kokudà gəl anja, kà madəv kuda.

Yesu awura dza uwana makalàh à vədah gə ala

(Mata 9.1-8; Mark 2.1-12)

¹⁷ Iyay, vərdi anik aya, Yesu adzəkà mapəhla tatak ala. Azla Farisəya la azlaməna mapəhla wakità seriya ala tadzàhà madzay nekwa la slaka anja. Tasà à wanj la gudəj anja Galili, la anja Yahudiya nğaha babay la Urusalima. Ndzəda anja Sufəl Zəzagəla agà la Yesu la abà kà mawar azlaməna dūvats ala. ¹⁸ Nğaha tasəlla masla dūvats à wanj la kəslah, kà uwana makalàh à vədah gə, tayàh tetəvi kà madalla à gày kà maf à huma anja Yesu. ¹⁹ Ama tasəl slaka uwana tagòla à awtày la abà aw, kà uwana maham à ahəj dza kà anjvwaw. Kiya uwaga tagòla la gəl gày, tazlèlla gəl gày ala, tawəddàh zuwid à kəslah à gay, tadzilà à gày la abatà la kəslah gə, à tataka maham à ahəj dza à abà la huma anja Yesu. ²⁰ Mok uwana Yesu anənjə madinjal gəl à vok anja azladza uwaga, Yesu agòd à dza makalàh à vədah gə: “Tsakana anjak adamatsila tsewwa.” ²¹ Nğaha azlaməna mapəhla wakità seriya ala la azla Farisəya tadzəkà madzugway la magodfay: “Uwa asla à tsəhay dza uwanay, atugw mawisiga lakəl anja Zəzagəla uwa? Uwa aslala vok anja mamats tsakana à dza ala, tsa banja Zəzagəla kokudà gəl anja pəra aw uwa?” ²² Bokuba uwana Yesu asəl madzugway anjàtá, agòd à atà: “Mana kadzugwaw la maronuzay la ləv anjul la tsəh ma? ²³ Tak ma, butu ma, la magodfay kà: Tsakana anjak adamatsila, awma magodfay: Sà à afik, nğaha hād anjak, takay? ²⁴ Ama asa à gi kasəlaw kà, kà Kona anja dza la maslay la gudəj uwanay la vok kà mamats tsakana anja dza ala.” Nğaha agòd à dza makalàh à vədah gə uwaga: “Gi uwaga gəgod à ka: Sà à afik, zəb kəslah anjak, nğaha dà anjak à mtəga!” ²⁵ Kiya uwaga, hadzak, dza uwaga asà à afik la huma azladza gesina, azəb kəslah anja uwana ahənay la afik, nğaha adà anja à mtəga la mazləb Zəzagəla. ²⁶ Ləv avàlèh atà à gay gesina, nğaha tazləbà Zəzagəla, guba akədéd atà à gay, nğaha tagòd: “Lakana kà, mədanənjəj azlatatak dzəba anja sèla aw gə, ndzer.”

Yesu azal Levi

(Mata 9.9-13; Mark 2.13-17)

²⁷ La lig anja uwaga la ahəj, Yesu asà à uda, nğaha anənjə masla mazəb hadama, sləm anja Levi, adadza madzay la gày mazəb hadama la aku. ²⁸ Yesu agòdal: “Nəfà à gi!” Hadzak, Levi asà à afik asək azlatatak à ahəj gesina, anəfà masla.

²⁹ Levi atà magol tatak may la mtəga anja. Azladza anjvwaw tahamà gay à vok la masla, azlaməna mazəb hadama, la azladza anik babay. ³⁰ Azla Farisəya la azlaməna mapəhla mapəhay ala, uwana tagà la panaw tekula kà, azà à atà lakəl anja uwaga, tagòd à azlaməna matapla la slaka anja: “Kà mana kazuwaw la azlaməna mazəb hadama ma, nğaha kasaw la azladza uwana madz à ahəj anjàtá kà delga aw gə, la azlaməna

tsakana ma?" ³¹ Uwana Yesu atsənà uwaga, agòd à atà: "Azladza uwana la òuvats aw kà, tanəkudfa mad à dokwtar aw, say azlauwana la òuvats pəral!" ³² Ama agòd atà aya: "Gəsà à waŋ kà mazala azladza uwana azlawurwur aw, ama gəsà à waŋ kà mazala azladza uwana atà la òuvats pəra, kà atà aŋa mapəh gay la ləv ala", agòd.

Gay lakəl aŋa makəs nəlay

(Mata 9.14-17; Mark 2.18-22)

³³ Nŋaha azladza tagòd'al: "Azlaməna matapla la slaka Yuhana kà takàsàhàh nəlay koksikoksi, nŋaha tadāv kuɗa, amiyaka aŋa azla Farisəya bay. Ama azlaaŋak kà: tazuway, tasay." ³⁴ Ama Yesu agòd atà: "Madzugway aŋkul ma maf leri à azlauwana à gəl tazala atà à mazəb vok à abà aŋa makəs nəlay à baŋa masla mazəb mis aləg la tataka aŋatà la abà kagòɗaw takay? Awaŋ, akəs vok aw. ³⁵ Ama kaslā adəsà à waŋ, à mok uwana masla mazəb mis adəgay la tataka aŋatà la abà aya aw kà, la mok uwatà la uwana tadəkəs nəlay suwaŋ." ³⁶ Yesu apəhatàla gay la gay la abà uwanay: "Dza la ahəŋ, akohəni lukut mawga kà matafay à lukut maviyaga à vok aw, baŋa adəhəŋ kiya uwaga kà, awis lukut mawga ala, nŋaha lukut mawga agay kalkal la lukut maviyaga babay aw. ³⁷ Nŋaha aya babay kà, dza la ahəŋ adəway iyaw matavəruk mawga à kiwa iyaw maviyaga à agu aw. Baŋa adəhəŋ kiya uwaga kà, mamslila aŋha kà, adəkwh kiwa maviyaga ala, nŋaha iyaw matavəruk asokw à vəɗah, nŋaha kiwa babay awis ala. ³⁸ Ama kəla kà, say tadəway iyaw matavəruk mawga à kiwa iyaw mawga à agu suwaŋ. ³⁹ Baŋa dza adasa iyaw matavəruk maviyaga kà, ayàh mas iyaw matavəruk mawga aya aw, kà uwana tagòd kà: 'Maviya gə la uwana aduwa mawga la matsiday', tagòd."

6

Yesu la uwana məŋga aŋa vuɗ maduw ləv

(Mata 12.1-8; Mark 2.23-28)

¹ Vərdi anik, la vuɗ maduw ləv Yesu aguwa à uda la guf nalkama la abà. (Uwana bokuba hi) Azlaməna matapla la slaka aŋha tadəkà manal gəl gə, nŋaha tavərsəlāh kà mapadəy kà uwana may azà à atà. ² Azla Farisəya anik tagòd à atà: "Kà mana kadəhaw tatak uwana tetəvi la ahəŋ aŋa madəh uwaga, la vuɗ maduw ləv aw ma?" ³ "Kay", Yesu agòd à atà: "Akul kà, kadzəŋəw tatak uwana David adəhəŋ la mok uwana may akəs la azladza uwana tagà atà nna aw takay? ⁴ Masla, la azlaməna aŋha tahəd à gəy Zəzagəla à agu, tazūw tatak may tsikasla, uwana maf à ahəŋ gə kà aŋa Zəzagəla pəra. Tekedika tetəvi la ahəŋ kà atà aŋa mazuway aw, say azlaməna mav tatak à Zəzagəla la uwana atà la tetəvi aŋa mazuway pəra." ⁵ Yesu agòd à atà aya: "Kona aŋa dza la uwana məŋga aŋa vuɗ maduw ləv uwaga."

Dza la ahəl mamətsayga

(Mata 12.9-14; Mark 3.1-6)

⁶ La vuɗ maduw ləv anik aya, Yesu ahəd à gəy madəv kuɗa anik à agu, nŋaha adəkà matapla azladza la abatà. Dza anik la ahəŋ la abatà, uwana ahəl kaf aŋha kà mamətsayga. ⁷ La abatà kà, azlaməna mapəhla mapəhay ala, la azla Farisəya tatsəb sləm à Yesu la manərezay, à baŋa awur dza uwaga ala la vuɗ maduw ləv, kà atà aŋa maɓəzal à tsəh, kà mapuw ala gudzi à gəl kà uwana apesew vuɗ maduw ləv. ⁸ Ama Yesu asəl madzugway aŋatà, kiya uwaga agòd à dza uwana la ahəl mamətsayga: "Sà à afik, tsizlla à tataka à abà, la abà gə, la huma azladza gesina." Dza uwaga asà à afik, nŋaha atsizlla à atà à huma à gay la abatà. ⁹ "La kità", Yesu agòd à atà: "Gi la manavay la slaka aŋkul: Mapəhay gami ma avà à anu tetəvi aŋa madəh delga la vuɗ maduw ləv takay, awma madəh mawisiga ay? Maɓəl sifa aŋa dza, awma maz sifa aŋa dza ala, la uwana delga takay?" ¹⁰ Atà gesina tatsəkəl yewdi à gay, kiya uwaga Yesu agòd à dza uwaga: "Biyà ahəl ala!" Abiyà ahəl ala, nŋaha ahəl adawur ala. ¹¹ Ama azla Farisəya la azlaməna mapəhla mapəhay ala tahən ala la maŋor, nŋaha la mapəkàh ləv, nŋaha tadəkà mabay vok gay kà atà kà atà lakəl aŋa uwana asà à atà madəhəŋ à Yesu à vok.

Yesu akasani azlaməna matapla kulo gəl aŋha səla

(Mata 10.1-15; Mark 3.13-19)

¹² La kaslā uwatà, Yesu ahəd à dadəgwal à afik kà madəv kuɗa la abatà, huyip ahən à madəv kuɗa à gəl, adəv kuɗa à Zəzagəla. ¹³ Mok uwana məl adawulla, azàla azlaməna asik aŋha, nŋaha atsatsəmàni kulo gəl aŋha səla, uwana apakàtala kà azlaməna matapla la slaka aŋha. ¹⁴ Səmon (uwana avəl sləm Piyer bay) la deda aŋha Andərə, Yakuba, Yuhana, Filip, Bartelemi, ¹⁵ Mata, Tomas, Yakuba kona aŋa Alfe,

Sëmon uwana tazàlal Zëlot, ¹⁶ Yudas kona anja Yakuba, ngaha Yudas Iskariyot, uwana apaka masla mëzam anja Sufël Yesu.

Yesu atapla tatak à maham à ahəj dza

*ngaha awara azlaməna dɔvats ala
(Mata 4.23-25)*

¹⁷ Yesu asà à ahəj la dadəgwal la afik atà nna, ngaha asà à vadavaday à afik, kà uwana azlaməna asik anja anɔvaw la abatà. Azlaməna kutso Yahudiya, la azlaməna gudəj Urusalima ngaha azlauwana la makəla anja gudəj Tir, la Sədon uwana la gay mukwà, atà gesina la abatà. ¹⁸ Tasàhà à wanj kà matsəbal sləm, ngaha kà atà anja mawarla la azladuvats anjatà la abà. Azlauwana tasà ngərpa la ahəl anja azlamasasədok mawisiga babay kà, tawarà ala. ¹⁹ Dəwdəw dza tayàh kà madəbani Yesu, kà uwana ndzəda asahàh à uda la masla la abà, awàràhà atà ala gesina.

*Barka la matsafay
(Mata 5.2-12)*

- ²⁰ Yesu anərəz azlaməna matapla la slaka anja agòd:
“Marabay agay la akul uwana azlaməna kudfa lagwa, kà uwana makoray Zəzagəla kà adəgay kà ankul.
²¹ Marabay agay la akul uwana may az akul lagwa, kà uwana kadàbəzawwal tatak may sakay sasakay.
Marabay agay la akul uwana katuwaw lagwa, kà uwana kadəkədaslaw.
²² Marabay agay la akul à banja azladza tapəsew akul, takweska akul, tatsək à akul magòfahay à gəl, ngaha tatərəb akul la mawisiga, kà Kona anja dza.^{*}
²³ Ràbàw la vud uwaga, ngaha vələhàw à zagəla kà uwana masik mənɔga akul akul la zagəla, kiya uwaga à uwana azlababa ankul madzidziga tatərəbàhà azlaməna mapəh à atà gay à ahəl uwarà.
²⁴ Ama ngərpa agay la akul, akul azlagorobu, kà uwana kadazuwwaw.
²⁵ Ngərpa agay la akul, akul uwana kakoraw tatak sakay sasakay lakana, kà uwana may la uwana adəkad akul.
Ngərpa agay la akul uwana kadəkədaslaw lakana, kà uwana bawbaw kà, kadəgaw la mazaw la gəl la abà, ngaha kadəgahaw la iyaw tugwi la adi.
²⁶ Ngərpa agay la akul à banja azladza gesina tasləkaw akul, kà uwana kiya uwaga la uwana, azlababa ankul madzidziga tadəhàhànɔj la azlaməna mapəh à atà gay à ahəl fidaga.”

*Mawoy masla məzam
(Mata 5.38-48; 7.12)*

²⁷ “Ama gəpəh à akul, akul uwana katsəbaw gi sləm: Wòyàw azlaməna məzam ankul, dəhàw delga à azladza uwana tapəsew akul. ²⁸ Pəsàw gay à azlauwana à vok, tatsafila akul, dèwàw kudfa kà anja azlauwana tatərəb akul. ²⁹ Banja dza adedka à panjaw à abà, gòlla anik uwanay à awtày aya, banja dza ahəl dawara anjak kà, sàkal ahəl bəzi anja aya babay. ³⁰ Kəla dza uwana anav à ka tatak kà, vəl, banja dza azəb à ka tatak ala la gasa kà, kapùwla gudzi à gəl aw. ³¹ Tatak delga uwana asa à akul azladza tadəhakulanj kà, dəhàwànɔj à azladza anik bokuba uwaga suwanj kəla.”

³² “Banja kawoyawwanj kà azladza uwana tawoya akul pəra ma, kà mana kakudaw masik anik aya ma? Kà uwana bə azlaməna tsakana babay kà, tawoya azlauwana tawoya atà babay suwanj pəra. ³³ Ngaha banja kadəhawwanj delga kà azlauwana tadəhakulanj delga pəra ma, kà mana kakudaw masik anik aya ma? Amiyaka azlaməna tsakana kà, kiya uwaga à uwana tadəhəj babay. ³⁴ Banja kakəllaw goder à dza uwana kasəlaw, kà adəpəlay ma, kà mana kakudaw masik anik aya ma? Azlaməna tsakana babay kà, takal vok goder, ngaha atà anja mavàh vok anjatà suwanj, kità ma: Uwa adavà akul masik aya zlà ma uwa? ³⁵ Ama kəla kà: Wòyàw azlaməna məzam ankul, ngaha kəllàw atà goder la kokudfa madzugway kà mawul akul ala. Kiya uwaga kà, kadàbəzaw à masik mənɔga la slaka Baba uwana kərkər la afik, ngaha kadəgaw azlabəza anja. Kà uwana masla kà dziriga la huma anja azlaməna tsakana la azlaməna makəsafər gesina. ³⁶ Hənàwla, la delga ngaha la vok mahamay, bokuba Baba ankul uwana adahənla la dzəba anja sèla aw.”

*Kadəhaw seriya à azladza anik à gəl aw
(Mata 7.1-5)*

^{*} 6:22 6.22 1 Piyer 4.14

³⁷ “Kadafahaw seriya à azladza anik à gəl aw, ngaha Zəzagəla adədfahakulla seriya à gəl suwan aw; kadəkaw seriya à azladza à gəl aw, ngaha Zəzagəla adədfəkakulla seriya à gəl suwan aw, matsawan azladza anik ala, ngaha Zəzagəla adədmatsakullanj ala suwan. ³⁸ Vəw à azladza anik, ngaha Zəzagəla adəvə à akul: Zəzagəla adətsak akul à zliba ankul à agu tsəj tsətsəj, tadəhatsəkəwəj la madəkəwəj serafaffa. La daram uwana kagurawla à azladza anik kà, uwaga la la uwana tadəgür à akul ala suwan.”

³⁹ Yesu apəh à atə gay la gay la abə anik, agəf à atə: “Guləf aslala vok anja makəs guləf anik à ahəl takay? Awanj, atə səla nna tadəsakway à afək à abə. ⁴⁰ Masla matapla aduw masla matapalla aw, ama banja adədəv matapla madzenjay anja à gay kà, aslala vok anja magay bokuba masla.”

⁴¹ “Kay, kà mana kanəja kəsaf la yewdi anja deda anjak la awtəy, ama anjak uwana magol tsəkud tsəkud la awtəy kà, kanəja aw ma, kà mana ma? ⁴² Ngaha kagəfay à deda anjak: ‘Deda, sək à gi, gəzəb à ka kəsaf la adi ala’. Kak, la gəl anjak kà, kanəja magol tsəkud tsəkud uwaga la anjak la awtəy aw ma? Kak, masla magolla dza, zəb anjak la adi ala dadəj, ngaha la lig la ahəj kà, kadənəjla lela kà mazəb kəsaf à deda anjak la adi ala, la dziriga.”

Masəl ahəf kà la mayyay anja la vok

(Mata 7.16-20; 12.33-35)

⁴³ “Ahəf delga kà avə mayyay mawisiga aw, ahəf mawisiga babay kà, aslala vok anja mav mayyay delga aw. ⁴⁴ Iyay, kəla ahəf kà agay masələyga la mayyay anja la vok. Dza aslala vok anja madəzl gudəv la matatək la vok aw, ngaha bay, dza adəzl matavəruk la mazəb la vok aw. ⁴⁵ Dza delga kà, adəhəj kà delga, kà uwana, uwana la ləv anja la tsəh kà delga. Dza mawisiga kà, adəhəj kà mawisiga, kà uwana uwana la ləv anja la tsəh kà mawisiga. Kà uwana panjaw anja dza kà, apəhay kà uwana la ləv anja la tsəh.”

Gay lakəl anja azlagəy səla

(Mata 7.21-29)

⁴⁶ “Kà mana kazalaw gi ala: Sufəl, Sufəl, ngaha tsa kadafahaw tatak uwana gəpəh à akul aw ma? ⁴⁷ Kəla uwabeyuwi uwana atsa à wanj à slaka gulo ngaha atsəb sləm à kuda gulo kà, gəpəhakulla dza uwana gəgagəzləla la masla. ⁴⁸ Masla kà kalkal la dza uwana atatukw matatukway anja gəy anja kà à təhus à afik. Mok uwana iyaw adədzəka mas à afik, akəl la lig gəy, afad adəf la ndzəfa, ama gəy kà akaləh à ahəj aw, kà uwana tatətək kà à təhus à afik. ⁴⁹ Ama dza uwana atsəb sləm à gay gulo, ngaha akəs uwaga aw kà, masla kà gəgagəzləla kà la dza, uwana anjal gəy à wuyyanj à afik. Mok uwana iyaw mukwà adəda à mukwà à afik, azəb gəy uwaga gesina, adalla.”

7

Yesu awur magamza anja mənğa anja azlaslodzi anja azla Rom ala

(Mata 8.5-13)

¹ Mok uwana Yesu adadəv gay anja à gay la huma anja maham à ahəj dza, atsizilla ala la abatə, ahəd à Kapernahum. ² Mənğa anja azlaslodzi anja azla Rom la ahəj la abatə. Magamza anja uwana awoyəj kaykay, aga la dıvats, agə kà la ləv la ləv. ³ Mok uwana mənğa anja azlaslodzi atsənə gay uwana tapahay lakəl anja Yesu kà, masla asləl azlamasiga anik la tataka azla Yahudiya la abə, kà madəv kuda à Yesu kà mas à wanj anja mawur magamza anja ala. ⁴ Kiya uwaga, mok uwana tabəz à slaka Yesu, tadəval kuda la kamkam la iyaw tugwi, ngaha la magəfay: “Dza uwanay kà, azlayla kà vok kà kazlakay, ⁵ kà uwana masla kà awoyə tsəhay gami, ngaha aya, masla la uwana anjal anu gəy madəv kuda gami aya.” ⁶ Kiya uwaga Yesu anəfə atə, ngaha mok uwana tadəzlabəz kà mtəga, mənğa anja azlaslodzi uwaga asləl azlamanalay anja kà magəfal: “Madzahaga katerəb gəl anjak aw, kà uwana gəsəla kà kak anja makəl gəl à ahəj kà mas à gəy gulo à agu aw. ⁷ Kà uwaga, gi babay la gəl gulo kà, gənərəz kà, gəsəl kà mad à awtəy à slaka anjak la gəl gulo aw. Ama pəh gay tekula la tsəh ala pəra kà kona gulo anja mawurla. ⁸ Gi babay kà azlamənğa la ahəj lakəl gulo, gi babay, gi lakəl anja azlaslodzi anik suwan. Ngaha gəsəla vok magəfay à tekula anjatə: Həd, kà aday. Gəgəfay à anik aya: Sə à wanj kà, atsa à wanj, ngaha bay gəgəfay à masla sləray gulo: Dəhəj uwanay kà, adəhəj bay.” ⁹ Mok uwana Yesu atsənə gay uwaga, awoyə masla kaykay, agəla vok, ngaha agəf à maham à ahəj dza uwana tanəfə la tsəh: “La dziriga gəpəh à akul: Gədanəjəj didididi à tsəhay madijal gəl à vok uwanay, amiyaka bə la İsrəyəl aw.” ¹⁰ Azlaməna sləray anja mənğa anja azlaslodzi tawul à mtəga, ngaha tabəz à magamza uwaga à gəl, kà adawur ala.

Yesu awulla kona anja mis kuda à uda la mamətsay

¹¹ Ngaha Yesu ahàd à gudəŋ anik uwana à abà, sləm aŋha Nayyin, la azlaməna matapla la slaka aŋha, ngaha maham à ahəŋ dza aŋuwaw tanəfà masla. ¹² Kiya uwaga mok uwana tazlābəz à gay gamagāy aŋha huɗ gudəŋ, tagagām la azladza uwana tazəb mazimnekid à uda. Uwaga bəzi tekula gā aŋa mis kufa, uwana anik aŋha la ahəŋ aw. Maham à ahəŋ dza aŋa gudəŋ uwaga gesina tagà la slaka mis uwaga. ¹³ Mok uwana Sufəl Yesu anəŋà mis uwaga vok ahamāl: “Katùw aw”, agòɗal. ¹⁴ Ngaha Yesu azà vok à slaka mazimnekid, adəbani azlav aŋha. Azlaməna mazəbay tatsizilla à ahəŋ, Yesu agòɗ: “Kohana, sà à afik, gəgòɗ à ka!” ¹⁵ Kiya uwaga mazimnekid atsizilla ala, ngaha adzəkà mavats gay. La lig la ahəŋ Yesu awùlla à iyà aŋha. ¹⁶ La abatà ləv avàl à azladza à gay gesina, tazləbà Zəzagəla la magoɗay: “Magol masla mapəhal gay à ahàl aŋa mapəh azladza adapəhla vok ala la tataka gami la abà lakana. Zəzagəla la gəl aŋha adasa à ahəŋ kà mazlak tsəhay aŋha lakana.” ¹⁷ Ngaha gay aŋa Yesu uwaga atsən la kutso Yahudiya la abà gesina la kutso uwana la makəla aŋha gesina.

*Azladza uwana Yuhana masla maɗàh batem asləl atà à waŋ
(Mata 11.2-19)*

¹⁸ Kiya uwaga azlaməna matapla la slaka aŋa Yuhana tapəh uwaga gesina aŋatà à mənŋa aŋatà. Yuhana azàl azladza səla la tataka aŋatà la abà, ¹⁹ ngaha aslèlla atà à slaka Yesu kà manaval à gay ala: “Kak, ma kak dza uwana məkud kà aŋa mas à waŋ takay? Awma məkud dza anik kəla ay?” ²⁰ Mok uwana tabəz à slaka Yesu, tagòɗal: “Yuhana, masla maɗàh batem, asləl anu à waŋ kà manav à ka: “Kak, ma kak dza uwana məkuday kà aŋa mas à waŋ takay, awma məkud dza anik ay?” ” ²¹ La kaslà uwatà, Yesu awarà azladza ala aŋuwaw, la azladɗuvats aŋatà la abà, ngaha la azlamazay vok aŋatà la abà, apəlla atà ala la ndzəɗa aŋa azlamasasəɗok mawisiga la abà, ngaha avàh yewdi à azlaguləf aŋuwaw. ²² Kiya uwaga awùlla gay à azlaməna masləl atà à waŋ gā aŋa Yuhana: “Dàw, kadəpəhaw à Yuhana uwana kanəŋəwəwəŋ la uwana katsənəwəwəŋ: ‘Azlaguləf tanəŋla, azladeri taday, azlaməna akàl zagəla tawarla, azlamadagazlam tatsən sləm, azlamazimnekid tawul à uda la mamətsay. Ngaha gay matsidəyga babay adatsən à azlaməna kufa.’[✧]

²³ Marabay agay la dza, uwana asak gi à tsəh ala la madiŋal gel à vok la abà aw!”

²⁴ Mok uwana azlaməna matapla la slaka Yuhana tadiy aŋatà, Yesu adzəkà mapəhay à maham à ahəŋ, dza lakəl aŋha la magoɗay: “Mana à uwana kadàw kà mayahay la fəta la abà ma? Mazuwa uwana afaɗ abəlakəŋ ay? Awan, uwaga aw. ²⁵ Kətà zlà ma: Mana à uwana kadàw aŋa manəŋəŋ zlà ma? Dza uwana atsàkwàh à lukut mahəɗəyga à abà kəla ay? Azlauwana tatsàkwàh à lukut mahəɗəyga à abà kà, atà kà azlasufəl. Ngaha tadzà à ahəŋ la huɗ gāy sufəl. ²⁶ Kətà zlà ma: Mana kadàw kà aŋa manəŋəŋ ma, masla mapəhal gay ahàl aŋa Zəzagəla kəla ay? Iyay, gəgòɗ à akul: amiyaka adagay masla mapəhal gay à ahàl babay kà, ²⁷ haɗay, Yuhana kà masla kà dza uwana matsəteray apəh lakəl aŋha:

“Aganay gəsləl masləlay gulo à awtəy à huma aŋak,’ Zəzagəla agòɗ: ‘Kà masla aŋa mapəslak tetəvi.’”[✧]

²⁸ “La dziriga gəpəh à akul: La tataka azladza asik la abà, agà la ahəŋ dza uwana agà bokuba Yuhana masla maɗàh batem uwanay aw; tekeɗika, dza uwana mabəziga bəziga la makoray Zəzagəla kà, aɗuwa Yuhana uwanay lagwa.”

²⁹ Maham à ahəŋ dza gesina la azlaməna mazəb hadama tatsəb sləm à masla, atà gesina tagòɗəŋ à afik kà Zəzagəla kà dziriga. Atà tabəzàl batem la slaka Yuhana. ³⁰ Ama azla Farisəya la azlaməna mapəhla mapəhay ala, takweskà tatak uwana asà à Zəzagəla kà maɗàh à atà à ahəŋ kà aŋatà, kà uwana takweskà batem aŋa Yuhana.

³¹ Yesu agòɗ aya: “Lagwa ma, la mana gəgəzləla azladza aŋa zamana aŋa lakana uwanay ma? La mana atà tadəbani vok lagwa ma? ³² Haɗay, atà gəgəgəzləla atà la azlabeza uwana tadzàh madzay la vadavaday kasukwa la afik. Tazàlāh vok, kà atà kà atà la magoɗay: Anu mətsà à akul talakwoy, ama akul kahàbàwal à tsəh aw. Məhàb à akul dəs kuɗa, ama katawàw la mats hulolo aw. ³³ Ngaha aya Yuhana masla maɗàh batem azlanjal, azùw kaf aw, ngaha asàh iyaw matavəruk aw, ngaha kagòɗaw aya kà: ‘Masla la masasəɗok mawisiga.’ ³⁴ Kità aya, Kona aŋa dza azlanjal, azuway, asay, ngaha kagòɗaw kà: ‘Nərəzàw dza uwanay tsi: Masla huɗ’, kagòɗaw. ‘Afa sləm kà à mazuway la masay aŋha pəra. Kafaw masla kà à tataka aŋa azlaməna mazəb hadama abà, la azlaməna tsakana, ngaha la azladza uwana madz à ahəŋ aŋatà kà lela aw.’ ³⁵ Ama matsihila aŋa Zəzagəla apəhla masla ala la slaka azladza gesina kà makəs masla.”

Yesu la mtəga aŋa Səmon zil Farisəya

³⁶ Zil Farisøya anik azàla à Yesu kà mazuw tatak may la mtøga aŋha. Yesu ahàd à mtøga aŋa zil uwatà, adzà à tatak may à adi. ³⁷ Mis masla tsakana agà la gudøŋ uwatà la abà. Mok uwana atsønà, kà Yesu la tatak may la adi la mtøga aŋa zil Farisøya uwaga kà, asèlla amàl matørsin à waŋ wuf la dèrew gà. ³⁸ Mis atsizl à makèla asik aŋa Yesu la matuway, alèbà asik aŋa Yesu la iyaw tugwi, ŋgaha aslaslàdàŋ ala la aŋidz gəl aŋha, ŋgaha ahèl asik aŋa Yesu à tèkul à abà kà madzadzabàl amàl matørsin à gəl. ³⁹ Mok uwana zil Farisøya uwana azàla Yesu, anøŋà uwaga kà, agòd la gəl aŋha kà: 'Ndzer kà, agayŋa zil uwanay, agay masla mapəhal gay à ahàl kà mapəh à azladza kà, naka asəl mis uwanay kà masla tsakana gà.' ⁴⁰ Yesu agòd à zil Farisøya: "Səmon, gi la gay anik kà mapəh à ka!" Səmon agòdàl: "Məŋga, pəh!" ⁴¹ Ŋgaha Yesu agòd: "Tsəŋəŋ lela: Dza anik la ahəŋ uwana avà goder sili à azladza səla, anəfà dza anik la gursu dadərmokw zlo, ŋgaha la slaka dza anik aya, gursu dzik zlo. ⁴² Uwana tabəz à tatak kà mapəlla aya aw, asàk à atà ala goder aŋha la vok. Ŋgaha ma, dza uwala à uwana awoyən kaykay la?" ⁴³ Səmon agòdàl: "Gi kà, gədzugw kà, dza uwana gursu dadərmokw zlo la vok, kà masla la uwana 'Kikay', agòdày kaykay." Yesu agòdàl: "Iyay, azlayla kà." ⁴⁴ Yesu agòla à huma à slaka mis la magòd à Səmon: "Səmon, kanəŋa mis uwanay ay? Gi la kay aŋak, bə iyaw bay, kà katədəgəŋ kà mapal asik gulo aw, ama masla kà aləb à gi asik gulo la iyaw tugwi aŋha, ŋgaha aya la aŋidz gəl aŋha la uwana aslaslàdəgəŋ ala. ⁴⁵ Kak, kakəs gi la ahàl səla aw, ama masla kà akəs gi la ahàl səla. Dagay uwana gəsà à gəy kà akəsà à asik gulo, kà uwana awoyà gi. ⁴⁶ Kak, kadàh à gi à amàl à gəl aw, ama masla kà adzadzab à gi matørsin à asik. ⁴⁷ Kà uwaga à uwana gəgòd à ka: Kà magol masal məŋga uwaga apəhla ala kà, mahəm à ahəŋ tsakana aŋha kà adamatsila, suwan. Ama aŋa dza uwana tamàtsàlən ala ŋuv kà, masal aŋha suwan kà ŋuvga babay." ⁴⁸ Kiya uwaga Yesu agòd à mis: "Tsakana aŋak adamats ala." ⁴⁹ Azladza uwana la tatak may la adi atà nna, tadzəkà manəŋuzay: "Uwa asla dza uwaga, aslala vok aŋa mamats tsakana à dza ala uwa?" ⁵⁰ Ama Yesu agòd à mis: "Madinjal gəl à vok aŋak adaəbəl ka, hād la wurwur!"

8

Azlamis uwana tanəfəh Yesu

¹ La lig aŋa uwaga la ahəŋ, Yesu adàh à azlagudəŋ à abà la azlahudəŋ, azahà gay matsidəyga aŋa makoray Zəzagəla. ² Azlaməna matapla la slaka aŋha kulo gəl aŋha səla uwatà, la azlamis anik anik, uwana adapalàh atà ala la azlamasasəfok mawisiga la abà, ŋgaha la azladəuvats anik anik la abà, atà gesina tanəfà, Mariyama, dəg zla Magdala, uwana akuəbəkàl azlamasasəfok mawisiga məfəf lakəl ala, ³ ŋgaha Yohana mis aŋa Kuza, vazaray aŋa sufəl Herod, Suzan la azlamis anik aŋuwaw uwana tazlæk Yesu la azlaməna matapla la slaka aŋha, la ləmana aŋatà.

Gay la gay la abà aŋa masla maslæk hi (Mata 13.1-9; Mark 4.1-9)

⁴ Azladza gudəŋ anik, anik gesina tasàhà à waŋ, tahamà gay à vok la slaka aŋha, ŋgaha apəh à atà gay la gay la abà uwanay:

⁵ "Masla maslæk tatak asà à uda, kà mad maslæk hi. La mok uwana aslæk hi uwaga la guf aŋha la abà, azlafofulo anik anis à tetəvi à ama. Tafàhal asik à gəl ŋgaha azladəyan tasà à waŋ, tazùw à gay. ⁶ Azlaanik aya anis à pala akur à afik, bokuba uwana kutso la pala akur lakəl məŋga aw, hi asà à uda katskats, ŋgaha uwaga agül ala katskats, kà uwana kutso la pala akur lakəl məŋga aw. ⁷ Gotəŋəŋ fofulo anik anis à atàk à abà, asà à uda, ama bokuba uwana tazigəŋay la slaka gə, atàk akəd à tsəh. ⁸ Bə gotəŋəŋ fofulo anik aya anis à kutso delga à abà, uwaga asà à uda, azigəŋ, atsà gəl lela, ŋgaha tavà mayyay lela, anik ayyà à adi huməts, anik aya ayyà à adi zun, ŋgaha anik ayyà à adi zazuŋ səla." Mok uwana Yesu adakəf gəl à mapəh gay aŋha, agòd à atà la mazatàlan à gəl: "Tsəbəwwal sləm lela, à baŋa sləm aga à akul lakəl!"

Kà mana Yesu apəhay kà la gay la gay la abà ma? (Mata 13.18-23; Mark 4.13-20)

⁹ Azlaməna matapla la slaka aŋha tanəv godega aŋa gay la gay la abà uwatà. ¹⁰ Yesu agòd à atà: "Akul kà, kabəzàw nasiri aŋa masəl godega aŋa wakitə Zəzagəla. Ama kà aŋa azladza anik kà, apəhatàla kà la gay la gay la abà pəra:

'Kà atà aŋa manəŋəŋ, ama bokuba tanəŋəŋ aw,
kà atà aŋa matsəŋəŋ ama bokuba tatsəŋəŋ aw.'"¹¹

Yesu apəh godega aŋa gay la gay la abà

*anja maslæk hi uwatà à uda
(Mata 13.18-23; Mark 4.13-20)*

¹¹ “Aganay godega anja gay la gay la abà uwanay: Fofulo kà gay Zəzagəla. ¹² Azladza anik məpakatàla bokuba tetəvi uwana hi anisal à ama: Atà tatsəb sləm à gay, ama katskats seteni asa à wan, abəd à gay uwaga la ləv anjatà la tsəh, kà atà anja madinjal gəl à vok kà məbəlay aw. ¹³ Azlaanik aya kalkal la pala akur uwana fofulo anis à afik. Tatsəb sləm à gay, takəs la marabay katskats, ama tasakal adala slilih la atà la abà la lela aw. Tadinjal gəl à vok kà anja kaslā njuv pəra, la mok uwana azlanğərpa tadzahka vok kà, takweska madinjal gəl à vok la katskats. ¹⁴ Fofulo uwana anis à atək à abà aya kà, apəhla azlauwana ala tatsəna gay Zəzagəla, takəs, ama madzugway la adi anja gudəŋ à vok uwanay, la matsiday anja, la məpatatay anja lakəl anja ləmana, asufa gay uwanay ala la ləv anjatà la tsəh, nğaha ahən aw. ¹⁵ Fofulo uwana anis à kutso delga à abà kà, apəhla azlauwana ala tatsəb sləm à gay, nğaha takəs uwaga la ahəl səla nğaha la ləv tekula, nğaha tatsizlla gay uwaga à afik, kiya uwaga tahən lela.”

*Gay la gay la abà anja fənəs
(Mark 4.21-35)*

¹⁶ Yesu agəd: “Dza avats fənəs kà maf à tsəh tasà takay, awma kà maf à tsəh gogozläh takay? Awan, tafay kà à slaka dzəgamma gə, kà azladza uwana tada à gəy anja manəŋ udəka anja. ¹⁷ Dəwdəw tatak mahadəŋ à ahəŋ gə kà, adəpəhla vok ala, nğaha dəwdəw tatak nasiri gə, adəgay masəlay gə, adəpəhla vok ala la dazuwaya la afats kà manəŋəŋ anja azladza. ¹⁸ Dahàw hanjəli la kaykay à uwana katsənawwan! Kà uwana tavəy mənğa à dza à uwana la tatak, ama kà tazəballəŋ ala à abà bəziga gə à uwana adzugw məbəzal babay.”

*Iyà la azladedə anja Yesu
(Mata 12.46-50; Mark 3.31-35)*

¹⁹ Iyà la azladedə anja Yesu tahəd à slaka anja, ama tabəzal à vok aw, kà uwana maham à ahəŋ dza anjuvaw. ²⁰ Nğaha tapəh à Yesu: “Iyà la azladedə anjak la uda, tayəh ka, asa à atà manəŋ kà”, tagədəl. ²¹ “Iyà la azladedə gulo kà azlauwana tatsəna gay Zəzagəla, nğaha la madəhəŋ, la uwana azladedə gulo la iyə gulo pəra”, Yesu agəd à atà.

*Yesu atsizl kular à ahəŋ
(Mata 8.23-27; Mark 4.35-41)*

²² Vərdi anik kà, Yesu ahəd à kəslah iyaw à afik la azlaməna matapla la slaka anja, agəd à atà: “Məguwà la gay dərəv à uda anik”, nğaha tahəd. ²³ Uwana tagə la kəslah iyaw la afik kà, Yesu adzəhəl. Katskats magol kular adzəkà vok la ndzəfa lakəl iyaw, kəslah iyaw ahən ala la magantsay anja iyaw uwana adàhà à abà, nğaha atà kà, tagə la zlamtsa la abà. ²⁴ Kiya uwaga azlaməna matapla tazə vok à slaka anja Yesu tatsənəŋ ala la magədəl: “Mənğa, mənğa, məzləmamətsay, zlək anu!”

Hadzak, Yesu asà à afik nğaha asləh mələ à kular à gəl la magantsay ana iyaw, nğaha tadzà à ahəŋ titi. ²⁵ Nğaha Yesu agəd à azlaməna matapla la slaka anja: “Anjala madinjal gəl à vok anjul la?” Ama guba akəs atà, ləv avəl atà à gay, nğaha tagəd à vok kà atà kà atà: “Tsəhay dza uwala à uwanay la? Amiyaka kular, la magantsay anja iyaw babay kà tasəl masla, nğaha takəsəl gay la ahəl ala!”

*Yesu awur dza uwana ala la azlamasəsədok mawisiga
(Mata 8.28-34; Mark 5.1-20)*

²⁶ La lig la ahəŋ gesina anjatà tabəz à gay dərəv à uda anja gay dərəv anja Galili, uwana la kutso anja Gerasəniya la abà. ²⁷ Batsərə uwana Yesu atsà à vədah la kəslah iyaw la afik, dza anik asà à wan la huđ gudəŋ la abà kà magagamay la masla. Dza uwatà kà zagəla zagəla lakəl, adasafay kà atsakwah à lukut abà aw, ahanay la gəy la aku babay aw, la azlamabuwanə zəvay la aku pəra. ²⁸ Mok uwana anəŋə Yesu, awiyà la ndzəfa nğaha atəd à makələ asik anja la magədəy: “Mana kayahay la slaka gulo ma? Yesu Kona anja Zəzagəla uwana kərkər la afik. Kamkam gədəv à ka kuđa, kasa à gi nğərpa aw gəgəd à ka!” ²⁹ Uwana apəh uwaga kà, kà uwana Yesu afə gay à masasədok mawisiga uwaga à gəl, kà masal à kəl ala. Zagəla zagəla uwaga adahal à gəl zwek zwek. Anjuvaw tawadəhəŋ à ahəŋ la azlamazakazak ada, aslähəh ala la manaləh ada ala, kà matəf à fəta. ³⁰ Kiya uwaga Yesu anəval gay ala la magədəl: “Uwa à sləm anjak uwa?” Masla awilla à uda agəd: “Sləm gulo kà: Maham à ahəŋ.” Kà uwana azlazagəla zagəla kà atà anjuvaw tahaməl à gəl. ³¹ Azlazagəla zagəla uwaga tadəv kuđa à Yesu kà mawits atà à afək zənjəŋga à abà aw.

³² Manəlanəḷ namzi la ahəḅ la abatà tapəḍ awul la madəguruh la afik. Azlazagəla zagəla uwaga tadəv kuḍa à Yesu, kà masla masləlla atà à azlanamzi uwatà à abà. Yesu avà à atà tetəvi: “Dàw à atà à gəl!”, agòḍ à atà. ³³ Kiya uwaga azlazagəla zagəla uwaga, tasà à dza uwaga lakəl ala, tahàḍ à azlanamzi à gəl. Kiya uwaga manəlanəḷ namzi uwaga tahòy à ahəḅ la madəguruh la afik, ḅgaha tatsàḅ gəl à iyaw à abà, tasufàḅ à abà.

³⁴ Uwana azlaməna manəḅla azlanamzi tanəḅə uwaga apakà vok, tahòy anatà, tahàḍ kà mapàḅ azlagay uwaga à azladza huḍ gudəḅ gesina, la azladza uwana la azlabəza gudəḅ la abà babay. ³⁵ Azladza tasà à uda la gudəḅ la abà gesina kà maday manəḅ tatak uwana apakà vok, ḅgaha tasà à waḅ à slaka Yesu, tabəzà dza uwaga à gəl azlazagəla zagəla tasà à kəl ala. Adadza madzay la makəla aḅa Yesu, masla adatsokw lukut à vok, hanəkəli aḅa babay kà delga. Azladza uwana tanəḅəḅ gesina kà, ləv avàḷ atà à gay kà masla. ³⁶ Azladza uwana tanəḅəḅ mawurla aḅa, tapàḅ godega aḅa mawurla aḅa à azladza uwatà. ³⁷ ḅgaha maham à ahəḅ dza gesina, uwana la makoray aḅa Gerasəniya tadəv kuḍa à Yesu kà mas à uda la makoray aḅatà la abà, kà uwana guba akəs atà à gay kayak. Kiya uwaga masla ahàḍ à kəslah iyaw à afik, adà aḅa la abatà. ³⁸ Dza uwana azlazagəla zagəla tasà à kəl ala, adəv kuḍa à Yesu kà madz à ahəḅ atà səla. Ama “Dà aḅak!”, Yesu agòḍal la magòḍay: ³⁹ “Wùḷ à huḍ gəy aḅak, ḅgaha pàḅ tatak uwana Zəzagəla aḍahàḅ kà aḅak gesina!” Masla atsizlla ala, ahàḍ, apàḅ tatak gesina uwana Yesu aḍahàḅ kà aḅa la makoray uwatà la abà gesina.

Yesu awur mis ala,

*ḅgaha awulla dugu aḅa Yayrus à uda la mamətsay
(Mata 9.18-26; Mark 5.21-43)*

⁴⁰ La mok uwana Yesu adawul à waḅ maham à ahəḅ dza takəs masla la ahàḷ səla, kà uwana takudà masla. ⁴¹ Dza anik uwana sləm aḅa Yayrus asà à waḅ, masla agà mənḅa aḅa gəy madəv kuḍa, atəḍ à makəla asik aḅa Yesu, la madəval kuḍa kà masla aḅa manəḍ à mtəga aḅa. ⁴² Dugu aḅa kà tekula à ahàḷ gə, la uwatà mavay aḅa kulo gəl aḅa səla. Masla la ḍuvats, aləg kà la ləv la ləv pəra.

La mok uwana Yesu aday la tetəvi la ama, maham à ahəḅ dza tanisḷ masla la makəla gesina. ⁴³ Mis anik la ahəḅ aniz akəllal à tsəḅ ala dagay mavay kulo gəl aḅa səla. Ləmana aḅa gesina kà adadəvəḅ à dokwtar à tsəḅ gesina, ama ḅuləm aw. ⁴⁴ Kiya uwaga mis uwaga aguwa la lig aḅa Yesu, ḅgaha adəḅani makəlbà aḅa gay dzika aḅa lukut aḅa. Katskats makəlay aḅa aniz aḅa atsizlla à ahəḅ. ⁴⁵ Dzàw, Yesu atsizlla à ahəḅ, agòḷa vok: “Uwa à uwana adəḅani gi uwa?” Kəla uwabeyuwi agòḍal: “Gi kà, gi aw!” Piyer agòḍal: “Mənḅa, kasəl kà maham à ahəḅ dza tahamà ka à adi, kakay kagòḍay kà: Uwa adəḅani gi uwi ma?” ⁴⁶ Yesu agòḍ: “Dza la ahəḅ adəḅani gi, kà uwana gətəp à ndzəḍa asà à uda la vok gulo la abà.” ⁴⁷ Kiya uwaga mis anəḅəḅ kà, aslāla vok kà mahad vok à ahəḅ aw, asà à waḅ la masukulay kosi kakosḷ à huma aḅa Yesu, ḅgaha atsehùr à makəla asik aḅa, apəḅal godega aḅa uwana adəḅani gay lukut aḅa. La huma aḅa azladza la kirim yewḍi awùr ala. ⁴⁸ Yesu agòḍal: “Dugu gulo, madiḅal gəl à vok aḅak awùr ka ala, ḍà aḅak la lapiya!”

⁴⁹ La mok uwana Yesu à lig la mabəḍma la abà dadəḅ, dza anik asà à waḅ la mtəga aḅa mənḅa aḅa gəy madəv kuḍa à Zəzagəla, la magòḍay: “Kà mana katəḅəb mənḅa aya ma? Dugu aḅak adamətsay, tsewwa.” ⁵⁰ Mok uwana Yesu atsənà gay uwaga kà, agòḍ à Yayrus: “Ləv aval à ka à gay aw. Diḅal gəl à vok pəra, ḅgaha adəḅelay!” ⁵¹ Mok uwana tabəz à mtəga, Yesu avà tetəvi à dza amiyaka tekula kà mad à gəy aw, say Piyer, Yuhana, Yakuba, ḅgaha baba la iyà aḅa bəzi pəra. ⁵² Tekedika azladza gesina tatuway la matsàḅ hulolo, kà uwana bəzi adamətsay. Ama Yesu agòḍ à atà: “Katawaw aw, kà uwana bəzi la adi atəḍ à madzəhal à abà pəra”, agòḍ à atà. ⁵³ “Uwàà...”, takəḍasḷal kà uwana tasəḷ kà bəzi kà adamətsay. ⁵⁴ Ama masla à Yesu akəs bəzi la ahàḷ la mazzalal: “Bəzi, sà à afik, tsizlla ala!” ⁵⁵ Kiya uwaga bəzi awùlla à ləv, ḅgaha asà à afik. Yesu agòḍ à atà: “Vàwwal tatak may, azuw!” ⁵⁶ Gəl akəḍ azlababa aḅa à vok, ləv avàḷahà atà à gay. Ama Yesu afahà à atà akur à lig la magòḍ à atà: “Dza apəḅ tatak uwana apakà vok à azladza anik aw.”

9

*Yesu asləl azlaməna matapla à slaka aḅa kulo gəl aḅa səla
(Mata 10.5-15; Mark 6.7-13)*

¹ Yesu ahamà gay azlaməna matapla la slaka aḅa à vok gesina, avà à atà ndzəḍa la maslay kà makudəkahay azlamasəḍok mawisiga gesina, ḅgaha kà mawar azlaməna ḍuvats ala. ² La lig la ahəḅ, asləl atà kà maz gay aḅa makoray Zəzagəla, ḅgaha kà mawar azlaməna ḍuvats ala, ³ agòḍ à atà: “Zəḅàw tatak à ahàḷ aḅa maday aw. Adəgay azəva,

adàgay kiwa, adàgay kaf, adàgay sili, adàgay lukut bay, katsəpawwanj à vok aw! ⁴ Kəla huɖ gày uwana azladza takəs akul la kay la ahəl səla kà, dzàw à ahəj la abatà, tsəràh à uwana kadàtsizlawla, kadàdaw ankul la abatà. ⁵ Ngaha kəla slaka uwana tadəkəs akul la abà aw kà, sàw à uda la huɖ gày anjatà. Bamərika burburu anja kutso anja gudəj anjatà, uwana agəd akul à asik bay kà, kaɖəɖfaw à atà à adi, uwaga kà agay bokuba tatak mapəh à atà à vok à abà gà kà anjatà.” ⁶ Azlaməna matapla tatsizlla ala, tahàd kà maz gay matsidayga anja makoray Zəzagəla la azlahuɖ gudəj gesina, ngaha tawàràhà azlaməna ɖuvats ala gesina.

Madzugway anja Herod lakəl anja Yesu

(Mata 14.1-12; Mark 6.14-29)

⁷ Kiya uwaga à uwana Herod, sufəl anja gudəj uwatà, atsənà uwana tapəhay kà, gəl akàɖal à vok, kà uwana azladza anik tagoɖay kà: “Yuhana masla maɖàh batem adawul à uda la mamətsay.” ⁸ Azlaanik tagoɖ kà: “Eliya, la uwana adazlanjalay.” Ngaha azlaanik tagoɖ kà: “Uwaga kà, tekula la tataka azlaməna mapəh à atà gay à ahəl la abà uwarà, adazlanjalay.” ⁹ Ama Herod agòɖ: “Tsa gi la uwana ‘Nàtsàw gəl anja Yuhana!’ gəgoɖ, ma uwaga zlà ma uwi? Uwa à dza uwaga tapəh azlatatak anjuvaw lakəl anja zlà à ama uwa?” Kà uwaga à uwana ayàh manəj Yesu.

Yesu avà tatak may à azladza dəbow zlo

(Mata 14.13-21; Mark 6.30-44; Yuhana 6.1-14)

¹⁰ Uwana azlaməna matapla tawul à wanj tapəh à Yesu dèwdew tatak uwana taɖàhəj gesina. Uwana adatsən uwaga kà, asəlla atà à uda la abatà, adəla atà à fəta à awtày kokuda gəl anjatà la huma anja huɖ gudəj, uwana sləm anja Betsayda. ¹¹ Ama uwana maham à ahəj dza adatsən uwaga kà, tanəfà masla, Yesu akəs atà la lela, ngaha apəh à atà gay anja makoray Zəzagəla, la mawar azlauwana ala, asà à atà mawarla.

¹² Mok uwana vəd adasa à wanj, azlaməna matapla tahàd à slaka anja, tagoɖal: “Dàw ankul,” gòɖ à maham à ahəj dza, kà atà anja mad à azlagudəj uwana à abà takəs anu gay à adi, kà atà anja maɖəz tatak may la azlaslaka mahan à ahəj, kà uwana la abatà kà fəta.” ¹³ Ama Yesu agòɖ à atà: “Akul, vāv à atà tatak may, tazuw!” Atà tagoɖ à Yesu: “Kaf gay bərsəw zlo, la bəza kilfi səla pəra, aga anu la ahəl. Asa à ka məday kà masukw tatak may kà anja maham à ahəj dza uwanay gesina la gəl gami kəla ay?” ¹⁴ Kà uwana la abatà kà matugway anjatà kà aslay dza dəbow zlo. Yesu agòɖ à azlaməna matapla la slaka anja: “Dzàhàw atà madzay la dzibokw dzibokw, dzik zlo dzik zlo gesina anjatà!” ¹⁵ Azlaməna matapla takəs, ngaha tadzàhà atà madzay gesina anjatà. ¹⁶ Ngaha Yesu ahəl kaf gay bərsəw zlo la kilfi səla uwatà, anəjə à zagəla, “Kikay,” agòɖ à Zəzagəla. Atsakà kaf ala, avà à azlaməna matapla la slaka anja, ngaha azlaməna matapla uwaga tavàh à maham à ahəj dza uwatà bay. ¹⁷ Kiya uwaga kəla uwabeyuwi azùw kəla anja may anja. Azlaməna matapla tahamà gay à matam à atà à ahəl gà à vok, takosà kulo gəl anja səla à uwana atəm à atà à ahəl la kaf gay bərsəw zlo la kilfi səla uwaga la abà.

Piyer apəhla ala kà Yesu kà Kristu

(Mata 16.13-19; Mark 8.27-29)

¹⁸ Vuɖ tekula Yesu adəv kuɖa kokuda gəl anja. Azlaməna matapla tasà à wanj à slaka anja. Yesu anəv à manavay la magoɖ à atà: “Uwa azladza tagoɖ kà gi uwa?” ¹⁹ Tawulàlla tagoɖal: “Azladza anik tagoɖay kà: Kak Yuhana, masla maɖàh batem, azladza anik bay tagoɖ: Kak Eliya, azlaanik aya tagoɖ: Kak tekula la tataka anja azlaməna mapəh à atà gay à ahəl, à uwana tapàhàh gay à azladza uwarà.” ²⁰ Yesu agòɖ à atà: “Iyay zlà, akul ma: Gi uwa kagoɖaw uwa?” Piyer agòɖal: “Kak la uwana Kristu anja Zəzagəla.”

Yesu apəh gay mamətsay anja à ahəj

la mawul à uda anja la mamətsay

(Mata 16.20-28; Mark 8.30-9.1)

²¹ Yesu afahà à atà akur à lig kayakay, kà atà anja mapəh tatak uwaga à dza aw. ²² Ngaha azàlən à gəl, agòɖ aya: “Say Kona anja dza as ngərpə mənɔɔ. Azlamasiga, la azlamadzahaga anja azlaməna mav tatak à Zəzagəla, ngaha la azlaməna matapla mapəhay à azladza tadəkəweska masla, tadəkəɖ masla bay, ama la mahənay maməkər adawul à uda la mamətsay.” ²³ Ngaha agòɖ à azladza gesina: “Banja dza asal manəf gi kà, asak maf sləm à gəl anja, ngaha azəb ahəf mamətsay anja koksikoksi, ngaha anəfa gi. ²⁴ Dza uwana asal matəf gəl anja, adəziŋ ala, ama dza uwana az gəl anja ala kà gi, adàbəl gəl anja. ²⁵ Mana akəs vok à dza, uwana akor gudəj à vok gesina, ngaha masla adəz gəl anja ala la makəɖ gəl à vok anja ma? ²⁶ Banja ziruwi az dza kà gi, ngaha kà

gay gulo, kità kà, Kona anja dza kà, ziruwi adàkəsay kà masla suwan, la mok uwana adàsa à ahəŋ la mazləbay anja, ŋgaha la mazləbay anja Baba Zəzagəla, ŋgaha la anja azlamalika anja tsikaslaga la abà. ²⁷ Hačəy, gəpəh à akul la dziriga: Azladza anik la tataka anjul la abà la abanay kà, tadəmətsay dən aw, say baŋa tanəŋ makoray anja Zəzagəla dən.”

Mabəŋla vok anja Yesu

(Mata 17.1-8; Mark 9.2-8)

²⁸ La lig mavakay mtəgis la ahəŋ, à uwana apəh gay uwaga, Yesu ahəl Piye, Yuhana, ŋgaha Yakuba, à tsəh, adàla atà à gudəŋ à afik, kà madəv kuča la abata kokuča gel anjata. ²⁹ La mok uwana tadəv kuča, huč adi anja agəlla vok, lukut anja awutsəday təlla. ³⁰ Katskats aganay azladza səla la slaka anja, tavəts gay, uwatà kà Musa atà la Eliya, ³¹ uwana tapəhla vok ala la mazləbay anja zagəla la abà. Tapəhà gay lakəl anja sləray anja uwana adəfehəŋ, la mamətsay à Urusalima anja. ³² Piye la azlamanalay anja uwaga, tatəf à madzəhal à abà. Ama kà uwana tatsəŋla, tanəŋà mazləbay anja, ŋgaha la azladza səla uwana tatsizilla à ahəŋ la masla. ³³ Mok uwana azladza səla uwaga tadiy anjata, tasək à Yesu à ahəŋ, Piye agəfal: “Məŋga, delga zlə bə à uwana anu la abanay zla. Məfəh safsaf makər à abanay, tekula à anjak, tekula anja Musa, ŋgaha tekula anja Eliya.” Kà uwana masla asəl tatak uwana apəhay aw ³⁴ La mok uwana Piye abadmə, habaga akəl à atà mələs à adi, tabadamma. Ləv avəl à azlaməna matapla uwaga à gay, kà uwana habaga atsakà à atà à ama la makəl à atà mələs à adi. ³⁵ ŋgaha kuda atsənà à uda la habaga uwatà la abà: “Masla uwanay, la uwana Kona gulo uwana gi gəkəsəni. Tsəbawwal sləm.” ³⁶ Mok uwana kuda uwaga atsən kà, tanəŋəŋ kà Yesu kokuča gəl anja pəra. Azlaməna matapla la slaka anja tadzà à ahəŋ titi. ŋgaha babay tapəh à dza tatak uwana tanəŋəŋ la mavakay uwatà aw.

Yesu awur bəzi uwana ala la masasəfok mawisiga

(Mata 17.14-18; Mark 9.14-27)

³⁷ La bebəŋ gə, uwana tatsà à ahəŋ la gudəŋ la afik, maham à ahəŋ dza anjuvaw tasà à waŋ kà magagamay la Yesu. ³⁸ La maham à ahəŋ dza uwatà la abà kà, dza anik la ahəŋ awiyà la magəday: “Məŋga, vok ahamà ka, kà bəzi gulo tekula gə uwanay tsi, kà uwana masla la fuvats. ³⁹ Kà uwana masasəfok mawisiga akasay, amallal gəl à ahəŋ, agədzal à ahəŋ la ndzəfa, huzləv asahal à waŋ la gay la awtəy, atəwəb à ahəŋ kà məŋga, məŋga, asək à ahəl kà wiy aw. ⁴⁰ Gədəv kuča à azlaməna matapla la slaka anjak kà makudəkal masasəfok mawisiga uwaga lakəl ala, ama taslala vok aw.” ⁴¹ Uwana Yesu atsənà gay uwaga, agəf à atà: “Kayyà, akul azladza mawisiga, kokuča madinəl gəl à vok, dagay mbà à uwana mədadza à ahəŋ anina ma? Dagay mbà gədəbasahakulanj ma?” Yesu agəfal: “Səgəla kona anjak à waŋ à abanay!” ⁴² Mok uwana bəzi azà vok à slaka anja, masasəfok aməllal gəl à ahəŋ, agədzəlla bəzi la ndzəfa. Ama Yesu asləh mələ à masasəfok mawisiga uwatà à gəl la ndzəfa, ŋgaha awurà bəzi ala, avà à baba anja. ⁴³ ŋgaha gesina anjata la abata, ləv avəl atà à gay, kà məŋga anja ndzəfa anja Zəzagəla la mazləbay ŋgaha la maslay anja.

Yesu apəhay gay mamətsay la mawul à uda anja aya

(Mata 17.22-23; Mark 9.30-32)

Ama Yesu atapà azlaməna matapla la slaka anja, agəf à atà kà: ⁴⁴ “Fəw gay uwanay à sləm à abà lela! Kona anja dza kà tadəvəy à ahəl anja azladza.” ⁴⁵ Ama tatsənà gay uwatà aw, ahəfə godega anja gay uwatà à ahəŋ, kà atà anja masəlay aw. ŋgaha atà kà, guba akəs atà kà manav godega anja babay.

Uwa à məŋga gə, uwa?

(Mata 18.1-5; Mark 9.33-37)

⁴⁶ Kiya uwaga azlaməna matapla tadzəkà mabay vok gay la tetəvi la ama, kà masəl dza uwana məŋga gə la tataka anjata la abà. ⁴⁷ Yesu asəl madzugway anjata uwana tadzugway gesina la ləv anjata la tsəh, masla akəs bəzi ŋvuga, atsizllatəŋ à huma à gay, ⁴⁸ agəf à atà: “Dza uwana akəs bəzi ŋvuga uwanay kà, kà uwana awoya gi kà, masla babay kà akəs gi, ŋgaha dza uwana akəs gi, akəs dza uwana asləl gi à waŋ babay. Dza uwana bəziga la tataka anjul la abà kà, masla la uwana məŋga gə.”

Dza uwana masla məzam gami aw kà, masla kà slawda gami

(Mark 9.38-40)

⁴⁹ Yuhana adzəkà mabadma, agəfal: “Məŋga, mənəŋà dza anik uwana akudəkəh azlamasəfok mawisiga la sləm anjak, ŋgaha mənərala gay kà uwana anina aw.”

⁵⁰ Yesu agòd à atà: “Awan, kà mana kavèràwla gay ma, kà uwana dza uwana masla mèzam ankul aw kà, masla kà slawda ankul!”

Gudəy anik la kutso Samariya akweska Yesu

⁵¹ Mok uwana kaslà mad à zagèla aya Yesu adagay nekwa kà, akès tetèvi kà mad à Urusalima. ⁵² Yesu aslèl azlamèna maslèlay la huma dadàñ, tahàd, tadà à gudəy, uwana la Samariya la abà kà madahalla azlatatak à ahəy gesina. ⁵³ Ngaha azlamèna madz à ahəy la gudəy uwatà takəs aw, kà uwana agà la tetèvi la ama, kà mad à Urusalima. ⁵⁴ Kiya uwaga à uwana azlamèna matapla Yuhana atà la Yakuba tatsənəy uwaga kà, tagòd: “Sufèl, asa à ka kà mənəv akàl atsa à ahəy la zagèla kà mababəh atà à gay ay?”[✠] ⁵⁵ Ama Yesu agòlla vok, anəyà atà à adi, ngaha aslèhà à atà vok. ⁵⁶ Ngaha atà tahàd à gudəy anik à abà.

*Azlawuana tayàh manəf Yesu Kristu
(Mata 8.19-22)*

⁵⁷ Mok uwana tatsizlla ala, dza anik agòd à Yesu: “Yesu, kèla slaka uwana kadàday kà gèdànf ka.” ⁵⁸ Ngaha Yesu agòdàl: “Azlamayaka kà: afək anjətà la ahəy, azladiyan kà: gày anjətà la ahəy, ama Kona aya dza kà bə, slaka mahən gəl à ahəy anja la ahəy kà maduw ləw aw.” ⁵⁹ Kiya uwaga Yesu agòd à anik aya: “Nəfà gi!” Ama masla agòdàl: “Məngga, vā à gi tetèvi, kà gi aya mal baba gulo dadàñ.” ⁶⁰ Ama Yesu agòdàl: “Sàk azlamazimnekiđ talàh vok anjətà, ama kak kà, hàd, kazà gay aya makoray Zəzagèla.” ⁶¹ Dza anik agòdàl aya: “Sufèl, gi kà gənəf ka nəma, ama vā à gi tetèvi kà maday, ‘Gi kà maday’, gèdàgòd à huđ gày gulo dadàñ.”[✠] ⁶² Yesu agòd à atà: “Kèla dza uwana adafa ahəl anja à sèđuk sla à lig, ngaha anəy à lig kà, masla kà, akəsa vok aya kà aya makoray Zəzagèla aw.”

*Sləray aya azlaməna asik dzik mədəf gəl anja sèla
uwana Yesu aslèl atà*

10

¹ La lig aya uwaga la ahəy, Sufèl atsatsəmàni azladza anik dzik mədəf gəl anja sèla, ngaha aslèlatàla sèla sèla la huma anja, à azlagudəy uwana à abà, à uwana masla la gəl anja asàl madàđàh à abà. ² Kiya uwaga Yesu agòd à atà: “Sləray matsəd tatak la ahəy anjuvaw, ama azlaməna sləray kà dən aw. Kità kà, dèwəw kudà à dza ana makor tatak, kà masla aya maslèl azlaməna matsəd tatak à wan dən. ³ Dàw, aganay gèslèl akul bokuba azlatuwan à tataka azlakèda fəta à abà. ⁴ Kazəđaw sili à ahəl, amiyaka kiwa aya tatak may, la kwimik babay aw. Katsizllaw à ahəy la tetèvi la ama kà madàh ‘Ayyi’ à dza aw. ⁵ Kèla gày, uwana kadaw à gày kagòđaw dadàñ teraṅa kà: ‘Lapiya agay la kay uwanay.’ ⁶ Baṅa masla lapiya la ahəy la kay uwatà, ayyi aya lapiya ankul adàdza à ahəy lakəl anja, tsa baṅa kità aw kà, ayyi aya lapiya ankul anəfa akul. ⁷ Dzàw à ahəy la huđ gày aya lapiya, zùwàw, sàw uwana taf à akul à huma à gay gesina, kà uwana masla sləray kà azlayla masik anja. Ama katsəserahaw à gày à gày aw. ⁸ Baṅa kadàdaw à huđ gudəy anik à abà, ngaha takəs akul la ahəl sèla, zùwàw tatak uwana taf à akul à huma akul à gay. ⁹ Wàràw azlaməna đuvats ala la gudəy uwatà la abà, gòđaw à azlaməna madz à ahəy la abatà kà: ‘Makoray aya Sufèl Zəzagèla kà nekwa la akul.’ ¹⁰ Ama baṅa kadaw à huđ gudəy anik à abà, ngaha takəs akul la ahəl sèla aw kà, sàw à uda à tetèvi à ama, ngaha gòđaw à atà: ¹¹ ‘Aganay mədəf à akul burburu aya gudəy ankul à adi, à uwana agəđ à anu à asik la gudəy ankul la abà. Tekedika sèlāw la lela kà: Makoray Zəzagèla kà adagay nekwa.’ ¹² La dziriga gəpəh à akul kà: La vuf seriya kà njuləm adagay kà aya azlaməna madz à ahəy la gudəy Sodom, kà azlaməna madz à ahəy la gudəy uwanay la abà.”

*Ngərpa lakəl aya azlagudəy uwana takweska Yesu
(Mata 11.20-24)*

¹³ “Ngərpa lakəl anjak à kak Korazən! Ngərpa lakəl anjak à kak Betsayda! Kà uwana agay nadzipo uwana tadahàn la tataka ankul la abà agay kà la gudəy Tir la Sədon kà, nakà, dagay uwarà azlaməna madz à ahəy la abà kà tatsàh kutso akàl à vok, ngaha la madaw abuh à vok, kà mapəhla ala kà, atà tapəh gay la ləw ala. ¹⁴ Kà uwaga à uwana gəgòd à akul kà: La vuf seriya kà, seriya uwana adàbəz azlaməna gudəy Tir, la azlaməna gudəy Sədon kà, njuləm kà anjətà, à kà aya gudəy ankul. ¹⁵ Ngaha kak, Kaper-nahum, kadzugw kà: ‘Gədazigənay tsəràh à zagèla’, kagòđ takay? Awan, tadàdukw kà à vədàh à gày akàl à abà.” ¹⁶ Kiya uwaga Yesu agòd à azlaməna matapla la slaka anja:

“Dza uwana atsəb à akul sləm, atsəb à gi sləm babay, dza uwana akweska akul kà, akweska gi babay, ngaha akweska masla masləl gi à wanj babay aya.”

Mawul à wan aña azlaməna asik dzik mədʻəf gəl aňha səla

¹⁷ Kiya uwaga azlaməna asik uwaga tawul à wanj, la marabay tseksatsek tagodf: “Məngga gami, amiyaka azlamasasədok mawisiga babay kà takəs anu gay la ahəl ala, à mok uwana mədapəh à atà gay aňak!” ¹⁸ “Haday”, Yesu agodf à atà: “Gənəhə seteni atəd à ahəh la zagəla bokuba mawutsəday aña habaga. ¹⁹ Tsənəwwəh, aganay gədavà à akul maslay kà akul aña mahabəh azlabebi ala, la azlaaliz, ngaha babay kà akul aña mahabəh ndzəda aña masla məzam ala gesina. Ngaha tatak mawisiga la ahəh adədəbani à akul aw.” ²⁰ Ama kəla kà, karabaw kà uwana azlamasasədok mawisiga takəs gay aňkul aw, ama kà, rəbaw kà, kà uwana sləm aňkul matsəterayga la wakità aña sifa la abà, la zagəla la afik!”

Yesu arab

(Mata 11.25-27; 13.16-17)

²¹ La mok uwatà, Masasədok Zəzagəla ahənà Yesu ala la marabay, agodf: “Iyay, Baba Sufəl aña zagəla ngaha aña vədah, kikay gəgodf à ka, kà uwana kafətlà à azlabəzaga la ama ala tatak nasiriga uwana kahadəh à azlaməna masəl tatak uwana à adi: ‘Mədawur gəl’, tagodf. Iyay Baba gəzləb ka kà uwaga.”

²² “Baba gulo abək à gi tatak gesina. Dza la ahəh asəl Kona aw, say Baba pəra asəl gi, dza la ahəh asəl Baba aw, say gi Kona aňha pəra, ngaha la azlauwana, Kona apəhatàla masla pəra.”

²³ Ngaha Yesu agəla à huma à azlaməna matapla la slaka aňha à gay, agodf à atà, à atà kokudə gəl aňatà pəra: “Marabay kà aňkul, kà uwana yewdi ankul tanəh à tatak dzəba aňha səla aw!” ²⁴ La dziriga gəpəh à akul, azlaməna mapəh à atà gay à ahəl aña mapəh à azladza, la azlasufəl tayəh kà manəh uwaga kanəhəwwəh lagwa, ama tanəhəh aw. Ngaha kà matsənəh uwana katsənəwwəh lagwa, ama tatsənəh aw.”

Gay la gay la abà aña zil Samariya

²⁵ Masla mapəhla wakità mapəhay ala, asà à afik. Asəl matap ləv aña Yesu, kà məbəzal à tsəh la gay la abà, agodf: “Məngga, mana à uwana, gədəhəh kà gi aña məbəz sifa adəv à gay aw ma?” ²⁶ Kiya uwaga Yesu agodf: “Mana tatsətsər à wakità mapəhay à abà ma, aña kadzəhəy ma?” ²⁷ Masla awulla à uda, agodf: “Wəyà Sufəl Zəzagəla aňak, la ləv aňak gesina, la ndzəda aňak gesina, la hanəkəli aňak gesina, ngaha la sifa aňak gesina, ngaha wəyà masla magay aňak, bokuba gəl aňak uwana kawoyəh.” ²⁸ Kiya uwaga Yesu agodf: “Delga kawulla à uda, Dahəh kiya uwaga zlə, kadəbəz sifa uwana adəv à gay aw.”

²⁹ Ama masla asəl mag gəl aña dziriga, agodf à Yesu: “Iyay zlə, uwa à masla magay gulo uwa?” ³⁰ Yesu agodf: “Iyay tsənəh: Dza anik atsi zilla ala la Urusalima kà mad à Yeriko. La tetəvi la ama, azlaməna nabəra tasà à wanj, tazlawəh, tazləb masla, tazūw, ngaha tasəkəl à ahəh la ləv la ləv pəra. ³¹ La lig la ahəh, tsəhay azlaməna mav tatak à Zəzagəla aguwan la tetəvi uwatà. Mok uwana anəhə dza uwaga kà, akəllal vavara à adi, aguwa la dərəv à uda anik. ³² Ngaha aya, zil Levi, (Uwana azlakaha à azlaməna mav tatak à Zəzagəla à sləray uwana la abà, tadahan la gəy Zəzagəla la aku) anəfà tetəvi uwatà bay. Mok uwana adabəz à slaka uwatà, anəhə dza uwaga, akəllal vavara à adi aya suwan, aguwa la dərəv à uda anik. ³³ Agà la ahəh aya babay zil Samariya uwana la maugzahay la abà, anəfà tetəvi uwatà babay suwan, abəzà à slaka aña dza uwatà la ləv la ləv. Mok uwana anəhəh, vok ahaməl kaykay kà masla. ³⁴ Ngaha azà vok à slaka aňha nif, apələhal azlaamik aňha, la madəhəhal aməl à gəl, la iyaw matavəruk uwana azay la abà, bokuba mamlələh uwana azay la amik la abà, ngaha abəkəl azlaamik uwaga, afà masla à tatak aňha uwana à afik, masla aday la afik, ngaha adàla masla à gəy mələk dza à agu, la slaka uwana tadənəhəl à adi lela. ³⁵ La bebəh bəh, mok uwana atsi zilla ala, kà mad aňha, ahəl gursu səla à uda, avà à dza aña gəy mələk la magodf: ‘Fəl sləm lela à dza uwanay, la vudf uwana gədawul à wanj à abanay kà, gi la gəl gulo, gədapəlla ka tatak uwana kadəzih ala kà aňha gesina.’” ³⁶ La lig la ahəh Yesu anavà à dza uwaga gə: “Iyay zlə, la tataka aña azladza makər uwaga la abà, ma uwala à uwana agà bokuba masla magay aña dza uwana azlaməna nabəra tazūw, tazləb ala?” ³⁷ Masla mapəhla mapəhay uwaga ala agodf: “Gi kà, dza uwana vok ahaməl kà masla, gəgodf.” “Delga”, Yesu agodf, “Kak babay, həd, kadəhəh kiya uwaga babay suwan zlə.”

Yesu la mtəga Marta atà la Mariyama

³⁸ Mok uwana atà la tetèvi la ama la azlamèna matapla aṅha, ahàd à gudəṅ anik à abà. Mis anik la ahəṅ la abatà, sləm aṅha Marta, akəs Yesu à mtəga aṅha la ahàl sèla. ³⁹ Deda aṅa mis uwatà la ahəṅ, sləm aṅha Mariyama, adzà madzay la makèla asik aṅa Sufəl, kà matsəb sləm à uwana masla apəhay. ⁴⁰ Bokuba uwana sləray madagəl adakəf gəl à Marta à vok, ṅgaha agòf à Yesu: “Sufəl, uwaga kà aza ka aw, tak à uwana deda gulo adasəgəla sləray à gəl gesina ay? ‘Zlakà deda aṅak’, gòd’al!” ⁴¹ Sufəl awulàlla agòfal: “Marta, Marta, katərəb gəl aṅak la azlatatak aṅuwaw kiga ma, kà mana ma?” ⁴² Ama kèla kà, tatak tekula la uwana akəsə vok! Mariyama kà, akəsàni tatak uwana dzəba aṅha sèla aw gə, uwana dza azəballaṅ ala aya aw tetuwa.”

11

Gay lakəl aṅa madəv kuḍa
(Mata 6.9-13; 7.7-11)

¹ Kiya uwaga vərđi anik, Yesu adəṅ kuḍa la slaka anik. Mok uwana adakəf gəl à madəv kuḍa, tekula la tataka azlamèna matapla la slaka aṅha la abà anàval: “Sufəl, tàpanula madəv kuḍa, bokuba aṅa Yuhana uwana atəpla azlamèna asik aṅha.” ² Yesu agòf à atà: “Baṅa kadəvwaw kuḍa kà, gòd’aw kà: Baba,

Sləm aṅak tsikaslaga agay masəlay gə, la slaka azladza.

ṅgaha makoray aṅak atsa à waṅ.

³ Və à anu tatak may asla à anu kèla mahəṅay.

⁴ Matsan tsakana gami ala,

ṅgaha anu bay la gəl gami aṅa mamatsiṅ à azladza uwana ala, tadəhà à anu mawisiga à vok.

ṅgaha, fà à anu sləm, kà seteni aṅa mapapat anu aw.”

⁵ ṅgaha Yesu agòf à atà: “Baṅa tekula aṅkul ada à mtəga slawda aṅha la tataka vəf agòfal: ‘Slawda gulo, kamkam bə̀k à gi kaf gay bə̀rsew makə̀r tsi, ⁶ kà uwana slawda gulo anik agurū̀h à gi, asà à waṅ la mauguzahay, gəsəl tatak uwana gə̀vəl aw.’ ⁷ Tseṅəw mabaḍma à uda la kay aṅa dza anik uwanay tsi: ‘Sàk à gi titi, gədatsak gamagə̀y à ama kà dagay uwarə̀, ṅgaha anu babay kà mədahan à ahəṅ la azlabə̀za gulo, tsewwa. Gə̀slala vok aṅa mas à afik aṅa mav à ka aya aw.’ ⁸ Njoda à gi kà, masla adəsà à afik kà aṅa mavəl kà, kà slawda aw; ama adəsà à afik kà, kà uwana slawda aṅha ad à huma à gay la mazalay, la mapakla. ⁹ Ama gi kà gə̀gòf à akul kà: Nə̀və̀w ṅgaha kadə̀bə̀zawwal, yə̀hə̀w ṅgaha tadə̀w à akul dèd’ə̀wə̀wə̀n, ṅgaha dza uwana ayahay abə̀zal, ṅgaha dza apə̀zl gamagə̀y à dza uwana azalay, ¹⁰ kà uwana kèla dza uwana anavay: abə̀zal; dza uwana ayahay: abə̀zal; ṅgaha dza apə̀zl gamagə̀y à dza uwana azalahay. ¹¹ Baba ma aṅa uwa la tataka aṅkul la abà, baṅa bə̀zi aṅha anaval kilfi ma avəl bebi takay? ¹² Awma baṅa anaval slaslay ma avəl aliz ay? ¹³ Akul azlamawisiga nə̀ma, ama kasə̀law mav tatak delga à azlabə̀za aṅkul, ṅgaha zlə̀ ma adamə̀raka Baba uwana la zagə̀la la afik takay. A masla uwana avə̀hay Masasə̀dok aṅha à azladza uwana tanaval?”

Mapə̀h mawisiga lakəl aṅa Masasə̀dok tsikaslaga
(Mata 12.22-30; Mark 3.20-27)

¹⁴ Yesu adzəkà makudək masasə̀dok mawisiga à dza anik lakəl ala à uwana adapakəṅ ala kà bada. Mok uwana masasə̀dok mawisiga uwaga adasal à kəl ala, bada adzəkà mabaḍma, ṅgaha lə̀v avəl à maham à ahəṅ dza à gay gesina la abatà. ¹⁵ Ama azladza anik la tataka aṅatà la abà, tagòf: “Belzə̀bul, sufəl aṅa azlamasasə̀dok mawisiga la uwana avəl ndzə̀da kà makudəkə̀h azlamasasə̀dok mawisiga.” ¹⁶ Azladza anik asà à atà malal à afək à ahəṅ, kà uwaga à uwana azladza anik tagòf: “Dahà à anu a ahəṅ nadzipo tsi, kà aṅa mapə̀hanula kà, Zə̀zagə̀la la uwana aslə̀l kà à waṅ.” ¹⁷ Ama Yesu asəl madzugway aṅatà, agòf à atà: “Baṅa azladza gudəṅ tekula tatsək ala, ṅgaha tapa guvəl la tataka aṅatà la abà kà, makoray ana gudəṅ uwatà kà azila, huḍ gə̀y la huḍ gə̀y tagwə̀h vok à gəl. ¹⁸ Tsa baṅa seteni la gəl aṅha adatsakla ma, kakay makoray aṅha ad à huma à gay aya ma? Tsa akul kagòd’aw kà: Gə̀kudəkə̀h azlamasasə̀dok mawisiga kà Belzə̀bul la uwana avə̀ à gi ndzə̀da kagòd’aw ma? ¹⁹ Iyay, akul kadzugwaw kà Belzə̀bul la uwana avə̀ à gi ndzə̀da kà makudəkə̀h azlamasasə̀dok mawisiga, uwaga kagòd’aw. Kità ma, uwa adavə̀ ndzə̀da à azlabə̀za aṅkul, kà makudəkə̀hla uwa? Kà uwaga à uwana tadə̀gah azlamèna seriya aṅkul. ²⁰ Ama tsa baṅa la Masasə̀dok Zə̀zagə̀la la uwana gə̀kudəkə̀h azlamasasə̀dok mawisiga uwanay kà, tsa kətə̀ kà, gòd’aw kà makoray aṅa Zə̀zagə̀la kà adabə̀z akul à vok lakana, gòd’aw zlə̀!”

²¹ “Baṅa dza mabə̀lafaga abək kazlaṅa guvəl aṅha à vok, anə̀ṅla gə̀y aṅha lela, kà uwana akoray gesina kà ahəl adàlla vok aw. ²² Ama baṅa dza uwana aduwa masla la

ndzøda atsa à wan̄ à slaka an̄ha, ngaha akødfaslal, ahølla kazlan̄a guvøl an̄ha uwana ala à uwana afà manøwøn an̄ha à afik gesina. Ngaha ahøl tatak an̄ha, avàh à azladza à uda gesina.”

²³ “Dza uwana anu sèla aw kà, masla kà, masla møzam gulo. Ngaha babay, dza uwana azlak gi, kà mahamla gay à vok aw kà, masla kà, masla madàdasiŋla.”

*Mawul à wan̄ an̄a masasødok mawisiga
(Mata 12.43-45)*

²⁴ “La mok uwana masasødok mawisiga adasa à uda la dza la abà kà, aday auguzahay la azlaslaka deyday gà gesina, ayàh slaka maduw løv. Ama ban̄a abøzal aw kà, agoðay la gøl an̄ha kà: ‘Lagwa kà, gøday, gødawul à slaka gulo uwana à abà, gøsa à uda la abà.’ ²⁵ Ngaha awulay, abøzal à gøl kà maslaðayga lela, madfehøn à ahøn gà dzøba an̄ha sèla aw. ²⁶ La abatà kà, aday, ayahay azlamasasødok mawisiga anik à tsøh møðøf, azlauwana taðuwa masla la dzan̄dzan̄, tatsa à wan̄ atà nna, tadza à ahøn la abatà. Kiya uwaga kà madz à ahøn an̄a dza uwaga agay mawisiga ðaðuwa à gay uwana uwarà.”

Mas à afik la ahàl lela

²⁷ Mok uwana Yesu adapøh gay kiya uwanay kà, mis anik adzøkà maðaðma la tataka maham à ahøn dza la abà: “Lapiya agay la mis uwana azàb ka la huð, ngaha la uwana avàhà à ka awà.” ²⁸ Ama Yesu agøðal kà: “Lapiya agay kaykay kà la azladza, uwana tatsøb sløm à gay Zøzagøla, ngaha taf sløm à uwaga lela.”

*Nadzipo an̄a Yonas
(Mata 12.38-42)*

²⁹ Mok uwana dza adahama gay à vok la slaka an̄ha kà, Yesu agøð à atà: “Azladza an̄a zamana uwanay lakana kà, azlamawisiga, dziriga an̄atà la ahøn aw. Atà tayàh nadzipo, ama nadzipo la ahøn tanøn aw, say an̄a masla mapøhal gay à ahàl Yonas uwatà pøra. ³⁰ Ngaha bokuba uwana Yonas apæk nadzipo kà an̄a azlamønna gudøn Niniv kà, kiya uwaga Kona an̄a dza adàpak nadzipo kà an̄a azladza an̄a zamana an̄a lakana suwan̄. ³¹ La vuð seriya kà, mis suføl gà uwana la gøl la aku, adàgøla à huma azladza an̄a lakana à gay, ngaha adàpuwa à atà gudzi à gøl, kà uwana asà à afik la tsøh la ahøn la makøð gøl à ahøn gudøn à vok, kà matsøb sløm à gay matsihila an̄a Salomon. Aganay à dza uwana aðuwa Salomon la abanay lakana. ³² La vuð seriya azlamønna an̄a gudøn Niniv tadàgøla afað à azladza an̄a lakana à gøl, ngaha tadàpuwa atà gudzi à gøl, à kà uwana azlamønna madz à ahøn la gudøn Niniv tapøh gay la løv ala, la mok uwana tatsønà sayda an̄a Yonas. Ama dza uwana aduwa Yonas kà aganay la abanay zlà.”

*Gay lakøl uðaka
(Mata 5.15; 6.22-23)*

³³ “Dza la ahøn avats fønøs maf à tsøh tasà aw, ama afay kà à slaka masøt fønøs à ahøn, kà mav uðaka à azladza gesina, uwana tad à gày. ³⁴ Yewdi kà uðaka an̄a vok an̄ak: ban̄a yewdi an̄ak kà wurwur kà, vok an̄ak gesina kà uðaka, ama ban̄a yewdi an̄ak la ðuvats kà, vok an̄ak gesina kà la møløs la abà. ³⁵ Kiya uwaga kà, ðahà han̄køli kà uðaka uwana la vok an̄ak kà, kà an̄a magay la møløs la abà aw. ³⁶ Iyay, ban̄a vok an̄ak gesina auðay, kokuða magay la abà an̄a bøzi møløs la slaka anik kà, vok an̄ak gesina kà adàgay uðaka, bokuba fønøs uwana av uðaka la huð gày gesina.”

Yesu adzøka gay

*à azla Farisøya à vok la azlamønna mapàhla mapøhay ala
(Mata 23.1-36; Mark 12.38-40)*

³⁷ La mok uwana Yesu adadøv maðaðma à gay, zil Farisøya anik azàlal kà mazuw tatak may atà sèla la mtøga an̄ha. Yesu adà à gày à dza à tatak may à gøl. ³⁸ Kay, zil Farisøya uwaga akøs gøl la ahàl sèla, kà uwana Yesu apàl ahàl kà mazuw tatak may aw, azùw pøra. ³⁹ Suføl agøðal: “Akul, azla Farisøya kà kapalahaw azlatatak masala iyaw, la azlakøslaf. Ama la huð an̄kul kà, kahønàwla la makøsafø dzøban̄an̄a, ngaha à gøl la adi gesina. ⁴⁰ Akul azlakuson̄u. Dza uwana aðahàn̄ udaga uwaga, ma masla la uwana aðahà huðga à awtày takay? ⁴¹ Njuløm kavàw à azlamønna kuða à tatak uwana la køtsaw an̄kul la abà, la uwana la køslaf an̄kul la abà, ngaha tatak gesina adàgay dzahhà kà an̄kul.”

⁴² “Ngørpa la aku, azla Farisøya! Kà uwana kavàw Zøzagøla makulo an̄a tatak an̄kul, bamøraka la azlatsøhay alàl bøzaga gesina bay, ama kapøsewaw dziriga la masal an̄a Zøzagøla. Tekedika naka uwatà la uwana madfehøn køla, ngaha mapøsew azlatatak anik anik deydayga uwanay gesina.”

⁴³ “Ngörpa la akul, azla Farisöya! Kà uwana asa à akul azlaslaka materaga la azlagay madəw kufa la aku, ngaha aya asa à akul kà azladza tadəhakulla ‘Ayyi’, la huma maham à ahəŋ dza gesina kà mapəhla gəl anjul ala, kà akul azladza mənğa. ⁴⁴ Ngörpa la akul! Akul uwana kapakəhəw kà bokuba azlazəway uwana adakal à ahəŋ tabazl à abə tanəŋla aya aw, kalkal la kutso uwana tauguzahay la afik.”

⁴⁵ “Iyay”, tekula la tataka azlaməna mapəhla mapəhay ala la abə agəfal: “Mənğa, la mapəhay kiya uwaga kà, anu babay kà kagəfaha à anu ma kasəl nəmay?”

⁴⁶ Yesu agəf à atə: “Ngörpa la akul, akul azlaməna mapəhla mapəhay ala! Kà uwana kabəfaw dzəgla à azladza à gəl, tsa tekefik akul la gəl anjul kà, amiyaka la gay gəl ahəl babay kà, kadəbawani aw. ⁴⁷ Ngörpa la akul! Akul uwana kanjaləhaw zəway anja azlaməna mapəh à atə gay à ahəl kà mapəh à azladza, tekefik azlababa anjul la uwana takəfəh atə. ⁴⁸ Kiya uwaga kà, akul azlaməna sayda anjatə lakəl anja sləray anjatə uwana tadəhəŋ. Kà uwana atə la uwana takəfəh azlaməna mapəh à atə gay à ahəl. Ngaha aya, akul kà katərkakaslahaw la manjaləh azlazəway anjatə aya! ⁴⁹ Kiya uwaga à uwana Zəzagəla agəf la matsihila anja kà:

“Gədəsləl atə à awtəy azlaməna mapəh à atə gay à ahəl la azlaməna matapatəla tatak.

Atə tadəkəfəhəy azlaanik anjatə, ngaha babay tadətərgərbəh azlaanik anjatə aya!”
⁵⁰ Gəpəh à akul la dziriga kà, aniz anja azlaməna mapəh à atə gay à ahəl, uwana tasəkəwəh à wəfəh dagay madzəka gudəŋ à vok kà, tadənavay kà la ahəl anja azladza anja lakana. ⁵¹ Dagay aniz anja Abel tsərah à aniz anja Zakari, uwana kakəfəw à tataka azlaslaka makəf tatak à abə la slaka tsikaslaga. Gəpəh à akul la dziriga kà, tadənav aniz anja azladza uwaga kà la ahəl anja azladza anja lakana!”

⁵² “Ngörpa la akul, akul azlaməna mapəhla mapəhay ala! Kà uwana kazəbəw tsəkurum uwana av tetəvi kà masəl tatak, uwala akul la gəl anjul kà, kadaw à gay la abətə aw, ngaha pəra aya kà, kadəfaw gay à azladza anik uwana à ahəŋ, asa à atə mad à gay la abətə.”

⁵³ Mok uwana Yesu adasa à uda la abətə azlaməna mapəhla mapəhay ala la azla Farisöya tanəfə masla la gay, tanəvəhal azlatatak anjuwaw la gay ala. ⁵⁴ Atə tayəh mabəzal à tsəh la azlagay mawisiga la abə, ngaha kà atə anja mapuwəla gudzi à gəl.

12

Madəh hanjəli lakəl anja magolla dza (Mata 10.26-27)

¹ La kaslā uwatā kà, azladza dəbow dəbow tahamə gay à vok, tsərah à uwana azladza tafəh vok asik à gəl kà atə kà atə. Teranə kà, Yesu kà, apəh gay kà à azlaməna matapla la slaka anja dadəŋ, masla agəf à atə: “Nəŋəwla gəl anjul, kà tatak makəslin anja azla Farisöya, uwaga asal magəfay kà: Magolla dza anjatə. ² Tatak mahəfəhəŋ à ahəŋ gə gesina, adəgay mapəhla vok ala gə, ngaha tatak nasiri gə gesina adəgay masəlayga la dazuwaya. ³ Kəla tatak uwana kadəhawwanə la mələs la abə kà, adətsənla la paraka, ngaha tatak uwana kà nənuzawla la gəl la gəl la kay kà, uwaga adəgay bokuba mawiy-laga la gay azəŋ.”

Gay lakəl anja guba (Mata 10.28-31)

⁴ “Gəgəfay kà akul, azlaməna gay ləv gulo, guba akəs akul kà azlauwana takəf sləb vok aw. Kà uwana tatak anik la ahəŋ tadəfəhəŋ à uwana adəwə uwaga aw! ⁵ Ama ağanay gəpəhakulla, dza uwana kahoyaw guba, kà masla: Guba akəs akul kà Zəzagəla, kà uwana mok adakəf akul kà, asla kà maduw vok anjul à akəl uwana à abə, adəmətsila aw kəla, iyay, masla la uwana kahoyaw guba anja pəra.”

⁶ “Tak ma taslala vok anja maduw dəgtsetsek zlo ala, kà anja sili səla aw takay? Iyay, tekefika amiyaka tekula anjatə kà azila la huma Zəzagəla aw. ⁷ Amiyaka anidz takasagəl anjul gesina kà, Zəzagəla asəl, la tekula tekula gesina anja. Guba akəs akul aw, kà uwana kaduwaw azladəgtsetsek gesina la manəŋla akul à adi.”

Maz sayda lakəl anja Yesu la mapuw ala gudzi à gəl (Mata 10.32-33; 12.32; 10.19-20)

⁸ “Hadəy, gəgəf à akul la dziriga: Banə dza agəfay: ‘Gi anja Yesu la paraka’, ‘Anjulo’, Kona anja dza adəgəfay la huma anja azlaməlika anja Zəzagəla lakəl anja bay. ⁹ Ama banə dza apəhay mawisiga lakəl kà anja Kona anja dza, Kona anja dza adəpəh mawisiga lakəl anja suwan, la huma anja azlaməlika anja Zəzagəla.”

¹⁰ “Kæla dza uwana apøh mawisiga lakøl anja Kona anja dza, adàmatsalanj ala, ama kæla dza uwana agodàh à Masasødok Zøzagøla kà, masla adàbøz mamatsila tsakana anja aw!”

¹¹ “Mok uwana tadàbayàh akul à azlagày madøv kufa à agu, banjaw à huma anja azlasuføl, banjaw à huma anja azlagumna kà anja madahàh akul seriya à gøl kà, guba akøs akul à kà tatak uwana kadàpøhaw, kà matøf gøl anjul aw. ¹² Kà uwana la kaslà uwatà kà, uwana kadzugwaw aw kà, Masasødok Zøzagøla adàpøhakulla adàgay la panjaw anjul la awtày.”

Gay la gay la abà anja masla gorobu kusonju gà

¹³ Kiya uwaga dza anik la ahøj, la maham à ahøj dza la abà, agød à Yesu: “Møjga, gød à deda gulo kà: ‘Vàhàw lømana, uwana baba anjul asàk à akul à ahøj’, gødal.”

¹⁴ Yesu awulàlla, agødal: “Zil, uwa à uwana afà à gi à ahøj, kà gi anja magay masla seriya anja mavàhakulla tatak ala la deda anjak uwa?” ¹⁵ Kiya uwaga agød à atà gesina: “Dahàw hanjëli la gøl anjul lakøl anja mawoy lømana, kà uwana sifa anja dza kà la magay la ahøj, amiyaka adàgay masla gorobu møjga gà, aw.” ¹⁶ Kiya uwaga Yesu apøh à atà gay la gay la abà uwanay la magodày:

“Dza anik la ahøj uwana agà la azlaàlak delga delga. ¹⁷ Masla adzugw la gøl anja, ‘Mana gødehøj mi: Tsa uwala slaka asløkà à gi anja matsakàh tatak may gulo à abà aw mi. ¹⁸ Lagwa kà, gøkalàh bøza vøda uwanay à ahøj gesina, ngaha gøjnalàh møjga møjgaga, ngaha gødàtsakah azlatatak gulo à abà gesina. ¹⁹ Ngaha gødagodày à gøl gulo: Kak la tatak anjuvaw, lagwa adàgay kà anja mavay døj; dùw løv anjak, zùw, ngaha sà, ràb anjak, dùw asik à zagøla.’ ²⁰ Ama Suføl Zøzagøla agødal: ‘Kak zil kusonjuga! Zlahaw la vød uwanay lakana kà kamøtsay ma, ngaha ma adàgay ma anja uwa à tatak uwaga kadahanj à ahøj gesina uwa?’ ” ²¹ Kiya uwaga Yesu azlàløj à gel, agød à atà: “Kiya uwaga à uwana dza uwana ahamà lømana anja gøl anja à ahøj kà, masla kà, galepi la huma yewdi anja Zøzagøla aw.”

Maf madzugway à Zøzagøla à afik

(Mata 6.25-34)

²² Kà uwaga à uwana Yesu agød à azlamøna matapla la slaka anja, “Kafawla kà gøl à ahøj kà tatak may uwana kadzadzazawla kà vok aw, bamørika lakøl anja tatak matsokw à abà babay aw. ²³ Sifa ma aduwa tatak may aw takay? Ngaha ma vok aduwa tatak matsokw à abà aw takay? ²⁴ Nørøzàw azlakwakwak tsi: Uwala tasløkay aw, ngaha tatsøday babay aw, vøda anjatà la ahøj, kà anja lebøj aw. Ama Zøzagøla adzadzaz ar atà, akul ma kaduwwawøj azlakolanj uwaga aw takay? ²⁵ Uwa la tataka anjul la abà aslala vok anja maziñ à mavay anja mamøtsay anja à adi amiyaka ñuv la aslasl gøl anja uwa? ²⁶ Ngaha ma, tsa bana azlabøza tatak babay kà, kaslawwalla vok aw ma, kà mana kafawla kà gøl à ahøj lakøl anja azlatatak anik anik deyday ma? ²⁷ Nørøzàw bokuba uwana azlamawuratatay anja guf tazigønay tsi: Tadàh sløray aw, ngaha tavavød slewzi kà anja lukut babay aw. Ama la dziriga gøgod à akul kà: Amiyaka bà Salomon uwana akør lømana anja anjuvaw babay kà, afbøz à lukut bokuba anja azlamawuratatay uwaga tatsokw à abà aw. ²⁸ Iyay zlà, Zøzagøla adàw lukut à azlakøsaf à vok uwana à vok la føta bay lakana, tekedika atà kà lakana banjaw lebøj kà tayakats à akàl à gay: Ngaha ma adàgay anu uwanay babay takay? Kay akul la madinjal gøl à vok matsihulaga haday. ²⁹ Kiya uwaga kà, kafawla kà gøl à ahøj, la uwana kadàzuwwaw, la uwana kadàsaw aw, ngaha kagahaw azlaadi aw. ³⁰ Kà uwana uwaga kà, say azladza uwana tasøl Zøzagøla aw, la uwana tayàh tatak uwaga koksikoksi. Ndzer Baba anjul uwana la zagøla la afik kà asøl tatak uwana kanawkufa anja gesina. ³¹ Fawla kà gøl à ahøj dadøj teranja kà, kà makoray Zøzagøla, la lig la ahøj kà masla adàkøs akul à ahàl ala dèwdèw tatak uwana kanavawwal.”

Lømana la zagøla

(Mata 6.19-21)

³² “Maham à ahøj bøziga, guba akøs akul aw, kà uwana asa à Baba kà masla anja mav à akul makoray anja. ³³ Dàwàw azlatatak anjul ala, vèhàw sili gà à azlamøna kufa à uda. Pàkàw vok ankul ala kà kiwa sili uwana sili adøv à lag la aku aw, ngaha lømana uwaga awisila la zagøla aw aw. Kà uwana la abatà kà, masla à gøl ad à abatà aw, marzaw la fafay bay awisøj ala aw. ³⁴ Kà uwana slaka uwana lømana anjak la abatà kà, la abatà bay kà, løv anjak adz à ahøj babay suwanj!”

Azlamagamza uwana tadz à ahøj la adi

³⁵ “Gàw madàh vok à ahøj gà, wàdàhàw parapara anjul à tsøh lela, ngaha bay fønøs anjul agàh mavats à ahøj gà. ³⁶ Gàw bokuba azlamagamza uwana takud møjga anjatà

ala, à banja ahàd à mazəb mis, kà atà mapəzlal gamagày la mok uwana mazalahay anha adàsa à wanj. ³⁷ Marabay à gay kà la azlamagamza uwana mənġa anjatà atsa à wanj, abəz atà à gəl la adi. La dziriga gəpəh à akul kà, mənġa anjatà adəwad parapara anha à tsəh, nġaha adədzàh atà madzay, kà mavàh à atà tatak may la gəl anha. ³⁸ Banja mənġa anjatà asa à wanj la tataka vəd, adəduw uwaga babay, banja abəz atà à gel la adi kà, marabay agay la atà! ³⁹ Tsəbàw sləm à gay uwanay lela: Agaynà zil gày asəl kaslā uwana masla à gəl atsa à wanj kà, mazləl gày anha la vəd kà, naka masla kà naka adzəhal aw huyip à ahən à ahən la adi, kà mad à gay anha, anja masla à gəl aw. ⁴⁰ Akul babay kà, gəw nekwa, kà uwana la mas à wanj anja Kona anja dza babay kà adəgay kà bə kiya uwaga la gurùh!”

*Azlamagamza səla
(Mata 24.45-51)*

⁴¹ Kiya uwaga Piyer agəfal: “Sufəl kà anjami la uwana kapəhay gay la gay la abà uwaga, awma kà anja azladza gesina takay?” ⁴² Kiya uwaga Sufəl agəfal: “Kità ma, uwa à masla sləray dziriga, nġaha hanġaliga uwa? Uwaga kà dza uwana mənġa anha afà à gəl anja azlamagamza anik, kà masla anja mavàh à atà tatak may la kaslā uwana asa à atà. ⁴³ Marabay agay la magamza uwana mənġa anha awul à wanj, abəzal à gəl la sləray anha la abà. ⁴⁴ Haday, gəpəh à akul la dziriga: Ndzer, zil gày adavà ləmana anha à ahəl anha gesina. ⁴⁵ Ama banja magamza uwaga agəfay la ləv anha la tsəh: ‘Mənġa gulo kà adəsafay’, nġaha adzəka makəsafər la mazlabàh azlamagamza anik anik gesina, nġaha aday à mazuway à abà, à masay à abà, apaka masla guzu. ⁴⁶ Kiya uwaga kà, mənġa anha adàsa à wanj la gurùh, la mavakay uwana adzugw mas à wanj anja mənġa anha aw. Kiya uwaga kà, mənġa anha adəsəl nġərpa, kà uwana akudən ala aw, masla kà tadəfay kà à tataka anja azlaməna tsakana à abà.”

⁴⁷ “Tekedika magamza uwana asəl tatak uwana asa à mənġa anha, akuda mənġa anha ala aw kà, adəhən kà bokuba uwana asa à gəl anha pəra, mazlabay adəsəl mənġa. ⁴⁸ Ama kà anja magamza uwana asəl madəh uwana asa à mənġa anha aw, nġaha adəh sləray uwana agay tazlabla kà, tadəzlabay kà nuy pəra, kà uwana asəl aw. Dza uwana tavəl tatak mənġa kà, la slaka anha kà, tanaval kà mənġa suwanj; nġaha aya dza uwana tafal à ahəl mənġa tadənaval mənġa suwanj.”

*Yesu atsala mavàhla à wanj
(Mata 10.34-36)*

⁴⁹ Yesu agəf: “Gi kà, gəsà à wanj kà, kà masəlla akəl à wanj à gudən à vok, nġaha asa à gi kà agay mavats vok gə. ⁵⁰ Batem anik la ahən tadəfəhġəh, nənəw madz à ahən gulo la mazaw la gəl la uwaga la abà tsi, gətərəbay tsərəh adəpakà vok. ⁵¹ Akul ma, kagədaw ma, gəsəlla lapiya à kutso uwanay à abà, kagədaw takay? Awanj, gəgəf à akul, ama mavàhla la uwana gəsəlla à wanj. ⁵² Dahəw hanġəli, dagay lakana, huf gày anja dza uwana atà zlo la kay, tadətsak kəla azladza makər tadəhamay à azladza səla à gəl, nġaha səla adəham à makər à gəl. ⁵³ Baba adəgola afad à bəzi anha à gəl, iyà babay adəgola afad à dugu anha à gəl, dugu bay adəgola afad à iyà à gəl. Dzedzi misga adəgola afad à kuhuwà anha à gəl, nġaha kuhuwà anha babay adəgola afad à dzedzi anha misga à gəl.”*

*Matsənəj godega anja mələ
(Mata 16.2-3)*

⁵⁴ Kiya uwaga Yesu agəf à maham à ahən dza aya: “La mok uwana kanənjaw habaga atsa à afik la matəf à ahən afats, katskats kagədaw kà: ‘Iyaw adəsəway’, uwaga apakàhà vok, haday. ⁵⁵ Banja kanənjaw afad adəfay la gəl la aku, ‘Anjuf adəgay la ahən’, kagədaw, uwaga bay kà apakàhà vok, haday. ⁵⁶ Kay, akul kà akul azlaməna magolla dza, kasəlaw mavàh mələ uwana ala la vədəh, nġaha la uwana la zagəla, nġaha ma kà mana katsənaw godega anja mələ uwanay lakana aw zlə ma?”

*Matsən vok gay la masla məzam
(Mata 5.25-26)*

⁵⁷ “Kà mana akul la gel anġul kadəhaw vok seriya à vok anġul à gəl kà madz à ahən la dziriga la abà aw ma? ⁵⁸ Banja dza apuwà à ka gudzi à gəl kà, la mok uwana akul à tetəvi la ama, kadaw à huma seriya akul səla kà, wəd vok à uda kà akul anja matsən vok gay səla, nġaha kà masla anja maf ka à ahəl anja masla seriya aw, nġaha bay kà masla seriya anja maf ka à ahəl anja azlaslodzi aw, nġaha kà azlaslodzi babay anja maduw ka à danaj aw. ⁵⁹ La dziriga gəpəh à ka kà, kadàsa à uda la abatà aw, say banja katsatsakwàh azlamatəm à ahən sili anġak à wanj gesina dadən!”

13

Mapəh gay la ləv ala banjaw mamətsay

¹ La kaslā uwatā, azladza anik tasā à wanj kà mapəh à Yesu gay lakəl anja azla Galili, uwana Pilatus akədf atā, à mok uwana tahād kà maf tatak anjatā à slaka mav tatak à Zəzagəla. ² Yesu agədf à atā: “Haday, ma kadzugwaw ma azla Galili uwaga ma: ‘Tadahanj mawisiga uwana aduwa anja azla Galili anik uwanay,’ kagədfaw takay?” ³ Awanj, gəgədf à akul gesina, banja kapəhaw gay la ləv ala aw kà, akul gesina kadəzahawla bokuba anjatā babay. ⁴ Iyay zlə, azladza kulo gəl anja mtəgis uwana mən gəy la gudənj Silowe atədf à gəl, adzaməhà atā ala ma, akul ma, la madzugway anjul ma, azlaməna tsakana taduwə azlaməna gudənj Urusalima anik kagədfaw takay? ⁵ Kay! Awanj, gəgədf à akul, ama banja kapəhaw gay la ləv ala aw kà, akul gesina kadəmatasaw à gay bokuba atā babay.”

Gay la gay la abà anja gudəv uwana av mayyay aw

⁶ Kiya uwaga Yesu apəh à atā gay la gay la abà uwanay la magədfay: “Dza anik la ahən, gudəv la guf matavəruk anja la abà. Masla atsizilla ala, ahəd kà mayəh mayyay la vok anja, ama abəzal aw. ⁷ Masla à dza anja guf, agədf à masla mapəs guf anja: ‘Kay, nənənj tsi, dagay mavay makər gəsəhà wanj kà mayəh mayyay la vok anja, ama gəbəzal aw, adadza à slaka à gəl deyday, kiya kà, gəkəsay aya aw, nàts à ahən.’” ⁸ Ama masla mapəs guf agədfal: ‘Mənğa gulo, kamkam, səkal la viya uwana aya, gədala à tsəh anja gədətəkal vərəw à tsəh dadən. ⁹ Banja gədəfəhən kiya uwaga kà, zlahaw kà adəyyay, nərəz tsərəh à kà vuf anik, banja aya aw kà: Kadənats à ahən!’”

Yesu awur mis makələh à vədah gə ala, la vuf maduw ləv

¹⁰ La vuf maduw ləv, vərđi anik, Yesu adzəkà matapla tatak à azladza la gəy madəv kuđa la aku. ¹¹ La abatā aga la ahən mis masla đuvatsga, uwana agə makələh à vədah gə dagay mavay kulo gəl anja mtəgis. Masasədfok mawisiga adakalahal gay à vok, aslālla à vok anja matsizilla ala aw. ¹² Mok uwana Yesu anənə mis uwaga azəlal la magədfal: “Lagwa kà, wūr ala la đuvats anjak la abà!” ¹³ Abəkəl ahəl à gəl, nğaha la katskats, mis atsizilla ala, nğaha adzəkà mazləb Zəzagəla la matsəkay. ¹⁴ Ama mənğa anja gəy madəv kuđa kà, gəl akədfal à vok, ləv avəlal à gay kà mawur dza ala uwana Yesu awurən ala vuf maduw ləv. Agədf à maham à ahən dza: “Mavakay mukwa la ahən la tsəh anja kasukwa, à uwana dza aslala vok anja madəh sləray. Səhəwwən, tawarakulla la azlamavakay uwaga la tsəh, awkà kasawwanj kà mawarakulla la mavakay maduw ləv aw!”* ¹⁵ “Iyay”, Sufəl Yesu agədf à atā: “Akul azlaməna magolla dza, kəla uwabeyuwi anjul ma apəlāh sla anja ala banjaw ziwənju anja ala la vuf maduw ləv kà madla atā à iyay à abà aw takay? ¹⁶ Nğaha ma baməraka mis mayyi à tsəh ala anja Abəraham, uwana tak seteni dadəsinj à sasala anja à abà mavay kulo gəl anja mtəgis, nğaha ma azlayla kà vok anja mapələn ala la sasala anja la abà la vuf maduw ləv aw takay?” ¹⁷ Mawul à uda anja Yesu uwaga akəlla ziruwı à azlaməna məzam anja à gəl gesina; ama maham à ahən dza tagə la marabay mənğa kà azlasləray nadzipo uwana Yesu adəhəhən.

*Gay la gay la abà anja tsəhay hamadz
(Mata 13.31-32; Mark 4.30-32)*

¹⁸ Apəh à atā gay la gay la abà anik, agədf à atā: “La mana makoray Zəzagəla adəbani vok ma? La mana à uwana gəgagəzləla ma?” ¹⁹ Yesu agədf: “Makoray Zəzagəla kà, gəgagəzləla la tsəhay hamadz uwana atsà à uda la lig gəy anja dza: Azigənay, apaka magol ahəf, tsərəh à uwana azladıyanj tasaha à wanj kà manjaləh gəy anjatā à afik.”

*Gay la gay la abà anja tatak maməsl tatak ala
(Mata 13.33)*

²⁰ Kiya uwaga Yesu agədf à atā aya: “La mana gəgagəzləla makoray Zəzagəla ma? ²¹ Makoray Zəzagəla kà kalkal la tatak maməsl tatak ala, uwana mis akotsən à pəhəw dogum zlo à tsəh, uwana adəh kilo dzik səla gəl anja səla, tsərəh à uwana aməsl magol pəhəw uwaga ala gesina.”

*Gamagəy slərəkutskuts gə
(Mata 7.13-14, 21, 23)*

²² La maday anja la abà à Yesu kà, aguwhàh à uda la azlamən gudən la abà, la azlabəza gudən la abà gesina, nğaha la matapla tatak à azladza la tetəvi anja maday à Urusalima la ama. ²³ Kiya uwaga dza anik anav: “Mənğa, kà mana azladza njuv pəra tadəbəlay ma?” Ama Yesu agədf à atā: ²⁴ “Wədfaw vok à uda kà mad à gəy la gamagəy

* 13:14 13.14 2Musa 20.9-10; 5Musa 5.13-14

slørkutskutsga uwaga; la paraka gøpøh à akul kà, azladza anjuvaw tadayah anja mad à gày la abatà, ama tadàslay aw."

²⁵ Agòd à atà: "La mok uwana zil gày adatsizilla ala adatsak à gamagày à ama kà, akul uwana la uda kadàdzawka mazalahay la magofoy: 'Suføl, Suføl, pèzl anu à ama ala.' Ama masla adàtsizilla ala, adàgof à akul: 'Akul gesina uwaga, gəsəl slaka uwana kaguwanj la abà aw, gəsəl akul aw.'" ²⁶ Ngaha kadàgofawwal: 'Məzaw tatak məsəh tatak gesina kà la slaka gə anina, ngaha aya katəpəhənu la tatak la azlagudənj gami la abà.'" ²⁷ Ngaha aya adàgof à akul: 'Gəsəl akul aw, gəsəl slaka uwana kaguwanj la abà aw, zəw gi vok akul gesina anjul, uwana kadəfəhaw mawisiga.'" ²⁸ La abatà la uwana kadətawaw, la mapaf slif la tsəh ala tərəwəwə, la mok uwana kadənənjaw Abərahə, Isak, Yakuba, ngaha la azlaməna mapəh à atə gay à ahəl, kə mapəh à azladza gesina la makoray Zəzagəla, tekedika akul kə akul mawits akul à uda gə. ²⁹ Ngaha aya kə, azladza tadəsa à wanj la tsəh la ahənj, la matəf à ahənj afats, la mas à afik afats ngaha la gəl la aku bay. Ngaha atə tadəbəzal slaka madza madzay la tatak may lakəl la makoray anja Suføl Zəzagəla. ³⁰ Kiya uwaga azlaanik la tataka azlaməna huma la abà, tadəgay azlaməna lig, ngaha azlaanik la tataka azlaməna lig la abà bay kə, tadəgay azlaməna huma."

Vok ahama Yesu kà Urusalima

(Mata 23.37-39)

³¹ La kaslā uwatā kà, azla Farisəya anik tazā vok à slaka Yesu, ngaha tagòfal: "Dà anjak la abanay. Hād à slaka anik kà uwana Herod asal makəf ka!" ³² Ngaha Yesu agòf à atà: "Dəw, kadəpəhaw à hayyən uwaga kə kiya uwanay: Aganay gəkufəkəh azlaməsəfəfok mawisiga la mawar azladza ala lakana, lebənj, ama la mavakay makər anja kə gədəkəf gəl à sləray gulo. ³³ Ama kəla kə, say gətsizilla ala lakana, lebənj, la vuf uwahə, kə uwana akəsə vok kə anja masla mapəhal gay à ahəl anja Zəzagəla anja maməts à uda anja huƒ gudənj Urusalima aw, say la huƒ gudənj Urusalima kəla."

³⁴ "Urusalima, Urusalima kak la uwana kakəfəh azlaməna mapəh à atə gay à ahəl anja Zəzagəla, uwana aslāləh kə atə à wanj gesina. Asik dənj gədayahəh maham gay à azladza anjak à vok la slaka gula, bokuba gotsak uwana ayəh maham gay azlabəza anja à vok, la tsəh gogozlāh anja. Ama kakəsəw aw. ³⁵ Həfay, lagwa kə, gày anjul adəpak nvağay. Ama gi kə, gəpəh à akul la dziriga kə, akul kadənənjaw gi, tsərah à kaslā uwana kadəgofaw kə: 'Zəzagəla apis gay à dza uwana à vok, atsa à wanj la sləm anja Suføl Zəzagəla', aw."*

14

Yesu awur masla dıvats ala

¹ Vərdi anik, Yesu ahād à mtəga anja tekula anja mənğa anja azla Farisəya la vuf maduw ləv, kə mazuw tatak may. Azladza uwana la abatà, tanərəz Yesu lela. ² Dza anik la ahənj uwana makəsl vəfəh gə la abatà la huma anja. ³ Yesu apəh gay à azlamənğa anja azlaməna mapəhla mapəhay ala la azla Farisəya: "Wakitə mapəhay gami ma avə tetəvi kə mawur dza ala la vuf maduw ləv takay?" ⁴ Ama asə à atə mawulla gay à uda aw. Kiya uwaga abək ahəl à masla dıvats à gəl, awurənj ala, ngaha asək à dza uwatə, adə anja. ⁵ Yesu agòf à atə: "Uwa à uwana bəzi anja anjak kokur anja atəf à suwa à abə ma la vuf maduw ləv kə, azəb à uda aw uwi?" ⁶ Dza la ahənj aslāla vok kə mawulla gay à uda lakəl anja uwaga aw.

Gay lakəl anja mayahani slaka ngaha lakəl anja mazalahay

⁷ İyay, la abatà Yesu anərəz mayahani slaka anja azladza uwana tazəlāh atə à maham gay à vok à abə. Tayahay kə azlaslaka delga. Kiya uwaga apəh à atə gay uwaga: ⁸ "Banja dza azəla ka à madəvaday mazəb mis à abə kə, kayəh slaka madza madzay delga gə dadənj aw. Zlahaw dza anik la ahənj, à uwana tazəlāl à madəvaday uwaga à abə, aduwa ka bay ma? ⁹ Ngaha kə pəra masla mazalləh akul atsa à wanj, agof à ka: 'Kona, səkla slaka uwaga à dza uwanay.' La abatà kə, kak kə magol ziruwı adahama ka à gəl kə matsizilla ala la huma, kə mad à lig. ¹⁰ Ama banja tazəla ka kiya uwaga kə: Hād, kadza anjak à madzay la lig. Kə uwana la mok uwana masla mazalləh akul adada à awtəy kə, adəgof à ka: 'Slawda, kak kə, zə vok à huma à gay la abanay', la abatà kə, kə anjak kə adəğay dzəba anja səla aw la huma azladza uwaga gesina, kə kak anja mad à huma à gay.'" ¹¹ Kə uwana kəla uwabeyuwı uwana azigən gəl anja kə, tadəwulla ala à lig. Ngaha dza uwana awulla gəl à vəfəh kə, tadədalla à huma."

¹² Kiya uwaga Yesu agòd à dza uwana, azàlàh babay: “Iyay zlà, baña kavà tatak may, banjaw kata kaf à uda kà, kazàllàh azlaslawda anjak la azladedda anjak, banjaw la azlayaga anjak, la azlamèna magay anjak, uwana azlagalepiga pèra aw. Way kà atà babay kà tadàzalla ka vèrdi anik, kà mazuw tatak, kà uwana baña tazàla ka kà bokuba tapèlla ka uwana à abà tazùw la mtøga anak suwanj. ¹³ Ama baña kat kaf à uda kà, zàlàh kà azlamèna kudfa, azlamagodu, azladeri ngaha la azlagulèf pèra. ¹⁴ Kità kà, kadàgagay la marabay, kà uwana atà kà taslala vok anja mapèlla ka à abà aw. Uwaga kà Zèzagèla la uwana adàpèlla ka à abà la mavakay uwana adàwulla azladza dziriga à uda la mamøtsay.”

*Gay la gay la abà anja møy mat kaf à uda
(Mata 22.1-10)*

¹⁵ Mok uwana tatsøn gay uwaga kà, tekula la tataka anja azladza uwana la tatak may la adi, agòd à Yesu: “Tsa kètà kà, marabay agay la dza uwana adàzuw tatak may anja la makoray anja Zèzagèla!” ¹⁶ Yesu agòd à atà: “Dza anik la ahøy, atà magol kaf à uda, ngaha azàlàh azladza anjuvaw. ¹⁷ La mok uwana tatak adahøyay kà, aslèl magamza anja kà mazalàh azladza uwana tapàh à atà: ‘Sàw à wanj, sàw à wanj adagay, kà uwana tatak may kà adahøyay!’ ¹⁸ Ama gesina anjatà tadzèkà manav kamkam la tekula tekula. Matera agòd à magamza: ‘Gi, gøsükw guf kà, asa à gi, gøday kà manøyøy, kamkam bàsgøy.’ ¹⁹ Kiya uwaga masèla agòdal aya: ‘Gøsükw sla søduk zlo, gøday gødàgurila atà sløray, kamkam bàsgøy.’ ²⁰ Ngaha anik agòdal aya suwanj: ‘Gi kà, gødazèb mis kà bà lagwa lagwa, kà uwaga à uwana gøslala vok anja manøf ka aw pèra.’ ²¹ Kiya uwaga magamza awul à slaka møyga anja, apøhal uwana tapàhal gesina. La abatà kà, zil gày apàk løv, la magodday à magamza anja: ‘Håd, katskats à azlavadavaday à afik, la azlagay barama à ama la huf gudøy la abà, ngaha håd kasèlla azlamèna kudfa à wanj, la azlamagodu, la azlagulèf ngaha la azladeri gesina!’ ²² Zweek la huma, uwana uwaga adadaha vok kà, magamza asà à wanj agòd à møyga anja: ‘Møyga, uwana kapèh kà, adfahà vok, ama slaka atamà à ahøy bà gotønøj aya.’ ²³ Kiya uwaga møyga agòd à magamza anja: ‘Lagwa kà, dàm à azlabèza mazlèramàm tetøvi à ama, la azlalig zlagam, fàh à atà gasa à gøl, kà masèlla atà à wanj kà anja mahønla anja gày gulo!’ ²⁴ Ndzer, gøpøh à akul la dziriga kà, azlauwana gøzàlàh atà takwèsah kà, tetuwa tadàtap tatak may gulo tetuwa aw.”

*Tatak uwana dza apakla masla madinjal gøl à vok la slaka Yesu
(Mata 10.37-38)*

²⁵ Maham à ahøy dza anjuvaw tanèfà Yesu la tsøh. Yesu agòla vok, ngaha agòd à atà: ²⁶ “Baña dza asal, manøf gi kà, say apøsew baba anja, la iyà anja, la mis anja, la azlabèza anja, la azladedda anja ngaha amiyaka gøl anja dadøj. Tsa baña kiya uwaga aw kà, aslala vok anja magay masla matapla la slaka gulo aw. ²⁷ Kèla dza uwana akøs mamøtsay anja, ngaha anøf gi aw kà, aslala vok anja magay masla matapla la slaka gulo aw. ²⁸ Baña dza asal manjal magol gày kà, say adza madzay dadøj, atugw tatak uwana adàziny ala gesina dadøj. Baña sili aslay kà mahønøj ala, la uwana adzèka sløray. ²⁹ Awkà baña adzèka maf godega à gày à ahøy pèra, uwala à adahøyøj ala aw kà, kèla dza uwana adànøj gày uwana ahønla aw kà, tadàdzèka makødaslal. ³⁰ Tadàgodday: ‘Nøjaw tsi, kona uwanay tsi: Adzèkà manjal magol gày, uwala aslala vok anja mahøyøj ala aw tsi!’ ³¹ Kiya uwaga babay la suføl uwana asal map guvøl la suføl anik kà, say adza madzay dadøj, kà manøzøy à baña dza dèbow kulo aslala vok anja map guvøl la dza dèbow dzik sèla. ³² Baña aslay aw kà, tsa suføl anik uwanay aløg kørkør dadøj kà, say aslèl gay kà manav masøl vok atà sèla.” ³³ Yesu agòd kiya uwaga babay zlà: “Baña dza apøsew tatak anja gesina aw kà, aslala vok anja magay masla matapla la slaka gulo aw!”

*Slugul uwana azladfay aw
(Mata 5.13; Mark 9.50)*

³⁴ “La hadfay gà kà, slugul kà tatak delga. Ama baña azladfay aya aw ma, kakay dza azladføj ma? ³⁵ Uwaga akøsa vok bamørika anja kutso aw, ngaha bay apàk arøguwa babay aw. Uwaga kà say maftukw ala pèra. Dza uwana sløm lakèl kà atsèbal sløm lela zlà!”

15

*Gay la gay la abà anja tuwanj mazilaga ngaha uwana tabøzal
(Mata 18.12-14)*

¹ La abatà azlaməna mazəb hadama la azladza anik uwana madz à ahəŋ aŋatà kà lela aw kà, tazà vòk à slaka Yesu kà matsəbəl sləm. ² Azla Farisəya la azlaməna mapəhla mapəhay ala taŋəŋuz à tsəh ala kà atà kà atà la magodfay: “Nəŋəw, konnay akəs azlaməna tsakana kà la ahəl səla tsi, ŋgaha tazūw tatak may la slaka gə la atà nna tsi.” ³ Kiya uwaga Yesu apəh à atà gay la gay la abà uwanay, agod à atà:

⁴ “Uwa la tataka aŋkul la abà uwana akor tuwaŋ dzim, ŋgaha tekula aŋatà azila à ama, asak à dzik ladəga gəl aŋha ladəga gə uwanay la fəta, kà masla aŋa mad mayəh tekula gə uwaga tsərəh à uwana abəzal aw uwi?” ⁵ Mok uwana adabəz tuwaŋ aŋha kà arabay, akəsəy, af à kuda. ⁶ Mok uwana adà à mtəga kà, adzəka mazaləh azlaslawda aŋha la azlaməna magay aŋha, la magod à atà: ‘Mərəb anina, kà uwana gədadəz tuwaŋ gulo uwana azalə.’ ⁷ Kiya uwaga babay gəgod à akul kà, marabay məŋga adəgay la zagəla la afik, kà aŋa masla tsakana tekula uwana apəh gay la ləv ala, aduwa dza dzik ladəga gəl aŋha ladəga gə uwanay, uwana: ‘Anu azladziriga’, tagod.”

Gay aŋa gursu uwana azalə ŋgaha tabəzal

⁸ “Awma mis ma uwala à uwana akor gursu kulo, ŋgaha tekula azilə à ama, kadzugwaw ma, avats fənəs, aslad gəy, ŋgaha ayahay la haŋkəli, tsərəh à uwana abəzal aw takay?” ⁹ Mok uwana adabəzal gursu aŋha kà, azalləh azlaslawda aŋha la azlamətetegi aŋha gesina, ŋgaha agod à atà: ‘Mərəb anina, kà uwana gursu gulo uwana azalə kà gədadəzal adagay!’ ¹⁰ Kiya uwaga babay, gəgod à akul kà, marabay adagay la zagəla la afik, la slaka azlamalika aŋa Zəzagəla, kà mapəh gay la ləv ala aŋa masla tsakana tekula, uwana atsə à huma aŋa Zəzagəla.”

Gay aŋa kona mazilaga la mawul à waŋ aŋha

¹¹ Kiya uwaga Yesu agod aya: “Dza anik la ahəŋ agə la azlabəza səla. ¹² Kiya uwaga, mabəziga bəziga agod à baba aŋha: ‘Baba vā à gi humà ləmana, uwana adəgay aŋulo!’ Kiya uwaga baba avahà ləmana à azlabəza aŋha səla ala. ¹³ Mok uwana adahəni à ahəŋ ŋuv, mabəziga bəziga adəw humà makoray aŋha ala, adə aŋha kərkər la sili gə. La abatà azà sili aŋha ala la magogotsay aŋa gudəŋ à vok la abà gesina. ¹⁴ Kiya uwaga, mok uwana adakod tatak aŋha gesina kà, magol may adzəkà vok la gudəŋ uwatà la abà, ŋgaha adzəkà mawoy tatak, ama tatak la ahəŋ aw. ¹⁵ Masla ahəd à mtəga dza anik aŋa gudəŋ uwatà la abà uwana asləl à guf aŋha à abà kà manəŋla azlanamzi. ¹⁶ Masla kà ayəh kà bə mahəŋ huɸ aŋha ala, la azlamaholəhola uwana azlanamzi tapadəy, ama dza la ahəŋ avəl aw. ¹⁷ Təh, awulal à gəl lakəl aŋa madz à ahəŋ aŋha uwana uwarə, agod: ‘Azlaməna slərəy aŋa baba gulo kà tatak may aduwa atà, ama gi kà, masla la uwanay gəmətsay kà may ma, kakay ma?’ ¹⁸ Lagwa kà, ŋuləm, gəda à mtəga baba gulo gədagodfal: Baba, kamkam gədaŋə mawisiga à Zəzagəla à vok, ŋgaha à kak à vok bay. ¹⁹ Baba, lagwa kà, azlayla kà vok kà mazal gi ala bəzi aŋak aya aw! Ama lagwa kà, fə à gi à ahəŋ bokuba gi magamza aŋak!’ ²⁰ La abatà kà atsizilla ala, kà mad à mtəga baba aŋha.”

“Mok uwana aləg kərkər la gəy aŋa baba aŋha kà, baba aŋha anəŋəŋ kà, atsə à waŋ. ŋgaha vok ahaməl kaykay. Hadzak, asə à afik, atsədəl à ama, avəl kà, akəsə vok la marabay. ²¹ Bəzi uwaga agodfal: ‘Baba, kamkam gədaŋə mawisiga à Zəzagəla à vok, ŋgaha à kak à vok. Lagwa kà, azlayla kà vok kà mazalgəla bəzi aŋak aya aw!’ ²² Ama baba agod à azlamagamza aŋha: ‘Katskats, səwla dawara delga à waŋ, kaduwal à vok; fəwwal dzedə à ahəl, bəkəwwal kwimik à asik. ²³ Lagwa kəsəw vəlīk magagseyga à waŋ, kakəɸaw, məpəɸ ŋgaha mərəb, ²⁴ kà uwana bəzi gulo uwana agə bokuba mamətsayga kà aganay, adawul à uda la sifa aya, azalə, ama adagay mabəzalga.’ ŋgaha kiya uwaga tadzəkà marabay.”

²⁵ “Tekedfika magol bəzi aŋha kà, agə la fəta. La mok uwana atsə à waŋ la fəta, uwana adagay nekwa la gəy kà, atsənə talakway la azladəs la madəvaday gesina. ²⁶ Magol bəzi uwaga azalə magamza tekula, anəvalla gay ala: ‘Mana ma à uwaga adadzəkə vok la mtəga gami ma?’ ²⁷ Kiya uwaga magamza agodfal: ‘Deda aŋak kà adawul à waŋ. Masla gə la uwaga, baba aŋak akod vəlīk magagseyga uwatà, kà uwana awulla à waŋ la wurwur.’ ²⁸ Nəŋ, adzəkə mapak ləv, ŋgaha akəs mad à gəy aya aw. Kiya uwaga baba aŋha asə à uda, adəval kuɸa kà mad à gəy. ²⁹ Ama masla agod à baba aŋha: ‘Baba, mavay dəŋ à uwana gi la slaka aŋak, didi gədakweska mapəhay aŋak aw. Ama bə məzezak babay kà, kavà à gi aŋa marabla la azlamanalay gulo aw!’ ³⁰ Ama banja kà aŋa bəzi aŋak uwanay adadadas tatak aŋak ala la zlapay la tsəh, ŋgaha adawulla à waŋ kà, kakəɸal vəlīk uwana məgəgsəŋ aya ma kà mana ma?’ ³¹ Ama baba agodfal: ‘Bəzi gulo, iyay, kak la ahəŋ koksikoksi la gi, gəsəl. Kasəl kà, dəwdəw tatak uwana gəkoray kà uwaga kà aŋak aw takay?’ ³² Ama lakana kà, akəsə vok kà, məvaləh à zagəla, la mahab

madəvaday, kà uwana deda anjak uwana agà bokuba mamətsayga kà, aganay adawula à uda la sifa aya, azalà ngaha adagay maβəzalga aya kà uwaga à uwana mərəbay!’ ”

16

Gay la gay la abà anja magamza kaskasga
(Mata 25.14-30)

¹ Kiya uwaga Yesu agòf à azlaməna matapla la slaka anja aya: “Dza galepi gà la ahənj uwana agà la magamza lakəl anja ləmana anja gesina. Ngaha azladza tasàhàla gay uwana à wan, magamza anja uwaga adəfahənj la tatak anja. ² Məngga anja azàl, agòfal: ‘Mana ma à uwana gətsenənj lakəl anjak ma? Iyay, tūgw à gi godega anja sləray anjak lagonay, kà uwana kadəgay magamza gulo aya aw!’ ³ Magamza adzugw la gel anja, agòf: ‘Aga, məngga gulo azəb gi à tatak anja lakəl ala ma, mana ma à uwana gədehənj lagwa zlà ma? Mapəs guf, ndzəda gulo la ahənj aw. Matsatsàh tatak babay, ziruwi. ⁴ Iyay, təga, gəsəl uwana gədəfəhənj à mok uwana adəzəb gi à tatak anja lakəl ala. Azladza la ahənj à uwana tadəfa à gi à ahənj à mtəga anjatà.’ ⁵ Kiya uwaga azàläh azladza uwana goder anja məngga anja agàhà à atà la vok tekula, tekula. Agòf à matera: ‘Nna à goder anja məngga gulo, uwana agà kà la vok ma?’ ⁶ ‘Aməl kuvu gonjon dzim’, agòfal. Magamza agòfal: ‘Wakità anja goder anjak kà, aganay, dza madzay katskats, katsetser gonjon dzik zlo!’ ⁷ Ngaha anavà dza anik aya: ‘Kak ma, nna aga kà la vok ma?’ ‘Nalkama nesesa dadərmokw zlo.’ Magamza agòfal: ‘Kak bay kà, aganay à wakità anja goder anjak: Tsetsèr dadərmokw ufad!’ ⁸ Kiya uwaga məngga anja, azləbà magamza kaskasga uwana adəfahə uwaga gesina la demdem, kà uwana azladza anja gudənj à vok lakana taduwa à azladza anja ufaka la katskats la sləray anjatà la abà.”

⁹ Yesu azàläh à gəl, agòf à atà: “Kəsàw vok slawda la azlələmana anja gudənj à vok uwanay, ngaha kà vuɔf uwana kadəbəzaw à tatak aw kà, tadəkəs akul à slaka madz à ahənj, uwana adəv à gay aw. ¹⁰ Kà uwana dza uwana dziriga la azləbəza tatak la abà kà, masla kà dziriga la azlamənj tatak la abà babay. Ngaha dza uwana kaskas la azləbəza tatak la abà kà, masla kaskas la azlamənj tatak la abà bay. ¹¹ Tsa banja akul kagaw dziriga la tatak uwana la abà, tafà à akul à ahəl la gudənj uwanay la vok aw, ma uwa à uwana adəfa à akul ləmana dziriga à ahəl zlà ma uwa? ¹² Banja akul kagaw dziriga la ləmana anja azladza anik aw, ma uwa à uwana aslala vok mav à akul ləmana anjul uwa?”

¹³ “Kiya uwaga dza la ahənj atsəp azlaməngga sèla à huma à gay aw: Apəsəw anik, ngaha akəs gay anja anik; awoy anik, ngaha akweska anik. Kiya uwaga babay zlà, kaslawwalla vok kà matsəp Zəzagəla à huma la sili aw.”

Azlaməpəhay anik anja Yesu
(Mata 11.13; 5.31-32; Mark 10.11-12)

¹⁴ Azla Farisəya tatsənà gay uwaga gesina, takədəsl à Yesu, kà uwana atà kà, azlaməna mawoy sili məngga. ¹⁵ Kiya uwaga Yesu agòf à atà: “Akul kà: ‘Anu azladza dziriga’, kagəɔaw la huma anja azladza la madəh gasa. Ama Zəzagəla asəl madzugway anjul. Uwana azladza tanəzəz bokuba tatak məngga gà kà, la huma Zəzagəla, kà uwaga kà bokuba tatak deydayga pəra.”

¹⁶ “Azlaməna mapəh à atà gay à ahəl la azlaməpəhay anja Musa tapəh gay lakəl anja makoray Zəzagəla tsərah à kaslā anja Yuhana masla madəh batem. Dagay la mok uwatà kà, kəla uwabəyuiw adəh gasa kà mad à makoray Zəzagəla à abà. ¹⁷ Zagəla la kutso kà adəv à gay la butu, à kà matəɔla anja mapəhay njwga la wakità Zəzagəla la abà.”

¹⁸ “Kəla dza uwana akudək mis anja, ngaha azəb anik kà adada à gəl gaw, ngaha dza uwana azəb mis uwana zil anja akudəkay babay kà, adada à gəl gaw suwan.”

Dza galepi atà la Lazar

¹⁹ “Dza galepi anik la ahənj, uwana atsakwàh à diri mativga à abà uwana tsakalay anjatà kà zlazladə. Masla kà adzàhà à ahənj kà say la matsidəy la abà pəra. ²⁰ La abatà kà, masla kuɔa anik la ahənj uwana sləm anja Lazar. Vok anja gesina kà bə amik amik tsatsabasla. Adzàhà à ahənj la slaka mahən à ahənj la gay gamagəy anja galepi. ²¹ Asal mahən huɔf anja ala la azlatatak may mapətsəh pətsəhga, uwana atəɔf à ahənj la table anja galepi uwaga la afik, ama aslā aw. Ngaha aya kà, azlakəda tasàhà à wan kà mamətəɔfəh amik anja uwaga la abatà kà, azàhənj kaykay. ²² Masla kuɔa uwatà aməts, ngaha azlaməlika tasà à wan, tazəb masla, tadàlla à slaka Abərahəam la zagəla. La lig la ahənj kà, galepi uwaga aməts suwan, talà, tatùw lela. ²³ Galepi uwaga kà asə ngərpə məngga la mezewi. La matəɔbəy anja la abà kà, anənj à zagəla kərkərk kà, anənj Abərahəam la Lazar la slələf anja lakəl. ²⁴ Ngaha masla adzəkà mazaləhal la magəɔay: ‘Baba Abərahəam, vok ahamà kà kà gi, sləl Lazar à wan, atəp gay gəl ahəl anja à iyaw

abà, kà matasgèla alàh gulo, kà uwana gës ngörpa mënnga la gày akàl uwanay la abà.’
²⁵ Ama Abèraham agòfal: ‘Iyay bëzi gulo, dzùgw tsi, kazùw matsidày la mok uwana kalèg la sifa, ama Lazar kà asà ngörpa mënnga. Lagonay kà, adabèz à matsidày suwanj la abanay, ngaha kà kak, kadafèd à matèrəbày à abà.’²⁶ Ngaha aya kà, la tataka gami la abà la akul kà, magol afək zənzəngə la ahəj; avahanula. Azladza uwana la slaka gami la abanay taslala vok ənjə mad à uda à slaka ənjul aw, ngaha azlauwana la slaka ənjul taslala vok ənjə mas à gay babay à slaka gami aw.’²⁷ Galepi agòd: ‘Kamkam, baba Abèraham, sləl Lazar à mtəga baba gulo,²⁸ kà uwana azladeda gulo la ahəj zlo aya, kà masla ənjə mapəh à atà à vok à abà, kà atà ənjə mas à wəj à slaka uwanay gi la abà aw.’²⁹ Ama Abèraham agòfal: ‘Musa la azlaməna mapəh à atà gay à ahəl kà tapəh à atà. Say takəs gay ənjatə pəra!’³⁰ Galepi agòfal: ‘Awanj, baba Abèraham, diga aw. Ama banja dza awul à uda la mamətsay, ahəd, la uwana tadəkəs gay ənjə, ngaha tadəpəh gay la ləv ala.’³¹ Kiya uwaga Abèraham agòfal: ‘Banja tatsəna gay ənjə Musa la azlaməna mapəh à atà gay à ahəl anik aw kà, amiyaka bə dza uwana awùlla à uda la mamətsay, adəday babay kà, tadətsən gay ənjə aw’ ”, kiya uwaga Yesu apəh à atà.

17

Tsakana

(Mata 18.6-7,21-22; Mark 9.42)

¹ Yesu agòd à azlaməna matapla la slaka ənjə: “Tatak uwana adədahla azladza à tsakana à abà la ahəj koksikoksi. Ama ngörpa adəgəy la dza, uwana adəh uwaga.
² Njələm tawadəl dzəgla à kuda, taduw à dərəv à abà, à kà uwana adukw tekula ənjə azlabəza uwanay à tsakana à abà.”³ Dahəw hanjəli lela!”

“Banja deda ənjək adəha tsakana kà, pəhal la tələmma; banja atuw lakəl ənjə tsakana ənjə kà, matsalləj ala.”⁴ Banja adəhà à ka tsakana à vok asik mədəf la mavakay la tsəh, pəra kəla madəh tsakana kà, atsa à wəj atuwəy lakəl ənjə kà, matsalləj ala gesina.”

Madijəl gəl à vok

⁵ Azlaməna matapla tagòd à Sufəl: “Zànula madijəl gəl à vok gami à gəl!”⁶ Sufəl agòd à atà: “Agayəja la madijəl gəl à vok ənjul à gay la ahəj bakət tsəhay hamadz kà, naka: “Bəđə vok ala la abanay, həd kadətsəb vok à dərəv à abà!”, kagodəw à gudəv kà, naka uwaga kà apakakulla vok, kà uwana akul la madijəl gel à vok.”

Sləray ənjə magamza

⁷ “Uwa la tataka ənjul la abà, à uwana magamza ənjə apès guf banjəw anəhəla azlatatak kà, la mok uwana adasa à wəj la fəta kà: ‘Sà à wəj katskats, kadza à tatak may à gəl’, agodəl uwa?’⁸ Awanj, ama agodəl kà: “Dəh gi tatak may, bəđə lukut, kà mav à gi tatak may la tatak masay, la lig la ahəj kà pəra, kak kadədzəka mazuw tatak, la masay suwanj.’⁹ Kagodəw ma, ‘Kikay’, agod à masla sləray uwana adəhəlla kiya uwanay kagodəw takay? Awanj, uwaga kà sləray ənjə.”¹⁰ Akul babay kà kiya uwaga: Mok uwana kadədahaw uwana tapəh à akul gesina kà, gòdəw kà: ‘Anu azlaməna sləray deydayga pəra’, gòdəw; ‘Mədəhəj kà uwana uwaga kà, agay kà sləray gami pəra.’”

Yesu awara azlaməna akàl zagəla ala kulo

¹¹ La mok uwana Yesu adà à Urusalima kà, aguwa la gay makwi ənjə Samariya atà la Galili.¹² La kaslā uwana masla azlādà à huf gudəj anik à abà kà, azlaməna akàl zagəla kulo tagagam la masla. Tatsəzl à fəta à awtəy.¹³ Ngaha tazà kuda à zagəla la mawiyay: “Yesu, mənnga, vok ahama ka kà anu!”¹⁴ Masla anərəz atà, agòd à atà: “Dəw kadəpəhawla vok ənjul à azlaməna mav tatak à Zəzagəla!” La mok uwana atà la asik lakəl kà maday kà, tanərəz vok ənjatə kà: Tawərla.¹⁵ Kiya uwaga tekula la tataka ənjatə la abà, uwana anəhəj kà adawurla kà, awùl à slaka Yesu la mazləb Zəzagəla la kuda zləkkà.¹⁶ Atəđ à makəla asik ənjə la magodəy: ‘Kikay’. Masla kà tekedika zil Samariya.¹⁷ Kiya uwaga Yesu agòd à atà: “Azladza kulo tawərla ala aw takay? Atà la azladaga anik uwanay la?”¹⁸ Dza la ahəj adzùgw kà mawul à awtəy kà mav kikay aw. Say məlok dza uwanay pəra.”¹⁹ Ngaha Yesu agòd à dza uwana awùl à wəj: “Sà à afik, həd ənjək; madijəl gəl à vok ənjək adawur ka ala!”

Mas à wəj ənjə makoray Zəzagəla

(Mata 24.23-28,37-41)

²⁰ Azla Farisəya tanavà Yesu: “Mbà makoray Zəzagəla adəsa à wəj mi”, tagòfal. Yesu agòd à atà: “Makoray Zəzagəla kà, atsa à wəj la kiya uwanay ənjə manəhəj la yewdi aw.”²¹ Ngaha dza aslala vok babay kà magodəy kà: ‘Aganay la abanay, banjəw

agatà y la abatà y', tagodfay babay aw. Sòlàw kà, aganay la tataka ankul la abà à makoray Zèzagèla."

²² Masla agòd à azlamèna matapla la slaka anha: "Azlamavakay anik tadàsa à wanj à uwana kadàyahaw la iyaw tugwi kà manəj Kona anja dza bà à mavakay tekula, ama kadànejanwanj aya aw. ²³ Ngaha azladza tadàgodfah à akul Kristu kà 'Aganay la abanay, banjag agatà y la abatà y.' Kakəsaw gay anjatà aw, kadaw la abatà aw! ²⁴ Kà uwana bokuba habaga uwana awutsəf à uda la ləv zagèla la abà, dagay la tsəh la ahəj tsərəh à gəl à agu kà, la kiya uwaga adàpaka vok la vuf mas à wanj anja Kona anja dza babay. ²⁵ Ama kəla kà say asa ngərpa mənja dadən, ngaha kà say azladza anja zamana uwanay takweska masla aya dadən. ²⁶ Bokuba uwana apakàhà vok la zamana anja Nuhu kà, kiya uwaga à uwana adàpaka vok babay la mavakay anja Kona anja dza. ²⁷ La zamana uwatà azladza tazàw, tasàh, tazàb mis, tavàh azladəgam anjatà à zil, tsərəh à mavakay uwana Nuhu adà à kəslah iyaw à agu. Ama atà kà, tadzùgw tatak anik dikiidiki tsərəh à uwana mazlaha asà à wanj azàhà atà ala aw. ²⁸ Apakà vok la zamana anja Lot bay kà kità: Tazàw, tasàh, tasàkwàh, tadfàwàh ala, taslèkàh tatak, ngaha tanjàläh azlagəy anjatà. ²⁹ Ama la mavakay uwana Lot asà à uda la gudəj Sodom la abà kà, Zèzagèla aduw akàl à ahəj la zagèla uwana la abà, kadfàh kà kadfàh. Ngaha azaha azladza ala gesina. ³⁰ Adàpaka vok kalkal la uwaga la vuf mas à wanj anja Kona anja dza babay."

³¹ "Kiya uwaga babay la mavakay uwatà kà, dza uwana la gəl gəy la afik kà, amiyaka kazlanja anha la kay kà, adàsa à ahəj kà mahəlay aw. Ngaha babay kà, dza uwana la guf la abà kà, adàwul à mtəga babay aw. ³² Dzùgwàw lakəl anja mis anja Lot tsi. ³³ Dza uwana ayàh matəf sifa anha kà, adàziŋ ala, ngaha dza uwana atùw sifa anha aw kà, adətəfəj uwaga. ³⁴ La dziriga gəpəh à akul: La vuf uwatà kà, azladza sèla la kəslah tekula la afik kà, tekula tadàzəbaj, tekula tadàsakal. ³⁵ Azlamis sèla la vəl tekula la afik kà, tekula adàzəbaj, tekula tadàsakal. ((³⁶ Aya kà, azlazil sèla la guf tekula la abà, tekula tadàzəbaj, ngaha tekula tadàsakal.))" ³⁷ Kiya uwaga azlamèna matapla la slaka anha tanàv: "Sufəl, uwaga ma adàpaka vok ma lala?" Masla agòd à atà: "La slaka uwana tatak mamatsayga la ahəj la uwana azlakwatsamu taham gay à vok la abatà."

18

Gay la gay la abà anja mis kudfa atà la masla madfah seriya

¹ La lig la ahəj Yesu apəh à atà gay la gay la abà kà anja mapəhatàla kà masak à madəv kudfa la tsəh ala la ahəj la maruw vok à ahəj aw. ² "Masla seriya la ahəj la gudəj anik ahoy guba anja Zèzagèla aw, ngaha akəs gay anja dza babay aw. ³ La gudəj uwatà la abà babay kà, mis kudfa anik la ahəj, asàh à wanj à slaka anha la magodfah: 'Dàh à gi seriya la masla məzam gulo.' ⁴ Asik dən masla seriya akwesàhal à gəl, ama la lig la ahəj adzùgw la gəl anha: 'La dziriga kà, guba az à gi kà anja Zèzagèla aw, gəkəs gay anja azladza aw. ⁵ Ama lagwa kà, mis kudfa uwanay atərəb gi ayigəla kà, gadfàhla seriya anja ngaha masla anja masàh à wanj anja mavis à gi gəl à vok aya aw.' ⁶ Kiya uwaga Sufəl Yesu agòd: "Tsənàw uwana masla seriya mawisiga uwanay agòd tsi. ⁷ Kətà zlà ma, Zèzagèla kà adàfah dziriga à azlauwana atsatsàmàni atà aw, kagodfaw takay? Adàfah dziriga à azlauwana tanàval tatak mavakay la mahənay gesina. Ngaha vok ahàmàl kà atà babay aya. ⁸ Bà la dziri gəpəh à akul kà, adàfah à atà dziriga la katskats. Tekedik ma, banja Kona anja dza adàsa à wanj ma, adàbəz à madinjal gəl à vok à gəl la vədah takay?"

Gay la gay la abà anja

zil Farisəya ngaha la masla mazəb hadama

⁹ Uwana Yesu apəh gay la gay la abà uwanay kà, kà anja azladza anik, uwana tapakà gəl anjatà ala kà: 'Anu azladza dziriga la huma Zèzagèla', tagòd, tapəsəw azladza anik. ¹⁰ "Azladza sèla tatsizlla kà mad madəv kudfa la mən gəy Zèzagèla la aku. Anik zil Farisəya, anik uwanay masla mazəb hadama. ¹¹ Zil Farisəya atsizlla ala, adəv kudfa la kiya uwanay: 'Sufəl Zèzagèla, kikay gəgod à ka, kà uwana gi kà, gi kiya azladza anik aw. Kà uwana atà kà: Azlamèna gəl, azlamawisiga, azlamabila! Zèzagèla, kikay gəgod à ka, kà uwana gi kà kiya masla mazəb hadama uwanay aw! ¹² Ngaha aya kà, asik sèla gəkəs nəlay la kasukwa la tsəh, kəla tatak gulo uwana gəbəzal kà, gəvəhay tekula la gay anja makulo gesina.' ¹³ Ama masla mazəb hadama atsizlla à fəta à awtəy, aslà kà madzək yewdi à zagèla aw, ama atatàsilla gay ləv: 'Sufəl Zèzagèla gulo, vok ahama ka kà gi, à gi uwana gi masla tsakana!' ¹⁴ Gəpəh à akul la dziriga kà, masla la uwana adà à

mtøga la løv sətakaga, à kà dza anik uwanay. Kà uwana kèla uwabeyuwi uwana azigèn gəl aŋha kà tawulla à lig, ŋgaha kèla dza uwana awulla gəl aŋha à vøfah kà, Zəzagəla adàdalla à huma.”

*Azladza tasàhla azlabəza à slaka Yesu
(Mata 19.13-15; Mark 10.13-16)*

¹⁵ Azladza tasàhla azlabəza à Yesu à waŋ, kà masla aŋa mapis à atà gay à vok, ŋgaha azlaməna matapla la slaka aŋha taslàh atà mèl à gəl. ¹⁶ Ama Yesu azàla atà la magodəy: “Sàkàw azlabəza tasa à waŋ à slaka gulo, kavəraw atà ay aw, kà uwana makoray Zəzagəla kà aŋa azlatsəhay azlauwaga! ¹⁷ La dziriga gəpəh à akul: Kèla uwabeyuwi uwana akəs makoray aŋa Zəzagəla bokuba azlabəza uwanay aw kà, adàda à makoray Zəzagəla dikidiki aw!”

*Kohana galepi gà
(Mata 19.16-30; Mark 10.17-31)*

¹⁸ Masiga anik aŋa azla Yahudiya anavà Yesu la magodəf: “Məŋga, kak delga, mana à delga gədehəŋ, kà gi aŋa mabəzal sifa adəv à gay aw ma?” ¹⁹ Yesu agədəf: “Kà mana ‘Kak delga’, kagəd à gi ma? Dza delga la ahəŋ aw, say Zəzagəla kokuđa gəl aŋa pəra delga. ²⁰ Kasəl mapəhay uwana la wakità Zəzagəla la abà ay? Kada gəl gaw aw, kakəd dza aw, kada à gəl aw, kadəhà fida lakəl aŋa dza anik aw, ŋgaha zləkàw baba aŋak la iyà aŋak!” ²¹ Kohana agəd: “Uwaga kà, dagay la bəziga la uwana gekəs uwaga gesina.” ²² Uwana Yesu adatsən uwaga kà, agədəf: “Lagwa kà, tatak tekula atəm à ka kà à ahəŋ! Kèla tatak gesina uwana kakoray kà: Dàw ala, vàh à azlaməna kufa à uda gesina, ŋgaha sà à waŋ, kanəfa à gi, kadàbəz ləmana la zagəla!” ²³ Ama mok uwana kohana atsn uwaga gesina kà, aməts à ahəŋ la adi, kà uwana galepi. ²⁴ Uwana Yesu anəŋəŋ kà, adapak ləv kà, agəd: “Hadəy gə, kà zlazladə kà dza galepi aŋa mad à makoray Zəzagəla. ²⁵ Nuləm zlugumi aguwa à uda la afik lepəri, kà dza galepi aŋa mad à makoray Zəzagəla.” ²⁶ Kiya uwaga azlauwana tatsəbal sləm kà, tadzəkà magodəy: “Tsa aŋa kità ma, uwa à uwana aslala vok aŋa mabəlay zlà ma uwa?” ²⁷ Yesu agəd: “La slaka azladza kà zlazladə, ama la slaka Zəzagəla kà zlazladə aw.” ²⁸ Kiya uwaga Piyer agədəf: “Tsnəŋ anu kà, mədəsək tatak uwana à ahəŋ məkor gesina, kà manəf ka.” ²⁹ Yesu agəd à atà: “Gəpəh à akul la dziriga kà, baŋa dza asək gay aŋha à ahəŋ, à mis aŋha à ahəŋ, à azladedə aŋha ahəŋ, à azlabəza aŋha à ahəŋ, à azlabəza aŋha à ahəŋ kà makoray Zəzagəla kà, ³⁰ dagay lakana la zamana uwanay adàbəz tatak aŋuwaw, ŋgaha la huma la gay aya kà, adàbəz sifa adəv gay aw aya!”

Yesu awulla gay aŋa mamətsay aŋha à tsəh

*la mawul à uda aŋha kà maməkər
(Mata 20.17-19; Mark 10.32-34)*

³¹ Yesu ahəl azlaməna matapla kulo gəl aŋha səla uwatà à tsəh, ŋgaha agəd à atà: “Tsnəwəwəŋ, aganay mədàda à Urusalima, kà uwana la abatà la uwana tatak uwana azlaməna mapəh à atà gay à ahəl aŋa mapəh à azladza tatsəsər adəgəd à afik, lakəl aŋa Kona aŋa dza. ³² Tadəkəs masla, tadàvə à ahəl aŋa azladza uwana azla Yahudiya aw, atà tadəkədaslal, tadàtsakal magodəhay à gəl la matafal sleslib à vok. ³³ Tadəzlabəy la kurpi, tadəkəday. ŋgaha la mahəŋay maməkər kà, adəwul à uda la mamətsay.” ³⁴ Ama azlaməna matapla tatsənà godega aŋha aw, kà uwana godega aŋa gay uwatà kà, ahəfətəŋ à adi, tasəl uwana Yesu apəh aw.

*Yesu awura guləf ala
(Mata 20.29-34; Mark 10.46-52)*

³⁵ Uwana Yesu azlābəz gudəŋ Yeriko kà, guləf anik madza madzay gə la gay tetəvi, atsatsàh tatak la abatà. ³⁶ Mok uwana atsnəh dərūkdərūk aŋa maham à ahəŋ dza uwana tadà à awtəy kà, katskats masla adzəkà manavay la magodəy: “Uwaga ma, mana ma aguwa ma?” ³⁷ Azladza tagədəf: “Yesu, zil Nazaret la uwana ada à awtəy kiya uwaga la maham à ahəŋ dza la tsəh.” ³⁸ Kiya uwaga adzəkà mawiyay la magodəy: “Yesu, Yesu, Kona aŋa David, vok ahama ka kà gi.” ³⁹ Ama azladza uwana taguwə à huma taslàhal mèl à gəl, “Dzà à ahəŋ titi!”, tagədəf, ama azà kuda à zagəla la mawiyay aya: “Kona aŋa David vok ahama ka kà gi, gəgəd à ka!” ⁴⁰ Kiya uwaga Yesu atsižlla à ahəŋ, “Səwgəla à waŋ!”, agəd à atà. Mok uwana tadàlla guləf à slaka aŋha, anavà guləf la gay ala: ⁴¹ “Mana asa à ka, kà gəfahəŋ ma?”, Yesu agədəf. “Məŋga, asa à gi kà gəŋəŋla la yewdi gulo”, guləf awulləlla. ⁴² La abatà: “Nəŋ ala, madinəl gəl à vok aŋak adawur ka ala!” ⁴³ Kiya uwaga, uđak, anəŋla la kirim yewdi, ŋgaha anəfà Yesu la tsəh

la mazlëb Zëzagëla. Mok uwana maham à ahëj dza anëjå uwaga kà, gesina anjåtå tazlëbå Zëzagëla.

19

Yesu atå la Zase

¹ Mok uwana Yesu adada à gudëj Yeriko kà, aguwå à uda la huf gudëj la abå. ² Dza anik la ahëj, uwana slëm anja Zase la abatå, masla kà mëjga anja azlamëna mazëb hadama, njaha galepi aya, ³ ayåh manëj Yesu. "Uwa à Yesu uwatå uwi?", agöd, ama aslå aw, kà uwana maham à ahëj dza kà anjувaw, njaha babay kà azigën aw, agöd à ahëj desl. ⁴ Ahåd à huma à gay la mahoyay, ahåd à gudëv à afik, njaha kà masla anja manëj Yesu, uwana aguwå à awtåy la tetëvi uwatå. ⁵ Njaha mok uwana Yesu adabëz à tsöh anja kà, anëj à afik, agödål: "Zase, sà à vëdåh katskats, kà uwana lakana kà, say gëda à mtëga anjak!" ⁶ Katskats aså à vëdåh, akës Yesu la ahål sëla, kà mad à mtëga anja. ⁷ Uwana azladza gesina tanëjå masla kà, tanjønüz à tsöh ala, tagöd: "Kakay ada mahën à mtëga masla tsakana ma?" ⁸ Zase aså à afik la huma anja Sufël, agödål: "Sufël, tenma anja lëmana gulo kà, gëvåh à azlamëna kuða à uda gesina. Njaha aya, banja gëdåhå mawisiga à dza à vok la mahël sili anja la kaskas kà, gëvålla à iyaw à tsöh asik makër, njaha anja magay maufåd la iyå anja sili anja!" ⁹ Yesu agödål: "Lakana kà mafëlay adasa à huf gay uwanay, kà uwana masla babay kà mayyi à tsöh ala anja Abëraham, ndzer. ¹⁰ Kà uwana Kona anja dza aså à wanj kà mayåh mafël azlauwana tazåhla."

Gay la gay la abå anja gursu anja luwåluwå (Mata 25.14-30)

¹¹ Yesu ahåd à huma à gay la mapëhatåla gay la gay la abå à azladza uwana tatsënå panjaw anja. Bokuba uwana atå nekwa la Urusalima kà tagöd kà: 'Makoray Zëzagëla kà apëhla vok ala la katskats la dazuwaya', gël anjåtå agöd. Kiya uwana Yesu apëh à atå gay la gay la abå anik. ¹² Aganay à uwana apëh: "Gadamula anik, uwana la huf gay mëjga, ahåd à gudëj anik kërker kà mazuw sufël la abatå, kà masla mawul à mtëga la lig la ahëj. ¹³ Uwana adåy kà, azållåh azlamagamza anja kulo dadån, avåhå à atå gursu anja luwåluwå tekula tekula, agöd à atå: 'Tsakållåw la sili uwanay, tsaråh à mok uwana gëdåwul à wanj.' ¹⁴ Ama azlamëna gudëj anja tapësëw masla, taslël gay kà magodåy kà: 'Asa à anu dza uwanay anja magay sufël lakël gami aw', tagöd. ¹⁵ Mok uwana adazuw sufël kà, awül à wanj à gudëj anja à abå. Njaha azålåh azlamagamza anja uwana avåhå à atå gursu anja luwåluwå kà anja matsakalla, asål manëwëz uwana tabëzalla à adi. ¹⁶ Kiya uwaga matera adå à awtåy la magodåy: 'Sufël, sili anjak kà ayyå à tsöh sili kulo.' ¹⁷ Sufël agödål: 'Delga, kak magamza delga, bokuba uwana kagå dziriga la bëzi tatak la abå kà, gëf kà à ahëj lawan anja gudëj kulo.' ¹⁸ Kiya uwaga masëla aså à wanj: 'Sufël, sili uwana kavå à gi kà, gëbëzalla à adi zlo aya'. ¹⁹ Sufël agöd à masla babay: 'Kak babay, kak lawan anja gudëj zlo.' ²⁰ Magamza anik aså à wanj aya, agöd: 'Sufël, aganay sili anjak, gëfafåd à makatsekatsa à abå, gëhadån à ahëj. ²¹ Guba akës gi kà kak, kà uwana kak dza dzandzanga. Kà uwana tatak uwana kak kafå à ahëj aw babay kà, kazëbay, njaha bå tatak uwana kak kaslëka aw babay kà, katsodåy.' ²² Sufël agödål: 'Kak magamza maksafërga. Panjaw anjak uwana kapëh, la uwana adfahå à ka seriya à gël. Iyay, kasël kà gi dza dzandzanga, njaha gëzëb tatak uwana gëfå à ahëj aw, kagöd. Gëtsod tatak uwana gëslëkå aya bay aw, kagod.' ²³ Njaha sufël agödål: 'Kå mana kafå sili gulo à gay makal goder, naka mok uwana gëdåwul à wanj kà, naka gëday, gëhël sili la iyaw la tsöh la abatå aw ma?' ²⁴ Njaha sufël agöd à azladza uwana la slaka anja: 'Zëbåwwal gursu tekula uwaga la ahål ala, våwla à dza uwana à vok akor sili kulo!' ((²⁵ Atå tagöd: 'Sufël, masla kà sili kà kulo la ahål njuwå!')) ²⁶ 'La dziriga', gëpëh à akul: 'Dza uwana akoray kà, tadåvalla à vok. Ama dza uwana akoray aw kà, bå bëziga uwatå aga la ahål kà, tadådëvalla à ahål ala aya! ²⁷ Ama azlamëna mëzam gulo uwana la abanay, aså à atå kà gëkor atå aw kà, såwla atå à abanay à huma gulo, kådåw atå la yewdi gulo', sufël agöd à azlamagamza anja", kiya uwanay Yesu apëh.

Yesu ada à huf Urusalima à abå

(Mata 21.1-11; Mark 11.1-11; Yuhana 12.12-19)

²⁸ La mok uwana adapëh gay uwaga, Yesu adå à huma anja maham à ahëj dza kà mad à Urusalima. ²⁹ Mok uwana tazlëbëz à Betfaze atå la Betaniya, nekwa la gudëj uwana gudëj kuvu tagodål kà, aslël azlamëna matapla sëla la slaka anja la huma, agöd à atå: ³⁰ "Dåw à gudëj uwaga à abå la huma ankul. Banja kadåbëzaw kà, kadånëjaw bëzi ziwjnyu mawadëj à ahëj gå, uwana dza adadza à afik didi aw. Dapëllåw, kadåsawla

à wanj à abanay. ³¹ Banja: 'Kà mana kapëllaw mi', dza agodf à akul kà, 'Sufël gami awoyan', gòd'awwal!' ³² Uwana azlamëna maslëlay taday kà, tanënj tatak gesina apakà vok bokuba uwana Sufël apëh à atà. ³³ Mok uwana tapël bëzi ziwññu uwaga kà: "Kà mana kapëllaw bëzi ziwññu uwaga mi?", ³⁴ azladza anja tagòd à atà, "Sufël awoyan", tagòd. ³⁵ Ngaha tasëlla bëzi ziwññu uwaga à slaka Yesu, atà tadàwal azlalukut anata à lig, tadza Yesu à afik. ³⁶ Mok uwana adadzëka maday, azladza tadàw azlalukut anata à tetëvi à ama. ³⁷ La mok uwana tazlëbëzay à Urusalima, kà mad à ahënj la gudënj kuvu la afik kà, azlamëna matapla tahën ala la marabay gesina anata, ngaha tazlëbà Zëzagëla la kuda zlëkkà, kà azlatatak nadzipoga uwana tanañnj gesina. ³⁸ Azla dza tagòd: "Delga kà Zëzagëla apis gay à Sufël uwana à vok, atsa à wanj la slëm anja Sufël Zëzagëla! Lapiya la zagëla, ngaha mazlëbay agay la Zëzagëla uwana la zagëla la afik." ³⁹ Ngaha azla Farisëya anik uwana la tataka maham à ahënj dza la abà tagòd à Yesu: "Mëngga, 'Dzàw à ahënj titi', gòd' à azlamëna matapla la slaka anjak!" ⁴⁰ Ama Yesu agòd' à atà: "Banja: 'Dzà à ahënj titi', gëgòd' à atà babay kà, bà azlaakur babay kà tadzëka mawiyay babay!"

Yesu atuw lakël anja Urusalima

⁴¹ Mok uwana Yesu azlëbëz à huç gudënj kà, adzëkà matuway à uwana adanënj ⁴² la magòday: "Agaynja kak la gël anjak kasël tatak uwana agay lapiya kà anjak kà, naka kità aw. Ama lagonay kà adadza à ahënj kà bokuba nasiriga la huma yewdi anjak. ⁴³ Kà uwana azlamavakay anik tadäsa, à wanj à uwana azlamëna mëzam anjak tadäkes à ka gay adi la kazlanja guvël la ahäl, tadätsak à ka à ama tadätsah kà makalla gesina. ⁴⁴ Tadäzakala tetuwa kak la azlabëza anjak, amiyaka bà akur tekula babay kà adägòd' à gël anja anik aw, kà uwana awul à ka à gël à mavakay uwana Zëzagëla asa à wanj anja mazlak ka aw."

Yesu la mënj gày Zëzagëla la aku

(Mata 21.12-17; Mark 11.15-19; Yuhana 2.13-22)

⁴⁵ Mok uwana Yesu adada à mënj gày Zëzagëla à agu kà, adzëkà makudëkäh azlamëna matsakalay à lag la aku. ⁴⁶ Agòd' à atà: "Aganay à uwana tatsetsër à wakità Zëzagëla à abà:

'Gày gulo kà adagay kà gày madëv kuçä, ama akul kà kadapakawwanja kà tsakur anja azlamëna gël.'"

⁴⁷ Yesu atapähla tatak à azladza la mënj gày Zëzagëla la aku koksikoksi. Azlamadzahaga anja azlamëna mav tatak à Zëzagëla, la azlamëna mapähla mapëhay à azladza, ngaha la azladza uwana masël à atà gä, la gudënj uwatà la abà, tayäh makës Yesu, kà makòday. ⁴⁸ Ama taslè kà madäh dabaray uwana asà à atà madëhënj aw, kà uwana azladza gesina kà, tafä slëm kà à masla la matsëbal slëm përa.

20

Ndzëdä anja Yesu ma aguwa à wanj ma ala la

(Mata 21.23-27; Mark 11.27-33)

¹ La vërdi anik Yesu atäpla tatak à azladza la mënj gày Zëzagëla la aku, ngaha apëh à atà gay matsidäyga. Azlamadzahaga anja azlamëna mav tatak à Zëzagëla, la azlamëna mapähla mapëhay ala, la azlamasiga anja azla Yahudiya ² tasà à wanj à slaka anja tagòdäl: "Pëhanula, la ndzëdä ma uwala à uwana kadähla azlatatak uwanay tak la? Uwa à uwana avà à ka tetëvi anja madäh azlatatak uwanay uwa?" ³ Yesu agòd' à atà: "Gi babay kà, gënav à akul tatak tekula lagwa, wülläwögëla suwanj! ⁴ Uwa à uwana aslël Yuhana à wanj kà madäh batem tak uwa? Zëzagëla ay, awma azladza takay?" ⁵ Ama atà tadzëkà mabay vok gay la tataka anata la abà kà atà à atà, ngaha tagòd: "Banja mëgòd' Zëzagëla la uwana aslël à wanj, 'Kà mana zlä ma kadinawwal gël à vok aw mi', adägòday. ⁶ Banja mëgòd: 'Azladza la uwana taslël à wanj kà', maham à ahënj dza uwana la abanay gesina tadätsah anu à gël la akur aya, kà uwana tasël kà Yuhana kà masla mapëhal gay à ahäl anja Zëzagëla kà mapäh à azladza ndzer." ⁷ Ngaha tawulälla: "Anu kà, mësël dza uwana aslël à wanj anja madäh batem aw." ⁸ La abatà Yesu agòd' à atà: "Këtä kà, gi babay kà, gëpëhakulla ndzëdä uwana gëdähla azlatatak uwanay babay zlä à ama aw."

Gay la gay la abà anja azlamagamza maksafër gä

(Mata 21.33-46; Mark 12.1-12)

⁹ Kiya uwaga Yesu adzëkà mapëh gay la gay la abà uwanay à maham à ahënj dza: "Dza anik atsëb gày matavëruk anja, asäkla uwaga la azlamagamza anja la ahäl, ngaha adä

an̄ha kerk̄er à gudon̄j anik, asáf la abata.* ¹⁰ Mok uwana adasal kà, aslèl dza an̄ha à azlamagamza à tsòh, kà mavàl humà mahon̄ay an̄a tatak guf an̄ha. Ama mok uwana azlamagamza tanon̄on̄j kà, tazlàbal, ngaha takudèk la ahàl deyday. ¹¹ Bà goton̄an̄j aslèl dza anik aya. Ama atà tazlàb à gèl, ngaha tatsèkal magodahay à gèl, la makudèkay la ahàl deyday babay. ¹² Aslèl dza anik kà mamakèr aya. Ama tatsàh, tadfahal anik à vok, ngaha tamèl à tetèvi à tsòh. ¹³ Dza an̄a guf matavèruk agòd: “Mana à uwana gòdehøn̄j lagwa zlà ma?”, agòd la gèl an̄ha, ‘Gèslèlla à atà bèzi gay lèw gulo, zlahaw kà, tadàslèkaw masla.’ ¹⁴ Ama mok uwana tanon̄j masla, azlamagamza tatsatsèl vok gay kà atà à atà, tagòd: ‘Masla la uwana masla mazuw gày, sàw à wan̄ katskats, mèkèd pèra, anu mèdàbòd à mazuw gày à gèl!’ ¹⁵ Tadùw à uda la guf la abà, takèd.”

“Ama kakay dza an̄a guf matavèruk adàfahatàn̄j à vok ma? ¹⁶ Adàsa à wan̄ adàkad azlamagamza maksafèrga uwaga gesina, ngaha adàvè guf à ahàl an̄a azladza anik uwana tadàvahal mahon̄ay an̄a matavèruk la kaslà uwana asal gesina.” Ama mok uwana tatsènà uwaga tagòd: “Kiya uwaga apakà vok aw!” ¹⁷ Ama Yesu anèrèz atà la magodafay: “Uwanay tatsètèr, ma mana asal mapèhla ala tak ma?

‘Akur uwana azlamèna man̄jal gày tapèsèw kà,

Masla la uwana adagay akur mawaf gày gesina.*”

¹⁸ Kèla dza uwana atèd à akur uwanay à afik kà adàkalahla. Ama ban̄a akur uwanay la uwana atèd à dza à gèl kà, aslèrèdøn̄j ala kèdønna.”

¹⁹ Azlamèna mapàhla mapèhay ala la azlamadzahaga an̄a azlamèna mav tatak à Zèzagèla tayàh kà makès Yesu la kaslà uwatà. Ama guba akès atà kà maham à ahøn̄j dza, kà uwana tasèl kà apèh gay la gay la abà uwaga kà lakèl an̄atà.

Mapèl hadama à møn̄j sufèl an̄a azla Rom

(Mata 22.15-22; Mark 12.13-17)

²⁰ Kiya uwaga kà mabèz à Yesu à tsòh kà, azlamøn̄ga taslèl azlamèna matsèb slòm, uwana tapakà gèl an̄atà ala kà bokuba azladza dziriga, awkà bokuba azlamèna matsèb slòm pèra aw, kà mabèzal à tsòh la gay mawisiga uwana la abà, atsà à wan̄ la gay an̄ha la awtày amiyaka tekula, ngaha kà atà an̄a mav masla à ahàl an̄a azlamèna makoray. ²¹ Kiya uwaga tanàval à gay ala la magodafay: “Møn̄ga, mèsèl kà uwana kapèhay, la uwana katapla à azladza, kà dziriga, ngaha babay kà kakèsani dza makasay aw, ama la dziriga, la tetèvi an̄a Zèzagèla à uwana katapla à azladza. ²² Anu ma tetèvi la ahøn̄j, kà mapèl hadama gami à møn̄j sufèl Zèsar ay, awma mapèhay gami avè à anu tetèvi aw kèlay?” ²³ Bokuba uwana Yesu asèl demdem an̄atà kà, agòd à atà: ²⁴ “Pèhàwgèla akur sili uwatà dadàn̄j tsi”, agòd à atà. “Gèl la slòm uwanay ma an̄a uwa, la sili uwanay la afik uwa?”, agòd à atà. Tagòfal: “An̄a Zèsar.” ²⁵ Kiya uwaga Yesu agòd à atà: “Kità kà, pèlèw à møn̄j sufèl Zèsar tatak uwana an̄ha, ngaha pèlèw à Zèzagèla uwana an̄ha suwan̄!” ²⁶ Kiya uwaga kà, tabèz à gay à tsòh kà makèsla masla aw, kà uwana gay an̄ha uwana apèh la huma maham à ahøn̄j dza kà mawisiga la abà aw, lèw avàl atà à gay kà mawulla gay à uda an̄ha, tadzà à ahøn̄j titi.

Manavay lakèl an̄a mawul à uda la mamètsay

(Mata 22.23-33; Mark 12.35-37)

²⁷ Kiya uwaga azladza anik la tataka azla Sadukiya la abà, atà uwana: ‘Mawul à uda la mamètsay la ahøn̄j aw’, tagòd, tasà à wan̄ à slaka Yesu kà manaval: ²⁸ “Møn̄ga, aganay uwana Musa apèh: Ban̄a dza amètòs à mis ala kokuɖa mabèz bèzi kà, say deda an̄ha azèb mis an̄ha à uda la gày kuɖa, ngaha atsizilla ala tsèhay an̄ha ala.*” ²⁹ Azladza la ahøn̄j atà mèdèf la azladeda an̄atà. Magolga gà azèb mis, amètsal akèlla ala kokuɖa mabèz bèzi. ³⁰ Deda masèla ngaha mamakèr tazàb mis uwaga à uda la gày kuɖa. ³¹ Kiya uwaga tazàb tsèràh à mèdèf nna gesina. Gesina an̄atà tamàtsàlàn̄j ala kokuɖa mabaz bèzi la mis uwaga. ³² Uwana uwaga adada à lig kà, mis amètòs bay suwan̄. ³³ Ngaha ma la vuɖ mawul à uda la mamètsay, ma mis ma adàgèdèfay ma à uwa, tsa atà gesina an̄atà kà tazàb uwa?”

³⁴ Ngaha Yesu agòd à atà: “Azladza an̄a zamana uwanay la uwana tazèb vok. ³⁵ Ama azlauwana Zèzagèla adàtsatsamani atà kà mabèz à sifa adèw gay aw, tadàwul à uda an̄a madz à ahøn̄j la sifa uwana adàdèw gay aw kà, atà kà, tadàzàb vok aya aw. ³⁶ Kà uwana la dziriga gà kà, tadàmatsay aya aw, tadàpakahay kà bokuba azlamalika, ngaha tadàgahay azlabèza an̄a Zèzagèla, à kà uwana tawul à uda la mamètsay kà madz à ahøn̄j la sifa. ³⁷ Iyay, lakèl an̄a mawul à uda la mamètsay kà, Musa apèh lakèl an̄ha la wakità la abà la paraka:

“Sufəl Zəzagəla gulo, Zəzagəla aña Abərahām, Zəzagəla aña Isak, ɲgaha Zəzagəla aña Yakuba bay.”³⁸

³⁸ Zəzagəla kà Zəzagəla aña azlamazimnekiɗ aw, ama aña azladza uwana la sifa, kà uwana tatak gesina uwana la sifa kà aɲha.” ³⁹ La kità kà, uwana tatsən uwaga kà, azlaməna mapàhla wakità aña mapəhay ala tagòɗ: “Məɲga, uwaga kà lela kapəh.”
⁴⁰ Kà uwana taslā manaval gay aya aw.

Kristu atà la David

(Mata 22.41-46; Mark 12.35-37)

⁴¹ Yesu agòɗ à atà: “Kakay tagòɗay kà Kristu kà Kona aña David ma? ⁴² Kà uwana David la gəl aɲha kà agòɗ à wakità aña Mahabay la abà kà:

“Sufəl Zəzagəla agòɗ à Sufəl gulo:

Dzà madzay la ahàl kaf gulo lakəl

⁴³ tsərəh à uwana gəbək à ka azlaməna məzam aɲak à tsəh asik!”⁴⁴

⁴⁴ Tsa banya David la gəl aɲha kà azàlalla Sufəl ma, kakay apək kona aɲha ma?”

“Dahàw hanjkəli kà azla Farisəya la azlaməna mapàhla wakità

mapəhay ala”, Yesu agòɗ

(Mata 23.1-36; Mark 12.38-40)

⁴⁵ Mok uwana maham à ahəɲ dza atsəbəl sləm kà, Yesu agòɗ à azlaməna matapla la slaka aɲha: ⁴⁶ “Dahàw hanjkəli kà azlaməna mapəhla wakità mapəhay ala kà uwana atà kà, asa à atà mauguzahay la azladawara məɲga məɲga gà la vok, kà mapapatla dza. ɲgaha asa à atà kà azladza tasukw atà kà la azlabarama uwana la ama mahamay dza la abatà, asa à atà madza madzay kà la slaka teraɲa la gày madəw kuɗa la aku, ɲgaha aya asa à atà madza madzay kà la slaka delga la tatak may lakəl. ⁴⁷ Atà kà, azlaməna mazaw azlamis kuɗa à uda aya, ɲgaha asà à atà mavakàh à madəw kuɗa à abà la slaka madəw kuɗa. Atà kà tadàbəzal seriya kà dzanɗzanɲa.”

21

Mav tatak à Zəzagəla aña mis kuɗa

(Mark 12.41-44)

¹ Yesu anəɲ à slələf à gəl kà, anəɲà azlagalepi uwana tawàts sili à sahar aña ofərand à abà la məɲ gày Zəzagəla la aku. ² La abatà bay kà anəɲà mis kuɗa kuɗa uwana awiɗts kalamay səla à abà la abatà la ləw tekula. ³ Yesu agòɗ: “La dziriga, gəpəh à akul kà, mis kuɗa uwanay kà avà kà aduwa azladza anik uwanay gesina. ⁴ Azladza uwanay tavà kiya uwanay kà, kà uwana adabaday la slaka aɲatà, ama mis kuɗa uwanay kà, azəb à uda kà uwana agà la ahàl aña madzadzarla gəl aɲha gesina.”

Yesu apəh gay makal məɲ gày Zəzagəla à ahəɲ

(Mata 24.1-2; Mark 13.1-2)

⁵ Azladza anik tapəh lakəl aña məɲ gày Zəzagəla kà ahəɗ. ‘Madahala vok à uda gà, la azlaakur delga delga gà’, tagòɗ, ‘ɲgaha la azlatatak anik anik uwana tavàh à Zəzagəla.’ Yesu agòɗ à atà: ⁶ “Mavakay adàsa à waɲ, kà azlaakur uwanay adàdza à ahəɲ kiya uwanay aw, amiyaka bə akur tekula adàgəɗfəl à gay aw, tadàbəzlah à ahəɲ gesina.”

Azlamatərbəy uwana adàpəhla madəw gay gudəɲ à vok ala

(Mata 24.3-14; Mark 13.3-13)

⁷ Kiya uwaga tanàval à gay la: “Məɲga, mbà à tatak uwaga adàpəka vok ma? Tatak ma uwala à uwana adàpəhanula zlà?”

⁸ Kiya uwaga Yesu agòɗ à atà: “Dahàw hanjkəli, dza apapat akul aw, kà uwana azladza aɲuwaw tadàsaha à waɲ la sləm gulo, à uwana ‘Anu azlakristu. Lagwa kà, kaslā aɲha la uwanay adàsa à waɲ lagwa’, tadàgòɗay. Ama kadànəfaw atà aw. ⁹ Banya kadàtsənaw gay lakəl aña guvəl, la azlamawiyay aɲha kà, ləw adàval akul à gay aw, kà uwana uwaga kà say leri apaka vok dadəɲ, ama uwaga kà makəɗ gəl à ahəɲ aña gudəɲ à vok dadəɲ aw.”

¹⁰ Kiya uwaga agòɗ à atà: “Azladza tsəhay anik tadàpa guvəl la azlatsəhay anik, ɲgaha makoray anik adàpa guvəl la makoray anik. ¹¹ Azlamabəlak à vok aña kutso adàgəhay la ahəɲ aɲuwaw, dɗuvats la azlamay, la matərbəy adagəhay la ahəɲ la azlaslaka anik anik. Azlatatak guba, la azlanadzipo məɲga tadàsa à ahəɲ la zagəla.”

¹² “Ama kà uwaga aña mapak vok gesina kà tadàkasah akul, tadàtsərəkwah akul tadàtərbəbah akul la azlagày madəw kuɗa la aku, ɲgaha tadàwats akul à danɲay, tadàbəyàh akul à huma aña azlasufəl, ɲgaha à huma aña azlalawan kà gi. ¹³ Uwaga la uwana

adavà à aku tetèvi kà maz sayda gulo. ¹⁴ Lagwa kà, gədfawanj à afik la ləv ankul la tsəh kà akul anja magogotsay kà anja mahəl à ahən aw. ¹⁵ Kà uwana gi la gəl gulo la uwana gədəguway la panjaw ankul la awtəy, kà mav à akul matsihila kà masla məzam ankul anja maməl akul gəl à ahən aw. ¹⁶ Tekedika kà, bə azlababa ankul, la azladedə ankul dardarga, ngaha la azlaslawda ankul la uwana tadətsərkwah akul. Ngaha tadəzah sifa anja azlaanik ankul ala aya. ¹⁷ Azladza gudən à vok gesina tadəpəsew akul kà uwana kawoyaw gi. ¹⁸ Ama bə la uwaga kà, amiyaka bə anjid takasagəl ankul tekula babay kà adəzila aw. ¹⁹ La matsizilla à ahən lela ankul la uwana kadəbəzaw à sifa ankul.”

Yesu apəh gay makal Urusalima à ahən

(Mata 24.15-21; Mark 13.14-19)

²⁰ “Mok uwana kadənənjaw azlaməna guvəl tadəkəs gay à Urusalima à adi kà, səlāw kà nekwa: ‘Takal à ahən adəgay’, kadəgodaw. ²¹ Kiya uwaga azlauwana atə la Yahudiya kà, tadəhoy à gudən à afik. Ngaha azlauwana tadəgay la huf anja Urusalima kà, tadəza vok, ngaha azlauwana la lig gə la uda kà, tadəda à abə aya aw. ²² Ama azlamavakay uwaga kà azlamavakay anja seriya la mazay, ama kà magəd uwana à afik tatsətsər à wakitə Zəzagəla à abə. ²³ Ngərpa adəgay la azlamis uwana la bəza la huf, la azlauwana bəza vərna aga à atə la ahəl la mavakay uwaga, kà uwana matərbəy la mapak ləv anja Zəzagəla adəpəhla vok ala la tataka azlatsəhay uwanay la abə. ²⁴ Tadəkədəh atə la katsakar, tadəpakah atə ala kà azlamayə la tataka azlatsəhay gudən à vok la abə. Azladza uwana azla Yahudiya aw, tadəhabah Urusalima à tsəh tsərəh à uwana kaslə anjatə adədəv à gay.”

Mas à ahən anja Kona anja dza

(Mata 24.29-31; Mark 13.24-27)

²⁵ “Azlaməsəlay, la azlanadzipo anik anik la afats la abə, la təla la abə, la azlatsəsilinj, ngaha la kutso la abə adəgay la ahən. Gudən à vok adəgay la mazaw la gel la abə, gəl adəkəf atə à vok kà mahohumay anja maganjsay anja azladərv. ²⁶ Azladza tadəməts à gay kà ngərpa uwana adəpaka vok la kutso la abə la vəfah, kà uwana azlandzəfə uwana la zagəla tadəbələk à vok. ²⁷ Kiya uwaga kadənənjaw Kona anja dza atsa à ahən la habaga zagəla la abə, la mazləbəy, ngaha la maslay gesina. ²⁸ Mok uwana azlatatak uwaga tadədzəka mapakəh vok kà, dzərəfəkəw vok ala, tsizllāw gəl ala la matsizilla à ahən lela, kà uwana mabəlay ankul kà nekwa.”

Uwana gudəv apəhla ala

(Mata 24.32-35; Mark 13.28-31)

²⁹ Kiya uwaga Yesu apəh à atə gay la gay la abə uwanay: “Nərəzəw gudəv la azlaahəf anik anik gesina tsi. ³⁰ Banja kadənənjaw azlababasl anjatə tadzəka mafay kà, səlāw kà madara kà nekwa. ³¹ La kitə babay, mok uwana kadənənjaw azlatatak uwaga tadədzəka vok kà, səlāw kà, makoray Zəzagəla kà nekwa atsa à wanj. ³² La dziriga, gəpəh à akul: Zamanay uwanay adədəv à gay dadən kà mapak vok anja azlatatak uwaga aw. ³³ Zagəla la kutso tadədəv à gay, ama gay gulo kà, adədəv à gay aw.”

Nənjəwla gəl ankul

³⁴ “Nənjəwla gel ankul! Kà gəl anja makəf akul à vok lakəl anja tatak masay, la tatak may, la azlatatak anja gudən à vok uwanay aw! Tsa banja kitə aw kà, mavakay anja seriya adəsa à wanj adəgoruh akul. ³⁵ Kà uwana mavakay uwatə kà, adəsa à wanj kà bokuba makəs tatak anja kəda kəfu à uwana adəsa azladza à gudən à vok à gəl. ³⁶ Dzəw à ahən la adi, dəvəw kuɖa la kaslə gesina, kà akul anja mabəz ndzəfə kà matəf uwana la gay ala atsa à wanj gesina, ngaha kà akul anja matsizilla à ahən dzawwa la huma anja Kona anja dza.”

³⁷ Tekedika la afats kà, Yesu atəpla tatak à azladza la mən gəy Zəzagəla la aku, ama la mokokhu gə kà, ahəd, ahən à gudən uwana afik: ‘Gudən kuvu’, tagədəl. ³⁸ Maham à ahən dza gesina asə à wanj la bən la zay la tsəh kà matsəbal sləm la mən gəy Zəzagəla la aku.

22

Azlamasiga takəs sawaray kà makəs Yesu

(Mata 26.1-5; Mark 14.1-2; Yuhana 11.45-53)

¹ Mok uwana uwaga adada à lig kà, madəvaday anja Pain uwana kokuɖa tatak maməslən ala, à uwana tazalalla Paska agay nekwa. ² Kiya uwaga azlamadzahaga

✧ 21:22 21.22 Hosəya 9.7 ✧ 21:25 21.25 Yesayya 13.10; Yoyel 2.31 ✧ 21:27 21.27 Daniyel 7.13 ✧ 22:1 22.1 2Musa 12.1-27

anja azlaməna mav tatak à Zəzagəla, ngaha la azlaməna mapàhla mapəhay ala tayəh dabaray kà makəf Yesu, ama guba akəs atà kà maham à ahəj dza.

*Yudas adàdah vok à ahəj kà mav Yesu à ahəl anja azlamasiga
(Mata 26.14-16; Mark 14.10-11)*

³ Kiya uwaga seteni aguwà la Yudas uwana la abà, tazàlalla Iskariyot, tekula anja azlaməna matapla kulo gəl anja səla. ⁴ Ngaha masla ahəd kà matsən vok gay la azlamadzahaga anja azlaməna mav tatak à Zəzagəla, la azlaməngə anja azlaməna manəhəla mənəj gəy Zəzagəla, kà mav à atà Yesu à ahəl. ⁵ Tarəb mənəgə, “Mədàvə à ka sili!”, tagəfal. ⁶ Yudas akəs la ahəl səla, ayəh tetəvi kà maf à atà Yesu à ahəl kokudə matsənənj anja maham à ahəj dza.

*Yesu adàh tatak may anja Paska à ahəj
(Mata 26.17-25; Mark 14.12-21; Yuhana 13.21-30)*

⁷ Kiya uwaga mavakay anja Pain uwana kokudə tatak maməsənj ala, uwana azladza takəfəh magadzaw adada à abà. ⁸ La kità, kà Yesu asləl azla Piyer atà la Yuhana la magəf à atà: “Dəw, kadàdahaw anu tatak anja madəvaday Paska à ahəj, kà anu anja mazuway!” ⁹ “Lala asà ka mədəy anja madəhənj à ahəj la?” tagəfal. ¹⁰ Ngaha agəf à atà: “Mok uwana kadabəzaw à huđ gudənj à abà kà, kadəgagamaw la dza uwana iyaw lakəl la tuguzl gə. Dənəfəw masla à gəy uwana à abà, adàda à abà. ¹¹ Ngaha kadəgəfəw à zil gəy: ‘Mənəgə anav gəy, uwana adəzəw tatak may anja Paska la aku, la azlaməna matapla la slaka anja la slaka anjak.’ ¹² Kiya uwaga adəpəhakulla gəy madəhənj à ahəj gə uwana lakəl anja gəy anik la afik, ngaha kà la abatà la uwana kadàdahaw tatak may à ahəj.” ¹³ Mok uwana taday kà, tabəz à tatak à gəl gesina bokuba uwana Yesu apəh à atà, ngaha tadzəkà madəh vok à ahəj kà anja madəvaday Paska.

*Tatak may tsikaslagə
(Mata 26.26-30; Mark 14.22-26; 1 Korintiya 11.23-25)*

¹⁴ Mok uwana kasl à adaslay kà Yesu la azlaməna matapla la slaka anja tadzəh à tatak may à adi, ¹⁵ Yesu agəf à atà: “Gəwoyan kà bə mawoyay kà mazuw tatak may anja Paska uwanay anina dadənj, kà gi anja mas ngərpə. ¹⁶ La dziriga gəgəf à akul: Tetuw gədəzuway aya aw, tsərəh à uwana adəgəy magəf à afik gə la makoray anja Sufəl Zəzagəla dadənj.” ¹⁷ Azəb kətsaw à ahəl la tatak masay gə, “Kikay”, agəf à Zəzagəla, “Kəsaw kətsaw uwanay, kaslawwanj à vok à gay la tataka anjul la abà. ¹⁸ Kà uwana la dziriga gəpəh à akul kà, gədəsa iyaw matavəruk uwanay aya aw, say la makoray Zəzagəla.”

¹⁹ Ngaha azəb kaf, “Kikay”, agəf à Zəzagəla, atsakənj ala, avà à atà la magəf à atà: “Uwanay kà vok gulo ((uwana mavəy gə kà anjul. Dəhəw uwanay kà gi anja mawul akul à gəl.” ²⁰ La lig anja mazuw tatak may à gay la ahəj kà, avà à atà kətsaw iyaw la tatak masay la abà, agəf à atà: “Kətsaw uwanay kà, kətsaw makəs vok slawda mawga la aniz gulo, uwana masokw à vəfəh gə kà anjul.)”^{*}

²¹ “Ama aganay à dza uwana adàta à gi kaf à gəl mədatsəp vok à ahəl à tatak may à abà anu səla.”^{*} ²² Ndzer, Kona anja dza adədiy anja bokuba uwana tatsetsər à wakitə Zəzagəla à abà, ama ngərpə la dza uwana atal kaf à gəl, avà à ahəl anja azladza!” ²³ Ngaha azlaanik uwanay tadzəkà manavəh vok kà atà kà atà: “Uwa à uwana adzugw madəh tsəhay gə uwaga la tataka gami la abà uwa?”, tagəf.

Uwa à mənəgə gə uwa?

²⁴ Mabav vok gay atsizilla ala la tataka anja azlaməna matapla la abà, kà masəl dza uwana azlayla magay mənəgə anjatə. ²⁵ Yesu agəf à atà: “Azlasufəl anja gudənj à vok takor azladza anjatə, azlaməna ndzəfə lakəl anjatə babay asa à atà kà tazala à atà ala azladza delga. ²⁶ Ama akul kà, kiya uwaga aw. Mənəgə gə la tataka anjul la abà kà apakay kà masla mazəb kiwa. Ngaha masla makor akul aya kə, agay kə bokuba masla mazəb akul dagum. ²⁷ La dziriga, ma dza ma uwala à uwana mənəgə tak la? Uwana adza madzay la tatak may lakəl ay, awma uwana atsak tatak may à azladza, adàha à atà ala ay. Nəfà à gi kə, dza uwana la tatak may lakəl, la uwana mənəgə gə. Ama gi kə gi la ahəj la tataka anjul la abà koksikoksi bokuba masla madəhakulla tatak may. ²⁸ Akul kà akul la ahəj la gi koksikoksi la ngərpə gulo la abà. ²⁹ Ngaha bokuba gi, uwana Baba afa à gi à makoray anja à abà kà, gi babay kə gədəfa à akul à makoray à abà suwanj. ³⁰ Kà akul anja mazuway la masay tatak la table gulo la afik la makoray gulo, ngaha kadədzahaw madzay la azlakursi sufəl la afik kə madəh seriya à azlatsəhay kulo gəl anja səla anja Isərayel à gəl.”

Yesu apəh gay fida anja Piyer à ahəj
(Mata 26.31-35; Mark 14.27-31; Yuhana 13.36-38)

³¹ Yesu agòd à Səmon: “Səmon, Səmon, tsənəj tsi: Seteni adanav tetəvi kà magodzal ka kà, bokuba uwana tasəh tatak kà mavəh azlafəfər gə ala la fofulo delga gə. ³² Ama gi kà gədəv kuḍa kà anək Piyer, kà maḍiḅal gəl à vok anək anja maruw vok à ahəj aw, ɲgaha kà pəra anja kadəwul à tetəvi à tsəh kà, ɗadzərəḍfəhà azladedə anək ala gesina!” ³³ Piyer agòḍal: “Sufəl, gi kà ɗagəd à uwali gəgəd aw, amiyaka à ɗanay, amiyaka tadəkəḍ ka, kà gi kà, gi nekwa kà mamətsay la slaka gə à anu səla.” ³⁴ Ama Sufəl Yesu agòd à Piyer: “Tsənəj Piyer, lakana kà mewgdzagalan adawiyay ɗadən aw, kà magodəy anək kà kasəl gi aw asik makər.”

Sili, kiwa, ɲgaha katsakar

³⁵ Kiya uwaga Yesu agòd à atà: “La mok uwana gəsləl akul kokuḍa sili, kokuḍa kiwa, kokuḍa kwimik ma, kanəwkuḍa anja tatak takay?” “Awan, mənəkudə anja tatak aw”, tagòḍal. ³⁶ Kiya uwaga Yesu agòd à atà: “Lagonay kà, kiya uwatà aya aw, dza uwana sili anja la ahəj kà, ahəl, dza uwana kiwa anja la ahəj kà azəb, ɲgaha dza uwana katsakar anja la ahəj aw kà, aduw dəbḍəbi anja ala kà masukw katsakar. ³⁷ Kà uwana la ɗziriga kà tatak uwana tatsetsər lakəl gulo kà say agòd à afik, ‘Masla kà, tatugwla la azlaməna tsakana.’”
La haḍay kà, uwana tatsetsər lakəl gulo kà adagəd à afik.” ³⁸ Azlaməna matapla la slaka anja tagòḍal: “Sufəl, katsakar səla la uwanay ma diga aw takay?” Yesu agòd à atà: “Diga uwə gə.”

Yesu adəv kuḍa la Getseməne
(Mata 26.36-46; Mark 14.32-42)

³⁹ Bokuba uwana zagələ anja Yesu, asà à uda, adə anja à gudəj kuvu à afik. Azlaməna matapla la slaka anja tanəfà la tsəh. ⁴⁰ Mok uwana tabəz à slaka uwatà à abà kà: “Dəvəw kuḍa kà akul anja matəḍ à mapapatay à abà aw!” agòd à atà. ⁴¹ Masla azà à atà vok la vok ala, zad daməl akur, akədəḍ à ahəj, adəv kuḍa. ⁴² “Baba, banja asa à ka kà, zà kətsaw ɲgərpa uwanay ala la slaka gulo. Ama kadahan kà mawoyəj gulo aw, say anək!” ((⁴³ Kiya uwaga malika asà à ahəj la zagəla adzərəḍfən ala. ⁴⁴ Adəv kuḍa la mazaw la gəl mənɲa, aməts à madəv kuḍa à abà tsərəh à uwana anjuf anəḍal à adi ala, vikuza bokuba anjiz.)) ⁴⁵ Mok uwana adadəv madəv kuḍa à gay kà, asà à wan à slaka azlaməna matapla anja, abəz atà à gəl, kà atà la madzəhal anja mazaw la gəl la abà. ⁴⁶ Agòd à atà: “Kà manə kadzəwhal ma? Səw à afik dəvəw kuḍa, kà akul anja matəḍ à mapapatay à abà aw.”

Makəs Yesu

(Mata 26.47-56; Mark 14.43-50; Yuhana 18.3-11)

⁴⁷ Uwana Yesu aləg la maḅadma la abà kà, maham à ahəj dza azlənjal, atà la azla Yudas, tekula anja azlaməna matapla kulo gəl anja səla, uwana tatəpəhla tatak la slaka anja. Tazà vok à awtəy à slaka Yesu. ⁴⁸ Ama Yesu agòḍal: “Yudas, la makəs gi à vok la uwana kaduw Kona anja dza ala takay?” ⁴⁹ Mok uwana azladza uwana la Yesu tanəjə uwaga adzəkà vok kà, tagòḍal: “Sufəl, mətsəḍ à atà kudu à gəl la katsakar ay?” ⁵⁰ Tekula la tataka anja azlaməna matapla la abà adəḍ magamza anja madzəhaga anja azlaməna mav tatak à Zəzagəla, anətsal sləm lakəl ala. ⁵¹ Ama Yesu avərə gay: “Səkəw uwaga, digiya”, agòd à atà. Yesu adəḅani sləm anja dza uwatà awurən ala.

⁵² Kiya uwaga Yesu agòd à azlamadzəhaga anja azlaməna mav tatak à Zəzagəla, la azlaməjga anja azlaməna manəjla gəy Zəzagəla, ɲgaha la azlamasiga: “Kasəwəwən kà makəs gi la azlakatsakar la azlaazəva la ahəl, bokuba gi masla nabəra ɲuwə?” ⁵³ Tekeḍika kəla mavakay kà, məgəh anina la mən gəy Zəzagəla la aku, uwala katəpəw gi ahəl à vok aw. Ama uwanay kà adagay kà kaslə ankul, la ndzəḍa anja mələs.”

“Gəsəl Yesu aw”, Piyer agod

(Mata 26.57-58,69-75; Mark 14.53-54,66-72; Yuhana 18.12-18,25-27)

⁵⁴ Takəs Yesu, tadəlla à mtəga anja mən madzəhaga anja azlaməna mav tatak à Zəzagəla; Piyer anəfà à atà la tsəh zadamma. ⁵⁵ La mok uwatà kà, anasl la ahəj, tavəts akəl à kodəl à abà, Piyer adzà madzay la slaka azladza uwana la akəl la adi. ⁵⁶ Masla sləray misga tekula anəjə Piyer adzà à akəl à adi, atsəkəl yewdi à gay la magodəy: “Zil uwanay babay kà tauguzəh atə səla.” ⁵⁷ Ama Piyer adəhà fida: “Gəsəl masla aw, gəgəd à ka, mis!” ⁵⁸ Zwek la huma la gay dza anik anəjən, agòḍal: “Kak babay kà, kak tekula anətə.” Ama Piyer agòd à dza uwaga: “Awan, gi tekula anətə aw.” ⁵⁹ Mok uwana tasəfəni kà, dza anik awaslən à afik la magodəy: “Ndzər, dza uwanay kà tauguzəh

atà sèla, masla babay kà zil Galili.” ⁶⁰ Ama Piyer agòd: “Kona, gəsəl uwana asa à ka mapəhay aw!”, uwana taləg la mavats gay la abà kà, mewgdzagalan awiyà. ⁶¹ Sufəl Yesu agòla vok, anəjà à Piyer à adi, ngaha awùl à Piyer à gəl, à gay anja sufəl uwana apəhal à vok à abà uwarà: ‘Gurayna mewgdzagalan adawiyay lakana kà asik makər kà, kadəgofay kà, kasəl gi aw.’ ⁶² Piyer asà à uda atùw la iyaw tugwi.

Tadala Yesu à huma seriya anja azla Yahudiya
(Mata 26.67-68; Mark 14.65)

⁶³ Azladza uwana tanəŋla Yesu takəfəslal, ngaha tazlāb. ⁶⁴ Tawəfal lukut à yewdi à ama, tanəval: “Uwa à uwana adəf kà tak uwa? Səl zlà!” ⁶⁵ Ngaha tatsəkəl azlamagofəhay anik anik à gəl aya. ⁶⁶ Uwana məl adawula kà, azlamasiga anja azla Yahudiya, la azlamadzahaga anja azlaməna mav tatak à Zəzagəla, la azlaməna mapəhla mapəhay ala, tahamà gay à vok, ngaha tadàla Yesu à huma à azlaməna sawaray anjətà ⁶⁷ la magofay: “Baŋa kak Kristu kà: Pəh à anu!” Ama Yesu agòd à atà: “Gədapəh à akul bay kà, kafəwwal sləm aw, ⁶⁸ à bə gənava à akul à manavay tekula bay kà, kawullaw gi ala aw. ⁶⁹ Ama dagay lakana Kona anja dza adza madzay la ahəl kaf anja Baba Zəzagəla lakəl, uwana Zəzagəla adahama ala ndzəfa gesina.” ⁷⁰ Gesina anjətà tagòd: “Lagwa zlà ma, kak Kona anja Zəzagəla ay?” Kiya uwaga Yesu agòd à atà: “Iyay, kiya uwana kagofaw kà, gi masla!” ⁷¹ Kiya uwaga tagòd: “Lagwa kà, məyàh azlaməna sayda aya zlà ma aw. Anu la gəl gami kà, mədatsənəŋ paŋaw anja adagay.”

23

Yesu la huma Pilatus

(Mata 27.11-14; Mark 15.1-5; Yuhana 18.28-38)

¹ Ngaha la abatà kà, maham à ahəŋ dza gesina tatsizilla ala, tadàla Yesu à huma Pilatus. ² Tadzəkà makallal gay à vok la magofay: “Dza uwanay kà, masla mapəs à tsəh à gudəŋ gami à afik, ‘Dza apəl hadama à Zəsar aw’, agòd, ngaha ‘Gi Kristu, gi Sufəl’, agòd aya.” ³ Pilatus anəval à gay ala: “Kak la uwana kak Sufəl anja azla Yahudiya, haday ay?” “Iyay, kiya uwana kapəh”, Yesu agòdal. ⁴ Pilatus agòd à azlamadzahaga anja azlaməna mav tatak à Zəzagəla, ngaha à maham à ahəŋ dza: “Dikidiki gəbəz à mawisiga anja dza uwanay aw.” ⁵ Ama tazà kuda à zagəla la ndzəfa. “Masla la uwana apəs à tsəh à maham à ahəŋ dza à afik la matapla anja. Adzəkà la Galili, la Yahudiya gesina, tsərəh à uwana adabəzla à abanay lakana.”

Yesu la huma Herod

⁶ Mok uwana Pilatus atsənà uwaga kà, anəv: “Konnay ma, zil Galili takay?” ⁷ Uwana adatsənəŋ kà, asà à waŋ kà la makoray anja Herod la abà kà, asləl masla à slaka Herod, kà uwana la mavakay uwatà kà, Herod kà agà la Urusalima. ⁸ Mok uwana Herod anəjà Yesu kà, arəb məŋgə, kà uwana ayahay anja manəŋəŋ kà dagay uwarà, kà uwana atsənà gay uwana tapəhay lakəl anja kà delga. Ngaha adzūg kà Yesu, adahalla nadzipo. ⁹ Anəvəhal azlamənavay anjəvaw, ama Yesu abəfalma aw. ¹⁰ Azlamadzahaga anja azlaməna mav tatak à Zəzagəla, la azlaməna matapla mapəhay à azladza la abatà, tapūwla gudzi à gəl la ndzəfa. ¹¹ Herod la azlaslodzi anja takəfəslal, tatəbən, tadūwal lukut delga gə à vok, ngaha tawùlla masla à slaka Pilatus. ¹² La mok uwatà la uwana Herod atà la Pilatus takəs vok slawda, kayka uwarà kà tasà vok iyaw aw.

Seriya mamətsay atəf à Yesu à gəl

(Mata 27.15-26; Mark 15.6-15; Yuhana 18.39-19.16)

¹³ Pilatus ahamà gay azlamadzahaga anja azlaməna mav tatak à Zəzagəla à vok, la azlamalahaga anja gudəŋ uwatà. ¹⁴ Ngaha agòd à atà: “Akul, kasəwğəla dza uwanay à waŋ kà: ‘Apəs à tsəh à gudəŋ à afik’, kagofaw. Iyay, lagonay kà gənəval gay kà la huma ankul gesina, ama gəbəz à mawisiga la slaka anja kà madukwla seriya à gəl la mapuwla gudzi à gəl uwana kapūwwal à gəl aw. ¹⁵ Amiyaka Herod babay kà, anəjà mawisiga anja aw, kà uwaga à uwana asləl anu à abanay. Kiya uwaga dza uwanay adahà mawisiga takəfəla aw!” ¹⁶ Pilatus agòd: “Lagwa kà gəsləhəŋla pəra, ngaha gəduwal gəl, ada anja.” ((¹⁷ Kəla madəvaday Paska kà, gumna adawəh gəl à masla daŋay tekula uwana asa à maham à ahəŋ dza, kà uwana uwaga kà adagay zagəla anja kà madaw à atà la gəl kəla madəvaday.)) ¹⁸ Ama gesina anjətà tawiyà la ndzəfa: “Kəd kà kona uwaga, kaduwanula gəl à Barabas!” ¹⁹ (Tadūw Barabas à daŋay tekedika uwana apəs à tsəh à gudəŋ à afik, akəf dza.) ²⁰ Bə gotənəŋ Pilatus anavà atà gay ala aya, kà uwana asəl maduw gəl à Yesu. ²¹ Ama tazà kuda à zagəla la mawiyay: “Zləl masla à ahəf à adi, zləl masla à ahəf à adi.” ²² Pilatus awùlla à atà la tsəh kà mamakər la magof à atà: “Mawisiga ma uwala à uwana adahəŋ la? Gəbəzà à mawisiga la slaka anja amiyaka

bà tekula uwana takœdla aw!", Pilatus agœd à atà: "Ama gœslehœn ala la kurpi, ngaha gœduwalla à gœl." ²³ Ama tasà mawiyay à zagœla kaykay la magoƒay: "Say mazlœl masla à ahàf à adi", ngaha mawiyay anjata agœd à afik. ²⁴ Ngaha kà bokuba uwana asà à atà la uwana Pilatus agœdàn à afik, kà marab lœv anjata. ²⁵ Kiya uwaga kà, apœlla à atà masla makaƒ dza uwana ala, taduwa à ɗanɗay la mapœs à tsœh à gudœn à afik la tsœh, kiya uwana maham à ahœn dza uwaga anav. Ngaha tava à atà Yesu à ahàl, kà atà anja mafahallan, bokuba uwana asà à atà.

Matatasl Yesu à ahàf à adi

(Mata 27.32-44; Mark 15.21-32; Yuhana 19.17-27)

²⁶ Mok uwana tadàla Yesu, tagagàm la dza anik uwana slœm anja Sœmon, atsà à wanj la fœta, masla kà zil gudœn Sœren. Azlaslodzi takœs, tafàl ahàf à kuda kà manœfla Yesu la tsœh. ²⁷ Maham à ahœn dza anjuvaw, la azlamis, tanœfà la hulolo ngaha la mataway kà masla, tabàk ahàl à gœl. ²⁸ Yesu agœt ala à huma à gay, agœd à atà: "Azlamis gudœn Urusalima katuwaw kà gi aw, ama tuiwaw à gœl ankul la azlabœza ankul, ²⁹ kà uwana mavakay adasa à wanj à uwana tadàgœƒay kà: 'Marabay kà la azladœgœr, la azlauwana azlabœza tasà awà anjata aw.'" ³⁰ Kiya uwaga azladza tadàdzœka magoƒah azlagudœn: 'Tadaw anu à gœl, ngaha hàdàhàw anu à ahœn', tadàgœƒah à azladadœgwal.* ³¹ Baɗa dza adœhœn kiya uwanay la ahàf biyaga, ma kakay adàpaka vok la magolga ma?"

³² Tadàla azlamœna nakœra anik à awtày sœla, kà makaƒ atà la slaka gà. ³³ Mok uwana tabœz à slaka uwana *Golgota* tagoƒal kà, (Uwana asal magoƒay: slaka hœranj gœl), tatàslah atà à ahàf à adi tekula la ahàl kaf, tekula la ahàl gudzay anja. ³⁴ Kiya uwaga Yesu agœd: "Baba, basà à atà tsakana anjata, kà uwana tasœl uwana tadœhœn aw!" Ngaha tava hà lukut anja la tataka anjata la abà, la matsal tsatsa lakœl. ³⁵ Maham à ahœn dza la abata, azlamasiga anja azla Yahudiya uwana la abata tadzœkà makœfasilla Yesu la magoƒal: "Masla uwana abàlaha à azladza anik kà, masla la gœl anja kà, abœla gœl anja suwanj zlà, à baɗa masla kà Kristu, uwana Zœzagœla akœsani tak zlà!"* ³⁶ Azlaslodzi babay takœfaslal; tatœƒasla iyaw hamhamga.* ³⁷ ngaha tagoƒal: "Baɗa kak la uwana sufœl anja azla Yahudiya kà, bœlla gœl anjak zlà!" ³⁸ Aganay à uwana tatsetsœr à gœl anja à afik: DZA UWANAY KÀ SUFœL ANJA AZLA YAHUDIYA.

³⁹ Tekula la tataka anja azladza sœla uwana la abà tatàsl à atà à ahàf à adi atà nna, akœƒaslal la magoƒay: "Kak kà, kak Kristu aw takay? Bœlla gœl anjak, ngaha bœlla anu babay zlà!" ⁴⁰ Ama anik uwanay apisal iyaw à tsœh la kaykay agœƒal: "Kahoy yewdi anja Zœzagœla, à kà uwana kagaw la seriya tekula la abà la masla aw takay? ⁴¹ Kà anjami kà uwanay takœƒ anu kà, azlayla atà takœƒ anu. Kà uwana leri mœbœzaw à masik anja tatak uwana mœƒahàwwœn. Ama masla kà, adfahà mawisiga amiyaka bà tekula à ahàl aw." ⁴² Ngaha agœƒal: "Kamkam Yesu, dfaƒa gi à ahœn la slœm, à vuf uwana kadàgay la makoray anjak la abà." ⁴³ Yesu agœƒal: "Hafay, gœpœh à ka la dziriga: Lakana uwanay kà, kadàgay la makoray gulo la abà, anu sœla."

Mamœsay anja Yesu

(Mata 27.45-56; Mark 15.33-41; Yuhana 19.28-30)

⁴⁴ La tataka afats mœlœs apakà vok la kutso la abà gesina tsœràh afats dat magova gova gœrewni delga. ⁴⁵ Mok uwana afats adakœl mœlœs kà, bafta uwana la gày Zœzagœla la aku akwohà la tsœràh à afik tsœràh à vœƒah, la tataka la abà. ⁴⁶ Kiya uwaga Yesu awiyà la ndzœƒa agœd: "Baba, gœsaka masasœƒok gulo kà la ahàl anjak." Mok uwana adapœh uwaga la gay ala kà, amœts.* ⁴⁷ Mœnɗa anja azlaslodzi anja azla Rom anœnjà tatak uwana apakà vok gesina, adzœkà magoƒay: "Ndzer kà, dza uwanay kà, dza dziriga", ngaha adzœkà mazlœb Zœzagœla. ⁴⁸ La lig la ahœn kà, maham à ahœn dza gesina uwana tasà à wanj kà manœn uwana apakà vok gesina kà, tawul à mtœga la madaf gay lœv. ⁴⁹ Azlaslawda anja Yesu la azlamis uwana tanœfà à wanj dagay la Galili, tatsàzàl à fœta à awtày kà manœrœz tatak uwana apakà vok gesina.

Mazœb Yesu à uda

(Mata 27.57-61; Mark 15.42-47; Yuhana 19.38-42)

⁵⁰ Dza anik la ahœn uwana slœm anja Yusufu, uwana la tataka anja azlamasiga la abà, masla babay kà dza dziriga. ⁵¹ Masla kà adzugway kà lakœl anja mas à wanj makoray Zœzagœla, masla kà atsœnà sawaray anja azladza anik babay aw, masla kà zil gudœn Arimate, la kutso Yahudiya la abà. ⁵² Ahàd, abœz à Pilatus à vok kà manaval mazimnekid anja Yesu. ⁵³ Uwana Pilatus adaval tetœvi kà azœb vok anja Yesu à ahœn la ahàf la adi kà, afafàƒal lukut à adi. Ngaha adàlla à zœvay mawga uwana à agu talà à tœhus à afik, tafà

* 23:30 23.30 Hosœya 10.8 * 23:35 23.35 Mahabay 22.7,18 * 23:36 23.36 Mahabay 69.21 * 23:46 23.46

2Musa 26.31-33; Mahabay 31.5

dza à agu didi dadàŋ aw. ⁵⁴ Vuɔf uwatà kà, vuɔf maɔhà vok à ahəŋ aŋa vuɔf maduɔ ləv. ⁵⁵ Azlamis uwana tanəfà Yesu à wanŋ la tsəh dagay la Galili, tanəfà Yusufu à wanŋ, tanəŋà zəvay, ŋgaha la tsəhay maf Yesu uwana à ahəŋ tahəŋàŋ à ahəŋ la zəvay la aku. ⁵⁶ Ŋgaha tawùl à mtəga aŋatà, ŋgaha tadfahà vok à ahəŋ la azlaamàl, la azlamatərsin kà maɔhà à Yesu à vok. Ŋgaha la vuɔf maduɔ ləv kà taduw ləv bokuba uwana mapəhay agod.*

24

Mawul à uda aŋa Yesu

(Mata 28.1-10; Mark 16.1-8; Yuhana 20.1-10)

¹ Bəŋ la zay la tsəh, vuɔf ladu kà, azlamis uwatà tadàla azlaamàl la azlamatərsin uwana tadfahàŋ à ahəŋ kà madla. ² Azlamis tabəz à zəvay à gəl kà matakoslal bəlam la ama ala gà, zad zwek la gay zəvay. ³ Tadà à agu, ama tanəŋà sləb vok aŋa Sufəl Yesu aw. ⁴ Gəl akàd à atà à vok. Bokuba uwana atà la madzugway la abà kà, azlamalika səla tatsàkwàh à lukut meɔdekuga təlla gà à abà, tapəhatàla vok. Lukut aŋatà aŋəràzl atà à adi. ⁵ Ama uwana guba adakad à atà à gay gesina kà, sasukwà tadzà à ahəŋ, azladza uwatà tagod à atà: “Kà mana kayahaw dza uwana la sifa la tataka azlamazimnekid la abà ma?” ⁶ Aga la abanay aw, adawula à uda la mamətsay. Dzùgwàw lakəl aŋa uwana apəh à akul la mok uwana à lig la Galili tsi. ⁷ Say Kona aŋa dza agəy mav à ahəl aŋa azlaməna tsakanaga, ŋgaha tadətataŋ à ahəf à adi, ŋgaha awul à uda la mahəŋay mamakər.”

⁸ Kiya uwaga awùlla atà à gəl à gay aŋa Yesu uwana apəh à atà. ⁹ Ŋgaha tatsizlla ala la gəl zəvay, tadàla gay uwaga à slaka azlaməna matapla kulo gəl aŋa tekula uwanay, ŋgaha à azladza anik gesina bay. ¹⁰ Uwaga kà azla Mariyama dəg zla Magdala, Yohana, ŋgaha Mariyama iyə aŋa Yakuba, la azlamis anik uwana tahəd atà nna, tapəh gay uwaga à azlaməna matapla aŋha. ¹¹ Ama azlaməna matapla uwaga tafà sləm à gay uwaga aw, uwaga kà: ‘Gay masəŋay’, tagod. ¹² Ama Piyer atsizlla ala, ahəd à gel zəvay; anəŋà à agu kà, anəŋà kà azlagabaga pəra, ŋgaha awùl à mtəga la mavalàh à zagəla kà tatak uwana apakà vok.

La tetəvi maday à Emawus la tsəh

(Mark 16.12-13)

¹³ La mavakay uwaga Piyer awùl à lig, aŋanay azladza səla la tataka azlaməna manəf Yesu la tsəh, tadà à gudəŋ uwana sləm aŋha Emawus. Tataka aŋatà atà la Urusalima kà bokuba magur mahoy pəlis zlo mala məkwa. ¹⁴ Tavəts gay la tetəvi la ama, lakəl aŋa tatak uwana apakà vok gesina. ¹⁵ Kiya uwaga mok uwana tabəy vok la mavats gay kà, Yesu adasa à wanŋ à slaka aŋatà, tahəd la tetəvi la ama atà nna. ¹⁶ La abatà tanəŋəŋ masla, ama tatak anik adəɔd à atà gay à ahəŋ, kà aŋa masəlay. ¹⁷ La abatà Yesu abadətāmà: “Lakəl ma aŋa mana ma, kabəyàw vok gay la tetəvi la ama ma?”, agod à atà. Ŋgaha tatsizlla à ahəŋ la mazaw la gəl. ¹⁸ La kità tekula aŋatà, uwana sləm aŋha Kəleyopas, agodfal: “Kak ma, kak məkək aŋa Urusalima ay? Kasəl uwana apakà vok la mahəŋay uwanay la abà aw takay?” Dza uwaga anavà atà: “Mana apakà vok ma?” ¹⁹ “Aa, à tatak uwana apakà vok la Yesu, zil Nazaret uwana masla mapəhal gay à ahəl aŋa Zəzagəla aŋa mapàh à azladza, masla maslay, la ndzəɔfa la gay la abà la huma Zəzagəla, ŋgaha la slaka azladza ay?” ²⁰ Ama azlamasiga aŋa azlaməna mav tatak à Zəzagəla, la azlaməna makoray gami tavà à ahəl aŋa azladza aŋa makəɔay la matataŋ à ahəf à adi. ²¹ Tekedika anu mənawəŋ kà masla la uwana adəzlak Isərayel, ama lakana mahəŋay mamakər aŋha à uwana tatak uwanay apakà vok. ²² Ŋgaha aya kà, azlamis anik la tataka gami la abà, takəd anu gəl à vok. Kà uwana bəŋ la zay la tsəh lakana kà, tahəd à gəl zəvay. ²³ Ama tabəzà mazimnekid aŋa Yesu aw, tawùl à wanŋ aŋa mapəh à anu, kà azlamalika tapəh à atà vok, ŋgaha tapəh à atà la paraka, kà Yesu la adi. ²⁴ Mok uwana azlamis tapəh uwaga kà, azlaməna gami anik tahəd à gel zəvay, ŋgaha tanəŋəŋ gesina bokuba uwana azlamis tapəh, ama masla kà, tanəŋəŋ aw.”

²⁵ La kaslà uwatà Yesu agod à atà: “Kayyà, akul azladza matsən sləm aw gà, akul azlanalnal aŋa makəs mapəhay aŋa azladza uwana Zəzagəla apəh à atà gay à ahəl aŋa mapàh à azladza!” ²⁶ Kiya uwaga Kristu asà ŋgərpa dadàŋ la uwana ada à makoray aŋha à abà?” ²⁷ Kiya uwaga apəh à atà à gay uwana tatsetsər lakəl aŋha la wakità Zəzagəla la abà gesina, la wakità aŋa Musa la abà, akəɔɔal gəl la wakità aŋa azladza uwana Zəzagəla apəh à atà gay à ahəl kà mapàh à azladza.

²⁸ Uwana tazlábèz à gudəŋ uwana à abà asà à atà maday kà, dza uwaga azəb atà asik lakəl ala. ²⁹ Azladza səla uwanay tazəlal à tsəh la magodaf: “Mədza à ahəŋ anina adagay vəf.” Nġaha adagay kà madz à ahəŋ atà nna. ³⁰ Kaslà aŋa mazuw tatak may adaslay kà, tadzəkà madz à tatak may à adi la slaka gà, uwana tadzəl à adi kiya uwaga kà, azəb kaf, “Kikay”, agòd à Zəzagəla, atsakəŋ ala, avà à atà. ³¹ La katskats yewdi aŋatà apəzlla à ama ala, tsəl masla, ama azà à atà à adi. ³² “Agà! Mok uwana abafanumà, apəh à anu gay Zəzagəla la tetəvi la ama kà, ləv azlawəh kà anu à ama aw takay?”

³³ La gay uwaga hahadzək tavalàh à afik, tawùl à Urusalima. Tabèz azlaməna matapla kulo gəl aŋha tekula à gəl la azlaslagama aŋatà. ³⁴ Tagòd: “Ndzer, mənġa gami kà awùl à uda la mamətsay, kà uwana Səmon Piyer anəŋəŋ. ³⁵ Kiya uwaga azladza səla uwanay tawùl à warj à slaka aŋatà, tapəh à atà gay uwana apakà vok la tetəvi la ama, la masəl Yesu aŋatà la mok uwana atsəkà kaf ala.”

Yesu apəhla vok à azlaməna matapla aŋha anik ala aya

³⁶ Mok uwana taləg la mabafma la abà aya, à uwana Yesu atsizlla à tataka aŋatà à abà, adahà à atà ‘Ayyi’, agòd à atà: “Lapiya agay la akul!” ³⁷ La abatà aŋidz ahamà à atà à gəl mənġa, kà uwana: ‘Mədanəŋ tatak mavavat dza’, gəl agođ, agòd à atà. ³⁸ Kiya uwaga masla agòd à atà: “Kà mana kagudəkàhəwla ala ma? Kà mana katsəw gay la ləv aŋkul la tsəh ma? ³⁹ Bə, gi ndzer gəvaləw à ahəl gulo la azlaasik gulo tsi, dəbawəni gi, kà uwana tatak mavavat dza kà la sləb vok, la aslas, bokuba dza aw.” ⁴⁰ Uwana adapəh à atà gay uwaga, apəhatəla ahəl aŋha, la azlaasik aŋha. ⁴¹ Ama taslala vok aŋa makəsay aw, kà uwana marabay aduwà ndzəda aŋatà; la abatà Yesu anavà atà: “Tatak may aga la akul la ahəl ay?” ⁴² Maslà taval tenma aŋa kilfi manazayga la pəhəw malpayga, la zuway mazuway. ⁴³ Azəb, nġaha apəđ la huma aŋatà. ⁴⁴ La lig la ahəŋ agòd à atà: “Mok uwana gi la akul gəgòd à akul kà: Tatak uwana matsəserayga lakəl gulo la wakità aŋa Musa la abà la azlauwana la wakità aŋa azlaməna mapəh à atà gay à ahəl la abà kà mapəh à azladza anik, nġaha la uwana la mahabay aŋa David la abà gesina kà, azlayla kà vok apakà vok haday.” ⁴⁵ La abatà Yesu apakwà haŋkəli aŋatà, kà atà aŋa matsən wakità Zəzagəla uwaga. ⁴⁶ Nġaha agòd à atà aya: “Aganay, à gay uwana tatsetsər à abà:

'Kristu as nġərpə dadəŋ, nġaha kà masla aŋa mawul à uda la mamətsay la mahəny maməkər.

⁴⁷ Kiya uwaga azlayla vok, kazəw gay uwanay à azladza gesina la sləm aŋha, kədzaw kà la abanay la Urusalima, tsərah à makəđ gəl à ahəŋ gudəŋ à vok gesina, zəw à atà gay mapəh gay la ləv ala, la gay mabasa à atà tsakana aŋatà. ⁴⁸ Akul kà, akul azlaməna sayda aŋa uwaga. ⁴⁹ Kiya uwaga, gi la gəl gulo gədəsləlla akul Masasəđok Zəzagəla uwana à ahəŋ, Baba gulo apəh à ahəŋ uwarà, ama say: Dzəw à ahəŋ la gudəŋ uwanay tsərah à uwana ndzəda aŋa Masasəđok uwaga adàsa à akul à gəl dadəŋ, la uwana kadədaw.”

Mad à zagəla aŋa Yesu

(Mark 16.19-20; Sləray 1.9-11)

⁵⁰ La lig aŋa uwaga la ahəŋ gesina, Yesu asəlla atà à uda la gudəŋ la abà tsərah à uwana tazlábèz à gudəŋ Betaniya. Mok uwana tadabəz à abatà kà adziyla ahəl à zagəla, nġaha apis à atà gay à vok. ⁵¹ La abatà Zəzagəla azəb à slaka aŋha. ⁵² Kiya uwaga tazləbà, nġaha tawùlla à Urusalima la marabay mənġa. ⁵³ Ama tadzəhà à ahəŋ koksikoksi la mənġ gay Zəzagəla la aku kà mazləb Zəzagəla.

GAY MARABƏŃ UWANA YUHANA ATSETSÈR Evangile selon Jean

Gay anja ufaka ngaha la sifa

¹ Mok uwana Zəzagəla aləg madəh gudəŋ à vok dadəŋ kà, agà la ahəŋ uwana tazàlalla Gay. Gay uwatà adzà à ahəŋ la Zəzagəla. Gay uwaga kà Zəzagəla la gəl anja. ² Gay uwaga agà la Zəzagəla dagay madzəka. ³ Tatak gesina uwana Zəzagəla adahəŋ kà, kà masla; tatak anik la ahəŋ à uwana Zəzagəla adahəŋ kokufa masla aw. ⁴ Sifa kà la masla la abà, sifa uwatà kà avà ufaka à azladza. ⁵ Ufaka uwaga aùf la mələs la abà, mələs aslalà vok à mamatsin əla aw.

⁶ Zəzagəla aslèl dza anik uwana à waŋ, sləm anja Yuhana. ⁷ Asà à waŋ kà, kà maz sayda anja ufaka. Asà à waŋ kà, kà azladza gesina kà madiŋal gəl à vok, kà madegolay uwana apàh. ⁸ Masla à Yuhana agà ufaka la gəl anja aw, ama asà à waŋ kà maz sayda lakəl anja ufaka uwaga. ⁹ Ufaka uwaga kà agà ufaka dziriga, asà à waŋ à gudəŋ à vok, uwaga aùf à azladza gesina.

¹⁰ Gay uwaga agà la gudəŋ la vok. Zəzagəla adahə gudəŋ à vok kà la masla, ama azladza uwana la gudəŋ la vok tasəl aw. ¹¹ Agà la tataka anja azladza anja la abà, ama azladza anja takweskà. ¹² Ama azlauwana takəs, la azlauwana tadiŋal gəl à vok, avà à atà maslay kà mapakahay azlabəza anja Zəzagəla. ¹³ Tapək azlabəza anja Zəzagəla la tetəvi anja azladza la mayyay anja vədəh, bokuba uwana azladza tatugway aw. Ama Zəzagəla la uwana, avà à atà sifa mawga.

¹⁴ Gay uwaga apək dza la sləb vok, adzà à ahəŋ la tataka gami la abà. Ləv anja kà tekula la slaka azladza, adahənla la dziriga, kà anja kà, apəhanula mazləbay anja, uwana la mazləbay uwana bəzi tekula abəzal la slaka Baba anja. ¹⁵ Yuhana azà sayda lakəl anja, awiyà: "Lakəl anja gəpəh à akul à uwana gəgòd: 'Masla manəf gi à tsəh à waŋ atsa à waŋ, ama masla la uwana mazləbayga kà gi, masla kà agà la ahəŋ dagay uwana taləg mayyi gi, aduwa gi la maslay', gəgòd à akul."

¹⁶ Anu gesina məbəzà à masik la gorobu la abà; məbəzà à mapis gay à vok kaykay lakəl anja mapis gay à vok aya. ¹⁷ Zəzagəla avà à anu mapəhay la ahəl anja Musa, ama vok mahamay la dziriga kà tasà à waŋ kà la ahəl anja Yesu Kristu. ¹⁸ Dza adanəŋ Zəzagəla dikiidiki aw, ama Kona anja tekula gə, uwana la makəla anja Baba lakəl, la uwana apəhanula masla.

Sayda anja Yuhana masla madəh batem

(Mata 3.1-12; Mark 1.1-8; Luka 3.1-18)

¹⁹ Aganay uwana Yuhana apəh à mok uwana azla Yahudiya la Urusalima taslèl azlaməna mav tatak à Zəzagəla la azlaməna sləray la mənə gay Zəzagəla la aku à slaka anja kà manaval: "Kak ma, kak uwa?" ²⁰ Akweskà mawulatàla aw, ama adzadəŋ ala la paraka la huma anjatà gesina: "Gi kà, gi Kristu aw." ²¹ "Kak uwa zlà ma uwa? Kak Eliya, uwana tapəh uwarə ay?" "Awan, gi masla aw", Yuhana agòd à atà. "Kak masla mapəhal gay ahəl anja Zəzagəla ay?", tagòdal. "Awan", agòd à atà. ²² Kiya uwaga tagòdal: "Kak uwa zlà ma uwa? Say kapəh à anu gay ngaha mədəpəh à azlauwana taslèl anu à waŋ. Kak la gəl anjak ma: 'Gi uwà' kagòd lagwa uwa?" ²³ Yuhana agòd à atà: "Gi kà gi

'Kuda anja dza uwana awiyay la kəsaf la abà: Dahəw tetəvi tərəra à ahəŋ kà anja Sufəl!'"* (Kiya uwaga à uwana masla mapəhal gay à ahəl Yesayya atsetsèr à wakità Zəzagəla à abà)

²⁴ La tataka azlaməna masləl atà à waŋ uwatà la abà kà, azla Farisəya la abà. ²⁵ Tanavà Yuhana: "Tsa anja kak Kristu aw, kak Eliya aw, kak masla mapəhal gay à ahəl kà mapəh à azladza aw, ma kà mana kadəh batem zlà ma?" ²⁶ Yuhana agòd à atà: "Gi gəfəhakullanj batem kà la iyaw; dza anik la ahəŋ la tataka anjul la abà, kasəlaw aw, ²⁷ atsa à waŋ la lig gulo la ahəŋ, ama gi bay kà gəsla kà mapəl zuwid kwimik anja ala babay aw."

²⁸ Tatak uwaga gesina adahə vok la Betaniya, la gay dərəv uda anik anja mukwà Urduun, la slaka uwana Yuhana adahə batem.

Yesu kà Magadzaw anja Zəzagəla

²⁹ La bebəŋ gà, Yuhana anəŋà Yesu atsa à waŋ à slaka aŋha, agòd: “Aganay magadzaw aŋa Zəzagəla uwana azəb tsakana aŋa gudəŋ à vok gesina. ³⁰ Lakəl aŋha la uwana gəpəh à akul, gəgòd à akul: ‘Dza la ahəŋ atsa à waŋ la lig gulo. Masla la uwana mazləbayga kà gi, kà uwana masla kà, agà la ahəŋ dagay uwana taləg mayyi gi. ³¹ Gi kà gəsəl masla aw, ama gəsà à waŋ kà maďàh batem aŋa iyaw à azlatsəhay Isərayel, kà atà aŋa masəl masla.’ ”

³² Yuhana agòd aya: “Gənəŋà Masasəfok tsikasla atsa à ahəŋ la zagəla bokuba haba-koku, adzà à gəl aŋha. ³³ La mok uwatà gəsəl masla aw, ama Zəzagəla la uwana asləl gi kà gi aŋa maďàh batem: ‘Masasəfok adàdza madzay lakəl aŋha, masla kà adəfah batem la Masasəfok Zəzagəla’, agòd à gi. ³⁴ Gədanəŋ uwaga, gəgəđiŋ à afik, kà masla la uwana Kona aŋa Zəzagəla”, Yuhana agòd.

Azlaməna matapla la slaka Yesu Kristu teraŋa

³⁵ La bebəŋ gà aya kà, Yuhana adatsizlla à ahəŋ la abatà la azlaməna matapla la slaka aŋha səla. ³⁶ Uwana anəŋà Yesu ada à awtəy agòd: “Aganay Magadzaw aŋa Zəzagəla!” ³⁷ Azlaməna matapla aŋha səla uwaga kà, tatsənà uwana apəh, ŋgaha tanəfà Yesu. ³⁸ Yesu agolà vok, anəŋà à lig, anəŋəŋ kà tanəfà masla, ŋgaha anavà atà: “Mana kayahaw ma?” Tagòd: “Rabbi, kadza à ahəŋ ma lala?” (Rabbi asal magòfay: Məŋga) ³⁹ Agòd à atà: “Sàw à waŋ, kadənəŋawwan!” ŋgaha tahəd, tanəŋà slaka madz à ahəŋ aŋha. (Mok uwaga kà sa ufaď aŋa mokokhu) Tadəvə mavakay uwatà à gay atà nna.

⁴⁰ Tekula la tataka aŋa azladza uwana la abà tatsənà sayda aŋa Yuhana, anəfà Yesu, masla la uwana Andəre, deda aŋa Səmon Piyer. ⁴¹ Teraŋa dadəŋ, Andəre agagəm la deda aŋha Səmon, agòd: “Kay, mədanəŋ Kristu, bokuba magòfay: dza uwana Zəzagəla afəl dzakwa à gəl!” ⁴² Adàla Səmon à slaka Yesu. Yesu anəřəz masla, agòd: “Kak la uwana, kak Səmon kona aŋa Yuhana, la huma la gay sləm aŋak adəgay Kayfas.” (Uwana asal magòfay kà dzəgla)

Yesu azala Filip atà la Natanayel

⁴³ La bebəŋ gà, asà à Yesu kà mad à kutso Galili ŋgaha tagagəm la Filip, agòd: “Nəfà à gi!” ⁴⁴ Filip kà zil Betsayda, gudəŋ aŋatà tekula la Andəre la Piyer. ⁴⁵ Filip tatagəm la Natanayel, ŋgaha agòd: “Mədanəŋ dza uwana Musa apəh lakəl aŋha la wakità mapəhay la abà, baməraکا azlaməna mapəh à atà gay à ahəl kà mapàh à azladza babay kà, tapəh lakəl aŋha, sləm aŋha kà, Yesu kona aŋa Yusufu uwana la gudəŋ Nazaret.” ⁴⁶ Natanayel agòd: “Dziri kà tatak delga aguwa à waŋ la Nazaret ay?” Filip agòd: “Sà à waŋ, kadənəŋəŋ!”

⁴⁷ Mok uwana Yesu anəŋà Natanayel ada à awtəy à slaka aŋha kà, apəh lakəl aŋha: “Aganay zil Isərayel deŋdeŋga, mawisiga la ahəŋ la masla la abà aw.” ⁴⁸ Natanayel anavà: “Kakay kasəl gi ma?” Yesu agòd: “Gənəŋà ka à mok uwana kak la tsəh gudəv, à mok uwana Filip aləg mazala ka.” ⁴⁹ Kiya uwaga Natanayel agòd: “Rabbi, kak la uwana kak Kona aŋa Zəzagəla, kak Sufəl aŋa azla Isərayel!” ⁵⁰ Yesu awulà ala: “Kadiŋəl gəl à vok kà, kà uwana gənəŋà ka la tsəh gudəv, gəgòd à ka takay? Kadənəŋ azlatatak uwana tadəduw uwanay gesina.” ⁵¹ Yesu agòd aya: “La dziriga gəpəh à akul, kadənəŋaw zagəla mapəzl à ama ala gà. Tsad tsatsad, azlamalika aŋa Zəzagəla tadàda à afik, ŋgaha tatsa à ahəŋ à gəl aŋa Kona aŋa dza.”^{*}

2

Nadzipo teraŋa uwana Yesu adahaŋ la mazəb vok la abà la Kana

¹ Uwana mahəŋay səla adada à lig kà mamakərga, kà mazəb vok apakà vok la Kana la kutso aŋa Galili. Iyà aŋa Yesu la abatà. ² Yesu atà la azlaməna matapla la slaka aŋha bay kà tazàla atà à mazəb vok uwaga à abà. ³ Mok uwana iyaw matavəruk adadəv à gay. Iyà aŋa Yesu agòd: “Tatak masay la ahəŋ aya aw!” ⁴ Ama Yesu awulà ala: “Mìs, kak la uwana kapəh à gi uwana asa à gi maďəhəŋ takay? Kaslà gulo adaslay dadəŋ aw.” ⁵ ŋgaha iyà aŋha agòd à azlaməna sləray: “Dahaw tatak uwana adapəh à akul gesina!”

⁶ La abatà agà la ahəŋ yuŋ mukwà, uwana azla Yahudiya tataďani iyaw à abà kà maďàhlaŋ sləray kà mapalahla azlaasik kà uwana uwaga kà bokuba mafəla fəla aŋatà, kà magay tsidəŋa. Kəla yuŋ tekula adəh tuguzl zlo, baŋaw mukwa. ⁷ Yesu agòd à atà: “Hànaw iyaw à azlayuŋ uwanay à abà pawasl papawasl.” Tahànəŋ ala bokuba uwana apəh à atà. ⁸ Kiya uwaga Yesu agòd à atà: “Tadawni iyaw uwaga nuv, kadawla à məŋga aŋa maďəvaday.” Tatəďani, tadàlla. ⁹ Məŋga aŋa maďəvaday atapəŋ, kà apək iyaw matavəruk. Masla asəl slaka uwana aguwa à waŋ à abà aw. (Ama azlaməna

matat iyaw kà, tasel slaka uwana aguwa à waɲ la abà) Azàla masla mazèb mis, ¹⁰ ngaha agòfal: “Azladza kà tatsə̀vkàh mavàhay kà iyaw matavèruk matsidəyga dadàɲ, baɲa azlaməna mazalàh atà gesina tasay kà, la lig la ahəɲ kà pəra, tavàh uwana atsid aw. Ama kak kà, kabə̀k matsidəyga à ahəɲ dadàɲ.”

¹¹ Uwaga la uwana nadzipo matera uwana Yesu adəhàɲ la Kana la kutso Galili, apə̀hla mazləbay aɲha ala, kà uwana à uwana azlaməna mataplà la slaka aɲha tadiɲ gəl à masla à vok.

¹² La lig aɲa uwaga la ahəɲ, ahàd à gudəɲ Kapernahum la iyà aɲha, la azladedə aɲha, la azlaməna mataplà la slaka aɲha, tadzàni à ahəɲ la abata.

Yesu la məɲ gəy Zəzagəla la aku

(Mata 21.12-13; Mark 11.15-17; Luka 19.45-46)

¹³ Uwana madəvaday aɲa Paska aɲa azla Yahudiya nekwa kà, Yesu ahàd à Urusalima.*

¹⁴ Aβəz azlaməna matsakalay à gəl, la məɲ gəy Zəzagəla la aku. Tadàw sla ala, la azlatuwaɲ, la azlahabakoku, aβəz azlaməna mabə̀dla sili à gəl bay, tadzàh madzay la huma aɲa sili aɲatà, taβə̀dla. ¹⁵ Adəhà kurpi aɲa zuwid, akudə̀kàh atà à lag gesina la məɲ gəy Zəzagəla la aku, la azlatuwaɲ, la azlasla aɲatà, adakwà table aɲa azlaməna mabə̀dla sili à vədəh anasà sili aɲatà ala. ¹⁶ Ngaha agòd à azlaməna madaw azlahabakoku ala: “Hə̀ləw atà ala la abanay! Kapakàw gəy aɲa baba gulo ala kà gəy matsakalay aw!” ¹⁷ Təh, awùl à azlaməna mataplà la slaka aɲha gay uwana tatsetsər à wakità Zəzagəla à abà à gəl:

'Mawoy gəy aɲak gulo kà, bokuba akàl uwana abə̀bəhgəla ləv la tsəh.'*

¹⁸ Ama azlamadzahaga aɲa azla Yahudiya tanavàl: “Tsəhay nadzipo ma uwala kapəhanula kà anu aɲa masəlay kà kak la maslay kà madəhəɲ kiya uwanay la?” ¹⁹ Yesu agòd à atà: “Kàləw məɲ gəy Zəzagəla uwanay à ahəɲ, ngaha gə̀dàula à afik la mahənaɲ makər.” ²⁰ Azla Yahudiya tagòfal: “Gəy uwanay taɲàl kà tadəhà mavay dzik ufad gəl aɲha mukwà, kà pəra masla kadəwula à afik la mahənaɲ makər kagod, aah.?!” ²¹ Ama məɲ gəy Zəzagəla uwana Yesu apə̀h, kà lakəl aɲa vok aɲha. ²² Uwana Yesu adawula à uda la mamətsay kà, təh awùl à azlaməna mataplà à gəl la slaka aɲha à gay uwaga, tadiɲ gəl uwana à vok matsetserayga, ngaha la gay uwana Yesu apə̀h à atà gesina.

Yesu kà asəl tatak uwana la ləv aɲa dza la tsəh gesina

²³ Mok uwana Yesu la Urusalima, la kaslè aɲa madəvaday aɲa Paska kà, azladza aɲuvaw tadiɲal gəl à vok, kà azlanadzipo uwana adəhàtəɲ. ²⁴ Ama Yesu afà à atà gəl aw, kà uwana asəl madzugway aɲatà lela. ²⁵ Kà uwana masla kà anəkudə dza aɲa mapəhalla madzugway aw, kà uwana masla la gəl aɲha asəl uwana la ləv aɲatà la tsəh.

3

Yesu atà la Nikodemus

¹ Dza anik la ahəɲ sləm aɲha Nikodemus, agà tekula aɲa azlamasiga aɲa azla Yahudiya, masla kà zil Farisəya. ² La vəd la abà vərđi anik asà à waɲ à slaka Yesu la magòfal: “Rabbi, məsəl kà Zəzagəla aslèl ka à waɲ kà matapanula, kà uwana dza la ahəɲ adəhəɲ tsəhay nadzipo uwaga kadəhəɲ aw, tsa baɲa Zəzagəla la masla aw aw.” ³ Yesu agòfal: “Hadəy, gəgod à ka la dziriga: Dza aslala vok manəɲ makoray Zəzagəla aw, say baɲa adayyi vok mawga dəɲ.” ⁴ Nikodemus anavàl: “Kakay dza adagay magol gə, kà ayyi vok mawga aya ma? Aslala vok aɲa maul à huɖ aɲa iyà aɲha kà mayyay aya ay?” ⁵ Yesu agòfal: “La dziriga gəpəh à ka: Dza aslala vok aɲa mad à makoray Zəzagəla aw, say baɲa adayyi vok, la iyaw ngaha la Masasə̀dok. ⁶ Uwana tayyà la sləb vok, uwaga sləb vok; uwana tayyà la Masasə̀dok, uwaga Masasə̀dok. ⁷ Ləv avàl à ka à gay kà, kà uwaga gəpəh à ka aw: ‘Azlawla kà vok, say akul gesina kayyay vok mawga.’ ⁸ Afad adəfay bokuba uwana asal; katsəna madəfay aɲha, ama kasəl slaka uwana asà à waɲ la abà aw, kasəl slaka uwana ada à abà aw. Kiya uwaga à uwana apaka vok la azladza uwana tayyà vok la Masasə̀dok.” ⁹ Kiya uwaga Nikodemus agòfal: “Kakay uwaga apaka vok ma?” ¹⁰ Yesu agòfal: “Tsa kak masla mataplà à azla Isərayel la abà, kà pəra masla kasəl uwaga aw uwà?” ¹¹ Gəpəh à ka la dziriga: Məpəhay lakəl aɲa tatak uwana məsəl, ngaha lakəl aɲa tatak uwana mənəɲəɲ. Ama asa à akul makəs sayda gami aw. ¹² Tsa kadiɲaw gəl à gay aɲa azlatatak uwana apaka vok la vədəh aw ma, ngaha ma, kakay zlə ma kadəkəsaw kaslawwal à vok aɲa madiɲal gəl à vok à baɲa gəpəh à akul gay aɲa azlatatak la zagəla ma? ¹³ Dza la ahəɲ adada à zagəla aw, tsa baɲa Kona aɲa dza uwana asà à ahəɲ la afik aw aw.”

* 2:13 2.13 2Musa 12.1-27 * 2:17 2.17 Mahabay 69.9

¹⁴ “Kiya uwana uwarà Musa adzilà bebi anja adà à zagèla la ahàf la gay la fèta la abà, kiya uwaga tadàdzilla Kona anja dza à zagèla suwanj.* ¹⁵ Ngaha kèla uwabeyuwi uwana adinj gèl à masla à vok abèz sifa adèw à gay aw. ¹⁶ Kà uwana Zèzagèla awoya gudèj à vok kà kayak, à uwana avà Kona anja tekula gà uwaga, kà dèwdèw dza uwana tadinjal gèl à vok kà, tazila aw, ama kà, tadàbèz sifa adèw gay aw. ¹⁷ Zèzagèla aslèl Kona anja à wanj kà, kà seriya à gudèj à vok à gèl aw, ama kà gudèj à vok anja maèz maèlay la masla.”

¹⁸ “Dza uwana adinj gèl à Kona à vok, seriya adàkèsay aw, ama dza uwana adinj gèl à vok aw kà, seriya adakèsay, kà uwana adinj gèl à Kona tekula gà anja Zèzagèla à vok aw. ¹⁹ Aganay slaka uwana seriya aguwanj la abà: Ufaka asà à wanj à gudèj à vok, ama azladza tahaya mèlès kà ufaka, kà uwana madfehøj anjatà kà delgaw. ²⁰ Azladza gesina tadàh mawisiga kà, tapèsew dziriga anja ufaka, ngaha tatsa à wanj à ufaka à abà aw, kà uwana asa à atà kà slèray mawisiga uwaga anja mapèhla vok ala, la ufaka la abà aw. ²¹ Ama dza uwana akès dziriga kà, aday kà la ufaka la abà, kà azladza gesina anja manèhøj la dazuwaya, kà akès gay anja Zèzagèla la maslèkaway.”

Yesu atà la Yuhana masla madàh batem

²² La lig anja uwaga la ahøj Yesu atsizilla ala, ahàd à kutso anja Yahudiya à abà la azlamèna matapla la slaka anja. Tasàfàni la abata atà nna, tadàhàhà batem. ²³ La kaslà uwatà kà Yuhana adahàhà batem à azladza la Aynon, uwana nekwa la Salim, kà uwana iyaw la ahøj la abata møjga. Azladza tasàhà à wanj à slaka anja, ngaha adahà à atà batem, suwanj. ²⁴ (La kaslà uwatà kà, Yuhana kà tadùw à danj dadàj aw)

²⁵ Kiya uwaga azlaanik la tataka azlamèna matapla anja Yuhana la abà tadzèkà mabay vok gay la zil Yahudiya anik, lakèl anja tsèhay mapal vok anjatà anja magay tsidàna.

²⁶ Tahàd à slaka Yuhana ngaha tagòfal: “Rabbi, kadzugway lakèl anja dza uwana kagaw akul sèla la gay dèrèw uda anja mukwà Urdun, uwana kaz anu sayda lakèl anja takay? Lagwa kà, masla bay kà, adàh batem à azladza, azladza takèl à slaka anja gesina!”

²⁷ Yuhana agòf à atà: “Dza la ahøj aslala vok abèz tatak aw, say banja Zèzagèla adavàl.

²⁸ Akul la gèl anjul kà, akul azlamèna sayda gulo, gègòf kà: Gi Kristu aw. Ama gi à maslèl gi à wanj gà, la huma anja pèra. ²⁹ Masla mazèb mis kà masla la uwana zil mis. Ama slègud anja zil misga, adatsizilla à ahøj la makèla anja, atsèbal slèm. Banja adatsen kuda anja zil mis, arabay. Kiya uwaga à marabay gulo babay suwanj zlà. Lagwa kà, marabay gulo adahènla pawasla. ³⁰ Kà anja uwaga kà, say masla agay mazlèbayga, ngaha mazlèbay gulo atatuway.”

Dza uwana asa à ahøj la zagèla

³¹ “Dza uwana asa à ahøj la zagèla, masla lakèl anja azlatatak gesina, ama dza uwana la wèdah masla dza anja wèdah, apèhay kà gay anja wèdah bay. Uwana asa à ahøj la zagèla aga lakèl anja tatak gesina. ³² Uwana anènanj, uwana atsènànj la uwana apèhay, ama dza akès mapèhay anja aw. ³³ Kèla uwabeyuwi uwana akès mapèhay anja, agèdanj à afik kà Zèzagèla kà dziriga. ³⁴ Dza uwana Zèzagèla aslèlla à wanj apèhay gay anja Zèzagèla, kà uwana ahènøj ala la Masasèdok anja. ³⁵ Baba awoya Kona anja, ngaha avàl ndzèda lakèl anja tatak gesina. ³⁶ Dza uwana adinj gèl à Kona à vok, abèz sifa adèw à gay aw, ama dza uwana akweska Kona, adàbèz sifa uwaga tetuwa à aw, ama mapak lèw anja Zèzagèla adza à ahøj lakèl anja.”

4

Yesu atà la mis Samariya

¹ Azla Farisèya tatsènànj kà Yesu adàh batem, ngaha abèz azlamèna matapla dafuwa à gay anja Yuhana. ² (Ama Yesu la gèl anja kà adahà batem à dza amiyaka tekula aw, say azlamèna matapla la slaka anja pèra) ³ Mok uwana Yesu atsènà uwaga tapèhay kà, asàk à kutso Yahudiya à ahøj, awùl à Galili. ⁴ Kà awùl à Galili kà, say aguwa à uda la kutso Samariya.

⁵ La mas à uda la Samariya abèz à gudèj uwana à abà slèm anja Sèser, uwana nekwa la guf uwana Yakuba avà à kona anja Yusufu.* ⁶ La abata suwa anja Yakuba la ahøj, Yesu adày vok la mauguzahay anja la abà, adzà madzay la gay suwa. Mok uwaga azlagay tataka afats. ⁷ Mis Samariya asà à wanj kà matèf iyaw, Yesu agòfal: “Mis tèf à gi iyaw, gèsay!” ⁸ (La kaslà uwatà kà, azlamèna matapla anja tadà à hudf gudèj kà mayàh tatak may) ⁹ Mis Samariya agòf à Yesu: “Kak, kak zil Yahudiya! Kakay kaslala vok kà manav à gi iyaw masay à gi uwana gi mis Samariya ma?”* (Apèh kiya uwaga

* 3:14 3.14 4Musa 21.9 * 4:5 4.5 1Musa 33.19; Josu'e 24.32 * 4:9 4.9 Ezèra 4.1-5; Nehemiya 4.1-2

kà, kà uwana azla Yahudiya tatsènà vok la azla Samariya aw ma) ¹⁰ Yesu awulà ala: “Agayña kasèl tatak uwana Zèzagèla avày kà, ñgaha naka kasèl dza uwana anava à ka iyaw masay kà, naka kak la uwana kanaval iyaw sifa, ñgaha naka avà kà uwaga.”

¹¹ Mis agòdál: “Møngga, tsa tatak matèdfla iyaw aga la kak là ahàl aw, suwa bay kà kèrkèr ma, kakay kabèz iyaw sifa ma? ¹² Baba gami madzidziga Yakuba avà à anu suwa uwanay; bay kà asàh la azlabèza aña la azlalèmàna aña babay. Kadzugw ma, ‘Gèdúwa Yakuba’, kagòd, takay?” ¹³ Yesu awulà ala: “Kèla uwabeyuwi uwana asà iyaw aña suwa uwanay, nèlay adàkèsay aya, ¹⁴ ama dza uwana adàsaw iyaw uwana gèdà-tèdfallan kà, nèlay adàkèsay aya aw. Kà uwana iyaw uwana gèdàtèdallan kà, adà-pakay la huf aña mukwà aña iyaw, uwana akèlay aña sifa adèw à gay aw.” ¹⁵ Mis agòdál: “Møngga, tédègøñ iyaw uwaga, kà nèlay aña makès gi aya aw, ñgaha kà gi aña manèkudfa aña mas à wan aña matèd iyaw la abanay aya aw.”

¹⁶ Yesu agòdál: “Hàd, kazala zil anjak, kasawwan à abanay.” ¹⁷ Mis agòdál: “Zil gulo la ahøn aw.” Yesu agòdál: “Dziriga à uwana kapèh: ‘Zil gulo la ahøn aw’, kagòd. ¹⁸ Haday, kadàh à zil zlo, ama uwana kak la mtøga aña lagwa kà, zil anjak aw. Kapèh dziriga.” ¹⁹ Kiya uwaga mis agòdál: “Møngga, gèsèl kà kak masla mapèhal gay à ahàl aña Zèzagèla. ²⁰ Azlababa gami madzidziga tadavàh kudfa à Zèzagèla la gudøn uwanay la afik, ama akul azla Yahudiya kà, kagòdaw kà: ‘Slaka uwana dza adèw kudfa à Zèzagèla, kà la Urusalima’, kagòdaw.” ²¹ Yesu agòdál: “Mis, dìn à gi gèl à vok, kaslà adàsà à wan à uwana kadàdèwaw kudfa à Baba Zèzagèla la gudøn uwanay la afik aw, amiyaka la Urusalima aw. ²² Akul azla Samariya kasèlaw tatak uwana kadèwawwal kudfa aw; ama anu, anu azla Yahudiya kà, mèsèl tatak uwana mèdèval kudfa, kà uwana maèlay kà, asa à uda kà la azla Yahudiya la abà. ²³ Ama kaslà adàsà à wan, lagwa kà adasa à wan lagwa, uwana azlamèna madèw kudfa tadàdèw kudfa la Masasèdøk ñgaha la dziriga, azladza uwana tadèw kudfa kiya uwaga à ahøn, à uwana Baba ayahay. ²⁴ Zèzagèla kà Masasèdøk gà, azlauwla kà vok kà, azlauwana tadèval kudfa kà la Masasèdøk ñgaha la dziriga.”

²⁵ Mis agòdál: “Mèsèl kà Mesi atsa à wan, uwana asal magòdáy kà Kristu. A banja adàsà à wan, adàpèhanula tatak gesina.” ²⁶ Yesu agòdál: “Gi gà la uwaga gèbadakama lagwa.”

²⁷ La kaslà uwatà, azlamèna matapla la slaka aña tawùl à wan, ñgaha lèw avàl à atà à gay kà uwana tavàts gay la mis. Ama dza aslala vok aña manaval aw: “Mana asal mi? Banjaw, kà mana kabàdawma akul sèla mi?”, la ahøn aw.

²⁸ Kiya uwaga mis asàk à tuguzl aña à ahøn, ahàd à huf gudøn à abà, la abatà agòd à azladza: ²⁹ “Sàw à wan, kà nønjàwwàn dza uwana adapèh à gi tatak uwana gèdàhàhàn gesina. Zlahaw kà, masla Kristu aw ay?” ³⁰ Azladza tasà à uda la gudøn la abà, tahàd à slaka Yesu.

³¹ La kaslà uwatà azlamèna matapla tadèw kudfa à Yesu kà mazuw tatak may. “Rabbi, kamkam zùw tatak may!”, tagòdál. ³² Ama agòd à atà: “Gi la tatak may uwana kasèlaw aw.” ³³ La abatà azlamèna matapla tanàw vok kà atà kà atà: “Dza anik adasalla tatak may à wan kèlay?”

³⁴ Yesu agòd à atà: “Tatak may gulo kà, makès gay aña dza uwana aslèl gi à wan, ñgaha madàh slèray uwana afà à gi à ahàl kà madèhøn. ³⁵ Akul kà, kagòdaw kà, à lig tèla ufad kà matsèd tatak, ama gi kà gègòd à akul kà, nèrèzaw guf lela tsi, hi adahønay, nekwa kà matsèdaway. ³⁶ Masla matsèd tatak abèz masik aña, ñgaha ahama hi à ahøn kà aña sifa adèw à gay aw, ñgaha kà masla maslèkay atà la masla matsèdaway tarabay la slaka gà. ³⁷ ‘Dza anik aslèkay, dza anik atsèdaway’, uwana gay la gay la abà agòd kà, bà dziriga. ³⁸ Gèslèl akul kà matsèdaway la guf uwana la abà kadahaw slèray la abà aw; azladza anik tadàhà slèray gà uwana, ñgaha kà kabèzaw à gèl kà slèray anjàtà.”

³⁹ Azla Samariya anjwaw tadiñal gèl à vok la gudøn uwatà kà gay uwana mis apèh à atà: “Apèh à gi tatak gesina uwana gèdàhàhàn”, mis agòd à atà. ⁴⁰ Mok uwana tadasa à wan à slaka Yesu, tadèval kudfa kà madzin à ahøn atà nna; kiya uwaga Yesu adàhà mavakay sèla atà nna. ⁴¹ Gotønàn anjwaw tadiñal gèl à Yesu à vok, kà gay aña uwana apèh à atà. ⁴² La abatà tagòd à mis: “Lagwa kà, mèdìnjal gèl à vok kà uwana kapèh à anu para aw, ama kà uwana anu la gèl gami mèdatsønøn uwana apèh, la dziriga, mèsèl kà masla la uwana masla maèl gudøn à vok.”

Yesu awur bèzi aña møngga aña masla slèray ala

⁴³ Mok uwana Yesu adadza à ahøn la abatà mavakay sèla, asàk atà à ahøn, ahàd à kutso Galilì. ⁴⁴ Yesu la gèl aña agòd: “Masla mapèhal gay à ahàl aña Zèzagèla maèz mazlèbay la gudøn aña la abà aw.” ⁴⁵ Ama tekedfik mok uwana adabèzay à gudøn

aŋha, azladza takès la ahàl sèla, kà uwana mok uwana tahàd à madəvaday à Urusalima, tanəŋəŋ, uwana adəhàŋ la madəvaday uwatà la abà gesina.

⁴⁶ La kaslà uwatà, masla awùl à Kana, la slaka uwana apakà iyaw ala kà iyaw matavəruk. Kana uwaga agà kà la Galili la abà. Masla sləray aŋa gumna la ahəŋ la abatà, bəzi aŋha la dʷuvats la Kapernahum. ⁴⁷ Mok uwana masla sləray uwaga atəŋəŋ kà Yesu adasa à waŋ à Yahudiya la Galili kà, masla atsizilla ala, ahàd à slaka Yesu, adəval kuɔa kà manaf masla à Kapernahum, kà masla aŋa mawur bəzi aŋha ala. Kà uwana bəzi agà kà la ləv la ləv pəra. ⁴⁸ Yesu agòɔal: “Akul gesina, kadiŋaw gi gəl à vok aw, say baŋa kadənəŋaw azlanadzipo la uwana kadədiŋawwal gəl à vok.” ⁴⁹ Masla sləray agòɔal: “Məŋga, sà à waŋ à mtəga gulo dadəŋ, kà mamətsay aŋa bəzi gulo.” ⁵⁰ Yesu agòɔal: “Hàd à mtəga aŋak, bəzi aŋak aga la ahəŋ, adza à ahəŋ la sifa, awkà adàmətsay aw.” Zil uwaga adiŋ gəl à uwaga à vok Yesu apəhal. ⁵¹ Uwana agà la tetəvi la ama, kà mawul à mtəga, tagagàm la azlaməna sləray aŋha, maslà tagòɔal: “Bəzi aŋak adabəlay!” ⁵² Masla anəv à atà la məl, ma uwala abəzà à ŋuləm la. Tagòɔal: “Lakuhu la sa tekula, à uwana akàl vok asàlla vok ala.” ⁵³ Kiya uwaga awùl à baba à gəl kà kalkal la kaslà uwana Yesu apəhal: “Bəzi aŋak adabəlay”, agòɔal. Kà uwaga à uwana masla la azlaməna huɔf gay aŋha gesina tadiŋ gəl à Yesu à vok.

⁵⁴ Uwaga kà masəla aŋa nadzipo uwana Yesu adəhàŋ dagay la mas à uda aŋha la Yahudiya, la kutso Galili.

5

Yesu awur dza magul à afik gə ala

¹ Uwana uwaga adada à lig, azla Yahudiya tadzəkà mahab madəvaday, Yesu bay ahàd à Urusalima. ² La gudəŋ uwatà la abà nekwa la gamagəy aŋa azlatuwan, agà la ahəŋ iyaw matsakayga uwana sləm aŋha la gay ibəranəŋkowen: *Betsata*. Iyaw uwatà tanuɔa ala à gay à abà la azlatsatsagla zlo. ³ La tsəh aŋa tsatsagala uwatà, azlaməna dʷuvats aŋuwaw tahənàhal à tsəh: azlaguləf, azladeri, azlamagul à afik gə. ((Takudàh məbələk vok aŋa iyaw uwana abələkàhà à vok. ⁴ Kwà à kwà malika aŋa Zəzagəla asàh à ahəŋ aŋa məbələkàh iyaw uwaga. Masla dʷuvats uwana atsa à vok à iyaw uwaga à abà abələkay, awur ala la dʷuvats aŋha la abà, baməraka dʷuvats tsəhay gə uwala beyli gesina.)) ⁵ Masla dʷuvats anik la ahəŋ la abatà, adəfah mavay dzik makər gəl aŋha mtəgis. ⁶ Uwana Yesu anəŋə dza uwatà la slaka mahən à ahəŋ, asəl kà adasafay la dʷuvats aŋha uwaga la abà, Yesu agòɔal: “Asa à ka mawur ala ay?” ⁷ Masla dʷuvats awulà ala, anəŋal à adi agòɔal: “Məŋga, dza gulo la ahəŋ aŋa madla gi à abà la kaslà uwana iyaw abələk vok aw. Baŋa gəwad vok à uda, gəda à abà zlà, gədagəɔay kà dza anik atsa à vok à abà kà gi.” ⁸ Yesu agòɔal: “Sà à afik, zəb butsi aŋak, ŋgaha dà aŋak!” ⁹ Hadzak, asà à afik awur ala, akəl butsi aŋha à abà, adzəkà maday.

Ama mavakay uwatà kà mavakay maduw ləv tekeɔik. ¹⁰ Uwana azlamasiga aŋa azla Yahudiya tanəŋəŋ, tagòɔd à dza uwana awur ala: “Lakana kà vuɔf maduw ləv, wakitə məpəhay gami avà tetəvi kà mazəb butsi aŋak aw!”^{*} ¹¹ Agòɔd à atà: “Dza uwana awurà gi ala agòɔd à gi: ‘Kəl butsi aŋak à abà, ŋgaha dà aŋak’, agòɔd à gi.” ¹² Tanavàl la gay ala: “Uwa à dza uwana ‘Zəb butsi aŋak, dà aŋak’, agòɔd à ka uwa?” ¹³ Ama dza uwana awurà ala kà, asəl dza uwana awurəŋ ala aw. Yesu adadiy aŋha la abatà, kà uwana maham à ahəŋ dza aŋuwaw la abatà.

¹⁴ Zweek, la huma la gay, Yesu agagàm à məŋ gəy Zəzagəla à agu atà sèla, ŋgaha agòɔal: “Tsəŋəŋ lagwa kà kawur ala. Kadəhəŋ tsakana aya kà tatak mawisiga uwana aduwa uwanay aŋa məbəza kà aya aw!” ¹⁵ Dza uwaga adà aŋha, ŋgaha agòɔd à azla Yahudiya kà Yesu la uwana awurəŋla. ¹⁶ Kà uwaga à uwana azla Yahudiya tadzəkà matərəb Yesu, à kà uwana awurà dza ala la vuɔf maduw ləv. ¹⁷ Ama Yesu agòɔd à atà: “Baba gulo adəh sləray koksikoksi, gi bay kà gəfəhəŋ kiya uwaga suwan.”

¹⁸ Kà gay uwaga à uwana, azla Yahudiya tayəh kaykay kà makəɔay, kà uwana agòɔd kà Zəzagəla kà Baba aŋha, ŋgaha agagazləla gəl aŋha la Zəzagəla. Awkà kà, uwana apəsəw mavakay maduw ləv pəra aw.

Maslay aŋa Kona aŋa Zəzagəla

¹⁹ Kà uwaga, Yesu agòɔd à atà: “Gəɔɔd à akul la dziriga, Kona aslala vok madəh tatak la gəl aŋha aw, say anəŋəŋ kà say uwana Baba adəhəŋ. Uwana Baba adəhəŋ gesina, uwaga la uwana Kona adəhəŋ babay. ²⁰ Kà uwana Baba awoya Kona, apəhalla uwana adəhəŋ gesina. Adəpəhalla à azlatatak uwana aduwa uwanay aya, kà Kona aŋa madəh

* 5:10 5.10 Nehemiya 13.19; Yereimiya 17.21

uwaga. Ngaha uwaga adaval akul ala løy à gay. ²¹ Bokuba uwana Baba awùlla azlamazimnekið à uda la mamøtsay kà mav à atà sifa kà, kiya uwaga babay Kona av sifa à uwabeyuwi uwana awoyañ gesina. ²² Baba kà adàh seriya à dza à gøl aw, ama avà maslay madàh seriya uwaga à ahàl anja Kona anja gesina, ²³ kà azladza gesina anja maslækaway Kona, bokuba uwana taslækaw Baba. Dza uwana aslækaw Kona aw, masla aslækaw Baba uwana asløl à wanj babay aw.”

²⁴ “Gøpøh à akul la dziriga, dza uwana atsøb sløm à gay gulo, ngaha adiñ gøl à dza uwana à vok asløl gi à wanj kà, masla la sifa adøv à gay aw. Seriya adàkøsay aw, aguwa à uda la mamøtsay, adàbøz sifa adøv à gay aw. ²⁵ Haday gøgodf à akul la dziriga, kaslà atsa à wanj, ngaha kaslà uwaga aga la tataka gami la abà lagwa, uwana azlamazimnekið tadàtsenøj kuda anja Kona anja Zøzagøla, ngaha kà azlauwana tadàkødefal à ahøj tadàdz à ahøj la sifa. ²⁶ Iyay, bokuba uwana Baba la maslay kà mavày sifa adøv à gay aw à azladza, kiya uwaga bay avà maslay uwaga à Kona anja à ahàl, kà masla anja mav sifa à azladza. ²⁷ Avà maslay à Kona anja kà madàh seriya, kà uwana masla Kona anja Zøzagøla. ²⁸ Løy aval à akul à gay kà uwaga aw, kà uwana kaslà atsa à wanj, à uwana azlamazimnekið uwana la zøvay la aku gesina tadàtsøn kuda anja, ²⁹ ngaha tadàsa à uda la zøvay anjatà la aku. Azladza uwana tafahøj delga tadàwula à uda kà maføzal masak anjatà uwana sifa adøv à gay aw, ama azlauwana tafahøj mawisiga tadàwula à uda kà madahàtanj seriya à gøl.”[✠]

Azlamasølay uwana lakøl maslay anja Yesu

³⁰ “Gi la gøl gulo kà gøslala vok kà madàh tatak aw, gødàh seriya kà bokuba uwana “Dahøj”, Baba agød à gi, seriya gulo kà dziriga, kà uwana gøyah mawoyøj anja gøl gulo aw. Ama uwana asa à dza uwana asløl gi à wanj pøra. ³¹ Baña gøz sayda anja gøl gulo kà, sayda gulo kà agay dziriga aw. ³² Ama say dza anik la uwana az sayda lakøl gulo, gøsel kà sayda uwana aziñ lakøl gulo kà dziriga. ³³ Kaslølawa azlamøna matsøb sløm à slaka Yuhana, sayda anja uwana azañ kà dziriga. ³⁴ Ama gi kà gønøkufa anja sayda anja dza aw, gøula akul à gøl kà, kà akul anja maføz mafølay pøra. ³⁵ Yuhana kà agà kà bokuba fønøs mavatsijn à ahøj gà pøra, ngaha karabay njuv la ufaka anja la abà. ³⁶ Ama sayda gulo uwana gazijn kà, aduwà anja Yuhana uwana azøj, azlasløyay uwana Baba gulo avà à gi kà mahønøjla kà, taz sayda gulo. Ngaha babay kà apøhla ala kà Baba la uwana asløl gi à wanj. ³⁷ Baba uwana asløl gi à wanj apøhay lakøl gulo aya. Akul kà kadàtsønaw kuda anja didi aw, ngaha kadànøjaw huðf adi anja babay aw. ³⁸ Akul kafaw gay anja à løy anjul à tsøh aw, kà uwana kadiñawwal gøl à vok à dza uwana asløl à wanj aw. ³⁹ Kadzenaw wakità Zøzagøla la hanjëli, kadzugwaw kà: “La abà la uwana mädàbøz sifa adøv à gay aw”, kagødaw. Bà dziri haday gà, la wakità uwaga la abà la uwana sayda gulo. ⁴⁰ Ama asa à akul anja mas à slaka gulo anja maføz sifa dziriga aw.”

⁴¹ “Ama gi kà, gøyah mazløb gi anja azladza aw. ⁴² Ama akul kà, gøsel kà, kawoyaw Zøzagøla la løy anjul la tsøh aw. ⁴³ Gøsa à ahøj kà la sløm anja Baba gulo, ama karabay gi à huma aw. Ama baña dza anik atsa à wanj la maslay anja aslasl gøl anja kà, kakøsw. ⁴⁴ Akul asa à akul mayah mazløbay anja azladza anik anik, ngaha kayahaw mazløbay uwana asa à ahøj la slaka Zøzagøla dziriga aw. Ngaha ma kakay kadiñaw gøl à vok ma? ⁴⁵ Ama kadzugwaw kà, gødàta akul kaf à gøl la slaka Baba gulo, kagødaw aw. Ama Musa la uwana adàta à akul kaf à gøl, à masla uwana kafaw manøjwøj anjul à masla à afik. ⁴⁶ Agayña ndzer, kadiñaw gøl à Musa à vok kà, naka kadiñaw gi gøl à vok babay, kà uwana Musa atsetsør kà lakøl gulo. ⁴⁷ Ama tsa kadiñaw gøl à uwana à vok atsetsør aw ma, kakay kadiñaw gøl à gay gulo à vok zlà ma?”

6

Yesu av tatak may à azlazil døbaw zlo

(Mata 14.13-21; Mark 6.30-44; Luka 9.10-17)

¹ La lig anja uwaga la ahøj, Yesu ahàd à gay dørøv à uda anik anja dørøv Galili, uwana tazalalla bay dørøv Tiberiya. ² Maham à ahøj dza anjuvaw tanøfà, kà uwana tananjà azlanadzipo uwana adahàhøj la mawar azladza ala. ³ Yesu ahàd à dadøgwaw à afik la abatà, tadzà madzay la azlamøna matapla la slaka anja. ⁴ Paska, madøvadaj anja azla Yahudiya, nekwa. ⁵ Uwana Yesu anøjà maham à ahøj dza anjuvaw tatsà à wanj à slaka anja, Yesu atap à Filip agødal: “Lala mädàbøz tatak may kà masukway, kà mav à maham à ahøj dza uwanay anja mazuway zlà?” ⁶ Apøh uwaga kà, kà matap Filip. Awkà, masla kà asøl tatak uwana naka adfehøj. ⁷ Filip agødal: “Amiyaka møsukw kaf anja gursu dadørmokw søla bay kà, aslay kà køla uwabeyuwi anjatà anja maføzal njuv

aw.”⁸ Tekula la tataka azlamøna matapla anha la abà Andøre, deda anja Sømon Piyer agòfal: ⁹ “Bøzi kohna anik la ahøj la abanay, kaf gay børsøw zlo la kílfi søla la ahàl, ama uwaga ma, mana akøs à vok anja maham à ahøj dza kiya uwanay ma?”¹⁰ Kiya uwaga Yesu agòf à atà: “Dzàw azladza madzay gesina, slaka uwatà kà delga kà madzàh madzay, kà uwana kəsaf la ahøj.” Ngaha atà tadzàhà madzay gesina anjatà taslay zil døbøw zlo.¹¹ Yesu ahøj kaf uwaga, “Kikay”, agòf à Zøzagøla, atsakà kaf ala, ngaha avàhà à azladza. Ahøj kilfi, adahøj kalkal kiya uwaga aya. Tazùw tsøràh à uwana asläh à atà.¹² Mok uwana tahànla gesina, Yesu agòf à azlamøna matapla la slaka anha: “Hamàw gay à mapøtsèh pøtsèhga uwaga à vok, atəfal ala amiyaka tekula aw.”¹³ Ngaha tahamà gay à mapøtsèh pøtsèhga uwana à vok atàm a atà à ahàl, tahøj anja ala takosà kulo gøl anha søla.

¹⁴ Uwana azladza tanøj anja nadzipo uwana Yesu adahøj, tagòf: “Kayyà, dza uwanay ndzer kà masla mapøhal gay à ahàl, uwana naka atsa à wanj à gudøj à vok!”¹⁵ Uwana Yesu asøj kà azladza tatsà à wanj kà mafiya à sufəl à abà la ndzəfa kà, kà uwaga à uwana adà anha à gudøj à afik kokufda gøl anha.

Yesu aday lakəl dərøw

(Mata 14.22-23; Mark 6.45-52)

¹⁶ Mok uwana mokokhu adasa à wanj kà, azlamøna matapla la slaka Yesu tadà à ahøj à gay dərøw,¹⁷ tahàd à kəslah iyaw à afik, ngaha tadzəkà mad à uda la dərøw la abà, kà mabøziya à Kapernahum. La mok uwaga kà, vøf adasa à wanj, Yesu aløj mabøz atà à tsøj dadøj.¹⁸ Magol kular adzəkà à vok, iyaw dərøw adzəkà magantsay la mavølay lakəl.¹⁹ Azlamøna matapla kà, taday azlatalka magur mahoyay pølis søla la tenma banjaw makər kà zlazlafa anja afad. Uwana tanøj Yesu adà à awtøj à slaka anjatà lakəl dərøw la asik kà, guba akøs atà.²⁰ Ama Yesu agòf à atà: “Guba akøs akul aw, gi njwà!”²¹ Tayàh mazəb à tsøj la kəslah iyaw la afik nøma, la katskats tanøj kà kəslah iyaw adàdøbani kutso uwana asà à atà mad à abà.

Maham à ahøj dza ayàh Yesu

²² La bebøj gà kà, maham à ahøj dza uwana tagòf à gay dərøw à uda anik, awul atà à gøl kà la mokokhu lakuhu kà, agà la ahøj pøra kà kəslah iyaw tekula, ngaha tasəl bay kà Yesu ahàd à kəslah iyaw à afik la azlamøna matapla la slaka anha aw. Ama azlamøna matapla anha tahàd kokufda gøl anjatà pøra.²³ Ama pøra kà, azlakəslah iyaw anik taguwà à wanj la Tiberiya, tasà à wanj à slaka uwana Yesu avà kaf, à mok uwana kikay agòf à Zøzagøla kà anja uwaga.²⁴ Uwana maham à ahøj dza anøj anøj kà Yesu la abatà aw, azlamøna matapla la slaka anha bay kà atà la abatà aw, tadàh à azlakəslah iyaw uwaga à afik, tada à Kapernahum kà mayahay.

Yesu kà kaf uwana av sifa

²⁵ La kiya uwaga tabøzà Yesu à vok la gay dərøw à uda anik anja dərøw ngaha tagòfal: “Rabbi, kasà à abanay mbà?”²⁶ Yesu awulà à atà ala: “Haday, gøpøh à akul la dziriga, kayhaw gi kà, kà uwana kazùwàw kaf, kahànàwla, aslahà à akul, awkà kà azlanadzipo la azlaslørøw gulo uwana gøfahøj aw.”²⁷ Kadahaw slørøw kà anja tatak may uwana awis ala aw. Ama dahàwøj kà anja tatak may uwana adza à ahøj, avà sifa adøw à gay aw. Tatak may uwaga kà, Kona anja dza la uwana adàvà à akul la maslay, uwana abøzal la slaka Baba Zøzagøla.”²⁸ Ngaha tanavàl: “Mana møfəhøj kà madəh slørøw uwana asa à Zøzagøla zlà ma?”²⁹ Yesu awulà à atà ala: “Slørøw uwana Zøzagøla akuday la slaka ankul kà, say madin gøl à dza uwana à vok, Zøzagøla aslèl à wanj.”³⁰ Tagòfal: “Nadzipo ma uwala kapøhanula kà anu anja madin à ka gøl à vok la? Ngaha ma slørøw ma uwala kadəhøj la?”³¹ Azlababa gami madzidziga tazùw manne à uwana asàhà à ahøj la zagøla la fəta la abà, bokuba uwana tatsetsər à wakità Zøzagøla à abà. Masla avà à atà tatak may uwana asàh à ahøj la zagøla.”³² Yesu awulà à atà ala: “Haday la dziriga, gøpøh à akul, Musa la uwana avà à akul tatak may uwana asà à ahøj la zagøla aw. Ama Baba gulo la uwana avà à akul tatak may dziriga, uwana asà à ahøj la zagøla.”³³ Kà uwana tatak may uwana Zøzagøla avøj kà, anik la ahøj aw, say masla uwana asà à ahøj la zagøla, (Uwaga kà Yesu) ngaha avà sifa à azladza gudøj à vok gesina.”³⁴ Kiya uwaga tagòfal: “Kayyà Sufəl, và à anu tatak may uwaga koksikoksi kəla zlà!”³⁵ Yesu asà à atà ala à uda: “Gi la uwana gi tatak may anja sifa. Dza uwana atsa à wanj à slaka gulo, adin à gi gøl à vok kà, may adəkəs aya aw, nølay adəkəs bay aw.”³⁶ Ama gøpøh à akul: Kanøjaw gi, ama bà la uwaga gesina kà, kanøjaw gi kadinøjaw gi gøl à vok aw.”³⁷ Mana bəymi uwana Baba avà à gi, atsa à wanj à slaka gulo, ngaha gødəkəweska dza uwana atsa à slaka gulo aw.³⁸ Kà uwana gəsà à ahøj la zagøla kà, kà madəhøj mawoyøj anja dza

✧ 6:31 6.31 2Musa 16.4,15; Mahabay 78.24

uwana aslël gi à wanj, awkà anja gël gulo aw. ³⁹ Aganay uwana asa à dza uwana aslël gi à wanj: Kà gəziñ ala tekula anja tatak uwana avà à gi à ahàl aw, ama kà gəula atà à uda la mamətsay la sifa la mavakay makəf gəl à ahəñ gudəñ à vok. ⁴⁰ Aganay uwana asa à Baba gulo: Kà dèwdèw dza, uwana tanəñà Kona anja Zəzagəla, ngaha tadinjal gəl à masla à vok kà, tabəzal sifa adəv à gay aw, ngaha gədaula atà à uda la mamətsay la madəv à gay gudəñ à vok.”

⁴¹ Azla Yahudiya tanəñuz lakəl anja Yesu, kà uwana Yesu, ‘Gi tatak may uwana asà à ahəñ la zagəla’, agòf. ⁴² “Təga kà, Yesu kona anja Yusufu aw takay? Məsəl baba anja la iyà anja, ngaha ma kakay: ‘Gəsà à ahəñ la zagəla’, agòf zlà ma?”, tagòf. ⁴³ Yesu awulà atà ala: “Sàkàw à manəñuz à tsəh ala kà akul à akul. ⁴⁴ Dza aslala vok anja mas à wanj à slaka gulo aw, say Baba uwana aslël gi à wanj, la uwana abiyəñ masla à slaka gulo, ngaha gi gədaula à uda la mamətsay la vuf makəf gəl à ahəñ. ⁴⁵ Azladza uwana Zəzagəla apəh à atà gay à ahàl kà mapàh à azladza, tatsetsèr à wakità à abà:

‘Zəzagəla la gəl anja adətapatala tatak gesina.’^{*}

Kəla dza uwana atsəb sləm à Baba, akəs mapəhay anja, masla atsa à wanj à slaka gulo. ⁴⁶ Asal magodəy, kà dza adanəñ Zəzagəla aw. Dza uwana asà à ahəñ la slaka Zəzagəla la uwana adanəñ Baba pəra.”

⁴⁷ “La dziriga gəpəh à akul, dza uwana adinjal gəl à vok kà, adəbəz sifa adəv à gay aw. ⁴⁸ Gi tatak may uwana avà sifa adəv gay aw. ⁴⁹ Azlababa anjul madzidziga tazuw manne la fəta la abà. Bə la uwaga bay kà taməts à gay. ⁵⁰ Ama uwabeyuwi uwana azuw tatak may uwana asà à ahəñ la zagəla kà, adəmətsay aw. ⁵¹ Gi tatak may anja sifa, uwana asà à ahəñ la zagəla. Banja dza azuw tatak may uwatà, adədzà à ahəñ la sifa anja koksikoksi. Tatak may uwana gədəvəl kà vok gulo, gədəvəy, ngaha gudəñ à vok anja madz à ahəñ la sifa.”

⁵² Lakəl anja gay uwaga azla Yahudiya tabayà vok gay kà atà kà atà, tagòf: “Kakay dza uwanay avà à anu sləb vok anja anja mazuway ma?”, tanavà vok. ⁵³ Yesu agòf à atà: “Hadəy, gəpəh à akul la dziriga: Banja kazuwaw sləb vok anja Kona anja dza aw, ngaha banja kasaw aniz anja aw kà, kadəbəzaw à sifa tetuwa aw. ⁵⁴ Dza uwana azuw sləb vok gulo, ngaha as aniz gulo kà, abəz sifa adəv à gay aw, ngaha gədaula à uda la mamətsay la vuf makəf gəl à ahəñ gudəñ à vok. ⁵⁵ Kà uwana sləb vok gulo kà tatak may dziriga, ngaha aniz gulo bay kà tatak masay dziriga aya. ⁵⁶ Dza uwana azuw sləb vok gulo, as aniz gulo, adza à ahəñ la gi la abà, ngaha gi babay gədzà à ahəñ la masla la abà. ⁵⁷ Bokuba uwana Baba uwana la sifa aslël gi à wanj, ngaha gi gədzà à ahəñ la sifa kà masla, kiya uwaga babay dza, uwana azuw gi, adza à ahəñ la sifa kà gi babay. ⁵⁸ Aganay tatak may uwana asà à ahəñ la zagəla: Masla kà bokuba uwana azlababa anjul tazawəh, uwana tamətsəh à gay aw. Ama dza uwana azuw tatak may uwanay, adədzà à ahəñ la sifa anja koksikoksi.” ⁵⁹ Yesu apəh à atà gay uwaga kà la mok uwana atapla azladza la gəy madəv kuđa la aku la Kapernahum.

Gay lakəl anja sifa uwana adəv à gay aw

⁶⁰ Mok uwana tatsən uwana Yesu apəh kà, anjvaw la tataka azlaməna asik anja la abà tagòf: “Gay uwanay kà zlazlada, uwa aslala vok anja makəs uwaga uwa?”, tagòf. ⁶¹ Yesu asəl kà gay uwaga kà adəla manəñuzay à azlaməna asik anja à ləv à tsəh, ngaha agòf à atà: “Uwaga ma atsəf akul à asik la tsəh ala takay? ⁶² Kakay tak à gay kanəñaw Kona anja dza, uwana ada à afik à slaka anja uwana à abà adzà à ahəñ uwarà ma? ⁶³ Masasəfok Zəzagəla la uwana avà sifa; vok anja dza kà asla tatak aw. Azlagay uwaga gəpəh à akul, la uwana Masasəfok ngaha sifa. ⁶⁴ Ama azladza anik la ahəñ la tataka anjul la abà kà, tadinjal gəl à vok aw.” (Kà uwana dagay madzəka kà, Yesu kà asal azladza uwana tadədinjal gəl à vok aw, ngaha la dza uwana adətəl kaf à gəl) ⁶⁵ Azaləñ à gəl la magodəy: “Kà uwaga à uwana gəgof à akul, dza aslala vok anja mas à wanj à slaka gulo aw, tsa banja Baba abiyəñ à wanj, avəl tetəvi.”

⁶⁶ Dagay la mavakay uwatà anjvaw la tataka azlaməna manəfay anja la abà, tawul à lig. ⁶⁷ Kiya uwaga Yesu agòf à azlaməna matapla la slaka anja kulo gəl anja səla: “Asa à akul madinjal akul babay suwan ay?” ⁶⁸ Səmon Piyer agòfal: “Sufəl, məday ma à slaka ma anja uwa? Tsa kak la azlagay uwana tav sifa adəv à gay aw uwa? ⁶⁹ Lagonay kà, mədinjal gəl à vok, kak tsikasłaga uwana Zəzagəla aslël ka à wanj.” ⁷⁰ Yesu agòf à atà: “Akul kulo gəl anja səla gətsətsəmənì akul aw takay? Ama tsa tekula anjul kà seteni!” ⁷¹ Apəh uwaga kà lakəl anja Yudas Iskariyot, kona anja Səmon, uwana agə la tataka azlaməna matapla kulo gəl anja səla uwaga la abà. Masla la uwana naka ata kaf à Yesu à gəl.

* 6:45 6.45 Yesayya 54.13

7

Azladeda anja Yesu tadin gël à masla à vok aw

¹ Uwana uwaga adada à lig kà, Yesu auguzàh la kutso Galili, asàl kà madz à ahøj la kutso Yahudiya aw, kà uwana azla Yahudiya tayàh makəday. ² Mok uwana madəvaday anja azla Yahudiya, uwana tazalalla madəvaday tsatsagla adagay nekwa kà, ³ azladeda anja tagòfàl: “Zà vok la abanay, hàd à Yahudiya, kà azlaməna asik anjak kà manøj sləray anjak uwana kədəhəhøj. ⁴ Banja dza asal azladza tasəl masla kà, apəhla gəl anja ala. Tsa kadfahàh azlasləray anik anik kiya uwanay kà, dəfahøj la paraka azladza anja manøj ka.” ⁵ (Amiyaka azladeda anja tadin gël à masla à vok bay aw) ⁶ Yesu agòf à atà: “Kaslà gulo uwana asa à gi kà, adasa à wan aw. Ama kà akul kà, kəla kaslà gesina kà delga. ⁷ Gudøj à vok aslala vok anja mapəsew akul aw, ama gi kà apəsew gi. Kà uwana gəpəh la paraka kà azlasləray anja uwana adəhøj kà mawisiga. ⁸ Dəw anjul à madəvaday akul zlà. Məday anina aw, kà uwana kaslà uwana asa à gi adasa à wan dadənj aw.” ⁹ Uwana adapəh à atà gay uwaga kà, adzà à ahøj la Galili.

Yesu la madəvaday tsatsagla

¹⁰ Iyay, la mok uwana azladeda anja tad à madəvaday, masla babay ahàd, ama apəhla vok ala aw, la səbàh pəra. ¹¹ La abatà la madəvaday la abà azla Yahudiya tayàh masla la maham à ahøj dza la abà la madəvaday la abà: “Anjala?”, tagòf. ¹² Tavàts gay la tsəh ala la gəl à gəl lakəl anja, la tataka maham à ahøj dza la abà. Azlaanik tagòf: “Masla kà, dza delga”, azlaanik tagòf bay: “Awan, dza delga aw!” Tagòf: “Masla mazàh azladza ala.” ¹³ Ama dza aslala vok anja mapəhay gay lakəl anja la dazuwaya aw, kà uwana guba akəs atà kà azla Yahudiya.

¹⁴ Mok uwana madəvaday adada à lig tenma kà, Yesu ahàd à møj gày Zəzagəla à agu, adzəkà matapla tatak à azladza. ¹⁵ Ləv avàl à azla Yahudiya à gay la magòday: “Kakay dza uwanay asəl tatak tsa tapla aw ma?” ¹⁶ Yesu awulà à atà ala: “Matapla uwana gəpəhla ala kà, asa à wan kà la slaka gulo aw, ama asà à ahøj kà la slaka Zəzagəla, uwana asləl gi à wan. ¹⁷ Banja dza asal madəh masal anja Zəzagəla kà, adəsəl tatak uwana gəpəhakulla kà, asa à wan kà la slaka Baba Zəzagəla, awkà uwaga kà gay anja ndzəda anja aslasl gəl gulo aw. ¹⁸ Dza uwana apəh gay anja aslasl gəl anja kà, ayàh mazləb gəl anja. Ama dza uwana adəh sləray kà anja dza uwana asləl à wan kà, masla kà apəhay kà uwana dziriga, ngəha mawisiga la ahøj la uwana la abà apəhay aw. ¹⁹ Musa avà à akul mapəhay aw takay? Ama amiyaka tekula anjul kà, akəs gay anja mapəhay aw. Kà mana kayahaw makəf gi zlà ma?” ²⁰ Maham à ahøj dza awulà: “Kak la masasəfok mawisiga, kak masla zagəla zagəla, uwa ayàh makəf kà uwa?” ²¹ Yesu agòf à atà: “Gədfahøj kà sləray tekula pəra, à uwana ləv avàl akul à gay gesina! ²² Musa avà à akul tetəvi kà makadav azlabəza à uda, (Amiyaka Musa la uwana adzəkà makadav azlabəza à uda babay aw, ama azlababa anjul madziziga), kà uwaga à uwana kakadavaw azlabəza anjul à uda la vuɸ maduw ləv bay.* ²³ Kakadavaw dza à uda la vuɸ maduw ləv kà matəm mapəhay anja Musa à ahøj aw, ngəha ma kà mana kapakaw gi ləv à gəl, à kà uwana gəwura dza ala səfakaka la vuɸ maduw ləv ma? ²⁴ Sàkàw à madəh seriya anja tatak uwana kanənjawwan la uda gə. Ngəha dəfahəw seriya la tetəvi anja.”

Yesu ma Kristu takay?

²⁵ Azladza anik uwana tadzà à ahøj la Urusalima tagòf: “Dza gə la uwanay à uwana tayahay anja makəday aw takay? ²⁶ Nənjəwəwənj, abadma la dazuwaya la tataka azladza la abà, ama uwala gay la ahøj tapəhal aw. Ngəha azlaməngə gami ma tasəl kà masla la uwana Kristu ndzer zlà ma uwa?” ²⁷ Ama banja Kristu adàsà à wan, dza la ahøj asəl slaka uwana adaguwa à wan la abà aw. Ama dza uwanay kà məsəl slaka uwana asà à wan la abà.”

²⁸ Yesu ataplà la møj gày Zəzagəla la aku, azà kuda à zagəla agòf à atà: “La dziriga kasəlaw gi, ngəha kasəlaw slaka uwana gəsà à wan la abà ay? Gi kà, gəsà à wan kà la aslasl gəl gulo aw, ama dza uwana asləl gi à wan kà, dza dziriga. Akul kà kasəlaw aw! ²⁹ Ama gi kà, gəsəl masla, kà uwana la slaka anja la uwana gəsà à wan, ngəha masla la uwana asləl gi à wan bay.” ³⁰ Kiya uwaga tayàh makəs masla, ama dza aslà kà matapal ahàl à vok aw, kà uwana kaslà anja adaslay dadənj aw. ³¹ Anjuvaw la tataka maham à ahøj dza la abà, tadin gël à masla à vok, tagòf: “Banja Kristu adàsà à wan kà, adəfəhøj azlanadzipo adəduwan anja kona uwanay ay?”, tagòf.

Tasləl azlaməna manəhla gày Zəzagəla kà makəs Yesu

* 7:22 7.22 2Musa 17.10; 3Musa 12.3

³² Azla Farisöya tatsənà uwana maham à ahəñ dza apəh la gəl à gəl lakəl anja Yesu, ñgaha azlamadzahaga anja azlaməna mav tatak à Zəzagəla, la azla Farisöya tasləl azlakohana kà makəs masla. ³³ Yesu apəh à atà la paraka: “Gi la ahəñ la akul anja kaslā ñuv aya, la lig la ahəñ gəðawula à slaka dza, uwana asləl gi à wañ. ³⁴ Kadayahaw gi ama kadabəz gi aw, kà uwana kaslaw mad à slaka uwana gəðaday aw.” ³⁵ Azla Yahudiya tanāv vok kà atà kà atà: “Lagwa ma masla ma adaday ma uwala à uwana: ‘Kadənəjaw gi aya aw’, agòdla? Adaday ma à slaka azla Yahudiya uwana taslèh gəl à ahəñ la tataka azla Gərak la abà, kà matapatàla azlatatak takay? ³⁶ Gay uwaga apəh ma mana asal magodfay ma? ‘Kadayahaw gi, ama kadabəza gi aw, kà uwana kaslawwal à vok mad à slaka uwana gəðaday aw. La slaka uwana gəðadza à ahəñ babay aw’, agòd ma?”

Dərəw anja iyaw sifa

³⁷ La mavakay uwana takəf gəl à mavədaday, la uwana aga delga, la vuf uwatà Yesu astizilla ala la huma maham à ahəñ dza, azà kuda à zagəla, agòd: “Uwabeyuwi uwana nələy azeñ, asa à wañ, asa iyaw la slaka gulo.” ³⁸ Kəla uwabeyuwi uwana adiñ gi gəl à vok, dərəw anja iyaw sifa adəkəlay la ləv anha la tsəh bokuba uwana tatsetsər à wakità Zəzagəla à abà.” ³⁹ Yesu kà apəhay kà lakəl anja Masasəfok Zəzagəla, uwana azlauwana tadinjal gəl à vok tadabəzal, kà uwana tabəz Masasəfok dadəñ aw, kà uwana Yesu adada à afik kà mafəz mazləbay la slaka Baba anha aw.

Maham à ahəñ dza atsak ala kà Yesu

⁴⁰ Azladza anik la tataka maham à ahəñ dza la abà tatsənəñ gay uwaga tagòd: “Ndzer kà, dza uwanay kà masla mapəhal gay à ahəl anja Zəzagəla kà mapəh à azladza.” ⁴¹ Azlaanik tagòd: “Masla kà Kristu!”, azlaanik tagòd: “Awan, masla aw, Kristu kà aguwa à wañ la Galili ay? ⁴² Tatsetsər à wakità Zəzagəla à abà kà: Kristu kà adəguwa à uda kà la mayyi à tsəh ala anja David, ñgaha adəguwa à wañ la Betelehem, la gudəñ uwana David adzà à ahəñ la abà.” ⁴³ Maham à ahəñ dza atsək ala kà Yesu. ⁴⁴ Azlaanik la tataka anjatà la abà, asà à atà makəs Yesu, ama dza la ahəñ aslāla vok anja matapal ahəl à vok aw.

Azlamadzahaga anja azla Yahudiya takweska Yesu

⁴⁵ Azlakohana tawul à slaka azlamənga anja azlaməna mav tatak à Zəzagəla la azla Farisöya, tanāv atà: “Kà mana kasəwla Yesu à wañ aw ma?” ⁴⁶ Azladza uwana tasləlla atà, tawulà à atà: “Dza la ahəñ adapəh gay ku bə anja dza uwanay didi didi aw.” ⁴⁷ Azla Farisöya tanāv atà: “Akul babay kà kadənəfaw mapapatay anha uwaga ñwà? ⁴⁸ Mənga la ahəñ la tataka gami la abà, banaw la tataka anja azla Farisöya la abà, adadinjal gəl à vok ay? ⁴⁹ Ama say azladza deydaj gə la uwana tadinjal gəl à vok, kà uwana tasəl mapəhay anja Musa aw, atà azlamatsaflaga!” ⁵⁰ Nikodemus agə la tataka anja azla Farisöya la abà. A masla uwana asà à wañ à slaka Yesu la vəf vərđi anik, agòd à atà: ⁵¹ “Hadaj, ma wakità seriya avà tetəvi kà madəh seriya à dza à gəl, la kokuđa matsən uwana adəhəñ takay? Awma məsəl uwana adəhəñ aw, takay?” ⁵² Tawuləl ala: “Kak zil Galili ay? Dzeñ wakità lela, ñgaha kadətsenəñ kà masla mapəhal gay à ahəl anja Zəzagəla adəguwa à wañ la Galili aw!” ((⁵³ La lig la ahəñ kəla uwabeyuwi awul à mtəga anha.

8

Mis uwana azab zil

¹ Mok uwana uwaga adadəw à gay kà, Yesu ahəd à gudəñ kuvu à afik. ² La bebəñ gə la zay la tsəh, awul à mən gəy Zəzagəla à agu aya, ñgaha maham à ahəñ dza anjuvaw tahamà à slaka anha. Adzà madzay, adzəkà matapatàla azlatatak ³ Azlaməna mapəhla mapəhay ala, la azla Farisöya tadàlla mis uwana à awtəy, takəs la mazañ zil la tsəh. Atà tatsizlləñ à huma anja maham à ahəñ dza gesina, ⁴ ñgaha tanāv Yesu: “Mənga, mis uwanay kà, takəs kà la mabila la tsəh. ⁵ La wakità Zəzagəla gami la abà Musa agòd à anu kà, azlatsəhay mis uwanay kà, say makad atà la matsəh atà la akur pəra. Kak ma kakay kagod ma?” ⁶ Tapəh uwaga kà, kà makəsəl madiñay à ahəñ kà anja mapuwal gudzi à gəl. Ama la abatà Yesu akəsà gəl à ahəñ, anəh à kutso à abà la gay gəl ahəl anha. ⁷ Uwana bə manaval tanavəl kà, awulə gəl à afik la magodf à atà: “Dza uwana la tataka anjul la abà adadəh tsakana didi aw kà, atsa vok ala akur à mis uwaga zlà!” ⁸ Ñgaha la lig la ahəñ, awulə gəl à vədəh kà manəhay aya. ⁹ Mok uwana tatsənà gay uwaga kà, tadahà anjatà la tekula, tekula, azlamagolga dən, ñgaha azlabəza gə. Yesu

☆ 7:37 7.37 3Musa 23.36 ☆ 7:38 7.38 Hezəkiyel 47.1; Zakari 14.8 ☆ 7:42 7.42 2 Samuyel 7.12; Mika 5.2 ☆ 8:5 8.5 3Musa 20.10; 5Musa 22.22-24

agòd à ahøj kokudfa anja la mis matsizl à ahøj gá, uwaga la huma anja. ¹⁰ Kiya uwaga awulá gəl à afik agòdál: “Mis, atà la azlaməna mapuwa à ka gudzi à gəl anjak la? Dza la ahøj adúk w kà ka seriya à gəl aw uwa?” ¹¹ “Dza la ahøj aw, mənğa”, mis agòdál. Yesu agòdál: “Gi babay kà, gədukw ka seriya à gəl aw, hād, ama kadācfaha tsakana aya aw!”, Yesu agòdál.)

Yesu la uwana uƒaka anja gudəŋ à vok

¹² Bā gotənanj Yesu apəh gay à maham à ahøj dza aya: “Gi la uwana gi uƒaka anja gudəŋ à vok. Dza uwana anəf gi kà masla adābəz uƒaka anja sifa, adāday la mələs la abā aw.” ¹³ Azla Farisəya tagòdál: “Kak kà kapəhay kà sayda anja gəl anjak, uwana kapəhay kà makəs vok anja la ahøj aw.” ¹⁴ Yesu awulá à uda agòd à atà: “Baməraka gədaza sayda anja gəl gulo babay kà, mapəhay gulo kà dziriga, kà uwana gi kà gəsəl slaka uwana gəsà à wanj, la slaka uwana gəday babay. Ama akul kà, kasələw slaka uwana gəsà à wanj la slaka uwana gəday babay aw. ¹⁵ Akul kà kadfahaw seriya kà la mahoy yewdi, ama gi kà gədfəh seriya kà kiya uwaga aw. ¹⁶ Bā amiyaka gədfəh seriya à dza kà seriya gulo kà dziriga, kà uwana gədfəh seriya kà kokudfa gəl gulo aw, ama anu la Baba uwana asləl gi à wanj. ¹⁷ Uwaga kà matsəserayga la wakitə seriya anjul la abā: Sayda anja azladza səla uwana tapəhay kalkal kà dziriga. ¹⁸ Gəza sayda anja gəl gulo ŋgaha Baba uwana asləl gi à wanj az sayda anja gəl gulo babay.” ¹⁹ Tanəv Yesu: “Uwa à Baba anjak uwa?” Yesu awulá à atà ala: “Akul kasələw gi aw, baməraka Baba gulo babay aw, agayŋa kasələw gi kà, naka kasələw Baba gulo babay.”

²⁰ Yesu apəh gay uwaga kà la mok uwana atəpatàla tatak la møj gəy Zəzagəla la aku. Apəh uwaga kà la slaka uwana tafəh sahar anja ofərand à ahøj, dza aslāla vok anja makəsaw aw, kà uwana kaslā anja adaslay dadəŋ aw.

Kaslawwal à vok anja mad à slaka uwana gəday aw

²¹ Yesu agòd à atà aya: “Gəda anjulo, kadəyahaw gi, ama akul kadəmətsaw à tsakana anjul à abā. Kaslawwal à vok kà mad à slaka uwana gəday aw.” ²² Azla Yahudiya tagòd vok kà: “Adəkəf vok ay à uwana: ‘Kaslawwalla vok kà mad à slaka uwana gəday aw’, agòday?” ²³ Yesu awulá à atà ala: “Akul kà akul azladza anja wədfəh, ama gi kà gəsà à ahøj kà la zagəla. Akul azlaanja gudəŋ à vok uwanay, ama gi kà gi anja gudəŋ à vok uwanay aw. ²⁴ Kà uwana à uwana gəgòd à akul kà kadəmətsaw à tsakana anjul à abā, ndzer kà, kadəmətsaw à tsakana anjul à abā, à banja kadiŋaw gi gəl à vok à gi uwana gi aw.” ²⁵ Tanəvəl à gay zlá: “Kak uwa?” Yesu agòd à atà: “Gi uwana gəpəh à akul dagay madzəka. ²⁶ Lakəl anjul gi la azlagay mənğa anja mapəh à akul, à gay uwana adfahakulla seriya à gəl. Ama dza asləl gi à wanj kà dziriga, gəpəhay à azladza gudəŋ à vok kà uwana gətapla la slaka Baba pəra.”

²⁷ Tasəl kà Yesu apəhay lakəl anja Baba Zəzagəla aw. ²⁸ Kiya uwaga Yesu agòd à atà: “Banja kadətsizllaw Kona anja dza ala kà, kadəsələw kà gi uwana gi la ahøj. Kadəsələw kà gədfəh tatak la gəl gulo aw, ama gəpəhay kà lakəl anja uwana Baba apahà à gi ala pəra. ²⁹ Dza uwana asləl gi à wanj kà, anu səla, awkà asək gi kokudfa gəl gulo aw, kà uwana koksikoksi gədfəhøj uwana ahədfal à adi.” ³⁰ Uwana Yesu adapəhay kiya uwaga, azladza anjwaw tadiŋal gəl à masla à vok.

Azladza makor gəl gá la azlamayá

³¹ Yesu agòd à azla Yahudiya uwana tadiŋal gəl à vok: “Banja kakəsaw matapla à mapəhay gulo kà, kadəgaw azlaməna matapla la slaka gulo ndzer. ³² Kiya uwaga kà, kadəsələw dziriga, ŋgaha dziriga adādala akul à makor gəl à abā.” ³³ Tawulá à uda: “Anu kà anu mayyi à tsəh ala anja Abəraham, ŋgaha anu azlamayá anja azladza dƒikidiki aw, ŋgaha ma kakay kagòd à anu kà, mədəgay la makor gəl la abā ma?” ³⁴ Yesu agòd à atà: “Hadəy, gəpəh à akul la dziriga: Kəla uwabeyuyi uwana adəh tsakana kà, masla kà mayá anja tsakana. ³⁵ Mayá kà, aslāla vok anja magay masla gəy aw. Ama kona kà, agay masla gəy anja koksikoksi. ³⁶ Banja Kona adəpələkulla kadəgaw la makor gəl la abā ndzer. ³⁷ Gəsəl kà akul mayyi à tsəh ala anja Abəraham. Ama kayahaw makəf gi aya, kà uwana kakəsaw matapakulla gulo aw. ³⁸ Gəpəhay lakəl anja tatak uwana Baba gulo apəh à gi ala, ama akul kà kadfahaw uwana baba anjul tapəhəkulla, suwanj.”

³⁹ Tawulá à uda: “Baba gami kà Abəraham!” Yesu awulá à atà ala: “Agayŋa kagaw azlabəza anja Abəraham kà, naka kadfahaw sləray anja Abəraham uwana adfahəhəŋ. ⁴⁰ Gi kà, gəpəh à akul kà dziriga, uwana gətsənəŋ la slaka Zəzagəla, la uwana gəpəh à akul, ama bā la uwaga kà, kayahaw makəf gi. Tsəhay gá uwaga kà, Abəraham adfahəŋ didi aw. ⁴¹ Akul kà kadfahawwanj kà sləray anja baba anjul.” Atà tawulá ala: “Anu azlabəza gəl gaw aw, anu Baba gami kà la Zəzagəla, tekula pəra.” ⁴² Yesu agòd à atà: “Agayŋa Zəzagəla agay Baba anjul ndzer kà, naka kawoyaw gi, kà uwana gəsà à wanj la

slaka anha, à uwana gësà à slaka ankul kà masal anha. Gësà à wanj kà, la aslasl gël gulo aw, masla la uwana aslèl gi à wanj. ⁴³ Kà mana katsëbaw slëm à uwana gëpëh à akul aw zlà ma? Kà uwana kaslaw kà anja matsën uwana gëpëhay aw. ⁴⁴ Akul kà, baba ankul kà la seteni, asa à akul madàh uwana asa à seteni kà uwana masla makad dza dagay la madzëka vok anja tatak. Adapëh dziriga didi aw, kà uwana dziriga la ahënj la slaka anha aw. Banja apëh fida, apëh la fëla anha, kà uwana masla fida, ngaha masla baba anja fida. ⁴⁵ Ama gi kà, gëpëhay kà dziriga, ngaha kà uwaga la uwana kadiñaw gi gël à vok aw. ⁴⁶ Uwa la tataka ankul la abà aslala vok agodfay kà, gadadefehënj tsakana uwa? Kà mana, banja gëpëh dziriga kà, kadiñawwal gël à vok aw zlà ma? ⁴⁷ Dza anja Zëzagëla kà, atsëb slëm à gay Zëzagëla. Ama akul azlaanja Zëzagëla aw. Gay gà la uwaga katsëbaw gi slëm aw!”

Yesu atà la Abëraham

⁴⁸ Azla Yahudiya tagodfal: “Azlayla anu à uwana: Kak zil Samariya, mëgodf à ka, ngaha kak la azlamasëdëfok mawisiga aw uwà?” ⁴⁹ Yesu agodf à atà: “Gi la masasëdëfok mawisiga aw, ama gi gësëkaw Baba gulo, ama akul kà kapësew gi. ⁵⁰ Gi kà gëyäh mazlëbay anja gël gulo aw. Dza anik la ahënj tekula, uwana ayäh gi mazlëbay, masla la uwana masla seriya bay. ⁵¹ La dziriga gëpëh à akul: Dza uwana akës gay gulo, adämatsay diki diki aw.” ⁵² Azla Yahudiya tagodfal: “Lagonay kà mësel ndzer kà, kà kak la masasëdëfok mawisiga, Abëraham amëts, azlamëna mapëh à atà gay à ahël tamäts, ngaha kak kagodfay kà: ‘Dza uwana akës mapëhay gulo kà, adämatsay aw’, kagodf ma? ⁵³ Baba gami Abëraham amëts: Kadzugw ma: ‘Gëduwa masla’, kagodf takay? Azlamëna mapëh à atà gay à ahël bay tamäts. Ngaha ma kapakà gël anjak ala ma kà kak uwi?” ⁵⁴ Yesu awulà à atà ala, la magodfay: “Agaynja gëzlëb gël gulo kà, naka mazlëbay gulo, akës vok aw. Baba gulo la uwana azlëb gi, à masla à uwana: ‘Zëzagëla gami’, kagodfaw. ⁵⁵ Ama kasëlaw masla diki diki aw. Ama gi kà gësël masla. Agaynja gëgodfay kà, gësël masla aw kà, naka gëgay masla fida bokuba akul. Ama gësël masla, ngaha gëkës gay anha. ⁵⁶ Abëraham baba ankul kà, arab lakël mavakay anja mas à wanj gulo, anënjän ngaha arab kaykay.” ⁵⁷ Azla Yahudiya tagodfal: “Uwala kaslay mavay dzik zlo, awkà përa: ‘Gënëjä Abëraham’, kagodf ay?” ⁵⁸ Yesu awulà à uda: “Hadfay, gëpëh à akul la dziriga: Mok uwana talëg mayyay Abëraham kà, gi la ahënj.” ⁵⁹ Ngaha tahël akur kà matsähla. Ama kusäh. Yesu ahacä vok à ahënj, asà à lag la mënj gay Zëzagëla la aku.

9

Yesu awur dza uwana ala tayyà à ahënj la gulëf gä

¹ Mok uwana Yesu anëfä tetëvi anha, anënjän dza anik uwana tayyà à ahënj gulëf gä. ² Azlamëna matapla la slaka anha tanavà: “Mënga, kà mana dza uwanay kà tayyà à ahënj kà gulëf gä ma? Kà tsakana anja gël anha ay, à uwana kà tsakana anja azlababa anha ay?” ³ Yesu awulà à atà ala: “Kà tsakana anha aw, kà tsakana anja azlababa anha magay aw. Tayyà gulëf kà, kà slëray anja Zëzagëla anja mapëhla vok ala la masla la abà përa. ⁴ La afats kà, say mëdäh slëray anja dza uwana aslèl gi à wanj. Vëdf la uwaga atsa à wanj, à uwana dza aslala vok anja madäh slëray aya aw. ⁵ La mok uwana gi la gudënj la vok kà, gi ufaka anja gudënj à vok.” ⁶ Uwana Yesu adapëh uwaga la gay ala, atëf sleslif à vëdfah alëpàni kutso, asëfah à yewdi anja gulëf uwaga. ⁷ Ngaha agodfal: “Häd, kadäpal yewdi anjak la mukwä Silowe la abà (Slëm uwaga asal magodfay maslëlay) Gulëf ahäd, apäl adi. La mok uwana awulà à wanj la tetëvi la ama, aslälà vok anja manënja adagay.” ⁸ Azlamëna magay anha la azladza uwana tanäj à ahënj atsatsäh tatak uwarä, tagodf: “Uwanay kà dza uwana adzähah madzay kà matsatsäh tatak aw, takay?” ⁹ Azladza anik: “Masla”, tagodfah. Azlaanik babay: “Masla aw”, tagodf, “Ama maftsa à vok anha përa”, tagodf. Zil uwaga agodf à atà: “Kà bə, gi!” ¹⁰ Tagodfal: “Kakay yewdi anjak apakwä vok ma?” ¹¹ Agodf à atà: “Dza uwana tazelalla Yesu alëpàni abisl, ngaha asafäh gi à yewdi, ngaha agodf à gi: ‘Häd, kadäpal adi anjak la mukwä Silowe la abà’, agodf à gi. Ngaha gëhäd, mok uwana gëdapal à adi, gësälà vok anja manënja.” ¹² Tanaväl: “Anjala dza uwatà la?”, tagodfal, “Gësäl aw”, agodf à atà.

Azla Farisëya tanav gulëf la gay ala

¹³ Kiya uwaga tadälà gulëf à slaka azla Farisëya. ¹⁴ Kà uwana Yesu alëpàni kutso, asëfahäl à yewdi kà dza uwatà la mavakay maduww lëw à uwana awuräj ala. ¹⁵ Kà uwaga à uwana azla Farisëya babay tanäv dza uwatà, tagodfal: “Kakay kanënja lagonay adagay ma?” Kona uwaga agodf à atà: “Asafäh à gi abisl à yewdi, ngaha agodf à gi: ‘Häd à mukwä Silowe à abà, kapal adi’, ayä gëgöd, gëhäd, gëpäl adi, ngaha lagwa gëdanënja.” ¹⁶ Azlaanik la tataka azla Farisëya la abà tagodf: “Dza uwana adahä tsëhay gä uwanay

kà, asà à wañ kà la slaka Zəzagəla aw, kà uwana afà gəl à vud' maduw ləv aw." Ama azlaanik tagòf: "Kakay dza aslala vok aña mad'ah nadzipo kiya uwanay, tsa banja masla tsakana ma?" Nğaha tatsək ala la tataka aņatà la abà.

¹⁷ Azla Farisəya tanàv à guləf uwana awür ala aya gotənaņ: "Kak ma uwa kagođ kà dza uwana awurà kà ala uwa?" Agòđ à atà: "Masla mapəhal gay à ahàl aña Zəzagəla, kà mapàh à azladza", agòđ à atà. ¹⁸ Bà gotənaņ azla Farisəya tadinjal gəl à vok, kà masla tayyà guləf gə aw, nğaha awür ala tagòđ aw, kà uwaga à uwana tazàl azlababa aņha à wañ aya babay, ¹⁹ kà tanav atà gay ala, tagòđ: "Had'ay ma, uwanay kà kona aņkul ay? Ndzer ma, kayyàw ma guləf gə ay? Kà kay à uwana apakà vok à uwana anəņla lagwa adagay ma?" ²⁰ Azlababa aņha tawulà à uda, tagòđ: "Məsəl kà masla kona gami, uwana məyyà guləf gə. ²¹ Ama anu kà, məsəl tatak uwana apakà vok kà manəņla aņha lagonay aw, nğaha məsəl dza uwana apəzllal yewdi babay aw. Nàvəw à masla la gəl aņha, kà uwana masla asla manaval gay adagay." ²² Uwana tapəh kiya uwanay kà, kà uwana guba akəs à atà kà azla Yahudiya, kà uwana azla Yahudiya tatsats'əl vok gay kà atà aña makudək azladza uwana à lag la gəy madəv kudfa la aku, uwana: 'Yesu kà Kristu', tagòday. ²³ Kà uwaga à uwana azlababa aņha tagòđ kà: "Masla kà asla maula gay à uda la gəl aņha, nàvəw à masla", tagòđ.

²⁴ Bà gotənaņ azla Farisəya tahàd, tazàla dza uwana awür ala aya kà masəla, nğaha tagòđal: "Pəh la dziriga la huma Zəzagəla, məsəl kà dza uwatà kà masla tsakana."

²⁵ Agòđ à atà: "Gəsəl aw, adagay masla tsakana, adagay masla tsakana aw kà, gəsəl aw. Ama tatak tekula uwana gəsəl kà: Gi guləf, ama lagwa kà gənəņla!" ²⁶ Tanavàl aya: "Mana kadahàņ ma? Kakay apəzł à ka yewdi ma?" ²⁷ Awulà à atà ala: "Gədapəh à akul təga aw uwa?", agòđ à atà. "Ama kafaw gi sləm aw. Kà mana asa à akul matsənəņ aya kà masəla ma mi? Awma akul babay ma asa à akul magay azlaməna matapla la slaka aņha babay kəla ay?" ²⁸ Tatsəkəl magòdahay à gəl la magòday: "Kak masla matapla aña zil uwaga, ama anu kà anu, anu azlaməna matapla aña Musa. ²⁹ Məsəl kà Zəzagəla abadimà la Musa, ama masla kà, bə slaka uwana asà à wañ la abà kà, məsəl aw!" ³⁰ Zil uwaga awulà à atà ala: "Lagwa kà tatak uwanay la uwana aval ləv à dza à gay zlə, kasəlaw slaka uwana asà à wañ la abà aw, ama masla la uwana apəzł gi yewdi gulo! ³¹ Məsəl kà Zəzagəla atsəb sləm à azlaməna tsakana aw, ama atsəb sləm à dza uwana ahoy yewdi aņha, nğaha akəs mapəhay aņha. ³² Didi didi gədatšenəņ tagòday kà dza adapəzł yewdi à dza, uwana tayyà guləf gə aw. ³³ Agayņa dza uwaga atsà à wañ la slaka Zəzagəla aw kà, naka tatak la ahəņ adefəņ aw." ³⁴ Tagòđ à guləf: "Tayyà ka à tsakana à abà, nğaha ma asa à ka, kà matapanula tatak takay?", takudək à lag la gəy madəv kudfa la aku.

Magay guləf la tetəvi aña Zəzagəla la tsəh

³⁵ Mok uwana atsənà à Yesu kà takudək à lag la gəy madəv kudfa la aku kà, agagàm atà səla, agòđal: "Kadiņ gəl à Kona aña dza à vok ay?" ³⁶ "Məņga, pəhgəla, uwa à masla uwa, kà gi aña madiņ gəl à masla à vok uwa?", agòđal. ³⁷ "Masla gə la uwaga kanəņaņ, à uwana abadakama lagwa", Yesu agòđal. ³⁸ "Gədinjal à ka gəl à vok, Sufəl gulo", zil uwaga agòđal, nğaha la makədeđ à ahəņ la huma aņha.

³⁹ Kiya uwaga Yesu agòđal: "Gəsà à wañ à gudəņ uwanay à vok kà seriya aña mad'ah vok, kà azlaguləf aña manəņla, nğaha azlaməna yewdi aña mapakàh guləf." ⁴⁰ Azlaanik la tataka azla Farisəya la abà, uwana la slaka aņha la abatà, tatsənà gay uwaga, nğaha tanavàl: "Anu ma anu azlaguləf babay suwan ay?" ⁴¹ Yesu agòđ à atà: "Agayņa kagaw azlaguləf kà, naka kagaw azlaməna tsakana aw, 'Tsa mənəņla', kagođaw kà, tsakana aņkul aləg."

10

Gay la gay la abà aña masla manəņla azlatuwan

¹ "Gəpəh à akul la dziriga, dza uwana aguwa la gay gamagəy aña gargar aña azlatuwan aw, ama aguwa à ahəņ kà la gəl aña zlagam, bi aguway la slaka anik kà, masla kà masla gəl, masla nabəra. ² Ama dza uwana aguwa à gəy la gamagəy kà, masla manəņla azlatuwan. ³ Masla manəņla gamagəy kà apəzllal gamagəy, azlatuwan bay tatsən kuda aņha. Azàllàh azlatuwan aņha, sləm la sləm, nğaha atsala atà à uda. ⁴ Banja adasa à atà à uda gesina kà, masla aguwa atà à huma, azlatuwan tanəfay, kà uwana tasəl kuda aņha. ⁵ Ama tanəf mələk dza aw, tahoyal à ahàl, kà uwana tasəl kuda aņha aw."

⁶ Yesu apəh à atà gay la gay la abà uwaga, ama tasəl tatak uwana apəh à atà aw.

Yesu masla manəņla azlatatak delga.

⁷ Yesu agòd aya: “Gèpèh à akul la dziriga, gi la uwana gi gamagày anja gargar anja azlatuwanj. ⁸ Azlauwana tatsà à vok à wanj kà gi kà, gesina kà, azlamèna gəl, azlamèna nabèra. Ama azlatuwanj tatsəb à atà sləm aw. ⁹ Gi la uwana gi gamagày. Dza uwana adàda à gày la sləm gulo adàbelay, aslala vok ada à gày, atsa à uda, abəz tatak may. ¹⁰ Masla gəl kà, atsa à wanj kà, kà mad à gəl pèra, makadaj, la madàdasàh atà ala. Ama gi kà gəsà à wanj kà azladza anja maβəzal sifa uwana aduwa vok kaykay.”

¹¹ “Gi masla manəŋla azlatuwanj delga. Masla manəŋla azlatuwanj delga av sifa anja kà azlatuwanj anja. ¹² Dza uwana adàh sləray kà anja sili pèra, uwala azlatuwanj anja aw kà, dza anja azlatuwanj aw. Asakay azlatuwanj à ahəŋ, ahoy anja à banja anəŋa kəda fəta atsa à wanj à slaka anja, ŋgaha kəda fəta akəs atà, adàdasàh atà gesina. ¹³ Ahoy anja kà uwana adàh sləray kà anja sili, ŋgaha af sləm à azlatuwanj aw. ¹⁴⁻¹⁵ Gi masla manəŋla azlatuwanj delga. Bokuba uwana Baba asəl gi, gi bay gəsəl masla. Gəsəl azlatuwanj gulo, atà babay tasəl gi. Ŋgaha gəv sifa gulo kà anja azlatuwanj gulo. ¹⁶ Azlatuwanj gulo anik la ahəŋ à uwana atà la ahəŋ la gargar uwanay la abà aw. Say gəsəlla atà à wanj babay kà atà anja masəl kuda gulo lagwa. Kiya uwaga adagay maham à ahəŋ tuwanj tekula, la masla manəŋla atà tekula à ahəl.”

¹⁷ “Baba awoya gi, kà uwana gəv sifa gulo, kà gi anja maulal à tsəh aya. ¹⁸ Dza la ahəŋ azəb sifa la slaka gulo la ndzəda aw, ama gi la uwana gəvay la mawoyəŋ gulo. Gi la maslay kà mavəy, ŋgaha gi la maslay anja maulal à tsəh aya. Kiya uwaga la uwana: “Dahəŋ”, Baba gulo agòd à gi.”

¹⁹ Kà gay uwaga matsakla ahəd à tataka azla Yahudiya à abà aya. ²⁰ Anjwaw la tataka anjətà la abà tagòd: “Masla la masasəfok mawisiga, bada, kà mana katsəbawwal sləm ma?” ²¹ Azlaanik tagòd: “Dza uwana la masasəfok mawisiga aslala vok anja madəhəŋ kiya uwanay aw. Kakay masasəfok mawisiga aslala vok mawur guləf ala ma?”

Azla Yahudiya takweska Yesu

²² Madəvadaj matsikasl mən gày Zəzagəla ala apakà vok la Urusalima la təla awkusa. ²³ Yesu auguzàh la mən gày Zəzagəla la aku la tsəh tsatsagla anja Salomon. ²⁴ Kiya uwaga azla Yahudiya takəsəl gay à adi, tagòdal: “Mbà kadəsəlla à anu à uda la madzugway gami la abà ma? Banja kak Kristu kà, pəh à anu la dazuwaya, lakana!” ²⁵ Yesu agòd à atà: “Gədapəh à akul nəma, asa à akul matsəb gi sləm aw pèra. Sləray uwanay gədehəŋ la ndzəda anja Baba gulo kà sayda gulo. ²⁶ Ama akul kà, kadiŋawwal gəl à vok aw, kà uwana akul la tataka anja azlatuwanj gulo la abà aw. ²⁷ Azlatuwanj gulo tatsəna kuda gulo, gəsəl atà, ŋgaha tanəfa gi. ²⁸ Gəv à atà sifa adəv à gay aw, tadəmətsay didi aw, dza aslala vok anja mahəl atà la ahəl gulo aw. ²⁹ Tatak uwana Baba gulo abək gi atà kà, aduwanj azlatatak gesina, dza la ahəŋ ahəl atà la ahəl anja Baba gulo aw. ³⁰ Anu la Baba kà anu tekula.”

³¹ Azla Yahudiya tahəl akur kà matsàhla aya. ³² Ama Yesu agòd à atà: “Gəfahà azlasləray dzəba anja səla aw gə uwanay, la huma ankul gesina la maslay anja Baba gulo uwana avà à gi, ŋgaha ma kà sləray ma uwala asa à akul matsəhgəla akur la?” ³³ Azla Yahudiya tawulà ala: “Asa à anu kà matsəh kà la akur kà sləray uwana kadahəŋ aw, ama kà uwana kapəh mawisiga lakəl anja Zəzagəla: Tsa kak dza deyday kà pèra, kagagazləla gəl anjak la Zəzagəla ma, məgòd.”³⁴ Yesu awulà à atà ala: “Tatsetsər à wakitə mapəhay akul à abà kà, Zəzagəla agòd à akul azlazəzagəla,³⁵ məsəl la paraka kà, kà dza aslala vok anja mawisəŋ ala uwana matsetserayga la wakitə mapəhay la abà aw. Zəzagəla azal azlazəzagəla azladza uwana takəs gay anja. ³⁶ Gi kà, Zəzagəla akəsəni, asləl gi à wanj à gudəŋ uwanay à vok, ŋgaha ma kakay kagədaw kà, gəpəh mawisiga à Zəzagəla à vok ma? Tsa gəpəhla dziriga kà gi Kona anja anja ma? ³⁷ Tsa banja sləray anja Baba gulo la uwana gədehəŋ, awkà kadiŋaw gi gəl à vok zlə ma aw. ³⁸ Ama banja sləray anja la uwana gədehəŋ kà, diŋaw gi gəl à vok, kadiŋaw gi gəl à sləray gə uwana à vok tsi, kà akul anja masəl la paraka aw kà gi la Baba la abà, ŋgaha Baba babay la gi la abà.”

³⁹ Tatàhkà à makəsəy gotənanj, ama atəf kà atà. ⁴⁰ Yesu adà anja à gay dərəv à uda anja mukwà Urdun, la slaka uwana Yuhana adàhàhà batem uwarə. Ŋgaha adzà à ahəŋ la abatà. ⁴¹ Azladza anjwaw tasàh à slaka anja. Tagòd: “Dikidiki Yuhana kà, adadafah nadzipo aw, ama uwana apəh lakəl anja dza uwanay kà agòd à afik, ndzer.” ⁴² La abatà azladza anjwaw tadiŋ gəl à masla à vok.

11

Mamətsay anja Lazar

¹ Dza anik la ahøj, sløj anja Lazar, agà la d'uvats, adzà à ahøj la Betaniya, la gudøj uwana Mariyama atà la deda anja Marta tadzà à ahøj. ² (Mariyama uwaga kà mis uwana adzadzàb amàl matørsin à Suføl Yesu à asik à gøl, aslasladà, anjalal la anjdz gøl anja) Deda anja Lazar la uwana agà la d'uvats. ³ Azladedà dëgamga sèla uwaga taslël gay à Yesu à tsøj, tagòfal: "Suføl, slawda anjak kà la d'uvats." ⁴ Uwana Yesu atsnà uwaga, agòd: "Duvats anja Lazar kà, d'uvats mamòtsay aw, ama uwaga kà, kà mapøhla maslay anja Zëzagøla ala, uwaga la uwana adàpøhla mazløjbay anja Kona anja ala bay."

⁵ Yesu awoyà Marta atà la Mariyama la Lazar deda anjatà. ⁶ Mok uwana atsnøj kà Lazar la d'uvats kà, adzà à ahøj la slaka uwatà mavakay sèla aya gotønøj. ⁷ La lig la ahøj, agòd à azlamøna matapla la slaka anja: "Møjwul à kutso Yahudiya!" ⁸ Azlamøna matapla la slaka anja tawulà ala: "Møjnga adasafay aw, bà nekwa nekwa azladza tayàh matsàh kà à gøl la akur, ngaha asa à ka mawul à abatà aya ay?" ⁹ Yesu agòd à atà: "Sa kulo gøl anja sèla la ahøj la mavakay la tsøj aw takay? Kà uwana banja dza aday la afats, matekwid' atsalla aw, kà uwana anøjna u'faka anja gudøj à vok uwanay. ¹⁰ Ama banja dza aday la vød kà, matekwid' atsalla, kà uwana u'faka la ahøj la masla la abà aw." ¹¹ Yesu apøj à atà gay uwaga ngaha azatàlàn à gøl: "Slawda gami Lazar kà aga la madzèhal gà, kà uwaga à uwana gøday anja madatsønøj ala." ¹² Azlamøna matapla tawulà à uda: "Suføl, banja adzèhal kà, adàwurla, haday!" ¹³ Ama Yesu kà asàl magòday kà Lazar kà adamòtsay, ama azlamøna matapla la slaka anja tadzùgw lakøl anja madzèhal deyday pøra. ¹⁴ Kiya uwaga Yesu agòd à atà la paraka kà: "Lazar adamòtsay. ¹⁵ Gi la marabay kà anjul, à kà uwana gi la abatà aw, ngaha kà akul anja madij gi gøl à vok. Ama lagwa, møjhad à slaka anja." ¹⁶ Kiya uwaga Tomas uwana tazalalla vøgal, agòd à azlamøna matapla anik: "Anu babay kà, møjhad kà mødàmòtsay la møjnga gami."

Yesu masla maula azladza à uda la mamòtsay

ngaha masla mav sifa.

¹⁷ Mok uwana Yesu adà à awtày kà, Lazar adadafah mahøjay u'fad la zøjvay la aku. ¹⁸ Betaniya kà nekwa la Urusalima, kørkør anja kà bokuba magur mahøjay pølis tekula. ¹⁹ Azla Yahudiya anjvaw tasàhà à wanj à mtøga Marta atà la Mariyama kà mamòtsay anja deda anjatà Lazar.

²⁰ Uwana Marta atsnøj kà Yesu atsa à wanj, ahàd kà matsòfal à ama. Ama Mariyama adzà à ahøj à mtøga. ²¹ Marta agòd à Yesu: "Suføl, agaynja kagay la abanay kà, naka deda gulo amòtsay aw. ²² Ama lagonay babay kà, tatak uwana kadànavay à Zëzagøla gesina kà, adavà à ka!" ²³ Yesu agòd: "Deda anjak adàula à uda la sifa." ²⁴ Marta agòd: "Gèsøl adàwula à uda la mamòtsay, la kaslà uwana azlamazimneki' tadàula à uda la vud makòd gøl à ahøj."

²⁵ Yesu agòd: "Gi la uwana gi masla maula azladza à uda la mamòtsay, ngaha la sifa, dza uwana adinj gi gøl à vok, adàdza à ahøj la sifa, amiyaka kà amòts, ²⁶ ngaha dza uwana la sifa, ngaha adinj gi gøl à vok kà, adàmòtsay diki'diki aw, kadij gøl à uwaga à vok nøjay?" ²⁷ "Iyay Suføl", agòd, "Gødiñal gøl à vok, kà kak Kristu, Kona anja Zëzagøla, uwana naka atsa à wanj à gudøj à vok."

Yesu atuway

²⁸ Mok uwana Marta adapøj gay uwaga, ahàd, azàla deda anja Mariyama, agòd la gøl à gøl: "Møjnga gami kà, agà la abanay, ayàh ka, kà mad à awtày." ²⁹ Mok uwana Mariyama adatsøn gay uwaga, asà à afik amørà vok kà mad à slaka Yesu. ³⁰ Mok uwatà kà, Yesu kà, adabøj à hu'f gudøj à abà dadøj aw, aløj la slaka uwana tagagàm la Marta. ³¹ Uwana azla Yahudiya, uwana atà la kay la slaka Mariyama kà matabla gay à ahøj, tanøjøj asà à uda la mamøj vok kà, tanøjà à uda. Tadzùgw kà, adàla kà matuway à gøl zøjvay tagòd. ³² Mok uwana Mariyama adabøj à slaka uwana Yesu kà agà la abatà, atøj à makøla asik anja la makòdèday, ngaha agòd: "Suføl, à magay kagay la abanay kà, naka deda gulo kà amòtsay aw." ³³ Uwana Yesu anøjà, atuway la azla Yahudiya uwana tasà à wanj atà nna bay tataway, hu'f kut, løjv agòd la uwaga. ³⁴ Anàv atà: "Kalàw ma uwala?" Tagòd: "Suføl, sà à wanj, kanøjna slaka uwana tallà à abà." ³⁵ Yesu atøj. ³⁶ Kiya uwaga azla Yahudiya tagòd: "Nøjàw mawoy masla anja tsi!" ³⁷ Ama azlaanik la tataka anjatà la abà tagòd: "Masla uwana apokwàhà yewdi à azlaguløj tak ma, kà mana asla kà madøj gay à mamòtsay à Lazar la vok ala aw ma?"

Mawul à uda la mamòtsay anja Lazar

³⁸ Bà gotønøj kà, Yesu kà løjv anja adatøj ala aw, ahàd à gøl zøjvay. Uwaga kà tsakur, matsakal à ama gà la akur mabølám bølámga. ³⁹ "Zøjbàwwal abølám la gay ala!", Yesu

agòd à atà. Marta, deda anja mazimnekiđ agòd: “Sufel, azinay adagay, kà uwana adafah mahənyay ufad la aku.” ⁴⁰ Yesu agòdal: “Gəpəh à ka aw takay, kà baŋa kadiŋal gəl à vok kà, kadənənəŋəŋ mazləbay Zəzagəla, gəgòd à ka aw ay?” ⁴¹ Tazəbəl abələm la gay ala. Yesu anəŋà à zagəla la magòday: “Baba, kikay gəgòd à ka, kà uwana katsəb gi sləm. ⁴² Gəsəl kà kadatsəb gi sləm koksikoksi, ama uwana gəpəh uwanay kà, kà maham à ahəŋ dza uwanay tatsəb gi sləm lagwa, kà atà anja madiŋal gəl à vok, kà kak la uwana kasləl gi à waŋ.” ⁴³ Mok uwana adapəh gay uwaga, awiyà la ndzəda: “Lazar, sà à lag la aku!” ⁴⁴ Mazimnekiđ asà à lag, azlaahàl la azlaasik anja matsafad à ahəŋ à ahəŋ gə la gabaga, huđ adi anja mafafadal nalbət à adi gə. Yesu agòd à atà: “Pələwwəŋ ala, ŋgaha sàkəwwal, adà anja.”

Tatsatsəl vok gay kà makəs Yesu

⁴⁵ Anjuvaw la tataka azla Yahudiya uwana la abà tasà à waŋ à slaka Mariyama, tanəŋà tatak uwana Yesu adafahəŋ gesina, tadiŋ gəl à masla à vok. ⁴⁶ Ama azlaanik la tataka anjətà la abà, tahàd à slaka azla Farisəya, tatugw à atà uwana Yesu adafahəŋ gesina. ⁴⁷ Kiya uwaga azla Farisəya la azlamadzahaga anja azlaməna mav tatak à Zəzagəla la azlaməna makoray tahamə gay à vok kà matsəsəl vok gay, tagòd: “Mana mədəhəŋ la dza uwanay adafah azlanadzipo anjuvaw mi? ⁴⁸ Baŋa məsakal kiya uwanay, azladza gesina tadiŋ gəl à masla à vok, ŋgaha azla Rom bay tadəsa à waŋ, tadəkalah anu məŋ gəy Zəzagəla gami à ahəŋ la tsəhay gami.” ⁴⁹ Tekula la tataka anjətà, uwana sləm anja Kayyif, uwana masla agə məŋ madzahaga la mavay uwatà la tsəh, agòd à atà: “Kasəlaw tatak aw! ⁵⁰ Kasəlaw kà ŋuləm dza tekula aməts kà gudəŋ gesina anja mazila aw takay?” ⁵¹ Apəh gay uwaga kà la masal anja aw, ama kà masla la uwana məŋ madzahaga la mavay uwatà la tsəh. Apəh à ahəŋ kà say Yesu amətsay, kà anja azla Yahudiya, ⁵² Kà anja tsəhay anjətà pəra aw, ama bay kà maham gay azlabəza anja Zəzagəla uwana à vok, taslèh gəl à ahəŋ la uda gesina. ⁵³ Dagay la vuđ uwatà, azlaməŋga anja azla Yahudiya tatsatsəl vok gay, kà makəs Yesu kà makəday. ⁵⁴ Kà uwaga à uwana Yesu auguzàh la dazuwəla, la tataka azla Yahudiya la abà aya aw. Masla ahàd à gudəŋ anik à abà la fəta, uwana sləm anja Efərayim, adzà à ahəŋ la abatà la azlaməna matapla la slaka anja. ⁵⁵ Madəvaday anja Paska anja azla Yahudiya nekwa. Azladza gudəŋ anik anik anjuvaw tadà à afik à Urusalima, kà uwana asà à atà matsikasl gəl ala ŋurayŋa mavakay madəvaday atsà à waŋ. ⁵⁶ Tayəh Yesu à mok, uwana atà la məŋ gəy Zəzagəla la aku. Tanavà vok kà atà kà atà: “Mana kadzugwaw ma, adəsa à waŋ à madəvaday takay? Awma adəsa à waŋ aw ay?” ⁵⁷ Uwana tapəh kiya uwaga kà, kà uwana azlamadzahaga anja azlaməna mav tatak la azla Farisəya tagòd kà: “Baŋa dza asəl slaka anja kà, apəhla ala kà maday makəsay”, tagòd.

12

Mariyama adzadzəb matərsin à Yesu à asik à gəl

(Mata 26.6-13; Mark 14.3-9)

¹ Mahənyay mukwa adà à lig kà, kà mas à waŋ anja madəvaday Paska, Yesu ahàd à gudəŋ Betaniya, à slaka uwana Lazar adzà à ahəŋ, à Lazar uwana awulà à uda la mamətsay. ² La abatà tatà tatak may à Yesu. Lazar kà tekula la tataka azladza uwana la abà, tadzàh à tatak may à adi la Yesu. Marta la uwana atsàk à atà tatak may. ³ ŋgaha Mariyama azəb dərew aməl matərsin bəf la dərew gə matsidayga, azlə gay tenma anja litre. Tsakalay anja kà zlazladfa. Adzadzəb à Yesu à asik à gəl, ŋgaha aslasladfəŋ ala la anjidz gəl anja, kà uwana abàdal à asik à gəl. Uwaga kà tadafahəŋ kà la ahəf mazinayga. Mazinay anja azəb gəy à gəl. ⁴ Tekula la tataka azlaməna matapla anja la abà à Yudas Iskariyot, masla uwana ayah mat à kaf à Yesu à gəl agòd: ⁵ “Kà mana taduw matərsin uwanay ala kà anja sili ŋursu dadərmokw makə, kà mavəh sili gə à azlaməna kuđa aw ma?” ⁶ Uwana apəh kiya uwaga kà, kà uwana awoyà azlaməna kuđa magay aw, ama kà uwana masla kà masla gəl: Masla la uwana anəŋla kiwa sili, ŋgaha azaəbàni uwana tafàh à agu. ⁷ Yesu agòdal: “Sàkal, afà matərsin uwaga à ahəŋ kà anja vuđ mal gi, ⁸ akul, koksikoksi kadəgaw la azlaməna kuđa, ama gi kà, mədəday anina koksikoksi aw.”*

Matsatsəl vok à gay kà makəđ Lazar

⁹ Mok uwana maham à ahəŋ dza asəl kà Yesu kà aga la Betaniya kà, azla Yahudiya tahàd, ama kà gay anja Yesu pəra aw, ama bay kà, kà Lazar uwana Yesu awulà à uda la mamətsay bay. ¹⁰ Azlaməŋga anja azlaməna mav tatak à Zəzagəla tatsənə vok gay kà makəđ Lazar, ¹¹ kà masla à uwana azla Yahudiya anjuvaw tasàk azlaməŋga anjətà la tsəh ala kà madiŋal gəl à Yesu à vok.

*Yesu ahàd à Urusalima à abà**(Mata 21.1-11; Mark 11.1-11; Luka 19.28-40)*

¹² La bebènj gà, maham à ahènj dza, uwana tasà à wanj à madəvaday Paska tatsənànj, kà Yesu atsà à Urusalima à abà. ¹³ Kiya uwaga tasà à uda, taslàh babasl la azlaslahoy à vədàh la tetəvi la ama, kà Yesu anja maday maguw à ahènj la afik, kà magagamay atà nna la mawiyay: "Mazləbay agay la Zəzagəla, Zəzagəla apisa gay à dza uwana à vok, atsa à wanj la sləm anja Sufəl. Zəzagəla apisa gay à Sufəl anja azla Isərayel à vok!"[✱]

¹⁴ Yesu abəz à ziwɲɲu, adzà à afik la abatà, bokuba uwana wakità Zəzagəla apəh:

¹⁵ "Akul azladza Siyon, guba akəs akul aw, mənɲ Sufəl anjul kà masla la uwana atsa à wanj, adadza madzay la bəzi ziwɲɲu à afik."[✱]

¹⁶ Azlaməna matapla la slaka anja kà, tatsənà godega anja tatak uwaga dadən aw, ama mok uwana Yesu adəbəz à mazləbay kà, awul à atà à gəl uwana wakità Zəzagəla apəh lakəl anja kà uwaga dziriga, ɲgaha atà bay tagəd à uwaga à afik uwana apəh gesina lakəl anja la sləray anətà gesina.

¹⁷ Maham à ahènj dza, uwana atà la abatà, à mok uwana Yesu awulla Lazar à uda la mamətsay kà, tapəh lakəl anja uwana tanənənɲ gesina bay. ¹⁸ Kà uwaga à uwana, maham à ahènj dza asà à wanj kà magagamay la Yesu, kà uwana tasəl kà masla la uwana adəhà nadzipo uwaga. ¹⁹ Kiya uwaga azla Farisəya tagəd kà atà kà atà: "Nəɲəwwən zlə, kaslawwal à vok kà anja madəh tatak aya zlə aw, kà uwana azladza gesina kà tanəfay kà masla adagay."

Azla Gərək anik tayəh manənj Yesu

²⁰ Azla Gərək anik la tataka anja azladza uwana la abà tasà à wanj à Urusalima kà madəv kudà à Zəzagəla la madəvaday la abà kà, ²¹ tazà vok à slaka Filip, uwana asà à wanj la Betsayda, uwana la Galili, tagədɬal: "Kona, asa à anu manənənɲ Yesu." ²² Filip ahàd, apəh à Andəre, ɲgaha tahàd à slaka Yesu, atà sələ. ²³ Yesu agəd à atà: "Lagonay kà, kaslà adaslay adagay, à uwana Kona anja dza mabəz à mazləbay anja. ²⁴ Haday, gəgəd à akul la dziriga: Fofulo hi tekula adza à ahènj bawtawta, à banja atəd à kutso à abà, banja akəl gay aw. Ama banja adakəl à gay, adàsa à uda kà, av mayyay anjuvaw. ²⁵ Dza uwana awoya sifa anja kà, adəziɲ ala. Ama dza uwana afa sləm à sifa anja la gudəɲ uwanay la vok aw kà, adəbəl uwaga kà anja sifa adəv à gay aw. ²⁶ Banja dza asal mazlak gi kà, say anəf à gi, kiya uwaga bay magamza gulo adəgay la slaka uwana gədəgay suwanj, Baba gulo adəzləb magamza uwana adazlak gi."

Yesu apəh gay mamətsay anja à ahènj

²⁷ Yesu agəd lagwa kà: "Banbabənj, ləv agəd à gi, kakay gəgədɬay lagwa mi? Baba təf gi kà tatak uwana abəz à gi la kaslà uwanay? Ama kà anja uwaga la uwana gesa à wanj. ²⁸ Baba v à mazləbay à sləm anjak!" Kuda atsənà à ahènj la zagəla la afik agod: "Gədəzləbay, ɲgaha gədəzləbay aya gətənanɲ."

²⁹ Maham à ahènj dza uwana la abatà tatsənà kuda uwatà: "Uwatà kà masləh məl anja habaga", tagəd. Azlaanik tagəd: "Malika abadalmà." ³⁰ Ama Yesu apəh à atà la paraka: "Kuda uwaga atsənà à ahènj kà, kà anjulo aw, ama kà anjul. ³¹ Lagonay kà, kaslà adaslay à uwana seriya adəh vok à gudəɲ à vok uwanay à gəl, lagonay la uwana takudək sufəl anja gudəɲ à vok uwanay adagay kà makələnɲ à uda. ³² Gi, banja gədàda à afik la vədəh kà, gədəbiy azladza gesina à slaka gulo." ³³ La gay uwaga asal mapəhla tsəhay mamətsay anja uwana ala adəmətsay. ³⁴ Maham à ahènj dza agədɬal: "Mədžən la wakità mapəhay gami la abà kà, Kristu adadza à ahènj anja koksikoksi. ɲgaha ma, kakay kagodəy, kà Kona anja dza adəday à zagəla ma? Uwa à Kona anja dza uwa?"[✱] ³⁵ Yesu agəd à atà: "Udaka kà aga la ahènj la tataka anjul dadən, anja kaslà ɲul. Nəfəw tetəvi dziriga la mok uwana akul la udaka la abà, kà mələs anja matsak à akul à ama aw, kà uwana dza uwana aday la mələs la abà kà, asəl slaka uwana ada à abà aw. ³⁶ Kiya uwaga kà, diɲəwwal gəl à vok à mok uwana akul la udaka la abà, kà akul anja magay azladza anja udaka."

Azla Yahudiya tadiɲ gəl à Yesu à vok aw

Uwana Yesu adapəh gay uwaga kà, adə anja la abatà, ahəd à atà vok à adi. ³⁷ Amiyaka bə la azlanadzipo uwana adəhəhənɲ, anjuvaw la huma anətà babay kà, tadiɲal gəl à vok aw, ³⁸ kà magəd uwana à afik, masla mapəhal gay à ahəl Yesayya uwana agəd: "Sufəl uwa adin gəl à gay gami à vok uwa? A uwa à uwana Sufəl Zəzagəla apəhla maslay anja ala uwa?"

³⁹ Taslala vok anja madiɲal gəl à vok aw kà uwana Yesayya agəd aya:

✱ **12:13** 12.13 Mahabay 118.25-26 ✱ **12:15** 12.15 Zakari 9.9 ✱ **12:34** 12.34 Mahabay 110.4; Yesayya 9.7; Hezəkiyel 37.25

40 'Zəzagəla aguləfəh atə ala, adatsakah à atə hanəkəli à ama, kà yewdi anətə anja manəŋla aw, kà hanəkəli anətə anja masəl tatak aw. Nğaha kà atə anja magola vok à slaka gulo, kà gi anja mawur atə ala aya aw.'

Zəzagəla agòd.✧ 41 Yesayya apəh uwaga kà, kà uwana anəŋà mazləbay anja Yesu, à uwana apəh lakəl anja.

42 Anjuvaw la tataka azlaməna gày zil anja azla Yahudiya la abà, tadiŋ gəl à Yesu à vok, ama la dazuwaya aw, kà uwana guba akəs atə kà azla Farisəya anja makudəkàh atə à lag gày madəv kudə la aku. 43 Kà uwana asà à atə kà azladza tazləb atə, à kà mazləb atə anja Zəzagəla.

Gay anja Yesu kà, adəh seriya

44 Kiya uwaga Yesu azà kuda à zagəla la magòday: "Dza uwana adiŋ gi gəl à vok, adiŋ gəl kà à gi à vok pəra aw, ama à dza uwana à vok asləl gi à waŋ babay. 45 Nğaha dza uwana anəŋa gi, anəŋa dza uwana asləl gi à waŋ babay. 46 Gi kà, gəsà à waŋ à gudəŋ à vok kà bokuba gi udaka, kəla dza uwana adiŋ gi gəl à vok kà, adz à ahəŋ la mələs la abà aw. 47 Ama baŋa dza atsəna gay gulo, nğaha akəs aw kà, gi la uwana gədəfahla ala seriya à gəl aw, kà uwana gəsà à waŋ kà anja maβəl azladza gudəŋ à vok, awkà anja madəh seriya à gudəŋ à vok à gəl aw. 48 Dza uwana akweska gi, nğaha akəs gay uwana gəpəh aw kà, seriya la ahəŋ lakəl anja, gay uwana gəpəh la uwana adəfahla ala seriya à gəl, la vuđ madəv à gay gudəŋ à vok. 49 Gay uwanay gəpəhay kà la maslay anja aslasl gəl gulo aw, ama Baba uwana asləl gi à waŋ kà, la gəl anja, la uwana avà à gi maslay kà gi anja mapəhay, anja matapla azladza. 50 Uwana apəh à gi, la uwana atsakakulla sifa adəv à gay aw à waŋ. Uwana gəpəhay kà, gəpəhay kà bokuba uwana Baba avà à gi maslay lakəl anja."

13

Yesu apaləh asik à azlaməna matapla la slaka anja

1 Uwaga kà vuđ madəh vok anja madəvaday Paska. Yesu asəl kà kaslə anja adaslay, kà maz vok anja la gudəŋ uwanay la vok, nğaha kà madiy anja à slaka Baba anja la zagəla. Koksikoksi awoyəhà azlaməna anja uwana la gudəŋ la vok, adəwoya atə tsərəh à makəf gəl à ahəŋ.

2 Yesu la azlaməna matapla la slaka anja tazùw tatak may anja mokokhu. La mok uwaga kà, seteni adaguway la ləv anja Yudas, kona anja Səmon Iskariyot la tsəh, kà mat kaf à Yesu à gəl. 3 Yesu asəl kà masla kà asà à waŋ kà la slaka Baba, nğaha awulay à abatə aya, kà uwana Zəzagəla Baba avəl maslay à ahəl gesina. 4 Kiya uwaga Yesu atsizilla ala la tatak may la adi, asəbət dawara anja la vok ala, azəb gabaga anja, awəf à tsəh. 5 Nğaha avəd iyaw à daraw à abà adzəkà mapaləhla asik à azlaməna matapla la slaka anja, adəhàh à atə iyaw la asik ala la gabaga, uwana awəf à tsəh. 6 Mok uwana adabəz à slaka anja Səmon, Səmon Piyer agòfal: "Sufəl, kak la uwana kapal gi asik, kagòf takay?" 7 Yesu awulə ala la magòfal: "Səmon Piyer, tatak uwana gəfəhəŋ lagonay kà, kasəl dadəŋ aw, ama la huma la gay la uwana kadəsəl godega anja." 8 Səmon Piyer agòfal: "Awaŋ Sufəl, kapal gi asik aw!" Yesu agòfal: "Baŋa gəpəla à asik aw, kadəbəz à tatak la ahəl gulo aya aw." 9 Səmon Piyer awulə ala: "Sufəl, tsa kitə kà, kapal gi azlaasik pəra aw, ama pal gi azlaahəl gulo, la gəl gulo gesina!" 10 Yesu agòfal: "Dza uwana adapal vok gesina kà, anəkudə mapal vok aya aw, say azlaasik gə pəra, kà uwana vok anja kà kuzekaka. Akul azlakuzekaka, ama akul gesina nəma aw." 11 Yesu kà asəl dza uwana adətəl kaf à gəl, kà uwaga à uwana agòd: "Akul azlakuzekaka gesina aw."

12 La lig anja uwaga la ahəŋ, à mok uwana adapaləh à atə asik, Yesu awulə dawara anja à vok aya, nğaha adzà madzay la slaka anja la abà, agòd à atə: "Katsənw godega anja uwaga gədəfahakullaŋ takay?" 13 Akul kazalawgəla mənğa, nğaha Sufəl, azlayla akul nəma, kà uwana gi masla hađay. 14 Tsa baŋa gi la uwana gi Sufəl, nğaha mənğa kà, kà gədapaləh à akul asik lagwa, akul babay kà, azlayla kà vok kà kapalahaw vok asik kà akul kà akul suwaŋ babay zlə. 15 Lagwa kà gədəpəhakulla mafətsa à vok anja, à uwana kadəhəwwəŋ bokuba uwana gəfəhəŋ zlə, la slaka anjul. 16 Hađay la dziriga gəpəh à akul: Masla sləray la ahəŋ, aduw mənğa anja aw, masləlay bay, aduw dza uwana asləl aw! 17 Lagonay kà, kasəlaw uwaga, kadəgaw la marabay à baŋa kakəsaw uwaga gesina."

18 "Gəpəhay kà lakəl anjul gesina aw, gəsəl azlauwana gətsatsəmàni atə. Ama say gay anja matsetseray uwanay agəf à afik, dza uwanay məzuw tatak may anu səla, la uwana adəguwgəla à lig à vok.✧ 19 Dagay lagonay gəpəh à akul à vok à abà, kokudə

mapak vok anja azlatatak uwaga, ngaha kà baŋa azlatatak uwaga adàpaka vok kà, akul anja maselay kà gi uwana gi ndzer. ²⁰ Gəpəh à akul la dziriga: Dza uwana akəs gi, akəs dza uwana asləl gi à wanj babay.”

Yesu apəh gay matal kaf à gəl anja Yudas

(Mata 26.20-25; Mark 14.17-21; Luka 22.21-23)

²¹ La mok uwana Yesu adapəh gay uwaga, abək mazaw la gəl mənğa agòd: “Gəpəh à akul la dziriga kà: Tekula anjul adàta à gi kaf à gəl!” ²² Azlaməna masla matapla tanəŋà à vok à adi kà atà kà atà, tasəl dza uwana apəhay lakəl anja aw. ²³ Tekula anja azlaməna matapla uwana Yesu awoyən kaykay, agà la makəla anja. ²⁴ Səmon Piyer anavəl la yewdi, kà masla anja manavay à Yesu kà masəl dza uwana apəhay lakəl anja. ²⁵ Kiya uwaga, masla matapla ahùb à slaka Yesu kà manaval: “Sufəl uwa, uwatà uwa?”^{*}

²⁶ Yesu agòdál: “Aganay gədəbay aləl à kaf à gəl, dza uwana gədàvəl kà, masla gə la uwaga.” Kiya uwaga Yesu atsikàni kaf, adəbal à aləl à gəl, ngaha avà à Yudas, kona anja Səmon Iskariyot. ²⁷ Mok uwana Yudas azəb kaf uwaga kà, seteni adà à ləv anja à tsəh. Yesu agòdál: “Uwana asa à ka madəhəŋ kà, dəhəŋ la katskats!”

²⁸ (Ama bə dza tekula la tataka anja azladza uwana la abà, tadzàh à tatak may à adi kà, dza la ahəŋ agòd: ‘Kà mana Yesu apəh kiya uwaga mi’, la ahəŋ aw. Kà uwana tatsənəŋ aw. ²⁹ Bokuba uwana: Kà uwana Yudas la uwana kiwa sili la ahəl kà, tadzəgw kà Yesu asal masləlay, kà masukw tatak anja madəvaday aya, tagòd. Baŋaw: ‘Và tatak à azlaməna kudà’, agòdál, tagòd) ³⁰ Yudas akəs kaf uwana atsəkalləŋ à ahəl, asà à uda katskats kà, adagay vòf.

Mapəhay mawga

³¹ Mok uwana Yudas adasa à uda kà, Yesu agòd: “Lagonay kà, mazləbay anja kona anja dza apəhla vok ala, ngaha mazləbay anja Zəzagəla adapəhla vok ala la masla la abà. ³² Mazləbay anja Zəzagəla apəhla vok ala la kona anja dza la abà, Zəzagəla bay adapəhla mazləbay uwana ala à Kona anja dza akor la gəl anja, adəh uwaga kà zwek bə lagwa. ³³ Azləbəza gulo gi la ahəŋ la akul anja kaslə nɔv pəra. Kadəyahaw gi, ama gəpəh à akul bokuba uwana gəpəh à azla Yahudiya aya: Kaslawwal à vok anja mad à slaka uwana gəday aw. ³⁴ Gədàvə à akul mapəhay mawga: Wəyàw vok kà akul à akul, say kawoyaw vok kà akul à akul bokuba uwana gəwoyà akul. ³⁵ Baŋa kawoyaw vok kà akul à akul kà, azladza gesina tadəsəlay kà, akul azlaməna matapla la slaka gulo, hadəy!”

Yesu atà la Piyer

(Mata 26.31-35; Mark 14.27-31; Luka 22.31-34)

³⁶ Səmon Piyer anavəl à gay la: “Sufəl kaday ma à uwala?” Yesu awulà ala: “Kaslala vok anja manəf gi à slaka uwana gəday lagonay aw. Ama bawbaw kà, kadənəf gi.” ³⁷ Piyer agòdál: “Sufəl, kà mana gəsəlay kà manəf ka lagonay aw ma? Gi, gədəfah vok, kà mav sifa gulo kà anjak!” ³⁸ Yesu agòdál: “Ndzer, kà kak kadəfah vok anja mav sifa anjak kà anjulo ay? Gəpəh à ka la dziriga kà, gurayŋa mewgdzagaləŋ awiyay kà asik makər, kadəgoday asik makər, kà kasəl gi aw!”

14

Yesu kà masla tetəvi uwana adala anu à slaka Zəzagəla

¹ “Kazamaw la gəl aw”, Yesu agòd à atà, “Dinəw gəl à Zəzagəla à vok, ngaha dinəw gi gəl à vok bay. ² Slaka madz à ahəŋ anjovaw la mtəga Baba gulo, gəday gədəfahakulla slaka à ahəŋ. Agayŋa hadəy awkà, naka gəpəh à akul aw. ³ Ngaha baŋa gədəday gədəfahakulla slaka à ahəŋ, kà gədəwula à wanj, kà gi anja mahəl akul à slaka gulo, kà akul anja magay la slaka uwana gi la abà. ⁴ Akul kà, kasələw tetəvi mad à slaka uwana gəday.” ⁵ Tomas agòdál: “Sufəl, məsəl slaka uwana kaday aw. Kakay məslala vok anja masəl tetəvi ma?” ⁶ Yesu awulà ala: “Gi tetəvi, gi dziriga, gi sifa. Dza aslala vok anja mad à slaka Baba la tetəvi anik, kokudə maguway la slaka gulo aw. ⁷ Baŋa kasələw gi kà, kasələw Baba gulo babay. Dagay lagonay kà, kasələw masla, ngaha kanəŋawwanj babay.”

⁸ Filip agòdál: “Sufəl, pəhanula Baba, uwaga kà diga zlə.” ⁹ Yesu agòdál: “Mədadza à ahəŋ kà mənğa anina kà, bə pəra kà, kasəl gi aw uwa, Filip? Dza uwana anəŋà gi kà, anəŋà Baba gulo babay, ngaha ma kakay kagoday pəhanula Baba ma? ¹⁰ Kadinjal gəl à vok, kà gi la Baba la abà, Baba la gi la abà aw uwa? Gay uwanay gəpəh à akul gesina kà, atsa à wanj kà la slaka gulo aw, ama la slaka Baba gulo. Baba uwana adza à ahəŋ la gi la abà la uwana ahən sləray anja ala. ¹¹ Dinəw gi gəl à vok à uwana gəgodf: Gi la Baba

* 13:25 13.25 Mahabay 35.19; 69.4

la abà, Baba bay la gi la abà. Baŋa kadiŋawwal gəl à gay uwaga à vok aw kà, diŋàw gəl à abà à sləray gə uwana à vok tsi! ¹² La dziriga gəpəh à akul: Dza uwana adiŋ gi gəl à vok, adàdàh azlasləray uwana gədadəhəŋ suwaŋ. Adàdàh sləray uwana aduwa uwanay, kà uwana gi gədaà à slaka Baba gulo. ¹³ Dəwdəw tatak uwana kadànavaw la sləm gulo kà, gədaà à akul uwaga gesina, kà Kona aŋa mapəhla mazləbay aŋa Baba aŋha ala. ¹⁴ Baŋa kanavaw tatak la sləm gulo kà, gədaà à akul uwaga.”

Yesu apəh gay aŋa masləl Masasədok Zəzagəla à ahəŋ

¹⁵ Yesu agòd: “Aŋa kawoyaw gi kà, naka kakəsaw mapəhay gulo. ¹⁶ Gədadəw kuɖa à Baba, kà masla aŋa masləl à akul masla mazlak akul anik à waŋ kà, Masasədok dziriga, kà masla aŋa magay la akul koksikoksi. ¹⁷ Gudəŋ à vok kà aslala vok aŋa mabəzal aw, kà uwana aslala vok aŋa manəŋəŋ la masələy aw. Ama akul kà kasələw masla, kà uwana adagay la akul ŋgaha adàdza à ahəŋ la akul la abà.”

¹⁸ “Gədasak akul à ahəŋ la matawaŋ la abà aw, gədaàwula à waŋ à slaka aŋkul. ¹⁹ La kasla ŋuv la abà, gudəŋ à vok adənəŋ gi aw, ama akul kà, kadənəŋaw gi, kà uwana gi la sifa, akul babay la sifa. ²⁰ Baŋa mavakay uwatà adàsa à waŋ kà, la mok uwatà la uwana kadəsələw kà gi la Baba la abà, ŋgaha kà Baba bay la gi la abà, ŋgaha gi bay la akul la abà.”

²¹ “Dza uwana akəs mapəhay gulo, ŋgaha anəŋla uwaga kà, masla mawoya gi zla. Baba gulo adəwəy dza uwana awoya gi babay, gədaàwəy masla, gədaàpəhalla vok.”

²² Yahuda (awka Yudas Iskariyot aw), agòdàl: “Sufəl, kakay uwaga adàh vok, kà kapəhanula vok kà anu pəra, awkà à gudəŋ à vok aw ma?” ²³ Yesu awulàl ala, agòdàl: “Dza uwana awoya gi akəs mapəhay gulo kà, Baba gulo adəwəyəŋ, anu la Baba gulo mədàduw à awtəy à slaka aŋha, mədàdza à ahəŋ la mtəga aŋha. ²⁴ Dza uwana awoya gi aw kà, akəs mapəhay gulo aw. Uwana katsənaw gi gəpəhay kà, uwaga kà asa à waŋ kà la slaka gulo aw, ama asa à waŋ kà la slaka Baba gulo uwana asləl gi à waŋ.”

²⁵ “Gədapəh à akul uwaga dagay uwarà, à mok uwana məga anina. ²⁶ Masla mazlak akul, à Masasədok tsikasla uwana Baba adəsələl à akul à waŋ, la sləm gulo kà, masla la uwana adàtapəhakulla tatak gesina, ŋgaha adəwula à akul à gəl uwana gədapəha à akul gesina aya.”

²⁷ “Gəsak à akul ala lapiya à ahəŋ, gəvə à akul lapiya gulo. Gəvə à akul kà bokuba uwana gudəŋ à vok avà à akul aw. Kazamawla gəl aw, guba akəs akul babay aya aw. ²⁸ Katsənəw uwana gəgòd à akul kà, gədiy anjulo. Ama gədaàwula à waŋ à slaka aŋkul. Agayŋa kawoyaw gi kà, naka karabaw à kà uwana gəda à slaka Baba gulo, gəgòd à akul, kà uwana Baba la uwana mənŋa kà gi. ²⁹ Lagonay kà, gədapəhakulla vok à abà, kokufa mapak vok aŋa azlatatak uwaga, kà mok uwana adəzlanjalay kà, kadàdiŋawwal gəl à vok. ³⁰ Gəslala vok aŋa mabədaŋa mənŋa anina aya aw, kà uwana sufəl aŋa gudəŋ à vok uwanay kà nekwa atsa à waŋ. Maslay aŋha la ahəŋ bə ŋuv lakəl gulo aw. ³¹ Ama say gudəŋ à vok asələy, kà gəwoya Baba kəla, ŋgaha gədza à ahəŋ kiya uwana asa à Baba. Səw à afik məda aŋami la abanay lagwa!”

15

Yesu kà matavəruk uwana av mayyay

¹ Yesu agòd aya: “Gi la uwana gi matavəruk dziriga, Baba gulo kà dza aŋa guf matavəruk. ² Kəla ahəl matavəruk uwana av mayyay aw kà, asləh gi à vok ala. ŋgaha kəla ahəl uwana av mayyay kà adədəslay, kà aŋa mav mayyay mənŋa aya. ³ Kà matapla uwanay gədatapaakullla kà, kadəgaw madadeslayga. ⁴ Nəbàw vok la gi, bokuba uwana gi la manəb vok gə la akul. Ahəl matavəruk aslala vok aŋa mav mayyay la aslasl gəl aŋha aw, say agay manəb vok gə, à iyə gə à vok. Kiya uwaga babay kaslawwal à vok aŋa madz à ahəŋ kokufa gəl aŋkul aw, say baŋa kanəbaw gi vok à vok.”

⁵ “Gi la uwana gi matavəruk iyə gə, akul kà akul azlamazləl vok gə. Dza uwana adza à ahəŋ la gi la abà, iyaw gulo akələy la masla la abà, masla adəvə mayyay aŋuvaw, kà uwana kaslawwalla vok aŋa madàh tatak la kokufa gi aw. ⁶ Dza uwana adza à ahəŋ manəb vok gə la gi aw kà, taduw à uda la guf la abà, bokuba ahəl matavəruk makəfəval à vok ala gə, agula la abatà, tatsatsaməy kà mabəkay à akəl à gay, ŋgaha akəl abəf à gay leɖɖa. ⁷ Baŋa kadənəbaw vok la gi, ŋgaha bay gay gulo adənəb vok la akul la abà, nəvəw uwana asa à akul gesina, kadəbəzawwal. ⁸ Baŋa kavəw mayyay aŋuvaw, kadəgaw azlaməna matapla la slaka gulo. La uwaga la uwana mazləbay aŋa Baba gulo adəpəhla vok ala la slaka azladza. ⁹ Gəwoya akul la ləv tekula, bokuba uwana Baba gulo awoya gi. Dzəw à ahəŋ la masal gulo la abà. ¹⁰ Baŋa kakəsaw mapəhay gulo kà, kadədzaw à ahəŋ la masal gulo la abà, kalkal bokuba uwana gəkəsəŋ mapəhay aŋa Baba gulo, ŋgaha gədzà à ahəŋ la masal aŋha la abà babay.”

11 “Gəpəh à akul uwaga kà, kà marabay gulo aña magay la akul la abà, ngaha marabay ankul babay aña magay mahənłaga. 12 Aganay mapəhay gulo: Wöyàw vok kà akul à akul, bokuba uwana gəwoya akul bay. 13 Masal la ahəj aduw aña dza, uwana av sifa aña kà aña azlaslawda aña aw. 14 Akul azlaslawda gulo, à baña kadəhaw uwana ‘Da-həwwəj’, gəgodf à akul gesina. 15 Dagay lakana kà, gədəzala akul ala azlamagamza aya aw, kà uwana magamza kà asəl tatak uwana mənğa aña adəhəj aw. Ama gədəzalla akul ala azlaslawda, kà uwana tatak uwana gətəpla la slaka Baba kà, gədatap à akul ala babay suwan. 16 Akul la uwana kakəsəwni gi aw, ama gi la uwana gəkəsəni akul, gəbək akul à ahəj kà kadaw aña mav mayyay, ngaha mayyay uwaga adasafay aña koksikoksi. Kiya uwaga Baba adəvə à akul dəwdəw tatak uwana kadənavaw la sləm gulo. 17 Gay uwana gəpəh à akul à vok à abà lagwa, say kawoyaw vok kà akul à akul.”

Gudəj à vok à azina vok à Yesu ala la azladza aña

18 “Baña gudəj à vok azinakulla vok ala kà, sələw kà atsà vok à mazin gi vok ala dadəj terəja. 19 Agay kagaw azlaəja gudəj à vok kà, naka gudəj à vok awoya akul kà uwana akul azlaəja. Ama gətsatsəməni akul, gəhəl akul à uda la abà, lagonay kà, akul azlaəja gudəj à vok aya aw, kà uwaga à uwana gudəj à vok azinakulla vok ala. 20 Awula à akul à gəl, à uwana gəpəh à akul uwarə kà, magamza aduwa mənğa aña aw. Baña tatəərb kà, tadətəərbəh akul bay, ama baña takəs mapəhay gulo kà, tadəkəs mapəhay ankul babay. 21 Ama tadəfəhakulla uwaga à vok gesina kà, kà ahəl gulo, kà uwaga à uwana təsəl dza uwana asləl gi à wan aw. 22 Agayja gətsə à wan kà aña mapəh à atə aw, kà naka tsakana aña atə atəf à atə à gəl aw. Ama lagwa kà hanjaj lakəl aña tsakana aña atə la ahəj aya aw. 23 Dza uwana azin gi vok ala kà, azina vok à Baba gulo ala bay. 24 Agayja gəfəh azlatatak nadzipo gə uwana dza adəhəj aw aw, kà naka tsakana atəf à atə à gəl aw. Ama tsa gədadəhəh azlanadzipo uwaga kà, ngaha bə gotənañ kà, tazinek vok ala la Baba gulo. 25 Ama uwaga apakə vok kà, kà magəf uwana à afik tatsətsər à wakitə mapəhay à abà: ‘Tadazingəj vok ala kà kiga pəra.’”

Yesu agəf à atə.

26 Yesu agəf à atə aya: “Baña masla mazlak akul adəsa à wan, masla la uwana Masasəfok dziriga, uwana adəguwa à wan la slaka Baba gulo, gədəsləl à akul à ahəj à baña gədada à slaka Baba gulo. Masasəfok uwaga adəza sayda lakəl gulo. 27 Ngaha akul bay kadəzaw sayda gulo, kà uwana kagaw la gi dagay la madzəka.”

16

1 “Gəpəh à akul uwaga kà, kà akul aña masak madijal gəl à vok aw. 2 Tadəkudəkəh akul à lag la gay madəv kufa aña azla Yahudiya la akul. Kaslə adəsa à wan à uwana azladza uwana tadəkəfəh akul, tadəgodfay kà: ‘Sləray uwana məfəhəj kà, akəs à Zəzagəla à gəl.’ 3 Tadəhə uwaga kà, kà uwana təsəl Baba aw, ngaha təsəl gi babay aw. 4 Ama gəpəh à akul uwanay kà, kà akul aña madzugway lakəl aña, kà baña adapaka vok kà, kà aña mawul à akul à gəl.”

Sləray aña Masasəfok Zəzagəla

“Uwana gəpəh à akul uwaga dagay madzəka aw kà, kà uwana gi la tataka akul la abà. 5 Lagonay kà, gəda à slaka dza uwana asləl gi à wan, ama dza la ahəj ‘Kad à uwali’, agəf à gi la tataka ankul la abà, amiyaka tekula aw. 6 Ama mazaw la gəl adəkəs akul kà uwana gəpəh à akul uwaga. 7 Ama gəpəh à akul la dziriga kà, ankul kà nūləm gəda anjulo, kà uwana baña gəda anjulo aw kà, masla mazlak akul atsa à ahəj à slaka ankul aw. Ama baña gi gəda anjulo kà, gədəsləl à akul à ahəj. 8 Masla kà, baña adəsa à ahəj kà, adəpəhla à azladza gudəj à vok madzugway mawisiga aña atə, lakəl aña tsakana, lakəl aña dziriga, ngaha lakəl aña seriya aña Zəzagəla. 9 Tadəvavar gəl aña atə lakəl aña tsakana, kà uwana tadin gi gəl à vok aw, 10 tavavar gəl aña atə lakəl aña tatak dziriga, kà uwana gəda à slaka Baba gulo, ngaha kà, kadənəhaw gi aya aw. 11 Lakəl aña seriya babay kà, kà uwana sufəl aña gudəj à vok uwanay kà seriya adəkəsəy.”

12 “Gi la azlagay anjovaw kà mapəh à akul, ama kaslawwalla vok aña makəsəj dadəj aw. 13 Mok uwana Masasəfok dziriga adəzlanjalay kà, adədala akul la dziriga la abə gesina, kà uwana adəpəhay kà lakəl aña maslay aña gəl aña aw, ama adəpəhay kà lakəl aña uwana atənəñ, ngaha lakəl aña azlatatak uwana atsa à wan la huma la gay. 14 Masla adəpəhla mazləbəy gulo ala, kiya uwana atənəñ la slaka gulo, la uwana adəzakulan. 15 Kəla tatak uwana Baba akoray kà uwaga anjulo, kà uwaga à uwana gəgodf à akul kà, Masasəfok Zəzagəla adəwula à akul tatak uwana abəzal la slaka gulo.”

Mazaw la gəl adəpəka marabay

¹⁶ Yesu agòd à atà: “Anja kaslà ñuv kadànéñaw gi aya aw, ama zwek la huma la gay ñuv kadànéñaw gi aya.” ¹⁷ Kiya uwaga azlaanik la tataka azlamèna mataplà la slaka anja, tanàvähà à vok kà atà kà atà: “Uwaga ma, mana asal magodfay ma? Agòd à anu kà: ‘Anja kaslà ñuv kà mädànéñaw gi aw, ama zwek la huma la gay aya kà mädànéñaw gi aya, ñgaha babay gèda à slaka Baba’, agòd aya. ¹⁸ Mana asal magodfay kaslà ñuv ma? Mèsènéà uwana asal mapèhaw aw.” ¹⁹ Yesu asèl kà asa à atà manaval. Kiya uwaga agòd à atà: “Asafay à uwana gèpèh à akul uwaga aw, zwek la huma la gay kadànéñaw gi aw, la lig la ahèñ ñuv kadànéñaw gi aya. Lakèl ma anja uwaga à uwana kanavahaw vok takay? ²⁰ Gèpèh à akul la dziriga: Katawaw, katsahahaw hulolo, ama gudèñ à vok adàrabay, kadàzamawla gèl, ama mazaw la gèl anjul kà, adàpaka marabay. ²¹ Baña mis azlà asekw à ahèñ kà, mazaw gèl adal à vok, kà uwana kaslà matèrèbày anja adaslay, ama baña adasekw à ahèñ kà, matèrèbày avikanj, kà uwana marabay kà uwana adayyi bèzi. ²² Kiya uwaga babay, akul la mazaw la gèl la abà la kaslà uwanay, ama gèdànéñ akul aya, ñgaha lèw anjul adàrabay. Dza la ahèñ aslala vok kà mazèbakulla marabay ala tetuwa aw.”

²³ “Baña mavakay uwatà adasa à wanj kà, kadànavaw gi tatak la slèm gulo aya aw. Gèpèh à akul la dziriga: Kèla tatak uwana kanavaw la slèm gulo kà, Baba adàv à akul uwaga gesina. ²⁴ Tsèràh à lakana dadàñ kà, kadanavaw tatak la slèm gulo aw. Nàvaw ñgaha kabèzawwal, ñgaha kà marabay anjul anja mahènlà.”

Yesu kà adakèdfasìl à gudèñ à vok

²⁵ “Gèpèh à akul azlatatak uwaga gesina kà la gay la gay la abà, ama kaslà atsa à wanj à uwana gèdàpèh à akul kà la gay la gay la abà aya aw. Gèdàpèh à akul kà la dazuwaya lakèl anja Baba gulo. ²⁶ Baña mavakay uwaga adaslay kà, gèdàdèw kuɔa à Baba kà anjul, gègodf magay aw. ²⁷ Kà uwana Baba la gèl anja awoya akul. Awoya akul kà, kà uwana kawoyaw gi, kà uwana kadiñawwal gèl à vok, kà gèsa à wanj la slaka anja. ²⁸ Gèsa à wanj à gudèñ à vok kà, gèsa à ahèñ kà la slaka Baba. Lagwa kà, gèda à slaka Baba, gèsak à gudèñ à vok à ahèñ.”

²⁹ Azlamèna mataplà la slaka anja tagòfal: “Lagonay kà, kapèhay la dazuwaya, kokuɔa la gay la gay la abà zlà. ³⁰ Lagwa kà, mèdasèlay kà kasèl tatak gesina, ñgaha kanèkuɔa kà dza anja manav à ka tatak aw. Mèdiñal gèl à vok kà ndzer, kasà à ahèñ kà la slaka Baba Zèzagèla.” ³¹ Yesu agòd à atà: “Kadiñawwal gèl à vok adagay lagwa ay? ³² Kaslà adàsa à wanj, lagwa kà adasa à wanj, uwana kadàsèlèhaw gèl à ahèñ uwabeyuwi adàdiñ anja à mtèga anja, kadàsakaw gi à ahèñ kokuɔa gulo. Ama la dziri kà, gi kokuɔa gulo aw, kà uwana anu la Baba gulo. ³³ Uwana gèpèh à akul uwaga gesina kà, kà akul anja magay la lapiya la maham gay à vok la abà la gi. Akul kà, kadàsaw ñgèrpa la gudèñ la vok, ama kurit yewdi, agòd à akul aw! Kà uwana gèdakèdfasìla gudèñ à vok.”

17

Yesu adèw kuɔa kà anja azlamèna mataplà anja

¹ Mok uwana Yesu adapèh gay uwaga à gay gesina kà, anèjà à zagèla, agòd: “Baba, kaslà kà adaslay. Pèhla mazlèbay anja Kona anjak ala, ñgaha Kona anjak apèhla mazlèbay anjak ala suwanj, ² kà uwana kavàl maslay lakèl anja azladza gesina la vèɔfah, kà masla anja mav sifa adèw à gay aw à azladza uwana kabèkal atà gesina. ³ Sifa adèw à gay aw kà, kà anja azlauwana tasèl ka pèra, à kak Zèzagèla dziriga gè, ñgaha kà masèlay Yesu Kristu uwana kaslèl à ahèñ. ⁴ Gèdàpèhla mazlèbay anjak ala la vèɔfah, gèdàdèwèñ à gay slèray uwana kaf à gi à ahàl kà madèhèñ. ⁵ Lagwa zlà kà, Baba kà, v à gi mazlèbay uwana gègè la masla la huma anjak mok uwana gudèñ à vok alèg madzèka dèñ zlà.”

⁶ “Baba, azladza uwana kabèk à gi, atà la gudèñ uwanay la vok kà, gèdàpèhatala kak, kà uwana atà tagay azlaanjak, ñgaha kabèk à gi atà, lagwa kà, atà takès gay anjak. ⁷ Lagwa kà dèwdèw tatak uwana kavà à gi kà, tasèl kà, atsa à ahèñ la slaka anjak. ⁸ Kà uwana gèpèh à atà ala gay uwana kapèh à gi à ahàl kà mapèh à atà, takès, tasèl ndzer kà gèsa à wanj la slaka anjak, ñgaha kà kak la uwana kaslèl gi à wanj.”

⁹ “Baba gèdèw à ka kuɔa kà anjatà. Awkà gèdèw kuɔa kà gudèñ à vok aw, ama kà anja azlauwana kabèk à gi atà à ahàl, kà uwana azlaanjak. ¹⁰ Dèwdèw tatak uwana anjak kà anjulo, dèwdèw tatak uwana anjulo bay kà, uwaga kà anjak, kà uwaga à uwana mazlèbay gulo apèhla vok ala la azlatatak uwaga la abà gesina. ¹¹ Gi kà, gi la gudèñ la vok aya aw, ama atà kà, atà la gudèñ la vok. Gi kà gèda à slaka anjak Baba tsikasla, nèñla atà la ndzèɔfa anja slèm anjak uwana kavà à gi, kà atà anja magay tekula, bokuba uwana mægaw tekula anu sèla. ¹² Mok uwana gi la slaka anjatà gèfà à atà slèm la maslay anja slèm anjak, slèm uwana kavà à gi. Gènèñla atà, amiyaka tekula anjatà bay kà, azàla

aw. Say dza uwana naka azilà, wakità agòd kà magòd uwana à afik, wakità agòd pèra.*
¹³ Ama lagonay kà, gèda à slaka anjak, à uwana gèpèh kiya uwanay kà, kà uwana gèlèg la gudèj la vok dadànj, kà atà anja mabèzal marabay gulo la huf anjata, marabay uwana mahènlaga. ¹⁴ Gi, gèvâ à atà gay anjak, ngaha gudèj à vok azin atà vok ala, kà uwana azlaanja gudèj à vok aw, bokuba gi uwana gi anja gudèj à vok bay aw. ¹⁵ Gèdèv à ka kudà kà mahèl atà à uda la gudèj la vok aw, ama anja manèjla atà kà mawisiga. ¹⁶ Atà kà azlaanja gudèj à vok aw, bokuba gi, uwana gi anja gudèj à vok aw. ¹⁷ Pàk atà ala kà azlaanjak, gay anjak kà dziriga pèra. ¹⁸ Gi gèdaslèl atà à gudèj à vok, bokuba uwana kaslèl gi à ahèj à gudèj à vok. ¹⁹ Gèvâ à ka sifa gulo gesina kà anjata, kà atà babay anja magay azlaanjak la dziriga.”

²⁰ “Gèdèv kudà kà, kà anjata pèra aw, ama kà anja azlauwana tadàdij gi gèl à vok, à kapèhla ala anjata bawbaw bay.” ²¹ “Gèdèv kudà kà atà gesina anja magay tekula. Baba, tagay tekula la anu bokuba kak la gi babay anu tekula pèra, gudèj à vok anja masèlay kà kak kaslèl gi à wanj. ²² Baba gèvâ à atà mazlèbay uwana kavâ à gi, kà atà anja tagay tekula bokuba anu sèla uwana anu tekula. ²³ Gègay la atà la abâ, ngaha kak babay mægaw anu sèla, kà magay tekula la slaka gâ. Ngaha gudèj à vok anja masèlay kà kak la uwana kaslèl gi à ahèj hadaj, ngaha kà kak kawoya atà bokuba uwana kawoya gi.”

²⁴ “Baba, kak kavâ à gi atà, asa à gi kà atà tagay la slaka uwana gèdègay, ngaha kà atà anja manèj mazlèbay gulo, uwana kavâ à gi, kà uwana kawoya gi dagay uwana kalèg madàh gudèj à vok. ²⁵ Baba dziriga, gudèj à vok asèl ka aw, ama gi kà gèsèl ka, ngaha azlauwana babay kà tasèl ka kà kak la uwana kaslèl gi à ahèj. ²⁶ Lagwa gèpèhatàla kak, ngaha gèdèpèhatàla kak aya, kà masal anjak uwana kawoya gi anja magay la atà babay, ngaha gi babay anja magay la atà.”

18

Makès Yesu

(Mata 26.47-56; Mark 14.43-50; Luka 22.47-53)

¹ Kiya uwaga mok uwana Yesu adadèv madèv kudà à gay kà, ahàd la azlamèna matapla la slaka anja à gay dèrèv à uda anik anja mukwâ Kidèron. La abatà kà, gày alàl la ahèj adâ à abâ la azlamèna matapla la slaka anja. ² Yudas masla matal kaf à Yesu à gèl babay kà, asèl slaka uwatà, kà uwana Yesu adàha à abatà kwâ à kwâ la azlamèna matapla la slaka anja. ³ Yudas zlâ, ahàd à gày alàl à abâ la maham à ahèj slodzi, la azlamèna manèjla gày Zèzagèla la tsèh. Azladza uwaga kà azlamadzahaga anja mav tatak la azla Farisèya la uwana tabèkal à tsèh, tahèl fènès la matèvani à akàl à ahàl. ⁴ Kiya uwaga Yesu kà asèl tatak uwana adàbèzal gesina, azâ à vok à awtây à slaka anjata, agòd à atà: “Uwa, kayahaw uwa?” ⁵ Tawulâ ala, tagòd: “Yesu, zil Nazaret.” Yesu agòd à atà: “Giga la uwanay, à uwana kayahaw!”

Yudas uwana atàl kaf à gèl, la abatà atà nna. ⁶ Mok uwana ‘Gèga la uwanay’, Yesu agòd à atà kà, tawul à lig, tatàd à vèdfah. ⁷ Yesu anàv à atà aya, agòd à atà aya: “Uwa, kayahaw uwa?” Tagòdàl: “Yesu, zil Nazaret.” ⁸ Yesu agòd à atà: “Gèga la uwanay, gèdagòd à akul aw takay? Banja gi kayahaw kà, sàkâw azlaanik uwaga tada anjata!” ⁹ Kiya uwaga la uwana gay uwana Yesu apèh uwarâ, agòd à afik: “Baba, azladza uwana kabèk à gi à ahàl kà, amiyaka tekula anjata kà adazila aw.” ¹⁰ Katsakar la Sèmon Piyer la ahàl, abèd katsakar à lag, adèdla mayâ anja mèn madzahaga anja azlamèna mav tatak à Zèzagèla, akèdèval slèm ahàl kaf lakèl ala, slèm anja mayâ uwatà kà Malkus. ¹¹ Yesu agòd: “Hay, Piyer, wulâ katsakar anjak à gày anja à agu. Kadzugw kà ‘Gèsa ngèrpa à uda la kètsaw uwana la abâ Baba avâ à gi aw’, kagòd takay?”

Tadala Yesu à huma Hanas

¹² Maham à ahèj slodzi, la azlamèngga anjata, la azlamèna manèjla gày Zèzagèla anja azla Yahudiya tahamâ à Yesu à adi, takàs, tawàdànj. ¹³ Teranja kà, tadàlla à mtèga anja Hanas dadànj. Hanas kà tsinay anja Kayyif, uwana masla la uwana mèn madzahaga anja azlamèna mav tatak à Zèzagèla la mavay uwatà la tsèh. ¹⁴ Tekedik kà, Kayyif la uwana avâ sawaray à azla Yahudiya: “Nulèm kà dza tekula amètès à kà azladza gesina anja mamètès à gay”, agòd tekedik.

“Gèsèl Yesu aw”, Piyer agòd

(Mata 26.69-70; Mark 14.66-68; Luka 22.55-57)

¹⁵ Sèmon Piyer atà la masla matapla anik tanèfâ Yesu. Masla matapla anik uwatà kà, mèn madzahaga asèl, tahàd à gày à kodal à abâ la slaka la Yesu, à kodal anja mèn madzahaga uwaga à abâ. ¹⁶ Ama Piyer agòd à gay gamagây. Kiya uwaga masla matapla

* 17:12 17.12 Mahabay 41.9

anik uwana mən madzahaga asəl, asə à uda abadmə la mis uwana anəŋla gamagəy kə mav tetəvi à Piyer, kə mad à gəy. ¹⁷ Mis uwana anəŋla gamagəy agod à Piyer: “Kak babay kə kak masla matapla anja zil uwanay aw takay?” “Awan, awan, gi la abə aw”, Piyer agod.

¹⁸ Anasl la ahən, azlaməna sləray, la azlaməna manəŋla tavatsə akəl à ahən, kə madz la ahən la adi. Piyer babay adzə à akəl à adi la slaka anjatə.

Mən madzahaga Hanas anava Yesu la gay ala
(Mata 26.59-66; Mark 14.55-64; Luka 22.66-71)

¹⁹ Mən madzahaga anja azlaməna mav tatak uwana anavə Yesu lakəl anja azlaməna matapla la slaka anja, lakəl anja matapla anja uwana atəpla à azladza. ²⁰ Yesu agodə: “Gəpəhəhəh gay à azladza la dazuwaya, gətəpəhətəla azlatatak la azlagəy madəv kudə la aku, ngaha la mən gay Zəzagəla la aku, la slaka uwana azla Yahudiya tahəmähə gay à vok gesina, gəhadə tatak à ahən aw. ²¹ Kə mana kanav gi tatak aya ma? Nəv à azladza uwana tatsəb gi sləm lakəl anja azlagay uwana gəpəh à atə gesina. Atə tasəl la lela lakəl anja uwana gəpəh à atə.” ²² Uwana Yesu apəh gay uwaga kə, masla manəŋla anik uwana la makəla anja, akədəval mamits à ahəl la magodə: “Kiya uwaga la uwana kaula à mən madzahaga anja azlaməna mav tatak à Zəzagəla à adi takay?” ²³ Yesu agodə: “Banja gəpəh mawisiga kə pəhgəla mawisiga uwatə. Ama banja dziriga gəpəh ma, kə mana kadədə gi kə kiya uwanay ma?” ²⁴ Hanas asləl mən masla la mawadəŋga à slaka Kayyif mən madzahaga.

Piyer agod aya kə: “Gəsəl Yesu aw”
(Mata 26.71-75; Mark 14.69-72; Luka 22.58-62)

²⁵ La mok uwatə Səmon Piyer la abatə à vuđ akəl à vok. Tanavəlla gay ala: “Kak babay, kak tekula anja azlaməna matapla anja zil uwanay aw takay?” Ama Piyer awulə à uda, agod: “Awan, awan, gi la abə aw!” ²⁶ Tekula la tataka anja azlamagamza anja mən madzahaga anja azlaməna mav tatak à Zəzagəla la abə, uwana yaga anja dza uwana Piyer akədəval sləm lakəl ala, agodə: “Kak à uwana gənəŋə ka la gəy aləl la abə, akul səla aw takay?” ²⁷ “Gi aw!”, Piyer agod aya, katskats mewgdzagaləŋ awiyə la kaslə uwatə.

Yesu la huma Pilatus
(Mata 27.1-2,11-14; Mark 15.1-5; Luka 23.1-5)

²⁸ La gay bebən bən, tasəlla Yesu à uda la mtəga Kayyif, tadəlla à mtəga gumna anja azla Rom. Ama azla Yahudiya tadə à gəy la mtəga anja gumna aw, kə uwana wakitə mapəhay anjatə avə à atə tetəvi aw, kə uwana banja tadə à gəy kə, adatəla əläh à vok, taslala vok anja mazuv tatak may anja madəvaday Paska aw. ²⁹ Kə uwaga à uwana gumna Pilatus asə à uda à slaka anjatə, anəv à atə lakəl: “Ma anja mana kapuwəw gudzi à dza uwanay à gəl ma?” ³⁰ Tagodə: “Agayŋa agay dza mawsiga aw kə, naka məslala vok anja mav à ka à ahəl aw.” ³¹ Pilatus agod à atə: “Dəwla, kadəfahawla seriya à gəl ankul bokuba uwana wakitə mapəhay ankul apəhay.” Azla Yahudiya tagodə: “Tetəvi la ahən kə anjami anja madəh seriya mamətsay à dza à gəl aw.” ³² Uwaga apakə vok anja magodə gay anja Yesu à afik, apəh lakəl anja mamətsay anja. ³³ Kiya uwaga Pilatus awulə à gəy, azləla Yesu, agodə: “Kak, Sufəl anja azla Yahudiya ay?” ³⁴ Yesu agodə: “Kapəh uwaga ma la gəl anjak ay? Awma azlaanik tapəh à ka magay ay?” ³⁵ Pilatus agodə: “Gi zil Yahudiya suwan ay? Azlayaga anjak dardar gə, la azlamadzahaga anja azlaməna mav tatak à Zəzagəla la uwana tava à gi kak, mana kadəhəŋ takay ma?” ³⁶ Yesu agodə: “Makoray gulo kə anja gudəŋ à vok uwanay aw, agayŋa makoray gulo kə anja gudəŋ à vok uwanay kə, naka iyay, azlaməna sləray gulo tagodəy kə mav à gi à ahəl anja azla Yahudiya aw. Ama kiya uwaga aw, makoray gulo kə anja gudəŋ à vok uwanay aw.” ³⁷ Pilatus agodə: “Lagwa ma kak Sufəl ay?” Yesu agodə: “Bokuba uwana kapəh kə, gi Sufəl. Tayyà gi, gəsə à ahən à gudəŋ à vok kə, kə mapəh dziriga. Uwabeyuwi uwana asal dziriga atsəb sləm à dziriga uwana gəpəhay.” ³⁸ “Mana à dziriga ma?”, Pilatus agodə.

Seriya mamətsay atəd à Yesu à gəl
(Mata 27.15-31; Mark 15.6-20; Luka 23.13-25)

Mok uwana adapəh gay uwaga, Pilatus asə à uda aya, kə mad à slaka azla Yahudiya, adzədətəŋ ala, agod à atə: “Gəbəz à tatak uwana adukwla zil uwanay à ahən aw. ³⁹ Ama bokuba uwana zagəla ankul kə, gədəwa à akul gəl à masla danay tekula kəla madəvaday Paska ma. Lagwa ma asə à akul gəduwa à akul gəl à Sufəl anja azla Yahudiya ay?” ⁴⁰ Kiya uwaga tadzəkə mawiyay: “Awan, masla aw! Barabas la uwana asa à anu!” Tekedik Barabas uwatə kə, agə kə masla nabəra.

19

¹ Kiya uwaga Pilatus avà à atà tetøvi kà masläh Yesu ala la kurpi. ² Azlaslodzi tasläläp gabaga anja atäk kà mawaf à Yesu à gөл, ngaha tatsäkwa à deri mativga gä à abà vikuza. ³ Tazà à vok à slaka anja, ngaha tagòfal: “Ayyi, Sufəl anja azla Yahudiya!” Ngaha tazläh la mamøts à ahäl.

⁴ Kiya uwaga Pilatus asà à uda aya, agòf à maham à ahøj dza, agòf à atà: “Gøtsakulla à uda à abanay. Kà akul anja masølay kà tatak la ahøj à uwana azlayla kà madukwla seriya à gөл aw.” ⁵ Yesu asà à uda la gabaga anja atäk lakөл, la deri mativga la vok vikuza. Ngaha Pilatus agòf à atà: “Aganay dza zlà!” ⁶ Ama uwana azlamadzaha anja azlamøna mav tatak à Zøzagøla, la azlamøna manøjla gày Zøzagøla tanøjnän kà, tadzøkà mawiyay: “Zlөл masla à ahäf à adi, zlөл masla à ahäf à adi!” Pilatus agòf à atà: “Zlөлaw masla à ahäf à adi la gөл ankul, kà uwana gøbøzà à tatak uwana gødahalla seriya à gөл aw.” ⁷ Azla Yahudiya tagòfal: “La wakità mapøhay gami la abà kà, mapøhay gami agòf kà: Azlayla à vok amøtsay kà uwana: ‘Gi la gөл gulo kà, gi Kona anja Zøzagøla’, agòf.”

⁸ Mok uwana Pilatus atsonà gay uwatà, guba akøs kaykay aya. ⁹ Awul à gày, ngaha anäv à Yesu: “Kasà à wan ma la ala tak la?” Ama Yesu kà awulà gay à uda aw. ¹⁰ Kiya uwaga Pilatus agòfal: “Asà à ka mabadgøma aw ay? Kasөл kà gi la maslay anja maduwa ka gөл, ngaha bay kà, gi la maslay anja mazlөл kà à ahäf à adi aw takay?” ¹¹ Yesu agòfal: “Kak la maslay lakөл gulo aw, say banja uwana Zøzagøla avà à ka dagay la afik pøra. Kà uwaga à uwana dza uwana avà à ka gi à ahäl la uwana aduwa ka la tsakana gesina.” ¹² Dagay la mok uwatà Pilatus ayäh tetøvi kà madu w gөл à Yesu. Ama azla Yahudiya tadzøkà mawiyay: “Banja kasak à dza uwaga kà, kak slawda anja møj sufөл aya aw! Køla dza uwana ‘Gi sufөл’, agòf kà, masla møzam anja møj sufөл!”

¹³ Mok uwana Pilatus atsonà gay uwaga kà, awulla Yesu à uda aya, adzà à kursi anja seriya à afik, la slaka uwana tazalalla Pave (Uwaga asal magòday: slaka akur madølay gay gä, la gay Ibøranøjkowen *Gabbatha*, tagòfal) ¹⁴ Uwaga kà, agä vuf madäh vok anja vuf madøvaday Paska, la tataka afats. Pilatus agòf à azla Yahudiya: “Masla la uwaga à Sufөл ankul!” ¹⁵ Ama tadzøkà mawiyay: “Kød masla, køf masla, zlөл à ahäf à adi!” Azlamøj madzahaga anja azlamøna mav tatak à Zøzagøla tagòf: “Sufөл gami anik la ahøj aw, say møj sufөл anja azla Rom pøra.” ¹⁶ Kiya uwaga Pilatus avà à atà Yesu à ahäl, kà atà anja mazlөл à ahäf à adi. Kiya uwaga tadala Yesu.

Tazlөл Yesu à ahäf à adi

(Mata 27.32-44; Mark 15.21-32; Luka 23.26-43)

¹⁷ Yesu asà à uda la gudøj la abà, ahäf uwana tadäzlöllal à adi lakөл anja, kà mad slaka uwana tazalalla slaka aslasl takas à gөл. (Tazalalla *Golgota* la gay Ibøranøjkowen) ¹⁸ La abatà la uwana, azlaslodzi tazlөл Yesu à ahäf à adi. La kaslà uwatà la uwana tazlөл azladza søla à ahäf à adi atà nna, tekula la ahäl kaf, tekula la ahäl gudzay anja. Yesu la tataka la abà.

¹⁹ Pilatus avà à atà tetøvi kà matsetser wakità kà maf à ahäf à adi lakөл anja. Aganay matsetseray gä uwana tatsetsør: YESU ZIL NAZARET, SUFƏL ANJA AZLA YAHUDIYA. ²⁰ Azla Yahudiya anjuvaw tadzøjnäh matsetseray uwatà, kà uwana slaka uwana tazlөл Yesu à ahäf à adi, kà nekwa la mad à huç gudøj à abà, matsetseray gä uwana tatsetsør kà la gay Ibøranøjkowen, la gay latin, ngaha la gay gøøk. ²¹ Kiya uwaga azlamadzahaga anja azlamøna mav tatak à Zøzagøla uwana la tataka azla Yahudiya la abà, tagòf à Pilatus: “Matsetseray uwanay: Gi Sufөл anja azla Yahudiya, kagòf kà kità aw, ama tssetsør kà: Dza uwanay la uwana agòf kà: ‘Gi Sufөл anja azla Yahudiya’, agòf, kagòday.” ²² Pilatus agòf: “Uwana gødatsetseray kà, adza à ahøj kiya uwaga pøra.”

²³ Mok uwana azlaslodzi tazlөл Yesu à ahäf à adi kà, tahөл lukut anja, tavähøj ala sla-slaka ufaf, køla slodzi abøzal slaka tekula, tekula. Tahөл deri anja uwana madzøbayga vok aw, tsøräh à afik, tsøräh à vøfah. ²⁴ Azlaslodzi tagòf à vok kà atà kà atà: “Møkwaha deri uwanay ala aw, ama møtsà tsatsa lakөл kà anu anja masøl dza uwana agòfal.” Uwanay apakà vok kà magòf gay uwana à afik wakità Zøzagøla apøh: “Tavähà lukut gulo la tataka anjatà la abà, tatsà tsatsa la lukut gulo lakөл.”*
Kiya uwanay la uwana azlaslodzi tafahøj zlà.

²⁵ Nekwa la ahäf uwana tazlöllal Yesu à adi kà, iyà anja atsizl à abatà, atà la deda anja duguga, mis anja Kølopa, ngaha Mariyama døg zla Magdala. ²⁶ Yesu anøjà iyà anja, la makøla anja masla matapla uwana awøjnän kaykay. Yesu agòf à iyà anja: “Mis uwanay kà kona anjak la uwaga.” ²⁷ Ngaha agòf à masla matapla uwaga: “Iyà anjak la uwaga.” Dagay vuf uwatà, masla matapla azøb à mtøga anja.

* 19:24 19.24 Mahabay 22.18

*Mamətsay anja Yesu**(Mata 27.45-56; Mark 15.33-41; Luka 23.44-49)*

²⁸ Uwana uwaga adada à lig gesina, Yesu asəl tatak gesina kà adadəv à gay, apəh uwaga kà mahən gay uwana ala matsetseray agod: “Nəlay aza à gi.”[☆] ²⁹ Iyaw hamhamga la ahən la abata la daraw gə dənjəra. Azlaslodzi tadüw sawsaw à iyaw hamhamga uwaga à abə, tafə à kavak à gay kà madziyla à afik anja makokuzay. ³⁰ Mok, uwana adakokuz iyaw uwaga, Yesu agod: “Lagwa kà adagay diga!” Akəsə gəl à ahən, aməts.

Slodzi azləla makəla à Yesu ala la atsəkaf

³¹ Uwaga kà mavakay madəh vok anja maduw ləv, asə à azla Yahudiya kà, azlavok adza à ahən la ahəf à adi tsərah à mavakay maduw ləv aw, kà uwana mavakay uwatà kà mavakay mapis ala gay à vok gə, tanəv à Pilatus kà, takələhə à atə asik ala, kà mahəl vok à ahən la ahəf la adi. ³² Kiya uwaga azlaslodzi tasə à wañ takələhə asik à matera ala, la anja masəla, uwana la makəla anja Yesu lakəl la slaka gə. ³³ Uwana tabəz à Yesu à vok kà, tanənjən kà adamətsay. Kà uwaga à uwana takəlla ala asik ala aw. ³⁴ Ama tekula anja azlaslodzi azləl ala makəlla la atsəkaf, batsərə anjz la iyaw asə à uda. ³⁵ Dza uwana azəñ lakəl anja tatak uwaga apakə vok gesina kà, azəñ lakəl anja kà dziriga, masla bay kà asəl kà uwana anəjà, akul babay kà kaslaw anja madinjal gəl à vok. ³⁶ Uwanay apakə vok kà gay anja matsetseray anja magod à afik ndzer:

“Tadəkələh aslasl anja ala aw.”[☆]

³⁷ La azlaslaka anik la wakità la abə agod aya kà:

“Tadənəñ dza uwana tazlələn ala la ahəf la adi.”[☆]

*Maf Yesu à zəvay à agu**(Mata 27.57-61; Mark 15.42-47; Luka 23.50-56)*

³⁸ Uwana uwaga adada à lig, Yusufu zil gudəñ Arimate, anəv tetəvi la slaka Pilatus kà mazəb vok anja Yesu. (Yusufu kà masla matapla la slaka Yesu la gəl à gəl, kà uwana guba azəñ kà azla Yahudiya) Pilatus avəl tetəvi. Kiya uwaga Yusufu asə à wañ, azəb vok anja Yesu à ahəf à adi ala. ³⁹ Nikodemus, zil uwana ahəd à slaka Yesu la vəd, asə à wañ à slaka anja bay, matərsin, la azlaahəf kidzidzi uwana mahamala gay à vok gə la ahəl, mahanay anja kà kilo dzik makər (Bokuba tasə kulo gəl anja zlo) ⁴⁰ Tazəb vok anja Yesu atə səla, tafədəl bafta à adi, tadəhəhal azlatatak mazinay gə à vok, uwana zagələ anja azla Yahudiya, kà mazəb dza à uda, à baña adamətsay. ⁴¹ La slaka uwana tazləl Yesu à ahəf à adi kà, gəy aləl la ahən la abata. La gəy aləl uwatà la abə kà, zəvay mawga la ahən, taf dza à agu didi aw. ⁴² Bokuba uwana vud madəh vok anja vud maduw ləv anja azla Yahudiya kà, tafə Yesu à agu la abata, kà uwana zəvay kà nekwa.

20*Mawul à uda la mamətsay anja Yesu**(Mata 28.1-8; Mark 16.1-8; Luka 24.1-12)*

¹ Bəñ la zay la tsəh vud maduw ləv anja azla Yahudiya, Mariyama dəg zla Magdala, ahəd à gəl zəvay. Masla anənjən kà akur uwana la zəvay la gay kà, matakoslal à ama ala gə. ² Adə anja la mahoyay, abəz à Səmon Piyer à vok, atə la masla matapla anik uwana Yesu awoyən kaykay, agod à atə: “Sufəl kà, tazəb à lag la zəvay la aku, məsəl slaka uwana tadəlla à abə aw.” ³ Piyer atə la masla matapla anik uwanay tahəd à gəl zəvay. ⁴ Tahəd la mahoyay, tahòy, ama masla matapla anik uwanay aduwə Piyer la mahoyay, atsə vok à gəl zəvay. ⁵ Atsəñ gəl à agu, anəjà bafta la vədah la aku, ama adə à agu aw. ⁶ Səmon Piyer, uwana asə à wañ la lig la ahən, adə à agu. Masla anəjà bəfta la vədah, ⁷ la nalbət uwana tafədəl à Yesu à gəl, masla kà, adəbani vok la bafta aw, mafədəl à abə gə la slaka anik kokudə gəl anja. ⁸ La lig la ahən, masla matapla uwana atsə vok à gəl zəvay, adə à agu suwan. Anənjən, nğaha adinjal gəl à vok. ⁹ (Tekedika la kaslə uwatà kà, azlaməna matapla tatsənə godega anja wakità, uwana Yesu adəwula à uda la mamətsay agod, dadən aw) ¹⁰ Nğaha azlaməna matapla səla uwatə tawul anjatə.

*Yesu apəhla vok à Mariyama uwana dəg zla Magdala**(Mata 28.5-10; Mark 16.9-11)*

¹¹ Mariyama atsilzla ahən la gay zəvay la matuway. Uwana atuway kà, atsəñ gəl à zəvay à agu kà manəzəzay, ¹² nğaha anəjà azlaməlika səla la lukut medəkuga la vok təlla, tadzəh madzay la slaka uwana hənə Yesu à ahən. Tekula adzə madzay lakəl gə, anik adzə madzay la godega gə. ¹³ Azlaməlika uwaga tanəvalla gay: “Mis, kà mana katuway ma?” Mis agod à atə: “Tazəb vok anja Sufəl gulo, gəsəl slaka uwana tadəlla

☆ **19:28** 19.28 Mahabay 69.21; 22.15 ☆ **19:36** 19.36 2Musa 12.46; 4Musa 9.12; Mahabay 34.20 ☆ **19:37** 19.37

à abà aw.” ¹⁴ La mapèh gay uwaga la gay la, agolà vok, ñgaha anèhà Yesu. ¹⁵ Yesu anàvalla gay ala: “Mis, kà mana katuway ma? Uwa kayahay uwa?” Mis adzùgw kà masla slèray guf, agòd, à uwana apèhal kiya uwanay: “Banja kak kazèb kà, pèhgèla slaka uwana kafà à abà, kà gèday, gèdàzèbay.” ¹⁶ Yesu agòdàl: “Mariyama!” Fètsal, Mariyama agolà vok à slaka anja, ñgaha agòdàl la gay Ibèranènkowen: “*Rabbuni!*” (Uwana asal magòday: Mèngga gulo) ¹⁷ Yesu agòdàl: “Kakès gi à ahèj aw, kà uwana gèdàda à afik à slaka Baba gulo aw. Ama hàd, kadàgòd à azladedà gulo kà gèdàda à afik à slaka Baba gulo, uwana Baba ankul babay, à slaka Zèzagèla gulo uwana Zèzagèla ankul babay.” ¹⁸ Kiya uwaga Mariyama dæg zla Magdala azà gay uwaga à azlamèna matapla: “Gèdanèj Sufèl!” Ñgaha atùgw a àtè tatak uwana apèhal gesina.

Yesu apèhla vok à azlamèna matapla la slaka anja
(Mata 28.16-20; Mark 16.14-18; Luka 24.34-49)

¹⁹ La gay mokokhu anja vuð maduw lèw anja azla Yahudiya uwatà, azlamèna matapla tahamà gay à vok la gày anik la aku, tatsàkà à gamagày à ama la tsèkurum, kà uwana guba azà à atà kà azla Yahudiya. Yesu asà à wanj, atsizl à tataka anjatà la abà, agòd à atà: “Lapiya aga la akul!” ²⁰ Uwana adapèh à atà uwaga, apèhatàla ahàl anja la makèla anja. Azlamèna matapla tahèn ala la marabay à kà uwana tanèhà Sufèl. ²¹ Yesu agòd à atà aya: “Lapiya aga la akul, bokuba uwana Baba aslèl gi à wanj kà, gi babay kà gèslèl akul suwanj.” ²² La lig anja uwaga la ahèj, afètà à atà afad à gèl, agòd à atà: “Bèzaw Masasèdok Zèzagèla! ²³ Uwabeyuwi uwana kamatsawwala tsakana ala kà, adàbèz mamatsila. Azlauwana kamatsaw à atà tsakana ala aw kà, tadàbèz mamtsila babay aw.”

Yesu atà la Tomas

²⁴ Mok uwana Yesu asà à wanj kà, Tomas, tekula anja azlamèna matapla kulo gèl anja sèla, (Uwana tazalal vègal), la uwana agà la tataka anjatà la abà, à mok uwana Yesu asà à wanj aw pèra. ²⁵ Azlamèna matapla anik tagòdàl: “Mènhèj Sufèl!” Ama Tomas agòd à atà: “Banja gèdanèhèj azlamokfak anja mamasamasa uwana la ahàl anja aw kà, gèdìnal gèl à vok aw, say banja gèdàtap gay gèl ahàl gulo à amik, anja mamasamasa uwatà à abà dadàj, ñgaha gètèp ahàl gulo à amik uwana à abà la makèla anja aw kà, gèdìnal gèl à vok aw!”

²⁶ Bà la mad à abà anja kasukwa uwatà aya kà, azlamèna matapla tahamà gay à vok la kay aya. Vuð uwatà kà, Tomas la tataka anjatà la abà. Gamagày matsakahay gà la tsèkurum, ama Yesu asà à wanj, atsizl à tataka anjatà la abà, la magòday: “Lapiya aga la akul!” ²⁷ Ñgaha agòd à Tomas: “Tomas, tèt gay gèl ahàl anjak à abà la abanay, ñgaha nèrèz makèla gulo, sàk à matsigay, dìnjal gèl à vok pèra.” ²⁸ Tomas agòdàl: “Sufèl gulo, Zèzagèla gulo!” ²⁹ Yesu agòdàl: “Kà uwana kadanèj gi pèra, à uwana kadinjal gèl à vok ay? Marabay la azlauwana tadinjal gèl à vok la kokudà manèj gi!”

Godega anja wakità uwanay

³⁰ Yesu adahà azlanadzipo anik la huma anja azlamèna matapla anja anjuvaw, uwana tatsetsèr à wakità uwanay à abà aw. ³¹ Ama uwana agà la abà kà tatsetser kà, kà akul anja madìnjal gèl à vok kà Yesu kà Kristu, ñgaha Kona anja Zèzagèla. La madìnjal gèl à vok uwaga kà akul kabèzaw sifa adèw à gay aw, la masla la abà.

21

Yesu apèhla vok à azlamèna matapla mædæf

¹ La lig anja uwaga la ahèj aya, Yesu apèhla vok à azlamèna matapla la slaka anja, la gay dèrèw Tiberiya, la kuba uwanay uwana apèhatàla vok: ² Sèmon Piyer, la Tomas (Uwana tazalalla vègal), Natanayel, uwana la Kana anja Galili, azlabèza anja Zebede, la azlamèna matapla sèla anik anja Yesu, tahamà gay à vok. ³ Sèmon Piyer agòd à atà: “Gèday, gèdàkas kilfi.” Atà tagòdàl: “Anu babay kà, mènèfa ka”, ñgaha tahàd à kèslah iyaw à afik. Ama la huð vèd uwatà kà, takès tatak aw. ⁴ Mok uwana mèl azl à awulà, Yesu apèhatàla vok la gay dèrèw, ama azlamèna matapla tasèl kà uwaga kà Yesu aw. ⁵ Kiya uwaga Yesu agòd à atà: “Azlakohana, kakàsaw kilfi ay?”, agòd à atà. “Awanj”, tagòdàl. ⁶ Masla agòd à atà: “Dùwaw dzarawa ankul à makèla à ahàl kaf anja kèslah iyaw, ñgaha kabèzaw à kilfi!” Kiya uwaga tadùw à abà ñgaha tabèz kilfi tsèràh à uwana taslàla vok anja mabiyèj à uda aya aw, kà uwana adahènla la kilfi. ⁷ Masla matapla uwana Yesu awoyàn kaykay agòd à Piyer: “Uwaga kà Sufèl gami!”

Kà uwaga, mok uwana Sèmon Piyer atsèna uwaga: ‘Sufèl’ tagòd kà, adùw lukut anja à vok, avàl à iyaw à abà. ⁸ Azlamèna matapla anik tasà à wanj la kèslah iyaw, la mabiy dzarawa uwana kilfi adahèn à abà. Kèrkèr la gay dèrèw aw, bokuba zuwif tekula.

⁹ Mok uwana tasà à vɔɔfah kà, tanɔ̀nà akàl, kilfi la afik la Pain. ¹⁰ Yesu agòɔf à atà: “Kilfi uwaga kakàsàw, kasawla azlaanik à wan̄ à abanay.” ¹¹ Sɔ̀mon Piyer ahàd à kɔ̀slah iyaw à afik, abiyà dzarawa à vɔɔfah la kilfi mɔ̀nɔ̀ga gà dzim bɔ̀zi an̄ha dzik zlo gɛl an̄ha makɛr gesina an̄ha. Ama la magol kilfi uwaga babay kà dzarawa akwahala aw. ¹² Yesu agòɔf à atà: “Sàw à wan̄, kazuwaw!” Amiyaka bà tekula la tataka azlamɔ̀na matapla an̄ha la abà kà, dza aslàla vok an̄a manaval: “Kak uwa” aw, kà uwana tasɔ̀l kà masla Sufɛl an̄atà. ¹³ Yesu azà vok à slaka Pain, ahèl, n̄gaha avàhà à atà, n̄gaha akàl à atà kilfi babay, bokuba uwana avàhà à atà Pain.

¹⁴ Uwaga kà, kà mamakɛr à uwana Yesu apɛhla vok à azlamɔ̀na matapla la slaka an̄ha, la lig an̄a mawul à uda an̄ha la mamɔ̀tsay.

Yesu atà la Piyer

¹⁵ Uwana tazùw tatak may à gay kà, Yesu agòɔf à Sɔ̀mon Piyer: “Sɔ̀mon, Kona an̄a Yuhana, kaduwà azlauwanay la mawoy gi takay?” “Iyay, Sufɛl, kasɛl kà gɛwoya ka” Yesu agòɔf: “Nɛ̀n̄la azlabɛza tuwan̄ gulo.” ¹⁶ N̄gaha agòɔf kà masɛla aya: “Sɔ̀mon, Kona an̄a Yuhana, kawoya gi ay?” “Iyay, Sufɛl, kasɛl kà gɛwoya ka.” Yesu agòɔf: “Fà slɛm à azlabɛza tuwan̄ gulo!” ¹⁷ N̄gaha Yesu agòɔf kà mamakɛr aya: “Sɔ̀mon, Kona an̄a Yuhana, kawoya gi ay?” Piyer agòɔf la mazaw la gɛl gà, kà uwana Yesu apɛhal kà mamakɛr: ‘Kawoya gi ay?’ N̄gaha agòɔf: “Sufɛl, kasɛl tatak gesina, kasɛl bay kà, gɛwoya ka.” Yesu agòɔf: “Nɛ̀n̄la azlatuwan̄ gulo!” ¹⁸ La haday gɛgod à ka: La mok uwana kalɛg medɛga, kafah parapara an̄ak à tsɛh la gɛl an̄ak, kadàhah à slaka uwana asà à ka. Ama an̄a kadàgay makoz kà, tadàbay à ahàl an̄ak ala, kà dza anik an̄a maf à ka parapara à tsɛh, n̄gaha dza anik adàdala ka à slaka uwana asà à ka maday aw.” ¹⁹ (La gay uwaga kà Yesu asal mapɛhla ala tsɛhay mamɔ̀tsayga uwana Piyer adàmɔ̀tsay kà mavày mazlɛbay à Zɛzagɛla) La lig la ahɛn̄ Yesu agòɔf: “Nɛ̀fà gi!”

Yesu la masla matapla uwana awoyan̄ kaykay

²⁰ Piyer anɔ̀nà à lig kà, anɔ̀nà masla matapla uwana Yesu awoyan̄ kaykay, atsà à wan̄ la lig an̄atà. Masla uwana ahùb à Yesu à makɛla, la mok uwana atà la tatak may lakɛl uwarà, à uwana anàv à Yesu: ‘Sufɛl, uwa à dza uwana adàta à kaf à gɛl uwa?’ ²¹ Piyer anɔ̀nà, n̄gaha agòɔf à Yesu: “Dza uwanay, takay Sufɛl, masla ma mana à uwana adàbɛzal tak ma?” ²² Yesu agòɔf: “Ban̄a asa à gi adz à ahɛn̄ la sifa tsɛràh à uwana gɛdàwula à wan̄ ma, mana an̄ak la abà ma? Kak kà, nɛ̀fà gi pɛra.” ²³ Azlamɔ̀na maham à ahɛn̄ gay Zɛzagɛla tatsɛnà gay uwaga: ‘Masla matapla uwanay, adàmɔ̀tsay aw’, tagòɔf. Ama, ‘Adàmɔ̀tsay aw’, Yesu agòɔf à Piyer aw, ama agòɔf pɛra kà: ‘Ban̄a asa à gi adza à ahɛn̄ la sifa tsɛràh à kaslà uwana gɛdàwula à wan̄ ma, mana an̄ak la abà mi?’, agòɔf pɛra.

²⁴ Uwaga masla matapla gà la uwanay à uwana atsetsɛr gay uwanay kà, n̄gaha mɛsɛl kà uwana atsetsɛr kà dziriga.

Makɛd gɛl à ahɛn̄ an̄a wakità uwanay

²⁵ Yesu adàhà azlaslɛray anik an̄uvaw. Agay tatsetseray la tekula, tekula gesina kà, naka gudɛn̄ gesina aslala vok an̄a makɛsin̄ azlawakità uwanay tatsetser aw.

SLƏRAY ANJA AZLAMƏNA MATAPLA LA SLAKA YESU Les Actes des Apôtres

¹ A kak slawda gulo Tewofil.

La wakità gulo matera la abà kà, gətsetser à ka lakəl anja Yesu. Gədatsetseray lakəl uwana apàhla ngaha la uwana atapàhla à azladza gesina, dagay madzəka vok anja sləray anja, ² tsəràh à mavakay uwana Zəzagəla azəb à zagəla. Mok uwana aləg la gudəñ la vok, akàsàni azladza kà magay azlaməna matapla anja, atəpàhàtəla uwana naka tafehəñ, adahà uwaga kà la ndzəfà anja Masasəfok Zəzagəla. ³ La lig la ahəñ, à mok uwana adamatsay apəhatàla vok asik dəñ la mahanay dzik ufad la abà, kà atà anja masəlay la dziriga kà masla la sifa. Apəh à atà gay anja makoray Zəzagəla. ⁴ Vərdi anik uwana tadahama gay à vok kà mazuw tatak may la slaka gə kà, agòf à atà: “Baba gulo, apəh à akul à ahəñ kà mav à akul tatak uwanay, à uwana gəpəh à akul, kadaw à slaka aw, dzàw à ahəñ la abanay la Urusalima kakudaw. ⁵ Kà uwana Yuhana adahà batem à azladza la iyaw, ama la huma la gay kà, akul kà, tadəfahakullanj kà la Masasəfok Zəzagəla.” ⁶ Azlaməna matapla uwana tahamà gay à vok la Yesu tanəval: “Sufəl gami, la kaslā uwatà la uwana kadāv makor gəl à tsəhay anjak Isərayel ay?” ⁷ Yesu agòf à atà: “Uwaga kà gay anjul la abà kà masəl kaslā uwatà aw, say Baba gulo la uwana asəl uwaga pəra. ⁸ Ama à akul kà, Zəzagəla adāvà à akul Masasəfok anja, la ndzəfà anja ngaha kadəgaw azlaməna sayda gulo, la abanay la Urusalima, ngaha la kutso Yahudiya, la Samariya ngaha tsəràh à makəf gəl à ahəñ gudəñ la vok gesina.”

Mad à zagəla anja Yesu

⁹ La mapəh uwaga la gay ala, azəb vok à zagəla, ahəd à slaka Baba, la huma yewdi anjatà. Ngaha azà à atà à adi, ngaha tanəñəñ aya aw. ¹⁰ La mok uwana atà la matsak yewdi à zagəla aya kà, azladza səla tatsizlla atà à vok la lukut medekuga la vok təlla. ¹¹ Tagòf à atà: “Akul azla Galili, kà mana kadzaw à ahəñ tsək yewdi à zagəla ma? Yesu uwana ahəd à zagəla asək akul à ahəñ, adəwul à wəñ bokuba uwana kanəñəw mad à zagəla anja.”

Tayahani dza kà mabəfəla à slaka anja Yudas à abà

¹² La lig anja uwaga la ahəñ, azlaməna matapla tasà à ahəñ la gudəñ uwana la afik, tazelalla gudəñ kuvu, kiya uwaga tasà à ahəñ la abatà, tahəd à Urusalima kərkər anja kà mahoyay pəlis tekula. ¹³ Mok uwana tabəzà Urusalima kà, tadà à gəy uwana à agu lakəl anja gəy anik la afik tadzà à ahəñ la aku uwarà. Azladza gə uwana kà: Piyer, Yuhana, Yakuba kona anja Alfe, Səmon uwana tazala Zələt ngaha Yahuda kona anja Yakuba. ¹⁴ Gesina anjatà tahamàh gay à vok kà madəv kuəfa la slaka gə, la azlamis, la Mariyama iyà anja Yesu, ngaha la azldeəda anja Yesu.

¹⁵ La vėrdi anik aya, azlaməna madiñal gəl à vok tahamà gay à vok: Dza dzim bəzi anja dzik səla. Hadzak, Piyer atsizlla ala la tataka anjatà la abà, agòf à atà: ¹⁶⁻¹⁷ “Azladedəda, Yudas kà agə la tataka gami la abà. Masla kà tavəl sləray bokuba anu bay. Ama la mok uwana azladza tayəh makəf Yesu kà, aguəwà azladza à huma, kà makəs Yesu. Dagay uwarà la matsetseray la abà, David apəh à ahəñ lakəl anja Yudas uwana naka adəfehəñ. Ndzər, say gay uwanay agəf à afik bokuba uwana apəh à vok.”

¹⁸ Yudas kà adəhəñj kà mawisiga. Sili uwana tapəlal kà maguw azladza à huma anja mapəhla Yesu ala kà, asukwla guf, ngaha atsə gəl à ahəñ la guf uwatà la abà, tsəzlləh, hana anja gesina asà à vədəh gesina, vėrdəfə. ¹⁹ Azlaməna madz à ahəñ la Urusalima tasəl à uwana apakà vok gesina, gay gə la uwaga tazəlalla guf uwatà la gay gudəñ anjatà kà: *Hakeldama*, bokuba magəfay kà: Guf anja aniz. ²⁰ Piyer awùlla à gay anja à tsəh, agòf aya: “Gay gə la uwaga David apəh à ahəñ dagay uwarà lakəl anja Yudas la wakità anja Mahabay la abà:

'Gəy anja adəpakay nvgay tsewwa,
Dza adədzə à ahəñ la aku anja tetuwa.'

Tatsetser aya kà:

'Say dza anik abəf à slaka anja à abà aya.'*²¹⁻²²

²¹⁻²² “Say dza abəf à slaka anja à abà kà mapak masla sayda anja mawul à uda anja Sufəl Yesu gami la mamətsay. Dza uwaga agay kəla kà tekula la tataka azlauwana la abà mauguzahəh anina la kəla slaka uwana Sufəl Yesu adahəh à abà dagay zamana

uwana Yuhana ađahälla batem tsərəh asək anu à ahəj à mok uwana Yesu awül à uda la mamətsay awül à zagəla.”²³ Kiya uwaga tatsizlla azladza səla ala: Yusufu uwana tazalalla Barsabas, sləm anha anik aya Yustus, atà la Matiyas.²⁴ Nğaha tadəv kuđa à Zəzagəla gesina anjatà, tagòd: “Sufəl, kak uwana kasəl madzugway anja ləv anja dza kà, pəhanula la uwana kakəsàni la tataka anjatà la abà,²⁵ kà masla anja maβəf à slaka asik anja Yudas à abà kà magay masla matapla, kà masla anja madfəh sləray anha à uwana Yudas asəkəl, kà masla anja mad à slaka uwana à abà agə anha.”²⁶ La lig la ahəj tatsà à atà goropu lakəl anja mazəbani tekula anjatà. Kiya uwaga Zəzagəla azəbàni Matiyas, nğaha adà à matugway anja azlaməna matapla kulo gəl anha tekula gə uwaga à adi.

2

Mas à ahəj anja Masasəfok Zəzagəla

¹ Mok uwana madəvaday anja Pentakosta adasa à waŋ, azlaməna madiŋal gəl à vok tahamà gay à vok gesina la slaka tekula la abà.*² Katskats tatsənà masləh mələ bokuba mahohumay anja mən kular, asa à ahəj la zagəla, nğaha ahənà gəy uwana ala, atà la aku gesina.³ La abatà azlatatak anik tapəhla vok ala bokuba azlaaləh akəl; tasləhà gəl à ahəj, tadzəh à kəla uwabeyuwi anjatà à gəl gesina.⁴ Gesina anjatà tahən ala la Masasəfok Zəzagəla, nğaha tadzəkà mabəfma la azlagay gudəj anik anik, bokuba uwana Masasəfok avà à atà kà mapəhay.

⁵ La kaslə uwatà azla Yahudiya uwana tanəfà mapəhay anja fəla anjatà, la ahəj la Urusalima, tasà à waŋ la azlakutso anik anik la abà gesina, tasà à waŋ kà madz à ahəj la Urusalima.⁶ Mok uwana tadatsən mahohumay uwaga, tasà à waŋ, tahamà gay à vok. Ləv avələh à atà à gay gesina anjatà, kà uwana kəla uwabeyuwi anjatà kà atsənəj kà tapəh gay kà la gay gudəj anha.⁷ Kiya uwaga gesina anjatà ləv avələh à atà à gay, gəl akəd à atà à vok, tagòd: “Azladza uwanay tavats gay kà, kà azla Galili aw takay?”⁸ Nğaha ma, uwanay ma kakay apaka vok, kà kəla uwabeyuwi gami atsəna kà tapəhay kà la gay gami uwi?⁹ Tsa tekefik kà azladza uwanay tasà à waŋ la kutso Partiya, Medi, Elam, Mesopotami, Yahudiya, Kapadotsəya, tsərəh à Asəya.¹⁰ Nğaha la Fərizi, Pamfiliya, Misəra, nğaha la kutso anja Libiya uwana nekwa la Səren, azlaanik la tataka gami la abà, tasà à waŋ la Rom,¹¹ azlauwana azla Yahudiya slilih gə la azlauwana tapəkəh azla Yahudiya mapakay, azlaanik uwana tasà à waŋ la Kəreta nğaha azlaanik la Arabiya. Ama ku bə la uwaga bay kà, kəla uwabeyuwi gami atsəna kà tapəhay lakəl anja sləray mənğa anja Zəzagəla la gay gudəj anha!”¹² Ləv avələh à atà à gay gesina, tasəl uwana tapəhay aw, tagòd kà atà à atà: “Uwanay ma, mana asal magəday mi?”¹³ Ama bə la uwaga kà azlaanik takəfəsl azlaməna madiŋal gəl à vok la magəday: “Ndzər, azladza uwanay kà guzu adakəd atà à gay.”

Mapəhay anja Piyer

¹⁴ Hadzak Piyer asà à afik la azlaməna matapla kulo gəl anha tekula gə uwana, azà kuda à zagəla, agòd à maham à ahəj dza: “Akul azla Yahudiya, nğaha akul uwana kadzaw à ahəj la Urusalima la abà gesina, sələw, tsəbəw sləm à gay uwanay gəpəh à akul lagwa.¹⁵ Kay, azladza uwanay kà, guzu adakəd atà bokuba uwana kagəfaw aw, kà uwana bə zil gosila bay kà, adaslay dadəj aw.¹⁶ Ama kà magəf uwana à afik, masla mapəhal gay à ahəl Yoyel apəh:¹⁷ Zəzagəla agòd:

‘Kiya uwanay à uwana adəpaka vok la madəv à gay mahənay:

Gədəsləl Masasəfok gulo à ahəj à azladza à gəl gesina;
azlabəza ankul, la azlakohana ankul, la azlamakozga ankul masasinjay adəsinəhla
atà, gədəbəfahà atà à ama la abà, tapəh paŋaw gulo.

¹⁸ Ndzər, hadəy gədəsləh Masasəfok gulo à gəl anja azlamagamza gulo, azlazilga, la azlamisga la mavakay uwatà

Nğaha tadəpahah à azladza.

¹⁹ Gədəfəhah azlanadzipo la zagəla nğaha la wəfəh,
aniz, akəl nğaha habaga la azlakəsək tadəghay la ahəj,

²⁰ Afats adətəfa zagəla,

Təla adəgay mativga vikuza, bokuba aniz.

La lig la ahəj kà pəra, mavakay anja Sufəl uwana mazləbayga, anja mas à waŋ.

²¹ Kəla dza uwana atsəl sləm anja Zəzagəla agay adəbəlay!”*

²² “Akul azla Isərayel, tsəbəw sləm à uwanay gəpəhay”, Piyer agòd à atà. “Yesu zil Nazaret uwana Zəzagəla asləl à waŋ, apəhla maslay anha ala, la madəh azlanadzipo la azlaməsəlay anik anik la tataka ankul la abà, akul babay kasəlaw.²³ Zəzagəla avà à ahəl

anĵul bokuba uwana awoyən kà uwana dagay uwarà, asəl uwana kadācfahawwallan à vok. Gay gà la uwaga kavàw masla à ahàl anja azlaməna tsakana kà mazləlay à ahàf à adi kà mamətsay. ²⁴ Ama Zəzagəla awùlla à uda la mamətsay, adzà à ahəŋ la sifa aya. Ndzer kà, masla kà agəd̄f à ndzəda anja mamətsay à ahàl aw. ²⁵ David apəh lakəl anĵa kà:

'Koksikoksi gəŋəŋəŋ Sufəl gulo la yewdi gulo, agà la ahàl kaf gulo, kà gi anja magogotsay aw.

²⁶ Gay gà la uwaga, ləv gulo adahən ala la marabay, ŋgaha gay gulo uwana gəpəhay kà matsidəyga,

Bamərakà gi la sləb vok pəra, gədāf manəwəŋ gulo à masla à afik.

²⁷ Kadāsak gi la ahàl anja mamətsay aw.

Kadəkəsay kà sləb vok anja kohana anĵak amazinla aw.

²⁸ Kak, kapəhgəla tetəvi uwana adala gi à sifa à abà,

Gi la marabay kà uwana kak la gi.¹✧

²⁹ "Azladedə gulo, azlayla gi gəpəh à akul la paraka lakəl anja Baba gami madzidziga David; masla kà aməts tallà, zəvay anĵa la ahəŋ la tataka gami la abà tsərəh à lakana.

³⁰ Masla mapəhal gay ahàl anja Zəzagəla asəl kà Zəzagəla azùwal mawadəy la magodfal: 'Gədəkəsani à uda tekula la mayyi tsəh ala anĵak la abà, gədāfa à sufəl à abà.'[✧] ³¹ David asəl dagay uwarà lakəl anja mawul à uda anja dza, uwana mafal dzakwa à gəl gà, kà uwaga agəd̄f:

'Gəsakal la mezewi aw ŋgaha vok anĵa azin ala aw.'

Zəzagəla agəd̄f."

³² Piyer agəd̄f aya: "Zəzagəla awùlla Yesu uwanay à uda la mamətsay, anu azlaməna sayda anja uwaga gesina. ³³ Zəzagəla Baba atsilzllən à ahàl kaf anĵa, ŋgaha avəl Masasədok uwana apəh à ahəŋ, masla asləh anu à ahəŋ à gəl à uwana kanəŋəwəŋ la uwana katsənəwəŋ lagwa. ³⁴ David kà, masla kà ahàd à zagəla aw, ama apəh gay lakəl anja dza uwana tafal dzakwa à gəl, agəd̄f:

'Sufəl Zəzagəla gulo agəd̄f à sufəl gulo: 'Dzà anĵak à abanay la ahàl kaf gulo lakəl.

³⁵ Tsərəh à uwana gədābək azlaməna məzam anĵak à tsəh à asik anĵak, kà maf asik à afik anĵak.'[✧]

³⁶ "Kità gəgod̄f à akul à azla Isərayel, ndzer kasəlaw kà, akul kazləlləw Yesu uwanay à ahàf à adi, masla la uwana Zəzagəla apakən ala kà Sufəl, ŋgaha afəl dzakwa à gəl."

³⁷ Uwana tatsən gay uwaga kà, ləv avələh à atà à gay gesina. Tanavà Piyer la azlaməna mataplə anik: "Azladedə, mana à uwana mədəhəŋ ma?" ³⁸ Piyer agəd̄f à atà: "Pəhəw gay la ləv ala, ŋgaha kəla uwabeyuwi anĵul tadəhalla batem la sləm anja Yesu Kristu kà tsakana anĵul anja mamatsilla. ŋgaha Zəzagəla adəvə à akul Masasədok anĵa. ³⁹ Kà uwana mapəh à ahəŋ anja Zəzagəla kà anĵul, la mayyi à tsəh ala ŋgaha kà anja azla-uwana kərkər gà, kà anja azlauwana Sufəl Zəzagəla gami adəzala à atà gesina."

⁴⁰ Kiya uwaga Piyer apəh à atà azlagay anik anik aya, kà mafaz atà à tsəh, ŋgaha kà madzərədəh atà ala la magod̄f à atà: "Sàw à uda la tataka anja azladza uwana takəs Yesu aw, yəhəw kà Zəzagəla anja mafəl akul pəra." ⁴¹ Anjuvaw la tataka anjətà la abà tadiŋ gəl à gay anja Piyer à vok ŋgaha tadəhà à atà batem. La mavakay uwatà dza dəbow makər azà à vok à azlaməna mataplə à adi. ⁴² Tavà vok anjətà kà matsəb sləm à uwana à azlaməna mataplə tapəhatàla, tadzà à ahəŋ la mazuw tatak may tekula la abà, ŋgaha tazəw tatak may la slaka tekula babay, ŋgaha la madəv kuča à Zəzagəla la slaka gà.

Madz à ahəŋ anja azlaməna madiŋal gəl à vok

⁴³ Azlanadzipo la azlamasəlay anjuvaw tadəhàhà vok la ahàl anja azlaməna mataplə, ŋgaha ləv avələh à azladza à gay. ⁴⁴ Azlaməna madiŋal gəl à vok tagə tekula, ŋgaha tahamə gay à tatak anjətà à vok la slaka gə gesina. ⁴⁵ Tadawəh azlaələk anjətà ala la azlaləmana anjətà, tavəhəh sili gə la tataka anjətà la abà uwabeyuwi kəla udəra anĵa. ⁴⁶ Kəla mavakay tahamə gay à vok la mən gəy Zəzagəla la aku, tazəwəh tatak may anjətà la slaka gə la mtəga la ləv tekula la marabay. ⁴⁷ Tazləbəhəh Zəzagəla, ŋgaha azladza gesina tawoyəhà atà. Kəla mavakay Sufəl Zəzagəla azəhà à atà ala azlauwana à adi asal mafəl atà.

3

Mawur dza deriga ala

¹ Vərdi anik, Piyer atà la Yuhana tahəd̄f à mən gəy Zəzagəla à agu kà madəv kuča la gay mokokhu, la kaslā anja madəv kuča. ² Deri anik la ahəŋ la gay gamagəy uwana

tazalalla gamagây delga, masla kà deriga dagay mayyay mənəŋ aŋha. Kəla mavakay azladza tadàhla à gay gamagây uwaga, kà masla aŋa matsatsàh tatak la slaka azlaməna mad à gày à agu. ³ Piyer atà la Yuhana tadà à gày kà, anavà atà à tatak. ⁴ Ama Piyer atà la Yuhana tatsəkəkal yewdi à gay, ŋgaha Piyer agòdɔl: “Nərəz anu!” ⁵ Dza uwaga anərəz atà la tsetsi dadən, adzùgw kà abəz tatak la ahàl aŋatà. ⁶ Piyer agòdɔl: “Tetuwa sili aga gi la ahàl aw, ama uwana gəkoray gəvə à ka. La sləm aŋa Yesu Kristu, zil Nazaret, sà à afik, hàd, gəgod à ka!” ⁷ Ŋgaha akəs la ahàl kaf, atsizllən ala, katskats asik la azlamatakola takola aŋha tadzərədfàh ala. ⁸ Hadzak, atsizlla ala, dzaradzara, ahàd, tadà à mənəŋ gày Zəzagəla à agu la azlaməna matapla la mavalàh à zagəla, ŋgaha la mazləb Zəzagəla. ⁹ Maham à ahən dza anənə deri uwaga, aday la mazləb Zəzagəla. ¹⁰ Uwana tasəl kà, uwaga kà deri uwana adzàhà madzay kà matsatsàh tatak la gày gamagây aŋa mənəŋ gay Zəzagəla uwana tazala ala gamagây delga kà, bədfək, ləv avàlàhà à atà à gay kà tatak uwana apakà vok.

Mapəhay aŋa Piyer la mənəŋ gày Zəzagəla la aku

¹¹ Piyer atà la Yuhana taləg la golav aŋa mənəŋ gày Zəzagəla uwana la abà tazalalla: Golav aŋa Salomon. Dza uwaga asək atà à ahən aw. Kiya uwaga azladza tasàhà à waŋ à slaka aŋatà la mahoyay, kà uwana ləv avàlàhà à atà à gay kà uwaga. ¹² Mok uwana Piyer adanən uwaga kà apəh gay à maham à ahən dza, agòd à atà: “Akul azla Isərayel, kà mana ləv avàlàhà à aku à gay ma? Kà mana kanərəzaw anu bokuba anu la uwana matsizlla dza uwanay ala la ndzəda aŋa aslasl gəl gami ma, la manəf fəla gami lela ma?” ¹³ Awan, Zəzagəla aŋa azlababa gami madzidziga, aŋa Abəraham, aŋa Isak, ŋgaha aŋa Yakuba uwana tadaval kuɔa, avà mazləb ay à Kona aŋha. Uwana aku la gəl aŋkul kavàw à ahàl aŋa azlaməna makor dza kapùwàwwalla gudzi à gəl la huma Pilatus, à mok uwana masla adzùgw maduwal à gəl. ¹⁴ Kakwəsaw kà dza dziriga, sətakaga, ŋgaha kanavàw la slaka Pilatus kà maduw à aku gəl à masla makad dza. ¹⁵ Kiya uwaga kakəɔfaw Madzahaga aŋa sifa, ama Zəzagəla awùlla à uda la mamətsay, anu kà anu azlaməna sayda aŋa uwaga. ¹⁶ Ama kà aŋa dza uwanay kà, kanənəwwan; kasəlaw uwaga kà: Ndzəda aŋa Yesu la uwana avəl ndzəda uwanay, madin gəl à Yesu à vok la uwana awurà dza uwanay ala la huma yewdi aŋkul.”

¹⁷ “Azladedə, mok uwana azlamasiga aŋkul kapùwàw gudzi à Yesu à gəl, la azlamasiga aŋkul kà, gəsəl kà la masəl gəl gə, kadəhàw uwaga aw. ¹⁸ Iyay, kiya uwanay à uwana Zəzagəla agəɔfən gay aŋha uwana à afik, apəh à azlaməna mapəh à atà gay à ahàl aŋha uwarà, kà uwana apəh à ahən kà Kristu adəs ŋgərpa, agòd. ¹⁹ La kità kà, pəhàw gay la ləv ala, gəla vok à slaka Zəzagəla, kà masla aŋa mamatsakulla tsakana aŋkul ala. ²⁰ Kiya uwaga Zəzagəla adəsak aku ala zamana lapiya à waŋ, ŋgaha adəsləl aku Kristu uwana à waŋ apəh à ahən uwarà kà aŋkul, uwaga kà Yesu. ²¹ Ama kà aŋa diŋa kà, Yesu adzà à ahən la zagəla tsəràh à uwana Zəzagəla apakàh azlatatak ala kà mawga dadən, bokuba uwana apəh à azlaməna mapəh à atà gay à ahàl dagay uwarà. ²² Təga kà Musa agòd kà:

‘Sufəl Zəzagəla aŋkul adəsləl aku masla mapəhal gay à ahàl à waŋ bokuba gi, uwana adəgay tekula la mayyi à tsəh ala aŋkul la abà. Kadətsəbaw sləm à uwana adətapakulla gesina.

²³ Ama kəla uwəbeyuwi uwana adətsəb sləm à masla mapəhal gay à ahàl uwatə aw kà, adədzə à ahən la tataka aŋa azladza aŋa Zəzagəla la abà aw, tadəkad atə.”

²⁴ Amiyaka azlaməna mapəh à atà gay à ahàl anik babay kà, tapàh bokuba aŋa Musa lakəl aŋa tatak uwana adəpaka vok la zamana gami, dagay Samuyel, ŋgaha la azla-uwana la lig aŋha la ahən. ²⁵ Azladedə, mapəh à ahən uwana Zəzagəla apəh à ahən la azlaməna mapəh à atà gay ahàl kà, kà aŋkul, kiya uwaga babay à uwana Zəzagəla akəs vok slawda la Abəraham:

‘Gəɔpəpə azlatsəhay gudən à vok gesina la tsəhay aŋak, agòd, ‘Makəs vok slawda uwaga kà, kà aŋkul.”

²⁶ Kà uwaga à uwana Zəzagəla asləl à aku Kona aŋha à waŋ, à aku tsəhay aŋha teraŋa. Asləl à aku à waŋ aŋa mapəh à aku ala dabaray, kà aku aŋa mas à uda la mawisiga aŋkul la abà, ŋgaha kà masla aŋa mapəh à aku gay à vok.”

4

Piyer atà la Yuhana la huma seriya

¹ Mok uwana Piyer atà la Yuhana tapəh gay à maham à ahən dza aya kà, azlaməna mav tatak à Zəzagəla tasà à waŋ, la mənəŋ aŋa azlaməna manəŋla mənəŋ gày Zəzagəla,

ngaha la azla Sadukiya uwana tagòd kà: Mawul à uda la mamòtsay la ahøj aw. ² Tapakà lèw lakèl anjatà, kà uwana azlamèna matapla tatapla à azladza kà, azladza tadawul à uda la mamòtsay. ³ Kà uwana wèd adasa à wan, takàs atà kà, tawùts atà à danjay tsèràh à bebøj. ⁴ Tekedik anjuvaw uwana tatsèn mapèhay anjatà uwaga kà, tadiñal gèl à vok, kiya uwaga matugway anja azlamèna madiñal gèl à vok azigèn tsèràh azladza dèbow zlo.

⁵ La bebøj gà, azlamøjga anja azla Yahudiya, la azlamasiga, la azlamèna mapàhla wakità seriya ala tahamà gay à vok gesina anjatà la Urusalima. ⁶ Hanas, møj madzahaga anja azlamèna mav tatak à Zèzagèla la ahøj, la Kayyif, la Yuhana, la Alekèsander ngaha la azlauwana la hud gày anja møj madzahaga gesina. ⁷ Tadàla azla Piyer la Yuhana à huma anjatà, ngaha tanavà atà gay ala: "La ndzèda ma anja uwa, awma la slèm anja uwa kawuràwla masla duvats ala uwa?" ⁸ Masasèdòk ahènà Piyer ala, ngaha agòd à atà: "Akul, azlamøjga anja azla Yahudiya, la azlamasiga, ⁹ kanavàw anu gay ala lakana, kà uwana mèdfahà delga la mawur deri ala. 'Kakay awùr ala mi?', kagòd'aw. ¹⁰ Had'ay zlà, delga kasèlaw gesina, kul azladza Isèrayel, masla uwana kazlèl'aw à aháf à adì, à Yesu zil Nazaret, Zèzagèla awùlla à uda la mamòtsay. ¹¹ Lakèl anja Yesu uwanay, à uwana wakità Zèzagèla apèh lakèl anja agòd: 'Akur uwana kul azlamèna mañal gày kadùwàwla, masla la uwana adapak akur mawad gày.'^{*}

¹² Kiya uwaga gègòd à kul: Zèzagèla abèl dza bamèraka tekula kokudà masla aw. Dza anik la ahøj tetuwa à uwana Zèzagèla aslèl à wan à gudøj à vok kà mabèl azladza aw."

¹³ Azladza uwaga lèw avàl'ahà à atà à gay kà uwana tanøjà mawad vok à uda anja Piyer atà la Yuhana, ngaha bay kà, tasèl kà tadà à nekol aw, tasèl la gèl anjatà kà atà kà azlamèna matapla la slaka anja Yesu. ¹⁴ Ama uwana tanøjà dza uwana awurà ala atsil à ahøj la makèla anjatà kà, tasl'ala vok kà mapèh à atà gay aw. ¹⁵ Tavà à atà tetèvi kà mas à uda, kà atà anja makès sawaray anjatà kà atà kà atà. ¹⁶ Tagòd à vok: "Mana mèdfèhøj à azladza uwanay à vok ma? Kà uwana azlamèna madz à ahøj la Urusalima gesina tasèl la paraka kà nadzipo uwanay apakà vok ndzer, uwala anu babay à wan mèsalala vok anja magòday aw. ¹⁷ Ama asa à anu gay uwanay atsen ala kà masèlay anja azladza aw, lagwa kà mèdfèd à atà gay à ahøj lakèl anja Yesu." ¹⁸ Ngaha tazàla à atà à gày aya, tavèr à atà gay kà matapla slèm anja Yesu à azladza.

¹⁹ Ama Piyer atà la Yuhana tawùlla à atà ala: "Akul la gèl anjul à kà nàtsàw gay uwaga ala. Delga la huma Zèzagèla kà makès gay anjul ay, awma anja Zèzagèla takay? ²⁰ Ama anu kà, mèsalala vok anja masak mapèh uwana mènøjàñ la uwana mètsonàñ aw." ²¹ Uwana azladza uwaga tasl'ah à atà mèl à gèl kà tasak atà. Tabèzà tetèvi kà madukw à atà seriya à gèl aw, kà uwana azladza gesina tazlèbà Zèzagèla lakèl anja tatak uwana apakà vok gesina. ²² Dza uwana awurà ala la nadzipo uwaga kà, mavay anja kà aduwa dzik ufad.

Madèw kudà anja azlamèna madiñal gèl à vok

²³ Uwana tadùw à atà gèl kà, Piyer atà la Yuhana tahàd à slaka azlamèna anjatà, ngaha tatùgw atà uwana azlamøj madzahaga anja azlamèna mav tatak à Zèzagèla, la azlamasiga tapèh à atà. ²⁴ Uwana tatsèn uwaga kà, tadèw kudà à Zèzagèla la lèw tekula: "Zèzagèla gami, kak la uwana kadahà zagèla, la kutso, la dèrèw ngaha la azlatatak uwana la abà gesina." ²⁵ Kak la uwana kapèh à anu la Masasèdòk anjak la panaw anja baba gami madzidziga David, magamza anjak uwana agòd:

'Kà mana azladza gudøj à vok tapakàh, azlaval'ahà ma?

Kà mana azladza tadzàhkà mad'ah dabaray deyday gà ma?

²⁶ Azlasufèl anja gudøj à vok tafahà vok à ahøj kà anja guvèl,

Ngaha azlamøjga bay tatsèn vok gay

Lakèl anja Sufèl Zèzagèla ngaha lakèl anja Kristu anja, (Masla mafal dzakwa à gèl gà).^{*}

²⁷ Ndzer, apakà vok la abanay la Urusalima, Herod la Pontsøyus Pilatus, la azladza à uda gà ngaha la azlatsèhay Isèrayel tahamà gay à vok gesina lakèl anja Yesu, magamza tsikasaga anja, uwana mafal dzakwa à gèl gà. ²⁸ Tahamà gay à vok kà mad'ah uwana kadzùgw à ahøj gesina dagay uwarà la mawoyøj anjak la abà. ²⁹ Sufèl, lagonay kà, tsèn à maslah mèlo anjatà tsi, lagwa kà, vè maslay à azlamagamza anjak kà mapèh gay anjak la mawad vok à uda gesina zlà. ³⁰ Lagwa kà, vè à anu maslay anjak kà mad'ah azlanadzipo anik anik la slèm anja Yesu, Kona anjak zlà." ³¹ Mok uwana tadadèw madèw kudà à

^{*} 4:11 4.11 Mahabay 118.22

^{*} 4:24 4.24 2Musa 20.11; Nehemiya 9.6; Mahabay 146.6

^{*} 4:26 4.26 Mahabay

gay kà, slaka uwana atà la abà abèlākà à vok. Tahèn ala gesina anjatà la Masasəđok Zəzagəla, ngaha tapəh gay Zəzagəla la mawad vok à uda.

Azlaməna madiŋal gəl à vok tahamà gay à tatak anjatà à vok

³² Azlaməna madiŋal gəl à vok tagà la ləv tekula la matsən vok gay lela. Dza la ahəŋ “Ləmana kà, kà anjulo pəra”, agəd la tataka anjatà la abà aw. Uwana takər gesina kà, tadahà vok huŋwa à vok la tataka anjatà la abà aw. ³³ Azlaməna matapla tazà sayda lakel anja Yesu kaykay, tagəd kà Yesu awul à uda la mamətsay: “Mənhəŋ”, tagəd. Ngaha Zəzagəla apisà gay à azlaməna madiŋal gəl à vok à vok. ³⁴ Dza la ahəŋ la tataka anjatà la abà, kuđa akəs aw, kà uwana azlaməna àlak, la azlagəy la ahəŋ, tadawah ala la tataka anjatà la abà, ngaha tasàhla sili gə à wan. ³⁵ Tabākàh à slaka azlaməna matapla, la lig la ahəŋ tavàhàhà sili uwaga, kəla udəra anja dza.

³⁶ Bokuba Yusufu, zil Levi la kutso Sipere uwana azlaməna matapla tazàlal Barnabas. (Barnabas asal magođay: Masla mabəllafàh azladza ala) ³⁷ Masla aduw àlak anja ala, asəlla sili gə à slaka azlaməna matapla gesina.

5

Gay lakəl anja Ananiyas atà la mis anja Safira

¹ Ama dza anik la ahəŋ, uwana sləm anja Ananiyas, atà la mis anja Safira, taduw àlak anjatà ala la matsən vok gay lela. ² Atəm̄la sili à mtəga, ngaha adàla uwanay à huma anja azlaməna matapla la kokuđa masəlay anjatà, ama mis anja kà asəl uwaga. ³ Kiya uwaga Piyer agəd̄al: “Ananiyas, kà mana kavà tetəvi à seteni, ahəd̄ à ləv anjak à tsəh kà mavavar Masasəđok Zəzagəla la matəm̄la sili anja àlak anjak, uwanaw kadu ala à mtəga ma?” ⁴ Mok uwana kaləg madula kà bə àlak anjak. Uwana kaduwla, bay sili gə bay, bə kà kak kakoray. Kà mana kadzugw la ləv anjak kà madàh tsəhay mawisiga uwanay ma? Fida kà kadàhəŋ kà à dza aw, ama à Zəzagəla.” ⁵ Uwana Ananiyas adatsən gay uwaga kà, atəd̄ à vəd̄ah, aməts. Azladza uwana tatsənà uwaga gesina kà, guba mən̄gga akəs à atà. ⁶ Azlakohana tasà à wan, tafafəd̄al lukut à adi, tazəb̄ à uda, tallà.

⁷ Zwek, tatak anja sa makər adada à lig, mis anja Ananiyas adà à gəy kokuđa masəl uwana apakà vok. ⁸ Piyer anavàl à gay ala magođal: “Pəh à gi, uwanay sili anja àlak anjukl uwana kaduwəwla pəra takay?” Mis agəd̄al: “Iyay, bə masla gə la uwaga.” ⁹ Kiya uwaga Piyer agəd̄al: “Kà mana katsənàw vok gay kà matap Masasəđok Sufəl ma? Tsənəŋ, azlauwana tallà zil anjak kà, atà la uwaga tatsà à gəy la gəy gamagəy, ngaha tadàzəb̄ ka, tallà ka!” ¹⁰ La kirim yewdi, atəd̄ à makəla à asik anja masla matapla, ngaha aməts. Azlakohana tasà à gay, tabəzal à gəl kà mamətsay gə; tazəb̄, ngaha tadàla, tallà à makəla anja zil anja. ¹¹ Guba mən̄gga akəs azlaməna gay Zəzagəla la azladza anik gesina uwana tatsənà gay uwaga.

Azlaməna matapla tadaha azlanadzipo

¹² Azlaməna matapla tadahàhà azlanadzipo la masəlay anik anik la tataka azladza la abà. Azlaməna madiŋal gəl à vok gesina tahamàhà gay à vok la ləv tekula la golav anja Salomon la abà. ¹³ Dza uwana adiŋal gəl à vok aw kà, aslāla vok kà maham gay à vok atà nna aw. Kay nəma kà, azladza tawoyà à atà! ¹⁴ Azladza anjuvaw tasàhà à wan, azlazil la azlamis tadiŋ gəl à Zəzagəla à vok, ¹⁵ kà azlanadzipo uwana azlaməna matapla tadahàhəŋ. Azladza tasàhla azlaməna d̄uvats à azlatetəvi à ama à wan anjuvaw. Tahànàhà atà à azlakəslah à afik, la azlabutsi, kà makud mad à awtəy anja Piyer, kà maguwa anja à kəl ala anja dzəgəy anja. ¹⁶ Azladza anjuvaw tasàhà à wan la azlagudəŋ uwana la abà la makəla anja Urusalima. Tasàhla azlaməna d̄uvats à wan, la azladza uwana zagəla zagəla agə à atà lakəl, gesina anjatà tawarà ala.

Matəəb̄ azlaməna matapla

¹⁷ Məŋ madzahaga anja azlaməna mav tatak à Zəzagəla la azlauwana tagà la masla, bokuba magođay azla Sadukiya, tagà la maŋor lakəl anja azlaməna matapla, ngaha tadzəkà matəəb̄ atà. ¹⁸ Kiya uwaga takəs azlaməna matapla, tawutəs atà à danjay. ¹⁹ Ama la huđ anja vəd̄ kà, malika anja Zəzagəla asà à ahəŋ, apəzl gamagəy anja gəy danjay, asəlla azlaməna matapla à uda, ngaha agəd̄ à atà: ²⁰ “Dəw à mən̄ gəy Zəzagəla à agu, ngaha zəw gay anja sifa adəv à gay aw à azladza!” ²¹ Azlaməna matapla takəs. Bəŋ la zay la tsəh, tahəd̄ à mən̄ gəy Zəzagəla à agu kà matapla azladza.

La vud uwatà kà, mən̄ madzahaga anja azlaməna mav tatak à Zəzagəla, ngaha la uwana la abatà gesina tahamà gay à vok la azlamasiga anja azla Yahudiya, takəs sawaray ngaha tasləl azladza kà madka azlaməna matapla à danjay. ²² Uwana azlaməna masləlay tabəzà danjay kà, tabəz atà aw. Tawul, tapəh à azlaməna sawaray: ²³ “Məhəd̄ à danjay kà, azlagamagəy kà matsakahayga lela, azlaməna manəŋla gamagəy tagà la slaka anjatà

la abà la gay gamagày. Ama mapəzl gamagày kà, dza la aku aw.”²⁴ Uwana mənğa aña azlaməna manəŋla mənğə Zəzagəla, la azlamənğa aña azlaməna mav tatak à Zəzagəla tatsən uwaga kà, gəl akàd' à atà à vok, tasəl uwana tadzugway aya lakəl aña azlaməna matapla aw, ŋgaha tanavàhà vok uwana adapakà vok.²⁵ Kiya uwaga hazlan, dza anik asà à waŋ, agòd' à atà: “Tsənàwwàŋ tsi! Azladza uwana kakàsaw atà, kawàtsàw atà à danğay kà, atà la mənğəy Zəzagəla la aku, tatapla azladza!”²⁶ La abatà mənğa aña azlaməna manəŋla ahàd la azladza, ŋgaha tawùlla azlaməna matapla à waŋ. Ama la gasa aw kà uwana guba akòs à atà, kà matsàh atà la akur aña azladza.

²⁷ Mok uwana tasəlla atà à waŋ à huma aña sawaray kà, mənğə madzahaga aña azlaməna mav tatak à Zəzagəla anavà atà gay ala.²⁸ Agòd' à atà: “Mədadəf à akul gay à ahən kà matapla la sləm aña dza uwaga aw ay? Ŋgaha ma, kà mana kadàhàwwàŋ lagwa ma? Kaslèhàw matapla aŋkul à Urusalima à abà gesina, ŋgaha ma asa à akul aŋiz aŋha ma aña mawul à anu à gəl takay?!”²⁹ Ama Piyer la azlaməna matapla anik tawùlla à atà ala: “Leri makəs gay aña Zəzagəla d'adfuwa à gay aña azladza.”³⁰ Haçay, Zəzagəla aña azlababa gami madzidziga awùlla à uda la mamətsay, dza uwaga kazlèllàw à ahàf à adi.³¹ Zəzagəla azəb à ahəl kaf aŋha à gəl, apakàŋ ala kà Sufəl, ŋgaha masla maðələn kà mav tetəvi à azla Isərayel kà mapəh gay la ləv ala kà atà aña maðəz mamatsila aña tsakana aŋatà.³² Haçay, anu la gəl gami kà, anu azlaməna sayda kà aña uwaga, anu la Masasədok uwana Zəzagəla avà à azlauwana takəs gay aŋha.”

³³ Mok uwana tatsən gay uwaga kà tapakàh ləv, asà à atà makad' azlaməna matapla.³⁴ La tataka aŋatà zil Farişəya anik, sləm aŋha Gamaliyel la abà, masla mapàhla mapəhay aña Musa ala. Azladza gesina tasləkaway. Uwana azladza anik tapakàh ləv, asà à afik la tataka aŋatà la abà, agòd': “'Dàw à uda', gòd'aw à azladza uwanay dadəŋ.”³⁵ Mok uwana tasà à uda, agòd': “Azladedə gulo, azla Isərayel, məd'ahà haŋkəli la uwana məd'ehən à azladza uwanay à vok.”³⁶ Dzùgwàw lakəl aña Tewudas uwana avəlla à waŋ uwarà tsi: ‘Gi mənğə dza’, agòd', tsərəh à uwana azladza dadərmokw ufad tanəfà. Ama takəd', ŋgaha azlauwana tanəf à masla gesina taslèhà gəl à ahən, ama tadəv à gay tərzləm.³⁷ La lig aŋha la ahən Yudas, zil Galili adzəkà la mok uwana tatùgw dza aya, azalàh azladza aŋuwaw kà manəf masla, ama takəd' masla la azlaməna manəfay aŋha gesina, tərzləm.³⁸ Lagonay kà, gəgòd' à akul kà, məsəlla à ahəl à azladza uwanay la tsəh ala, tada aŋatà. Baŋa sləray aŋatà uwanay tad'ehən atsà à waŋ kà la slaka azladza asik kà, adàzila bay,³⁹ ama baŋa asà à waŋ kà la slaka Zəzagəla ndzer kà, məslala à vok kà madədal gay à ahən aw. Məd'ahà haŋkəli, məpə guvəla la Zəzagəla aw!” Azlaməna sawaray takəs mapəhay aña Gamaliyel.⁴⁰ Tazàla azlaməna matapla à gày, tazlèbàh atà, tagòd' à atà: “Kapəhaw la sləm aña dza uwaga aya aw, ama lagwa kà dāw aŋkul!”⁴¹ Azlaməna matapla tazà à vok la slaka sawaray la marabay kà uwana azlayla atà la huma Zəzagəla kà mas ŋgərpa kà sləm aña Yesu, kà uwana Zəzagəla asəl kà tabasiŋ.⁴² Ŋgaha kəla mahənay tadà à huma à gay la matapla gay marabəz à azladza lakəl aña Yesu, uwana Zəzagəla afəl dzakwa à gəl, la mənğəy Zəzagəla la aku, ŋgaha la gày anik anik.

6

Takasani azladza məd'əf kà mazlak azlaməna matapla

¹ La kaslè uwana azlaməna matapla tasigla kà azla Yahudiya uwana tapəh gay Gərək la azlauwana tapəh gay gudən aŋatà tagòd': “Azlamis kuçda gami kà, tafà à atà sləm, à mok uwana tavàh tatak may aw”, tagòd'.² Kiya uwaga azlaməna matapla kulo gəl aŋha səla uwaga tahamà gay à azlaməna asik à vok gesina, ŋgaha tagòd' à atà: “Anu kà, akəs à anu à vok, kà anu aña masak à mapəh gay Zəzagəla, kà mad' à gay aña tatak may à abà aw.”³ Azladedə, tsatsəmàwni azladza məd'əf, uwana kasəlaw madz à ahən aŋatà la tataka aŋkul la abà, mahənlaga la Masasədok Zəzagəla ŋgaha azlaməna makor haŋkəli gə ləla. Ŋgaha məd'əbək à atà sləray aña tatak may uwaga à ahəl aŋatà.⁴ Ŋgaha anu kà, məslala vok aña mav vok gami gesina à madəv kuçda à abà la maz gay Zəzagəla à azladza.”⁵ Gay uwaga akəsà vok à azladza uwana tahamà gay à vok gesina. Takàsani azladza; Etiyen, uwana adahənlə la madiŋal gəl à vok, la Masasədok Zəzagəla: la Filip; Pərkor; Nikanor; Timon; Parmenas; ŋgaha Nikolas, zil Antiyəws uwana abəfla vok à tsəhay Yahudiya à abà dagay uwarà.⁶ La lig la ahən tapəhla atà à azlaməna matapla, kà atà aña madəv kuçda lakəl aŋatà la maðək à atà ahəl à gəl.

⁷ Gay Zəzagəla aslèhà gəl à ahən kaykay. Matugway aña azlaməna madiŋal gəl à vok azigən, asigla la Urusalima, ŋgaha azlaməna mav tatak à Zəzagəla aŋuwaw takəs madiŋ gəl à Yesu à vok.

⁸ Etiyen uwana Zəzagəla apis ala gay à vok kaykay, agà la ndzəda mənğa la tetəvi anja Zəzagəla la tsəh, adəhàhà azlanadzipo anik anik la tataka azladza la abà. ⁹ Azla Yahudiya anik tasàhà à wəŋ la Søren la Alekəsəndərə, la azlauwana tadəv kuɖa la gəy uwana la aku, tazalalla gəy anja azlamayà mapalla gə, la azla Yahudiya anik, uwana tasàhà à wəŋ la kutso Səlisəya ŋgaha la kutso Asəya, gesina anjata tabayà vok gay la Etiyen. ¹⁰ Ama taslala vok kà matsizlal à huma aw kà uwana Masasəɖok la uwana avəl haŋkəli. ¹¹ Kiya uwaga tasukw azladza kà atà anja magoɖay kà: “Mətsənəŋ apəh mawisiga lakəl anja Musa ŋgaha lakəl anja Zəzagəla.” ¹² La abatà tavədzàhà à tsəh azladza à afik, la azlamasiga ŋgaha la azlaməna mapəhla wakità mapəhay ala. Ŋgaha tahamà Etiyen à gəl, tadàlla à huma anja azlamasiga anjata. ¹³ Tadàla azlaməna sayda fidaga uwatà à awtəy babay kà mapəh fida lakəl anja: “Dza uwanay kà; asak à mapəh mawisiga lakəl anja mən gəy Zəzagəla gami, ŋgaha lakəl anja mapəhay anja Musa aw. ¹⁴ Mətsənəŋ agoɖ aya kà: “Yesu zil Nazaret uwaga adəkalah mən gəy Zəzagəla gami à ahən, ŋgaha adəbəɖla madz à ahən uwana Musa avà à anu,” agoɖ aya.” ¹⁵ Azladza uwana la gəy sawaray la aku gesina tatsək yewdi à Etiyen à gay, tanənəŋ kà huɖ adi anja kà kalkal la anja malika anja Zəzagəla.

7

Mapəhay anja Etiyen

¹ “Uwanay tapəh à ka vok ma haday ay?”, mən madzahaga anja azlaməna mav tatak à Zəzagəla agoɖ à Etiyen. ² Etiyen awulla à uda: “Azladedə la azlababa gulo, tsəbàw à gi sləm. Zəzagəla uwana mazləbayga apəhla vok à baba gami madzidziga Abəraham, à mok uwana agà la kutso Mesopotami, à mok uwana aləg maday kà madz à ahən la Karan. ³ Ŋgaha agoɖal:

‘Sà à uda la gudən anjak, la huɖ gəy anjak, həd, kadàdza à ahən la gudən uwana gəɖapəhakla!’^{*}

⁴ Kiya uwaga Abəraham asà à uda la kutso Kaldiya, ahəd kà madz à ahən la Karan. La lig anja mamətsay anja Baba anja la ahən, Zəzagəla adàlla à kutso uwanay à abà, kadzaw à ahən la abà lakana lagwa. ⁵ La abatà kà, bə slaka madin asik à ahən bay, kà abəzal aw. Ama Zəzagəla apəh à Abəraham à vok à abà kà mavəl kutso uwaga, agoɖal: ‘Gəɖəv à ka, ŋgaha mayyi à tsəh ala anjak la uwana adəkora’^{*} agoɖal, tekeɖika, Abəraham kà bəzi anja la ahən à mok uwatà aw. ⁶ Aganay uwana Zəzagəla apəh:

‘Mayyi à tsəh ala anjak adàdza à ahən la gudən dza la abatà, tadəgay azlamayà, ŋgaha tadətəɖəbəh atà tsərah à mavay dadərmokw ufaɖ.

⁷ Ama gəɖəɖah seriya à azladza uwana à gəl tadətəɖəb atà. La lig la ahən tadədiy anjata la abatà, tadəkəɖəɖ à gi à ahən la slaka uwanay lagwa.’^{*}

Zəzagəla agoɖ. ⁸ Kiya uwaga Zəzagəla akəs vok slawda la Abəraham, agoɖal kà:

‘Makəɖəv vok à uda la uwana masəlay anja makəs vok slawda uwaga.’

Gay gə la uwaga, Abəraham akəɖəv bəzi anja Isak à uda la lig mahənay mtəgis la ahən, kiya uwaga babay, Isak akəɖəv Yakuba à uda uwana akəɖəv azlabəza anja kulo gəl anja səla à uda bay. Atà la uwana takəslla azlatsəhay gami ala.”

⁹ “Azlaməna makosl anu uwaga tadəhən manor à deda anjata Yusufu à vok, taduw à azla Misəra ala kà anja mayà. Ama Zəzagəla agà la masla. ¹⁰ Zəzagəla anəŋla la ŋgərpa uwaga la abà gesina. Avà haŋkəli à Yusufu kà masla anja maɖəz mawoyəŋ, la vok matsiday la huma anja Faruna, sufəl anja Misəra. Masla la uwana afà à Yusufu à ahən kà gumna anja makoray Misəra, ŋgaha lakəl anja huɖ gəy anja gesina. ¹¹ Mok uwatà kà, may mənğa adzəkà à vok la kutso Misəra la Kanana gesina. Ŋgərpa agà mənğa, ŋgaha azlababa gami madzidziga tabəzà tatak may kà mazuway aw. ¹² Mok uwana Yakuba atsənəŋ kà tatak may la ahən la makoray Misəra kà, asləl azlababa gami asik tekula dadən. ¹³ Maday kà masəla uwana tahəd kà, Yusufu apəhla vok à azladedə anja, ŋgaha Faruna asəl kà azlauwaga kà huɖ gəy anja Yusufu. ¹⁴ La abatà Yusufu asləl atà kà mazala baba anja Yakuba, la azladza gesina uwana la huɖ gəy anja, gesina anjata taslà dza dzik məɖəf gəl anja zlo. ¹⁵ Kiya uwaga Yakuba ahəd à kutso Misəra à slaka uwana aməts à abatà, la azlababa gami madzidziga bay. ¹⁶ Talàh atà kà à Səsem à zəway uwana à agu Abəraham asukw la gursu, la slaka anja tsəhay Hemor.”

¹⁷ “Mok uwana kasl adaslay, kà Zəzagəla anja mahən mapəhay anja uwana ala, adəhən la Abəraham, tsəhay gami ayyà à tsəh anuwaw la kutso Misəra. ¹⁸ Ŋgaha sufəl mawga uwana asəl Yusufu aw adzəkà makor gudən uwaga. ¹⁹ Sufəl uwatà avavərəhà tsəhay gami, afàhà à atà leri à gəl kà mamal azlabəza ala, kà azlabəza anja mamats

* 7:3 7.3 1Musa 12.1

* 7:5 7.5 1Musa 12.7

* 7:7 7.7 1Musa 15.13-14

à gay. ²⁰ La zamana uwatà la uwana tayya Musa, uwana bəzi mahədayga. Zəzagəla awoyəñ. Tanəñla tsərəh à təla makər la huf gəy aña baba aña. ²¹ Mok uwana taməl à uda, dugu aña Faruna azəb, adzadzər bokuba mayyay aña. ²² Kiya uwaga Musa adzəñ atsətsehà ala la azlatatak gesina uwana azla Misəra tasəl, ñgaha agà maslay gə la gay la abà, ñgaha la sləray aña la abà gesina.”

²³ “Mok uwana mavay aña adaslay dzik ufađ kà: ‘Gəday, gədənəñ azlaməna gulo azla Isərayel à gay’, Musa agòđ. ²⁴ Anəñà zil Misəra atərəb tsəhay aña, abəđ à huma kà mazlakəñ dza uwana tətərəbəñ, apəl goder, akəđ zil uwaga. ²⁵ Musa adzəgw kà azladedə aña tadəsəlay kà: ‘Zəzagəla akəs mapəl atà ala tadəgoday’, agòđ, la mazlak atà aña, ama tatsənà godega aña aw. ²⁶ La bəñ gə Musa abəzà azla Isərayel səla à gəl tazlāb vok, asəl kà masəl à atà à vok. Agòđ à atà: ‘Azladedə, tsa akul la dedə ma, kà mana katərəbaw vok kà akul à akul ma?’ ²⁷ Ama dza uwana atərəb anik uwanay, adəkà Musa la vok ala, agòđal: ‘Uwa afà à ka à ahəñ mənğa banaw kà masla seriya lakəl gami uwa?’ ²⁸ Awma asa à ka makəđ gi, bokuba uwana kakəđ zil Misəra lakuhu kəlay?’ ²⁹ Uwana Musa adatsən gay uwaga kà, ahòy aña, ahəd, adzà à ahəñ la kutso Madiyan. La abatà abəzà azlabəza zilga səla.”

³⁰ “La lig aña mavay dzik ufađ la ahəñ, la mok uwana Musa la fəta aña gudəñ Sənyayi kà, malika aña Zəzagəla asà à wañ, apəhla vok à Musa la aləh aña akəl uwana ababəhay la tsewwagay la abà. ³¹ Uwana adanəñ tatak uwaga kà, ləv avələl à gay. Ama bokuba uwana azà à vok à awtəy nekwa kà manərəziñ ala kà, kuda aña Sufəl Zəzagəla atsən la abà, agòđ:

³² ‘Gi Zəzagəla aña Abəraham, aña Isak ñgaha aña Yakuba, aña azlababa aña madzidziga uwaga.’^{*}

Musa adzəkà masukulay dawdadaw kà guba, ñgaha aslāla vok kà manərəziñ ala aya aw. ³³ Kiya uwaga Sufəl Zəzagəla agòđal:

‘Sərətəh kwimik aña la asik ala, kà uwana slaka uwanay kak la abà kà, kutso tsikaslaga, kokufa àlāh.

³⁴ Gədanəñ ñgərpa aña azlatsəhay gulo la Misəra. Gədatəñ mabas vok añağà ñgaha gəsà à ahəñ kà mapəlla atà ala. Lagwa kà, sà à wañ, gəsəl ka à Misəra.’^{**}

³⁵ “Sələw azladedə, azla Isərayel takweskà Musa la magòđal: ‘Uwa à uwana afà ka à ahəñ, kà mənğa, ñgaha kà masla seriya uwa’, tagòđal. Ama bə la uwaga kà, la lig la ahəñ Zəzagəla asləl à slaka añağà kà magay mənğa añağà, ñgaha kà mapəlla atà ala, la ndzəfa aña malika uwana apəhalla vok la tsewwagay la abà. ³⁶ Masla la uwana asəlla azladzə à uda la Misəra la madəhəh azlaməsəlay la azlanadziyo anik anik la abatà, ñgaha la gay dərəv mativga, ñgaha la fəta la abà, tsərəh à mavay dzik ufađ. ³⁷ Bə Musa uwaga aya gotənəñ, la uwana agòđ à azla Isərayel: ‘Zəzagəla adəsəl à akul masla mapəhal gay à ahəl anik à wañ bokuba gi, uwana adəsə à uda la tsəhay añağul la abà.’ ³⁸ Musa gə la uwaga à uwana adzà à ahəñ la mahəm à ahəñ aña Isərayel la fəta la abà; agà la azlababa gami madzidziga, ñgaha la malika uwana abadəlmə la gudəñ Sənyayi la afik. La abatà la uwana abəzà à azlagay uwana tavə sifa, la slaka Zəzagəla kà mav à anu.”

³⁹ “Ama azlababa gami madzidziga takəs uwaga aw, takweskà, tayəh mawul añağà à Misəra. ⁴⁰ Tagòđ à Haruna: ‘Dahà à anu azlazəzagəla uwana taguwa à anu à huma, kà uwana məsəl tatak uwana abəzà à Musa, uwana asəlla anu à uda la Misəra aw.’

⁴¹ La mavakay uwatà tadəhəh vèlik luwəluwə, ñgaha tavəl tatak. Tarəb mənğa lakəl aña sləray aña ahəl añağà. ⁴² Ama la lig aña uwaga la ahəñ, Zəzagəla aguwa à atà ala lig à gay, asək à atà kà masləkaw azlatsetsiliñ uwana la zagəla, bokuba uwana tatsətser à wakità aña azlaməna mapəh à atà gay à ahəl à abà:

‘Akul, tsəhay Isərayel kà añağulo, à uwana kakəđaw azlatatak anik anik la mav tatak anik takay? A mavay dzik ufađ uwaga la fəta la abà ay?’

⁴³ Awañ, kazəbəw gəy lukut aña Molokw mazlazlay añağul, ñgaha kazəbəw maftsa à vok aña tsetsiliñ kà aña Refan, mazlazlay añağul. Azlamazlazlay uwana kà kadəhəw atà kà masləkaw atà. Gay gə la uwaga gəđəza akul kərkər la Babila.’^{***}

⁴⁴ Gotənəñ Etiyen adà à huma à gay, agòđ: “Mok uwana azlababa gami madzidziga tadzà à ahəñ la fəta la abà, tagə la gəy lukut, uwana tadəw à sahar aña makəs vok slawda à gəl, kà atà aña masəlay kà Zəzagəla agà la tataka añağà la abà. Gəy uwatà kà tadəhəñ kà, bokuba uwana Zəzagəla apəhla à Musa, kà madəhəñ kalkal la uwana anəñəñ. ⁴⁵ La lig la ahəñ, azlababa gami tavə gəy lukut uwaga à mayyi à tsəh ala añağà. Mayyi à tsəh ala uwaga kà Josu'e la uwana aguwa à atà à huma kà, mazağ kutso aña azlatsəhay anik, uwana Zəzagəla akudək à atà la huma añağà. Gay gə la uwaga, gəy

lukut adzà à ahənj la gudənj la abà tsərəh à zamana anja sufəl David. ⁴⁶ David abəzà vok mahamay anja Zəzagəla, adəval kufda, kà masla anja mabəzal tetəvi kà mañlal mənə gəy Zəzagəla à Zəzagəla anja Yakuba. ⁴⁷ Ama Salomon la uwana anjalal uwaga pəra.”

⁴⁸ “Tekedika Zəzagəla uwana la zagəla la afik, adza à ahənj la gəy uwana la aku azladza tarjalal aw. Bokuba uwana masla mapəhal gay à ahəl apəh. Sufəl Zəzagəla agəf kà:

⁴⁹ ‘Zagəla kà kursi gulo, kutsə kà slaka maf à asik gulo à ahənj. Tsəhay gəy ma uwala à uwana karjalaw à gi la? Slaka ma uwala asla kà gi anja maduw ləv la abà la?

⁵⁰ Gi la uwana gədfahənj azlatatak uwaga gesina aw takay?”⁵⁰

⁵¹ “Haday, aku azlaməna madzadzənjəh gəl ala, ləv ankul la sləm ankul kà, asa à atà matsən gay anja Zəzagəla dikidiki aw! Kakwesaw kà Masasəfok anja Zəzagəla koksi-koksi, bokuba anja azlababa ankul. ⁵² Azlaməna mapəh à atà gay à ahəl, azla ma uwala, azlababa ankul madzidziga tatərbəh atà aw la? Atà tatakəfəh azlauwana, tasà à wənj kà maz mas à wənj anja dza dziriga lagonay bay, kà masla la uwanay katəwwal kaf à gəl, ngaha kakəfəw. ⁵³ Tekedik kà aku kà, Zəzagəla avà à aku mapəhay la ahəl anja azlamalika, ama kakəsaw aw.”

Makəf Etiyen la akur

⁵⁴ Uwana maham à ahənj anja azlaməna sawaray tatsən gay uwaga kà, tapəf slif la tsəh ala, tapakəh ləv mənəga lakəl anja Etiyen. ⁵⁵ Ama Etiyen uwana mahənla ala gə la Masasəfok Zəzagəla, adzilə yewdi à zagəla, anənə mazləbay anja Zəzagəla, la Yesu matsizl à ahənj gə la ahəl kaf anja Zəzagəla lakəl. ⁵⁶ Etiyen agəf: “Tsəbawwal sləm: Gənənə zagəla kà zagəla mapəzlla ama ala gə, ngaha Kona anja dza dzawwa la ahəl kaf anja Zəzagəla lakəl.” ⁵⁷ Tawiyə la ndzəfa kà makəfal gəl à ahənj la manakəh à sləm à ama. Gesina anjatà tahamàl à gəl. ⁵⁸ Tabayənj à uda la gudənj la abà, ngaha tadzəkə matsahay la akur kà makəfəw. Azlaməna makəfəw tahamà lukut anjatà à slaka bəzi kohana, uwana sləm anja Sawul. ⁵⁹ Uwana tatsahay la akur kà Etiyen, adəv kufda kiya uwanay: “Sufəl Yesu, gəmətsay kà à ahəl anək à afik!” ⁶⁰ Ngaha akəfəf à ahənj, azà kufda à zagəla awiyə: “Sufəl, katugw uwaga bokuba tsakana lakəl anjatà aw!”, agəf. La mapəh gay uwaga la gay ala, aməts.

8

¹ Makəf Etiyen kà, akəs à Sawul à gəl.

Sawul atərbə azlaməna gay Zəzagəla

La mavakay uwatà, matərbəbay mənəga adzəkə à vok lakəl anja maham à ahənj mənə gay Zəzagəla la Urusalima. Gesina anjatà tasləhə gəl à ahənj la kuto Yahudiya ngaha la Samariya. Say azlaməna matapla pəra tatəm à Urusalima. ² Ama azladza dziriga talə Etiyen, ngaha tatuw mənəga. ³ Sawul awəf vok à uda kà mabəzl gəl à maham à ahənj mənə gay Zəzagəla à abà; adəhəh gəy la gəy, kà makas azlaməna madijal gəl à vok, azlazil la azlamisga gesina, kà mawats atà à danəy.

Azlaməna Samariya tatsənənj gay marabənj

⁴ Azlauwana tasləhə gəl à ahənj kà, tauguzəhəh la kutso gesina kà maz gay marabənj. ⁵ Filip ahəd à Samariya, ngaha azà gay anja Kristu à azlaməna madz à ahənj la gudənj uwatà. ⁶ Maham à ahənj dza takəs gay anja Filip à mok uwana tatsənənj ngaha tanənjənj azlanadzipo uwana adəhəhənj. ⁷ La kità azlamasəfok mawisiga tasəhə à uda la azlaməna fuvats la abà anjəwəw anja mawiyay, ngaha azlamagul à afik gə, la azladeri tawarə ala bay. ⁸ Marabəy mənəga apakə vok la gudənj uwatà.

⁹ Dza anik la ahənj, dagay uwarə la gudənj uwatà, sləm anja Səmon. Masla kà avələh ləv à azladza à gay la Samariya la məzla anja. Masla kà: “Gi mənə dza”, agəf. ¹⁰ Gay gə la uwaga azladza la gudənj uwatə gesina, azlauwana azlamənjga tagəf à atà, la azləbəzaga gesina, tasləkəw masla, tagəf kà: “Masla la uwana ndzəfa anja Zəzagəla uwana tazəlalla ndzəfa mənəga gə.” ¹¹ Tasləkəwəh masla mənəga kà uwana avələh ləv à azladza à gay la məzla anja dagay uwatà. ¹² Ama mok uwana tadinj gəl à gay marabənj uwana à vok, Filip azənj lakəl anja makoray Zəzagəla, ngaha lakəl anja sləm anja Yesu Kristu kà, tabəzə batem, azlazil la azlamis. ¹³ Səmon la gəl anja bay, adinjal gəl à vok, abəzə batem, adzà à ahənj la slaka Filip, ngaha ləv avələhəl à gay mənəga la manənj azlamasəy la azlanadzipo uwana Filip adəhəhənj.

¹⁴ Azlaməna matapla la Urusalima tatsənənj kà azladza la Samariya takəs gay anja Zəzagəla kà, tasləl à atà Piyer à awtəy atà la Yuhana. ¹⁵ Mok uwana tabəzə à Samariya kà, tadəv kufda kà anja azlaməna madijal gəl à vok kà atà anja mabəz Masasəfok

Zəzagəla. ¹⁶ Kà uwana Masasəđok Zəzagəla adasa à ahəñ, bamərika à gəl aña tekuła añaṭà dadəñ aw, tabəzà batem la sləm aña Sufəl Yesu dadəñ pəra. ¹⁷ Gay gə la uwaga à uwana, Piyer atà la Yuhana tabək à atà ahəl à gəl, ɲgaha maβəz Masasəđok Zəzagəla.

¹⁸ Mok uwana azlaməna matapla tabək à atà ahəl à gəl kà, Səmon ayəh maβək sili à azla Piyer atà la Yuhana. ¹⁹ Agəđ: "Vəw à gi ndzəđa uwaga babay suwan, kà kəla uwabeyuwi uwana gəđəbəkəl ahəl à gəl aña maβəz Masasəđok Zəzagəla." ²⁰ Ama Piyer awuləlla: "Zəlla la sili aña k, kà uwana kadzugw kà: Mavəy aña Zəzagəla kà tasukway la sili, kagəđ. ²¹ Humà gə aña k, kà uwana ahəñ, la gay uwanay la abə aw. Kak kà, kak la sləray gami la abə aw, kà uwana ləv aña k la dziriga la huma Zəzagəla aw! ²² Pəh gay la ləv ala kà mawisiga aña k uwaga, dəv kuđa à Sufəl, zlahaw kà masla amatsakan ala tsəhay madzugway aña k uwaga tak. ²³ Kà uwana gəñəñəñ kà kadahən ala la mawisiga dəhakaka, ɲgaha kak mayə aña tsakana." ²⁴ Kiya uwaga Səmon agəđ à Piyer atà la Yuhana: "Kamkam, dəvəw kuđa à Sufəl kà gi, kà gay uwana kapəhəw à gi aña maβəz à gi aw!"

²⁵ Piyer atà la Yuhana tapəh sayda aña Sufəl Yesu la maz gay marabəñ la Samariya, ɲgaha tawulà à Urusalima. La tetəvi añaṭà la ama kà, tapəhəh gay marabəñ lakəl aña Yesu la azlabəza gudəñ uwana la kutso Samariya la abə gesina.

Filip atà la slawpara aña məñ sufəl misga la Etiyopiya

²⁶ La lig aña uwaga la ahəñ, malika aña Sufəl Zəzagəla apəhla vok à Filip, agəđfal: "Filip, sà à afik, wul à gəl à agu, à tetəvi uwana à ama asà à uda la Urusalima ada à Gaza." Tetəvi uwana tetəvi kəsaf. ²⁷ Filip atsiləla ala, ahəd. Tagagəm à tetəvi à ama la dza anik. Dza uwatà kà zil Etiyopiya, subaga, slawpara aña Kandantse, məñ sufəl misga la Etiyopiya. Asà à Urusalima kà masləkəw Zəzagəla. ²⁸ Agə la tetəvi mawul à mtəga aña la tsəh, la dərkwə aña la afik, adzəñay la wakitə aña masla mapəhal gay à ahəl Yesayya la abə. ²⁹ Masasəđok Zəzagəla agəđ à Filip: "Həd à slaka aña, zà à vok à slaka aña dərkwə aña!" ³⁰ Filip azà à vok à slaka aña la mahoyay, ɲgaha atsənà zil Etiyopiya uwaga adzəñay la wakitə aña masla mapəhal gay à ahəl Yesayya la abə. Anavəl à gay la: "Katsənə uwaga kadzəñay ay?" ³¹ Kona uwaga agəđfal: "Kakay gətsənəñ à baña dza adəpatgəla godega aña aw ma? Sà à wan à slaka gulo à dərkwə la afik", agəđ à Filip. ³² Aganay à slaka uwana adzəñ la wakitə la abə:

'Agə bokuba tuwan uwana tadəla à makəđfay, bokuba bəzi tuwan uwana atuway à baña tatsəđ aña aw.

Kiya uwaga məslək, apokwə gay aña aw.

³³ Tapəsəw, takəl ala ziruwi à gəl, tadəkwal ala seriya à gəl kà deyday pəra.

Uwa à uwana adəslala vok aña matugway lakəl aña tsəhay aña uwa?

Kà uwana takəđ à gəl à sifa aña la gudəñ la vok.*

³⁴ Slawpara uwaga anavə Filip: "Kamkam, pəhəgəla lakəl ma aña uwa masla mapəhal gay à ahəl apəhay uwa? Apəhay ma lakəl aña, awma lakəl aña dza anik ay?" ³⁵ Filip adzəkə lakəl aña uwana dza uwaga adzəñay la wakitə la abə, azəla gay lakəl aña Yesu.

³⁶ Uwana taday, taday kà, tabəzà à iyaw à vok, la abatə slawpara agəđ: "Tsa iyaw la uwanay, ma mana à uwana adəđ à gi gay à ahəñ kà maβəz batem ma?" ((³⁷ Filip agəđfal: "Baña kadiñal gəl à vok la ləv aña k gesina kà, kaslala vok kà, maβəz batem." Kona uwaga awuləlla: "Gədiñal gəl à vok, kà Yesu Kristu kà Kona aña Zəzagəla.")) ³⁸ ɲgaha la abatə: "Tsiləla dərkwə à ahəñ", agəđ à magamza aña. Filip atà la slawpara tasə à ahəñ, tahəd à iyaw à abə, ɲgaha Filip adəhəlla batem. ³⁹ La mok uwana tasə à uda la iyaw la abə kà, Masasəđok Sufəl Zəzagəla azəbə Filip ala dzəgasl. Slawpara anəñəñ aya aw, ama adə aña la marabay. ⁴⁰ Batsərə kà, Filip anəñla kà agə la Azot. Kiya uwaga aguwhə la azlagudəñ la abə gesina, kà maz gay matsiđayga la slaka gesina tsərah uwana abəzə Zəsare.

9

Mapəh gay la ləv ala aña Sawul

¹ La mok uwatə, Sawul asakə matərəbəñ la makəđ azlaməna matapla la slaka Sufəl Yesu aw. Ahəd à slaka məñ madzahaga aña azlaməna mav tatak à Zəzagəla. ² Anavə patanti, kà aña gəy madəv kuđa la Damas, kà makas azladza uwana tanəfa Yesu, azlazil la azlamis gesina, kà madla atə à Urusalima.

³ Mok uwana adəbəz à patanti uwaga kà, atsiləla ala, kà mad à Damas. La tetəvi la ama, uwana azlabəzay, katskats məñ udəka asà à ahəñ la zagəla, aùđ la slaka aña.

⁴ Atəđ à vəđah, ɲgaha atsənə kəda uwana agəđfal: "Sawul, Sawul, kà mana katərəb

gi ma?" ⁵ Anəv, agòdɒl: "Kak uwa, Sufəl?" Kuda uwaga agòdɒl: "Gi Yesu uwana katəərbəŋ." ⁶ Ama agòdɒl: "Sà à afik, hàd à gudəŋ à abà, la abatà la uwana tadəpəh à ka uwana kadàdfehəŋ." ⁷ Azlaməna mauguzahay atà nna tagudəkàhla, taslàla vok kà mapokw gay aw, tatsənà mabədmə, ama tanəŋà dza aw. ⁸ Sawul asà à afik la vədəf, apəzl yewdi, ama aslàla vok kà manəŋ tatak aw. Takəs à ahəl kà madla à Damas. ⁹ Tsərah mavakay maker; aslàla vok kà manəŋla aw, azlūv ŋgaha asà tatak babay aw.

¹⁰ Masla asik anik la ahəŋ la Damas uwana sləm anəha Ananiyas. Sufəl Zəzagəla apəhal la masasiŋay, agòdɒl: "Ananiyas, Ananiyas!" "Awway, gi la uwanay, Sufəl gulo", Ananiyas agòdɒl. ¹¹ Sufəl Zəzagəla agòdɒl: "Katskats, hàd lagonay à bəzi barama tərrega à ama. Lakay anə Yudas, dza uwana sləm anəha Sawul zil Tarsus, adəv kuɒa lagwa, dənəv. ¹² Kiya uwaga la masasiŋay kà, Sawul anəŋà dza anik, uwana sləm anəha Ananiyas adà à gəy kà mabəkəl ahəl à gəl, kà masla anə manəŋla aya." ¹³ Ananiyas agòdɒl: "Sufəl, azladza anjūvaw tapəh à gi lakəl anə dza uwaga, lakəl anə uwana adəhəŋ à azlaməna manəfay anək à vok la Urusalima. ¹⁴ ŋgaha asà à wəŋ à abanay la patanti, uwana la ahəl azlamadzahaga anə azlaməna mav tatak à Zəzagəla la Urusalima tavəl, kà makas azladza uwana tatsəl sləm anək à gay." ¹⁵ Ama Sufəl Zəzagəla agòdɒl: "Həd, kà uwana gədazəb masla, ŋgaha gədəpakəŋ ala, kà masla mapəhla gi ala, la slaka azlatsəhay anik anik, la azlasufəl anətə, ŋgaha la tsəhay Isərayel. ¹⁶ Gi la gəl gulo gədəpəh ala ŋgəra uwana adəsay kà gi."

¹⁷ Kiya uwaga Ananiyas ahəd, adà à gəy uwatà à agu, abək ahəl à Sawul à gəl, agòdɒl: "Deda Sawul, Sufəl Yesu uwana apəhakala vok la tetəvi la ama à uwana katsà à wəŋ, masla la uwana asləl gi à wəŋ, kà kak anə manəŋla aya, ŋgaha kà kak anə magay mahənlaga la Masasədok Zəzagəla." ¹⁸ Katskats tatak anik bokuba mafəfətay anə kilfi anis à Sawul la adi ala, ŋgaha anəŋla aya. Hadzak, asà à afik ŋgaha tadəhalla batem. ¹⁹ La lig la ahəŋ azlūv tatak may, ŋgaha abəzà à ndzəɒa aya.

Sawul apəh gay Zəzagəla la Damas

Sawul asəf la azlaməna madiŋal gəl à vok ŋuv la Damas. ²⁰ Katskats adzəkà mapəhəh gay Zəzagəla la azlagəy madəv kuɒa la aku, la mapəhla ala, kà Yesu kà Kona anə Zəzagəla. ²¹ Azladza uwana tatsəbal sləm gesina, ləv avələh à atà à gay, tagòd: "Uwaga kà dza uwana atəərbəhà azladza la ndzəɒa la Urusalima, azlauwana takəs gay anə Yesu aw takay? ŋgaha asà à wəŋ à abanay kà anə makas atà la madla atà à mən madzahaga anə azlaməna mav tatak à Zəzagəla aw takay?"

²² Ama Sawul azəŋ la ndzəɒa koksikoksi la mad à huma à gay, azla Yahudiya uwana tadzà à ahəŋ la Damas, tasəl uwana tawuləlla aya à mok uwana apəhatəla kà Yesu kà Kristu aw.

²³ Uwana adasafni kà, azla Yahudiya takəs sawaray kà makəɒay. ²⁴ Ama atsənà uwana tatsənəŋ à vok kà madəhalləŋ à vok. Kəla mavakay la mahəŋay tanəŋla gay gamagəy anə huɒ gudəŋ kà makəɒay. ²⁵ Kiya uwaga la vəd vərđi anik, azlaməna asik anə tazəb, tafà à takosà à abà, tadzilə à ahəŋ la gəl zlagam, uwana takəslla gay à huɒ gudəŋ à adi.

Sawul la Urusalima

²⁶ Mok uwana Sawul adawul à Urusalima kà, ayəh maham gay à vok la azlaməna matapla; ama guba akəs à atà gesina, kà uwana tadiŋal gəl à vok, kà masla ndzer kà adapaka masla manəf Yesu aw. ²⁷ Ama Barnabas akəs à tsəh, adəlla à slaka azlaməna matapla la slaka Yesu, ŋgaha atūgw à atà godega manəŋ Sufəl Yesu anə Sawul la tetəvi la ama, ŋgaha la uwana Sufəl Yesu abəɒalmə. Apəh à atà gay lakəl anə mawəɒ vok à uda anə Sawul uwana azə gay anə Yesu la Damas aya. ²⁸ Dayay kaslə uwatə kà, Sawul adà à atà à adi, tauguzəhəh la gudəŋ Urusalima kà maz gay anə Sufəl Yesu. ²⁹ ŋgaha apəhəh à azla Yahudiya uwana tapəh gay Gərək la mabay vok gay la atà babay, ama atà kà, tayəh kà makəɒay. ³⁰ Mok uwana azladedə tatsən uwaga kà, talakà Sawul à Zəsare, ŋgaha tasləl à Tarsus.

³¹ Kiya uwaga azlaməna madiŋal gəl à vok la kutso Yahudiya, la Galili, la Samariya gesina tadzà à ahəŋ la lapiya, kokuɒa matəərbəy. Tadzərbəh ala, tadzà à ahəŋ la mahoy à adi anə masləkaw Sufəl Zəzagəla la abà, tasəg ala la mazlakay anə Masasədok Zəzagəla.

Mawurla anə Ene

³² La kaslə uwatə Piyer auguzəhəh la azlagudəŋ la abà gesina. Vərđi anik, ahəd à slaka azlaməna madiŋal gəl à vok uwana tadzà à ahəŋ la Lidda. ³³ La abətə dza anik uwana sləm anəha Ene la ahəŋ. Magul à afik gə dagay mavay mtəgis agə la slaka mahən à ahəŋ. ³⁴ Piyer agòdɒl: "Ene, Yesu Kristu awur ka ala! Sà à afik, kakəl slaka mahən à ahəŋ anək à abà!" Hadzak Ene asà à afik. ³⁵ La abətə azlaməna madz à ahəŋ la Lidda

ngaha la azlauwana la vaday Saron tanəhənəŋ gesina anjatà tapəh gay la ləv ala la huma anja Sufəl Yesu.

Mawulla Dorkas à uda

³⁶ Mis anik la ahəŋ la Yope sləm anja Tabita, (Sləm uwaga la gay Gərək Dorkas, uwana asal magoɔɔy Pəkur) Masla kà aɔahàhà azlaslëray dzəba anja səla aw gə la mazlakay kuda. ³⁷ La kaslā uwatà ɔuvats akəs, ngaha aməts. La mok uwana tapəlal vok kà, tahənəŋ à gày, uwana à agu lakəl anja gày anik. ³⁸ Uwana azlaməna madinjal gəl à vok la Yope tatsənəŋ kà Piyer la Lidda, nekwa la gudəŋ uwaga kà, taslələl azladza səla à tsəh la gay: “Mədəv à ka kufa, sà à wəŋ à mtəga gami la katskats.” ³⁹ Piyer anəfà à atà la katskats. Mok uwana tabəzà awtəy kà, tadàla à gày uwana à afik tahənəŋ à agu. Azlamis kufa gesina tadà à awtəy à slaka anja la mataway; tapəhalla azlanenewi, ngaha la azladebdebi uwana Dorkas atsàh à mok uwana aləg la sifa. ⁴⁰ La abatà Piyer akudəfəkàh azladza à uda, ngaha akəɔɔfəd à ahəŋ, adəv kufa, agolà à huma à slaka mazimnekid: “Tabita, sà à afiki”, agəɔɔfal. Tabita apəzl yewdi, uwana anəŋà à Piyer à adi, asà à afik, adzà madzay. ⁴¹ Piyer akəs à ahəl, ngaha azlakəŋ kà matsizlənəŋ ala. La lig la ahəŋ Piyer azlā azlamis kufa la azlaməna madinjal gəl à vok, apəhatàla kà agay la sifa. ⁴² Uwaga asəlla à vok la Yope gesina, ngaha azladza anjувav tadin gəl à Sufəl Yesu à vok. ⁴³ Piyer kà asəf mənŋa la gudəŋ Yope la mtəga anja Səmon, masla masad zlap.

10

Piyer la mtəga Korneliyus

¹ Dza la ahəŋ la Zəsare, sləm anja Korneliyus, masla kà zil Rom, mənŋa anja azlaslodzi dzim anja maham à ahəŋ slodzi, uwana tazalal ala maham à ahəŋ Italiya. ² Masla awoyà Zəzagəla, asləkəw Zəzagəla la azlaməna huɔf gày anja gesina. Azlākàh azlaməna kufa uwana azlatsəhay Yahudiy, ngaha adəv kufa à Zəzagəla koksikoksi. ³ La gay mokokhu vərđi anik la sa makər, masasinjəy asasinjəla, anəŋà malika anja Zəzagəla adagay à slaka anja ngaha agəɔɔfal: “Korneliyus!” ⁴ Anəŋəz malika la masukulay, ngaha agəɔɔfal: “Kak uwa, Sufəl gulo?” Malika awuləlla: “Zəzagəla adatsən madəv kufa anjak la mazlakəh azlaməna kufa anjak, ngaha lagwa kà kawullal à gəl. ⁵ Lagwa kà, sləl azladza à Yope kà mazal Səmon uwana ‘Piyer’, tagəɔɔfal. ⁶ Ahənəy kà la mtəga Səmon masla masad zlap, uwana gày anja kà la gay dərəv.” ⁷ Mok uwana malika uwaga abadəfalmə, adada anja kà. Korneliyus azəl azlamagamza anja səla, la slodzi tekula uwana anəhəl, masla bay, awoyà Zəzagəla. ⁸ Atəgəw à atà uwana apakà vok gesina, ngaha asləlla atà à gudəŋ Yope. ⁹ Kiya uwaga tatsizlla ala, tahəd à Yope. La bebəŋ gə, mok uwana tazlabəz Yope kà, Piyer bay kà, ahəd à gəl gày à afik kà madəv kufa la tataka afats. ¹⁰ May akəs Piyer, asəl mazuw tatak may. A mok uwana tadzəkà matal tatak, à uwana masasinjəy asasinjəla. ¹¹ Anəŋà zagəla apəzlla vok, ngaha tatak anik asà à ahəŋ: Magol mən tagəgə bokuba peteli gay dzika uɔad mawad à ahəŋ ala gə, afà à vok à vəɔɔh. ¹² La huɔf anja kà kəla tsəhay tatak asik uɔad la abə gesina, la azlatatak uwana taday la huɔf, ngaha la azlatsəhay tatak uwana tahoyay gesina. ¹³ Ama Zəzagəla agəɔɔfal: “Sà à afik, kakəɔɔf, ngaha pəɔf zlə, Piyer!” ¹⁴ Ama Piyer agəɔɔf: “Awan, kiya uwaga aw, Sufəl gulo, kà uwana ɔikidiki gəɔɔpəɔf tatak əlāhga aw, asləh!” ¹⁵ Agəɔɔfal aya: “Kapakəŋ ala bokuba əlāhga à uwana Zəzagəla adapakəŋ ala tsidəŋa aw.” ¹⁶ Uwaga aɔahà vok asik makər, ngaha la lig la ahəŋ la kirim yewdi tatak uwaga awul à zagəla.

¹⁷ Piyer adzəgəw godega anja uwana masasinjəy uwaga asəl mapəhalla. Ama la kaslā uwatà kà, azlaməna masləlay anja Korneliyus tanavəhay la slaka azladza: “Lala à gày anja Səmon masla masad zlap la?”, tagəɔɔɔy. Tsa mok uwaga kà, atà la gay gamagəy anja. ¹⁸ Tazələh, ngaha tanəv: “La abanay à Səmon uwana tazalalla Piyer ahənəy ay?” ¹⁹ Piyer aləg la madzugway anja masasinjəy uwaga la abə, uwana Masasəɔɔk Zəzagəla agəɔɔfal: “Nəhəŋ, azladza makər la uwaga tayəh ka la gay gamagəy la uda. ²⁰ Sà à afik, dā à ahəŋ, kadaw akul nna, kokudə matsurəkway, kà uwana gi la uwana gəsləlla ka atà à wəŋ!” ²¹ Piyer asà à ahəŋ à slaka azladza uwaga, ngaha agəɔɔf à atà: “Gəga la uwanay à uwana kayahaw gi. Mana kasawka à wəŋ ma?” ²² Tagəɔɔfal: “Məsà à wəŋ kà, Korneliyus mənŋa anja azlaslodzi dzim, la uwana asləlla anu à wəŋ. Masla kà dza dziriga, uwana azləb Zəzagəla, uwana azla Yahudiya gesina kà: ‘Dza’, tagəɔɔfal. Malika anja Zəzagəla apəhal gay, kà masla anja mazala à ka, kà kak anja mapəhal uwana asa à ka mapəhal.” ²³ Ngaha Piyer adàla atà à gày, avà à atà slaka mahən à ahəŋ. La bebəŋ gə, takəs tetəvi, tahəd atà nna. Azladedə anik, la tataka azladza la abə la Yope, talakà à atà. ²⁴ La bebəŋ gə aya tabəzà Zəsare. Korneliyus babay kà adahama gay azladza à vok la azlahuɔf gày anja gesina kà makud atà. ²⁵ Uwana Piyer adà à gày kà, tagəgəm la Korneliyus, atəɔf à huma anja, akəɔɔfəd la ahəŋ. ²⁶ Ama Piyer akəs à afik la magəɔɔfal: “Sà à afik, gi

kà bə gi dza kiya kak bay.”²⁷ Kiya uwaga tadà à huma à gay la mabəđma la abà la Korneliyus, ŋgaha tsərah à uwana tahamà gay à vok takuday.²⁸ Agòđ à atà: “Kasəlaw kà zil Yahudiya aŋa madz à ahəŋ la azlatsəhay anik, kà zlazladə, ama Zəzagəla apəh à gi kà gəpak tsəhay dza anik ala kà àləhga, gəda à gəy aŋha aw, gəgəđay aw.²⁹ Gay gə la uwaga mok uwana kazaləw gi kà, gəsa à waŋ kokuđa madzurəkway. Lagwa ma, kà mana kazaləw gi mi?”

³⁰ Korneliyus awulalla: “Adagay mahənay ufađ lakana, bə la kaslə uwanay gəđəw kuđa la mtəga gulo la sa makər aŋa mokokhu. La kirim yewdi kà, dza anik adatsakwàh la lukut mawutsəđay gə la vok la huma gulo.³¹ ŋgaha agòđ à gi: Korneliyus, Zəzagəla atsənà madəw kuđa aŋak, ŋgaha mazlakay aŋak uwana kazlakàh à azlaməna kuđa adawullal à gəl.³² Lagwa kà, sləl azladza à Yope kà mazal Səmon uwana tazalalla Piyer. Adza à ahəŋ la mtəga Səmon, masla masəđ zlap, uwana gəy aŋha la gay dərəv.³³ Katskats gəsləl azladza à awtəy, kà mazal à ka. Kadəhəŋ delga la mas à waŋ aŋak. Lagonay kà, anu la uwanay gesina gami la huma aŋa Zəzagəla, kà matsəb sləm à uwana Sufəl apəh à ka, kà mapəh à anu gesina zlə.”

Mapəhay aŋa Piyer la mtəga Korneliyus

³⁴ Piyer adzəkà mabəđma, agòđ: “Lagwa kà, gədasəlay kà Zəzagəla kà avàh à dza mavahay aw.³⁵ Kəla dza tsəhay uwala beyli uwana adinjal gəl à vok, ŋgaha adəh dziriga kà, ahəđal à adi.³⁶ Haday, kasəlaw kà Zəzagəla asləl gay aŋha à slaka azla Isərayel, uwaga kà gay matsidəyga à uwana məslalə vok aŋa magla lapiya la Zəzagəla, kà made-golay Yesu, uwana asəlla anu vok la Zəzagəla, uwana Sufəl aŋa dza gesina.³⁷ Gay matsidəyga uwanay adzəkà vok la Galili, la lig aŋa batem uwana la ahəŋ Yuhana azəŋ, ŋgaha asləhà gəl à ahəŋ la kutso Yahudiya.³⁸ Kasəlaw à uwana Zəzagəla asləl Masasəđok aŋha à ahəŋ, à Yesu zil Nazaret à gəl, ŋgaha kasəlaw babay, à uwana Yesu auguzàhəh la azlagudəŋ la abà gesina la madəhəŋ delga la mawar azladza uwana ala, atà la ahəl aŋa seteni. Ndzer kà, Zəzagəla agə la masla.³⁹ Gesina gami kà, anu azlaməna sayda aŋa tatak uwana adəhəhəŋ la Urusalima, la kutso aŋa azla Yahudiya la abà gesina. Takəđ masla la mazləl à ahəf à adi.⁴⁰ Ama Zəzagəla awulla à uda la mamətsay la mahənay makər, ŋgaha avəl ndzəđa kà mapəhla vok ala.⁴¹ Ama azladza gesina tanəŋəŋ aw, anu uwana atsatsəmənī anu la madzəka, kà anu aŋa magay azlaməna sayda pəra, mənəŋəŋ. La lig aŋa uwana Zəzagəla awulla à uda la mamətsay kà, məzūw, məsə la slaka gə anina.⁴² ŋgaha apəh à anu à vok à abà kà maz gay marabəŋ à azladza, ŋgaha kà mapəhla ala kà Zəzagəla afə Yesu à ahəŋ, kà masla seriya lakəl aŋa azladza uwana la sifa, ŋgaha lakəl aŋa azlauwana tamatsay.⁴³ Azlaməna mapəh à atà gay à ahəl kà mapəh à azladza gesina tapəh lakəl aŋha: Kəla dza uwana adinjal gəl à Yesu à vok kà, Zəzagəla adəmətsalla tsakana aŋha ala, kà sləm aŋa Yesu.”

Azladza uwana azla Yahudiya aw, tabəzà Masasəđok Zəzagəla

⁴⁴ Mok uwana Piyer aləg la mabəđma la abà kà, Masasəđok Zəzagəla asà à gəl aŋa azladza uwana tatsəb sləm à gay aŋha gesina.⁴⁵ Azla Yahudiya uwana tadinjal gəl à Yesu à vok, azlauwana tanəfə Piyer à waŋ kà, ləv avələh à atà à gay, kà Masasəđok, uwana Zəzagəla avà à azladza uwana azla Yahudiya aw bay.⁴⁶ Kà uwana tatsənà atà tazləb maslay aŋa Zəzagəla la azlagay mələk gə, uwana tatəpla aw. Piyer agòđ: ⁴⁷ “Lagwa ma məslala vok aŋa madəđəf gay à azladza uwanay à ahəŋ kà madəhatəŋ batem aŋa iyaw, tsa tabəzà Masasəđok Zəzagəla bokuba anu ay?”⁴⁸ ŋgaha avà tetəvi kà madəh à atà batem la sləm aŋa Yesu Kristu. ŋgaha tanavəl à masla aŋa madzin à ahəŋ atà nna.

11

Piyer apəhla uwana ala apaka vok la mtəga Korneliyus la huma

aŋa azlaməna madiŋjal gəl à vok la Urusalima

¹ Azlaməna masləlay la azlaməna madiŋjal gəl à vok uwana tadzà à ahəŋ la Yahudiya tatsənəŋ kà azladza uwana azla Yahudiya aw babay takəs gay Zəzagəla.² Uwana Piyer adawul à Urusalima kà, azla Yahudiya uwana tadinjal gəl à Yesu à vok tasləhàla vok.³ Tagòđal: “Kahàd à tataka aŋa azladza uwana à abà, makadav atà à uda gə aw, ŋgaha kazūw aw tatak may akul nna?!”⁴ Kiya uwaga Piyer adzəkà matugw à atà godega aŋha takwatokw lakəl aŋa uwana apakà vok gesina. Agòđ à atà:

⁵ “Gi, kà gi la Yope, mok uwaga gi la madəw kuđa la abà kà, masesinay asesinla gi. Gənəŋəŋ tatak anik asà à ahəŋ la zagəla, asà à slaka gulo. Tatak uwatà kà bokuba magol peteli, mawəđ à ahəŋ ala gə, kəla gay dziika ufađ nna, asà à ahəŋ la zagəla, asà à slaka gulo.⁶ Gənəwəz huđ aŋha la haŋkəli kà, gənəŋəŋ azlatatak uwana la asik ufađ, azlatatak fəta la azlauwana taday la huđ, ŋgaha la azlauwana tahoyay la zagəla.⁷ ŋgaha gətsənà

kuda anja Zëzagëla agòd à gi: 'Piyer, sà à afik, kèd ngaha pàd!' ⁸ Ama gëwulàlla: 'Awan, kiya uwaga aw, Sufël gulo, òkidiiki tatak àlàhga adada à gay gulo à awtày aw, aslèh!' ⁹ La abata kuda uwaga atsèn à ahøj aya: 'Kapakà tatak uwana ala Zëzagëla adapakøj ala tsidafja kà àlàhga aw!' ¹⁰ Adahà vok asik makøj, ngaha la lig la ahøj, tatak uwaga awùl à zagëla gesina. ¹¹ La kaslà uwatà azladza makøj tasà à warj à gày, uwana à abà gi lakay. Taslèlla atà à warj kà dagay la Zësare kà mayàh gi. ¹² La abatà Masasëdök Zëzagëla agòd, gënëfà atà, kakwes aw. Kiya uwaga azladedà mukwà talaka gi babay à Zësare, gesina gami mädà à gày la mtëga Korneliyus. ¹³ Uwana Korneliyus adanøj anu kà, adzëkà matugw anu gay lakël anja malika uwana adà à mtëga anja, atsizlla à ahøj, agòfal: 'Slël azladza à Yope, kà mazalay à Sëmon uwana tazalalla Piyer. ¹⁴ Adapëh à ka ala gay uwana kadàbëla la azlamëna huf gày anjak gesina.' ¹⁵ La abata gëdzëkà mapëh à atà. Masasëdök Zëzagëla asà à atà à gël bokuba uwana asà à anu à gël babay suwan, dagay uwarà. ¹⁶ La abatà kà, awùl à gi à gël lakël anja uwana Sufël Zëzagëla apëh: 'Yuhana adfahøj batem la iyaw, ama akul kadàbëzaw batem kà la Masasëdök Zëzagëla.' ¹⁷ Ndzer, Zëzagëla avà à atà Masasëdök anja bokuba uwana avà à anu à mok uwana mëdij gël à Sufël gami Yesu Kristu à vok. Ngaha ma, gi ma gi uwa, kà madëd gay à Zëzagëla à ahøj uwa?" ¹⁸ Mok uwana tatsën gay uwaga kà, tadzà à ahøj titi, ngaha tazlëbà Zëzagëla la magodfay: "Hadfay kà, Zëzagëla adavà tetëvi à azladza uwana azla Yahudiya aw babay, kà atà anja mapëh gay la lëv ala, kà atà mafëzal sifa adëv gay aw, hadfay."

Azlamëna madijal gël à vok la Antiyews

¹⁹ Azlamëna madijal gël à vok taslëhà gël à ahøj kà makëd Etiyen, uwana takëd. Azlaanik la tataka anjatà la abà tadà à Fenesëya, ngaha à Sipëre, ngaha à Antiyews. Ama tazà gay Zëzagëla kà à azla Yahudiya përa. ²⁰ Ama azlamëna madijal gël à vok anik uwana la Sipëre la azlauwana la Sëren, tahäd à Antiyews, ngaha tazà gay marabøj lakël anja Yesu Kristu à azlauwana azla Yahudiya aw. ²¹ Ndzëdä anja Sufël Zëzagëla agà la atà, azladza anjvaw tapäh gay lëv ala, tadij gël à Sufël Yesu à vok.

²² Mok uwana gay uwaga adatsën à azlamëna madijal gël à vok la Urusalima kà, taslël à atà Barnabas à awtày à Antiyews. ²³ Uwana adada à awtày kà, arab mënga, kà uwana Zëzagëla apisà gay à azlamëna madijal gël à vok à vok, kiya uwaga Barnabas adzëdëfah atà ala, kà atà anja mahoy yewdi anja Zëzagëla la manëfay la lëv tekula. ²⁴ Barnabas kà dza delga gä, mahënlaga la ndzëdä anja Masasëdök Zëzagëla, ngaha la madijal gël à vok. Azladza anjvaw tanëfà Sufël Zëzagëla.

²⁵ Barnabas ahäd kà mayàh Sawul la Tarsus. ²⁶ Uwana adafëzal, asëlla à Antiyews. Atà sëla nna, tadzà à ahøj mavay tekula la abata, kà atà sëla anja matapla azlamëna gay Zëzagëla la matsësehäh atà ala anjvaw la Antiyews. La uwana, azlamëna matapla tadzëkà mazalalla la slëm: Azlamëna madijal gël à vok.

²⁷ La zamana uwatà azlamëna mapëh à atà gay à ahäl anja Zëzagëla kà mapäh à azladza, tasähà à warj la Urusalima, tadäh à Antiyews. ²⁸ Tekula anjatà uwana slëm anja Agabus, atsizlla ala, la ndzëdä anja Masasëdök Zëzagëla agòd: "Magol may atsa à warj à gudøj à vok gesina." (Apakà vok la zamana makoray anja mënj sufël Këlod) ²⁹ Kiya uwaga azlamëna matapla tatsënà vok gay kà këla uwabeyuwi anjatà avà uwana aslälà vok kà maslël à azladedà uwana la may la abà la kutso Yahudiya. ³⁰ Uwana tadfah uwaga, taslël Barnabas atà la Sawul kà madla sili uwaga à slaka azlamasiga la kutso Yahudiya.

12

Takës Yakuba ngaha taduw Piyer à danjay

¹ La zamana uwatà Sufël Herod adzëkà matëwëb azlamëna madijal gël à vok, ² akëd Yakuba, deda anja Yuhana la katsakar. ³ Uwana anøjänj kà, akës à azla Yahudiya à gël kà, akës Piyer aya. (Kaslà uwaga agà mavakay anja Pain uwana tatak makëslinj la tsëh aw) ⁴ Bokuba uwana akës à azla Yahudiya à gël, à uwana Herod akës Piyer, aduw à danjay. "Nënjawla!", agòd à azlaslodzi. Atà azlaslodzi tatsäk ala madzëga ufad, këla slaka kà, slodzi ufad ufad, kà uwana asäl madalla à huma anja azladza à banja madëvadaj Paska adädëv à gay. ⁵ Azlaslodzi tanënjla Piyer la danjay, ama azlamëna madijal gël à vok tada à huma à gay la madëv kuđa à Zëzagëla la lëv tekula kokuđa masakal.

Piyer asa à uda la danjay

⁶ La mahëney uwana naka Herod adala Piyer à huma à azladza, Piyer la madzëhal gä la tataka azlaslodzi sëla la abà, mawodøj à ahøj gä la mazakazak sëla, ngaha azlamëna manøjla bay atà la slaka anjatà la abà la gay gamagày. ⁷ La kirim yewdi, malika anja

Sufəl Zəzagəla apəhla vok ala, magol ufaka aùf la gày danjaj la aku. Malika afetekà Piyer, atsənañ ala, agòdàl: “Sà à afik, katskats!” Azlamazakazak tanəsal à ahàl ala.⁸ Nğaha malika agòdàl: “Wàf parapara anjak à tsəh, nğaha wàdàhà kwimik anjak!” Piyer adahàn kiya uwaga, nğaha malika agòdàl: “Dùw dəbdebi anjak à vok, nğaha kà nəfà gi!”⁹ Piyer asà à uda la gày danjaj la aku la manəf malika. Asəl kà uwaga malika adəhən kà dziriga aw. Gəl anja agòf kà: ‘Masəinja la uwana asəinja à gi’, agòf.¹⁰ Tatsəf à azlaslaka azlaməna manənja terənja la vok ala, azlamasəla la vok ala, nğaha tabəzà à gay gamagày anja adà à vok, adà à huđ gudəñ. Gamagày uwaga apəzlla vok la ahàl anja la huma anjatà, nğaha tasà à uda. Tadà à barama à ama. La abatà malika asàk à Piyer à ahəñ.

¹¹ Uwana Piyer adavàh gəl ala lakəl anja uwana apakà vok kà, agòf: “Ndzer, Zəzagəla asləl malika anja à wañ kà mapəl gi ala la ahàl anja Herod, nğaha la mawisiga uwana la abà gesina azla Yahudiya tayàhla gi kà madàhğəñ à vok gesina.”

¹² Uwana adavàh gəl ala kà, ahàl à mtəga Mariyama, iyà anja Yuhana uwana tazalalla Mark, la slaka uwana azladza anjvaw tahamà gay à vok kà madəv kufa.¹³ Piyer atsizilla à gay gamagày adəfəñ, nğaha masla sləray misga, uwana sləm anja Rode, azà vok à gay gamagày à huđ kà mapəzlay.¹⁴ Katskats asəl kufa anja Piyer, aràb mənğa, ama apəzl gamagày aw adùw vok à gày, kà mapəh à azladza kà Piyer la uda la gay gamagày.¹⁵ “Kak kusonju!” Ama masla kà, agəfəñ afik ndzer kà, bə masla. Nğaha tagòdàl: “Uwaga malika anja!”¹⁶ Tekedik Piyer asàk à madəf à gay gamagày aw. Uwana tapəzl gamagày tanəñən kà, tsa masla, ləv avàläh à atà à gay gesina.¹⁷ Piyer adzilà ahàl à zagəla, akokòt à atà à ahàl à adi, kà atà anja madz à ahəñ titi, nğaha adzəkà matugw à atà uwana Sufəl Zəzagəla adahàn kà masəla à uda la danjaj la abà. Agòf à atà aya: “Kadəpəhaw à Yakuba, nğaha à azladedə anik aya babay.” La lig la ahəñ, asà à uda, adà anja à slaka anik.

¹⁸ Uwana məl adawulla kà, gəl akàf à azlaslodzi à vok: “Kakay Piyer adà anja ma?”, tagòdàh à vok.¹⁹ Herod ayàh, ama abəzal aw. Anavàh azlaməna manənja la gay ala, nğaha avà tetəvi kà makaf atà. La lig la ahəñ masla à Herod ahàd, adzà à ahəñ la Yahudiya nğaha la Samariya.

Mamətsay anja Herod

²⁰ La mok uwatà kà, azlaməna gudəñ Tir la azla Sədon tayàh matsən vok gay la Herod, kà uwana la abatà la uwana tabəz tatak may anjatà. Kà uwana Herod la mapak ləv gə lakəl anjatà. Tasà à wañ, takəs dza anik uwana à ahəl, masla manənja huđ gày anja Sufəl, uwana sləm anja Bəlastus. Nğaha tahàd à slaka Herod kà manav məsəl vok.²¹ La abatà Herod akədəv à atà kaslà à ahəñ, kà mapəh à atà gay. La mavakay uwatà, atsəkəw à lukut sufəl anja à abà, nğaha adzà madzaj la kursi sufəl anja la afik, nğaha apəh à atà gay la kufa zləkkà.²² Maham à ahəñ dza agòf: “Uwaga kà mabədma anja dza asik aw”, tagòf, “Ama anja zəzagəla.”²³ Uwana Herod atsənà uwaga kà, adəf à gay ləv. Gay gə la uwaga malika anja Zəzagəla adùwal dùvats à gəl, maduwari azùw à gay, nğaha aməts, kà uwana azləbà gəl anja bokuba Zəzagəla.

²⁴ Kiya uwaga gay anja Sufəl Zəzagəla azigən kaykay aya.

²⁵ Mok uwana Barnabas atà la Sawul tadəvla sləray anjatà à gay la gudəñ Urusalima, tawùl à lig nğaha tazəb Yuhana uwana à tsəh, tazalalla Mark.

13

Tahəl azla Barnabas atà la Sawul kà mad madàh sləray

¹ La tataka maham à ahəñ mənə gay Zəzagəla la abà la Antiyews kà, azlaməna mapəh à atà gay à ahàl la ahəñ kà mapəh à azladza, nğaha la azlaməna matapla: Barnabas, Səmeyyon uwana sləm anja marsiga, Lutəyus zil Səren, la Manayen uwana tazigən la slaka gə la Herod sufəl, nğaha Sawul.² La vərđi anik, uwana tadəv kufa à Zəzagəla la makəs nəlay, Masasəfok Zəzagəla agòf à atà: “Bəkəw gi, azla Barnabas atà la Sawul à fəta à awtəy kà mahəñəñ sləray uwana ala, gəzàlla atà ala.”³ Uwana takəf gəl à madəv kufa la makəs nəlay, tabəh atà à ahàl à gəl, nğaha tasləl atà à sləray à abà.

Barnabas atà la Sawul la gudəñ Sipəre

⁴ Bokuba uwana Masasəfok Zəzagəla asləl azla Barnabas atà la Sawul, tahàd à gudəñ Səloysəya, la abatà tahàd à kəslah iyaw à afik kà maday à gudəñ uwana à afik la tataka iyaw la abà, sləm anja Sipəre.⁵ Mok uwana tabəzay à Salamin, tadzəkà mapəh gay Zəzagəla la azlagày madəv kufa anja azla Yahudiya la aku, Yuhana, uwana tazalalla Mark, azlək atà la sləray.

⁶ Taguwà à uda la gudəŋ uwatà la abà tsəràh à Pafos. La abatà tabəzà məzla anik à gəl uwana sləm anha Bar-Yesu, zil Yahudiya. “Gi masla mapəh à gi gay à ahəl”, agòf, ama tsa fida. ⁷ Masla kà tasəl vok lela la sufəl anja gudəŋ uwatà. Sləm anja sufəl uwatà kà Sergiyus Pawlus, masla makor haŋkəli. Sufəl uwaga azàla Barnabas atà la Sawul kà matsən gay Zəzagəla la slaka anjatà. ⁸ Ama məzla uwatà (Uwana tazalalla Elimas la gay Gərək) akəs atà aw. Ayàh madəf gay à sufəl à ahəŋ kà matsən gay Zəzagəla, kà masla anja madiŋal gəl à vok aw. ⁹ Kiya uwaga Sawul uwana tazalalla Pol babay, agà mahənлага la Masasəfok Zəzagəla, atsək yewdi à məzla uwaga à gay. ¹⁰ Nġaha agòf: “Kak dēmēm kahənla la makəsafər, kak kona anja seteni. Kak masla məzam anja tatak delga anja Zəzagəla gesina, kadəsakal à tsəh ala, ma mbà à mawis dziriga anja Sufəl Zəzagəla ala ma? ¹¹ Gəgòf à ka, tsənəŋ lagwa Sufəl Zəzagəla adəf kà: Kapàk guləf, kanəŋla aw la tataka mahənay anik la abà aya aw.” Katskats yewdi anja Elimas apàk mərəzla kka tabadamma bokuba la wəf, taptap ayàh dza kà makəs à ahəl. ¹² Uwana sufəl anəŋə uwaga apakà vok kà, adin gəl à Zəzagəla à vok. Gay anja Sufəl Zəzagəla adəl à ləv à tsəh kaykay.

Pol atà la Barnabas la Antiyews la kutso Pisədiya

¹³ La abatà azla Pol tasà à uda la gudəŋ Pafos, tahàd à kəslah iyaw à afik kà mad à Perge la kutso Pamfiliya. La abatà la uwana Yuhana, uwana tazala Mark bay, asək atà à tsəh ala, awul à Urusalima. ¹⁴ Tatsilla ala la asik, dagay la Perge tahàd à Antiyews la kutso Pisədiya. La wuf maduw ləv tahàd à gəy madəv kuča à agu, tadzàh madzay. ¹⁵ Mok uwana tadzeŋay la wakità mapəhay anja azlaməna mapəh à atà gay à ahəl la abà, mənġa anja gəy madəv kuča azəl à atà: “Azladedə, baŋa akul la gay kà mapəh à maham à ahəŋ dza, kà madzərəfəh atà ala kà kaslawwalla vok anja mapəhay lagwa à dagay.” ¹⁶ Pol atsizlla ala, adziyla ahəl à zagəla, agòf à atà: “Akul azla Isərayel la azlatsəhay dza anik uwana kasləkawaw Zəzagəla, tsəbəw gi sləm! ¹⁷ Zəzagəla anja tsəhay gami Isərayel uwana atsatsəmàni azlababa gami madzidziga, azigəŋə tsəhay anja, mok uwana atà la mələk la Misəra, kiya uwaga asəlla atà à uda la Misəra la ndzəda anja mənġa. ¹⁸ Adzadzər atà la kəsaf la abà mavay dzik ufad. ¹⁹ Azəŋ ala makoray madəf la kutso Kanana, avà kutso uwatà à tsəhay anja. ²⁰ Uwaga gesina adəhəŋ bokuba mavay dadərmokw ufad bəzi anja dzik zlo.”

“La lig anja uwaga la ahəŋ, Zəzagəla abək azlaməna seriya à azlababa gami madzidziga à ahəŋ, tsəràh à zamana anja masla mapəhal gay à ahəl Samuyel. ²¹ La lig la ahəŋ kà, tanavà maf à atà sufəl à ahəŋ nġaha Zəzagəla af à atà Sawlu à ahəŋ, kona anja Kis, uwana asà à uda la tsəhay anja Benyamin la abà, akər mavay dzik ufad. ²² La lig la ahəŋ, Zəzagəla akweska Sawlu, afa à atà David à ahəŋ kà sufəl. Apəh gay lakəl anja, agòf: ‘Gedabəzal David kona Isay, dza uwana asà à ləv gulo, nġaha adəfəhġəŋ uwana asa à gi gesina.’ ²³ Tekula la mayyi à tsəh ala anja David kà Yesu, à uwana Zəzagəla apakəŋ ala kà masla mabəl azlatsəhay anja Isərayel, kiya uwaga à uwana apəh à ahəŋ dagay uwarə. ²⁴ Mok uwana Yesu à lig mas à waŋ kà, Yuhana agòf: ‘Azla Isərayel, pəhəw gay la ləv ala, nġaha tadəhakullan batem!’ agòf à atà. ²⁵ La kasla uwatà à uwana, Yuhana adəbəz makəf gəl à ahəŋ sifa anja kà, agòf à atà: ‘Gi uwa, kagodəw uwa? Gi kà, gi dza uwana kakudaw aw. Ama fəw à sləm à abà, kà masla anəfa gi à tsəh à waŋ nġaha baməraka gi kà gəsla kà mapəl suwid kwimik anja uwana ala, la asik aw.’ ²⁶ Azladedə, akul mayyi à tsəh ala anja Abəraham la azladza anik uwana kasləkawaw Zəzagəla. Gay anja mabəlay uwanay asəlla kà à slaka gami. ²⁷ Ama azlaməna madz à ahəŋ la Urusalima, la azlamənġa anjatà kà, tatsənà godega anja Yesu aw, nġaha bay tatsənà mapəhay anja azlaməna mapəh à atà gay à ahəl uwana tadzeŋəh la azlagəy madəv kuča la aku kəla wuf maduw ləv aw. Ama tagəfə gay uwaga à afik la makəf Yesu. ²⁸ Amiyaka tabəzà tetəvi kà madfukwlan à ahəŋ kà makəfay aw, bay kà tanavà Pilatus kà makəfay. ²⁹ Uwana tadəv uwana à gay tadəhəlləŋ à vok wakità Zəzagəla apəh lakəl anja gesina kà, tazəb à ahəŋ la ahəf la adi, tafə à zəvay à agu. ³⁰ Ama Zəzagəla awulla à uda la mamətsay. ³¹ Azlamavakay anjuvaw apəhla vok à azlauwana tanəfə à waŋ la Galili tsəràh à Urusalima. Lagwa kà, atà la uwana azlaməna sayda anja la slaka azla Isərayel. ³² Anu la gəl gami mədasa à akul ala gay marabəŋ uwanay. Zəzagəla apəh à azlababa gami madzidziga, azla Yahudiya à ahəŋ. ³³ Adagəfəŋ à afik lagonay kà, anu azlamayyi à tsəh ala anja. La mawulla Yesu à uda la mamətsay, bokuba uwana tatsətsər à wakità anja mahabay masəla la abà:

‘Kak bəzi gay ləv gulo,

Lakana gədayyi ka.’[✠]

³⁴ Aganay babay uwana Zəzagəla apəh à ahəj lakəl aña mawulla à uda aña la mamətsay, kà masla aña mazinla aw.

'Ndzer, gədapisakulla gay à vok la ahəl gulo bokuba

Uwana gəpəh à David à ahəj uwarà.'

³⁵ Gay gə la uwaga David agəf la azlaslaka anik la abə:

'Iyay, kadāsaka dza anjak la slaka mamətsay aw, kà mazinla aña dza anjak aw.'[✠]

³⁶ David kà, masla kà afahà uwana asà à Zəzagəla tsərəh à mamətsay aña, tallà à makəla aña azlababa gami madzidziga ngaha azin ala. ³⁷ Ama dza uwana Zəzagəla awulla à uda la mamətsay kà, azin ala aw. ³⁸⁻³⁹ Azladedə, delga kasəlaw, anu məzakullanj kà, kà la Yesu la uwana Zəzagəla aməts tsakana à azladza ala. La masla la uwana Zəzagəla agəj azlauwana tadij gəl à masla à vok sətaka, kà uwana mapəhay aña Musa kà aslā aw. ⁴⁰ Lagwa kadəhaw hanjəli lakəl aña uwana azlaməna mapəh à atə gay à ahəl tapəh kà aña mazəf akul aw:

⁴¹ 'La kaslā anjul gədəfehəj sləray anik. Akul uwana kapəsewaw gay aña Zəzagəla, nərəzəw zlə, kul azlaməna mapəsew gay Zəzagəla, ləv aval à kul à gay, kamətsaw à gay kà sləray uwana gadada à ahəj la zamana anjul, kà uwana amiyaka tatapəhakulla godega aña bay kà naka kakəsaw aw.'

⁴² Mok uwana Pol atə la Barnabas tasà à lag la gəy madəv kudfa la aku kà, tagəf à atə kà, tadəwul à wəj la wuf maduw ləv anik aya kà mapəh à anu lakəl aña uwaga aya gotənanj, tagəf à atə. ⁴³ Mok uwana azladza tasləh ala, anjəwaw la tataka azla Yahudiya la abə, ngaha la azlauwana tabədfəla vok à tsəhay Yahudiya à abə, tanəfə Pol atə la Barnabas. Azla Pol tadzərədfəhətəla kà matsizl à delga uwana à afik, Zəzagəla asəl madəhatəj.

⁴⁴ La wuf maduw ləv azladza la gudəj uwatə gesina tahamə gay à vok kà matsən gay Sufəl Zəzagəla. ⁴⁵ Uwana azla Yahudiya tanəjə maham à ahəj dza kiya uwaga kà, atə manjor akəsə atə, tafə guvəl à uwana à adi Pol apəh, ngaha tatsəkəl magəfəhay à Pol à gəl. ⁴⁶ Pol atə la Barnabas tagəf à atə la paraka: "Azlayla kà vok, kà gay Zəzagəla agay mapəh à kul gə dadəj. Ama tsa kakwesawka gay sifa adəv gay aw kà, məday mədəzizj à azladza uwana azla Yahudiya aw zlə. ⁴⁷ Aganay mafəh akur à ahəj, uwana Sufəl Zəzagəla afəhà à gi à lig, agəf:

'Gəfə à ka à ahəj, kà ka aña magay wufəka aña azladza, kà ka aña maz gay mabəlay à azladza uwana la makəf gəl à ahəj gudəj à vok gesina.'^{✠✠}

⁴⁸ Mok uwana azlauwana azla Yahudiya aw tatsən uwaga kà tarəb. Tadzəkə mazləb gay aña Sufəl. Azlauwana Zəzagəla atsatsəmənə atə gesina kà, atə aña mabəz sifa adəv gay aw kà, tadijəl gəl à vok.

⁴⁹ Gay Sufəl Zəzagəla asləhə gəl à ahəj la kutso uwatə la abə gesina. ⁵⁰ Ama azla Yahudiya tavətsəhəh azlamis uwana ala sləm anjatə la ahəj, azlauwana tasləkəw Zəzagəla, la azlagadaməla aña gudəj uwatə gesina, ngaha tayəh azla Pol la magazlay tsərəh à uwana takudəkəh atə à uda la makoray anjatə la abə. ⁵¹ Azla Pol atə la Barnabas tagəf: "Gay gami la abə aw", tagəf. Tadəf à atə burburu aña gudəj anjatə à adi, ngaha tahəd anjatə à Ikonyum. ⁵² Bamərika takudəkəh azla Pol la Antiyəws bay kà, azlaməna matəpla la gudəj uwatə tagə la marabay, ngaha tahənə ala la Masasəfək Zəzagəla.

14

Pol atə la Barnabas la Ikonyum

¹ Uwana Pol atə la Barnabas tabəzə Ikonyum, tahəd à gəy madəv kudfa à agu, bokuba uwana tadəhəj la Antiyəws babay, tsərəh à uwana gay mənəga aña azla Yahudiya la azlauwana azla Yahudiya aw tadijəl gəl à vok. ² Ama azla Yahudiya uwana takweska madijəl gəl à vok, tavədzəhəhəh azladza uwana ala, atə azla Yahudiya aw, kà atə aña madzugw mawisiga lakəl azladedə uwaga. ³ Pol atə la Barnabas tadzə à ahəj mənəga la Ikonyum, tapəh gay Sufəl Zəzagəla la dazuwaya. Tazə gay lakəl aña vok mahamay aña, ngaha Sufəl avə à atə ndzəfə kà mafəh azlaməsəlay la azlanadzipo, kà mapəhla ala kà gay anjatə kà dziriga. ⁴ Azladza gudəj uwaga tatsək ala. Azlaanik tagə aña azla Yahudiya, ngaha azlaanik tagə aña azlaməna asik.

⁵ Azla Yahudiya la azladza uwana azla Yahudiya aw, la azlasufəl anjatə, tadəhə vok à ahəj kà matəfəb azla Pol kà aña makəf atə la matsəl atə la akur. ⁶ Uwana azla Pol tadatsən uwaga kà, tahəy anjatə, tanəfə tetəvi uwana adə à Lisətəra la Derbe, la makoray aña Likawoniya la abə. ⁷ Tadzəkə maz gay marabəj à azladza la abətə.

Pol atə la Barnabas la Lisətəra

⁸ La Lisetëra dza anik la ahøj adzà à ahøj kà la slaka madza madzay, kà uwana magul à afik gá dagay mayyay, aslála vok adaday la asik anha, amiyaka asik tekula aw. ⁹ Vërdi anik kà, atsëb slëm à uwana Pol apəhay. Pol atsëkal yewdi à gay ngaha anërëz kà masla la madiñal gəl à vok, aslála vok kà mawurla. ¹⁰ Kiya uwaga agófal, la kuda zlëkkà: “Sà à afik, tsìzlla à asik anjak à gay, dzawwla!” Hadzak, dza uwaga atsìzlla à asik anha à gay, adzëkà maday. ¹¹ Uwana maham à ahøj dza adanøj uwaga Pol adahàn kà, tadzëkà mawiyay la gay gudøj anjata, gay Likawoniya: “Azlazëzagëla kà, tadapakàh azladza gá adagay, ngaha tasà à tataka gami à abà la vëdàh!” ¹² Tazàla à Barnabas Tsoys, slëm anja mazlazlay anjata, ngaha Pol bay kà, Hermës tagófal, kà uwana masla kà masla mapàh gay. ¹³ Masla mav tatak à Zëzagëla Tsoys, uwana la slaka mazlazlay kà, la gay gamagày anja mad à gày à huf gudøj, asëlla azlakokur à wan, tatsafadàh atà gəl à uda la azlamawuratatay à gay gamagày anja gày mazlazlay, asl à kà maham à ahøj dza takëd tatak à azla Barnabas atà la Pol. ¹⁴ Mok uwana tatsën uwaga, takohàhà lukut à vok, tahøj à tataka maham à ahøj dza à abà la mawiyay: ¹⁵ “Azlaslawda, kà mana kadàhàw uwanay mi, anu bay kà anu azladza asik bokuba akul miya! Mësà à akul ala gay marabøj à wan kà mawulla akul à gəl kà akul masak azlamazlazlay deydayga uwana kanëfaw lagwa, ngaha kà akul magola vok à slaka Zëzagëla, uwana la sifa, masla uwana adàhà zagëla la kutso, la azlamukwà ngaha la azlatatak uwana la abà gesina![✠] ¹⁶ La zamana uwana uwarà kà, asàk azlatsəhay gesina kà manəf tetəvi anja gəl anjata. ¹⁷ Tekedfik kà, apëlla vok à azladza la azlaslëray anha dzëba anha sëla aw gá uwana adëhøj: Asüw akul iyaw, kalàw tatak la kaslà anha, avà à akul tatak may ngaha ahənà ləv akul ala la marabay.” ¹⁸ Bamëra kà la mapəhay kiya uwaga babay kà, la zlazladà tadëd gay à maham dza à ahøj kà makad tatak.

¹⁹ La kaslà uwatà, azla Yahudiya anik tasà à wan la gudøj Antiyews la kutso Pisëdiya ngaha la Ikoniyum. Tavëdzàh à tsəh azlamaham à ahøj dza à afik, tatsàh Pol la akur kà makaday, ngaha tasəpər à uda la gudøj la abà kà uwana tadzüg kà: ‘Adamətsay’, tagócf. ²⁰ Ama uwana azlaməna madiñal gəl à vok tahamà gay à vok lakəl anha kà, asà à afik, awül à gudøj à abà. La bebøj gá kà, tahàd à Derbe atà la Barnabas.

Mawul à wan la Sëriya kà mad à Antiyews

²¹ Pol atà la Barnabas tazà gay marabøj la Derbe la slaka uwana tabëzà azladza anjüwaw kà anja Yesu. Ngaha tawül à Lisetëra, à Ikoniyum, à Antiyews uwana la kutso anja Pisëdiya la abà. ²² Këla gudøj uwana tadàhà à abà kà, tadzërëdàhà azlaməna madiñal gəl à vok ala, kà matsizl à madiñal gəl à vok à afik. “Haday kà, mad à makoray Zëzagëla kà, say maguw à uda kà la azlamagol ngörpa la abà dadàn.” ²³ La këla maham à ahøj məna gay Zëzagëla kà, tatsatsàmàhàni azladza kà mapak atà ala kà azlamasiga. Ngaha takës nəlay, tadəv kudà kà anja azlaməna madiñal gəl à vok, ngaha tabëk à atà à ahəl anja Sufəl Zëzagëla, à uwana tadiñal gəl à vok, tadà anjata.

²⁴ Tagüw à uda la kutso Pisëdiya la abà ngaha tabëzà kutso Pamfliya. ²⁵ Tazà gay Zëzagëla la Perge, la lig la ahøj tahàd à Ataliya. ²⁶ Dagay la abatà tadà à kəslah iyaw à afik, tahàd à Antiyews la gudøj uwatà la uwana tabëk à atà à ahəl anja Zëzagëla, kà masla mav à atà vok mahamay kà anja slëray anha, slëray uwaga kà tahənən ala lagwa.

²⁷ Mok uwana tabëzay à Antiyews, tahamà gay azlaməna madiñal gəl à vok à vok gesina, ngaha tatügw à atà uwana apakà vok la atà gesina, uwana Zëzagëla adahàn la atà, la mapëzl tetəvi à azladza uwana azla Yahudiya aw, kà atà anja madiñal gəl à vok babay. ²⁸ Tadzà à ahøj mənğa la azlaməna madiñal gəl à vok la abatà.

15

Maham gay à vok la Urusalima

¹ Azladza anik tasà à wan la Yahudiya, tahàd à Antiyews, tagócf à azladedà: “Kaslawwala vok kà mabəlay aw, say banja kakədəwaw vok à uda, bokuba uwana mapəhay anja Musa apəh daj.”[✠] ² Pol atà la Barnabas takës aw, tabayà vok gay lakəl anja uwaga. Tasləl Pol atà la Barnabas ngaha la azladedà anik la Antiyews, kà madla atà à Urusalima kà mapəhay lakəl anja gay uwaga la azlaməna matapla la slaka anja Yesu, la azlamasiga.

³ Kiya uwaga azlaməna madiñal gəl à vok tasləl atà. Taguwà à uda la Fenesəya la Samariya la mapàhla ala gay magola vok anja azlauwana azla Yahudiya aw à slaka Zëzagëla. Gay mawga uwaga kà, avà marabay à azladza gesina. ⁴ Mok uwana tabëz à Urusalima, azlaməna matapla la slaka anja Yesu, la azlamasiga, ngaha la azlaməna madiñal gəl à vok takës atà la ahəl sëla, ngaha azla Pol tapəh à atà tatak uwana Zëzagëla

aɗahàŋ la atà gesina. ⁵ Ama azlaməna madiŋal gəl à vok anik, uwana taguwà à uda la maham à ahəŋ aŋa azla Farisəya la abà kà, tagòɗ kà: “Say makadav azlaməna madiŋal gəl à vok uwana à uda azla Yahudiya aw, ŋgaha mətapatàla aya makəs mapəhay aŋa Musa dadàŋ kəla.”

⁶ La abatà azlaməna matapla la slaka aŋa Yesu, la azlamasiga tahamà gay à vok kà manərez gay uwaga. ⁷ La lig mavats gay mənŋa uwaga la ahəŋ, Piyer asà à afik, agòɗ: “Azladeda, kasəlaw kà Zəzagəla akəsàni gi la tataka aŋkul la abà dagay uwarà, kà gi aŋa maz gay marabəŋ à azladza uwana azla Yahudiya aw. Kà atà aŋa matsənəŋ, ŋgaha kà atà aŋa madiŋal gəl à vok bay. ⁸ Zəzagəla uwana masla masəl madzugway aŋa ləv aŋa azladza gesina, apəhla ala kà awoyà azladza uwaga babay, avà à atà Masasəɗok aŋha bokuba uwana avà à anu babay. ⁹ Zəzagəla avàhànula la atà aw: Agà ləv aŋatà sətaka, kà uwana tadiŋal gəl à vok. ¹⁰ Ŋgaha ma, kà mana lagonay kà, katàpaw Zəzagəla la maf atà magol mahanay mənŋa à gəl ma? Baməraka anu, la azlababa gami madzidziga kà məslàla vok aŋa mazəbay tekeɗik aw ma? ¹¹ La madiŋal gəl à Sufəl Yesu à vok kà, vok mahamay aŋha la uwana mədàbəlay, kiya uwaga babay la atà aw takay?”

¹² Kiya uwaga maham à ahəŋ dza adzà à ahəŋ titi, tatsəb sləm à Barnabas atà la Pol uwana tapəh à atà azlanadzipo uwana Zəzagəla aɗahàhàŋ la ahəl aŋatà la tataka aŋa azladza uwana la abà, azla Yahudiya aw. ¹³ Mok uwana takəɗ gəl à mabəɗma, Yakuba abəɗ à gay à gay agòɗ: “Azladeda, tsəbàw sləm dàŋ! ¹⁴ Səmon atəgw lakəl aŋa Zəzagəla bokuba uwana akəs azladza uwana azla Yahudiya aw, dagay la mok uwana Zəzagəla akəsàni azladza anik aŋatà, kà atà magay azlaaŋha. ¹⁵ Ŋgaha mapəhay aŋa azlaməna mapəh à atà gay à ahəl agagàm la uwaga. Kiya uwana matsəteray agòɗ:

¹⁶ ‘La lig aŋa uwaga la ahəŋ, Sufəl Zəzagəla agòɗ: ‘Gəɗawul à warŋ,
Gəɗàŋal ŋvagay aŋa David uwana akàlàh à ahəŋ,
Gəɗàtsizl uwaga ala.

¹⁷ Ŋgaha kà pəra, azladza gesina kà mayàh gi.’
Sufəl Zəzagəla agòɗ.

‘Təshay gesina uwana gəzàl atà, atà magay azlagulo.’

¹⁸ Kiya uwaga à uwana Sufəl Zəzagəla agòɗ, à uwana apəhla uwaga ala dagay uwarà la viyanu.”*

¹⁹ Gay gà la uwaga Yakuba azàlàŋ à gəl, agòɗ: “Gi kà madzugway gulo kà, asa à gi makad gəl à azlatsəhay anik uwanay à vok tagolà vok à slaka Zəzagəla aw. ²⁰ Ama ŋuləm mətəsetser à atà, kà tapad sləb uwana tadàhla matuwlay la mazlazlay aw, kà uwana uwaga kà mawisiga, tadahàh mabila aw, tapad tatak uwana tasufəŋ ala masufay aw, tasa aŋiz aw, kà uwana uwaga kà mawisiga.”* ²¹ Kay dagay uwarà kà, azladza tapəh mapəhay aŋa Musa la kəla gudəŋ aŋha tadzəŋàh la kəla vuɗ maduw ləv la gəy madəv kuɗa la aku!”

Wakità uwana tasləl à azlaməna madiŋal gəl à vok

uwana azla Yahudiya aw

²² Kiya uwaga azlaməna matapla la slaka aŋa Yesu, la azlamasiga, la azlaməna madiŋal gəl à vok takəs matsatsamani azladza anik la tataka aŋatà la abà kà, kà masləl atà la azla Pol la Barnabas à Antiyews. Yahuda uwana tazàlalla Barsabas atà la Silas, atà səla nna azlaməna madiŋal gəl à vok masəl atà gə. ²³ Tasləl atà la wakità uwaga la ahəl:

“Anu azlaməna matapla la slaka aŋa Yesu, la azlamasiga la uwana mətəsetser à akul. ‘Ayyi’, məgof à akul, akul azlaməna madiŋal gəl à vok, uwana akul azla Yahudiya aw la Antiyews ŋgaha la azlauwana la kutso Səriya la Səlisəya. ²⁴ Mətsənəŋ kà azladza anik tasà à uda la tataka gami la abà la abanay, tadà à awtəy kà makadəkulla gəl à vok, ŋgaha la mav à akul madzugway la gay aŋatà. Anu kà, məpəh à atà gay à ahəl lakəl aŋa uwaga aw. ²⁵ Gay gà la uwaga, gesina gami, məkàsàni azladza kà masləl à akul à awtəy, talakà azladeda gami mawoy atà gə uwaga à awtəy Barnabas atà la Pol, ²⁶ uwana taduw sifa aŋatà ala kà sləray aŋa Sufəl Yesu Kristu. ²⁷ Məsləl akul azla Yahuda atà la Silas à awtəy, tadəpəh à akul lakəl aŋa uwana mədatsetseray la abanay lagwa. ²⁸ Akəs à Masasəɗok tsikasla la gəl anu gesina gami, məkəs kà manəf akul, akəs à maham à ahəŋ anik à gəl aya aw, say uwanay məpəh la uwana akəsà vok pəra. ²⁹ Kapadaw sləb matulay aw, la aŋa mazlazlay aw; kasaw aŋiz aw, kapadaw sləb aŋa tatak uwana tasufəŋ ala masufay aw, kadaw à gəl gaw aw. Baŋa kasakaw uwaga la tsəh ala gesina kà, kà kadahàw delga. Mədzà à ahəŋ wurwur zlà!”

* 15:18 15.18 Amos 9.11-12 ✧ 15:20 15.20 2Musa 34.15-17; 3Musa 17.10-16; 18.6-23

¹⁶ Vèrdi anik la ahøj uwana mødà à slaka madøv kuða kà, mægagàm la dugu mayà gä, uwana la masasəfok mawisiga lakel. Apàhàh tatak uwana adàpaka vok la huma la gay, la mapàh tatak uwaga kà, adabəz sili kà anja mənğa anja. ¹⁷ Adzəkà manəf anu la tsəh, awiyaa agòd: “Azladza uwanay kà, azlaməna sløray anja Zəzagəla uwana kərkər la afik! Tapəhakulla tetəvi uwana Zəzagəla adàbəla akul!” ¹⁸ Apəhàh uwaga mavakay døj. La makəf gəl à ahøj, Pol adəy vok, agolà vok à slaka anja, agòd à masasəfok mawisiga: “Kak masasəfok mawisiga, la sləm anja Yesu: Sà à uda la masla la abà, gəgòd à kà!” La kirim yewdi masasəfok asà à uda. ¹⁹ Mok uwana azlamənğa anja dugu mayà uwaga tanənən kà tabəz sili aya aw kà, takàs azla Pol atà la Silas nğaha tabayà atà à vadavaday kasukwa à afik tsəràh à huma anja azlamənğa anja gudøj. ²⁰ Tadàla atà à slaka azlagumna anja azla Rom nğaha tagòd: “Azladza uwanay kà, tatsàlla magazlay à gudøj gami à abà, atà kà, azla Yahudiya. ²¹ Nğaha tapàhla mapəhay uwana ala wakità seriya gami avəra gay à azladza, anu uwana anu azla Rom, kà manəfay la makəsay.” ²² Maham à ahøj dza ahamà atà à gəl. Azlagumna tahàl lukut anja Pol atà la Silas, nğaha tavà tetəvi kà mazləbàh atà la kurpi. ²³ Uwana tazləbàh atà la kurpi kà, tawits atà à danay, nğaha tafàhà akur à azlaməna manəjla à atà à lig kà, kà manəjla atà lela. ²⁴ Uwana masla manəjla atà adatsən gay uwaga kà, awits atà à danay huđ gä à agu, nğaha abək atà sasala à asik.

²⁵ La huđ anja tataka vəf azla Pol atà la Silas tadəv kuða, nğaha tahàb kà mazləb Zəzagəla; azlaməna danay anik tatsənà atà babay. ²⁶ Katskats kutso abəlàkà vok mənğa mənğa, baməraka matatukway anja gày kà abəlàkà vok, katskats azlagamagay tapəzlla vok, nğaha la kità bay, azlasala la azlamazakazak tapàllàh à vok à azlaməna danay la vok ala kokuða gəl anjatà. ²⁷ Masla manəjla azlaməna danay atsənà ala. Uwana anənən kà gamagay anja gày danay mapəzll vok gä, abəf katsakar anja kà makəf vok, kà uwana adzəgw kà, azlaməna danay tahoyay. ²⁸ Ama Pol awiyà la ndzəfa: “Kay, kəkəf vok anjak aw, anu gesina gami la ahøj!” ²⁹ Masla manəjla uwaga anav akəl, ahàd à gày danay à agu la katskats la masəkulay la abà kà guba, atəf à makəla asik anja azla Pol atà la Silas. ³⁰ Nğaha asəlla atà à uda, anavà atà: “Azlamənğa gulo, mana gədfəhøj kà gi anja mabəlay ma?” ³¹ Tawulàlla: “Diñ gəl à Yesu à vok, nğaha kabəlay, kak la huđ gày anjak gesina!” ³² Nğaha tazàla gay anja Sufəl Zəzagəla la azlaməna huđ gày anja gesina. ³³ Masla manəjla gày danay uwaga, ahəl atà à uda la vuđ uwatà, nğaha apàllàh azlaamik anjatà. La lig la ahøj tadəhalla batem la azlaməna huđ gày anja gesina. ³⁴ Adàla azla Pol la Silas à gày anja à agu, nğaha avà à atà tatak may. Zil uwaga la azlaməna huđ gày anja gesina tahən ala la marabay, kà uwana tadin gəl à Zəzagəla à vok.

³⁵ Mok uwana məl adawula, azlagumna anja azla Rom, tasləl dza à slaka masla manəjla gày danay la magòdal: “Sàk azladza uwaga, tahàd anjatà”, tagòdal. ³⁶ Masla manəjla asà à wan, apəh à azla Pol, agòd à atà: “Azlagumna tav tetəvi kà mawits akul à gəl. Kaslawwalla vok anja mas à uda, kà madiy ankul la lapiya.” ³⁷ Ama Pol agòd à azlaməna masləlla atà à wan: “Lakuhu tazləbàh anu la vadavaday kasukwa la afik, nğaha kà pəra tawits anu à gəl kokuða madəh seriya gami, tsa anu babay kà, anu azla Rom kà pəra, tawits anu à gəl, la gəl à gəl ma kà mana mi?! Kiya uwaga aw! Say atà la gəl anjatà tatsa à wan kà mapəl anu ala, kəla!” ³⁸ Azlaməna masləllay tawùlla à gay uwaga à azlagumna Rom. Ama guba akəs atà kaykay kà uwana tatsənən kà Pol la Silas kà azla Rom. ³⁹ Kiya uwaga, atà tasà à wan tadəv atà kudu, nğaha tasəlla atà à lag la gày danay la aku, nğaha aya tadəv atà kuða kà mas à uda la kutso anjatà la abà. ⁴⁰ Uwana Pol atà la Silas tadasa à uda la danay, tahàd à mtəga Lidiya dadən. Uwana tanən azladedà la abata tadzərəfàhàtəla, nğaha tahàd anjatà.

17

Pol atà la Silas la Tesaloniki

¹ Tanəfà tetəvi uwana aguwà la Amfipolis la Apoloniya nğaha tabəzà Tesaloniki. Gày madəv kuða anja azla Yahudiya la ahøj la abata. ² Bokuba uwana adagay zagəla anja Pol, ahàd à gày madəv kuða à agu. Mavakay maduw ləv makər, Pol atsanà vok gay atà nna lakəl anja wakità Zəzagəla. ³ Atapàhàtəla la madzərəfàhàtəla, kà akəsà vok kà Kristu asà nğərpa, nğaha awul à uda la mamətsay, Pol agòd à atà: “Yesu uwanay gopəh à akul kà, Kristu gä la uwaga.” ⁴ Azladza anik la tataka anjatà la abà takəs uwaga, tanəfà Pol atà la Silas. Azla Gərək uwana tahøj yewdi anja Zəzagəla la azlamis huđ gudøj uwana sləm anjatà la ahøj anjувaw.

⁵ Ama azla Yahudiya tahən ala la manər. Kiya uwaga tahamà gay azlabuđaray à vok, tawiyà kà maf à tsəh à maham à ahøj dza à afik la magazlay la huđ gudøj. Tahàd

à mtëga Yason kà mayàh azla Pol atà la Silas, kà madla atà à huma aña azlamëna sawaray. ⁶Uwana tabëz azla Pol la abata aw kà, tabayà Yason la azladede anik à huma aña azlamënga aña gudëj, ngaha tadzëkà mawiyay: “Azladza uwana tawis gudëj à vok ala kà, atà, la uwanay tabëzà à abanay lakana. ⁷Yason akës atà à mtëga aña, azladza uwaga gesina tapësëw mapëhay aña sufël aña Rom, kà uwana tapëhay kà mën sufël anik la ahëj, uwana slëm aña Yesu”, tagòf. ⁸Gay uwaga avëdzàh à tsëh à maham à ahëj dza à afik la azlamënga aña gudëj. ⁹Kiya uwaga azlamënga tafà leri à azla Yason à gël kà tapël sili dän kà maduw atà à gël.

Pol atà la Silas la Bere

¹⁰Uwana vëf adasa à wanj, azladede tagòf à Pol atà la Silas: “Dàw ankul à Bere!”, tagòf à atà. Mok uwana tabëzà abata kà, tahàd à gay madëv kufa aña azla Yahudiya à agu. ¹¹Azlauwanay kà madzugway anata kà delga, kà azla Yahudiya aña Tesaloniki, takës gay Zëzagëla la ahàl sël, kèla mavakay tamëdzëfàh huf aña wakità, kà masëlay à banja uwana Pol apëhay kà dziriga. ¹²Ngaha anuvaw la tataka anata la abà tadiñal gël à vok. Azla Gërëk la azlamis uwana slëm anata la ahëj, la azlazil tadiñal gël à vok. ¹³Ama uwana azla Yahudiya uwana la Tesaloniki tatsënëj kà Pol apëh gay Zëzagëla la Bere kà, tasà à wanj la maham à gay azladza à vok, kà mavëdzàh azladza ala. ¹⁴Kiya uwaga azladede tadàla Pol à gay dërëv, ama Silas atà la Timotawus tagòf à Bere. ¹⁵Azlauwana talakà Pol, tabëzla tsëràh à Atena. La lig la ahëj tawùlla anata à Bere la gay uwana la ahàl Pol, apëh à atà kà mapëh à azla Silas atà la Timotawus, kà tabëzalla vok la katskats.

Pol la Atena

¹⁶Mok uwana Pol akùd azla Silas atà la Timotawus la Atena kà, lëv azëj mënnga kà manëj gudëj uwaga adahënla la azlamazlazlay. ¹⁷Tabayàhà vok gay la azla Yahudiya la gay madëv kufa la aku, la azlauwana azla Yahudiya aw, ama tahöy yewdi aña Zëzagëla, la azlauwana la vadavaday kasukwa la afik, ngaha la azlauwana tagagamàh la masla. ¹⁸Azlamëna matapla azladza anik azla Epikuriya ngaha la azla Sëtöyisaya tavats gay la masla. Azlaanik tagòf: “Mana masla gay zlawzlawga uwanay agòf lagwa zlà ma? Zlahaw kà apëhay kà gay aña azlazëzagëla mëlök gä.” Tapëh uwaga kà, kà uwana Pol apëhay lakël aña Yesu, ngaha lakël mawul à uda la mamëtsay. ¹⁹Kiya uwaga takës, tadàlla à gudëj uwana à afik Arewopez la huma aña azlamëna sawaray, ngaha tagòfal: “Lagwa asa à anu masëlay matapla, ma uwala asa à ka matapanula? ²⁰Kà uwana asa à ka matapanula azlatatak mëlök gä, ngaha bay asa à anu masël godega aña zlà.” ²¹(Azla Atena la azlamëlök dza uwana tadzà à ahëj la tataka anata la abà, tadfahà tatak aw, say matsën azlagay mawga uwana tavats përa)

²²Hadzak, Pol atsizilla ala la tataka aña azlamëna sawaray la abà ngaha agòf: “Azla Atena, godzùgw kà akul kanëfaw azlatsëhay zëzagëla anik anik gërgagër. ²³Hadfay, bokuba uwana gëdauguzahay la huf gudëj ankul la abà kà, gënëj à azlaslaka mazlazlay ankul. Ngaha gënëj à anik aya uwana tatsëtsèral à vok: ‘Slaka uwana kà aña zëzagëla dza asël slëm aña aw.’ Iyay zlà! Kaslëkawaw kokufa masëlay, ama gi kà gësël, uwana gesà à wanj kà mapëhakulla. ²⁴Masla la uwana adfahën gudëj à vok, la azlatatak uwana la huf aña gesina, ama masla kà adza à ahëj la azlagay uwana la aku, ahàl aña dza anjäl aw. ²⁵Masla kà anëkufa kà dza aña madfahalla tatak aw, kà uwana masla la uwana av sifa à dza la masafay gesina.* ²⁶La dza tekula la abà, la uwana mayyi à tsëh ala apakà vok gesina, ngaha abëk atà à ahëj la gudëj uwanay la vok. Dagay uwana alëg madfàh vok, afàh azlakasla à ahëj la azlamakwi aña madz à ahëj anata babay. ²⁷Adfahà à atà kà atà mayàh masla tëlztatëzl, kà atà aña mafëzal. Ama la dziriga kà, Zëzagëla kà kërker la uwabeyuwi gami aw, ²⁸Kà uwana:

‘La masla anu la sifa masla la vok aña masafay anu la ahëj.’

Delga à uwana azladza anik ankul tahàb, ngaha tagòf:

‘Anu babay kà anu azlabëza aña.’

²⁹Tsa anu azlabëza aña Zëzagëla kà, mësllala vok mëgagazlëla la madzugway kà, Zëzagëla kà bokuba luwàluwà, sili, banjaw akur aw. Kà uwana aña azlatatak uwaga kà, dza adfahà à atà la hanjëli aña, kà azlamazlazlay aña. Azlatatak uwaga kà azla aña Zëzagëla aw. ³⁰Iyay, kà uwana Zëzagëla atugw tsakana aña uwarà aya aw, kà uwana azladza tadza à ahëj kà la mawur gël aw la abà. Ama lagonay kà, adazala azladza bamëraka lëli gesina, kà mapëh gay la lëv ala. ³¹La hadfay kà kà, afà mavakay tekula à ahëj, à uwana adàfah seriya à gudëj à vok à gël la dziriga. La ahàl aña dza tekula uwana akësàni, ngaha apëhanula masla la mawul à uda la mamëtsay.”

* 17:25 17.25 1 Sufël 8.27; Yesayya 42.5

³² Uwana tatsənà, kà Pol apəh lakəl anja mawul à uda la mamətsay kà, azladza anik takəfəslal, azlaanik tagəf: “Iyay, lagwa kà, asa à anu anja mədətsəbal sləm vərđi anik aya zlə!” ³³ Kiya uwaga à uwana, Pol asà à uda la tataka anjatà la abà. ³⁴ Azlaanik tadà à atà à adi, tadinjal gəl à vok. La tataka anjatà la abà kà Denəs tekula la tataka maham à ahənj sawaray, uwana la abà la gudənj la afik, mis anik uwana sləm anja Damarəs, nğaha la azladza anik aya.

18

Pol la Korintiya

¹ La lig anja uwaga la ahənj, Pol atsizlla ala la Atena nğaha ahàd à Korintiya. ² Zil Yahudiya anik la ahənj la abatà, sləm anja Akilas, tagagəm la Pol. Pol ahàd à mtəga anja kà manənj atà à gay. Masla kà, tayyà kà à makoray anja Pontiya à abà, ama asafay la abatà aw. Asà à wañ kà la Italiya la ahəl à ahəl atà la mis anja Pərəskila, kà uwana sufəl Rom, uwana sləm anja Kələd, akudəkàh azla Yahudiya gesina la Rom. ³ Sləray anjatà kà tekula la Pol, (Mataf gày lukut) adzà à ahənj la mtəga anjatà, nğaha tadəhàhà sləray la slaka gə. ⁴ Kəla vud maduw ləv, Pol abayàhà vok gay la azla Yahudiya la gày madəv kuđa la aku, kà atà tadinjal gəl à vok, baməraka azla Gərək bay.

⁵ Ama mok uwana azla Silas atà la Timotavvus tasà à wañ la Makeduniya kà, Pol adəhà sləray anik aya aw, say azənj kà gay Zəzagəla la mapəhla à azla Yahudiya, kà Yesu kà masla uwana Zəzagəla afəl dzakwa à gəl. ⁶ Ama uwana azla Yahudiya tafà gəl à gay anja aw, tatsəkəl magodəhəy à gəl Pol adəf à atà burburu anja gudənj anjatà à gəl, agod à atà: “Banja kadəzahawla kà, mawisiga kà adagay kà ankul, gay gulo la abà aw. Dagay lagonay lagwa gəgola vok gulo à slaka azladza uwana azla Yahudiya aw adagay.” ⁷ Kiya uwaga adà anja la abatà, ahàd à mtəga anja dza anik uwana sləm anja Titiyus Yustus, uwana ahəy yewđi anja Zəzagəla, nğaha gày anja kà agə la makəla anja gày madəv kuđa. ⁸ Kirəspus, mənğa anja gày madəv kuđa, adin gəl à Sufəl Yesu à vok la huđ gày anja gesina. Azla Korintiya uwana tatsənà gay uwaga, tadinjal gəl à vok, nğaha tadəhà à atà batem.

⁹ La vəd la abà vərđi anik masesinay asesinla Pol, Sufəl Zəzagəla agodəf: “Guba akəs ka aw, dà à huma à gay la mapəh gay gulo, kadza à ahənj titi aw!” ¹⁰ Kà uwana gi la ahənj la kak. Dza la ahənj aslala vok kà makəs ka, kà madəhə à ka mawisiga à vok aw, kà uwana azlauwana tadəgəhəy azlaanjulo kà, atà njuv la gudənj uwanay la abà aw.” ¹¹ Pol adzà à ahənj la Korintiya mavay la tenma, atapəhla gay Zəzagəla à azladza.

¹² Mok uwana Galiyon apək gumna anja kutso Akayya, azla Yahudiya tahamà gay à vok, takəs Pol, tadəlla à huma seriya, ¹³ Tagodəf: “Dza uwanay kà apapat azladza kà atà makədəf à Zəzagəla anik à ahənj, la azlatətəvi anik anik, uwana adəb vok la mapəhəy gami aw.”

¹⁴ Pol asəl mabəđma, à mok uwana Galiyon agodəf à azla Yahudiya: “Banja dza uwanay akod dza, banjaw adəh mawisiga anik zlazladəga naka gəbasin, gətsəb akul sləm. ¹⁵ Ama tsa kabayaw vok gay kà lakəl anja azlagay, lakəl anja azlasləm, nğaha lakəl anja wakitə seriya ankul kà, say akul la gəl ankul kakədəvaw uwaga ala, gi kà, gədəh seriya anja tsəhəy gə uwaga aw.” ¹⁶ Nğaha akudəkàh atà la huma seriya. ¹⁷ La abatà gesina anjatà takəs Sostenus, mənğa anja gày madəv kuđa, tazləb la huma seriya. Ama Galiyon afəl sləm aw.

Pol awul à Antiyews

¹⁸ Uwana Pol adadzın à ahənj la Korintiya aya kà, la lig la ahənj, asək azladeda à ahənj, ahàd à Kenkeriya atà la Pərəskila la Akilas. La abatà afəts gəl à ahənj kà maslaf vok anja uwana asləf la huma Zəzagəla. La lig la ahənj ahàd à kəslah iyaw à afik, kà mad à kutso Səriya.^{*} ¹⁹ Uwana tabəzà Efesus, Pol asakà Akilas à ahənj atà la Pərəskila, nğaha ahàd à gày madəv kuđa à agu, kà matsən vok gay la azla Yahudiya. ²⁰ Atà tanavəl masafani la abatà, ama akəs aw. ²¹ Asək atà à ahənj la magodəf à atà: “Banja asa à Zəzagəla kà, gədəwul à wañ à slaka ankul aya”, nğaha adà anja à Efesus la kəslah iyaw.

²² Mok uwana adabəz à Zəsare ka, ahàd à Urusalima kà madəh ayyi à azlaməna gay Zəzagəla la abatà. La lig la ahənj, adà à ahənj à Antiyews. ²³ Uwana adadzən à ahənj la abatà kà, awul anja aya, aguwa à uda la makoray anja Galatiya la abà, nğaha la Fərizi la madzərəđəh azlaməna madinjal gəl à vok ala.

Apolos azanj gay Zəzagəla la Efesus nğaha la Korintiya

²⁴ La zamana uwatà kà, zil Yahudiya anik la ahənj, sləm anja Apolos tayyà à Alekəsandəra, abəzà à gudənj Efesus. Masla la hanjəli anja mabəđma, asəl wakitə Zəzagəla lela.

* 18:18 18:18 4Musa 6.18

²⁵ Asèl tetèvi anja Sufèl Zèzagèla lela. La mabādma delga apàhla gay anja Yesu à azladza la dziriga. Ama batem tsèhay gà anja Yuhana la uwana asèl pèra. ²⁶ Adzèkà mapàh gay la gày madèv kudfa la aku la kokudfa guba. Mok uwana Pèrèskila atà la Akilas tatsèn mapèhay anja, tadàla masla à mtèga anjàt, tapèhalla tetèvi anja Zèzagèla la dziriga. ²⁷ Kiya uwaga Apolos akès tetèvi kà mad à kutso Akayya. Azladedà mèna madiñal gèl à vok tadzèrèdàn ala, tatsètèral wakità à ahàl, kà mav à azlamèna madiñal gèl à vok la kutso uwatà, kà atà makèsay la ahàl sèla. Mok uwana adabèz à abatà kà, azlèk azlamèna madiñal gèl à vok la vok mahamay uwana Zèzagèla avàl. ²⁸ Apèh à azla Yahudiya la huma azladza gesina, tsèràh à uwana dza apèzl gay maslèk aw, apèhatàla la wakità Zèzagèla la abà, kà Yesu la uwana dza uwana Zèzagèla afàl dzakwa à gèl, Kristu.

19

Pol apèh gay Zèzagèla la Efesus

¹ Mok uwana Apolos la Korintiya, Pol aguwà la gudèj la afik, abèzà à Efesus. La abatà la uwana abèzà azlamèna madiñal gèl à vok anik à vok. ² Anavà atà: “Kabèzaw Masasèdòk Zèzagèla, à mok uwana kadiñawwal gèl à vok ay?” Tawulàlla, tagòf: “Tetuwa mètatsènèj tapèhay lakèl anja Masasèdòk Zèzagèla aw.” ³ Kiya uwaga Pol anavà atà: “Tsèhay batem ma uwala tadahàkullàn la?” Tawulàlla: “Tsèhay gà anja Yuhana”, tagòfal. ⁴ Pol agòf à atà: “Yuhana adahà batem à azlauwana tapàh gay la lèv ala, ngàha agòfah à azla tsèrayel kà, say tadinj gèl à dza uwana à vok adanèfal à tsèh à wanj, uwaga kà Yesu.” ⁵ Mok uwana tatsèn uwaga tadahàtàn batem la slèm anja Sufèl Yesu. ⁶ Pol abèk à atà ahàl à gèl, gesina anjàt tabèzal Masasèdòk Zèzagèla. Tadzèkà mabādma la azlagay mèlok gà, ngàha tazà sayda uwana tabèzal la slaka Zèzagèla. ⁷ Gesina anjàt kà taslay kulo gèl anja sèla.

⁸ Tèla makèr Pol adahàn kà matapatàla la gày madèv kudfa anja azla Yahudiya la aku, apàhla azladza kokudfa guba, kà atà tatsènà vok gay, awàf vok à uda kà mapèhatàla gay anja makoray Zèzagèla. ⁹ Ama azlaanik anjàt tadzadzànjàh gèl ala, takweskà, tapèh mawisiga lakèl anja tetèvi anja Sufèl Zèzagèla la huma maham à ahèj dza. Kà uwaga à uwana Pol ahèl azlamèna madiñal gèl à vok, tahàd anjàt. Kèla mavakay atàpla azladza la gày nekol anja Tiranus la aku. ¹⁰ Anèfà madfah uwaga tsèràh à mavay sèla, tsèràh à uwana azladza la kutso Asèya, la azla Yahudiya, ngàha la maham à ahèj dza anik gesina tatsènà gay anja Sufèl Zèzagèla.

Gay anja azlakona anja Seva

¹¹ Zèzagèla adahàhà azlanadzipo tsèhay anik anik la ahàl anja Pol. ¹² Azlalukut uwana tadabani vok anja Pol la azlanalbèt gesina kà tawaràhà azlamèna dufvats ala gesina. ¹³ La kaslà uwatà azla Yahudiya anik la ahèj uwana tauguzàhàh, tawùl à abanay, tawùl à abatày kà makudèkàh azlamasasèdòk mawisiga à azlamèna dufvats lakèl ala, tazèb kà slèm anja Sufèl Yesu kà makudèkàhla azlamasasèdòk mawisiga uwaga. Tagòfah à azlamasasèdòk uwaga: “Mègòf à akul: Sàw à uda la slèm anja Yesu uwana Pol apahay!” ¹⁴ Uwaga azlabèza anja mènj madzahaga anja mav tatak à Zèzagèla, uwana slèm anja Seva, tadahà uwaga atà mèdèf. ¹⁵ Ama masasèdòk mawisiga agòf à atà: “Gèsèl Yesu, Pol babay gèsèl, ngàha ma akul ma, akul azla uwa tak uwa?” ¹⁶ Masla zagèla zagèla avàl à atà à adì, adfuwà à atà gesina. Azlèbàh à atà à gay, adahàh à atà amik à vok, tavàlèh à uda, tahòy anjàt la godega deyday. ¹⁷ Azla Yahudiya la azlamaham à ahèj dza anik anik, uwana tadzà à ahèj la Efesus gesina, tatsènà uwaga. Lèv avàl à atà à gay tsèràh à uwana azladza tazànj mazlèbay slèm anja Sufèl Zèzagèla à gèl kaykay aya. ¹⁸ Anjuvaw la tataka azlamèna madiñal gèl à vok la abà tasàhà à wanj, tapàh gay la lèv ala lakèl anja uwana tadadahanj la huma azladza gesina. ¹⁹ Anjuvaw la tataka anja azlauwana la abà tadfah mazla, tasàhla wakità anjàt à wanj, tadàwal à akàl à tsèh la huma anja azladza gesina. Tatùgw sili anja wakità gà, uwana kà adfah gursu dèbow dzik zlo. ²⁰ Kiya uwaga à uwana gay anja Sufèl Zèzagèla aslèhà gèl à ahèj la ndzèfa la mapèhla ndzèfa anja ala.

²¹ Mok uwana uwaga adada à lig gesina, Pol akès tetèvi uwana aguwà la Makeduniya, la Akayya kà masla anja mad à Urusalima. “Banja gèdabèzay kà, gèdàd à gudèj Rom babay”, agòf. ²² Aslèl azlamèna mazlakay anja sèla à Makeduniya, Timotawan atà la Erastus, ama masla kà adzànì à ahèj la Asèya dadànj.

Masàh gèl la Efesus

²³ La kaslà uwatà kà, gay mènja atsizilla ala la Efesus lakèl anja tetèvi anja Sufèl Zèzagèla. ²⁴ Dza anik la ahèj la abatà, slèm anja Demetèriyus, uwana avàtsàh azlamafsa à vok anja gày uwana azladza taslèkàwàh, uwanay gày anja mazlazlay

Arəteməs misga, akəs atà à vok la azlaməna sləray aŋha gesina kà madawla. ²⁵ Azalàh azlaməna sləray aŋha, la azladza uwana sləray aŋatà tekula, ŋgaha agòd à atà: “Azlakona, kasəlaw kà, la sləray gami akəs à anu aw takay, ²⁶ kanəŋawwan, ŋgaha katsənaŋwan uwana Pol uwanay adəhəŋ aw takay? Agòd à azladza kà: Azlamazlazlay uwana mədəhəŋ la ahàl kà, azlazəzagəla delga aw, agòd. Ŋgaha azladza takəs gay aŋha kà la abanay la Efesus pəra aw, ama la makoray aŋa Asəya la abà gesina bay. ²⁷ Baŋa kiya uwanay kà, azladza tadəpəh mawisiga lakəl aŋa sləray gami, ŋgaha tadəpəsew mən gày mazlazlay Arəteməs bamərika Arəteməs bay, kà tadəhoy yewdi aŋha aya aw. Tekedik kà, masla la uwana azla Efesus tasləkaway la azladza gudəŋ à vok gesina!”

²⁸ Mok uwana tatsəŋ gay uwaga kà, tapakà ləv kaykay, tadzəkà mawiyay, tagòd: “Arəteməs aŋa azla Efesus kà mənŋa, Arəteməs aŋa Efesus kà mənŋa!” ²⁹ Gay uwaga asləhà gəl à gudəŋ à abà gesina, awisà gəl à azladza à vok, takàs azlaməna manəf Pol səla, Gayyus atà la Arəstarkus uwana tasà à wan la Makeduniya, tabaya atà, tadàla atà à vadavaday aŋa marazlay à afik. ³⁰ Pol bay kà asal aŋa mad à abà, ama azlaməna madiŋal gəl à vok tadəfal gay à ahəŋ. ³¹ Azlaməŋga aŋa kutso Asəya uwana azlaslagama aŋha tasləl gay à slaka aŋha, tadəval kudà kà masla aŋa mad à vadavaday marazlay à afik aw. ³² La mok uwaga kà, maham à ahəŋ gesina hohodfa gəl à vok, kəla uwabeyuwi awiyay deyday pəra, kà uwana aŋuwaw la tataka aŋatà la abà, tasəl gay uwana ahamà atà gay à vok aw. ³³ Zil Yahudiya anik la ahəŋ la abatà la tataka azladza la abà, sləm aŋha Alekəsander, tadàlla à awtày à huma aŋa maham à ahəŋ dza kà uwana azla Yahudiya tasəl masla, kà mapəhla godega aŋa gay uwaga à azladza. ³⁴ Ama uwana tasəl kà masla babay zil Yahudiya kà, tazà mawiyay à zagəla la kuda tekula, tasəf la mawiyəl la abà azlagay sa səla: “Arəteməs aŋa azla Efesus kà mənŋa, Arəteməs aŋa azla Efesus kà mənŋa!”

³⁵ “Dzàw à ahəŋ titi!”, mən səkəreter aŋa gudəŋ uwaga agòd à atà kà kudà kudà: “Haday, akul azla Efesus kà uwabeyuwi asəl kà gudəŋ aŋa Efesus kà masla manəŋla mən gày aŋa Arteməs, ŋgaha la maftsa vok tsikaslaga aŋha, uwana asà à ahəŋ la zagəla, kəla dza uwala beyli asəl uwaga. ³⁶ Dza la ahəŋ ats gadzewi lakəl aŋha aw. Gay gà la uwaga say kadzaw à ahəŋ titi, ŋgaha kadəhaw haŋkəli lakəl aŋa uwana kadəhawwan bay. ³⁷ Haday, səlàw kà, azladza uwana kasəwla atà à abanay kà, tadà à gəl la mən gày mazlazlay gami la aku aw, uwala tapəh mawisiga lakəl aŋa mazlazlay gami bay aw. ³⁸ Baŋa gay la Demətərius lakəl, la azlaməna sləray aŋha, kà mapuw gudzi à dza à gəl kà, kaslā la ahəŋ à uwana dza ada à seriya la mok uwatà à huma aŋa azlaməŋga, la abatà la uwana tadəvah atà ala. ³⁹ Baŋa akul la azlagay anik aya babay kà, say kadawla à huma à azlaməna sawaray, kà makədəvəŋ ala la abatà. ⁴⁰ Ama kà aŋa uwanay lakana kà, akəs anu vok aw, kà uwana tagòd à anu kà, akul la uwana madatsizl gay ala, tagòd à anu, kà uwana akəs anu vok kà maham gay à vok kiya uwanay aw!” ⁴¹ Ŋgaha mok uwana adakəf gəl à gay uwaga kà: “Dàw aŋkul!”, agòd à atà.

20

Pol ahàd à Makeduniya ŋgaha à Akayya

¹ Mok uwana gay atasləla kà, Pol ahamà gay à azlaməna madiŋal gəl à vok à vok. Adzərədəhàla la azlagay, agòd à atà: “Gi kà, gəda à Makeduniya.” ² Aguwà à uda la kutso uwatà la abà la madzərədəh azlaməna madiŋal gəl à vok ala, la mazàh à atà gay Zəzagəla, ŋgaha ahàd à Akayya. ³ Adzà à ahəŋ la abatà təla makəŋ, adəhà vok à ahəŋ kà mad à Səriya la kəslah iyaw, ama atəsnəŋ kà azla Yahudiya tatsəŋ vok gay kà makəfay, gay gà la uwaga awlil à Makeduniya. ⁴ Sopatəŋ, kona aŋa Pirus, zil Bere alakəŋ, ŋgaha bay Arəstarkus atà la Sekundus, uwana azla Tesaloniki, Gayyus zil Derbe, Tisik atà la Tərofim ŋgaha bay Timotawus, uwana atà azla Asəya, tahàd atà nna gesina. ⁵ Tatsà vok à huma kà anu, tahàd à Tərowas, takudà anu la abatà. ⁶ Anu la gəl gami məgəf à Filipiya, uwana madəvaday aŋa pain uwana tatak maməsələ la tsəh aw adada à lig kà, la mahənay zlo kà məbəzà atà à vok la Tərowas la kəslah iyaw. Məfahà kasukwa tekula la abatà.

Pol anəŋ azlaməna Tərowas à gay

⁷ La məkəkhə gə, vuf səbdu kà, maham gay à vok kà mazuw tatak maw tsikaslaga. La abatà Pol apəh gay à azladza. Apəh gay tsərəh à tataka wəf, kà uwana la bebəŋ gə kà, asal mad aŋha. ⁸ La gày uwatà la aku lakəl aŋa gày uwatà la afik, məhəm à agu kà, azlafənəs aŋuwaw dzadzàhà la ahəŋ. ⁹ Bəzi kohana uwana sləm aŋha Antikus adzà madzay la gay fenetər. Pol adà à huma à gay la mapəh gay Zəzagəla tsərəh à uwana Antikus ayi vok, adzəhəl. Tsəŋurəsl, atəd à ahəŋ, dagay la kəl gày mamakər la afik, tazəb à afik kà adamətsay. ¹⁰ Ama Pol asà à ahəŋ, ahübal à gəl, akəs à vok,

agòd: “Katawaw aw, mamòtsayga aw!” ¹¹ Ngaha Pol awùl à gày uwatà à afik, azèb Pain atsèkàñ ala, ngaha tazùw gesina anàtà la slaka gà. Apèh à atà gay uwaga tsèràh à gay bebèñ, la lig la ahèñ adà anha. ¹² Tadàla bèzi kohana uwaga à mtèga la sifa, taràb mènja kà uwaga, tadzèrèdàhà ala.

Pol atsizilla ala la gudèñ Tèrowas, ahàd à Milet

¹³ Anu kà, mòtsà vok à huma, kà Pol anja maday à kèsлах iyaw à afik uwana adàla anu à Asos. La abatà la uwana mèdzùgw mazèb Pol à tsèh à kèsлах iyaw à afik, kà uwana masla kà anèfà tetèvi à asik. ¹⁴ Mok uwana adabèz anu vok la Asos kà, mèzèb à tsèh à kèsлах iyaw à afik, mèhàd à Mitilen. ¹⁵ Mètsizilla ala la abatà aya, mèhàd à huma anja Tsiyo. La bebèñ anha aya kà, mèbèzà à Samos, ngaha la bebèñ anha aya kà maufad kà, mèbèzà à Milet. ¹⁶ Asà à Pol kà matsèd à Efesus lakèl ala, kà uwana asàl matsizl à ahèñ kà maz kaslà ala la kutso Asèya aw, kà uwana av vok kà mabèz à Urusalima gurayña madèvaday Pentakosta, adàh vok kèla.

Pol apèh gay à azlamasiga la Efesus

¹⁷ Mok uwana Pol adabèz à Milet kà, aslèl gay à slaka azlamasiga anja maham à ahèñ mèna gay Zèzagèla la Efesus: “Sàw à wan à abanay!”, agòd à atà. ¹⁸ Mok uwana tadùw à awtày à slaka anha kà: “Kasèlaw kakay à madz à ahèñ gulo uwana gèdzà à ahèñ la makoray anja Asèya la abà”, agòd à atà. ¹⁹ “Gèdàhà sléray anja Sufèl Zèzagèla la lèw tekula, ngaha la iyaw tugwi la adi, la ngèrpa, la tataka ankul la abà kà matsèn vok gay la azla Yahudiya. ²⁰ Sèlèw babay kà, gèhadàhàkulla tatak uwana à vok akèsà akul à vok aw. Gèpèh à akul uwaga gesina, ngaha gètàpakulla la dazuwaya, ngaha bamèraka la azlahud gày ankul. ²¹ Gèzàlla azla Yahudiya ngaha la azlauwana azla Yahudiya aw kà mapèh gay la lèw ala, kà atà magola vok à slaka Zèzagèla, ngaha atà anja madìñ gèl à Sufèl Yesu à vok. ²² Ama lagonay kà, gèday à Urusalima, kà uwana Masasèdok Zèzagèla afà à gi leri à gèl kà maday, lagwa kà, gèsèl tatak uwana adàbèz à gi la abatà aw. ²³ Kèla kà, kèla hud gudèñ uwana gèguwà à uda la abà kà, Masasèdok Zèzagèla agòd à gi, kà tadàduw gi à danay, gèdàsa ngèrpa. ²⁴ Ama kà gi kà gèdàmòtsay, gèdàdza à ahèñ la sifa kà, bà tatak tekula, banja gèdàkèd gèl à madahay gulo, la sléray uwana Sufèl Zèzagèla afà à gi à gèl kà diga, uwaga kà mapèhla ala gay marabèñ lakèl anja vok mahamay anja Zèzagèla.”

²⁵ “Gèuguzàhàh la tataka ankul la abà gesina, gèzà gay anja makoray Zèzagèla. Lagwa kà, gèsèl kà kadànèñaw gi aya aw. ²⁶ Kà uwaga à uwana gèpèh à akul la paraka lakana: Banja tekula ankul azalla kà: Gay gulo aw. ²⁷ Kà uwana gèzàla masal anja Zèzagèla gesina, gèhadàhàkulla tatak à vok aw. ²⁸ Nèñàwla gèl ankul, nèñàwla maham à ahèñ mèna gay Zèzagèla, uwana Zèzagèla asùkw atà la mamòtsay anja Kona anha. ²⁹ Kà uwana banja gèdàda anjulo kà, azladza tadàsahah à wan bokuba azlakèda fèta à tataka ankul à abà, tadàsaka azlatuwan aw. ³⁰ Bamèraka la tataka ankul la abà bay kà, tadàpahla vok ala kà madàh fida kà azlamèna madìñal gèl à vok anja manèf atà bay. ³¹ Kìya uwaga kà, nèñàwla gèl ankul, awulla à akul à gèl gèdapaha à akul mavay makèr, mavakay la mahanay gesina, la iyaw tugwi la adi.”

³² “Lagonay kà, gèdàbèk akul à ahàl anja Zèzagèla, ngaha à ahàl anja vok mahamay anha. Aslala vok kà anja mazingèñ akul, aslala vok kà anja mapis à akul gay à vok la lèmana uwana adahàkullàn gesina. ³³ Gènavà sili la lukut la slaka dza aw. ³⁴ Akul la gèl ankul babay kà kasèlaw, kà gèdàhàhà sléray la ahàl gulo, kà gi anja madàhla tatak uwana gèñèkudà anha la azladza uwana anina. ³⁵ La azlatatak gesina la abà, gèpèhàkulla kà say kazlakaw azlamèna kudà la tsèhay sléray uwanay gesina. Tawulla anu gèl babay à gay anja Sufèl Yesu uwana agòd la gèl anha:

'Marabay agay la dza uwana avày, marabay uwanay aduwa marabay anja dza uwana akèsay pèra',

Yesu agòd.”

³⁶ Mok uwana Pol adadèw gay anha à gay kà, akèd à ahèñ, adèw kudà atà nna la slaka gà gesina. ³⁷ Gesina anàtà tatàw, la makas masla à vok ngaha: “Hàd, zla!”, tagòdal la mabak ahàl à kudà. ³⁸ Tapakàh lèw mènja, kà uwana 'Kadànèñaw gi aya aw', agòd à atà. Ngaha talakàn à kèsлах.

21

Pol aday à Urusalima

¹ La abatà 'Maday', mægòd à atà, mèhàd la kèsлах iyaw à afik, mèbèz à Kos. La bebèñ gà, mèbèz à Rodès. Dagay la abatà mèhàd à Patara. ² La abatà la uwana mèbèzà à kèsлах iyaw, kà mad à Fenesèya. Mèdà à afik, mèhàd, ³ Katskats mènèñà gèdèñ Sípère,

uwana la tataka dəröv la abà, məfàl à ahàl gudzay, kà mad à Səriya. Məsà à vədàh la Tir kà matsək kazlanja anja kəslah iyaw à ahəj. ⁴ Məbəz azlaməna madiŋal gəl à vok la abatà, ŋgaha mədžà à ahəj kasukwa tekula anina. Masasəfok Zəzagəla apəhatàla tatak uwana adàbəz Pol, kiya uwaga kà: 'Kadà à Urusalima aw', tagòfal. ⁵ Ama uwana kasukwa uwatà adada à lig kà, mətšizlla ala, məhàd la azlamis anjatà la azlabəza anjatà gesina, talakà anu à uda la huđ gudəj la abà. Məkədəfàh à ahəj la gay dəröv mənġa, madəv kufca. ⁶ Mok uwana: 'Mədžà à ahəj wurwur', mədagof à vok kà, məhàd à kəslah iyaw à afik, atà babay tawùl à mtəga anjatà.

⁷ Kiya uwaga mədəvə mauguzahay gami à gay la iyaw lakəl la mad à Tir, tsəràh à Potolemawus. La abatà babay, azladeda takəs anu, məvakà à abatà à slaka anjatà. ⁸ La bebəj gə məhəl vok, məhàd à Zəsare. La abatà məhàd à mtəga anja Filip masla mapəh gay Zəzagəla, məhən à mtəga anja. Masla kà tekula la tataka azladza mədəf uwana la abà, tatsatsəmàni atà la Urusalima. ⁹ Azladəgam anja la ahəj, uwana tadàh à zil dadəj aw, tapàhəh gay uwana Zəzagəla apəh à atà à ahàl kà mapəh à azladza. ¹⁰ Uwana mədəhəni à abatà kà, masla mapəhal gay à ahàl anja Zəzagəla kà mapəh à azladza, uwana sləm anja Agabus, asà à wəj la Yahudiya. ¹¹ Asà à wəj à slaka gami, azəb parapara anja Pol, awàdla asik à ahəj la azlaahàl anja, agòd: "Aganay uwana Masasəfok Zəzagəla agòd: 'Azla Yahudiya la Urusalima tadəwad' dza anja parapara uwanay kiya uwanay, tadəfa masla à ahàl anja azladza uwana azla Yahudiya aw.'" ¹² Mok uwana mədatsən gay uwaga, anu la azladza uwana la Zəsare kà: "Kamkam, kahad à Urusalima aw!", məgòd à Pol. ¹³ Ama awùlla à uda: "Kà mana katawaw ma? Asa à akul kà mav à gi guba takay? Ama gi kà, gədàvə vok gulo kà mawad gi la Urusalima pəra aw, ama kà mamətsay kà Sufəl Yesu Kristu bay." ¹⁴ Uwana məslàla vok kà madəfədal gay à ahəj aw kà, mədžà à ahəj titi: "Bokuba uwana asa à Zəzagəla pəra zlà", məgòfal.

¹⁵ Uwana mədadzà à ahəj la abatà kà, mədəfəhà vok kà mad à Urusalima. ¹⁶ Azlaməna madiŋal gəl à vok anik la Zəsare talakà anu. Tadàla anu à mtəga anja Manason, uwana asà à wəj la Sipəre, masla madiŋal gəl à vok dagay uwarà, kà mahən anu à ahəj.

Pol ahad manəj Yakuba à gay

¹⁷ Mok uwana mədəbəzay à Urusalima kà, azlamadiŋal gəl à vok la abatà, takəs anu la ahàl səla. ¹⁸ La bebəj gə, məhàd, la azla Pol, à mtəga anja Yakuba, à slaka uwana azlamasiga anja maham à ahəj məna gay Zəzagəla gesina tahaməh gay à vok. ¹⁹ Pol adəhà à atà 'Ayyi', ŋgaha apəh à atà sləray, uwana Zəzagəla adəhà la ahàl anja la tataka anja azladza uwana azla Yahudiya aw. ²⁰ Mok uwana tatsən uwaga la slaka anja kà, tazləbà Zəzagəla, tagòd à Pol: "Deda à kanəjə uwana apakà vok la abanay la slaka azla Yahudiya tsi. Azla Yahudiya dəbow dəbew tapakà azlamadiŋal gəl à vok. Ama gesina kà tanəfa gay anja wakità seriya aya. ²¹ Tatsənəj kà, katəpla azla Yahudiya uwana tadžà à ahəj la tataka anja azla tsəhay dza anik la abà, kà atà anja magola vok à uda la wakità seriya anja Musa la abà, ŋgaha kəgòd à atà kà, tasəkəl makadav azlabəza anjatà à uda, ŋgaha tasək à madž à ahəj anja azla Yahudiya la tsəh ala babay. ²² Mana mədəhəj ma? Kà uwana ndzer tasəlay kà, kadasa à wəj. ²³ Lagwa dahà kà uwana məpəhaha à ka: Azladza ufad la ahəj la abanay, à uwana asà à atà masəfə vok. ²⁴ Nəfà atà, ŋgaha kadəsəfəw vok akul nna, bokuba uwana wakità seriya apəhay, pəl sili anja mafəts gəl à ahəj anjatà. Banja kadəfəh uwaga gesina kà, azladza tadəsəlay kà uwana tapəh à kà à vok, kà fida, ŋgaha atà kà masəlay kà kanəfa mapəhay anja Musa lela! ²⁵ Ama kà anja azlauwana azla Yahudiya aw kà, masla tapakà azlaməna madiŋal gəl à vok kà mətsetsər à atà wakità kà mapəh à atà uwana məkəs: Təga kà, məgòd à atà kaslawwəlla vok mapad sləb matulay, sləb mazlazlay, mas anj la mapad sləb anja tatak masewfla gə, kadəhaw məbila aw, uwaga gesina kà delga aw, mətsetsər à atà." ²⁶ Kiya uwaga la bebəj gə, Pol ahàd la azladza ufad uwaga, tasəfə vok, kà magay sətaka, ŋgaha tahàd à mənġ gay Zəzagəla à agu. La abatà agòd: 'Banja mahənay mədəf adaslay kà, madəv sləray anja magay sətaka anja kəla uwabeyuwi anjatà.' (Bokuba magòfay kà sartà anja makad tatak kà anjatà adaslay)

Takəs Pol la mənġ gəy Zəzagəla la aku

²⁷ Mok uwana mavakay mədəf uwaga azladəv à gay kà, azla Yahudiya uwana la makoray Asəya tanəjə Pol la mənġ gəy Zəzagəla la aku kà, ŋgaha tavədzàhə maham à ahəj dza ala, ŋgaha takəs Pol, ²⁸ la mawiyay: "Azlatsəhay gami Isərayel zləkəw anu! Aganay dza à uwanay auguzàhəhay la slaka gesina, atūgəw delga aw à azladza gesina lakəl anja azla Isərayel lakəl anja wakità seriya anja Musa, ŋgaha lakəl anja mənġ gəy Zəzagəla babay! Bə gətənəj babay asəlla azlakirdi à gəy Zəzagəla gami à agu, tadəhla àläh à slaka tsidəna gami à vok." ²⁹ (Uwana tapəh kiya uwaga kà, kà uwana tanəjəj Tərofim zil Efesus atà la Pol tauguzàh la huđ gudəj la abà, tadžugəw kà tahàd à mənġ gəy

Zəzagəla à agu, gəl agod à atà) ³⁰ Gay uwaga atsan à huf gudəñ à abà gesina, azladza gesina tahamə gay à vok. Takəs Pol, tabayəñ à lag la gəy Zəzagəla la aku, ngaha tatsàkàh azlagamagəy à ama gesina. ³¹ Maham à ahəñ dza asà à atà makəf Pol, ama gay uwaga atsən à mənğa aña azlaslodzi aña azla Rom, tagəfəl kà azladza Urusalima gesina gəl adawis à atà à vok. ³² Katskats mənğa aña azlaslodzi ahəl azlaslodzi la azlamənğa aña, tahàd à maham à ahəñ dza à abà la mahoyay. Uwana azladza tanəñəñ azlaslodzi tasà à wañ kà, tasàk à mazla Pol. ³³ Kiya uwaga mənğa aña azlaslodzi azà vok à slaka Pol, akəs: “Wəfəwwəñ kà la mazakazak səla!”, agəf. Ngaha anavà atà: “Uwanay ma, mana adəhəñ ma?”, agəf à atà. ³⁴ Azladza la maham à ahəñ dza la abà tapəh azlagay anik anik deydaya. Takàdla gəl à gay uwaga à vok, ngaha asəl uwana adəhəñ kà gay uwauwaga uwaga aw, ngaha agəf kà: “Dəwla Pol à mtəga azlaslodzi!”, agəf. ³⁵ Mok uwana tabəzà maslək à ahəl gamagəy, azlaslodzi tazəb mazəbəy kà mav dzəhla aña maham à ahəñ dza, ³⁶ kà uwana azladza tanəfà la tsəh dukwadukw la mawiyay: “Məkəf, məkəf, məkəf!”

Pol awulla dzirga aña à uda kà mazlayla

³⁷ Mok uwana tazlādàla Pol à gəy aña azlaslodzi uwatà à agu kà, Pol agəf à mənğa aña slodzi: “Gəbəzal tetəvi kà mabəfma ay?” Mənğa aña azlaslodzi agəf: “Tsa kasəl gay Gərek aw nna?” ³⁸ Tsa kak kà zil Misəra, uwana azləl guvəl la azladza la kaslā uwanay adada à lig aw takay, uwana adàla azladza dəbəw ufađ à kəsaf à abà kà magay azlaməna nabəra aw ay?” ³⁹ Pol agəf: “Gi zil Yahudiya, tayyà gi à Tarsus uwana la Səlisəya, gi bəzi huf gudəñ mənğa gə. Kamkam, gəgəf à ka, vā à gi tetəvi kà gi aña mabəfma à maham à ahəñ dza uwanay!” ⁴⁰ Mənğa aña azlaslodzi avəl tetəvi. Kiya uwaga Pol atsizla à maslək ahəl gamagəy à afik, akokət à atà ahəl à adi kà madz à ahəñ titi, uwana tadzà à ahəñ titi kà, Pol apəh à atà gay, la gay Yahudiya:

22

¹ “Azladeda la azlababa, lagwa kà, tsəbəw sləm à gay mazlayla gi gulo uwana gəpəh à akul lagwa!” ² Mok uwana tatsənəñ, kà apəh à atà kà la gay aña kà, dziriya tadzà à ahəñ titi ngaha Pol agəf à atà:

³ “Gi zil Yahudiya, tayyà gi à Tarsus la Səlisəya, ama gəzigən kà la abanay la Uru-salima, ngaha bay kà, masla matapgəla tatak kà, Gamaliyel, masla la uwana apəhgəla masəl mapəhay aña azlababa gami madzidziga. Gəfəhə sləray aña Zəzagəla kà mənğa bokuba añkul uwanay kafahəwwəñ lakana. ⁴ Kasəlaw kà gətərbəhə azlaməna madiñ gəl à Yesu à vok tsərahà à makəf atà. Gəkàsəh azlazil la azlamis, gəwəts atà à dañay. ⁵ Kiya uwaga madzahə aña azlaməna mav tatak à Zəzagəla, la azlamasiga tanəroz kà delga à uwana gəfəhəñ, tava à gi wakità kà azladeda gami azla Yahudiya uwana la Damas, gəhəd à abatà kà makas atà, ngaha kà madla atà à Urusalima à huma seriya.”

Pol apəh gay aña mapəh gay la ləv ala aña
(Sléray 9.1-19; 26.12-18)

⁶ “Mok uwana gi la tetəvi la ama, kà mad à Damas, uwana azlagay tataka afats kà, katskats magol ufaka mənğa asà à ahəñ la zagəla, aùf la makəla gulo. ⁷ Gətəf à wəfəh, ngaha gətsənà mabəfma agəf à gi: ‘Sawul, Sawul, kà mana katərbə gi ma?’ ⁸ Gənəv: ‘Kak uwa, Sufəl?’ Agəf à gi: ‘Gi Yesu, zil Nazaret uwana katərbəhə.’ ⁹ Azladza uwana la slaka gulo tanəñə udfaka, ama tatsənà kuda uwana abəfəmə aw. ¹⁰ Kiya uwaga gənəv: ‘Sufəl, mana gəfəhəñ ma?’ La abatà Sufəl Yesu agəf à gi: ‘Sà à afik, hād à gudəñ Damas à abà, la abatà la uwana tadəpəhakala tatak gesina uwana asà à Sufəl Zəzagəla kadəhəñ.’ ¹¹ Uwana gədapaka guləf kà magol ufaka uwana aña aña gi à adi, azladza uwana məday anina takəs gi à ahəl, ngaha tadàla gi à Damas.”

¹² “Dza anik la ahəñ la abatà, uwana sləm aña Ananiyas, masla kà asəl Zəzagəla, akəs wakità seriya gami lela, sləm aña la ahəñ la tataka azla Yahudiya aña Damas la abà. ¹³ Asà à wañ à slaka gulo, atsizl gi gəl, agəf à gi: ‘Sawul, deda gulo, nən ala aya à dağay!’ La kaslā uwatà gənəñ ala, ngaha gənəñə masla. ¹⁴ Agəf à gi: ‘Zəzagəla aña azlababa madzidziga akəsəni ka, kà mapəhla mawoyəñ aña ala la kak, kà manəñ dziriga aña Kona aña, ngaha kak aña matsən gay aña la dziriga. ¹⁵ Kà uwana say kagay masla sayda aña la huma aña azladza gesina lakəl aña uwana kanəñəñ ngaha katsəñəñ. ¹⁶ Lagonay ma, mana kakufay aya ma? Kəs batem!’, agəf à gi, ‘Kà Zəzagəla aña mazlak ka, kà aña mapal ka la tsakana aña kà abà gesina, la mazal sləm aña!’.”

Sufəl Zəzagəla asləl Pol à slaka azladza uwana azla Yahudiya aw

¹⁷ “Gəwül à wañ à Urusalima. La mok uwana gədəv kudə la mən gəy Zəzagəla la aku kà, masesinay asesinla gi. ¹⁸ Gətsənà Sufəl Yesu agəf à gi: ‘Hadzak gəf, sà à uda

la gudəñ uwanay la abà, kà uwana azlaməna gudəñ uwanay kà tadəkəs gay uwana kadəpəh à atà lakəl gulo aw.’¹⁹ Gəwulàlla, gəgòd: ‘Haday, Sufəl, tasəl la paraka kà gədfàh à azlagəy madəv kuđa à agu, gəkàsàh atà, gəwàtsàh atà à danay, ñgaha gəzlàbàh azlauwana tadiñ gəl à gay anək à vok ndzer.’²⁰ Ngaha aya, mok uwana takəs Etiyen, masla sayda anək kà, gi bay kà gi la abatà. Gəkəs makədfay, gənəñla lukut anja azlaməna makədfay.’²¹ Kiya uwaga Sufəl Zəzagəla agòd à gi: ‘Həd, kà uwana gəsləl ka kərkər à slaka azladza uwana azla Yahudiya aw!’.”

Pol la huma mənğa anja azlaslodzi

²² Maham à ahəñ dza atsəb sləm à Pol tsərəh à uwana apəh gay uwaga, ama la lig la ahəñ kà tadzəkà mawiyay: “Zəwwàn ala à dza uwaga, kədfaw, azlayla adza à ahəñ la sifa aw.”²³ Tawiyà la makwahàh lukut la vok ala, la matak kutso à zagəla. ²⁴ Kiya uwaga mənğa anja azlaslodzi avà tetəvi kà madla Pol à gəy uwatà à agu, kà maslahəñ ala, ngaha kà masla mapəh dziriga lakəl anja mana uwana azla Yahudiya tawiyay mi à mənğa. ²⁵ Ama mok uwana tawadəñ kà mazlabay kà, Pol agòd à mənğa anja azlaslodzi uwana la abatà: “Dziri ma, tetəvi la ahəñ kà mazlab zil Rom kokudà matsən seriya anja takay?”²⁶ Mok uwana adatsən uwaga kà, ahəd, apəh gay uwaga à mənğa anjatà suwan: “Kakay kadəgòd anək ma? Zil uwanay kà zil Rom.”²⁷ Mənğa anja azlaslodzi asà à wan à slaka Pol anavàl: “Pəh à gi, kak zil Rom ay?” “Iyay”, Pol agòdal. ²⁸ Kiya uwaga mənğa anja azlaslodzi agòdal: “Gi kà, gəpəl kà magol tebeləm anja sili kà gi anja mapak zil Rom.” Pol awulàlla: “Gi kà dagay mayyi gi.”²⁹ La lig la ahəñ azlauwana asà à atà mazlabay, kà masla anja mapəh dziriga kà, tawul anjatà à lig. Baməraka mənğa anja azlaslodzi bay kà, guba akəs à uwana adatsenəñ kà Pol kà zil Rom, à kà uwana awadəñ la kadərtsi.

Pol la huma anja azlamasiga

³⁰ Mənğa anja azlaslodzi asàl kà masəlay, kà mana azla Yahudiya tayàh makədf Pol mi. Gay gə la uwaga, la bebəñ gə kà apəzlla Pol ala la kadərtsi la abà. Agòd kà azlamadzahaga anja azlaməna mav tatak à Zəzagəla la azlamasiga gesina tahamà gay à vok, agòd. Kiya uwaga asəlla Pol à wan, à huma anjatà gesina.

23

¹ Pol atsək yewdi à azlamasiga à gay agòd: “Azladedà, gənəfà gay anja Zəzagəla kà kokudà mawisiga dagay uwarà tsərəh à lakana.”² Məñ madzahaga uwana sləm anja Ananiyas avà tetəvi à azladza uwana la makəla anja Pol lakəl, kà madəf à panaw à abà. ³ Kiya uwaga Pol agòdal: “Ndzer, Zəzagəla adədfək ka, kak zlagaw medfekuga. Kagòd kà: ‘Gədfàh seriya kà la tetəvi anja wakità seriya’, kagòd, ‘Tsa tekedik kanəfà aw.’”⁴ Azlauwana la makəla anja Pol lakəl tagòdal: “Kagòdàh à mən madzahaga anja Zəzagəla ñuwà?”⁵ “Azladedà, gəsləl kà mən madzahaga anja mav tatak à Zəzagəla à masla aw. Haday kà wakità agòd kà, ‘Kapəh mawisiga à mənğa anjuk la gəl aw’, agòd.”

⁶ Uwana Pol asəl kà azla Sadukiya uwana: Mawul à uda la mamətsay la ahəñ aw tagòd, la tataka azla Farisəya la abatà kà, apəh gay à azladza la kuda zləkkà: “Azladedà, gi kà, gi zil Farisəya, kona anja zil Farisəya, uwana tasəlla gi à abanay kà, kà uwana: ‘Mawul à uda la mamətsay la ahəñ’, gəgòd, à uwana tasəlla gi à huma seriya.”⁷ Uwana adapəh gay uwaga kà, azla Farisəya la azla Sadukiya tadzəkà mabay vok gay la tataka anjatà, ngaha maham à ahəñ atsək ala. ⁸ (Kà uwana azla Sadukiya tagòd la paraka kà: ‘Mawul à uda la mamətsay la ahəñ aw, malika la ahəñ aw, masasədfək la ahəñ babay aw’, tagòd. Tekedik kà azla Farisəya kà, tadiñ gəl à uwaga à vok, kà aga la ahəñ)⁹ Uwana mawiyay uwaga adazalla vok à gəl kà, azlaanik la tataka azlamənğa anja wakità seriya la abà, uwana la maham à ahəñ anja azla Farisəya la abà tasà à afik, tavədzahàtəla tagòd: “Kiya uwanay kà, məbəza mawisiga amiyaka tekula la slaka zil uwanay aw, zlahaw malika, banaw masasədfək apəhalla ala uwaga la dziriga à mənğa.”

¹⁰ Magazlay atsizlla ala mənğa kaykay tsərəh à uwana guba akəs mənğa anja azlaslodzi kà masläh Pol à ahəl aw. Gay gə la uwaga avà tetəvi à azlaslodzi kà mad à tataka maham à ahəñ dza à abà, kà atà anja madla Pol à mtəga anjatà à agu. ¹¹ Kiya uwaga la huf anja vəf uwatà Zəzagəla agòd à Pol: “Guba akəs ka aw, kaz sayda gulo la Urusalima la abanay, ngaha bay kà, kaz sayda gulo la Rom aya babay.”

Azla Yahudiya tatsatsəl vok gay kà makədf Pol

¹² La bebəñ gə, azla Yahudiya anik anik tahamà gay à vok, tagòd kà: “Məzùw tatak may, məs iyaw aw say banja mədakədf Pol”, tagòd, la mazuw mawadəy. ¹³ Azlaməna madàh sawaray uwaga kà, taduwà dza dzik ufad. ¹⁴ Tahəd à slaka azlamadzahaga anja azlaməna mav tatak à Zəzagəla la azlamasiga, tagòd à atà: “Anu kà, mədazuw

mawadəy kà: ‘Məzùw tatak aw, say baŋa mədakəf Pol dən’, mөгöf. ¹⁵ Akul lagwa, akul azlaməŋga, nəvəw à məŋga aŋa azlaslodzi, kà asəkulla Pol à waŋ kà manəwəz gay aŋha lela, gödəwwal. Nəgaha mədəfəh vok à ahəŋ kà makəfəy la tetəvi la ama, à baŋa atsa à waŋ.”

¹⁶ Ama bəzi duguma aŋa Pol atsənà uwana tapəh, ahəd à mtəga aŋa azlaslodzi, apəh uwaga à Pol à vok à abə. ¹⁷ La abatà Pol azàla mənə slodzi tekula, agöfal: “Lakà kona uwanay à slaka məŋga aŋkul, kà uwana gay lakəl, kà mapəhal.” ¹⁸ Slodzi uwaga alakən à slaka məŋga aŋatà, agöfal: “Masla daŋay Pol azəl gi, agöf à gi kà, gəlakà kona uwanay à slaka aŋak, kà uwana gay lakəl kà mapəh à ka.” ¹⁹ Məŋga aŋa azlaslodzi akəs kona uwaga la ahəl, tahəd à fəta à awtəy kokudə gəl aŋatà, kà manaval gay uwaga. “Gay mana asa à ka mapəh à gi ma?” ²⁰ Agöfal: “Azla Yahudiya tatsən vok gay kà manav à ka Pol kà madalla lebəŋ à huma seriya, kà masəl dziriga aŋha. ²¹ Ama kadədiŋəl gəl à vok aw, kà uwana azladza dzik ufaď anik tadəgoba à fəta à abə kà makəf Pol, kà uwana tazùw mawadəy, kà tazuw tatak may aw, tas iyaw aw say baŋa takəf Pol dən, tagöf. Tadəh vok à ahəŋ, takuday kà say gay aŋak pəra adagay.” ²² Kiya uwaga məŋga aŋa azlaslodzi afəh akur à kona uwaga à lig, kà masla aŋa mapəhay à dza anik aw, “Dà aŋak!”, agöfal.

Tasləl Pol à gumna Felikəs

²³ La lig la ahəŋ, məŋga aŋa azlaslodzi azəl azlat à səhga aŋha səla, agöf à atə: “Həmaw gay azlaslodzi guvəl à vok dadərmokw səla, mənə pəlis dzik mədəf, dza dadərmokw səla la atsəkəf la ahəl aŋatà. Dəhəw vok kà mad à Zəsare la sa ladəga aŋa mokokhu. ²⁴ Dəhəw azlapəlis à ahəŋ babay, kà madla Pol la sətaka à huma gumna Felikəs!” ²⁵ Nəgaha atsetsər à atə wakitə à ahəl.

²⁶ “Gi Kələd Lisəyas, à kak Felikəs, la dzəba aŋha səla aw aŋak, ‘Ayyi’, gөгöf à ka! ²⁷ Hadəy, zil uwanay kà, asə à azla Yahudiya kà makəfəy, ama uwana gətsənəŋ kà zil Rom kà, gəhəd la azlaslodzi kà matafəŋ, masla gə la uwaga masləl à akul à awtəy. ²⁸ Gəyàh masəl godega aŋa gay uwana tapùwəlla gudzi à gəl, gay gə la uwaga gədàlla à slaka azlaməna sawaray aŋatà. ²⁹ Gənəŋəŋ kà, gay la ahəŋ aslə kà maduw à daŋay baŋaw aŋa makəfəy aw, tapùwal gudzi à gəl kà lakəl aŋa mapəhay aŋatà pəra. ³⁰ Nəgaha aya kà, gətsənəŋ kà azla Yahudiya tazùw mawadəy kà makəfəy, gay gə la uwaga à uwana, gəsləl à slaka aŋak katskats. Gөгöf à azlaməna mapuwəl gudzi à gəl kà, say tapuwəl gudzi à gəl kà la slaka aŋak pəra.”

³¹ Kiya uwaga azlaslodzi tazəb Pol, tadàlla la wəf uwatà bokuba uwana məŋga aŋa azlaslodzi apəh, tadàlla à Antipatarəs. ³² La bebəŋ gə, azlaslodzi uwana la asik tawùl à mtəga, ama azlawəna la pəlis kà, tadàlla Pol. ³³ Tadàlla à Zəsare, tavə wakitə uwatà à gumna, tasakà Pol la ahəl aŋha. ³⁴ Gumna adzəŋ wakitə uwatà, anavə Pol: “Kutso ma uwala kadzà à ahəŋ la abə la?” Uwana adasəlay kà zil Səlisəya kà, ³⁵ agöfal: “Mədətsən gay aŋak la wuď uwana azlaməna mapuw à ka gudzi à gəl tadasa à waŋ.” Nəgaha agöf à azlaslodzi kà tanəŋla Pol la gəy uwana la aku, Herod aŋəl kà mahaməh gay à vok la aku.

24

Azla Yahudiya tapuwa gudzi à Pol à gəl la huma aŋa Felikəs

¹ Uwana mahəŋay zlo adada à lig kà, Ananiyas, madzahaga aŋa azla Yahudiya abəzà Zəsare, la azlaməsiga anik anik, nəgaha la Tertulus uwana asəl manəfay aŋa azla Rom gesina, kà mazlak atə. Mok uwana tabəzà huma gumna Felikəs kà, tapuwə gudzi à Pol à gəl. ² Mok uwana tazələl kà, Tertulus adzəkə mapuw gudzi kiya uwanay:

“Kumani, kumani, Felikəs məŋga, kà kak la uwana anu la lapiya la abə, kutso gami dzəba aŋha səla aw kà, kà matsihila aŋak. ³ Uwaga gesina kà, la slaka aŋak la uwana məbəzal, kikay aŋak məŋga. ⁴ Ama asa à gi gəzaka kaslə ala aw. Gay gə la uwaga, kamkam, tsəb anu sləm à uwana mədəpəhay lagwa. ⁵ Mənəŋəŋ dza uwanay, kà masla matsən sləm aw gə, kà uwana masla la uwana atəz magazlay ala la tataka azla Yahudiya aŋa gudəŋ à vok gesina, nəgaha kà masla la uwana məŋga aŋa maham à ahəŋ aŋa azla Nazaret aya. ⁶ Nəgaha aya kà, adəhə àläh à mənə gəy Zəzagəla gami à vok babay, kà uwaga à uwana məkəs. ((Asə à anu kà madəhalla seriya à gəl ma aŋami aŋa mi. ⁷ Ama Lisəyas, məŋga aŋa azlaslodzi azəb à uda la tataka gami la abə la ndzəfə. ⁸ Gay gə la uwaga Lisəyas avə à anu tetəvi à azlaməna mapuwəl gudzi à gəl, kà mas à waŋ à huma aŋak.)) Lagwa kà, baŋa kanaval gay ala kà, kasəl tatak uwana mapuwəlla gudzi à gəl kà dziriga.” ⁹ Azla Yahudiya gesina tagəđəŋ à afik kà uwana Tertulus apəh kà ndzer.

Pol awulla dziriga aŋha à uda la huma Felikəs

¹⁰ Kiya uwaga takəm, gumna agöf à Pol kà mabac̄fma, ngaha Pol agöf: “Gəsəl kà kak masla seriya aña tsəhay uwanay dagay mavay dən. Gay gə la uwaga gəslələ vok aña matsizl à huma aňak kà mapəh uwana azlayla gi. ¹¹ Kà uwana aduw mahənay kulo gəl aňha səla à mad à Urusalima gulo, kà masləkaway Zəzagəla gulo, aw, baməraka kak la gəl aňak kaslələ vok aña masəl godega aña uwaga. ¹² Tetuw tabəz gi gəl mөгəzlay la dza la mən gəy Zəzagəla la aku, baməraka la uwabeyuwi aw, baməraka la maftsa à gəl à maham à ahən dza à afik la gəy madəv kuđa la aku aw, baməraka la azlaslaka anik anik la huđ gudən la abà bay aw. ¹³ Ngaha dza la ahən la tataka aňatà la abà, agöf gay mapuw gudzi aňatà à gəl uwanay à afik aw. ¹⁴ Ama aganay uwana gəsək ala à uda: Gi la ahən la masləkaway Zəzagəla aña azlababa gami, la manəf tetəvi mawga ‘Uwana fida’, kagöfaw. Ama tekedik gədiň gəl à uwana à vok la wakitə seriya la abà gesina, la aña azlaməna mapəh à atà gay à ahəl kà mapəh à azladza. ¹⁵ Kà uwaga, gi gөгөđəň à afik kà Zəzagəla adəwulla azladza dziriga à uda ala la azlamawisiga la mamətsay, bokuba uwana tagöfà à uwaga à afik. ¹⁶ Gay gə la uwaga gөdawaf vok à uda kà madz à ahən la ləv tekula la huma Zəzagəla ngaha la huma azladza bay.”

¹⁷ “La lig aña mauguzahay gulo mavay dən la uda, aña mawul à Urusalima kà, gəwulla sili mazlakay à azlatəhay gulo à waň, ngaha kà mav tatak à Zəzagəla bay. ¹⁸ Mok uwana gөdäfəh uwaga kà, tabəz gi gəl la mən gəy Zəzagəla la aku, tabəz gi vok, kà mok uwana gөdädəv masəf vok gulo à uda. Maham à ahən dza la ahən la slaka gulo baməraka magəzlay aw. ¹⁹ Ama azla Yahudiya aña kutso Asəya pəra la abatà, naka atà la uwana tatsà à waň à huma aňak kà mapuw gi gudzi à gəl, agay tanən mawisiga gulo. ²⁰ Baňaw akul azladza uwanay bay, pəhəw mawisiga gulo, uwana gөdəfəh à uwana tadəla gi à huma azlamasiga zlə. ²¹ Gay tekula pəra gөpəh la kuda zləkkà, à mok uwana gi la huma aňatà. Kà uwana gөdiňal gəl à vok kà mawul à uda la ahən, à uwana gəsà à waň à huma aňak lakana.”

²² Bokuba uwana Felikəs asəl gay lakəl aña azlaməna manəf Kristu kà, azà gay uwaga à huma à gay agöf: “Baňa Lisəyas, mənğa aña azlaslodzi adəsa à waň kà, gөdəpəh gay aňak: Dəw aňkul!”, agöf à atà gesina. ²³ Kiya uwaga: “Nənəwla Pol lela!”, agöf à mənğa aña azlaslodzi. “Ama vəwal mas afac̄, vəw tetəvi à azlaslawda aňha tanəňal à gay!”, agöf à atà aya.

Pol la huma Felikəs atà la Dərusəla

²⁴ La lig azlamahanay anik la ahən, Felikəs asà à waň la mis aňha Dərusəla, uwana tsəhay Yahudiya. Azəla Pol kà matsəbal sləm lakəl aña madin gəl à Yesu Kristu à vok. ²⁵ Uwana Pol adzəkà mapəhay lakəl aña madz à ahən dziriga, lakəl aña makəl gəl, ngaha lakəl aña seriya uwana adəsa à waň kà, ləv avəl à Felikəs à gay, agöf: “Kayyà, lagwa kà, dà aňak, vuđ uwana gөdəböz kaslə kà gөdəzalla ka aya!” ²⁶ Adzəgəw kà Pol avəl sili. Gay gə la uwaga azələhal, kà mabac̄fahma atà səla.

²⁷ La lig mavay səla la ahən, Portsəyus Festus abəf à slaka aña Felikəs à abà. Ama Felikəs asəl marab ləv à azla Yahudiya aduw gəl à Pol aw.

25

Asa à Pol kà gumna Rom la uwana adəhəlla seriya

¹ Uwana mahənay makər adada à lig, Festus abəzà kutso uwaga à abà, atsizilla ala la Zəsare, ahəd à Urusalima. ² La abatà la uwana azlamadzahaga aña azla Yahudiya la azlamasiga anik uwana sləm aňatà la ahən, tavə mapuw gudzi aňatà, uwana tapuwà à Pol à gəl à Festus, ³ kà mav à atà tetəvi kà madla Pol à Urusalima, kà uwana la madzugway aňatà la abà kà, tatsən vok gay lakəl aňha kà makəf à tetəvi à ama. ⁴ Ama Festus awulla à atà ala: “Pol kà, aga la daňay la Zəsare, gi bay kà nekwa gəwul à abatà. ⁵ Tsa kətà kà, azlamadzahaga aňkul tanəfa gi à abatà kà mapuwalla gudzi à gəl à baňa adəhəkulla mawisiga à vok zlə.”

⁶ Festus adəhə mahənay mtəgis, bi kulo, la tataka aňatà la abà pəra, ngaha awul à Zəsare. La bebən gə, adà à gay seriya à agu, tadəla Pol à huma aňha. ⁷ Uwana Pol adaduw à awtəy kà, azla Yahudiya uwana tasà à waň la Urusalima takəsal gay à adi, tapuwalla gudzi zlazladfaga à gəl deyday, ama agöf à atà à gay aw, kà uwana fida. ⁸ Ama Pol apəh dziriga aňha, agöf: “Gөdəfəh mawisiga lakəl aña mapəhay aña azla Yahudiya aw, baməraka lakəl aña mən gəy Zəzagəla babay aw, amiyaka à mən sufəl à vok aw.” ⁹ Festus uwana asəl marabən azla Yahudiya agöf à Pol: “Asa à ka nəma aña mad à Urusalima, kà madəh à ka seriya la huma gulo nəmay?” ¹⁰ Pol agöfal: “Gөdətsizlay kà à huma seriya aña gumna, say la abanay la uwana seriya gulo adəhə vok. Gөdəhə mawisiga à azla Yahudiya à vok aw, kak babay kà kasəl. ¹¹ Baňa azlayla gi aw, gөdəhə mawisiga, uwana azlayla gi mamətsay kà, gəkəs mamətsay. Ama baňa gay la ahən la

mapuw gi gudzi à gəl anjatà uwanay la abà aw kà, dza aslala vok anja mav à atà gi à ahàl aw. Kamkam dàla gi à huma mənş sufəl la Rom, adàfah seriya.”¹² Kiya uwaga à uwana, Festus atsən vok gay la azlaməna sawaray anja agòd: “Tsa kanəv mad à huma seriya anja mənş sufəl Rom kà, bə kaday zlà.”

Pol la huma Agərīpa la Berenəs

¹³ La lig azlamahanay nuv, sufəl Agərīpa asà à wañ, atà la Berenəs, à Zəsare kà madàh ‘Ayyi’ à Festus. ¹⁴ Uwana tasàfani kà, Festus apəh gay anja Pol à sufəl uwaga, agòd: “Dza anik la ahən, Felikəs asàkal la danay la abanay. ¹⁵ Mok uwana gəhàd à Urusalima kà, azlamadzahaga anja azlaməna mav tatak, la azlamasiga anja azla Yahudiya tapuwal gudzi à gəl, ngaha tanavà gi, kà gi anja madukwalla seriya à gəl. ¹⁶ Gəwulla atà ala kà azla Rom kà atà la tetəvi kà madukw seriya à dza à gəl kiya uwanay kokudə seriya la yewdi yewdi la huma anja azlaməna mapuw gudzi à dza à gəl aw. ¹⁷ Məsà à abanay anina. Katskats la bebəñ gə kà, gəhàd à gəy seriya à agu, gəvə tetəvi kà masəlla dza uwaga à wañ. ¹⁸ Azlaməna məzam anja bay atà la abatà, ama tasələ mapuw gudzi à wañ, kà mawisiga bokuba uwana gədzugw aw. ¹⁹ Say tabayà vok gay kà lakəl anja madz à ahən anjatà, ngaha lakəl anja dza anik uwana sləm anja Yesu, uwana Pol agòd kà aga la ahən la sifa pəra. ²⁰ Kiya uwaga, gi babay kà, uwana gəbəz à mawisiga anja aw kà: ‘Kakəsay kà madà Urusalima kà madàhla ka seriya la abatà ay?’, gəgòdal. ²¹ Ama Pol adəv gi kudə kà madàhla seriya la Rom, ngaha nənəwla tsərəh à uwana gədəsələy à slaka mənş sufəl Rom, gi magod à atà.” ²² Agərīpa agòd à Festus: “Gi babay kà, asa à gi matsən gay anja dza uwaga bay.” Festus agòdal: “Kadətəbal sləm lebəñ zlà!”

²³ La bebəñ gə, sufəl Agərīpa la Berenəs tasà à wañ la makoray. Azladza tahəb atà dəs, tahàd à slaka seriya la azlaməngə anja azlaslodzi la azlaməngə anja gudəñ. “Səwla Pol à wañ!” Festus agòd, ngaha tadàla Pol à awtəy. ²⁴ Festus agòd: “Kak, sufəl Agərīpa, la azladza uwanay azla Yahudiya uwana la abanay la uwana la Urusalima gesina, tapuwal gudzi à gəl la slaka gulo, atà gesina tagòd kà, say maz sifa anja ala. ²⁵ Ama gi kà, gəbəzà tatak uwana asla makədfa aw. Iyay, ama dza masla la gəl anja ayàh, madàhalla seriya la huma mənş sufəl anja Rom kà, gəvə tetəvi kà masləl à abatà. ²⁶ Ama gəsəl tatak uwana gətseter à mənş sufəl lakəl anja aw. Gay gə la uwaga gəsəl à wañ à huma ankul, kaykay kà à slaka anjak à kak sufəl Agərīpa, bəña mədətsən godega anja gay anja kà pəra, gədətseteray lakəl anja. ²⁷ Kà uwana asa à gi kà masləl masla danay à huma seriya kokudə madzəf gay uwana ala lakəl anja aw.”

26

Mawisiga gulo la ahən aw, Pol agòd à Agərīpa

¹ Kiya uwaga Agərīpa agòd à Pol: “Tetəvi la ahən kà mabəfma anjak.” Kiya uwaga Pol abiyà ahàl ala kà mapəh dziriga anja uwana azlawla:

² “Haday, sufəl Agərīpa, gi la marabay lakana kà, mapəh gay uwana azla Yahudiya tapuw gi ala gudzi à gəl gesina. ³ Kà uwana kasəl madz à ahən anja azla Yahudiya, ngaha la azlamənəfay anjatà gesina. Kamkam, tsəb gi sləm lela.”

⁴ “Azla Yahudiya tasəl madz à ahən gulo dagay uwana gi bəziga. Tasəl babay madz à ahən gulo la tataka azladza gulo la abà, ngaha la uwana la Urusalima bay. ⁵ Dagay uwarə gənəfə manəfay anja azla Farisəya, tetəvi anja manəfay zlazladfaga, anjatà tasəl uwaga dagay uwarə, tazà sayda anja uwaga bay à bəña asa à atà. ⁶ Lagonay kà, gi la huma seriya kà, mapəhay uwana Zəzagəla akəsəla vok slawda la azlababa gami madzidziga. ⁷ Tsəhay gami kulo gəl anja səla tafə gəl à uwana adapaka vok, gay gə la uwaga tasləkəw Zəzagəla vud mavakay gesina kà manəwəñ, uwaga à uwana azla Yahudiya tapuw gi gudzi à gəl! ⁸ Akul, azla Yahudiya, kà mana kagədawwan à afik kà Zəzagəla adawulla azlaməzimnekid à uda aw ma?”

⁹ “Tekedik kà, gi la gəl gulo kà, gəyàh mawis sləm anja Yesu zil Nazaret uwaga ala la dabaray anik anik. ¹⁰ Gədfahà uwaga kà la Urusalima. Azlamadzahaga anja azla Yahudiya tavə à gi tetəvi kà madaw azladza uwana tanəf tetəvi uwaga à danay gesina, azlauwana tadəhàhà atà seriya mamətsay à gəl. Gi bay, gəkəs uwaga bay. ¹¹ La azlagəy madəv kudə la aku gesina kà, gədàhà à agu kà makas atà la matərəb atà tsərəh à uwana tapəsəw sləm anja Yesu Kristu. Gəfə à atà guvəl à adi, kà atà anja masak à tetəvi anja madinəl gəl à vok anjatà, gədfah tsərəh à azlagudəñ uwana la uda gə kà matərəb atà la abatà bay.”

Pol apəh gay anja mapəh gay la ləv ala anja
(Sləray 9.1-19)

¹² “Kiya uwana gədə à Damas la patanti la ahàl, uwana azlamadzahaga anja azlaməna mav tatak à Zəzagəla tavà à gi. ¹³ Mok uwana gi la tetəvi la ama, la tataka afats kà, udaka asà à ahəŋ la zagəla anjərazi gi à adi, anudə gi à abà la azladza uwana anina gesina. ¹⁴ Kuratata məsək w à vədah gesina, gətsənà kuda uwana atsən la gay ibəranəŋkowen: ‘Sawul, Sawul, kà mana katərəb gi ma? Uwaga kà azakà à kak ndzer, bokuba kokur uwana akweska məbəlakəŋ anja dza anha la azəva la. ¹⁵ Gənàv: ‘Kak uwa, Sufəl?’ Sufəl agòd à gi: ‘Gi Yesu uwana katərəbəŋ. ¹⁶ Ama lagwa kà, sà à afik, tsizilla ala, kà uwana gəkəsàni kà, kà kak anja magay kohana gulo, uwana gəpəhakala vok. Kadəgay masla sayda gulo kà uwana kanəŋ gi lakana, ŋgaha kadàza à atà uwana gədəpəhakala aya. ¹⁷ Gədətəf ka la ahàl anja azla Isərayel ŋgaha la ahàl anja azla tsəhay dza anik gesina babay, azlauwana gədəsləl ka à slaka anjatà, ¹⁸ kà kak anja mapəzlla atà yewdi, kà kak anja masəlla atà à uda la mələs la abà, ŋgaha kadala atà à udaka à abà, kataf atà la ndzəda anja seteni la abà, kà atà anja mad à masal anja Zəzagəla à abà, kà atà anja məbəz mamatsila tsakana anjatà. Kà slaka anjatà anja magay la tataka anja azlauwana la abà, tadinj gəl à Yesu à vok à uwana Zəzagəla adatsatsamani atà’, Yesu agòd.”

Pol apəhay lakəl anja sləray anha

¹⁹ “Iyay, sufəl Agəripa, gəkəs kà tatak uwana Zəzagəla afətəgəla à adi ala la zagəla. ²⁰ Teranə dadəŋ kà, gəzəŋ kà azlaməna madz à ahəŋ la Damas, ŋgaha la Urusalima, azlauwana la kutso Yahudiya gesina, kà atà mapəh gay la ləv ala, la məbədla vok à slaka Zəzagəla, ŋgaha kà atà madfah azlasləray delga, la uwaga azladza anja məsəlay kà tagola ləv anjatà la dziriga. ²¹ Kà uwaga à uwana azla Yahudiya takəs gi la mənə gəy Zəzagəla la aku, tawoyà makəf gi, ²² Ama tsərəh à lakana Zəzagəla anəŋla gi, gədatsizl à ahəŋ anja mapəhla ala dziriga la huma azladza gesina, la azlaməŋga la azladza anik gesina. Gəpəh tatak anik aw, say uwana Musa la azlaməna mapəh à atà gay à ahàl tapəh adəpaka vok pəra: ²³ Kristu adasa ŋgərpə, adəgay matera anja mawul à uda la mamətsay, kà mapəhla udaka anja məbəlay azla Yahudiya ala, la azlatsəhay anik anik gesina bay, tagòd.”

“Diŋal gəl à vok!”, Pol agòd à Agəripa

²⁴ Bokuba uwana Pol apəh dziriga anha kà, Festus agòdal la kuda zləkkà: “Pol, kak utsi, mapatla, madzənay anjak uwaga kà apakàkala kà kusoŋu!” ²⁵ Pol agòdal: “Gi la lig anjak, gi kusoŋu aw! Uwanay kà gay dziriga, uwana azladza takəsay la uwana gəpəh gesina. ²⁶ Hadfay sufəl Agəripa, guba akəs gi, kà mapəh à ka aw, kà uwana kasəl gay gulo, tatak la ahəŋ mahadəkəŋ à adi gə la uwanay la abà gesina aw, kà uwana uwanay kà apəhla vok ala kà la dazuwaya. ²⁷ Sufəl Agəripa, kadinj gəl à uwana à vok, azlauwana azlaməna mapəh à atà gay à ahàl tapəhə ay? Gəsəl kà kadiŋal gəl à vok!” ²⁸ Agəripa agòd à Pol: “Tsa banə kiya uwaga kà, fà à gi, wəf vok à uda kà mapak gi ala, kà masla madiŋal gəl à vok zlə!” ²⁹ Pol agòd: “Adagay lagwa, ku bə la huma la gay, gədəv kufa à Zəzagəla, kà kak la azlaməna matsəb gi sləm uwana la abanay gesina, kà aku magay kiya gi, uwana gi masla manəfay, ama la kokuđa mazakazak!”

³⁰ La lig anja uwaga la ahəŋ, sufəl, gumna, la Berenəs gesina tasà à afik la azladza uwana la abatà kà uwana kaslə adaslay. ³¹ Uwana tadà à fəta à awtəy, tagòd kà: “Dza uwanay kà, adəhəŋ mawisiga uwana asla makəfəla, baməra kə maduw à danay aw.” ³² La abatà Agəripa agòd à Festus: “Naka məsləlla vok anja maduw gəl à dza uwanay, agay ayəh mədiya seriya à huma anja sufəl Rom aw.”

27

Tasəl Pol à Rom

¹ Mok uwana agəf à afik kà maday à Italiya la kəslah iyaw kà, tafə Pol la azlaməna danay anik, à ahàl anja mənəga anja azlaslodzi anja sufəl Rom, uwana sləm anha Yuliyus, masla tekula anja azlaməna manəŋla mənə sufəl. ² Məhəd à kəslah iyaw uwana à afik asà à wəŋ la Adəramit kà, uwana atsizlla à ahəŋ la azləbəza gudəŋ uwana la abà la gay dərəv uwana la kutso Asəya la abà. Arəstarkus, zil Makeduniya alakà anu.

³ La bebəŋ gə, məbəz à Sədon. Vok aham à Yuliyus kà Pol, avəl tetəvi kà maday manəŋ azlaslawda anha à gay, kà manəŋal à adi. ⁴ Dagay la abatà mətsizlla ala, məguwà la makəla anja gudəŋ Sipərə, uwana la iyaw la abà, la gay uwana afad la ahəŋ aw, kà uwana afad awul anu à adi la azlaslaka anik anik la abà. ⁵ Məguwà à uda la dərəv uwana la abà la makəla anja Səlisəya la Pamfiliya, məbəz à gudəŋ Mira uwana la kutso Lisəya la abà. ⁶ La abatà mənəga anja azlaslodzi abəzà kəslah iyaw anik uwana atsizlla ala la Alekəsandəra, uwana adiyà à Italiya. Abək anu à uwatà à afik.

⁷ Mødà à huma la ñuv ñuv la azlamahanay anik anik la abà: La kuða kuða mēbēzà à Sēnid, à kà uwana afad' ad'ad' à anu gay à ahēj kà maday à huma, mēguwà la makēla aña Kōreta, uwana afad' la ahēj aw, mētsēdā à Salmone lakəl ala. ⁸ Mēzlēl gērdza la zlazladā, mēbēz à slaka uwana tazalalla slaka matsizl à ahēj delga, uwana kōrkōr la kutso Lase aw.

⁹ Mēdzà à ahēj mēngja la abatà kà uwana maday la kēslah iyaw kà zlazladā, tsērāh à uwana tēla awkuza adà à lig. ¹⁰ Gay gā la uwaga Pol apēh à azladza anik à vok à abà la magod' à atà: "Mauguzahay gami kà, adagay zlazladā ñodēgi, kà uwana mēj kular la ahēj, azlatatak uwana la kēslah iyaw la abà, bā la gēl kēslah iyaw gā bay kà, tadāwis ala. Bā uwaga pēra aw, bā sifa gami babay kà, tadātafay ñodēgi aw." ¹¹ Ama mēngja aña azlaslodzi akēs gay aña masla mabiy kēslah iyaw la mēngja aña kēslah iyaw, kà gay aña Pol. ¹² Mētsizlla à ahēj la abanay la viya la abà kà delga aw. Gay gā la uwaga, gay mēngja aña azladza tayāh kà maday kà mabēz Fenikēs, la abatà la uwana slaka matsizl à ahēj aña azlakēslah iyaw la gay tēr gērdza aña Kōreta uwana agola à huma à mas à afik afats, ñgaha la matēd' à ahēj afats à gay, kà uwana slaka uwatā kà adzà à afad' à ama.

Kular la dērēv lakəl

¹³ Bokuba uwana bēzi afad' adzēkà vok kà mad'ēday fewfafew kà, delga tagōd' à kà uwarā afad' adika atà, ñgaha mauguzahay gami kà adagay delga tagōd', ñgaha tapālla tatak uwana tawādāh ala à kēslah iyaw à ahēj, la maday la manōf gay gērdza aña Kōreta. ¹⁴ Ama asāf aw, katskats magol afad' gēd'gēdga uwana slēm aña maul à ahēj aña mas à afik afats, asà à ahēj la gudēj uwana la afik la tataka iyaw la abà. ¹⁵ Adūwā ndzēdā aña kēslah iyaw, dza aslāla vok aña madla aw. Mēsāk afad', adāla anu bokuba uwana asāl. ¹⁶ Mēguwà la makēla gudēj uwana la iyaw la abà, slēm aña Kawda, uwana adzà à anu à ama ñuv. La abatà la kuða kuða mēwadā bēzi kēslah iyaw à ahēj, kà mazila aw. ¹⁷ Tazēb kēslah iyaw bēziga uwaga, tafā à mēngja à afik. Ñgaha tatsefādā mēngja à ahēj la azlazuwid', kà uwana guba akēs atà kà mazlēl wuyyan, uwana la gay gērdza aña Libiya. Gay gā la uwaga tazēb lukut uwana à ahēj adāla kēslah iyaw, tamēl à iyaw à abà, tasāk à kēslah iyaw afad' adāla. ¹⁸ La bebēj gā, afad' bā mad'ēday ad'ēday, kà tadzēkà matsikla kazlāña uwana la kēslah iyaw la afik. ¹⁹ La bebēj gā aya kà, tawātā ala azlazuwid' la azlalukut la azlaahāf uwana tadāla kēslah iyaw la ahāl anātā. ²⁰ Mavakay dēj kà mēnējā afats la azlatsetsilin' aw. Kà uwana afad' ad'ēday la ndzēdā, tsērāh à uwana mēfā madzugway kà mētofay aya aw.

²¹ Azladza uwana la kēslah iyaw la afik tazūw tatak may dagay uwatā aw, Pol atsizlla ala, agōd' à atà: "Azladedā, agayña kakēsāw gay gulo kà à uwana madz à ahēj la Kōreta, gēgōd' kà, naka ñulēm, naka mētofay la nassara uwanay la abà adazuw anu la mazila uwanay mēdzālla. ²² Ama lagwa kà, d'ēdāw gay lēv, kà uwana dza la ahēj adāzila la tataka gami la abà aw, say kēslah iyaw pēra. ²³ Kà uwana la wēdāfā kà, Sufēl Zēzagēla gulo uwana gēnēfay, aslēl malika aña à wāj à slaka gulo. ²⁴ Agōd' à gi: 'Pol, guba akēs ka aw! Ndzēr, kadātsilay à huma aña sufēl aña Rom. Aganay, vok adahama à Zēzagēla adābēl sifa anjak la azladza uwana la kēslah iyaw la afik gesina.' ²⁵ Gay gā la uwaga guba akēs akul aw, gēfa madzugway gulo à Zēzagēla à afik, kà adādehēj bokuba uwana apēh à gi! ²⁶ Ama afad' adādāla anu à gudēj anik à afik la iyaw la abà."

²⁷ Adadāh mahēnay kulo gēl aña ufad' à uwana afad' adzēkà madla anu à dērēv à abà. La tataka wēf, masla mabēlak kēslah iyaw adzūgw kà: 'Mēdābēz à kutso à abà', gēl agōd'āl. ²⁸ Tazēb zuwid' uwana tadēbal adà à agay kà magur zējzēj aña dērēv. Zējzēj aña kà, kà kulaslay dziik sēla. Tadā à huma zwek kà kulaslay kulo. ²⁹ Guba akēs atà kà afad' aña madla atà à gudēj à afik, gay gā la uwaga tatsēk adā ufad' à iyaw à abà, la lig kēslah iyaw, ñgaha takudā kà afad' aña madla aw tsērāh à mēl maulla. ³⁰ Azlamēna mabēlak kēslah iyaw kà, asà à atà mas à ahēj la kēslah iyaw la afik kà madij atà. Tazēb bēzi kēslah iyaw à ahēj à iyaw à gēl, ñgaha tadzūgw kà mamalay adā, mawad' ala kēslah iyaw à vok la huma gā bay. ³¹ Ama Pol agōd' à azlaslodzi la azlamēngja anātā: "Banja azlamēna mabēlak kēslah iyaw tadzā à ahēj la kēslah iyaw la afik aw kà, mēbēlay aw." ³² La abatà azlaslodzi tanātsāhā zuwid' uwana ala tadābēla kēslah iyaw bēziga gā, tasākāl, adā aña kokudā gēl aña.

³³ Mok uwana mēl adawula à wāj dadāñ aw kà, Pol adēv atà kuða kà mazuw tatak may, agōd' à atà: "Dagay mahēnay kulo gēl aña ufad' kazuwaw tatak aw, kakūdāw. ³⁴ Delga kazuwaw tatak may ñuv, à banja asa à akul mabēlay. Ama bamēraka anidz gēl ankul azila aw!" ³⁵ Uwana adapēh uwaga, azēb tatak may, atsākāñ ala, kikay agōd' à Zēzagēla la huma azladza gesina, ñgaha tadzēkà mazuway. ³⁶ Kiya uwaga hanjēli anātā gesina adza à ahēj titi, tazūw. ³⁷ Matugway aña azladza uwana la kēslah iyaw la

afik kà dadərmokw səla bəzi anħa dzik mədfəf gəl anħa mukwa. ³⁸ Mok uwana tadahən ala tatsək nalkama à iyaw à abə kà matetuw mahanay anja kəslah iyaw.

Kular asləha kəslah iyaw ala

³⁹ Mok uwana məl adawulla kà, azlaməna mabəlak kəslah iyaw tasəl slaka uwana atà la abə aw, ama tawül à slaka wuyyan gə, kà uwana tanənjà dzəlun anja dərəv. Tayəh madla kəslah iyaw à abatà kà magəf à abə à banja abəzà vok, tagəf. ⁴⁰ Gay gə la uwaga tanətsəhà zuwif adà uwana tawədfəhla à ahəj, tasəkala la iyaw la abə. Nğaha tatsizllənj ala lukut, uwana la huma kəslah iyaw, kà afad anja madla à wuyyan uwatà à afik. ⁴¹ Ama kəslah iyaw abəzà slaka uwana iyaw slemslem gə, atsə gay tər à wuyyan à abə. Tetuwa abəlakà vok aw. Nğaha godega gə kà maganťsay anja iyaw akələhənj ala gesina.

⁴² Azlaslodzi tawoyà makad azlaməna danjə, kà tekula anjatà anja matəfay la magosagosa aw. ⁴³ Ama mənğa anja slodzi anja Rom uwana asəl matəf Pol, adəf à atə gay à ahəj kà magəf mapəhay anjatà à afik. Avà tetəvi à azlauwana tasəl magosagosa kà mavaləh à iyaw à abə kà mats à vok à kutso à abə. ⁴⁴ Azlaanik anjatà takəs azlaahəf anja kəslah iyaw à ahəl kà mas à uda, azlaanik tadəh à uda la makas azlamakalahla anja ahəf uwaga, kiya uwaga gesina anjatà tasə à kutso à abə la wurwur.

28

Pol la kutso uwana la afik la iyaw la abə uwana sləm anħa Malta

¹ Uwana mədabəz à kutso à abə la wurwur, mətənənj kà sləm anja gudənj uwatə tazalalla Malta. ² Azladza la abatà takəs anu la ahəl səla. Uwana iyaw adadzəka masuway, anasl adzəkà vok babay, tavətsəh à anu akəl à ahəj. ³ Pol ayəh tsetsema kà mařək à akəl à gay, akəl akudək bebi makəsafər gə à uda la tsetsema uwatə la abə, atsə Pol. ⁴ Mok uwana azladza uwana la abatà tanənjə bebi adagəf à Pol à ahəl tadzəbərə kà, tagəf: “Paraka, zil uwanay kà masla makad dza. Baməraka adatəfay la iyaw uwanay la abə bay kà, mazlazlay gami uwana mənəfay, sləm anħa dziriga kà, adəsakal la sifa aw.” ⁵ Ama Pol akotsək bebi à akəl à abə, atsənə mazənj anħa amiyaka njuv njuv aw. ⁶ Madzugway anjatà kà ahəl akəsəlal à gəl banjaw aməťsay, tagəf. Ama uwana adasafay, tanənjə uwana adəhəlla tatak aw, tagəf: “Iyay, masla kà zəzagəla.”

⁷ Guf anja Pubəliyus, sufəl anja azladza gudənj uwatə la ahəj nekwa la slaka uwatə. Akəs anu la ahəl səla anja diŋa, mədza à ahəj la mtəga anħa mahənay makər. ⁸ Baba anja Pubəliyus la slaka mahən à ahəj, akəl la vok atəh hufzay anjiz. Pol ahəd à slaka anħa, adəv kuďa, abəkəkal ahəl à gəl, awurənj ala. ⁹ La lig la ahəj, azladza uwana la kutso uwatə la abə atə la đuvats, tasəhà à wəj à slaka Pol, awarə atə ala. ¹⁰ Tavəhà à anu azlatatak deyday kà anjувaw. La mok uwana məday à kəslah iyaw à afik kà madiy anjami babay kà, tavəhà à anu azlatatak uwana mənəkudfa anħa la mauguzahay gami la abə gesina.

Pol atsizlla ala la Malta kà mad à Rom

¹¹ La lig anja təla makər la ahəj mətisizlla ala, mədà à kəslah iyaw uwana à afik aguwa à wəj la Alekəsandəra tazəlalla: ‘Fəla vəgal’, uwana adzà à ahəj la gudənj uwatə la abə la təla zlazladfaga. ¹² Məhəl vok la abatà, məbəz à gudənj uwana sləm anħa Sərakusa, mədəhənj mahənay makər la abatà. ¹³ Mətisizlla ala la abatà aya, məbəz à gudənj uwana sləm anħa Redziyo. La bebənj gə, afad anja gəl à agu adzəkà vok. La mahənay səla la abə à məbəzà à Pusol. ¹⁴ La gudənj uwatə la abə kà, məbəzà à deda à vok uwana: “Dəhəw à wəj kasukwa tekula la abanay”, agəf à anu. Mətisilla ala, məhəd la asik. La kiya uwaga à uwana məbəzà à Rom. ¹⁵ Mok uwana azladedə la Rom tatsənə gay lakəl gami, tasə à wəj à kasukwa anja Apiyus à slaka matsekw à ahəj, uwana barki makər la abatà bay kà magagamay anina. Uwana Pol adanənj atə, ‘Kikay’, agəf à Zəzagəla, adzərədə vok ala, arəb mənğa.

Pol la Rom

¹⁶ Mok uwana mədabəz à Rom kà, tavə tetəvi à Pol kà madz à ahəj kokuďa gəl anħa la slodzi tekula uwana anəjla. ¹⁷ Uwana mahənay makər adada à lig kà, Pol azələh azlamənğa anja azla Yahudiya uwana la Rom. Tahamə gay à vok, agəf à atə: “Hadfay, azladedə, gəďahə mawisiga à azladedə gami à vok baməraka lakəl anja azlababa gami madzidziga gami aw, ama takəs gi la Urusalima, tafə gi à azla Rom à ahəl. ¹⁸ Azla Rom tanavə gi tatak uwana gəďahənj. La abatà asə à atə maduw gi gəl kà uwana tanənjə mawisiga uwana gəďahənj kà makəďla gi aw. ¹⁹ Ama uwana azla Yahudiya takəs kà, taduw gi gəl aw, gay gə la uwaga leri gulo, gəgəf kà, say tadəh gi seriya kà la huma anja sufəl Rom, awkə gəpuwə gudzi azlatsəhay gulo à gəl magay aw. ²⁰ Gay gə la uwaga gəyəh akul anja manənj akul la mapəh à akul gay uwanay babay, tawəďa gi, kà gay anja

dza uwana azla Isərayel tafà manəwəŋ aŋatà à afik, à uwana tawàfà à gi la mazakazak uwanay zlà.” ²¹ Tagòfàl: “Məbðəzal wakità tatsətsər à waŋ la Yahudiya babay aw, dza la ahəŋ asà à waŋ la abatà aŋa mapəh à anu tatak uwana apakà vok babay lakəl aŋak aw. ²² Ama lagwa asà à anu matsən madzugway aŋak lagwa zlà, kà uwana məsəl kà baməraka la mali kà, tapəsəw azladza uwana tanəf uwanay kak la abà lagwa.”

²³ La abatà tafà afats à ahəŋ, kà maham gay à vok aya la azla Pol. Uwana mavakay uwaga adaslay, azlauwana tahamà gay à vok la slaka Pol aduwà uwana uwarà. Lis, Pol avàk à mapəhatàla à gəl matapatàla gay makoray Zəzagəla. Awàf vok à uda kà magəf à atà à gay aŋa Yesu à afik adzàf à atà gay aŋa Yesu ala la wakità aŋa Musa la abà, la uwana azlaməna mapəh à atà gay à ahəl tapàhla à abà. ²⁴ Azlaanik aŋatà takəs uwana Pol apəh, ama azlaanik takəs aw. ²⁵ Uwana tavàh vok ala kokufa matsən vok gay la tataka aŋatà la abà, Pol apəh à atà kà gay tekula pəra: “Tatak uwana Masasəfok Zəzagəla apəh à azlababa aŋkul la ahəl aŋa masla mapəhal gay à ahəl Yesayya kà, agəf à afik hačay! ²⁶ Zəzagəla agəf:

'Həd, gəf à azladza gulo:

Katsənawwan lela, ama bokuba katsənawwan aw.

Kanəŋawwan, ma bokuba kanəŋawwan aw.

²⁷ Azladza uwanay tadzadzəŋəh gəl aŋatà ala.

Tanakàh à sləm aŋatà à ama.

Tatsakàh à yewdi aŋatà à ama.

Tsa baŋa kità kà, atà aŋa manəŋla la yewdi, atà aŋa matsən la sləm aw.

Ŋgaha kà ləv aŋatà aŋa masəl tatak aw.

Ŋgaha kà atà aŋa mawul à slaka gulo kà gi gədəwur atà ala aya aw.*

Zəzagəla agəf.”

²⁸ Pol agəf aya: “Hačay, sələw kà Zəzagəla asləl gay aŋa à slaka azlatsəhay anik bay lakana, kà atà aŋa matsənəŋ!” ((²⁹ La lig aŋa uwaga la ahəŋ azla Yahudiya tadà aŋatà la mabay vok gay la tataka aŋatà la abà.))

³⁰ Mavay səla Pol adzà à ahəŋ la gəy hayyà la aku. Akàsàh dza uwana tadàh à awtəy à slaka aŋa la ahəl səla. ³¹ Azahà gay aŋa Zəzagəla, apàhla gay aŋa Sufəl Yesu Kristu à azladza, apəh la mawaf vok à uda, dza la ahəŋ adəfəl gay à ahəŋ aw.

WAKITÀ UWANA POL ATSETSÈR À AZLA ROM Lettre de Paul aux Romains

Pol ad'ah ayyi à azlaməna gudəŋ Rom

¹ Gi Pol, la uwana gətsetser wakitə uwanay, gi uwana gi mayà anja Yesu Kristu. Zəzagəla akəsàni gi, kà gi anja magay masla matapla anja, kà gi anja maz gay marabəŋ à azladza. ² Gay marabəŋ uwanay kà, Zəzagəla apəh à anu à ahəŋ, kà masləl à anu à waŋ la paŋaw anja azlaməna mapəh à atà gay ahəl la awtəy dagay uwarà, bokuba uwana matsetserayga la wakitə Zəzagəla la abà. ³ Apəhay lakəl anja Kona anja, Sufəl gami Yesu Kristu, la kaslə uwana asà à gudəŋ à vok, agà mayyi à tsəh ala anja David. ⁴ Ama la kaslə uwana Zəzagəla awùlla à uda la mamətsay agəfəŋ à afik kà Kona anja, la ndzəfə ŋgaha ahənəŋ ala la ndzəfə anja Masasəfok anja. ⁵ Kà madegolay masla aya à uwana Zəzagəla apakà gi ala kà masləlay anja, kà gi anja mad maz gay anja à azladza tsəhay gesina, kà atà anja madiŋəl gəl à vok, ŋgaha kà atà makəs masla gay anja, kà atà anja masləkaw Yesu Kristu. ⁶ Akul, azla Rom babay akul la abà, à uwana Zəzagəla azalà à akul, kà akul anja magay azlaanja Yesu Kristu. ⁷ Gay gà la uwaga, gətsetser à akul, akul gesina uwana la Rom: “Zəzagəla awoya akul, Zəzagəla azalà à akul, kà akul anja magay azlaanja. Zəzagəla Baba, la Sufəl gami Yesu Kristu, kà vok ahamà atà kà akul, ŋgaha tavà à akul lapiya.”

Asa à Pol kà anja manəŋ

azlaməna madiŋəl gəl à vok à gay la Rom

⁸ A dadəŋ kà, kikay gəgof à Zəzagəla gulo kà anjul gesina, kà uwana azladza la gudəŋ la vok gesina kà, tapəhay lakəl anja madiŋ gəl à Yesu Kristu à vok anjul. Kikay gəgof à Zəzagəla kà Yesu Kristu. ⁹ Baməraka mbaw, uwana gədəv kuɖa à Zəzagəla kà, gədəv kuɖa kà anjul, gi la madəv kuɖa la abà. Uwanay gəpəhay kà, Zəzagəla kà asəl kà dziriga, gəfəhəŋ sləray anja ndzer la ləv tekula, ŋgaha gəz gay marabəŋ lakəl anja Kona anja. ¹⁰ Gədəv kuɖa koksikoksi kà masla anja mav à gi tetəvi lagonay, à baŋa asal kà gi anja mad à awtəy à slaka anjul. ¹¹ Asa à gi, kà gi anja maduw à awtəy à slaka anjul ndzer, kà anu anja makal tatak, uwana Masasəfok Zəzagəla av à gi, ŋgaha kà madzərəfəh akul ala aya. ¹² Gədagofay, gəgof kà anu gesina mədzərəfəh vok ala. Kadzərəfəwgəla kà uwana kadiŋaw gəl à Kristu à vok, ŋgaha gədzərəfəhakulla kà uwana gədiŋ à masla à vok babay.

¹³ Azladedə, sələw kà, gədzagəh mad à awtəy manəŋ akul à gay, ama gəbəzà à tetəvi aw. Asà à gi mad à awtəy kà madəh sləray la tataka anjul la abà bokuba uwana gəfəhəŋ la azlatsəhay dza anik la abà babay. ¹⁴ Zəzagəla afà à gi sləray uwanay à gəl. La kitə leri gulo gəz gay marabəŋ à azladza uwana tawur gəl, la azladza uwana tasəl tatak aw, gəzəŋ à azlauwana tadzeŋay la azlauwana tadzeŋay aw gesina. ¹⁵ Gay gà la uwaga, gəyàh tetəvi la iyaw tugwi kà mazakullaŋ gay marabəŋ à akul azladza la Rom babay.

Ndzəfə anja gay marabəŋ

¹⁶ Ziruwu aza à gi kà maz gay marabəŋ aw. Gəfəf gay ləv kà mazaŋ gay marabəŋ, kà uwana ndzəfə anja Zəzagəla la gay uwaga la abà, kà mabəl azlauwana tadiŋ gəl à Yesu à vok gesina. Terəŋa azla Yahudiya dadəŋ, ŋgaha azlauwana azla Yahudiya aw. ¹⁷ Gay marabəŋ uwaga la uwana apəhla ala kà, kakay Zəzagəla apaka kəla azladza ala dziriga la huma anja mi. Tetəvi uwaga adzəka vok kà la madiŋ gəl à masla à vok pəra. Bokuba uwana atsetser à wakitə Zəzagəla à abà kà: Dza uwana Zəzagəla apakəŋ ala dziriga la huma anja, kà uwana adiŋ gəl à Yesu à vok, kà masla la uwana la sifa dziriga.

Azladza gesina azlaməna tsakana

¹⁸ Ndzer, Zəzagəla apəh à anu la paraka kà masla la mapak ləv gə dagay la zagəla kà tsakana gesina uwana azladza tafəhəŋ, ŋgaha kà uwana tasləkaway Zəzagəla aw. Adəfəhə à atà seriya à gəl, kà uwana la tatak mawisiga uwaga tafəhəŋ kà adəfə gay à azladza à ahəŋ kà masəl dziriga. ¹⁹ Zəzagəla adədukw à atà seriya à gəl, kà uwana tetəvi uwana à naka tasəla masla kà dazuwaya, kà uwana Zəzagəla la gəl anja kà, adapəhatəla, ama tanəfə aw. ²⁰ Dza adanəŋ masla dikiɖiki aw. Ama la maŋəl gudəŋ à vok tsərah à lakana la uwana, azladza taslala vok anja masləlay lakəl anja tatak uwana adəhəŋ. Uwaga paraka, masla la ndzəfə uwana atətuway dikiɖiki aw. ŋgaha adzəfə ala babay, kà masla kokuɖa gəl anja la uwana Zəzagəla. Kà uwaga à

madàh uwana apèh à abà, kiya uwaga kà agay dziriga la huma Zəzagəla. ¹⁴ Iyay nəma, azlatsəhay anik uwana azla Yahudiya aw kà, tasəl mapəhay anja azla Yahudiya aw, ama vərđi anik anik la gəl anjatà tadfehəñ azlatatak uwana la tetəvi anja mapəhay uwatà la ama. La madfehəñ kiya uwaga, baməraka tasəl madàh tatak dzəba anja səla aw gə. ¹⁵ Uwanay asal magodəy la madz à ahəñ anjatà la abà kà, Zəzagəla afà mapəhay uwanay à ləv anjatà à tsəh, kà atà anja masəlay uwana naka tadfehəñ. Kiya uwana ləv anjatà apəhatàla, kà uwana vərđi anik awul atà à gəl kà tadəhəñ delga, njaaha vərđi anik awul atà à gəl kà tadəhəñ mawisiga. ¹⁶ Ama lakəl anja azlatatak uwana gəpəh à akul la abanay kà, adàsa à uda la dazuwaya la mavakay uwana Zəzagəla adəsəl Yesu Kristu à wañ kà madàh seriya à azladza à gəl. Adàdàh seriya à azlatatak mahadəhəñga uwana la ləv anjatà la tsəh. Uwana gəpəh à akul la abanay kà, asa à uda kà la gay marabəñ uwanay la abà gəzan.

Azla Yahudiya takəs mapəhay anja Zəzagəla aw

¹⁷ Akul azla Yahudiya uwana: ‘Anu azla Yahudiya’, kagodəw, kafaw gəl anjul kà à mapəhay uwanay à afik, katsaw zlapay la magodəy kà: ‘Anu kà, məsəl Zəzagəla’, kagodəw. ¹⁸ Njaaha kasəlaw mawoyəñ anja Zəzagəla, njaaha la mapəhay uwana atapakulla, kà akul anja mayahani uwana delga. ¹⁹ Madzugway anjul kà: ‘Anu azlaməna makas azlaguləf à ahəl’, kagodəw. ²⁰ Njaaha kagodəw aya kà: ‘Mapəhay anja Zəzagəla, kà anja azladza uwana tasəl tatak aw’, kagodəw. Kagodəw aya kà: ‘Mədàh à azladza uwana à ahəñ azlagufguf la tetəvi anja Zəzagəla la tsəh’. Kagodəw aya kà: ‘Mapəhay anja Zəzagəla atapanula masəlay, la dziriga anja gesina’, kagodəw. ²¹ Iyay zlə, kà mana kapəhawla tetəvi à azladza anik à ama kà, mana kapəhawla à gəl anjul aw zlə ma? Kazaw sayda à azladza kà mad à gəl aw, ama kà mana akul kà kadaw à gəl ma? ²² ‘Kadaw à gəl gaw aw’, kagodəw à azladza, kà mana akul kà, kadaw à gəl gaw ma? Akul kafahaw akur à ahəñ kà madàh mazlazlay, ama kà mana akul kahəlaw azlatatak, uwana la gəy mazlazlay la aku ma? ²³ Kayyà, katsaw zlapay kà kaykay la magodəy kà: ‘Məsəl mapəhay anja Zəzagəla’, kagodəw, ama kà kalawla mapəhay anja ala, kiya uwaga kà, kawisaw sləm anja Zəzagəla ala. ²⁴ Kà uwaga à uwana tatsətsər à wakitə anja Zəzagəla à abà, kà azlatsəhay dza anik tawis sləm anja Zəzagəla ala kà, kà madfehəñ anjul, akul azla Yahudiya.*

²⁵ Akul azla Yahudiya kà, kadavaw vok à uda, kà mapəhla ala kà akul anja Zəzagəla. Ama baña kanəfaw mapəhay lela aw kà, makədəv vok à uda anjul kà deyday pəra. ²⁶ Baña dza uwana makədəv à uda gə aw, ama anəfa kà mapəhay, masla kà kalkal bokuba makədəv à uda gə. ²⁷ Dza uwana makədəv à uda aw gə, ama anəfa mapəhay, adəkəlla à akul ala ziruiw à gəl, à akul uwana kasəlaw mapəhay la gay anja makədəv vok à uda nəma, ama kanəfaw aw. ²⁸ Hadəy ma, magay zil Yahudiya ma la gay gə pəra takay? Awan, say la makədəv vok à uda, uwana anja Zəzagəla, awkà gay makədəvani sləb vok à vədah, uwana azladza tanəñəñ la yewdi pəra aw. ²⁹ Ama magay zil Yahudiya kə, aguwa à uda kà la ləv la tsəh, njaaha makədəv vok à uda kà agay kà anja ləv uwana Masasədok Zəzagəla, apəhla ala awkà la mapəhay uwana tatsətsər aw, uwaga anəkudə mabəzal mazləbay la slaka azladza aw, ama la slaka Zəzagəla.

3

¹ Baña kiya uwaga ma, magay zil Yahudiya ma, mana akəs vok ma? Makədəv vok à uda ma, azlak anu takay? ² Hadəy, aduwa vok gesina, teranja dadəñ kà, Zəzagəla afà gay anja kà atà à ahəl. ³ Iyay zlə, kakay mədagodəy la lagwa ma? Tsa azlaanik la tataka anjatà la abà kà, tanəfa gay uwaga aw ma? Kadzugwaw ma Zəzagəla kà adàdàh uwana apəh aw takay? ⁴ Awan! Bə amiyaka azladza gesina azlaməna fida babay kà, ndzer Zəzagəla adàdàh dziriga anja. Bokuba uwana tatsətsər à wakitə anja Zəzagəla abà kà: ‘Kak Zəzagəla: Baña kabədmà à azladza gesina tasəlay kà kapəh dziriga, amiyaka tapuwa à ka gudzi à gəl kà kadəkəfasl atà.*’

⁵ Lagwa zlahaw azladza anik tagodəy kà, ‘Mawisiga uwana mədfehəñ kà, azlaka à azladza’ tagodəy, ‘Kà Zəzagəla kà adfehəñ mawisiga aw’. Gay ma uwala à uwana mədəwulla atà ala la? Məgodəy kà Zəzagəla kà adfehəñ mawisiga la matəbəbay, mədəgodəy ay? Uwanay gəpəh kà bokuba uwana azladza tapəhay. ⁶ Anja kiya uwaga ma, Zəzagəla ma dziriga aw zlə ma ay? Awan, kiya uwaga aw. Agaynə Zəzagəla agay dziriga aw kà, naka aslala vok anja madàh seriya à gudəñ à vok à gəl takay? ⁷ Zlahaw, azladza anik tagodəy babay kà: ‘Fida uwana mədfehəñ kà, azlaka kà azladza anja masəl dziriga anja Zəzagəla, kiya uwaga kà tadəzləb masla kà uwaga. Tsa baña kiya uwanay kà, anu azlaməna tsakana ma, la tetəvi uwali zlə ma li?’ ⁸ Kiya uwaga azlaanik tagodəy:

* 2:24 2.24 Yesayya 52.5 * 3:4 3.4 Mahabay 51.4

'Mədfäh mawisiga kà masəlay kà Zəzagəla kà masla mawoyəñ, ma adfehəñ mi?', tagod. Azlaanik tatugw à gi mawisiga à vok, tagod kà: Gi babay kà, gi gədzugway kà kiya uwaga. Zəzagəla adəfah seriya à azladza uwaga à gəl, kà uwana seriya uwaga kà azlayla à atà kà madukwatəñ à gəl anja Zəzagəla.

Dza dziriga la ahəñ amiyaka tekula aw

⁹ Lagwa ma, anu azla Yahudiya ma məduwa azladza anik takay? Awan. Tetuwa məduwa azladza anik aw. Gədapəha à akul, kà azla Yahudiya la azladza anik anik gesina, kà anu la tsəh makoray anja tsakana. ¹⁰ Iyay, bokuba uwana tatsetsər à wakitə Zəzagəla à abà:

'Dza dziriga la ahəñ la huma Zəzagəla amiyaka tekula aw.

¹¹ Dza la ahəñ asəl dziriga aw

Dza la ahəñ amiyaka tekula à uwana ayəh Zəzagəla aw

¹² Azladza gesina tagola à lig à Zəzagəla à gay, tawis ala gesina.

Dza la ahəñ amiyaka tekula, adəh delga à azladza aw.

¹³ Kay, gay uwana atsa à afik la kuda anətə la ahəñ kà, mawisiga bokuba mazinay anja zəvay mapəzlla à ama ala gə.

Aləh anətə kà avavar azladza.

Uwana atsa à wan la panjaw anətə la awtəy kà, kalkal la magur anja bebi uwana akəf dza.

¹⁴ Sləray anətə kà say matsaflla dza pəra, ngaha gay dəhakakga pəra atsa à wan la gay anətə la awtəy koksikoksi.

¹⁵ Tavay kà makəf dza.

¹⁶ Kəla slaka uwana taday kà, say gay atsən atə à tsəh ala.

¹⁷ Tasəl madz à ahəñ la tələmuma la abà la azladza aw.

¹⁸ Dikidiki tahoy yewdi anja Zəzagəla aw.*

¹⁹ Tekedfika kà mapəhay anja Zəzagəla kà, apəhay kà azladza uwana mapəhay uwaga aga la atə la ahəl, kà maməts gay à gəl anja magay la ahəñ, ngaha kà azladza gesina anja masəlay, kà atə azlaməna tsakana la huma Zəzagəla. ²⁰ Tsa anja kiya uwaga kà, dza la ahəñ adəgay dziriga la huma Zəzagəla la manəf mapəhay aw, kà uwana mapəhay anja Zəzagəla apəhla ala kà masəl tsakana.*

Kakay azladza tapaka dziriga la huma anja Zəzagəla ma?

²¹ Ama lagonay kà, tetəvi uwana azladza tadəgəla dziriga la huma Zəzagəla kà, Zəzagəla adapəhla ala: Gay anja mapəhay la abà à tetəvi uwatə aw. Ama la wakitə mapəhay anja Zəzagəla la abà, ngaha azladza uwana Zəzagəla apəh à atə gay à ahəl, kà mapəh à azladza, tapəhəh lakəl anja tetəvi uwatə dagay uwarə la magodəy kà: Zəzagəla adəpəhla tetəvi anik mawga ala. ²² Tetəvi gə, uwana Zəzagəla apakla azladza dziriga ala la huma anja kà, la madin gəl à Yesu Kristu à vok, Zəzagəla adapəzəl tetəvi à azlauwana tadin gəl à Yesu à vok, awkə azla Yahudiya pəra aw. Zəzagəla kà avəh dza aw. ²³ Dza gesina tadəhan tsakana, ngaha tabəzə mazləbəy uwana naka Zəzagəla avə à atə aw. ²⁴ Ama Zəzagəla apis à atə gay à vok kà deyday, apakə atə ala dziriga la huma anja. Adəhəñ uwaga kà la ahəl anja Yesu Kristu, à uwana apəlla atə ala la tsakana la abà. ²⁵ Zəzagəla afə à ahəñ, kà masla anja mamətsay kà anja azladza, kà aniz anja anja mazəb à atə tsakana lakəl ala. Tetəvi uwaga kà, Zəzagəla apəzəl à azladza, uwana tadin gəl à Yesu à vok. Uwana adəhəh uwaga kà, kà azladza anja masəlay kà masla kà dziriga. Bokuba magodəy kà, tsakana uwana uwarə tadəhəhəñ kà, Zəzagəla afal sləm aya aw. ²⁶ Abasəñ ndzer, ama lagonay apəhla à azladza, kà masla kà dziriga. Masla asal madəhəñ kà uwana dziriga, ngaha asal aya magəñ azladza, uwana tadin gəl à Yesu à vok dziriga la huma anja bay.

²⁷ Tsa banja kiya uwanay kà, tatak la ahəñ mətsalla zlapay takay? Awan, tatak la ahəñ aya aw. Zəzagəla adapaka anu ala dziriga kà, kà uwana mədin gəl à Yesu Kristu à vok. Awkə apakə anu ala dziriga kà, kà uwana mənəfa mapəhay aw. Tsa anja kiya uwaga kà, tatak la ahəñ kà matsalla zlapay gami aya aw. ²⁸ Məsəl kà Zəzagəla apakə azladza ala kà dziriga la huma anja, à banja tadin gəl à Yesu à vok, awkə kà uwana tanəfa mapəhay aw. ²⁹ Zəzagəla ma anja azla Yahudiya pəra takay? Awan, anja azla Yahudiya pəra aw, ama Zəzagəla anja dza gesina. ³⁰ Kà uwana Zəzagəla kà tekula pəra. Banja azla Yahudiya tadin gəl à Yesu à vok, adəpaka atə ala dziriga la huma anja. Kà anja azladza tsəhay anik, uwana tadin gəl à masla à vok bay kà, bə adəpaka atə ala dziriga la huma anja suwan ³¹ Zəzagəla apaka azladza ala dziriga, kà uwana tadin gəl à Yesu à vok, uwana

məgəf ma? Məpəsew mapəhay takay? Tetuwa kiya uwaga aw! Məgəfa mapəhay à afik kà la uwaga.

4

Kà mana Zəzagəla apakà Abəraham ala kà dziriga ma?

¹ Lagwa kà, mədzugw lakəl aña Abəraham baba gami, uwana akəslla anu ala. Mana məpəhay lakəl aña ma? Mana Abəraham abəzəl ma? ² Baña Zəzagəla apakən ala dziriga la huma aña kà, kà uwana adəhəhən azlatatak dzəba aña səla aw gə, kiya uwaga naka azlayla kà Abəraham atsə zlapay. Ama atsə zlapay la huma Zəzagəla aw.

³ Kiya uwanay à uwana tatsetsər à wakitə Zəzagəla à abə:

'Kà Abəraham adiņ gel à Zəzagəla à vok, kà uwaga à uwana Zəzagəla azalə ala dza dziriga la huma aña.'^{*}

⁴ Səlaw kà baña dza adəh sləray delga, ŋgaha tavəl tatak kà madegolay sləray aña, tatak uwaga tapələl kà masik aña, awkə deyday tavəl aw. ⁵ Baña dza adiņ gəl à Zəzagəla à vok, uwala adzugw magay dziriga la huma Zəzagəla kà, sləray uwana adəhən aw, la kitə Zəzagəla adəpakəŋ ala kà dza dziriga kiya uwanay. Zəzagəla kà, la maslay kà mapak masla tsakana ala kà dziriga la huma aña, ŋgaha adəh uwaga kà deyday.

⁶ Kalkəl à uwana David apəh babay. Apəh lakəl aña azladza, uwana Zəzagəla apakətəla kà azladza dziriga la huma aña. Sləray aña ahəl aņatə à uwana atugw aw. Azladza uwaga kà atə la marabay. ⁷ David agəf kà:

'Marabay agay la azladza uwana Zəzagəla adəmats atə tsakana aņatə ala, marabay agay la azlauwana masla adətsak atə mawisiga aņatə ma.

⁸ Marabay agay la dza uwana Sufəl atugw tsakana aña aw.'^{*}

⁹ Məwəl à gay aña David à tsəh. Marabay ma, la azladza uwana makadav atə à uda gə pəra takay? Awan, marabay kà la azlauwana makadav atə à uda gə aw babay. Mətsənən kà Abəraham agə dziriga la huma Zəzagəla, kà uwana adiņ gel à masla à vok. ¹⁰ Mok uwala Abəraham agə dziriga la huma Zəzagəla la? Mok uwatə ma akədəv vok à uda ay? Awma à lig la sudə gə ay? La mok uwatə kà, aləg aña makədəv vok à uda dən.

¹¹ Makədəv vok à uda, uwana Abəraham akədəv vok à uda kà, uwaga kà, agə madiya kà mapəhla ala kà, adadiņ gəl à Zəzagəla à vok, ŋgaha Zəzagəla apakə masla ala kà dza dziriga, à mok uwana aləg makədəv vok à uda dadən. Kà uwaga à uwana Abəraham apakə baba aña azlauwana kokudə makədəv vok à uda, ama tadin gəl à Zəzagəla à vok. Kiya uwaga masla adəpaka atə ala dziriga la huma aña, bokuba uwana apakə Abəraham ala babay.^{*} ¹² Masla ndzer kà baba aña azlaməna makadav vok à uda gə bay. Ama gesina azlabəza aña aw, say azlauwana tanəfa madiņal gəl à vok aña, kiya masla uwana adiņal gəl à vok, la mok uwana aləg makədəv vok à uda.

Azladza uwana tadin gəl à Yesu à vok, la uwana tabəz tatak

uwana Zəzagəla apəh à ahən

¹³ Dagay uwana Zəzagəla apəh Abəraham à ahən la mayyi à tsəh ala aña kà, adəvə à atə gudəŋ à vok tadəkoray. Uwana Zəzagəla apəh uwaga kà, kà uwana Abəraham anəfə mapəhay aña wakitə seriya aw, ama apəhal kiya uwaga kà, kà uwana adiņ gəl à Zəzagəla à vok, ŋgaha apakə dziriga la huma aña. ¹⁴ Iyay, agayna azlauwana tadin gəl à mapəhay aña wakitə seriya à vok, tabəz tatak uwana Zəzagəla apəh à ahən kà, naka azlauwana tadin gəl à Zəzagəla à vok tagay deyday, ŋgaha naka tatak uwana Zəzagəla apəh à ahən kà mavəy bay, naka agay deyday aya. ¹⁵ Haday, kà uwana mapəhay kà atsala kà mapak ləv aña Zəzagəla à wan à gəl aña azladza uwana tanəfa aw, ama la slaka uwana mapəhay la ahən aw kà, məpəsew mapəhay la ahən babay aw.

¹⁶ Gay gə la uwaga à uwana, Zəzagəla apəh kà, apəh à ahən kà aña azlauwana tadin gəl à masla à vok. Adəhən kiya uwanay, kà masla aña mav à atə tatak uwanay deyday. Asal mavəy à mayyi à tsəh ala aña Abəraham gesina. Avəy à azlaməna manəfay pəra aw, ama à azlatsəhay anik gesina, uwana tadin gəl à Zəzagəla à vok bokuba à Abəraham, kà uwana Abəraham kà baba gami gesina. ¹⁷ Bokuba uwana tatsetsər à wakitə Zəzagəla à abə, Zəzagəla agəf à Abəraham:

'Gəfa ka à ahən kà kagay baba aña azlatsəhay aņuwaw.'

Abəraham apakə baba gami la huma Zəzagəla, kà uwana adiņ gəl à Zəzagəla à vok. Zəzagəla masla mav sifa à azlaməzimekid, ŋgaha agəŋ la ahən la afad gay aña azlatatak uwana amiyaka tagəhəh la ahən aw.^{*} ¹⁸ La kitə, Abəraham ahəd à huma à gay la madiņ gəl à Zəzagəla à vok. Amiyaka uwana azladza tadzugw à tetəvi uwatə, kà

* 4:3 4.3 1Musa 15.6

* 4:8 4.8 Mahabay 32.1-2

* 4:11 4.11 1Musa 17.10

* 4:17 4.17 1Musa 17.5

Zəzagəla aɖəh uwana apəh à ahəŋ aya, aw. Abəraham ahəd à huma à gay la maf manəwəŋ aŋha à Zəzagəla à afik. La lig la ahəŋ Zəzagəla aɖahəlləŋ uwana apəhəl à ahəŋ la abatà, apakà baba aŋa azlatsəhay aŋuvaw, bokuba uwana Zəzagəla apəhəl:

'Mayyi à tsəh ala aŋak adagay aŋuvaw.'^{*}

¹⁹ Mok uwana Zəzagəla apəh uwaga kà, Abəraham mavay aŋha kà azlatalka dzim. Asəl kà adagay makoz gurdza gurdza, ŋgaha bay mis aŋha Sara bay kà degər aya, ama tayà vok la maɖiŋəl gəl à vok la abà aw, kà uwana asəl kà Zəzagəla adadəh, uwana apəh à ahəŋ. ²⁰ Masla babay asəl kà adəbəz tatak uwana Zəzagəla apəhəl à ahəŋ, abək gəl à ahəŋ səla aw. Maɖiŋəl gəl à vok aŋha adzərəɖ ala kaykay, asləkəw Zəzagəla. ²¹ Ndzer, asəl la lela kà Zəzagəla la maslay kà madəh uwana apəhəl à ahəŋ. ²² Gay gə la uwaga à uwana Zəzagəla, azalà ala: Dza dziriga la huma aŋha. ²³ Gay uwana Zəzagəla atugwla Abəraham la dziriga la afik kà tatsətsər kà aŋa Abəraham kokudə aŋha pəra aw. ²⁴ Tatsətsər uwaga kà aŋami babay. Baŋa məɖiŋ gəl à Zəzagəla uwana à vok awùlla Sufəl Yesu à uda la mamətsay la abà, masla adəpaka anu ala dziriga la huma aŋha babay! ²⁵ Zəzagəla avà Yesu à ahəl aŋa azladza kà makəɖay kà tsakana gami. Ŋgaha aya, Zəzagəla awùlla à uda la mamətsay, kà anu aŋa magay azladza dziriga la huma Zəzagəla kà masla.

5

Yesu adasəlla anu vok la Zəzagəla

¹ Tsa bə, uwana Zəzagəla adapaka anu ala dziriga la huma aŋha, kà uwana məɖiŋ gəl à masla à vok, lagonay kà, gay la ahəŋ la tataka gami la abà la Zəzagəla aya aw, kà uwana Sufəl Yesu Kristu adasəlla anu vok la mamətsay aŋha. ² Yesu Kristu apəzlla anu tetəvi, kà anu aŋa mafəb mapis gay à vok la slaka Zəzagəla, kà uwana məɖiŋ gəl à masla à vok. Mətsizlla à mapis gay à vok uwaga à afik, ŋgaha mərəb la mavaləh à zagəla, kà uwana mənawəŋ kà mədəbəz humà mazləbay gami la huma Zəzagəla. ³ Mərəbay la mavaləh à zagəla kà aŋa uwaga pəra aw, məvaləh à zagəla babay kà baməraka anu la mas ŋgərpa la abà, kà uwana ndzer məsəl kà ŋgərpa azlaka anu kà aŋa magur mabasij. ⁴ Baŋa məsəla mabasij, mədəhəney, baŋa mədəhəney kà, mədəfa manəwəŋ gami à gay Zəzagəla à afik, adəvə anu bokuba uwana aɖəɖ. ⁵ Baŋa mənawəŋ kiya uwanay, mədəməts à vədəh deyday aw, kà uwana Zəzagəla apəh à anu kà, awoya anu kà kaykay. Masasəɖok aŋha uwana avà à anu, apəhanula masal aŋha.

⁶ Iyay uwarə kà, ndzəɖa gami la ahəŋ aw məsləla vok aŋa matəf gəl gami aw. La kaslə uwatə Yesu asə à wəŋ, aməts kà aŋa azlaməna tsakana, à kaslə uwana Zəzagəla afə à ahəŋ. ⁷ Ndzer, məsəl kà zlazladə kà dza aŋa mamətsay kà aŋa masla gamagəy aŋha, bə amiyaka masla anəfa mapəhay bay kà, zlazladə. Bi dza anik kà aslala vok aŋa makəs mamətsay kà madegolay dza uwana asəl dza. ⁸ Ama Zəzagəla apəhanula kaykay à mawoy anu aŋha mi, avə Yesu Kristu, aməts kà aŋami à mok uwana mələg azlaməna tsakana gə dadəŋ. ⁹ Yesu Kristu aməts kà aŋami, Zəzagəla apakà anu ala dziriga la huma aŋha la aŋiz aŋha. Tsa aŋa kiya uwanay, haɖay ndzer zlə kà, Yesu Kristu adətəf anu la mapak ləv aŋa Zəzagəla la abà. ¹⁰ Dagay uwarə məgə azlaməna məzam aŋa Zəzagəla, masla asəlla anu vok la mamətsay aŋa Kona aŋha. Bə uwana adasəlla anu vok la uwaga kà, məsəl ndzer kà adəbəl anu aŋa koksikoksi kà uwana Yesu avə sifa aŋha. ¹¹ Adadəv à gay kiya uwanay pəra aw. La kaykay kà, mərəbay la mavaləh à zagəla lakəl aŋa uwana Zəzagəla adəhanəŋ. Sufəl gami Yesu Kristu arabə anu ləv la uwana adəla anu à slaka Zəzagəla kà mapak anu ala azlaslawda aŋha.

Adama la Kristu

¹² Aganay godega aŋa gay uwanay: Tsakana asə à gudəŋ à vok kà, kà dza tekula uwana sləm aŋha Adama, ŋgaha la tsakana aŋha uwatə la abà la uwana, mamətsay asləhə à gəl aŋa dza gesina, kà uwana dza gesina taɖahə tsakana, kà madegolay tsakana aŋa dza tekula uwaga. ¹³ Amiyaka mok uwana Zəzagəla aləg mav mapəhay aŋha kà, tsakana kà agə la ahəŋ la gudəŋ la vok. Ama Zəzagəla atugw tsakana lakəl aŋatə aw, kà uwana mapəhay aŋa Zəzagəla la ahəŋ dadəŋ aw. ¹⁴ Amiyaka la uwaga bay, ɖadzəkə vok aŋa Adama, tsərəh à Musa kà, mamətsay akòr lakəl aŋa azladza gesina, amiyaka tsakana aŋatə adəbani aŋa Adama uwana akweska mapəhay aŋa Zəzagəla bay aw kà tamətsəh.

Adama kà maftsa vok aŋa dza uwana atsa à wəŋ. ¹⁵ Ama mavəy uwana Zəzagəla avə à anu la dza uwanay kà, adəbani vok la tsakana aŋa Adama ɖikiɖiki aw. Haɖay, aŋuvaw tamətsə kà tsakana aŋa dza tekula, ndzer, ama dzəba aŋha səla aw aŋa Zəzagəla aɖuwa uwaga la mənŋa, kiya uwaga babay mavəy deyday uwaga aviya à azladza aŋuvaw, kà madegolay dza tekula Yesu Kristu. ¹⁶ Ama uwana Zəzagəla avəy bay kà godega aŋha kà

^{*} 4:18 4.18 1Musa 15.5

gørgør døn awkà kiya tsakana aw. Tsakana uwana dza tekula uwatà adfahàn kà adukw ala seriya à gøl. Tekedfika, banja Zøzagøla apis gay à azladza à vok deyday, amiyaka tadfah tsakana anjvaw kà adàpaka atà ala kà azladza dziriga la huma anja, ngaha kà seriya matøf à atà à gøl aw. ¹⁷ Ndzer kà, dza tekula adfahà tsakana, ngaha tsakana akøð dza à gay gesina kà madegolay dza tekula uwaga. Ama dza anik, à Yesu Kristu adfahàn kà sløray anik. Kà madegolay masla, Zøzagøla avà mapis gay à vok la maduw à vok anja. Ngaha tadabøz sifa, tadàkoray koksikoksi, kà madegolay Yesu Kristu.

¹⁸ Kà tsakana anja dza tekula Adama, à uwana tsakana asà à azladza gesina à gøl, ngaha seriya atøf à atà à gøl bay. Ngaha kà sløray dziriga anja dza tekula, Yesu Kristu bay la uwana adapølla azladza ala la seriya anja Zøzagøla la abà, ngaha adavà à atà sifa adøv à gay aw. ¹⁹ Kà dza tekula Adama uwana akweska mapøhay anja Zøzagøla, la uwana azladza gesina tapakà azlamøna tsakana, ngaha kà dza tekula Yesu Kristu bay, la uwana azladza anjvaw tadàpaka dziriga la huma Zøzagøla, kà uwana masla kà akøð gay anja Zøzagøla.

²⁰ Ama banja mapøhay adanjzila kiya uwanay kà, kà tsakana anja azladza anja manjazila kaykay. La kità, banja tsakana anja azladza adanjzahla, mapis gay anja Zøzagøla anjazàhla kaykay bay. ²¹ Bokuba uwana tsakana la uwana akoray lakøl anja mamøtsay kiya uwaga la dziriga, mapis gay à vok anja Zøzagøla aga la maslay anja mapak dza ala dziriga la huma anja kà mapis gay à vok, uwatà kà akoray, kà anu anja magay la sifa, uwana adøv à gay aw la ahàl anja Suføl gami Yesu Kristu.

6

Mamøtsay kà ahàl tsakana,

ama madz à ahøn la sifa kà ahàl Yesu Kristu

¹ Mana mødagodfay lagwa mi? Mødza à ahøn la tsakana la abà, ngaha mapis gay à vok anja Zøzagøla adanjzila takay? ² Awan, kiya uwaga aw, mømøts kà ahàl tsakana, ngaha ma kakay møda à huma à gay la tsakana la abà aya zlà ma? ³ Hay! Kasølaw kà, mok uwana mødfahà batem kà, møgà à maham à gay à vok gà la Yesu Kristu la abà, la mok uwaga kà, bokuba magodfay kà, mømøts la masla babay aw takay? ⁴ La batem kà, møkøð mamøtsay la masla, kà mal anu la masla, kà anu anja masak à madz à ahøn maviyaga, bokuba uwana Zøzagøla awùlla Yesu à uda la ndzøfa anja mazløbay anja.

⁵ Hadfay, anu azlamamatsay gà bokuba masla. Kiya uwaga mødahama gay à vok la masla, tsa kiya uwanay kà ndzer, mødawul à uda bokuba uwana masla awul à uda babay. ⁶ Møsel kà, la mok uwana Yesu Kristu amøts à ahàf à adi kà, Zøzagøla atatøl madz à ahøn maviyaga gami à adi la abatà bay, kà vok tsakana gà uwanay anja mamøtsay, kà anu anja magay azlamayà anja tsakana aya aw, ⁷ kà uwana tsakana anja magay la ndzøfa la dza mamøtsay gà aya aw. ⁸ Kà uwana mok uwana Kristu amøts kà, mømøts la slaka gà la masla, kiya uwaga, møsel kà anu la masla, mødådza à ahøn la sifa bay la masla. ⁹ Ngaha aya, møsel babay, kà Yesu Kristu awul à uda la mamøtsay adàmøtsay aya aw, kà uwana ndzøfa anja mamøtsay la ahøn lakøl anja aya aw. ¹⁰ La mamøtsay anja kà, avàhalla la tsakana anja tetuwa. Lagwa aga la ahøn la sifa kà anja Zøzagøla anja koksikoksi. ¹¹ Iyay zlà, akul babay kà, kiya uwaga, sølãw kà, kamøtsãw kà ahàl tsakana. Lagwa akul la ahøn la sifa la huma anja Zøzagøla, kà uwana khamãw gay à vok la Yesu Kristu.

¹² Tsa anja kiya uwanay lagwa zlà kà, kasakaw à tsakana akor akul aw. Kanøfaw mabila anja vok anjul, uwana adãzakulla vørdi anik aw. ¹³ Kakøðaw kà tsakana aføza tetøvi à tsøh anja madukw akul à ahøn, kà mawis akul ala aw. Tsa banja kiya uwaga zlà kà, vãw vok anjul à Zøzagøla, kà uwana akul azladza uwana kamøtsaw, ngaha kawullaw à uda, vãw vok anjul à masla gesina, sãkãwwal adfãhla akul sløray bokuba akul azlakazlanja sløray delga gà. ¹⁴ Kiya uwaga kà, tsakana adãdza à akul à gøl aya aw kà uwana akul la tsøh anja mapøhay aw, kà magay la dziriga la huma Zøzagøla kà, dzãw à ahøn la mapis gay à vok anja la abà.

Anu azlamayà anja Zøzagøla, awma anja tsakana ay?

¹⁵ Uwaga ma, mana asal magodfay lagwa mi? Møkor gøl kà madfehøn tsakana, kà uwana anu la tsøh anja mapøhay aya aw, kà uwana anu la mapis gay à vok anja Zøzagøla la abà takay? Tetuwa kiya uwaga aw! ¹⁶ Kasølaw kà, banja kaduwaw vok anjul à dza anik ala, ngaha kagodfawwal kà kakøðaw gay anja kà, kapakaw mayà anja aw takay? Banja tsakana la uwana adza à akul à gøl, ndzer, akul azlamayà anja tsakana, ngaha kabiyaw mamøtsay à gøl. La kità, banja kakøðaw kà gay anja Zøzagøla, kiya uwaga kagaw azlamayà anja, ngaha adàpaka akul ala kà azladziriga la huma anja.

¹⁷ Haday aw ay, uwarà kagaw mayà anja tsakana, ama lagonay kà, kiya uwaga aya aw. Kakəsaw gay uwana atàpakulla, kakəsaw azlatatak uwana atàpakulla la ləv tekula, kikay məgod' à Zəzagəla kà uwaga. ¹⁸ Mapəlla, uwana kapələwla la tsakana la abà, kà kapàkəwla azlamayà anja dziriga adagay, kà akul anja mad'ah dziriga. ¹⁹ Gəpəh à akul la gay zil kiya uwanay kà, kà uwana akul azlaguɓguɓ dadəŋ, kà matsen azlatatak uwanay. Dagay uwarà kavəw vok anjul gesina à mawisiga, kanzəhəw tsakana ala. Kà uwana kadəhəhəw mawisiga. Ama lagonay kà, vəw vok anjul à Zəzagəla anja diki-diki. Dahəw dziriga, ŋgaha kà madz à ahəŋ anjul anja magay sətaka.

²⁰ Dagay uwarà, à mok uwana kaləgaw azlamayà anja tsakana, tatak la ahəŋ afà à akul leri à gəl, kà manəf dziriga anja Zəzagəla aw. ²¹ Mok uwana kadəhəhəw azlatatak ziruwi gə uwaga ma mana kabəzəwwal la abà lagwa zlà mi? Lakana kà kakələw ziruwi à azlatatak mawisiga uwaga à gəl mədətsalah à gay, kà uwana madəv à gay anja uwaga kà mamətsay. ²² Lagonay kà, kapələwla la tsakana la abà, kagaw azlamayà anja Zəzagəla. Lagwa tatak delga uwana kabəzəwwal la abà, kà madz à ahəŋ anjul adəgay sətaka la huma Zəzagəla, ŋgaha aya, akul kadəbəzəwwal sifa adəv à gay aw la makəf gəl à ahəŋ. ²³ Ndzər, masik anja tsakana kà uwaga mamətsay, ama mavəy deyday anja Zəzagəla kà sifa adəv à gay aw, kà uwana mədahama gay à vok la Sufəl gami Yesu Kristu.

7

Ndzəda anja mapəhay la ahəŋ lakəl gami aw

¹ Azladedə gulo, gəpəh à akul kà, kà uwana kasəlaw mapəhay, kasəlaw kà mapəhay kà la ndzəda lakəl anja dza, uwana la sifa dadəŋ. ² Bokuba magod'ay, baŋa mis adada à zil. La mok uwana zil anja ələg la sifa kà, tetəvi la ahəŋ kà anja mad' à zil anik aw, kà uwana mapəhay avà à tetəvi aw. Ama baŋa zil anja adamətsay kà, tetəvi la ahəŋ adagay, kà mad' à zil anik. ³ Kay, ama baŋa zil anja ələg la sifa, nəma pəra ada à zil anik aya, masla azaɓ zil. Ama baŋa zil adamətsal à akəl ala masla la tetəvi, baməraka ada anja à zil, agay masla mazaɓ zil aw, kà uwana kà akəlla mapəhay ala aw. ⁴ Kiya uwaga kà, anjul babay azladedə. Kadzaw à ahəŋ la ahəl anja mapəhay kà, bokuba akul azlamamətsay gə, kà uwana kamətsaw la slaka gə la Yesu Kristu. Kità akul azlaanja, masla la uwana Zəzagəla awulla à uda la mamətsay. Kà anu anja madəhalləŋ sləray uwana akəsa à vok gesina. ⁵ Mok uwana uwarà kà, mədza à ahəŋ kà bokuba uwana asà à gəl gami, ama mapəhay anja Zəzagəla la uwana: Uwanay la uwanay kà tsakana, agod'ah à anu. Kiya uwaga à uwana apəh à anu ala tsakana, uwana mədəhəhəŋ tekid'ik. Azlatatak mawisiga uwaga takor gəl anjətà la anu la abà, ŋgaha tadək anu à mamətsay à abà. ⁶ Uwarà kà, mapəhay afà à anu à ahəŋ bokuba azladəŋay. Lagonay kà, mədətsal à adi ala à mapəhay uwaga, ndzəda anja la ahəŋ lakəl gami aya aw. Lagonay adagay kà, məd'ah sləray anja Zəzagəla la madz à ahəŋ mawga la abà, la tetəvi anja Masasədok anja la ama, awkà la tetəvi maviyaga, uwana tatsətsər à mapəhay à abà aya aw.

Mapəhay apəhanula tsakana

⁷ Kakay gəgod'ay mi? Mapəhay anja Zəzagəla ma tsakana takay? Awan, tsakana diki-diki aw. Ama agaynə mapəhay agay la ahəŋ, awkà naka gəsəl tsakana aw. Agaynə mapəhay agod'ay: Kadəhaw adi aw, awkà naka gəsəl adi aw. ⁸ Hay, ama la mok uwana gətsənəŋ mapəhay uwaga kà, tsakana abəzà gi à tsəh, ŋgaha gədzəkà mad'ah adi à azlatatak gesina à tsəh. Mok uwana mapəhay la ahəŋ aw kà, tsakana kà agə tsaftaf. ⁹ Mok uwana uwarà gəsəl mapəhay à dadəŋ aw kà gəgod' kà: 'Gi la sifa.' Ama mok uwana gədatəŋ mapəhay kà, tsakana anzəzə gay ala. ¹⁰ ŋgaha gəsəl kà tsa gi mamətsayga. Zəzagəla avà mapəhay uwaga kà, kà mapəhgəla tetəvi sifa, ama adala gi kà à mamətsay. ¹¹ Mok uwana gətsənəŋ mapəhay uwaga kà, tsakana abəzà gi à tsəh, apapət gi, kà gi anja mad'ah tsakana, ŋgaha agəd' kà uwana gəfahà tsakana.

¹² Kiya uwaga kà, mapəhay atsa à wan kà la ahəl anja Zəzagəla, ŋgaha kəla mapəhay anja bay kà tsikasla gesina, dziriga. ¹³ Baŋa kiya uwanay ma, tatak uwana delga la uwana adapaka gi matsapa vok takay? Awan masla aw! Uwaga kà tsakana la uwana apaka matsapa kà makəf gi. Tsakana abəzə gi à tsəh kà makəf gi ala, tatak delga uwaga kà masələy, kà tsakana kà bə tsakana ndzər, ŋgaha kà uwana mapəhay la ahəŋ, tsakana apəhla tsakana ala kà mawisiga la tetuwa.

Dza kà tsakana adafal à asik à gəl

¹⁴ Məsəl kà mapəhay kà atsa à wan kà la slaka Zəzagəla, ama gi kà gi dza deyday gə pəra, gəgə bokuba mayà anja tsakana. ¹⁵ Gətsənəŋ uwana gədehəŋ aw, gədehəŋ kà uwana asà à gi aw, hərəzka anja uwana asà à gi aw, la uwana gədehəŋ aya. ¹⁶ Baŋa gədehəŋ, kà uwana asà à gi anja madəhəŋ aw, uwaga apəhla ala kà mapəhay anja

Zəzagəla kà delga. ¹⁷ Ama mawisiga uwaga kà gi la uwana gədehəŋ aw. Tsakana uwana la gi la abà la uwana adəh uwaga. ¹⁸ Gəsəl kà delga la ahəŋ la gi la abà aw, à gi dza uwana gi dza asik aw. Kay kà, asa à gi madəh delga nəma, ama gəslala vok aw, kà uwaga. ¹⁹ Tatak delga, uwana asa à gi madəhəŋ kà, gədehəŋ aw, ama tatak mawisiga uwana asa à gi madəhəŋ aw, la uwana gədehəŋ. ²⁰ Baŋa gədehəŋ kà tatak, uwana asa à gi aw kà, uwaga kà gi la uwana gədehəŋ aw, tsakana uwana la gi la abà, la uwana adəhəŋ.

²¹ Kiya uwaga à uwana gədehəŋ koksikoksi, baŋa gəfəh delga zlə, gi gəgodəy kà, tsakana la uwana atsavok gi à huma. ²² La madzugway gulo la abà kà, mapəhay aŋa Zəzagəla kà akəs à gi gəl ndzer. ²³ Ama la madz à ahəŋ gulo la abà kà, gəŋəŋəŋ kà tatak anik la ahəŋ à uwana apa guvəl la madzugway delga uwana la gi la abà. Tatak mawisiga uwaga la gi la abà kà, asal mapak gi ala kà mayà aŋha. ²⁴ Yayatsiya, uwa à uwana adəpəl gi ala la madz à ahəŋ mawisiga gulo uwanay la abà, adala gi à mamətsay uwa? ²⁵ Kikay gəgod à Zəzagəla la ləv tekula, kà uwana masla la uwana adəpəl gi ala kà ahəl aŋa Sufəl gami Yesu Kristu.

Gəgod la madzugway gulo la abà kà, gədehəŋ kà mapəhay aŋa Zəzagəla. Ama dza sləb vok kà, asal kà gəŋəfay kà tsakana.

8

Sifa uwana Masasəfok Zəzagəla av à azladza

¹ Lagwa kà Zəzagəla adədukw seriya à azladza uwana à gel, tahama gay à vok la Yesu Kristu aya aw. ² Kà uwana ndzəda aŋa Masasəfok Zəzagəla uwana avà à anu sifa la ahəl aŋa Yesu Kristu, adəpəl gi ala la ndzəda aŋa tsakana la abà la mamətsay. ³ Mapəhay aŋa wakità seriya asla mav sifa à azladza aw, kà uwana anu azladza asik məslala vok aŋa madəh uwana asa à mapəhay aw. Ama uwana mapəhay aslala vok aw kà, Zəzagəla kà ahəŋəŋ ala. Zəzagəla adəhəŋ uwaga la maslə Kona aŋha à waŋ à gudəŋ à vok, la sləb vok kiya aŋa aŋami azlaməna tsakana. Masla asà à waŋ aŋa mazəb anu tsakana lakəl ala. Kiya uwaga Zəzagəla adukwə seriya aŋa tsakana aŋa azladza à gəl aŋha. ⁴ Zəzagəla adəhə uwaga, kà anu aŋa maslala vok, kà madəh delga uwana mapəhay ayahay kà uwana məkəsa gəl à ahəŋ la tsəh aŋa uwana asa à Masasəfok Zəzagəla, awkà uwana asa à sləb vok gami aw. ⁵ Azlauwana tadzadzar vok bokuba uwana asa à gəl aŋatà kà, tatuway kà à uwaga à tsəh koksikoksi. Ama azlauwana tadzadzar vok bokuba uwana asa à Masasəfok kà, atà bay tatuway kà à uwana à tsəh, asa à Masasəfok uwaga bay. ⁶ Baŋa anu mətuw à uwana à tsəh asa à sləb vok gami kà, abiyan mamətsay à gəl, ama baŋa mətuway kà à uwana à tsəh asa à Masasəfok kà, mədəbəza sifa la lapiya. ⁷ Azlauwana tatuway kà à uwana à tsəh, asa à vok aŋatà kà azlaməna məzam aŋa Zəzagəla. Atà tanəfa mapəhay aŋa Zəzagəla dikiidiki aw. Ndzer kà, taslala vok aŋa makəsaw aw. ⁸ Azlauwana tadzadzar vok bokuba uwana asa à gəl aŋatà kà, taslala vok aŋa mahəf à Zəzagəla à adi aw.

⁹ Ama akul kà kadzadzaraw vok kà la makəs gəl à ahəŋ la tsəh aŋa Masasəfok Zəzagəla, kà uwana Masasəfok uwaga aga la ahəŋ la ləv aŋkul la tsəh. Dza uwana la Masasəfok uwaga aw kà, masla kà dza aŋa Yesu Kristu aw. ¹⁰ Baŋa Yesu Kristu la akul la abà kà, baməraka kamətsaw kà madəgolay tsakana babay kà, bə Masasəfok aŋha uwana avà à akul adzadzar akul, kà uwana Zəzagəla adapakakulla dziriga la huma aŋha. ¹¹ Baŋa Masasəfok aŋa Zəzagəla uwana awulla ala Yesu Kristu à uda la mamətsay la akul la abà, la kità bay ndzer kà, Zəzagəla uwaga adəwulla ala akul à uda la mamətsay babay. Adəfəh uwaga kà la ndzəda aŋa Masasəfok aŋha, uwana la akul la abà.

¹² Azladedə, tsa kiya uwanay kà, goder aga anu lakəl, kà aŋa madzadzar vok, bokuba uwana Masasəfok Zəzagəla ayahay, awkà bokuba uwana asa à sləb vok gami aw. ¹³ Baŋa kanəfaw kà tetəvi uwana asa à vok aŋkul kà, kadəmətsaw. Ama baŋa kavəw tetəvi à Masasəfok Zəzagəla, kasaw à uda la azlatatak mawisiga uwaga la abà kadəhawwaŋ kà, kadəbəzaw sifa. ¹⁴ Azlauwana takəsə gəl à ahəŋ la tsəh aŋa Masasəfok Zəzagəla, gesina kà azləbəza aŋa Zəzagəla. ¹⁵ Masasəfok uwana Zəzagəla avà à akul kà, apəkakulla kà azlaməy, ŋgaha avà à akul guba aya aw. Ama apəkakulla kà azləbəza aŋha. Avà à anu gay kà magodəy à Zəzagəla: “Baba, kak tsuŋulo!” ¹⁶ Kiya uwaga Masasəfok uwaga afaɖanumə la ləv la tsəh: Ndzer, anu azləbəza aŋa Zəzagəla. ¹⁷ Tsa bə uwana anu azləbəza aŋa Zəzagəla adəgay kà, mədəbəza azlatatak dzəbə aŋha sɛla aw gə, uwana adəfa à anu à ahəŋ. Ama kà Yesu Kristu la uwana mədəbəza azlatatak uwaga, kità mədəbəza mazləbay uwaga, kà uwana məs ŋgərpə anina la slaka gə bay.

Gay lakəl aŋa mazləbay uwana mədəbəzal

¹⁸ Aganay gəgod' à akul kà, nğerpa uwana məsəy la abanay la vəfah la sa uwanay kà, uwaga kà apaka kà bokuba tatak deyday. Tetuwa adətsizilla à mazləbəy anja Zəzagəla, uwana à huma adavə à anu aw. ¹⁹ Tatak gesina uwana Zəzagəla adəfahən, takuday la tsetsi dadən à mavakay uwana Zəzagəla adəpəhla à azlabəza anja ala la dazuwaya, kà masla anja mapəhla mazləbəy anjatà ala. ²⁰ Azlatatak uwana Zəzagəla adəfah à atà kà, tagahay kà bokuba azlatatak deyday. Atà la gəl anjatà kà, tawoyən kiya uwanay aw. Zəzagəla la gəl anja la uwana asakətala à ahəl la tsəh ala, ama atà tafə manəwəyən anjatà à azlatatak anik à tsəh gotənən. ²¹ Kà uwana vərđi anik kà, Zəzagəla adətəf azlatatak uwana adəfah à atà, nğaha tadəgay kiya azlamayə aya aw. Tadəzinla aya aw. Atà babay tadəkor gəl, tadəbəza mazləbəy bokuba uwana azlabəza anja Zəzagəla tadəbəzal bay suwan. ²² Məsəl kà dagay madzəka tsəràh à lakana kà, kəla tatak uwana Zəzagəla adəfahən kà, tabàs vok bokuba mis uwana huđ bəzi azəy ay njuwadaw? ²³ Atà kokuđa gəl anjatà pəra tabasay aw, baməraka anu, uwana Zəzagəla avə à anu Masasədok anja bokuba tatak matapin anja diŋa kà, məbas vok la ləv gami la tsəh bay. Məkuday la iyaw tugwi la adi, kà Zəzagəla anja madəpaka anu ala, kà anu azlabəza anja, adəsəlla anu à uda la mabas vok gami la abə anja tetuwa. ²⁴ Nđzer mədəbəlay lagwa, ama mədənən azlatatak gesina dadən aw, anu la manəwəyən lakəl anja anja manəyən. Ama mok uwana mədənən azlatatak uwaga mənawəyən la yewđi gami kà, mədənəwəyən aya aw. Uwa à uwana anaw tatak uwana adanəyən la yewđi anja zlə ma uwa? ²⁵ Hadəy gə, mənaw tatak uwana mədənən dādən aw. Kitə məkuday la tsetsi dadən kiya uwanay. ²⁶ Kiya uwaga bay Masasədok Zəzagəla atsə à waŋ kà mazlak anu, anu uwana anu azlagubgub la tetəvi anja Zəzagəla la tsəh, kà uwana məsəl madəv kuđa, bokuba uwana naka akəs vok aw. Masasədok la gəl anja abəđ' à huma kà anjami, adəv kuđa à Zəzagəla la makəs anjuf la adi ala. Dađuwa à gay madəv kuđa la gay. ²⁷ La paraka kà, Zəzagəla asəl uwana la tsəh ləv anja azladza, nğaha babay asəl uwana Masasədok anja adzugway, kà uwana Masasədok abəđ' à huma kà anja azladza anja, adəv kuđa à Zəzagəla bokuba uwana akəsəl à gəl.

²⁸ Azladza uwana tawoya Zəzagəla kà, azlauwana masla azala atà kà atə madəhalla tatak uwana ahədəl à adi, məsəl kà dēwdēw tatak uwana abəza atə, kà Zəzagəla adəh tatak uwaga à ahən, kà makəđ' gəl à ahən anja anja magay delga. ²⁹ Azlauwana Zəzagəla adatsatsamani atə dagay uwarə kà, adabək atə, afə atə awtəy kà magay bokuba azlabəza anja, kà bəzi gay ləv anja anja magay malkwoy la tataka anja azlabəza dən la abə. ³⁰ Abək atə, afə atə à awtəy pəra aw, azalə atə pəra aw, apakə atə ala kà azladziriga la huma anja. Babay kà, atə anja magay azladza anja. Azalə atə pəra aw, apakə atə ala kà azladziriga la huma anja, nğaha avə à atə mazləbəy aya.

Zəzagəla kà, awoya anu

³¹ Tsa anja kiya uwanay ma, mana à uwana atəm kà anu à ahən anja mapəhay ma? Tsa Zəzagəla kà awul kà à anu ma, uwa à uwana adəvədah anu gəl aya uwi? ³² Zəzagəla kà akwəslə bəzi anja aw, asləl à waŋ kà masla anja mamətsay kà, kà anjami gesina. Tsa Zəzagəla avə à anu Kona anja ma, sakoraka azlatatak anik la uwana avə à anu aw takəy? ³³ Uwa à uwana aslala vok kà mat kaf à azladza uwana à gəl, Zəzagəla adatsatsamani atə uwa? Kà uwana Zəzagəla adapaka atə ala kà azladza dziriga la huma anja. ³⁴ Uwa à uwana aslala vok anja madukw à atə seriya à gəl uwa? Yesu Kristu la gəl anja aməts kà anjami, Zəzagəla awulla à uda la mamətsay, adzanə madzay la ahəl kaf anja lakəl, nğaha masla la uwana abəđ' à humə gami, la huma Zəzagəla. ³⁵ Uwa à uwana adəvah anu ala la Yesu Kristu kà masla anja mawoy anu aya aw uwa? Məterəbəy à uwana adəvah anu ala ay, awma mabas vok ay? Awma azlauwana tasa à anu zladə la uwana adəvah anu ala ay? Awma may la uwana adətugw anu ala ay? Awma kuđa ay? Baməraka anu la zlamtsa la abə, amiyaka katsakar, awma mamətsay la uwana adəvahanula la Yesu Kristu ay? Awan, tatak la ahən, à uwana adəđ' gay à masal anja ahən, kà anja makweska anu aw. ³⁶ Uwaga kà bokuba uwana tatsetsər à wakitə Zəzagəla à abə kà:

'Kà uwana anu azlaənək à kak Zəzagəla, à uwana anu la zlamtsa anja mamətsay la abə, kà uwana azladza tayəh makəđ' anu koksikoksi. Anu kà mədəgay la yewđi anja azladza kà kalkal la azlatuwan, uwana tadala atə makəđ' atə.'^{*}

³⁷ Ama mədaf asik à azlaməterəbəy uwaga à gəl gesina, mədəduw atə la ndzəđ' anja dza uwana awoya anu. ³⁸ Nđzer, gəsəl kà tatak la ahən à uwana avəhanula la masla, kà masla anja mawoy anu aw, aw. Amiyaka banja məmətsay, amiyaka anu la adi taslala vok anja madəđ' à anu gay à ahən aw. Azlamalika la azlatatak uwana takor ndzəđ' la zagəla gesina bay kà, taslala vok, kà madəh tatak kà masla anja mawoy anu aw, aw.

* 8:36 8.36 Mahabay 44.22

Azlatatak uwana abøza anu lagonay, la azlatatak uwana adàbøza anu la huma la gay bay kà, taslala vok madəf à anu gay à ahəj aw. ³⁹ Azlauwana, la ləv zagəla la abà, ŋgaha azlauwana la tsəh iyaw bay kà, taslala vok aŋa madəh tatak aw. Dəwdəw tatak uwana Zəzagəla adəhəŋ taslala vok aŋa madəf gay à Zəzagəla à ahəj kà aŋa mawoy anu aw. Mawoy dza uwaga kà apəhanula kà la ahəl aŋa Sufəl gami Yesu Kristu.

9

Zəzagəla la azla Yahudiya

¹ Uwanay gəpəhay lagwa kà dziriga, kà uwana gi aŋa Kristu, gəďəh fida aw. Masasəfok tsikasla la madzugway gulo taza sayda aŋa uwaga babay. ² Gi la mazaw la gəl gə kaykay la ləv gulo la tsəh, ŋgaha la mazay mənŋa ³ kà tsəhay gulo Isərayel, uwana gəwoyən. Agayŋa Zəzagəla akəf à atà gi à uda la tataka kà aŋatà ŋuləm, la mavahanula la Kristu, kà uwana azladedə gulo. ⁴ Atà mayyi à tsəh ala aŋa Isərayel. Zəzagəla atsatsaməni atà, kà atà aŋa magay azlabøza aŋha, apəhatəla mazləbay aŋha, ŋgaha akəs vok slawda la atà, avà à atà mapəhay. ŋgaha apəhatəla tetəvi kà masləkawla masla, ŋgaha apəh à atà azlagay, uwana avà à vok aŋatəə abà, asal kà madəhəj bay. ⁵ Atà mayyi à tsəh ala aŋa Abəraham la azlabøza aŋha, Isak la Yakuba uwana tadzà à ahəj uwarə. Yesu Kristu la sləb vok aŋha la abà kà mayyi à tsəh ala aŋatə bay. Kristu uwanay kà Zəzagəla agəŋ lakəl aŋa tatak gesina məzləbə masla koksikoksi. Amen.

⁶ Mədzugw kà uwana Zəzagəla apəh à azlatsəhay aŋha à ahəj, adəhəŋ kiya uwatə məgodf aw. Ama kəla kà, azla Isərayel gesina la uwana taga tsəhay aŋha aw, say aŋa gay gə pəra. ⁷ Mayyi à tsəh ala aŋa Abəraham kà dəŋ, ama atà tagə azlabøza gay ləv aŋha gesina aw. Zəzagəla apəh à Abəraham à vok à abà dagay uwarə: 'Fofulo aŋək dziriga kà, adəsà à uda kà la mayyi à tsəh ala aŋa Isak la abà.'*

⁸ Uwaga asal magodfay kà, azlabøza aŋa Abəraham gesina kà, atà tagə azlabøza aŋa Zəzagəla aw. Zəzagəla agodf kà, azlabøza aŋha dziriga kà, say azlauwana pəra tayyà à vok la uwana la afik, apəh à ahəj. ⁹ Uwana Zəzagəla apəh à ahəj kà: 'Baŋa mavakay uwana gəpəh à ahəj adəslay kà, gəďəwul à awtəy, ŋgaha la mok uwatə

la uwana Sara adəyya bəzi zilga',*

agodf. ¹⁰ ŋgaha kà uwaga pəra aw, ama mənəroz lakəl aŋa vəgal, uwana Rebeka ayyà bay. Baba aŋatə kà la baba gami madzidziga Isak. ¹¹ Mok uwana aləg mayyàh atà kà Zəzagəla agodfəl:

'Madəvəla à ahəj adəduw uwana adatsə vok à ahəj.'
Mok uwana apəh kiya uwanay kà, tadəh tatak delga baməraکا tatak mawisiga dadəŋ aw, Rebeka bay adəyyah atə aw. ¹² Zəzagəla adəhəŋ kiya uwanay kà, kà uwana zagəla aŋha kà madəh uwana asal. Akəsəni dza aŋha la tataka azladza anik la abà, kà huma à gay sləray delga aŋha uwana adəhəŋ aw.* ¹³ Uwaga apakà vok bokuba uwana tatsetsər à wakitə à abà, Zəzagəla agodf:

'Gi Zəzagəla, la uwana gəkəsəni Yakuba, ŋgaha gi la uwana gəkweska Esaw bay.*'

¹⁴ Baŋa kiya uwanay ma, mana mədəgodfay zlə ma? Kitə ma Zəzagəla kà adəfəhəj kà la tetəvi aŋha aw məgodf ay? Tetuwa kiya uwaga aw. ¹⁵ Hadəy dagay uwarə agodf à Musa:

'Gəďəďəh delga à dza, uwana asa à gi madəhalla ala delga, vok mahamay adəkəsə à gi kà aŋa dza uwanay vok adəhama gi kà masla.*'

¹⁶ Kiya uwaga, baŋa Zəzagəla akəsəni dza kà, bə akəsəni pəra, kà uwana asal madəhalla ala delga. Awkà kà, à huma à gay dza la mawadf vok à uda aŋha, ŋgaha sləray aŋha pəra aw. ¹⁷ Kitə mədzenəy la wakitə Zəzagəla la abà babay kà, Zəzagəla agodf à Faruna: 'Gəfə ka à sufəl à abà kà deyday aw, ama kà gi aŋa mapəhla ndzəďə gulo ala la kak la abà, ŋgaha kà sləm gulo aŋa matsinla la gudəŋ la vok gesina.*'

¹⁸ ŋgaha Zəzagəla adəh delga à dza uwana asal, ŋgaha adzadzəŋ gəl ala la dza uwana asal babay.

Mapak ləv la vok mahamay aŋa Zəzagəla

¹⁹ Zlahaw tagodf à gi: 'Baŋa Zəzagəla akəsəŋ azladza kiya uwanay ma, kà mana ma masla apakətəla kà azlamawisiga aya mi? Uwa la uwana atsizilliya à mawoyəŋ aŋha à huma uwi? Say azladza tadəhəŋ kà uwana afə à ahəj la gəl aŋha pəra.' ²⁰ Kayyà, zil! 'Gi uwa', kagodf, kà mabay vok gay la Zəzagəla uwa? Tak ma abisl manjalay gə, agodf à dza uwana aŋal kà, 'Kà mana kaŋal gi kiya uwanay mi ay?', agodfay takay? ²¹ Masla

* 9:7 9.7 1Musa 21.12 * 9:9 9.9 1Musa 18.10 * 9:12 9.12 1Musa 25.23 * 9:13 9.13 Malaki 1.2-3 * 9:15 9.15 2Musa 33.19 * 9:17 9.17 2Musa 9.16

mañal masik kà, aga la ndzɔɔa lakɛl aña abisl aña aw takay? La abisl tekula aslala vok mañalàh masik sɛla, añañ anik uwana asa à lɔv aña kaykay, ñgaha anik bay añañay bokuba azlamasik anik anik gesina.

²² Iyay, agayña Zɛzagɛla asal magay bokuba masla mañal masik uwaga ma abɛz kakay? Asal kà azladza tasɛlay kà masla la mapak lɔv gà lakɛl aña azlamɛna tsakana, ñgaha masla la maslay. Kità abasàtàn bamɛraka tadfahàhla lɔv à Zɛzagɛla à huɔf, kay, kà atà kà azlayla à atà à mamɔtsay. ²³ Adfahàn kiya uwanay kà, kà azladza aña masɛlay, kà masla la mazlɔbay mɛngga, ñgaha kà masla aña mahɛl atà à mazlɔbay uwaga à abà suwan, atà uwana asal madfaha à atà delga. Masla adfaha à atà à ahɛñ dagay uwarà, kà atà aña mad à mazlɔbay aña à abà. ²⁴ Gesina gami kà Zɛzagɛla adazalla anu adagay kà mad à mazlɔbay aña à abà. Akèsàni kà azla Yahudiya à uda pɛra aw, ama azalà azlatsɛhay gesina. ²⁵ Uwaga bokuba uwana masla agòɔf la wakità aña Hosɛya la abà kà: 'Azladza uwaga tagà azladza gulo aw uwarà, lagwa akul azladza gulo gɛdàgɔɔf à atà. Azlauwanay gɛwoyà atà uwarà aw kà, tadàgay azlabɛza gay lɔv gulo adagay.

²⁶ La slaka uwana la abà: 'Akul, azlatsɛhay gulo aw', tagòɔf à atà kà, zwek la huma la gay tadàzala atà ala 'Azlabɛza aña Zɛzagɛla uwana la sifa.'^{*}

²⁷ Yesayya apɛh la paraka lakɛl aña azla Isɛrayel kà:

'Bamɛraka tsɛhay Isɛrayel añañaw kiya wuyyan, uwana la mukwà la tsɛh kà, sɛlɔw kà, azlauwana Zɛzagɛla adàbɛl atà kà, atà dɛñ aw.

²⁸ Sufɛl Zɛzagɛla kà anàl gɛl à ahɛñ, kà mas à wan à gudɛñ à vok, kà madfah uwana apɛh gesina, aw.^{*}

²⁹ Kiya uwanay Yesayya uwanay adapɛhay uwarà:

'Baña Sufɛl Zɛzagɛla uwana akor tatak gesina kà, asakà azlauwana tsɛhay gami anik la uda aw kà, mɛdàmɛts à gay bokuba azladza la gudɛñ Sodom la Gomor!^{*}

Yesu kà akur uwana atsala matekwid à azla Isɛrayel

³⁰ Mana mɛgɔɔɔfay lagwa ma? Azladza uwana azla Yahudiya aw kà, tayàh tetɔvi kà magay dziriga la huma Zɛzagɛla aw, ama lagonay kà tagahay dziriga la huma aña, kà uwana tadin gɛl à masla à vok. ³¹ Kà aña azla Yahudiya kà tayàh madfɛk vok à mapɛhay à afik kà atà magay dziriga la huma aña la uwatà, ama taslala vok kà makɔɔɔf gɛl à ahɛñ aw. ³² Kay, kà mana takɔɔɔf gɛl à ahɛñ aw ma? Kà uwana tadzugw kà 'Mɛdàgay dziriga la madfɛhɛñ gami', tagòɔf. Ñgaha tadin gɛl à Zɛzagɛla à vok aw. Kità kà, akur uwatà atsala atà matekwid.^{*} ³³ Bokuba uwana tatsɛsɛr à wakità Zɛzagɛla à abà:

'Nɛrɛzàw, gɛtsɛb akur matsàhla matekwid à azladza à ahɛñ la Siyon. Dzɛgla uwaga la uwana adàduk w à azladza à ahɛñ. Ama azladza uwana tadin gɛl à dzɛgla uwaga à vok kà, adàvavar atà aw.^{*}

10

¹ Azladedà, asa à gi kà azlatsɛhay gulo azla Yahudiya tabɛlay gesina, gɛsak à madɔv kudà à Zɛzagɛla kà atà aw. ² Kà anàtà kà gi la uwana gɛza sayda lakɛl anàtà. Asa à atà ndzer mav vok anàtà à Zɛzagɛla, ama tetɔvi uwana tavàlla vok anàtà kà masla aw. ³ Atà, tatsɛnà godega aña tetɔvi uwana Zɛzagɛla apàkla azladza dziriga ala la huma aña aw, tanɔfà kà tetɔvi anàtà anik. Kità kà tavàlla à Zɛzagɛla à ahɛñ lakɛl à adi, kà uwana takɛs tetɔvi uwana Zɛzagɛla asal mapakla azladza ala kà azladza dziriga la huma aña aw. ⁴ Uwana gɛpɛhay kiya uwanay kà, à mok uwana Yesu, uwana mafal dzakwa à gɛl gà, asà à wan kà, anatsà ndzɔɔa aña mapɛhay ala. Uwana adfahàn kiya uwanay kà, kà azladza uwana tadin gɛl à masla à vok kà, kà atà la uwana Zɛzagɛla apakà atà ala kà azladziriga la huma aña.

Zɛzagɛla abɛl azlauwana tadin gɛl à Yesu à vok gesina

⁵ Musa tatsɛsɛr lakɛl aña manɛf mapɛhay dagay uwarà. Kakay mɛdàgay dziriga la manɛf uwaga mi? Agòɔf:

'Dza uwana anɛfa mapɛhay uwaga gesina adàbɛz sifa kà uwaga. Kɛla kà, say baña dza anɛfa uwaga la dɛndan^{*}

agòɔf. ⁶ Ama tetɔvi aña mapakla dziriga la huma Zɛzagɛla, la madinjal gɛl à vok kà, gɛrgɛr. Tatsɛsɛr à wakità Zɛzagɛla à abà lakɛl aña tetɔvi uwaga kà:

'Kadzugw la lɔv añañak la tsɛh, 'Uwa à uwana adàda à zagɛla à uwi?', kagòɔf aw.' (Bokuba magòɔfay: Uwa à uwana adàda mazalla Kristu uwana à ahɛñ, mafal dzakwa à gɛl uwi?)

^{*} 9:26 9.26 Hosɛya 1.10; 2.23 ^{*} 9:28 9.28 Yesayya 10.22-23 ^{*} 9:29 9.29 Yesayya 1.9 ^{*} 9:33 9.33 Yesayya 28.16 ^{*} 10:5 10.5 3Musa 18.5

⁷ 'Kadzugw babay la ləv anjak la tsəh, 'Uwa à uwana adàda à mezewi uwa'', (Bokuba magodfay: kà mazalla Kristu à uda la tataka azlamazimmekid la abà), kagodf babay aw.

⁸ Mana wakità Zəzagəla agodf ma?

'Nekwa la kak à gay uwaga, la paŋaw anjak la awtày, ŋgaha la ləv anjak la tsəh!'^{*}
Gay uwaga kà, gay uwana məziŋ à azladza la magodfay: "Diŋaw gəl à Zəzagəla à vok", məgòdf à atà. ⁹ Baŋa dza apəhay la dazuwaya: "Yesu kà, dza uwana Zəzagəla afal dzakwa à gəl", agodfay, ŋgaha adiŋal gəl à vok kà, Zəzagəla awùlla Sufəl Yesu à uda la mamətsay, Zəzagəla adàbələŋ. ¹⁰ Baŋa mədiŋ gəl à Yesu à vok la ləv gami, ŋgaha məziŋ la paŋaw gami kà masla kà Sufəl, Zəzagəla adəpaka anu ala azladza dziriga la huma anja, ŋgaha adàbəl anu. ¹¹ Hadfay, kiya uwaga tatsətsèr à wakità à abà:

'Uwabeyuwi uwana adiŋ gəl à masla à vok kà, adàts gay à ahəŋ aw.'^{*}

¹² Adəgay zil Yahudiya adəgay tsəhay anik, Sufəl uwaga kà, masla Sufəl anja azladza gesina. Təsay gəl à azladza uwana à vok, tadəval kuɗa gesina. ¹³ Uwaga bokuba uwana tatsətsèr à wakità Zəzagəla à abà:

'Uwabeyuwi uwana adəv kuɗa à Sufəl Zəzagəla, adàbəlay.'^{*}

¹⁴ Kay, gay kà aganay zlakodfa: Kakay mədəval kuɗa, kokudfa madiŋ gəl à masla à vok ma? ŋgaha kakay mədiŋ gəl à masla à vok, kokudfa matsən gay lakəl anja ma? ŋgaha aya kakay mədətəŋəŋ, à baŋa masla mapəh à anu gay uwaga la ahəŋ aw ma? ¹⁵ ŋgaha à baŋa azlaməna gay Zəzagəla tasləl à atà azladza aw, la tetəvi ma uwala azladza taday anja mapəhatàla gay la? Uwaga kalkal bokuba uwana tatsətsèr à wakità Zəzagəla à abà: 'Nərəzaw, marabay anja azladza uwana tarab lakəl anja azladza, uwana tasà à waŋ anja maz à atà gay marabəŋ tsi.'

¹⁶ Ama la tataka azlaməna matsəb sləm à gay uwanay kà, dza dəŋ à uwana takəs gay uwaga aw. Masla mapəhal gay ahəl Yesayya agòdf kà:

'Sufəl, uwa à uwana adiŋ gəl à mapəhay gami à vok uwa? Dza dəŋ aw!' ^{*}

agòdf. ¹⁷ Kità, sələw kà, dza atsən gay marabəŋ dadəŋ la uwana adiŋal gəl à vok. Ama kà dza anja matsən gay marabəŋ kà, say dza anik apəhal lakəl anja Yesu Kristu dadəŋ.

¹⁸ Aganay manavay gulo: La dziriga kà, azla Yahudiya kà, tatsənà gay uwaga aw takay? Ndzer, tatsənəŋ! La wakità Zəzagəla la abà tatsətsèr, tagòdf kà:

'Azladza tadàh kà mapəh gay Zəzagəla la gudəŋ la vok gesina, mapəhay anjatà atsən ala gesina, tsərəh à makədf gəl à ahəŋ gudəŋ à vok!'

¹⁹ Bə gətənaŋ gənavà akul manavay anik aya: La dziriga ma, azla Yahudiya tatsənà gay uwatà aw takay? Tatsənəŋ, ama asa à atà matsəbal sləm aw pəra. Terəŋa dəŋ Musa apəh à atà:

'Zəzagəla agòdf: 'Gədəpaka akul ala kà azlaməŋor lakəl anja tsəhay uwana madziyikw atà gə. Gədəpaka akul ala ləv gəl lakəl anja tsəhay uwana tasəl gəl aw', agòdf.'^{*}

²⁰ ŋgaha la lig anja uwaga la ahəŋ, guba akəs Yesayya kà mapəhay aw. Kiya uwana mapəhay anja Zəzagəla, uwana apəh, Yesayya agòdf:

'Aganay azladza uwana tayəh gi aw kà, tanəŋ gi ŋgaha gədəpəhatàla vok à azladza uwana tadəv gi kuɗa aw.'

²¹ Ama kà anja azla Isərayel kà Zəzagəla apəh la paŋaw anja Yesayya kà:

'Lis gəvak à mafatakàh à atà gəl kà mazala atà kà, ama tasa à waŋ aw. Takəs gay gulo aw, takwes gi à gəl.'^{*}

11

Vok mahamay anja Zəzagəla lakəl anja azla Isərayel

¹ Kità kà, gənavə manavay anik aya: Tsa kiya uwanay ma, Zəzagəla aməl azla Isərayel ala ay? Awan, aməl atà ala aw. Gi la aslasl gəl gulo bay kà, gi zil Isərayel. Gəsà à uda la tsəhay anja Benyamin uwana mayyi à tsəh ala anja Abəraham. ² Zəzagəla aməl azladza anja uwana ala, atsatsəmāni atà dagay madzəka aw. Kasəlaw kà tatsətsèr kiya uwaga à wakità Zəzagəla à abà lakəl anja Eliya aw ay? Apuwà gudzi à azla Isərayel à gəl, la huma Zəzagəla agòdf:

³ 'Sufəl, azladza uwana takədfəh azlaməna mapəh à atà gay ahəl anjak, tabazlləh azlaslaka makədf tatak à ahəŋ. Say gi kokudfa gəl gulo pəra à uwana gətəm à ahəŋ anja manəf ka, ŋgaha asa à atà makədf gi bay.'^{*}

⁴ Mana Zəzagəla awùlla ala ma? Agòdfal:

^{*} **10:8** 10.8 5Musa 30.12-14 ^{*} **10:11** 10.11 Yesayya 28.16 ^{*} **10:13** 10.13 Yoyel 2.32 ^{*} **10:16** 10.16 Yesayya 52.7; 53.1 ^{*} **10:19** 10.19 5Musa 32.21; Mahabay 19.4 ^{*} **10:21** 10.21 Yesayya 65.1-2 ^{*} **11:3** 11.3 1 Sufəl 19.10,14,18

'Kak kokudfa gəl anjak pəra aw. Gəbək à ahəŋ azladza dəbow mədəf, uwana atà kà takədəf à Bal à ahəŋ aw.'

Zəzagəla agədal. ⁵ Lagwa kà, kasəlaw gay uwanay təga aw ay? Kà anjami kà kiya uwanay babay zlà, atəm à ahəŋ azladza uwana Zəzagəla atsatsəmàni atà la vok mahamay anja. ⁶ Baŋa Zəzagəla atsatsəmàni atà kà, kà sləray anjatà uwana tadəhəŋ aw. Tsa baŋa kità aw kà, vok mahamay anja kà, adagay kà vok mahamay aya aw.

⁷ Uwaga asal magədafay kà, azla Isərayel tabəza uwana tayəh aw, say azlauwana Zəzagəla atsatsəmàni atà la uwana tabəzal. Ama azlauwana tatəm à ahəŋ kà tadzadzəhəhə gəl anjatà ala. ⁸ Uwaga kà bokuba uwana tatsətsər à wakitə Zəzagəla à abà:

'Zəzagəla apakà atà ala dadəgzləka bokuba azlamadagazlam, atsəkàh à atà à yewdi à ama, anakàh atà à sləm à ama tsərəh à lakana kà: 'Təh sləm', agəd à atà aw.'

⁹ David agəd babay kà:

'Mazuw tatak may anjatà kà adəpaka atà maləkaw à ahəŋ, adətsahla à atà matekwid, ŋgaha adədukw atà à ahəŋ. Kità à uwana Zəzagəla adəvə à atà ŋgərpa.

¹⁰ Zəzagəla atsəkàh à atà à yewdi à ama, kà atà anja manəŋla ala aya aw, kà atà anja madz à ahəŋ la ŋgərpa la abà koksikoksi, kà makaləh atà à vədəh,¹⁰

David agəd.

¹¹ Tsa kiya uwanay kà, gənava akul manavay anik aya. Mok uwana matekwid atsàla à azla Yahudiya ma, tatəd à ahəŋ anja tetuwa takay? Awan, anja tetuwa aw. Ama kà uwana matekwid atsàla atà la uwana azlatsəhay anik tabəzà gəl anjatà, tabəl. Zəzagəla adəhəŋ kiya uwanay kà, kà azla Yahudiya anja makəd ala yewdi à tsəh. ¹² Mok uwana matekwid atsàla azla Yahudiya kà, azladza gudəŋ à vok gesina, tabəzà mabəlay kà madəgolay uwaga. Mok uwana azla Yahudiya tatəd à ahəŋ la tetəvi anja Zəzagəla la tsəh, Zəzagəla avà mabəlay à azlatsəhay anik. Kay, baŋa Zəzagəla adəfəh dzəba anja səla aw à azladza anik la kaslə uwatà, adəfəhətanj ma dafəwa à gay uwaga aw takay, la mok uwana azla Yahudiya tadəwul à wanj à tetəvi anja à tsəh?

Kakay Zəzagəla abəl azlatsəhay anik ma?

¹³ Lagonay kà, gəpəhay kà akul, uwana akul azla Yahudiya aw. Gi kà, gi masləlay anja Zəzagəla uwana asləl gi à slaka anjuk, uwana akul azla masla Yahudiya aw. Kà uwaga à uwana, gədəf gay ləv kà sləray uwana avà à gi. ¹⁴ Kità, asa à gi kà tsəhay gulo, azla Yahudiya, tanəŋ gi, kà azlaanik la tataka anjatà anja makəd atà à adi, kà atà anja mas à wanj, kà Zəzagəla mabələ atà la sləray gulo. ¹⁵ Hafay, mok uwana Zəzagəla aməl azla Yahudiya ala, asəl vok à azladza gudəŋ à vok. Ama mok uwana Zəzagəla adəwulla atà à tsəh aya, ma adəgay ma, kakay ma? Uwaga kà adəgay kà dzəba anja səla aw, adəvə sifa à azladza mamatsay gə.

¹⁶ Mats kaf matera, uwana dza atsəkay à fəta à awtəy tsikasla kà anja Zəzagəla, ŋgaha kaf gesina kà tsikasla bay. Baŋa godega ahəf anja Zəzagəla azlasləm gə bay kà, azlaanja.

¹⁷ Ahəf delga la abatà takədəval sləm anik la vok ala, ŋgaha tahəd kà makədəvani tsəhay anja ahəf uwatà la fəta kà mabədla à slaka uwana à abà, takədəvalla vok ala. Uwaga kà apəhay kà à kak, uwana kak zil Yahudiya aw. Kà uwana tatak delga uwana azla Yahudiya tabəzəl kà, lagonay kà, kak babay kabəzal bokuba azlasləm ahəf uwana tabəzal ndzəfa kà madəgolay iyə gə. ¹⁸ Kà uwaga zlà kà, kapəsew azlasləm ahəf uwana takadaval à vok ala aw. Kà mana kats zlapay ma? Kak kà, sləm ahəf pəra, ndzəfa anja sləm ahəf kà atsa à uda kà la iyə gə la abà pəra, awkà sləm ahəf avà ndzəfa à iyə gə aw.

¹⁹ Zlahaw, dza la tataka anjuk la abà agəd: "Zəzagəla adakadaval azlasləm ahəf anik la vok ala, ŋgaha kà mabədla gi à abà la abatà", agədaf. ²⁰ Hafay, uwaga kà kità, Zəzagəla akədəvalla vok ala, kà uwana tadəŋ gəl à masla à vok aw. Ama kà anjak kà, avà à ka slaka, kà uwana kadəŋ gəl à masla à vok, kità kà. Kazigəna gəl aw, həy yewdi anja Zəzagəla! ²¹ Kà uwana baŋa Zəzagəla asək azlasləm ahəf dziriga gə, uwana asəlla à uda la vok aw, adəsak à kak babay, à kak aw. ²² Kay, fəl sləm lela, Zəzagəla kà delga, ŋgaha dzəndzəŋ babay. Masla kà dzəndzəŋ lakəl anja azladza, uwana tatəd à ahəŋ la tetəvi anja la tsəh, ama kà anjak kà, adəhəhə à ka delga à kak uwana kada à huma à gay la madəh uwana ahəfal à adi, tsa baŋa kità aw, adənats ka à ahəŋ babay. ²³ Ama azla Yahudiya kà, baŋa tadza à ahəŋ la dzəndzəŋ anjatà la abə aw, Zəzagəla adətsəv atà à gəl mən anjatà à gay, kà uwana masla la maslay kà matsəv atà à gəl mən anjatà à gay aya. ²⁴ Kak uwana kak zil Yahudiya aw kà, kak bokuba kak sləm ahəf fəta manatsin à wanj gə, uwana tatsəv à ahəf delga à gay la mtəga. Baŋa Zəzagəla adəhəŋ kiya uwaga

ma, kadzugw kà zlazladfa kà anha anja mawulla azla Yahudiya à gəl mən anjatà, uwana à gay uwarà takay? Atà uwana azlasləm ahàf dziriga gà?

Mawul ləv anja Isərayel

²⁵ Azladedə, asa à gi kà kasəlaw nasiri dziriga uwana Zəzagəla afətəlla à ama ala, kà akul anja magay azlazlapay aw. Gəgədf kà, azlaanik la tataka azla Isərayel la abà kà, asà à atà madiŋ gəl à Zəzagəla à vok aw bə la dziriga. Say banja azlatsəhay dza anik, uwana azla Yahudiya aw, uwana Zəzagəla atsatsəmāni atà, tadiŋ gəl à Zəzagəla à vok dən, ŋgaha la lig la ahəŋ azla Isərayel tadadiŋal gəl à vok. ²⁶ Ŋgaha Zəzagəla adəbəl Isərayel. Bokuba uwana tatsətsər à wakitə Zəzagəla à abà:

'Masla məbəl azladza kà, adāsa à uda kà la Siyon. Adəzəb tsakana à mayyi à tsəh ala anja Yakuba lakəl ala.

²⁷ Uwanay la uwana makəs vok slawda gulo la atà, à mok uwana gədəzəb atà tsakana lakəl ala,✠

Zəzagəla agədf. ²⁸ Kiya uwaga kà, azla Yahudiya, kà takweskə gay marabəŋ, gay gə la uwaga à uwana, tapakə azlaməna məzam anja Zəzagəla. Uwaga apakə vok kà, kà akul uwana akul azla Yahudiya aw, anja məbəz gəl la abà. Ama kà anjatə babay kà, Zəzagəla atsatsəmāni atà, ŋgaha awoyà atà, kà uwana apəh à azlababa anjatə madzidziga à vok à abà dagay uwarà. ²⁹ Zəzagəla kà, banja adazalla ka kà, bə adazalla ka. Ŋgaha banja adavà à ka kà bə adavà, abədf la vok aw. ³⁰ Akul uwana azla Yahudiya aw kà, kakwəsəwkə paŋaw anja Zəzagəla dagay uwarà. Ama lagonay kà azla Yahudiya takweskə Zəzagəla, gay gə la uwaga kabəzəw vok mahamay anja. ³¹ Ama azla Yahudiya kà, kiya uwaga babay, lagonay kà takweskə Zəzagəla, ŋgaha kabəzəw à gəl la slaka anjatə la abà. Ama uwaga apakə vok kà, kà atà məbəz vok mahamay babay. ³² Zəzagəla asəkla à ahəl à azladza la tsəh ala gesina, kà atà anja makweska masla, adəhən kiya uwaga kà, kà vok anja mahamal kà atà gesina.

Zəzagəla kà mənŋa, məzləba

³³ Kay ndzer, dzəba anja səla aw anja Zəzagəla kà mənŋa, matsihila anja kà zəŋzəŋ, adūwa azlatatak gesina, asəl tatak gesina bay. Madzugway anja kà dza abəz kà aw. Zlazladfa kà dza matsən madəhəŋ anja. ³⁴ Uwaga bokuba uwana tatsətsər à wakitə Zəzagəla à abà:

'Uwa asəl, uwana Sufəl Zəzagəla adzugway uwi, 'Dahà uwanay!', ma uwa à uwana agədfal uwi? Dza la ahəŋ aw.

³⁵ Uwa adavəl tatak à adi uwi, kà masla anja magay la goder anja la vok uwi? 'Dza la ahəŋ aw', tagədf.✠

³⁶ Hadəy ndzer kà, dza la ahəŋ aw, kà uwana masla la uwana adəhə tatak gesina. Tatak uwaga gesina tadza à ahəŋ la sifa kà, kà masla, masla la uwana Sufəl lakəl anjatə. Məzləbà masla anja koksikoksi. Amen!

12

*Maday delga anja masla sləray anja Zəzagəla
(1 Korintiya 12.1-11; 14.1-25)*

¹ Azladedə, tsa anja kiya uwanay vok adahama à Zəzagəla kà anjami zlə kà, gədəv à akul kufa: Vəwwal vok anjul la denđən. Vəw vok anjul à masla, bokuba tatak uwana takədf à Zəzagəla la ləv tekula, baməraka akul la sifa babay. Gəw azlaanja kà makəsəl à gəl. Uwaga la uwana tetəvi dziriga kà masləkawla Zəzagəla. ² Kanəfaw madz à ahəŋ anja azladza gudəŋ à vok aw. Ama la uwaga kà, vəw tetəvi à Zəzagəla, avà à akul azlamadzugway mawga kà masla anja məbədf la akul. Kiya uwaga kà, kadəsələw tatak uwana asa à Zəzagəla, uwana delga, uwana ahədfal à adi, ŋgaha akəsə à vok la tetəvi anja la ama bay. ³ Ndzədf anja Zəzagəla, uwana avà à gi kà məpəhakulla kà à aganay; gəgədf à kəla uwabeyuwi anjul kà kazigəŋaw gəl aw, ama sələw madz à ahəŋ anjul. Nərəzəw kà mavəy uwana Zəzagəla avà à akul anja masəl slaka uwana akul la abà. ⁴ Vok anja dza kà tekula pəra gesina, ama vok uwaga kà la azlamabay anik anik, ŋgaha kəla manabay kà la sləray anja. ⁵ La anu babay kà kitə. Anu dən, ama kiya anu la sləb vok tekula, kà uwana mədahama gay à vok la Kristu. Anu gesina kà mədanab vok à gay bokuba manabay anja vok. ⁶ Zəzagəla avəhà à anu mavəy anja sləray anja kà la anja, la anja. Kiya uwana asal mav à anu uwabeyuwi adəhə sləray la mavəy uwana Zəzagəla avəl. Kasəl kà, banja Zəzagəla avà à ka mavəy anja məpəh gay anja kà: Zəŋ, bokuba kasəl, kà uwana Zəzagəla avà à ka maslay. ⁷ Banja Zəzagəla avà à ka maslay

✠ 11:27 11.27 Yesayya 59.20; Yeremiya 31.33-34 ✠ 11:35 11.35 Yesayya 40.13; 55.8; Job 41.11

aŋa mađàh sləray à azladza: Zlāk à atà. Baŋa Zəzagəla avà à ka mavà y aŋa matapla à azladza, kiya uwaga tàpatàla, la tetəvi aŋha. ⁸ Baŋa Zəzagəla avà à ka à mavà y kà madzərəđàh azladza ala, dzərəđàhatàla. Baŋa Zəzagəla avà à ka à mavà y kà mavà h tatak à azladza, vàh la ləv tekula. Baŋa Zəzagəla avà à ka à mavà y kà manəŋla azladza, nəŋla atà la tetəvi aŋha. Baŋa Zəzagəla avà à ka à mavà y kà mađàhla delga à azladza, đàhà uwaga la marabay.

⁹ Kawoyaw dza la gay gə pəra aw, wòyàw dza la ləv tekula, hòyàw à mawisiga à ahàl. Nəfàw kà uwana delga. ¹⁰ Wòyàw vok akul azlaməna manəfay, kà uwana akul azlaməna huđ gày tekula, sləkàwàw azladeda aŋkul đaduwà à gay gəl aŋkul. ¹¹ Vàw vok à sləray la ləv aŋkul gesina, kagaw azlaməna mas aw, zlākàw Sufəl Zəzagəla la ləv aŋkul gesina. ¹² Fàw yewdi kà à uwana à gay Zəzagəla apəh à akul à ahəŋ. Kità kà, rabàw koksikoksi. Basàw ŋgəpa uwana kasaw. Dəvàw kuđa à Zəzagəla kokuđa masakal. ¹³ Baŋa azlaməna mađiŋal gəl à vok anik la kuđa la abà kà, kàlàw tatak uwana tanəkudà aŋha. Kəsàw azlaməlok dza uwana tatsa à mtəga aŋkul la ahàl səla.

¹⁴ Dəvàw kuđa à Zəzagəla kà azladza uwana tatəreḅ akul, katsafaw la atà aw. ¹⁵ Rabàw la slaka gə la azladza uwana tarabay. Tawàw la slaka gə la azladza uwana tataway babay. ¹⁶ Tsənàw vok gay la azlaməna magay aŋkul, kazigənaw gəl aw, baməraya sləray uwali đahəŋ bəziya aŋa sləray la ahəŋ aw. Kadzugwaw aw 'Anu azlaməna matsihilaga', kagodaw aw.

¹⁷ Baŋa dza ađahakulla mawisiga à vok kà, kawulawwalla mawisiga à adi aw. Dahàw haŋkəli kà mađehəŋ, kà uwana ahəđ la slaka azladza gesina. ¹⁸ Wàđàw vok à uda la uwana la abà kaslaw gesina, kà akul aŋa madz à ahəŋ la lapiya la abà, la kəla uwabe-yuwi à baŋa akəsa à vok. ¹⁹ Akul azlaməna gay ləv gulo kawulawla mawisiga à azladza à adi aw, ama sàkàwla kà la Zəzagəla la ahàl, à mapak ləv uwaga kokuđa gəl aŋha pəra. Kà uwana tatsətsər à wakità Zəzagəla à abà:

'Tatak mawisiga uwana azladza tađahakullaŋ à vok kà, gi la uwana gəđapəlla à akul goder aŋha', Sufəl Zəzagəla agòđ.*

²⁰ Wakità Zəzagəla agòđ aya kà:

'Baŋa masla məzam aŋak la may gə, vəl tatak may, baŋa la nəlay gə, təđalla iyaw. Baŋa kađahalaŋ kiya uwaga, masal aŋak ađàđahalla sləray ŋgaha ađapəh gay la ləv ala.*

²¹ Kavà tetəvi à mawisiga kà makəđasl à ka aw, kəđàsl à mawisiga la mađàh delga.

13

Mawulla gəl à vəđah la huma aŋa azlaməna makor kutso

¹ Kəsàw gay aŋa azlaməna makor kutso, kà uwana azlauwana la ndzəđa gesina kà Zəzagəla la uwana avà à atà, ŋgaha masla la uwana aḅək atà à ahəŋ. ² Kità kà, dza uwana ađzadzəŋ gəl ala la huma aŋa azladza, uwaga kà ađzadzəŋa gəl ala kà la tatak uwana la afik Zəzagəla afà à ahəŋ, azlauwana tađehəŋ kiya uwanay kà tađəbiy seriya à gəl aŋatà. ³ Ama baŋa azladza, uwana tađàh delga kà, guba aza atà kà azlaməna makor kutso aw, say azlaməna mađàh mawisiga la uwana guba az atà pəra. Baŋa asa à akul kà guba aŋa maz akul la huma aŋatà aw kà, đahàw delga, kà akul aŋa mahəđ à atà à adi. ⁴ Kà uwana azlauwana takoray kà, tađehəŋ kà sləray uwana Zəzagəla afà à atà à ahàl kà mazlak ka aŋa mađàh delga. Baŋa kadađahaw mawisiga kà, guba akəs akul kà atà, kà uwana ndzəđa uwana Zəzagəla avà à atà kà, avà à atà kà deyday aw. Atà kà, azlaməna sləray aŋa Zəzagəla, kà mapəhla mapak ləv aŋa Zəzagəla ala lakəl aŋa azlauwana tađàh mawisiga, kà mađàh à atà seriya à gəl. ⁵ Tsa baŋa kiya uwanay kà, say məkəsəy gay aŋa azlaməna makor kutso, kà huma yewdi pəra aw, ŋgaha la seriya uwana la abà atəđ anu à gəl aw. Ama kəsàw gay aŋatà, kà uwana kasəlaw la ləv la tsəh kà, tetəvi uwaga kà asa kà à Zəzagəla babay.

⁶ Gay gə la uwaga à uwana, kapəlaw hadama babay. Zəzagəla aḅək à azlaməna mazəḅ hadama à ahəŋ, kà atà aŋa mađàhla sləray uwaga lela. ⁷ Pəlàw à azladza uwaga gesina tatak uwana tanava à akul. Pəlàw hadama à azlaməna mazəḅ hadama, pəlàw duwan à azlaməna mazəḅ duwan. Kəsàw gay à azladza uwana la ahàl ala takor kutso la lela.

Mawoy vok kà anu kà anu

⁸ Kadzaw à ahəŋ la goder aŋa dza la vok aw. Goder aŋkul kəla kà, say mad à huma à gay la mawoy à azladza anik la abà. Kà uwana dza uwana awoya azlaməna magay aŋha kà, anəfa mapəhay aŋa Zəzagəla lela. ⁹ Hađay, Zəzagəla agòđ à anu:

'Kada à gəl gaw aw, kakəf dza aw, kada gəl aw, kakəfa yewdi à azlatatak aña azladza anik à vok aw.'

Azlamapəhay uwaga, la azlaanik gesina kà, tahama à abà à uwana agof:

'Wòyàn masla magay anjak, bokuba uwana kawoya gəl anjak bay.'^{*}

¹⁰ Dza uwana awoya masla magay aña kà, adfahalan mawisiga à vok aw. Kità kà baña kawoya azlaməna magay anjak kà, kanəfa mapəhay à uda gesina.

Mawul à wan aña Kristu kà nekwa

¹¹ Wādāw vok à uda, tsa kasəlaw mavakay uwaga lagwa kà, tsənāwla adagay kà uwana kaslā uwana Zəzagəla adābəl anu aña tetuwa kà nekwa. Uwaga kà kərkər bokuba la mavakay uwana mədiŋ gəl à Yesu Kristu à vok dadāŋ aw. ¹² Vəf la uwaga adà à lig, afats la uwaga atsa à afik. Lagwa kà mənəfa à sləray aña mələs aya aw. Mətsokw azlatatak guvəl uwana à abà, məpala guvəl la afats. ¹³ Məhād lela, azlauwana taday la udaka la abà. Məgà azlaməna mas guzu aw, mələlim lakəl aña tatak may aw, mədfahà mabilla baməraka la mana mi aw, mədfahà magazlay la azladza aw, ŋgaha məkadā yewdi à tatak aña azladza anik à vok aw. ¹⁴ Mətsokw Yesu Kristu à vok bokuba tatak guvəl gami. Kadzugwaw à azlatatak mawisiga, uwana asa à vok ankul kà madəhəŋ aw.

14

Azlaməna ndzəfa gə la azlaməna maruw vok à ahəŋ gə

la tetəvi aña Zəzagəla la ama

¹ Kəsāw azlauwana taruw vok ahəŋ la tetəvi aña Zəzagəla la tsəh la ahəl səla, kadzedzinaw madzugway anjatā aw. ² Uwaga gəpəh à akul kà, lakəl aña tatak may kəyky. Azladza anik kà, tatak may uwanay kà, asləh kà mazuway tasəl magofay aw bā mazuway pəra, ama dza uwana aləg mahənay la tetəvi aña Zəzagəla la tsəh kà, apad sləb aw, azuway kà bəsla agər à abà pəra. ³ Ama dza uwana amanay gesina kà, apəsew dza anik uwana apad sləb uwaga aw. Ŋgaha dza uwana apad sləb aw kà, adziyukw à masla mapad sləb babay aw, kà uwana Zəzagəla kà akəs masla maman tatak uwaga gesina. ⁴ Kak ma, kak uwa, kagof kà madziyukw à magamza aña dza anik, uwana adāh sləray mawisiga uwa? Say mənŋa aña la uwana apəhaalla, à baña adāhan kà delga aw ma mana anjak la abà ma? Adətəf à ahəŋ aw kà uwana mənŋa aña uwana la afik, adānəŋla kà masla aña matəfay à tetəvi aña la tsəh ala aw. ⁵ Azladza anik tadzugway kà mavakay anik aduwa azlaanik la huma yewdi anjatā, ama la yewdi aña azladza anik mavakay gesina kà kalkal. Say dza asəl uwana adzugway la ləv aña la tsəh la paraka. ⁶ Dza uwana adzugway kà, mavakay anik aduwa azlaanik adzugw kiya uwanay kà, asləkawla Sufəl Yesu. Dza uwana apad sləb tasləkaw, kiky agodiya à Zəzagəla lakəl aña uwana azuway. Dza uwana apad sləb bay adāhan kiya uwaga kà masləkaw Sufəl babay, ŋgaha kiky agof à Zəzagəla lakəl aña uwana azuway babay. ⁷ Kità kà dza la ahəŋ, adza à ahəŋ kà aslasl gəl aña aw ŋgaha dza la ahəŋ amətsay kà aña aslasl gəl aña babay aw. ⁸ Kà uwana baña anu la sifa kà, anu la sifa kà aña mədfah sləray aña Sufəl, uwana anjal anu, ŋgaha baña məmətsay kà, məmətsay mamətsay gesina kà, kà anu azlaaŋa Sufəl Yesu Kristu. ⁹ Kà uwana Sufəl Yesu Kristu aməts, ŋgaha awul à uda la mamətsay, kà masla aña magay Sufəl aña azlamazimnekiđ la azladza uwana la sifa bay. ¹⁰ Tsa aña kiya uwanay ma, kak ma kak uwa, à uwana kapəsew deda magay anjak uwa? Ŋgaha ma kak ma kak uwa? Məsəl gesina gami kà, mədāda à huma seriya aña Zəzagəla. ¹¹ Uwaga kà bokuba uwana tatsetsər à wakitā Zəzagəla à abà. Sufəl Zəzagəla agof:

'Gəgof la dziriga: Kəla dza adəkədəf à ahəŋ la huma gulo.

Ŋgaha kəla uwabeyuwi adəpəhay la paraka kà: Kak Zəzagəla la uwana la maslay gesina,'^{*}

tadagofay. ¹² Uwabeyuwi adātuwuw uwana adāhəhəŋ la huma Zəzagəla, la paŋaw aña la paraka.

Mədfaha hanjəli kà azladedə gami maruw vok à ahəŋ gə

¹³ Tsa baña kiya uwanay kà, məsak à madziyukw à vok à dagay. Dahəw hanjəli kà akul aña madāh uwana atsala matekwid à deda ankul, ŋgaha kà madukw masla à tsakana à abà aw. ¹⁴ Gi dza aña Sufəl Yesu, ndzer kà, tatak gesina kà masləhay gə la ahəŋ aw, ama baña dza anik adzugway kà, tatak anik masləhay gə la ahəŋ, kità uwaga kà, afa à gay aw, kà uwana kà aña kà, asləh haday. ¹⁵ Baña katafad ləv à deda anjak la tatak may, uwana kazuway kà, kiya kawoyan aw. Kà uwana Yesu Kristu kà aməts

^{*} 13:9 13.9 2Musa 20.13-15,17; 3Musa 19.18; 5Musa 5.17-19.21 ^{*} 14:11 14.11 Yesayya 45.23

kà anja babay. Sòl kà, uwana kazuway kà, atafadalla løv la tetøvi anja Zøzagøla la tsøh aw. ¹⁶ Ama kà anjak kà, tatak gesina kà masløhay gà la ahøj la huma anjak aw, ama banja kasøl kà azladza tadapøh mawisiga lakøl anja kà sàkal, ngaha kà atà anja matugw mawisiga aw. ¹⁷ Makoray Zøzagøla kà gay anja mazuway la masay aw. Ama uwaga kà gay anja dziriga ngaha la marabay, uwana Masasøfok Zøzagøla avøy la lapiya, awkà gay anja tatak uwaga la abà aw. ¹⁸ Dza uwana adfah sløray anja Yesu Kristu kiya uwanay kà, Zøzagøla adawoyøn, ngaha azladza tadàsløkaway babay. ¹⁹ Tsa banja kiya uwanay kà, møwæf vok à uda kà madfah uwana azlaka à azladza kà madz à ahøj la lapiya, la maham à gay à vok gami la abà, ngaha uwana adazigøn azladza anik la tetøvi anja Zøzagøla la tsøh. ²⁰ Kawisà sløray anja Zøzagøla ala la tatak uwana kà manay aw. Kay kà, tatak masløhay gà la ahøj nøma kà, ama banja azladede anjak tadàsokw à tsakana abà kà, uwaga kà delga kà manay aw. ²¹ Ama uwana delga kà, kadaha tatak uwana adàdukw deda anjak à ahøj, adàgay mapæf sløb uwaga bamøraka adàgay mas guzu, adàgay bà mana beyimi uwana adukw deda anjak à ahøj kà, kafa gay aw. ²² Uwana kasøl lakøl anja uwaga kà, fà uwaga à tsøh kuvøl anjak, uwaga kà la tataka ankul la Zøzagøla pøra. Marabay agay la dza uwana adfahan tatak la kokufda maføk gøl à ahøj søla. ²³ Ama dza, uwana aføk gøl à ahøj søla, lakøl anja tatak may, azuway la maføk gøl à ahøj, sèl à kà seriya adækøsay, kà uwana bà la maføk gøl à ahøj søla anja kà, asakal à tsøh ala kà mazuway aw. Kà uwana køla tatak uwana møfehøj la maføk gøl à ahøj søla la huma Zøzagøla kà tsakana.

15

Madfah uwana azlak azlamagabøf gù

¹ Anu uwana mødahønay la tetøvi anja Zøzagøla la tsøh kà, møzlaka azlauwana tahønay dadån aw, møfahan kà uwana akøsa à anu à gøl pøra aw. ² Say møfahan kà uwana akøsa vok kà anja azladede gami, møzlak atà kà atà anja mazigønay la tetøvi anja Zøzagøla la tsøh. ³ Yesu Kristu la gøl anja bay kà, ayah tetøvi kà madfah uwana asà à gøl anja aw. Ahønà gay uwana ala, tatsetsèr à wakità Zøzagøla à abà: 'Magøfahay anja azlamønə matsøk à ka magøfahay à gøl kà, awul à gøl gulo,'^{*} agøf. ⁴ Tekedfik, køla tatak uwana tatsetsèr à wakità Zøzagøla à abà kà, tatsetsèr uwaga kà matapanula dziriga, kà anu anja makøf yewdi à uwana à abà, Zøzagøla apøh à ahøj kà mæfehøj kà uwana la wakità Zøzagøla la abà adzørføh anu ala, ngaha kà anu anja matsizlla à ahøj lela. ⁵ Zøzagøla adzørføh anu ala kà uwana apakånula kà anu magay mazlamønə mabasinj, ngaha anu anja magay la pañaw tekula, bokuba uwana Yesu Kristu adfahan bay, ⁶ kà akul gesina anja mazløb Baba anja Suføl gami Yesu Kristu la pañaw tekula.

Køsaw vok kà akul à akul

⁷ Kità kà, køsaw vok kà akul à akul bokuba uwana Yesu Kristu akès akul. Dahàwwån kiya uwaga, kà azladza anja mazløb Zøzagøla. ⁸ Gi, gøpøh à akul la paraka, Yesu Kristu apakà magamza anja azla Yahudiya, kà masla anja mapøhatàla kà Zøzagøla kà adfah fida aw. Asàl mahøn uwana ala Zøzagøla apøh à azlababa anjatà à ahøj. ⁹ Asà à waj babay, kà azlauwana azla Yahudiya aw anja mazløb, kà azlatatak dzøba anja søla aw gà uwana adfahan. Uwaga kà bokuba uwana tatsetsèr à wakità Zøzagøla à abà lakøl anja: 'Kà gay uwanay gødàzløb kà la tataka azladza la abà, gødàzløb kà la azlamahabay.'^{*}

¹⁰ Gay Zøzagøla agøf aya kà:

'Akul uwana akul azla Yahudiya aw, rabàw la slaka gà, la azlatsøhay anja Zøzagøla uwana akès atà dagay uwarà.'

¹¹ La slaka anik la abà aya tagøf:

'Akul uwana akul azla Yahudiya aw, zløbàw Suføl Zøzagøla. Dza atøm à uda aw, zløbàw masla gesina.'^{*}

¹² Yesayya, masla mapøhal gay ahàl anja Zøzagøla agøf babay:

'Dza anik adàsa à uda la tsøhay anja Yese la abà, adàsa à waj kà makor azladza uwana azla Yahudiya aw, tadafay manøwøj anjatà à masla à afik kà maføl atà.'^{*}

¹³ Zøzagøla uwana av manøwøj, ahønàkulla la marabay, ngaha akul anja maføl lapiya la løv la tsøh, kà uwana kadiñaw gøl à masla à vok kà, manøwøj ankul lakøl anja adahøn ala pawasla, la ndzøfda anja Masasøfok tsikasla.

Pol apøh gay lakøl anja sløray anja uwana adfahan

^{*} 15:3 15.3 Mahabay 69.9 ^{*} 15:9 15.9 2 Samuyel 22.50; Mahabay 18.49 ^{*} 15:11 15.11 5Musa 32.43; Mahabay 117.1 ^{*} 15:12 15.12 Yesayya 11.10

¹⁴ Azladede gulo, gi la aslasl gəl gulo kà, gəsəl kà kadahàwwàn kà la tetəvi aṅha, kasəlaw dziriga gesina, ṅgaha kasəlaw tetəvi aṅa mawalla kà vok haṅkəli à gəl. ¹⁵ Ama bə la uwaga, la azlaslaka anik la wakità uwanay la abà, gətsetsər à atà kà, la maz kuda à zagəla lakəl aṅa azlatatak anik anik, kà aṅa mavika akul aw. Gətsetser bokuba uwanay, kà dzəba aṅha səla aw uwana Zəzagəla adəhagəṅ. ¹⁶ Bokuba magodəy kà, afà gi à ahəṅ kà magamza aṅa Yesu Kristu la tataka azladza uwana azla Yahudiya aw. Gəvə vok gulo à Zəzagəla tetuwa, kà maz gay marabəṅ, gay gə à uwana atsà à waṅ la slaka aṅha. Gəziṅ kà à azlauwana azla Yahudiya aw, kà atà aṅa madiṅ gəl à masla à vok, ṅgaha kà uwana Masasəfok tsikasla afà à fəta à awtəy kà aṅha. ¹⁷ Kà sləray aṅa Zəzagəla uwana gəfəhəṅ kà, gədfəd gay ləv, kà uwana gi la ahəl aṅa Yesu Kristu. ¹⁸ Kà uwana gəpəhay lakəl aṅa tatak anik aw, say uwana Yesu afà à gi à ahəl. Masla avà à gi ndzəfə, kà madla azladza uwana azla Yahudiya aw à huma Zəzagəla, kà atà aṅa makəs masla. Adəhəṅ kiya uwanay kà, kà azlagay uwana gəpəh, ṅgaha azlatatak uwana gəfəhəṅ. ¹⁹ Adəhə azlanadzipo tsəhay anik la ndzəfə aṅa Masasəfok tsikasla babay. Kiya uwaga gəsləhà gay marabəṅ à azladza ala gesina lakəl aṅa Yesu Kristu, adzəkà à vok dagay la Urusalima tsərəh à gudəṅ Iliriya. ²⁰ Ama gi kà gəhika kaykay maz gay marabəṅ kà la slaka uwana azladza tatsən gay lakəl aṅa Yesu Kristu dadəṅ aw, kà uwana asa à gi maziṅ la slaka uwana azladza tatsənəṅ aw kà gi asa à gi maβəf sləray aṅa dza anik à gay dzəgov aw. ²¹ Gi kà, gədfəhəṅ bokuba uwana tatsətsər à wakità Zəzagəla à abà: 'Azlauwana tapəh à atà tatak lakəl aṅha aw kà, atà kà tadənəṅəṅ. Azlauwana tatsən tatak lakəl aṅha aw bay tadatsən gay marabəṅ,' Zəzagəla agəf.

Pol adzugw mad à Rom

²² Asik dəṅ gədaβərzl ala kà manəṅ akul à gay, ama gəbəzà tetəvi aw. ²³ Mavay dəṅ à uwana gədayah tetəvi la iyaw tugwi kà manəṅ akul à gay, ama sləray akəs à gi à ahəṅ. Lagwa kà, sləray gulo la kutso uwanay la abà kà, adakəf gəl à ahəṅ. ²⁴ Gədzugw mad à awtəy à slaka aṅkul, gədadza à ahəṅ ṅuv la slaka aṅkul kà manəṅ vok. La lig la ahəṅ kà pəra, gədəda à Espaniya. Asa à gi kà kadəzlakaw gi la mauguzahay gulo uwaga la abà gədadəfəhəṅ. ²⁵ Ama lagonay kà, gəwul à Urusalima dadəṅ, kà madla tatak mazlakay à azladza aṅa Zəzagəla la abatà. ²⁶ Kà uwana azlaməna gay Zəzagəla uwana la abanay la Makeduniya, la azlauwana la Akayya tarəb kà maham gay à sili à vok kà masləl à azlaməna kudə la tataka maham à ahəṅ məna gay Zəzagəla la Urusalima. ²⁷ Uwaga kà, atà tadzugw la gəl aṅatà, ama uwaga kà azlayla kà vok aṅa madəfəhəṅ kiya uwaga. Haday, kà uwana azla Yahudiya tazlak azladza uwana azla Yahudiya aw, kà atà aṅa maβəz mapis gay à vok aṅa Zəzagəla məṅga. Kità kà delga, kà azladza uwana azla Yahudiya aw, tazlaka atà la azlatatak uwana taβəzəl la gudəṅ la vok babay suwaṅ. ²⁸ Baṅa gədadəv uwaga à gay, gədadəbək atà tatak uwana taβək gi à ahəl gesina, gədawul à lig, kà mad à Espaniya, ama gədagəway kà la gudəṅ aṅkul, la Rom dadəṅ. ²⁹ Gəsəl kà aṅa gədadəzlaṅal à slaka aṅkul kà, Yesu Kristu adəpis anu gay à vok məṅga, la maham gay à vok gami la abà.

³⁰ Azladede, kamkam, gəgodf à akul la sləm aṅa Yesu Kristu, kà uwana Masasəfok tsikasla apakà anu ala kà məna mawoy vok kà anu à anu. Kamkam zlakəw gi la madəv kudə à Zəzagəla, dəvəwwal kudə kà aṅulo la ləv tekula, ³¹ kà azlaməna kutso Yahudiya uwana tsəl Yesu Kristu aw, kà gi aṅa mad à ahəl aṅatà aw. Dəvəw kudə à Zəzagəla babay, kà tatak uwana la ahəl gulo aṅa makəs à vok à azladza la abatà la Urusalima. ³² Kità kà, baṅa asa à Zəzagəla kà, gədəsa à waṅ à slaka aṅkul kà la hazlakhazlak. ṅgaha mədəhama gay à vok la marabay məṅga la abà. ³³ Zəzagəla masla aṅa mavəhə lapiya afà à akul sləm. Amen!

16

'Ayyi' aṅa Pol uwana adəhəṅ à azladza anik

¹ Iyay, gəpəh à akul lakəl aṅa deda gami misga, Febe, uwana adəhə sləray la tataka maham à ahəṅ məna gay Zəzagəla la abà la Kenkeriya. ² Kamkam, mok uwana adəbəza à slaka aṅkul kà, dəkəsəw masla la ahəl səla la sləm Sufəl gami Yesu, bokuba uwana azlayla azlaməna gay Zəzagəla tadəhəhəṅ. Zlakəw masla la azlatatak uwana anəkudə aṅha gesina, kà uwana masla kà, azlakà à azladza aṅuvaw baməraka gi babay.

³ 'Ayyi' gəgodf à Pərəskila atà la zil aṅha Akilas. Atà uwana mədəhə sləray aṅa Sufəl gami Yesu Kristu la slaka gə. ⁴ Mok uwana uwarə azladza tatəwəbà gi kà, tasà à waṅ kà aṅa matəf gi, tafà à gəl aṅatà aw, 'Kikay' gəgodf à atà məṅga, gi pəra à uwana 'Kikay' gəgodf à atà aw, azlaməna madiṅal gəl à vok, uwana azla Yahudiya aw gesina babay kà: 'Kikay', tagodf à atà. ⁵ 'Ayyi' gəgodf à azlaməna gay Zəzagəla uwana tahaməh gay à vok

kà madəv kuɕa la mtəga aɲatà aya. 'Ayyi' gəgod à slawda gulo Epaynet, uwana atsəv vok à madiɲal gəl à Yesu à vok à abà la kutso Asəya. ⁶ 'Ayyi' gəgod à Mariyama, uwana adəhà sləray mənɲa kà aɲkul. ⁷ 'Ayyi' gəgod babay à Andəronikus atà la Yuniyas uwana la tsəhay gulo. Mədzà à ahəɲ la daɲay anina. Atà uwana azlazəbɛzəb gə la tataka aɲa azlaməna matapla la abà. Atà la uwana tatsəv vok à madiɲal gəl à Yesu à vok kà gi.

⁸ 'Ayyi' gəgod à slawda gulo Ampəliyatus uwana anu tekuła la ahəl aɲa Sufəl. ⁹ 'Ayyi' gəgod à Urban, slagama gami la sləray aɲa Yesu Kristu la abà atà la Sətakəs slawda gulo. ¹⁰ 'Ayyi' gəgod à Apel, uwana asà nɲəpə kà sləm aɲa Yesu Kristu, nɲaha agəd à afik ndzer, nɲaha 'Ayyi' gəgod à huɕ gəy aɲa Arisətobul. ¹¹ 'Ayyi' gəgod à tsəhay gulo Herodiyon, 'Ayyi' gəgod à azlaməna gay Zəzagəla la huɕ gəy aɲa Nartsəs. ¹² 'Ayyi' gəgod à Tərifən atà la Tərifos, azladedə gami misga uwana tadəh sləray aɲa Sufəl Yesu. 'Ayyi' gəgod aya babay à Persəda, deda gami misga uwana adəh sləray la ndzəɕa kà aɲa Sufəl. ¹³ 'Ayyi' gəgod à Rufus, dza dziriga gə, uwana la tetəvi aɲa Sufəl la tsəh. 'Ayyi' gəgod à iyà aɲha uwana afà à gi sləm bokuba gi bəzi manədəl aɲiz à gəl aɲha bay. ¹⁴ 'Ayyi' gəgod à Asənkərit, à Felegon, à Herməs, à Patərobas, à Hermas, la azlaməna madiɲal gəl à vok anik gesina, uwana atà nna la abà gə. ¹⁵ 'Ayyi' gəgod babay à Filolog atà la Yuliya, Nere misga atà la deda aɲha duguga. 'Ayyi' gəgod à Olimpas la azlaməna gay Zəzagəla anik gesina uwana atà nna la abà gə bay.

¹⁶ Dahəhəw vok 'Ayyi' kà akul à akul. Maham à ahəɲ dza gesina uwana tadiɲ gəl à Yesu Kristu à vok, 'Ayyi', tagod à akul.

Hələw à ahəɲ kà azlaməna gay Zəzagəla fida gə

¹⁷ Azladedə, 'Kamkam' gəgod à akul, dəhəw haɲkəli kà azladza uwana tatsəd gay à gay uwana à tsəh tatəpakulla. Kà atà tatsəlla kà mavəhla à waɲ, nɲaha tanis akul à ahəɲ la tetəvi la tsəh, atà kà kagagamawla vok ahəl akul nna aw. ¹⁸ Kà uwana tsəhay dza uwaga kà, tadəh sləray aɲa Sufəl gami Yesu Kristu aw, tatuway kà vok aɲatà pəra. Tapapat azladza la azlagay namnamga, uwana atsa à waɲ la paɲaw aɲatà la awtəy. Kità à uwana tavavar azladza uwana kokuɕa masəl godega aɲa gay uwaga. ¹⁹ Kà aɲkul kà, dza gesina tasəlay kà, kakəsəw gay aɲa Sufəl gami. Gi la marabay mənɲa kà akul, nɲaha asa à gi babay kà kagaw azlamahanay gə, kà madəh uwana delga kà akul aɲa mahoy à mawisiga à ahəl. ²⁰ Zəzagəla masla mavəh lapiya à azladza, adədzam gəl à seteni ala la tsəh à asik aɲkul la huma la gay.

Sufəl gami Yesu Kristu apis akul à gay à vok.

²¹ Bə gotənaɲ kà 'Ayyi' Timotawus, uwana mədəh sləray anu səla, agod à akul. Azlatəhay gulo Lutəyus la Yason la Sosəpatər kà 'Ayyi', tagod à akul babay.

²² 'Ayyi' gəgod à akul, à gi Tertəyus uwana gətsetser gay aɲa Pol uwanay à wakitə uwanay à abà, 'Ayyi' gəgod à akul babay, la sləm aɲa Sufəl gami.

²³ 'Ayyi' Gayyus agod à akul babay. Gi la azlaməna gay Zəzagəla gesina madz à ahəɲ kà la mtəga aɲha la abanay. Erastus, masla makəs sahar aɲa huɕ gudəɲ uwanay, atà la deda gami Kwartus tadəha à akul 'Ayyi'.

((²⁴ Sufəl gami Yesu Kristu apis à akul gay à vok lela! Amen.))

Pol azləb Zəzagəla

²⁵ Məzləbà Zəzagəla uwana avà à akul ndzəɕa kà madz à ahəɲ lela la tetəvi aɲha la tsəh. Bokuba uwana apəh à azladza la mok uwana gozà à atà gay marabəɲ lakəl aɲa Yesu Kristu. Gay mahad vok à ahəɲ gə aɲa Zəzagəla bay kà, apəhay à anu kà kalkal la uwaga. Kà uwana tatak uwaga kà, Zəzagəla afətəla à azladza la adi ala dagay uwarà aw. ²⁶ Ama lagonay kà, Zəzagəla adafətəla à azladza la adi ala la dazuwaya. Apəhatəla kà la maz à atà uwana azlaməna mapəh à atà gay à ahəl tatsetser lakəl aɲa Yesu Kristu. Zəzagəla uwana adəv à gay aw kà, asal kà azladza tsəhay gesina tadiɲal gəl à masla à vok, takəs gay aɲha.

²⁷ Məzləbà Zəzagəla aɲa tsərah à awtəy. Masla kokuɕa gəl aɲha la uwana akor matsihila dziriga, məzləbà masla la sləm aɲa Sufəl gami Yesu Kristu. Amen!

MATERA AŇA WAKITÀ UWANA POL ATŞETSËR À AZLA KORINTIYA Première Lettre de Paul aux Corinthiens

Ayyi

¹ Gi Pol uwana Zəzagəla akəsàni gi, la mawoyəŋ aŋha, kà gi aŋa magay masləlay aŋa Yesu Kristu, gətsətsər wakità uwanay la ahəl gulo la slaka gə, anu la Sostenus, deda gami.

² Mətsətsəray kà akul azlaməna masla gay Zəzagəla, uwana la Korintiya, azlauwana matsətsəmani atà gə, kà atà aŋa madz à ahəŋ kà ahəl aŋa Zəzagəla Baba, ŋgaha uwana azlaaŋa la Yesu Kristu la abà, ŋgaha azlauwana tatsəl sləm aŋa Sufəl gami Yesu Kristu à gay gesina, uwana Sufəl gami babay suwaŋ. ³ Zəzagəla Baba gami, la Sufəl Yesu Kristu tapis à akul à gay à vok la mav à akul lapiya.

Tatak dzəba aŋha səla aw gə, uwana tabəzal la Korintiya

⁴ Kikay gəgəf à Zəzagəla gulo koksikoksi lakəl aŋkul, kà vok mahamay uwana avà à akul la Yesu Kristu la abà. ⁵ Ama la maham gay à vok aŋkul la abà la Yesu Kristu, kabəzəw à gəl la azlatatak delga delga gə uwana la abà, tavà à akul gesina, haday, la azlamavəy aŋa tatak, aŋa gay aŋha, ŋgaha la masləlay aŋha gesina. ⁶ Ndzər, gay lakəl aŋa Kristu uwana tazəŋ kà, adàla slilih la akul la abà. ⁷ Kà uwaga mavəy aŋa Zəzagəla gesina kabəzəwwal, akul uwana kakudaw kaslə mas à waŋ aŋa Sufəl gami Yesu Kristu. ⁸ Masla kà aga la ahəŋ azlaka akul, kà akul magay matsizl à ahəŋ gə tsərəh à mavakay uwatà, kà dza aŋa məbəz tetəvi aŋa masləh akul à vok, la vuf seriya aŋha aw. ⁹ Zəzagəla la gəl aŋha, la uwana azalà akul, kà akul magay tekula la Kona aŋha la abà, Yesu Kristu, Sufəl gami. Zəzagəla la uwana dziriga.

Mavəhla la tataka azlaməna madiŋal gəl à vok

¹⁰ Azladedə gulo, gədəv à akul kudə la sləm aŋa Sufəl gami Yesu Kristu: Dzəw à ahəŋ la matsən vok gay la abà, mavəhla apaka vok la tataka aŋkul la abà aw, gəw la maham gay à vok la abà, la madzugway tekula la abà ŋgaha la paŋaw tekula. ¹¹ Azladedə gulo, gəpəh à akul kiya uwanay kà, kà uwana azlaməna huđ gay aŋa Kəlowe, misga, tasà à waŋ kà məpəh à gi kà magazlay la ahəŋ la tataka aŋkul la abà, tagəf à gi. ¹² Uwana gəpəh à akul uwanay kà, kà uwana kəla uwabəyuwi aŋkul kà, apəhay kà paŋaw gərgər. Anik agəf: ‘Gi aŋa Pol’, anik: ‘Gi aŋa Apolos’, anik aya: ‘Gi aŋa Piyer’, ŋgaha anik aya: ‘Gi aŋa Kristu’. ¹³ ŋgaha ma, kadzugwaw ma, vok aŋa Kristu ma aslaha vok ala gərgər dəŋ, kagədaw takay? Awma Pol la uwana aməts à ahəf à adi kà aŋkul takay? Awma tadahəkulla batem la sləm aŋa Pol kəla ay? ¹⁴ Kay, kikay gəgəfay à Zəzagəla, kà uwana gəfahà batem à dza aw, say Kirəspus atà la Gayyus pəra. ¹⁵ ŋgaha à dza agədiŋ à afik kà adahà batem la sləm gulo aw. ¹⁶ Iyay, haday təga, avikà gi, gəfahà batem à huđ gay aŋa Estefanas təga, ama gəfahəŋ à dza anik aya, gəl agəf à gi aw. ¹⁷ Ama gi kà, Zəzagəla asləl gi à waŋ kà madəh batem aw, asləl gi à waŋ kà maz gay marabəŋ, ŋgaha gəzəŋ kà la kokudə haŋkəli aŋa sləb vok, ŋgaha gi aŋa məpəsev mamətsay aŋa Kristu la ahəf à adi aw.

Ndzəfə aŋa Zəzagəla la matsihila aŋha

¹⁸ Gay lakəl aŋa maməts à ahəf à adi aŋa Kristu apakà bokuba tatak deyday la huma yewdi aŋa azladza, uwana takəs tetəvi aŋa gay akəl. Ama kà aŋami uwana Zəzagəla aḃəl anu kà, məsəl kà gay uwaga kà la ndzəfə aŋa Zəzagəla. ¹⁹ Bokuba uwana tatsətsər à wakità Zəzagəla à abà, agəf kà: “Gədakaləh haŋkəli aŋa azlaməna məsəl tatak à ahəŋ, gədawits məsəlay aŋa azlaməna matsihila ala.”^{*} ²⁰ Tsa kiya uwaga ma, mana azlaməna haŋkəli tapəhay aya zlə ma? Baŋaw azladza mawur gəl gə, la azlaməna mats gay la gudəŋ uwanay la vok ma? Zəzagəla apəhla ala kà, məsəlay aŋa gudəŋ à vok uwanay kà magay kusoŋu.^{*} ²¹ Azladza gudəŋ à vok la haŋkəli, tanəŋa tatak uwana Zəzagəla adəhəŋ la matsihila aŋha, ama təsəl masla aw. Gay gə la uwaga à uwana, Zəzagəla adəhla sləray la azlagay uwana məpəhay, kà uwana atə tagəf kà: “Uwanay kà azlatatak kusoŋu gə pəra.” Zəzagəla akəs kà uwaga kà, məbəl azlauwana tadiŋ gəl à masla à vok. ²² Azla Yahudiya kà, asa à atə manəŋ azlanadzipo, ŋgaha kà atə aŋa məsəlay kà sayda gami kà dziriga. Azla Gərək kà, tayəh kà atə məsəl Zəzagəla la aslasl

^{*} 1:19 1.19 Yesayya 29.14 ^{*} 1:20 1.20 Job 12.17; Yesayya 19.12; 33.18; 44.25

gəl anjatà. ²³ Kà anjami kà, mөziñ kà lakəl anja Yesu Kristu uwana tazləl à ahàf à adi. Banja azla Yahudiya tatsən uwaga kà, azin à atà à gəl, ñgaha azladza anik kà tagof: "Kà gay kusonju!" ²⁴ Ama azladza uwana Zəzagəla atsatsəmàni atà, kà atà anja magay azlaanħa kà, amiyaka tadagay azla Yahudiya, amiyaka tadagay azlatsəhay azla Yahudiya aw bay, kà anjatà kà, gay uwanay kà gay deyday aw, kà uwana tasəl kà Yesu Kristu kà apəhla ndzəfa anja Zəzagəla la matsihila anħa ala babay. ²⁵ Azlaanik tagof kà, uwana Zəzagəla adahàn kà kusonju, ama tasəl kà kusonju uwaga aduwa hanĵkəli anja dza la kaykay aw. Tadzugw kà guĵguĵ uwaga aduwa ndzəfa anjatà la kaykay gesina aw.

²⁶ Azladedə, nərəzəw gəl anĵkul, akul uwana Zəzagəla azalà akul tsi. La yewdi anja azladza kà akul mənə makor hanĵkəli, la maslay, la masləkaway la ahən mənĵa aw. ²⁷ Ama Zəzagəla atsatsəmàni azlauwana azladza tazalà à atà ala azlakusonju, kà atà anja makəl ziruwı à azlamatsihila gə à gəl. Atsatsəmàni azlaguĵguĵga, kà makəl ziruwı à azlandzəfa-ndzəfaga anja gudən à vok uwanay à gəl. ²⁸ Atsatsəmàni aya azlauwana, azladza gudən à vok tanəñ atà bokuba azlatatak mapəsew atə gə, kà atə makəl ziruwı à azlamənĵa à gəl. ²⁹ Kiya uwaga kà dza la ahən: 'Gi', agofay la huma Zəzagəla kà mats zlapay aw. ³⁰ Ama akul kà, Zəzagəla azalà akul, kà maham gay à vok la Yesu Kristu la abà. Kà uwana Kristu la uwana aga matsihila gami, uwana asà à ahən la zagəla la afik, mədapaka azladza anja Zəzagəla, sà sətaka adagay, mədapəlla la ndzəfa anja mamətsay la abà babay. ³¹ Asa à Zəzagəla kà uwaga apakə vok bokuba uwana tatsətsər à wakitə anħa à abà:

'Banja dza asal mats zlapay kà, atsa zlapay kà, kà azlatatak uwana Zəzagəla adahàn.'*

2

Gay uwana Pol azəñ la Korintiya

¹ Azladedə gulo, uwarə uwana gədà à awtəy kà maz à akul ala gay mahəfəñ à ahən gə, uwana Sufəl Zəzagəla afətə à anu à ama ala, gəpəh uwaga la azlagay namnamga aw, ñgaha babay gəpəh la hanĵkəli anja dza aw. ² La kaslə uwana gədà à mtəgə anĵkul kà, gəgəfəñ à afik kà gi anja mapəhay kà lakəl anja Yesu Kristu pəra, gədapəhay lakəl anja azlatatak anik aw, ama gəpəh kà lakəl anja mamətsay, uwana aməts à ahàf à adi pəra. ³ Mok uwana gəgə la Korintiya, gəgə guĵguĵ, guba akəs gi, gəsukuləh. ⁴ Mapəh gay Zəzagəla gulo la sayda gulo uwana gəzəñ kà, agə kà la maslay anja azladza anja gudən à vok aw. Ama la mapəhla ala anja Masasəfok Zəzagəla, ñgaha la maslay anħa, ⁵ kà madinjal gəl à vok anĵkul anja matsizl à masəlay anja azladza à afik aw, say à maslay anja Zəzagəla à afik pəra.

Matsihila anja Zəzagəla

⁶ Anja azladza uwana tasafay la tetəvi anja Zəzagəla la tsəh, gətəpakulla matsihila dziriga à uwana hanĵkəli anja gudən à vok uwanay aw, ñgaha hanĵkəli anja azlamənə makoray la gudən à vok uwanay, uwana tadəməts à gay aw. ⁷ Matsihila uwana gəpəhay kà, matsihila anja Zəzagəla. Uwaga kà tatak mahad vok à ahən gə, uwana Zəzagəla atsatsəmàni dagay uwarə, à mok uwana gudən à vok uwaga la ahən dən aw, kà anu anja mad à slaka mazləbəy anħa à abà. ⁸ Ağa la ahən, amiyaka tekula, la tataka anja azlamənə makor gudən à vok uwanay la abà, asəl uwaga tetuwa aw. Agay tasəlay kà, anaka tazləl Sufəl gami, uwana la mazləbəy, à ahàf à adi kà makəfəy aw. ⁹ Ama bokuba uwana tatsətsər à wakitə Zəzagəla à abà, la uwana adahàn:

'Uwana dza adanəñ adatsəñ didi aw, tatak uwana adada à arel anja dza à abà dadən aw, la uwana Zəzagəla adahən à ahən, kà anja azlauwana tawoya masla.'

¹⁰ Haday, anu la uwana Zəzagəla apəhanula nasiri uwaga la Masasəfok tsikasla anħa. Ndzer Masasəfok aslala vok anja masəl madzugway anja Zəzagəla uwana la gəl anħa la afik. ¹¹ Ama dza asəl uwana dza anik adzugway aw, say masasəfok anja dza uwatə pəra asəl. Kiya uwaga babay, dza la ahən asəl madzugway anja Zəzagəla aw, say Masasəfok Zəzagəla kokuĵa gəl anħa pəra asəl. ¹² Anu la Masasəfok, uwana gudən à vok avà à anu aw, asà à ahən kà la slaka Zəzagəla. Zəzagəla la uwana asləl à anu uwaga à ahən la gəl anħa, kà anu anja masəl dəwdəw tatak uwana avà à anu gesina. ¹³ Gi kà, gəpəh gay uwana azladza tapəhgəla aw. Ama gəpəh à akul, kà uwana Masasəfok Zəzagəla apəh à gi. Ngaha gətəpla à azlauwana tatsəb sləm à Masasəfok uwaga.

¹⁴ Dza uwana la Masasəfok Zəzagəla aw kà, aslala vok anja məbəz dziriga anja Masasəfok uwaga aw. Kà anħa kà, uwaga apakə kà bokuba azlatatak kusonju gə, masla aslala vok anja matsən godega anjatà aw, say la mazlakay anja Masasəfok la uwana atsenəñ. ¹⁵ Dza uwana la Masasəfok Zəzagəla, aslala vok anja mavəh tatak gesina ala,

* 1:31 1.31 Yeremiya 9.24

ama dza aslala vok aña madfahalla seriya à gəl aw. ¹⁶ Bokuba uwana tatsetsèr à wakità Zəzagəla à abà:

'Uwa à uwana asəl madzugway aña Sufəl Zəzagəla uwa? Uwa à uwana aslala vok aña mawulla ala matsihila uwa? Ama anu, anu la madzugway aña Kristu.*

3

Mavàhla kà delga aw

¹ la dziriga azladedə gulo, mok uwana gi la Korintiya, gəsləla vok aña mapəh à akul bokuba uwana gəpəhay à azladza, uwana la Masasədok Zəzagəla aw. Gəpəh à akul kà bokuba uwana gəpəh à azladza gudəñ à vok, bokuba azlabəza uwana la madinəl gəl à vok la abà. ² Kà uwaga à uwana, gəvəhà à akul kà awà, awkà tatak may dzañdzañga aw, kà uwana la mok uwaga kà kaslāw dadəñ aw. Bə lagonay babay kà, kaslaw aw. ³ Kà uwana tsərəh à lakana kà, kanəfaw kà madfehəñ aña gudəñ à vok. Kadəhaw vok mañor à vok, kagazlahaw, tsa baña kiya uwaga ma, kanəfaw kà madfehəñ aña gudəñ à vok kiya aña azladza anik aw takay? ⁴ Baña dza agod: 'Gi aña Pol', dza anik aya: 'Gi aña Apolos', uwaga kà manəf madfehəñ aña azladza aw takay?

⁵ Uwa Apolos uwa? Nğaha ma, gi Pol ma gi uwa? Anu səla nna, kà anu azlaməna sləray aña Zəzagəla pəra, uwana Zəzagəla asləl à akul atà à wañ, kà akul aña madinə gəl à Kristu à vok. Anu kà mədəh sləray uwana: 'Dahəwwan', Zəzagəla agod à anu.

⁶ Gi gəsləkà, Apolos atədəl iyaw, ama Zəzagəla la uwana azigən uwaga. ⁷ Haday, dza uwana asləkay, la dza uwana atədəl iyaw kà, atà tasla tatak aw, Zəzagəla la uwana asla tatak, kà uwana masla la uwana azigən uwaga. ⁸ Dza uwana asləka, la dza uwana atədəl iyaw kà, atà kà kalkal. Zəzagəla adavà à kəla uwabeyuwi aña masik aña sləray, la madfehəñ aña uwana adəhəñ, ⁹ anu kà anu tekula la sləray aña Zəzagəla la abà, ama akul kà, akul kà bokuba guf uwana Zəzagəla apəsay.

Nğaha aya kà, akul bokuba gəy, uwana Zəzagəla aña lay. ¹⁰ La maslay uwana Zəzagəla avà à gi, gədzəkà la sləray la slaka aña kul. Gəgə bokuba dza uwana aña lay, uwana asəl maf matatukway à ahəñ lela. Gətətəkwəñ lela, lagonay azladza anik aña lay gəy uwaga. Delga kà azlauwana tañalay, tadəh hanjəli kà atà aña mañal gəy lela. ¹¹ Zəzagəla afə Kristu à ahəñ kà bokuba masla la uwana matatukway. Dza aslala vok aña madfəh matatəkw gəy anik aya aw. ¹² La matatukway uwatà la gay, azladza tadzəkà mañaləhal à gəy, azladza anik la luwəluwə, azlaanik la gursu, azlaanik la azlaakur uwana sləm aña atà la ahəñ kà mañaləhla à matatukway uwaga à gay. Azlaanik tadfehəñ la azlaahəf, azlaanik la kəsaf, nğaha azlaanik la veviz. ¹³ Ama kəla sləray aña uwabeyuwi adəpəhla vok ala la huma seriya, kà uwana la mavakay uwatà la uwana, Zəzagəla adəgur sləray aña uwabeyuwi la akəl, nğaha anu la gəl gami mədənəñ sləray gami à baña delga. ¹⁴ Baña dza aña la matatukway uwana à gay, nğaha atəf akəl la gay ala kà, dza uwatà adəbəza masik aña. ¹⁵ Ama baña dza uwana akəl apəd sləray aña à gay kà, dza uwatà kà, adəbəza masik aña aw, ama masla la gəl aña kà adəbəlay, ama bokuba dza uwana atəfa à akəl la gay ala la zlahha à masla.

Məñ gəy aña Zəzagəla

¹⁶ Kasəlaw kà akul kà kagaw bokuba məñ gəy Zəzagəla, à uwana Masasədok Zəzagəla adzà à ahəñ la aku aw takay? ¹⁷ Iyay zlə, baña dza akal məñ gəy Zəzagəla à ahəñ kà, Zəzagəla adəkalah dza uwaga à ahəñ suwan. Kà uwana məñ gəy Zəzagəla kà tsidəña, nğaha məñ gəy Zəzagəla kà akul.

¹⁸ Tsa kità zlə kà, dza avavara gəl aña zlə ma aw! Baña dza la tataka aña kul la abà, asal aña magay masla hanjəli aña gudəñ à vok uwanay kà, say agay bokuba dza masəl tatak aw gə dadəñ, la uwana agay masla hanjəli la tetəvi dziriga la ama. ¹⁹ Uwana gəpəh kiya uwanay kà, azlatatak uwana azladza gudəñ à vok uwanay asa à atə magay la hanjəli, uwaga kà, azlatatak deyday la yewdi aña Zəzagəla pəra. Uwaga kà bokuba uwana tatsetsèr à wakità Zəzagəla à abà, tagod kà:

'Zəzagəla adəbəza azlamatsihilaga uwaga à tsəh la demdem aña atà la abà.*

²⁰ La slaka anik babay aya kà, tatsetsèr kà:

'Zəzagəla asəl madzugway aña azladza, asəl kà deyday.*

²¹ Kà uwaga à uwana gəgod à akul kà: Dza atsa zlapay la dza anik la afik aw, kà uwana azlatatak gesina kà, akul kəkoraw. ²² Gi Pol, Apolos, Piyer, anu gesina gami kà, anu azlaanəkul. Amiyaka azlatatak lakana, la azlauwana taləg aw à wañ la huma la gay gesina kà, azlaanəkul. ²³ Akul kà, akul azlaaña Kristu, nğaha Kristu babay kà aña Zəzagəla.

4

Azlaməna masləlay anja Kristu

¹ Asa à gi kà azladza tasəlay kà anu azlaməna sayda anja Yesu Kristu, kà anu azlaməna sləray anja. Zəzagəla afà à anu nasiri dziriga anja uwana à ahəl uwarà, kà anu anja masəlla à ufaka ala. ² Akul kà, səlāw uwaga adagay, dza, uwana mən dza afal tatak à ahəl kà, masla kà say dza dziriga pəra. ³ Kà anjulo kà, baməraka kakəlaw gi gay à vok, bay kà dagədawali gəgoday aw, amiyaka bə azladza takəl gi gay à vok lakəl anja azlatatak anik anik babay kà dagədawali, gəgoday aw. Bə gi babay kà, gəfəh seriya anja gəl gulo aw. ⁴ Gəsəl tatak mawisiga gulo dadən aw. Ama uwaga asal magoday kà, gi sətaka dadən magay aw. Sufəl Zəzagəla la uwana masla madəh à gi seriya à gəl pəra. ⁵ Kà uwaga kà, kadahaw seriya à azladza à gəl dadən aw, say kakudaw mavakay uwana Zəzagəla akədəv à ahən dadən. La vud uwana Sufəl Kristu adəzlanjalay, adəsəlla à uda à ufaka ala azlatatak uwana la mələs la abà lakana. Uwana azladza tadzugway la ləv anjatà la tsəh kà, adəsəlla à uda babay. Kiya uwaga kà, Zəzagəla adəzləb kəla uwabeyuwi lakəl anja sləray anja uwana adəhən. Baŋa dza adəhən mənğa, azləb masla mənğa suwan, ama baŋa dza adəhən kay aw, mazləbay atsəhal suwan.

⁶ Azladeda gulo kà, kul la uwana gəpəh uwaga gesina, lakəl gulo, ŋgaha lakəl anja Apolos. Asa à gi kà kasəlaw la slaka gami uwana gay uwanay asal magoday. Dza atsəd à makwi uwana lakəl ala tatsetsər aw: Dza anik anjul akədəd à dza anik à ahən, ŋgaha kà mapəseyaw dza anik. ⁷ Kak uwana: 'Gəduwa azladza anik', kagod, kak uwa? Awma Zəzagəla la uwana avà à ka azlatatak uwaga gesina aw takay? Baŋa Zəzagəla la uwana avà à ka uwaga, ma kà mana katsala zlapay zlə ma? Kà mana kagod kà: Gəbəzà uwaga kà la aslasl gəl gulo zlə ma?

⁸ Kayyà, kadəbəzaw tatak gesina. Akul azlagorobu adagay la tetəvi anja Zəzagəla la tsəh, kazəwəw sufəl, bə amiyaka anu kà mədəzuw sufəl dadən aw. Naka agay delga à baŋa kul azlasufəl ndzer, la yewdi anja Zəzagəla, ŋgaha anu azlaməna maz gay anja məpakəh azlasufəl babay suwan. ⁹ Ama anu azlaməna masəlay kà, gədzugw kà Zəzagəla kà adagolla anu la lig. Anu kà mədagay kà bokuba azladza uwana seriya mamətsay adatəd à atà à gəl, la yewdi anja azladza la vadavaday la afik. Bokuba marəzlay uwana azladza gesina tanənən gesina la gudən uwanay la vok, la slaka azladza, ŋgaha la slaka azlamalika babay. ¹⁰ Azladza tadzugw kà anu azlakusonju, tagod, kà uwana məz gay lakəl anja Yesu Kristu. Ama kà kul kà, azlamatsihilaga, kà uwana kahaməw gay à vok la Kristu. Anu kà, azladza tadzugw kà anu azlagubgu, ama kul kà, kul azlandzəfa ndzəfa. Anu kà azladza tapəsew anu, ama kul kà, azladza tasləkaw kul. ¹¹ Tsərəh à lakana may la nəlay aza anu babay, lukut aga anu la vok babay aw, ŋgaha tazlabəh anu aya, ŋgaha gəy gami la ahən aw. ¹² Mədəh sləray kà anjuf dā à uda la gudah, kà mazlakla gəl gami, la mok uwana azladza tadzək à anu magodəhay à gəl kà, mədəv kudə à Zəzagəla kà mapis atà à gay à vok. La mok uwana azladza tatərəb anu babay kà, məbasin. ¹³ La mok uwana tatugw à anu gay mawisiga à vok kà, məwulatəla kà la ləv tələmma. Tapakənula lagonay kà bokuba anu azlaələh anja gudən à vok, bə tsərəh à lakana babay kà bokuba anu azlahuyiv anja gudən à vok uwanay.

¹⁴ Uwana gətsetser kiya uwanay kà, kà anja makələkulla ziruwì à gəl lakəl anja uwana kadəhəwəwən, gəgod magay aw. Uwana gətsetser à kul uwanay kà, kà gi anja masləhakulla vok pəra, kul azlabəza gay ləv gulo. ¹⁵ Amiyaka baŋa kabəzaw azlaməna matapakulla dəbow kulo, azlauwana tadala kul la tetəvi anja Kristu la ama, baba anjul kà bə tekula pəra. La mok uwana gəsa à kul ala sifa uwana kahaməw à gay à vok la Yesu Kristu la abà. ¹⁶ Kà uwaga à uwana gədəv à kul kudə: Kamkam pakəw bokuba gi. ¹⁷ Kà uwaga à uwana gəsləl Timotawus à slaka anjul babay. Masla kà bəzi gay ləv gulo, uwana ahoy yewdi anja Sufəl Zəzagəla. Masla adəwulakulla azlatatak uwana à gəl, gəpəhakulla la tetəvi anja azlaməna manəf Yesu la tsəh, la tataka azlaməna madinjal gəl à vok la abà gesina.

¹⁸ Azladza anik anik la tataka azladza anjul la abà tats zlapay, tadzugw kà, gəda à awtəy aya aw, gəl agod à atà. ¹⁹ Ama baŋa asa à Sufəl Zəzagəla kà, gəda à awtəy kà nekwa. Baŋa godàda à awtəy, asa à gi anja masəl azlaməna zlapay uwaga, ama gay anjatà pəra aw, ama maslay anja ndzəfa anjatà babay. ²⁰ Kà uwana makoray anja Zəzagəla kà anja gay pəra aw, ama la ndzəfa anja Zəzagəla. ²¹ Mana à uwana asa à kul lagwa ma? Gəda à awtəy ma la azəva la ahəl ay, awma la masal ŋgaha la ləv tələmma ay?

5

Makudək masla mabila gə à uda la maham gay à vok

la azlaməna gay Zəzagəla

¹ Kəla slaka gesina gətsəñ tapəhay gay lakəl anja mabila uwana la tataka anjul la abə, mabila uwana amiyaka azlauwana tasəl Zəzagəla aw bay kə, tadəhəñ aw. Gətsəñ anj azladza tapəhay kə dza anik la tataka anjul la abə kə, adabəf mis anja baba anja à gəl.* ² Nğaha aya kə, akul azlazlapay aya! Kayyà, njuləm naka kagaw la mazaw la gəl la abə, nğaha zil uwana adəh tsəhay gə uwaga la tataka anjul la abə kə, kəsaw à uda la tataka anjul la abə. ³ Gi kə kərker la akul la sləb vok la abə, ama la masasəfok la abə kə, gi nekwa la akul, nğaha gədadəh seriya à dza, uwana adəh tsəhay sləray mawisiga uwaga la tataka anjul la abə à gəl bokuba gi nekwa la akul. ⁴ Gədadəv seriya uwaga à gay, la sləm anja Sufəl gami Yesu. Gəgəf à akul kə, la mok uwana kadəhamaw gay à vok kə, madzugway gulo adəgəy la tataka anjul la abə, nğaha ndzəda anja Sufəl gami Yesu adəgay la tataka anjul la abə babay. ⁵ La mok uwana kahamaw gay à vok kə, vəv dza uwaga à ahəl anja seteni, kə seteni anja mawisəñ ala. Kə uwana seteni kə, aga la ndzəda kə lakəl anja sləb vok pəra. Nğaha Zəzagəla adəbəl masasəfok anja, la makəf gəl à ahəñ, anja mavakay uwana Sufəl adəwul à wanj.

⁶ Tatak la ahəñ, à uwana katsawla zlapay aw. Kasəlaw kə tatak makəsl tatak nuv, akəsl magəl pəhəw à gay aw uwə? ⁷ Zəbəw tatak makəsl tatak maviyaga à uda la tataka anjul la abə, uwaga kə tsakana, kə akul anja magay sətaka kokuə tsakana. Gəw kalkal bokuba pəhaw mawga uwana tatak makəsl nja tsəh aw, kiya uwaga à uwana kagaw, kə uwana Kristu magadzaw anja madəvaday Paska aga makəfayga kə anjami.* ⁸ Kitə kə, məhab madəvaday Paska. Ama mətə Pain la tatak makəsl nja aw, məgə kuzakaka, mənəfə tetəvi anja Zəzagəla la ləv tekula. Məsək azlatatak mawisiga, uwana taga bokuba azlatatak makəsl nja, uwaga kə tsakana, nğaha kə mabila. Ama mətə Pain la tatak makəsl nja aw, uwaga Pain anja sətaka, nğaha anja dziriga.*

⁹ La terəna anja wakitə gulo, uwana la abə gətsətsər à akul kə, gəgəf à akul kə: 'Kahamaw gay à vok aw la azladza uwana tadza à ahəñ la mabila la abə aw', gəgəf à akul. ¹⁰ Banja gəpəh kiya uwanay kə, gəpəhay kə azladza uwana tasəl Zəzagəla aw, kagəfaw aw. Awanj, ama gəpəhay kə akul uwana kasəlaw. Azladza uwana tadəh mabila, la azlaməna mawoy tatak anja azladza anik, la azlaməna madəh gəl, la azlaməna manəf mazlazlay, uwana à ahəñ la gudəñ la vok, məhəlla à ahəñ kə azlatatak uwaga gesina, njuləm mas à uda la gudəñ à vok uwanay la abə. ¹¹ Asa à gi kə magəf à akul kə: 'Kahamaw gay à vok la azlatəhay dza uwaga aw'. Banja dza agəf kə: 'Gi masla madinəl gəl à vok', ama adəh mabila, banjaw masla agay masla mawoy tatak anja azladza anik, banjaw masla manəf mazlazlay, banjaw masla agay masla matsak magəfahay à azladza anik à gəl, banjaw agay masla guzu, nğaha agay masla gəl, kadzaw à ahəñ la slaka gə la masla aw, amiyaka tatak may bay kə, kazuwaw la slaka gə aw.

¹² Gi kə gəslala vok anja madəh seriya à azlaməna à uda à gəl aw, akul kadəhaw seriya kə azlaməna huəf gay à gəl. ¹³ Kə uwana azlaməna à uda kə, Zəzagəla la uwana adəfaha à atə seriya à gəl. Kudəkəw à uda dza uwana adəh mawisiga la tataka anjul la abə, bokuba uwana wakitə Zəzagəla apəhay.*

6

Kapaw gudzi à masla madinəl gəl à vok à gəl la huma azladza à uda aw

¹ Banja dza la tataka anjul la abə tabay vok gay la dza anik, ma delga à banja apuwla gudzi à gəl kə la huma azladza uwana tasəl Zəzagəla aw takay? Akəsa à vok kə apuwla gudzi à gəl kə la huma anja azlaməna madinəl gəl à vok. ² Kasəlaw kə, azladza anja Zəzagəla la uwana tadəfah seriya à azladza gudəñ à vok uwanay à gəl aw takay? Iyay, haday zlə, banja ndzer kadəfahaw seriya à gudəñ à vok uwanay à gəl ma, kakay, kaslawwalla vok anja matəh azlabəza gay uwana ala la tataka anjul la abə aw zlə ma? ³ Kasəlaw babay kə mədəfah seriya à azlaməlika à gəl aw takay? Tsa kiya uwaga, ma baməraka azlatatak bəzaga anja gudəñ à vok uwanay zla ama uwə? ⁴ Ama akul, banja akul la magazlay lakəl anja tatak anik la tataka anjul la abə ma, kakay kaslawwalla vok anja mapəh tatak uwaga à azlaməna à uda, uwana atə la matsəñ vok à gay anina aw ma, kə atə anja madəh seriya anja tatak uwaga ma? ⁵ Ziruwı aza à akul aw takay? Aga la ahəñ la tataka anjul la abə à bə dza hanjəli gə, bə tekula anja matahəh azlabəza gay uwana alaa la tataka anjul la abə, akul azlaməna madinəl gəl à vok aw takay? ⁶ Iyay zlə, uwaga ma, akəsa vok ndzer kə mapuw gudzi à deda anjul anik à gəl, la huma anja azladza uwana tasəl Zəzagəla aw takay?

* 5:1 5.1 5Musa 22.30 * 5:7 5.7 2Musa 12.5 * 5:8 5.8 2Musa 13.7; 5Musa 16.3 * 5:13 5.13 5Musa 13.5; 17.7

⁷ Baŋa tatak mapuwla vok gudzi à gəl la ahəŋ, la tataka aŋkul la abà, uwaga la uwana adukwakula tsakana à gəl, uwana kadəhaw à waŋ. Kà mana kabasaw vok tsakana aw ma? Kà mana kasakawwal ada à akul à gəl à tsəh pəra aw ma? Njələm mabasij. ⁸ La dziriga kà, akul la uwana kanəfaw mawisiga la mad à gəl, ŋgaha kadəhaw uwaga kà la slaka azladeda aŋkul məna maŋjal gəl à vok aya bay. ⁹ Sələw la dziriga kà, azlaməna makəsafer tadàda à makoray Zəzagəla aw. Akul, kavavaraw gəl aŋkul aw. Azlaməna mabila, azlaməna manəf mazlazlay la azlaməna gəl gaw, ŋgaha la azlaməna matsatsəl vok kà atà kà atà zil zil kà, tadàda à makoray Zəzagəla tetuwa aw. ¹⁰ ŋgaha la azlaməna gəl aŋa tatak aŋa azladza anik, la azlaməna makad yewdi à azlatatak aŋa azladza anik à tsəh, la azlaməna guzu, la azlaməna matsak magodəhay à azladza anik à gəl, ŋgaha la azlaməna mazab tatak aŋa azladza anik la ndzəda, azlatsəhay dza uwaga gesina kà, tadəbək asik à abatà babay aw. ¹¹ Kiya uwaga à madz à ahəŋ aŋa azladza anik aŋkul uwarà. Ama lagonay kà, Masasədok Zəzagəla uwana mənəfay kà adapal akul la tsakana gami la abà gesina sətaka adagay, akul maḃək akul à fəta à awtəy gə, kà ana Zəzagəla, kagaw dziriga la huma Zəzagəla kà sləm aŋa Sufəl Yesu Kristu uwana kasəlaw, ŋgaha kà Masasədok aŋa Zəzagəla gami.

Maday uwana akəs à Zəzagəla à gəl

¹² Iyay, azladza aŋuwaw la tataka aŋkul la abà tagod kà: 'Tatak gesina kà, tetəvi la ahəŋ kà aŋami', tagod. Iyay dziriga nəma, ama tatak gesina kà, akəsa à akul vok aw. Ama gi kà, asa à gi kà tatak anik afà à gi asik à gəl, kà gi aŋa magay mayà aŋha aw. ¹³ Madzugway aŋatà bay kà: 'Zəzagəla adəha tatak may kà aŋa huɖ', tagod. 'ŋgaha huɖ babay kà aŋa maf tatak may à abà', tagod aya. Iyay nəma. Ama Zəzagəla adəkalah à ahəŋ vərđi anik səla nna. Ama kà aŋa mabila kà, Zəzagəla adəhà vok gami kà aŋa uwaga aw, ama Zəzagəla adəhà kà anu aŋa maɖahl sləray, uwana asa à Sufəl Yesu, kà uwana masla la uwana akor wok gami. ¹⁴ Zəzagəla awulla Sufəl Yesu à uda la mamətsay, ŋgaha masla adəwulla anu à uda la mamətsay la ndzəda aŋha aya babay.

¹⁵ Kasəlaw kà vok aŋkul kà manəbay aŋa vok aŋa Yesu Kristu aw takay? Gəsləhəni manəbay aŋa vok aŋa Yesu, ŋgaha gi aŋa madla à slaka aŋa masla mazaḃ zil takay? Awaŋ! Akəs vok aw! ¹⁶ Kasəlaw kà baŋa dza agagamla à vok maləv la masla mazaḃ zil kà, tagay sləḃ vok tekula aw takay? Haɖay, tatsetsər à wakitə à abà kà:

'Atà səla nna, tagay sləḃ vok tekula.'¹⁸

¹⁷ Ama dza uwana avà wok aŋha à Sufəl Yesu kà, masla la Yesu kà, atà tekula suwaŋ.

¹⁸ Tsa kità zlə kà, kahoyaw à mabila à ahəl! Azlatsakana anik anik uwana azladza tadə à ahəŋ gesina kà, aḃəz à huɖ gə aw. Ama dza uwana adəh mabila kà, awis wok aŋha ala la gəl aŋha. ¹⁹ Kasəlaw kà, vok aŋkul kà huɖ gəy aŋa Masasədok Zəzagəla aw takay? Zəzagəla la uwana avà à akul Masasədok uwanay à uwana la ləv aŋkul la tsəh, kà uwana vok aŋkul kakoraw aw, Zəzagəla akoray. ²⁰ Zəzagəla apəl tatak kà məŋga aŋa mavavarla akul. Kiya uwaga dəhaw sləray la vok aŋkul kà mazləḃla Zəzagəla pəra.

7

Gay lakəl aŋa mazəḃ vok

¹ Lagwa kà, gəwula à gay aŋa manavay aŋkul uwana à tsəh, kanəvəw à gi, la wakitə aŋkul la abà zlə. Gədzugw kà delga nəma, kà dza aŋa mazəḃ mis aw. ² Ama la madzugway gulo la abà aya kà, njələm mazəḃ mis, gəl agod à gi, kà dza aŋa matəd à mabila à abà. Delga kà uwabeyuwi aŋa magay la mis, ŋgaha kà azlamis bay tagay kità. ³ Kiya uwaga kà, zil avà à mis aŋha à tatak uwana mis aŋha ayahay, ŋgaha bay, mis avà à zil aŋha à tatak uwana zil aŋha ayahay. ⁴ Mis aslala vok aŋa mahən, uwana ala asa à vok aŋha aw: Say zil aŋha. Zil babay aslala vok aŋa mahən, uwana ala asa à vok aŋha bay aw, say mis aŋha la uwana ahənallaŋ ala. ⁵ Kiya uwaga zlə kà, kakwesawla kà vok mahən à ahəŋ kà akul à akul aw, say akul katsənaw vok à gay kà aŋa kaslə ŋuv lakəl aŋha, kà akul aŋa mazəḃ kaslə aŋa madəv kuɖa à Zəzagəla. Ama la lig la ahəŋ haməw gay à vok aya. Tsa baŋa kità aw kà, kadəslawwala vok aŋa masləh vok à vok aŋkul aya aw, kà akul aŋa mav tetəvi à seteni kiga aw.

⁶ Ama: 'Dahəwwəŋ uwanay', gəgod à akul, la magay zlə ma, aw. Ama agayŋa kadəhawwaŋ kiya uwanay kà naka delga, gəgod pəra. ⁷ Kəla kà, agay la madzugway gulo kà, naka delga azladza tadza à ahəŋ kokuɖa mis bokuba gi, gəgod. Ama kəla uwabeyuwi kà, aḃəzə mavəy gərgər la slaka Zəzagəla. A azladza anik kà, avà à atà maslay aŋa madz à ahəŋ kiya uwanay kokuɖa mis, à dza anik avəl maslay aŋa madz à ahəŋ la mis.

⁸ Lagonay kà, gèdàgola à huma kà à slaka azlamagamza la azlamis kufa kà mapèh à atà gay. Gègodf à atà, kà delga, kà atà tadza à ahøj bokuba gi. ⁹ Ama baña kaslaw aw, kazèbaw mis. Nulèm kà mis, kà akul aña mahèl gèl à ahøj la madzugway aņkul la abà.

¹⁰ Lagwa kà, gèpèhay kà azlauwana la azlamis adagay zlà, la tataka aña azlamèna madiņal gèl à vok la abà. Mapèhay uwanay kà gi gèpèh aw, ama Sufèl Zèzagèla la uwana apèh. Mis uwana adada à zil, aslala vok aña mavàh vok ala la zil aņha aya aw, ama baña avàh vok ala kà, ada à zil anik aya aw, tsa baña kètà aw kà, tawul à vok à tsèh la zil aņha. ¹¹ Nğaha bay zil aslala vok aña makudèk mis aņha aw.

¹² Lagonay kà, gèpèhay kà à azlamèna à uda adagay zlà, uwanay kà gay gulo, awkà gay aña Sufèl Yesu aw. Baña masla madiņal gèl à vok la mis, uwana adiņal gèl à vok aw, ama asal madz à ahøj la zil aņha, uwaga kà akudèk aw. ¹³ Kà aña mis uwana masla madiņal gèl à vok babay kà, kiya uwanay bay. Baña zil aņha adiņal gèl à vok aw, ama asal madz à ahøj atà sèla kà, ada aņha aw. ¹⁴ Uwana gèpèh uwanay kà, kà uwana zil masla madiņal gèl à vok aw gèl uwanay kà, Zèzagèla akès kà, kà mis aņha, uwana masla madiņal gèl à vok. Nğaha mis masla madiņal gèl à vok gèl aw gèl, uwanay aya kà Zèzagèla akès kà, kà zil aņha uwana adiņal gèl à vok aya suwan. Tsa aña kità aw kà, naka azlabèza aņatà kà, naka tagay kà bokuba azlabèza aña azladza uwana tasèl Zèzagèla aw gèl zla, ama lagwa kà Zèzagèla adakès atà. ¹⁵ Ama dza uwana adiņal gèl à vok aw, asal mavàhla la masla madiņal gèl à vok kà, vawwal tetèvi. Nğaha kà masla madiņal gèl à vok uwaga, adagay zilga, adagay misga kà, aga la mapèlla la abà adagay zlà. Zèzagèla azalà akul kà, kà madz à ahøj la lapiya, la tølèmma la abà. ¹⁶ Kak mis, kasèl ma kadàtèf zil aņak ay? Nğaha kak zil babay ma kadàtèf mis aņak tak ay? Kasèlaw aw!

Dzàw à ahøj bokuba uwana la abà Zèzagèla azalà akul

¹⁷ Uwaga kà kèsaw, say kèla uwabeyuwi anèf madz à ahøj aņha uwana Zèzagèla avàl lela, nğaha manèf madz à ahøj aņha uwana uwarà Zèzagèla azalà la abà lela. Uwaga la uwana gèpèhay à azlamaham à ahøj mèna gay Zèzagèla gesina. ¹⁸ Baña dza makèdèv à uda gèl, la mok uwana Zèzagèla azalà kà: Kà mana mi, agodf aw. Baña dza kokudà makèdèv à uda gèl, à mok uwana Zèzagèla azalà kà, ayàh makèdèv à uda aya aw. ¹⁹ Magay makèdèv à uda baņaw magay kokudà makèdèv à uda kà tatak tekula, makès vok aņatà la ahøj aw. Tatak uwana akès vok kà, say makès mapèhay aña Zèzagèla pèra. ²⁰ Akèsa vok, kà kèla uwabeyuwi adza à ahøj la uwana la abà uwarà, la slaka uwana la abà Zèzagèla azalàl à mok uwana atsənà mazalal aña Zèzagèla. ²¹ Iyay, mayà uwana Zèzagèla azalàl kà, adzugw gèl aya aw, ama baña mas à afik la ahàl apèhla vok ala, kà aņak aña magay la makor gèl la abà babay kà bà delga, ²² mayà uwana Zèzagèla azalàl adagay à makor gèl la abà, kà uwana adagay tekula la Sufèl gami Yesu Kristu. Kiya uwaga babay, dza makor gèl gèl, uwana Zèzagèla azalàl, adagay mayà aña Zèzagèla, kà uwana adagay aņha aya. ²³ Zèzagèla avavarà akul la tatak møjga, kità kà, kagaw azlamayà aña azladza aya aw. ²⁴ Azladedà gulo, kamkam, kèla uwabeyuwi adza à ahøj la slaka Zèzagèla bokuba uwana adzà à ahøj à mok uwana Zèzagèla azalàl.

Gay lakèl aña azlamagamza, la azlamis kufa

²⁵ Lakèl aña azlamagamza kà, gi la gay aña Sufèl kà mapèh à atà aw. Ama madzugway gulo la uwana gèpèh à akul, delga katsèbaw slèm à gay gulo, kà uwana gi kà, gi masla mabèdla gay aw, kikyà kà maslay aña Sufèl Yesu Kristu. ²⁶ Madzugway gulo tèbà: Baña dza adazèb mis didi aw kà, nulèm kà masla adza à ahøj à kà materèbay aña lakana uwanay. ²⁷ Baña kak la mis bay kà, kakudèk aw. Baña kak magamza gèl babay kà, dzà à ahøj kiya uwaga, kayàh mis aw. ²⁸ Iyay zlà, amiyaka gèpèh kiya uwanay babay kà, baña kazèb mis kà tsakana, gègodf magay aw. Nğaha baña dugu ada à zil babay kà, tsakana, gègodf aw. Ama sèlàw kà, azlauwana la azlamis la uwana tas nğèrpa møjga la gudøj uwanay la vok lakana, nğaha kà asa à gi kà akul aña mad à mas nğèrpa uwaga à abà aw.

²⁹ Aganay uwana asa à gi mapèhay zlà, azladedà: Kaslà kà desl adagay. Dagay lakana kà, azladza uwana la azlamis kà, taga kà bokuba atà la azlamis aw kèla. ³⁰ Azlauwana tataway kà, taga bokuba atà la iyaw tugwi la adi aw, azlauwana la makèfaslay la gay kà, tanèrèz kà bokuba atà la makèfaslay la gay aw, azlamèna masukw tatak babay kà, tanèrèz kà bokuba takor tatak uwana tasukw aw. ³¹ Azladza uwana takès vok la azlatatak aña gudøj à vok uwanay kà, tanèrèz kà bokuba takès vok la uwaga aya aw, kà uwana gudøj à vok uwana kanèhawwan lagonay kà, adàzila, tuwiz.

³² Lagwa kà, asa à gi kà kahèlaw gèl à ahøj kà madzugw gèl. Dza uwana azèb mis aw kà, afa gèl kà à slèray aña Sufèl Zèzagèla pèra, ayàh mahèday kà Sufèl à adi pèra. ³³ Ama dza uwana adazèb mis kà, afa gèl kà azlatatak aña gudøj à vok uwanay, asal

mahədəy kà à mis anja à adi suwanj. ³⁴ Kiya uwaga ləv anja adavahla səla, kiya uwaga la mis babay. Mis uwana zil anja la ahənj aw banjw dahalay uwana la zil aw kà, tafa gəl kà à sləray anja Sufəl Zəzagəla. Tavà vok anjatà la ləv anjatà gesina à Zəzagəla, ama mis uwana la zil kà, adzugway kà lakəl anja azlatatak anja gudənj à vok uwanay, kà uwana asal mad' à ahənj kà uwana akəs à zil anja à gəl.

³⁵ Uwana gəpəh uwanay kà, kà uwana asa à gi mazlak akul. Gəyàh mad'əf akul gay à ahənj aw, asa à gi kafahawwanj kà uwana delga, dəhàw sləray anja Sufəl Zəzagəla la ləv tekula.

³⁶ Lagwa, gədzugw lakəl anja azlamawudà uwana asa à atà mazəb vok aya aw. Banja dahalay atà la mawudà anja, tadzugw kà atà anja mazəb vok aya aw, la lig la ahənj kohana adzugway aya kà à mawudà anja, njaha kà madzugway anja gesina kà la masla la tsəh kà, akəsə vok kà mazəbay kà, tazəb vok bokuba uwana asa à atà, uwaga kà tsakana aw. ³⁷ Ama banja agədanj à afik kà, uwala tatak la ahənj atərəbənj aw, njaha mabila azənj aw kà, kità kà, agəf à madzugway anja à afik, azəb mawudà anja uwaga aw. ³⁸ Dza uwana azəb mawudà anja kà, adaha delga, ama dza uwana azəb aw adaha sləray kà dzəba anja səla aw, aduwa vok kaykay aya.

³⁹ Mis uwana la zil, masla aga la sasala la abà, kà uwana zil anja la ahənj la sifa. Ama banja zil adamətsay, mis adapəlla. Banja asal, ada à zil anik, ama say aday kà à mtəga masla madinjal gəl à vok. ⁴⁰ Ama banja adza à ahənj kokudà anja mad zil kà, marabay anja kà ada à zagəla. Kəla kà, uwaga kà madzugway gulo zlà. Ama gi babay kà, gi la Masasəfok anja Zəzagəla à uwana apəhgəla.

8

Sləb uwana takəf à azlamazlazlay à ahənj

¹ Lagwa mənərəz gay lakəl anja azlasləb uwana takəf à azlamazlazlay à ahənj zlà:

Akul kà kagəfaw kà: 'Anu gesina la hanjkəli', kagəfaw. La dziriga kà, hanjkəli tsəhay gə uwaga kà adala dza kà à zlapay à abà pəra. Masal la uwana adzərədəh azlaməna madinjal gəl à vok ala. ² Dza uwana: 'Gəsəl tatak', agəf kà, asəl tatak bokuba uwana anaka, asəl dadənj aw. ³ Ama dza uwana awoya Zəzagəla kà, Zəzagəla asəl masla.

⁴ Aganay gay gə uwana: Dza aslala vok anja mapad' sləb, uwana takəf à azlamazlazlay takay? Məsəl kà, mazlazlay kà tatak deyday la gudənj uwanay la vok. Məsəl kà say Zəzagəla kokudà gəl anja tekula pəra. ⁵ Haday gə, azlatatak la ahənj la zagəla njaha la vədàh à uwana azladza tasləkaw tatak uwatà bokuba zəzagəla. Azlatatədiya la ahənj, kiya uwaga à uwana azladza tasləkaway, tapakahatàla kà azlamənjga anjatà bokuba zəzagəla. ⁶ Ama kà anjami kà, Zəzagəla kà tekula ahəl pəra. Masla la uwana Baba gami. Tatak uwana la gudənj la vok gesina kà, aguwa à uda kà la ahəl anja. Adahà anu babay, kà anu anja magay azlaanja. Sufəl gami babay kà tekula pəra, uwaga kà Yesu Kristu. Tatak gesina atsà à uda la ahəl anja, məbəzà sifa babay kà la ahəl anja.

⁷ Ama azladza gesina tasəl dziriga uwaga aw. Kà uwana azladza anjwaw tadàhla slilih kà la manəf azlamazlazlay, njaha lakana aya banja tapad' azlasləb uwana takəf à mazlazlay à aya kà, ndzer tanərəz bokuba sləb anja mazlazlay la dziriga, kà uwana tabəz ndzəfə la tetəvi anja Zəzagəla la tsəh dadənj aw, guba aza à atà, kà madah àläh à vok anjatà à vok la mapad' sləb uwaga. ⁸ Ama la dziriga kà, tatak may adaha à anu àläh la slaka Zəzagəla aw. Banja məzuw azlatatak anik aw babay kà məgogolay aw, banja məzuw babay kà, agagis anu aw.

⁹ Ama kamkam dəhàw hanjkəli, kà uwana akul la makor gəl la abà, kà mazuw tatak gesina. Ama zlahaw kà, uwaga adala dza, uwana azlagubgub la tetəvi anja Zəzagəla la tsəh, à tsakana à abà, kà delga aw. ¹⁰ Haday kà, banja dza anik gubgubga anənjə ka, à kak uwana kasəl tatak, kadadza madzay la gəy mazlazlay la aku kà mazuw tatak kà, masla bay kà, adəzuway suwanj, kà uwana kadəkadəfəlla gəl à vok. ¹¹ Njaha deda anjak maruw vok à ahənj gə, uwana Kristu aməts kà anja kà, masla azila la tsəh anja masəl tatak anjak uwana kadahənj. ¹² Madəh tsakana tsəhay uwaga kà, delga aw. Katsalla matekwid' à deda anjak, azənj la madzugway anja la abà, njaha bay kà, kadəh tsakana kà à Kristu à vok la gəl anja babay. ¹³ Tsa banja tatak may la uwana atsala matekwid' à deda gulo kà, kà mad à tsakana à abà kà, njuləm gəpad' azlasləb uwana takəf à azlamazlazlay à ahənj dikiidiki aw, njaha kà, gi anja matsala matekwid' à deda gulo aw.

9

Gay lakəl anja azlaməna masləlay

¹ Gi kà, gi la makor gəl la abà aw takay? Gi masləlay aw ay? Njaha gənənjə Yesu Kristu la yewdi gulo. Akul uwanay kà akul mayyi à tsəh anja sləray gulo uwana gəfahənj aw

takay? ² Iyay, amiyaka azladza anik takəs gi bokuba gi masləlay aw kà, akul kà, kasəlaw gi, kà gi masla masləl gi gə, kà maham gay à vok ankul, uwana la Yesu la abà, apəhla kà, gi masləlay ndzer, kà uwana gi la gəl gulo la uwana gəpəh à akul gay marabəh.

³ Aganay tatak uwana gəpəh à azladza uwana taslaha gi məl à gəl. ⁴ Azlayla gi kà gəbəzal tatak may la tatak masay kà anja sləray gulo aw takay? ⁵ Azlayla gi kà, gi anja mazaḅ mis masla madiḅal gəl à vok gə, kà mauguzahay anu səla, bokuba uwana azlaməna masləlay anik, la azladedə anja Sufəl gami, la Piyer aw takay? ⁶ Awma anu la Barnabas la uwana mədàh sləray kà anu anja madzadzər gəl gami pəra takay? ⁷ Slodzi uwana la guvəl la gay, ma masla adzadzər gəl anja takay? Awma dza ma uwala à uwana azuw mayyay tatak anja guf anja, uwana asləka aw la? Masla manəḅla azlaləmana, ma asa awà anjatà aw takay?

⁸ Ama kadzugwaw kà mapəhay gulo kà, apəhay anja azladza pəra, kagodaw aw, awaḅ, wakità seriya anja Zəzagəla babay kà apəh kiya uwaga. ⁹ Aganay uwana tatsetsər à wakità Zəzagəla à abà:

'Kawadaw gay à kokur uwana à ahəḅ, azlaḅ hi aw.'^{*}

Zəzagəla ma adzugw ma lakəl anja kokur, kagodaw takay? ¹⁰ Kasəlaw kà, la dziriga kà, apəh kà anu aw takay? La dziriga kà, gay uwatà kà tatsetsər kà anjami, akəsà vok kà masla mapəs guf, la masla mazlaḅ tatak kà, say tadəv sləray anjatà à gay lela kəla, la maf madzugway anjatà à ahəḅ kà humà gə anjatà la tatak uwaga la abà suwaḅ. ¹¹ Anu mətəsəd makəs vok anja tatak gudəḅ à vok la slaka ankul, ma uwaga ma tatak delga aw takay? ¹² Baḅa azlawla azlaanik kà maḅəz tatak la ahəl ankul ma, anu la uwana azlawla anu kaykay aw takay?

Adagay kiya uwaga babay kà anu, kà mədahəḅ kiya uwaga aw, bə kəla ḅgərpə uwana abəz anu kà, anu kà məbasin kà anu anja madəh tatak uwana adədəf gay à azladza anik à ahəḅ anja matsən gay marabəḅ lakəl anja Yesu Kristu aw. ¹³ Səlaw la dziriga kà, azlawana tādəh sləray la mərəḅ gəy Zəzagəla la aku kà, tabəz tatak may anjatà la aku la abatà. ḅgaha azlaməna makad tatak la aku la abatà, tabəz humà gə anjatà la azlatatak uwatà la abà takadəy.^{*} ¹⁴ Kiya uwaga babay, Sufəl Yesu apəh kà azlawana taz gay marabəḅ kà, tadzadzər vok la uwatà suwaḅ, agəd.

¹⁵ Amiyaka adagay kiya uwanay babay kà, gəda à ahəḅ kiya uwaga aw. Gətsetser kà masləl gi tatak à awaḅ, gəgod à akul, aw. Kà uwana ḅuləm gəməts kà manav tatak à kà dza anja makəl gi marabay gulo ala aw. ¹⁶ Gi, gəts zlapay kà maz gay marabəḅ aw, kà uwana kà leri gə kà anulo kà madəhəḅ. Baḅa gi gəz gay marabəḅ uwaga aw kà, matəḅəy agay la gi. ¹⁷ Agayḅa gi la uwana gəkəsəni sləray uwaga la ahəl gulo kà madəhəḅ kà, naka gəkud maḅəz masik. Iyay, tsa uwaga kà, sləray gulo kà madəhəḅ kà, say gəduw yewdi kà à abà sləray, uwana Zəzagəla afa à gi à ahəl la gəl anja. ¹⁸ Gi ma mana à masik gulo zlə ma? Aganay masik gulo: Gəz gay marabəḅ kà deyday, kà uwana gənaḅ anjuf anja sləray sayda uwana gədehəḅ aw, ama naka azlayla gi nəma.

Asa à gi masəlla azladza à slaka Zəzagəla pəra

¹⁹ Gi la makor gəl la abà, gi mayà anja dza aw. Ama gi la gəl gulo la uwana gəpakà gəl gulo ala kà mayà, ḅgaha gi anja masəlla azladza à slaka Kristu. ²⁰ Mok uwana gədaḅ sləray la tataka azla Yahudiya la abà kà, gədzà à ahəḅ bokuba gi zil Yahudiya, kà gi anja maḅəz atà, ama gi la gəl gulo kà, gi la tsəh anja mapəhay anja Musa aw. Gədzà à ahəḅ la tataka azlawana tanəfa mapəhay, gədzà à ahəḅ bokuba anjatà, kà gi anja maḅəz atà. ²¹ Kiya uwaga, mok uwana gədzà à ahəḅ la tataka azlawana la abà tasəl mapəhay anja Musa aw, gədzà à ahəḅ bokuba anjatà, la kokudə maf gəl à mapəhay uwaga, kà gi anja maḅəz atà la kokudə maf gəl à mapəhay uwaga, kà gi anja maḅəz atà suwaḅ. Ama uwaga kà, asal magodəy kà, gəkəs mapəhay aw, magay aw, awaḅ, gənəfa mapəhay anja Yesu Kristu. ²² La huma anja azlawana atà maruw vok à ahəḅ gə kà, gi babay gəga anja maḅəz atà. Uwaga gədehəḅ gesina kà, kà gi anja maḅəz atà, ḅgaha atà anja maḅəlay, amiyaka tekula anjatà anja mazilaw. ²³ Uwana gədaḅ uwaga gesina kà, kà gay marabəḅ anja mad à huma à gay lela, kà gi anja maḅəz masik la azladza anik bay.

²⁴ Kasəlaw la dziriga kà, azladza uwana tagor mahoyay, gesina anjatà tahoyay, ama dza tekula la uwana adəbəza masik uwana tapəh pəra. Kità kà, gərəw mahoyay, kà akul anja maḅəz masik. ²⁵ Dza uwana asal magor mahoyay kà, say atsətsəh vok ala dagay uwarà dadəḅ, kà masla anja maḅəz masik. Ama masik uwatà adəbəzal la gudəḅ uwanay la vok, kà adəwisla. Kəla kà, kà anjami kà, mətətsəh vok ala kà, kà anu anja maḅəz masik uwana adəv à gay aw, akəl adəsəl à adi ala aw. ²⁶ Kà uwaga à uwana gədaḅay la matsək yewdi, kà say à huma à gay kabaw. Kà uwaga à uwana gədaḅay kà bokuba masla madədəf kotəpa uwana azlaḅ afaḅ deyday aw. ²⁷ Gəsal vok gulo lela, kà gi

^{*} 9:9 9.9 5Musa 25.4 ^{*} 9:13 9.13 5Musa 18.1

aŋa makor vok gulo, kà la marabəŋ makəf gəl à ahəŋ, kà Zəzagəla aŋa magolla gi la lig à gi uwana gəzà gay marabəŋ aŋha à azladza anik aw.

10

Kahamaw gay à vok la azlamazlazlay aw

¹ Azladedə, delga awul à akul à gəl, lakəl aŋa azlababa gami madzidziga uwana tau-guzàh la Musa. Zəzagəla adək à atà magudu gudu à gəl gesina, atsakà atà à ama, ŋgaha gesina aŋatà taguwà à uda la mukwà mativga la abà aya.* ² Atà gesina aŋatà kà tabəzà batem la magudu gudu, ŋgaha la mukwà mativga la abà. Atà gesina aŋa tahamà gay à vok la Musa. ³ Atà gesina aŋatà tazùw tatak may uwana asà à ahəŋ la slaka Zəzagəla babay. ⁴ Tasàh iyaw uwana akalàh à uda la dzəgla la abà, uwana Zəzagəla avàh à atà dzəgla, uwana Zəzagəla avà à atà kà, kà Yesu Kristu uwana aguwà à huma.* ⁵ Bà la uwaga gesina kà, Zəzagəla akweska madfehəŋ aŋatà, kà uwaga à uwana gesina aŋatà tamàts à kəsaf à abà.

⁶ Azlatatak uwaga kà tazlaka anu lakana, kà anu aŋa madfàh à adi la mabila mawisiga uwana atà tadfahàhəŋ aw. ⁷ Kasləkawaw azlamazlazlay bokuba uwana azlaanik aŋatà tadfahàhəŋ aw. Wakità agod lakəl kà:

'Azladza tadzà madzay, tazùw tatak, tasàhàh tatak, ŋgaha tasà à afik kà mahab dəs azlamazlazlay.*

Kamkam, kà aŋkul kà kasləkawaw azlamazlazlay aw. ⁸ Kadfahaw mabila bokuba azlaanik aŋatà, uwana dza dəbow dzik səla gəl aŋha makor tamatsà à gay la mavakay tekula la tsəh aw. ⁹ Digiya katapaw Sufəl Zəzagəla, bokuba azladza anik aŋatà aw. Atà tamatsàh à matsàh atà aŋha bebi à abà. ¹⁰ Kaŋoŋuzaw lakəl aŋa Zəzagəla bokuba azlaanik aŋatà uwana tadfahàhəŋ aw. Malika aŋa mamətsay azahà atà ala. Akul kà kadfahawwəŋ kiya aŋatà aw.

¹¹ Uwana Zəzagəla adfahàhəŋ azlatatak uwaga gesina kà, kà azladza aŋa masəl azlatatak la uwaga la abà, ŋgaha kà atà aŋa madfàh haŋkəli. Tatsetsər uwaga à wakità à abà, kà atà aŋa matapanula azlatatak à anu azladza aŋa zamana uwanay azladəv à gay. ¹² Kà uwaga, dzàw à ahəŋ dzawwa. Dza uwana adatsizlla à ahəŋ kà, say adfaha haŋkəli kà masla aŋa matəf à ahəŋ aw. ¹³ Azlamatərbəy uwana tabəza akul kà, tabəza azladza gesina babay. Ama Zəzagəla, uwana agədfiŋ dziriga aŋha à afik kà, asak à matərbəy kà matərbəy akul la azlatatak uwana la abà, adfuwa ndzəfa aŋkul aw. Masla adàvə à akul ndzəfa kà mabasij, ŋgaha kà mas à uda la abà aya babay.

¹⁴ Kà uwaga azladedə gay ləv gulo, hōyàw à azlamazlazlay à ahəl. ¹⁵ Gəpəhay kà akul azladza matsən sləm gə, nərəzàw lakəl aŋkul à uwana gəpəhay tsi, kà uwana dziri à uwana gəpəhay. ¹⁶ Akul dzūgwàw lakəl aŋa tatak may aŋa Sufəl uwana məzuwahay tsi. La mok uwana məzuway la slaka gə, à tatak may aŋa Sufəl, kasəlaw kà anu la Kristu mədahama gay à vok la aŋiz tekula la abà aw takay? Mok uwana mətsək kaf ala kà mazuway kà, kasəlaw kà mədaham gay à vok la sləb vok aŋa Yesu Kristu la abà tekula aw takay? ¹⁷ Kaf kà tekula pəra à uwana anu gesina məzuway, kaf tekula gə uwaga kà apəhla ala kà mədagay tekula, kà uwana məzùw kà kaf tekula uwatà.

¹⁸ Dzūgwàw lakəl aŋa tsəhay Isərayel dadəŋ tsi. Takàdfah azlatatak à Zəzagəla kà, azlauwana tapədfah sləb uwaga kà, atà tekula la Zəzagəla.* ¹⁹ Mana à uwana mafafad bəga la gay uwaga la abà ma? Sləb uwana dza akəd à azlamazlazlay la azlamazlazlay ma, tatak dziriga takay? Awanj! ²⁰ Ama uwana azlaməna makad tatak uwana tsəl Zəzagəla aw kà, takadəy kà à azlamazlazlay, awkà à Zəzagəla aw amà à seteni. Ŋgaha asa à gi kà kahamaw gay à vok la azlamasəfəfok mawisiga aw. ²¹ Kà uwana kaslawwalla vok aŋa matsəp gay à masakwa aŋa Sufəl la abà la aŋa azlamasəfəfok mawisiga la abà aw. Ŋgaha babay kaslawwalla vok aŋa madz madzay la tatak may aŋa Sufəl Yesu la adi, ŋgaha kadzaw madzay la aŋa masəfəfok mawisiga la adi aya babay aw. ²² Awma asa à anu madla ləv à Sufəl Zəzagəla à huɔf takay? Ŋgaha ma məduwa masla la ndzəfa takay?

Madz à ahəŋ kà matsala matekwid à azladza anik aw

²³ Hadəy, azladza anik la tataka aŋkul la abà tagod kà: 'Anu la makor gəl la abà kà tatak gesina'. Iyay nəma, ama tatak gesina kà azlaka anu aw pəra. Tagod aya kà: 'Anu la tetəvi kà madfàh tatak gesina', ama la azlatatak anik kà, mədàzigəŋla magay la tetəvi aŋa Zəzagəla la tsəh aw. ²⁴ Kayahaw kà azlatatak uwana akəsa akul à vok pəra aw, ama yàhàw kà uwana akəsa vok à azladza anik babay suwanj.

²⁵ Kêla tatak uwana tadaw ala la kasukwa, bokuba azlaslêb kapaçaw, kokufa maêk gel à ahêj sêla la lèw ankul la tsêh. ²⁶ Haçay, bokuba uwana tatsesêr à wakitâ Zêzagêla à abâ kâ, agôçf kâ:

'Sufêl Zêzagêla la uwana akor gudêj à vok gesina, la azlatatak uwana la abâ gesina.'²⁶

²⁷ Baña masla mađinal gel à vok aw anik, azala akul kâ mazuw tatak may la mtega anha kâ, ziwaw kêla tatak gesina uwana adâfa à akul à huma à gay, la kokufa manaval lakêl anja maêk gel à ahêj sêla ankul. ²⁸ Ama kêla kâ, baña dza agôçf à akul kâ, slêb uwanay kâ slêb mazlazlay kâ, uwaga kâ kazuwaw zlà ma aw, kâ uwana adapêhakulla, ngaha kâ kak anja makadla gel à vok, la lèw anha la tsêh aw. ²⁹ Madzugway anja lèw ankul gëgôçf aw, ama anja lèw anha. La dziri madzugway anja lèw anja dza aslala vok anja madâh seriya à madzugway anja makor gel anja lèw gulo à gel aw. ³⁰ Baña kikay gëdagôçf à Zêzagêla kâ tatak may gulo aya ma, kakay dza apêsew gi lakêl anja tatak may uwana kikay gëgôçf à Zêzagêla gulo aya ma?

³¹ Uwana gëpêh kâ kiya uwanay, kadâzuw mana babey mi, kadâsa mana babey mi, kadâçah mana babey mi, çahàn kâ la tetêvi uwana slêm anja Sufêl Zêzagêla anja maday à huma à gay la mazigênay përa. ³² Kadahawwanj kâ la makad gel à azladza à vok aw: Adagay zil Yahudiya, adagay zil Yahudiya aw, adagay azlamêna mađinal gel à Zêzagêla à vok. ³³ Dahâwwânj bokuba uwana gi gëçahêj. Gi gëdawad vok à uda, kâ gi anja mawoy uwabeyuwi gesina, gëyâh uwana akês gi vok aw, say uwana akês vok à azladza, kâ atâ anja maêlay.

11

¹ Dzaw à ahêj bokuba uwana gëdza à ahêj, nêfaw gi, bokuba uwana gënêfa Kristu.

Azlazil la azlamis la huma anja Zêzagêla

² Azladedâ gëzlêb akul, kâ uwana kadzugwaw lakêl gulo koksikoksi, ngaha kâ uwana kanêfaw azlatatak uwana gëçapakulla gesina aya. ³ Ama bâ la kitâ kâ, asa à gi kâ kasêlaw uwanay: Sêlâw kâ Kristu kâ Sufêl gâ anja azladza gesina. Zil kâ mênge anja mis, ngaha Zêzagêla kâ masla kâ mênge anja Kristu. ⁴ Kâ uwaga baña zil adêv kufa, banaw apêha gay Zêzagêla la gâj la aku la maf tatak à gel gâ kâ, kiya uwaga kâ masla apêsew mênge anha. ⁵ Kiya uwaga babay baña mis adêv kufa banaw apêh gay Zêzagêla la gâj la aku la gel deyday gâ kâ, apêsew zil anha. Apakay kâ bokuba masla mafêts gel à ahêj gâ. ⁶ Tsa baña mis awad nalbêt à gel aw, ma kâ mana afêts gel à ahêj përa aw zlà ma? Ama masl anjdz anja mis la mafêts gel à ahêj kâ uwaga kâ ziruwî, say awadâh nalbêt à gel. ⁷ Ama zil kâ afa tatak à gel aw, kâ uwana masla maftsa vok anja Zêzagêla. Masla apêhla mazlêbay anja Zêzagêla ala, ama mis kâ apêhla kâ mazlêbay anja zil anha ala suwanj. ⁸ Haçay kâ, zil kâ asâ à uda kâ la mis la abâ aw, ama mis la uwana, asâ à uda la zil la abâ. ⁹ Zêzagêla anjêl zil kâ anja mis aw, ama anjêl mis kâ anja zil.¹⁰ ¹⁰ Kâ uwaga à uwana mis ahad gel à ahêj la nalbêt, kâ maslêkaway zil anha, ngaha kâ azlamalika babay. ¹¹ Amiyaka adagay kiya uwanay kâ, kâ anjami uwana mëdagay tekula la Sufêl Yesu Kristu kâ, mësêl kâ mis aslala vok anja madz à ahêj la aslasl gel anha babay aw, ngaha zil babay aslala vok anja madz à ahêj la aslasl gel anha babay aw. Say atâ sêla nna. ¹² Iyay, bokuba uwana mis kâ asa à uda kâ la zil la abâ kâ, kiya uwaga kâ, lakana mis la uwana ayyi zil lagwa, ama atâ sêla nna kâ tasâ à wanj la slaka Zêzagêla, masla manjal tatak gesina.

¹³ Nêrêzâw la gel ankul dadânj: Baña mis adêv kufa à Zêzagêla la gâj madêv kufa la aku la gel deyday, ma akêsa vok takay? Wullâw à gi ala tsi! ¹⁴ Bâ la madz à ahêj la abâ kâ, ziruwî kâ anja zil kâ masak anjdz zinziŋga lakêl. ¹⁵ Ama baña mis azigênêj anjdz anha à gel kâ, uwaga kâ tatak dzêba anha sêla aw gâ. Abêz anjdz anha zinziŋga bokuba tatak mahadla gel à ahêj. ¹⁶ Ama baña dza asal mats gay lakêl anja uwaga kâ, sêlâw kâ, anu kâ mësêl madz à ahêj anik aw, amiyaka azlamêna gay Zêzagêla babay kâ tasêl tetêvi anik babay aw.

Mazuw tatak may anja Sufêl Yesu Kristu

(Mata 26.26-29; Mark 14.22-25; Luka 22.15-20)

¹⁷ Tatak uwana asa à gi anja mapêh à akul kâ mazlêb anu kagôçfaw aw. Kâ uwana mok uwana kahamaw gay à vok kâ anja maslêkaw Zêzagêla kâ, tatak delga kadahawwanj aw, ama kadahawwanj kâ mawisiga, delga aw, gëgôçf à akul. ¹⁸ Teranja kâ, mok uwana kahamaw gay à vok, kâ anja maslêkaw Zêzagêla kâ, katsakahawla gergêr, tagôçf à gi, uwaga ma dziri ay? Wullâw à gi ala tsi! ¹⁹ (Duli matsakla agay la tataka ankul la abâ, ngaha kâ masêlla ala azlauwana azlaanja Sufêl Yesu dziriga) ²⁰ Uwana kamahaw

gay à vok kà kazawaw tatak may anja Sufël aw. ²¹ Kà uwana kèla uwabeyuwi ankul kà av vok anja mazuw anja, ngaha azlaanik tagodf à ahøj la may gá, ngaha azlaanik aya kà guzu adakadf atà zlà, gøgodf. ²² Tsa banja kiya uwaga kadahawwan, ma kà mana kazawaw tatak may la mtøga ankul aw ma? Asa à akul anja mapøsew maham à ahøj mœna madinjal gøl à vok kœla ay? Awma kà, makøl ziruwi à azlauwana à gøl tatak may anjatà la ahøj aw, kagodfaw kœla ay? Mana gøpøh à akul lagwa zlà ma kagodfaw ma? Gøzløb akul, kagodfaw ay? Awan, gøzløb akul aw!

²³ Aganay matapla uwana Sufël Yesu atãpgœla, à uwana gøtãpakulla: Sufël Yesu la vœd uwana tatãl kaf à gøl kà mavày à ahàl anja azladza kà, azèb kaf à ahàl, ²⁴ kikay agòd à Zøzagœla kà kaf, atsøkà kaf uwaga ala, agòd:

'Uwanay kà vok gulo uwana aga matsøkøj ala gà kà ankul, zùwàw uwaga kà gi anja mawul à akul à gøl.'

²⁵ La lig anja mazuw tatak may anjatà la ahøj, azèb kœtsaw à ahàl, agòd:

'Tatak masay uwana la kœtsaw uwanay la abà kà, makøs vok slawda mawga la anjiz gulo, uwana adàsokw à vœdah. Kœla kaslà uwana kadàshaw uwanay kà, kà gi anja mawul à akul à gøl.'*

²⁶ Mapøhay anja Sufël Yesu uwanay apøhla ala kà, la kœla kaslà uwana kazuwaw kaf uwanay, la mas tatak masal à gøl uwanay kà, kapøhaw kà gay mamøtsay anja à azladza, tsøràh à kaslà uwana Sufël adàwul à wan.

²⁷ Kà uwaga kà banja dza azuw kaf, ngaha as tatak masay à uda la kœtsaw anja Sufël Yesu la abà la kokudfa, mavàh gøl anja ala kà, adàh tsakana à vok anja Sufël Yesu à gøl, ngaha à anjiz anja à gøl aya. ²⁸ Kità kà, kœla uwabeyuwi agur gøl anja dadàn, ngaha masla anja mazuw kaf, la mas tatak à uda la kœtsaw uwaga la abà. ²⁹ Kà uwana banja avaha uwaga ala la tatak may deyday gá aw kà, abiy seriya à gøl anja la mazuway anja la masay anja. ³⁰ Kà uwaga à uwana anjuvaw la tataka ankul la abà takalàh à vœdah, tapakàh magudu, tapakàh azlamœna d'uvats ngaha anjuvaw tamàts à gay aya bay. ³¹ Banja anu mœgur gøl gami dadàn kà, Zøzagœla adàdàha à anu seriya à gøl aw. ³² Banja Sufël Yesu aslœha à anu à vok kà, kà matsatsøh anu ala la tatak uwana la abà kà, seriya anja madàkøs anu kiya anja azladza anik aw.

³³ Kà uwaga azladedda gulo, banja kadàhamaw gay à vok, kà mazuw tatak may anja Sufël kà, kudàhàw vok kà akul anja magay la ahøj gesina. ³⁴ Banja dza la may gá kà, say azuw kaf à huf la mtøga anja, kà maham gay à vok ankul anja mabiyakulla seriya anja Zøzagœla à gøl aw.

Kà anja azlagay anik, say banja gødàda à awtày la uwana, gødàdøvøj à gay zlà.

12

*Mavày uwana Masasødok Zøzagœla avày kà madahla sløray
(Rom 12.1-11; 1 Korintiya 14.1-25)*

¹ Lagwa adagay kà mœpøh gay anja mavày anja Masasødok Zøzagœla. Azladedda gulo, asa à gi kà kasølaw uwaga lela. ² Azladedda, mok uwana kaløgaw anja madin gøl à Yesu à vok kà, kanøfàhàw azlamazlazlay badaga uwana takøràh akul. ³ Kà uwaga à uwana, asa à gi kà kasølaw uwaga: Banja Masasødok Zøzagœla adakøs dza kà, dza uwatà kà aslala vok anja magodfay kà: 'Yesu kà matsafla gá!', agodfay aw. Kiya uwaga babay: 'Yesu kà Sufël Zøzagœla', dza agodfay aw, say banja Masasødok Zøzagœla la masla la abà.

⁴ Aga la ahøj azlamavày anik anik gørgagør anjuvaw, ama Masasødok tekula la uwana avà à atà tetøvi gesina anjatà. ⁵ Aga la ahøj azlatatak anik anik anjuvaw, ama Sufël Yesu tekula, la uwana avà à atà tetøvi anja mavày uwaga gesina. ⁶ Aga la ahøj azlamaslay anja madàh sløray anik anik gørgagør anjuvaw, ama Zøzagœla kokudfa gøl anja la uwana avày à kœla uwabeyuwi maslay anja sløray uwaga. ⁷ Masasødok apøhla ala kà, aga la kœla uwabeyuwi ankul la abà, kà akul anja mazlakla maham à ahøj mœna gay Zøzagœla la mavày uwaga. ⁸ Masasødok avày à dza matsihila, ngaha bà la Masasødok uwaga avà à dza anik aya maslay anja mapøhla madzugway anja Zøzagœla ala. ⁹ Kà anja dza anik aya kà, Masasødok avà ndzødfa kà madin gøl à Yesu à vok la dziriga. Ngaha avà à dza anik maslay kà mawar azlamœna d'uvats ala. ¹⁰ Uwaga avà à azladza anik maslay kà madàh azlanadzipo, à azladza anik aya avà à atà maslay kà mapøh panjaw anja Zøzagœla, uwana apøh à atà, à azladza anik aya avà à atà maslay kà mabàdma la azlagay anik anik, à azladza anik aya avà à atà maslay kà mapalla godega anja azlagay uwaga ala. ¹¹ Uwaga kà bà Masasødok tekula gá, gá la uwaga à uwana adàh uwaga gesina, masla avà maslay à dza gørgagør bokuba uwana asal.

* 11:25 11.25 2Musa 24.6-8; Yeremiya 31.31-34

Maham à ahəj məna madiŋal gəl à vok kà,

aga kà bokuba vok aŋa dza

¹² Məsəl kà vok aŋa dza kà tekula, ama azlamanabay la ahəj gərgəgər. Amiyaka azlamanabay la vok aŋa dza kà gərgəgər ama vok kà tekula pəra. La Kristu bay kà kità.

¹³ Nŋaha anu azla Yahudiya la azlauwana azla Yahudiya aw, azlamayà baŋaw azladza uwana takor gəl, tadfahà anu batem kà, kà anu aŋa magay vok tekula la Masasədok tsikaslaga uwaga la abà, nŋaha Zəzagəla avà à anu maslay la Masasədok tekula uwaga la abà.

¹⁴ Vok kà, aga la manabay tekula pəra aw, ama manabay dəj. ¹⁵ Iyay zlahaw kà, asik agoday kà: 'Gi manabay aŋa vok à gi aw, kà uwana gi ahəl aw', agoday, 'Kità kà, gi aŋa vok aw', bə la uwaga gesina kà masla manabay aŋa vok, ndzer. ¹⁶ Zlahaw sləm agoday kà: 'Gi kà gi yewdi aw, gay gə la uwaga gəga manabay aŋa vok aw', agoday, bə la dziriga uwaga adəf gay à sləm à ahəj aŋa magay manabay aŋa vok aw. ¹⁷ Agayŋa vok gesina kà naka agay kà yewdi pəra, ma naka kakay atsən sləm ma? Nŋaha agay, agay kà sləm, pəra ma naka kakay azin tatak ma? ¹⁸ Ndzer, Zəzagəla abək azlamanabay à vok à vok bokuba uwana asal. ¹⁹ Agayŋa vok gesina agay kà manabay tekula pəra kà, uwaga kà naka agay vok aw. ²⁰ Ama lagwa kà, azlamanabay aŋuvaw la vok tekula la vok.

²¹ Kiya uwaga kà, yewdi aslala vok aŋa magod à ahəl kà: 'Gəyah ka aw!', agodal aw. Nŋaha takasagəl babay aslala vok aŋa mapəhay uwaga à asik babay aw. ²² Tetuwa kiya uwaga aw! Azlamanabay aŋa vok, uwana kanəj atà, bokuba takəsa kà vok aw, kà atà la uwana takəsa kà vok ndzer. ²³ Azlamanabay uwana takəsa à anu vok aw, məgod kà, atà la uwana məfa à atà sləm kaykay, manabay ziruwi gə uwana məhad atà à ahəj la huma yewdi aŋa azladza kà, məkəs atà kà la ahəl səla. ²⁴ Azlamanabay uwana takəs anu à gəl kaykay, atà kà mənəkuda aŋa mahad atà à ahəj aw. Zəzagəla ahamà gay à vok à vok gesina, avàh à azlamanabay bəzaga masləkaway gesina. ²⁵ Kà uwana asal kà maŋəjuzay aŋa magay la ahəj la vok aw. Ama kà matsən vok gay aŋa magay la ahəj la tataka azlamanabay aŋa vok la abà gesina aŋatà. ²⁶ Baŋa manabay tekula azay kà, azlamanabay gesina tazay la slaka gə. Baŋa tekula aŋatà la marabay la abà, gesina aŋatà tarabay la slaka gə suwan, bay.

²⁷ Akul gesina kà, akul vok aŋa Kristu, nŋaha kəla uwabeyuwi aŋkul kà manabay aŋa vok uwaga. ²⁸ Kiya uwaga à uwana, Zəzagəla avàh sləray à azladza la maham à ahəj məna gay Zəzagəla. Teranə: azlaməna masləlay, masəla: azlaməna mapəh à atà gay à ahəl aŋa Zəzagəla, kà mapəh à azladza, nŋaha maməkər aŋha: azlaməna matapla tatak à azladza anik, la lig la ahəj: azlaməna madfah azlanadzipo, nŋaha: azlauwana la maslay kà mawar azlaməna đuvats ala, nŋaha: azlaməna mazlak à azladza anik anik, nŋaha: azlauwana tadala azladza anik anik la tetəvi delga la ama, nŋaha: azlauwana la maslay kà mapəh azlagay məlok gə, uwana azladza anik tasəl aw. ²⁹ Gesina aŋatà kà azlaməna masləl atà, baŋaw azlaməna mapəh à atà gay à ahəl aw, baŋaw azlaməna matapla à azladza aw. Gesina aŋatà kà atà la maslay kà atà aŋa madfah azlanadzipo aw, ³⁰ baŋaw kà mawar azlaməna đuvats ala, nŋaha la mapəh azlagay məlok gə aw, baŋaw la masəh ala godega aŋa azlagay uwaga à uda aw. ³¹ Kiya uwaga kà yàhàwàni mavày uwana aduwa vok zlà.

Ama lagonay kà, gəpəhakulla tetəvi uwana aduwa vok gesina.

13

Tatak uwana aduwa vok gesina kà: Masal

¹ Iyay, agayŋa gəsəl azlagay gudəj aŋa azladza gesina, amiyaka bə aŋa azlamalika, nŋaha mawoy dza gulo la ahəj aw kà, kiya uwaga kà gəpaka kà kalkal la mahohumay aŋa dewdəw uwana azay la sləm la abà pəra. ² Amiyaka gədəgay la maslay kà maz paŋaw aŋa Zəzagəla à azladza, amiyaka bə gədəsəlay tatak gesina, gədəsəlay godega aŋa nasiri aŋa Zəzagəla, gədədiŋ gəl à Zəzagəla à vok la tsəhay gə, uwana gəslala vok aŋa magoday à gudəj: 'Bəfa vok ala la abanay, ama baŋa gəwoyay azladza anik aw kà, gədəpaka tatak deyday pəra. ³ Gədāvàh azlatatak gulo à uda gesina babay, amiyaka bə gəl gulo bay kà mabək à gay la akəl, ama baŋa gəwoyay azladza anik aw kà, makəs vok gulo la ahəj aw, gədəpaka tatak deyday.

⁴ Dza uwana la masal, masla abasin azladza anik, masla adah delga, adah adi aw, ats zlapay aw, azigəj gəl aw. ⁵ Masla masal kà, adah sləray ziruwi gə aw, masla afa à gəl kà vok aŋha pəra aw, masla ləv aw, apəh gay lakəl aŋa mawisiga aŋa dza aw, la maf dza à ləv aw. ⁶ Masla arabay kà sləray mawisiga aw, ama arabay kà, kà sləray delga. ⁷ Masla uwana la masal kà, abas tatak gesina, madiŋal gəl à vok aŋha, la manewəj aŋha, la mabasin aŋha atəuway đikidiki aw.

⁸ Masal kà adəv à gay aw, mapəhay aña Zəzagəla uwana apəh à azladza à ahəl kà mapah à atà kà, adədəv à gay à baña mēlo aňha adəslay. Azlagay gudəñ aña azladza gesina, uwana məpəhay kà, adədəv à gay babay, bə masəl tatak gami uwana məsəl tatak babay kà adəzahla. ⁹ Kà uwana masəlay gami, la mapəhay gami kà uwana məz pañaw aña Zəzagəla uwana apəh à anu à ahəl kà ahən ala babay aw. ¹⁰ Ama mok uwana tatak ahən ala gə adəsa à wañ kà, tatak uwana ahən ala aw kà, adəziyla gesina.

¹¹ Mok uwana gi bəziga kà, gəpəhəh gay bəzi, gədzugwəh ŋgaha gənawəhəñ mabəzi bəzi, ama mok uwana gədagay magolga, gəsək à tatak azlabəza la tsəh ala gesina. ¹² Lagonay kà, mənəñəñ kà bokuba fatew uwana la kutərum la abə, mənəñəñ la dziriga aw. Ama kaslā adəslay à uwana mədənəñ Zəzagəla yewdi la yewdi. Lagonay kà, gəsəl kà gəl gə gəl gə pəra, ama la kaslā uwatā kà, gədəsəlay la lela bokuba uwana masla uwana asəl gi babay.

¹³ Lagonay kà, tatak makər uwaga la uwana tagəfəñ à afik: Madiñal gəl à vok, manewəñ, ŋgaha masal. Ama masal la uwana aduwa azlatatak anik anik gesina la kaykay.

14

Gay anik lakəl aña mavəy aña Masasəfok Zəzagəla (Rom 12.1-13; 1 Korintiya 12.1-11)

¹ Wəfəw vok à uda kà akul aña magay la masal, wəyàwwəñ la ləv tekula! Mavəy uwana Masasəfok Zəzagəla avəhà à azladza, kà akul aña mabəzal suwañ. Uwana wəyàwwəñ, gəgod à akul, kaykay kà, maslay aña mapəhla gay Zəzagəla à azladza uwana Zəzagəla apakullan. ² Masla məpəh gay mələk gə, uwana azladza anik tasəl aw kà, say apəhay kà à Zəzagəla pəra, kà uwana dza asəl gay uwaga aw. La ndzəfa aña Masasəfok Zəzagəla dza apəh nasiri. ³ Ama dza uwana az pañaw aña Zəzagəla, uwana apəhal kà, azigənəñ kà azladza la madiñal gəl à vok la abə, kà madzərəfəh atà à uda, ŋgaha kà matasləh atà à gay à ahəñ. ⁴ Dza uwana abəfma la azlagay mələk gə, uwana azladza anik tasəl aw, adzərəfəñ kà madiñal gəl à vok aňha à uda pəra. Ama dza uwana az pañaw aña Zəzagəla, uwana apəhal kà mapəh à azladza kà, avə ndzəfa à məna madiñal gəl à vok la maham à ahəñ məna gay Zəzagəla gesina.

⁵ Asa à gi, kà akul gesina kà kavatsaw gay la azlagay mələk gə, uwana azladza anik tasəl aw. Ama uwana gəyahay kaykay aya kà, akul aña mabəz maslay aña maz pañaw aña Zəzagəla uwana apəh à azladza à ahəl. Hadəy kà, dza uwana av sayda uwaga kà, uwaga la uwana akəsa vok à dza, uwana asəl azlagay mələk gə, ŋuləm kà say masla mawulla à uda aga la ahəñ, kà madzərəfəf azlaməna madiñal gəl à vok ala. ⁶ Azladedə, gənaava akul: La mok uwana gədāda à awtəy à slaka aňkul, la mana gədəkəs à akul à vok, à baña gədāvats gay kà la azlagay mələk gə uwana azladza tasəlaw ma? Gədəkəs akul à vok aw, say baña gədāsa akul à uda dziriga aña Zəzagəla, bañaw gəpəhakulla tatak anik anik, bañaw masəlay anik anik, bañaw sayda uwana mabəzal gə la slaka Zəzagəla, bañaw matapla anik anik.

⁷ Dzūgwəw lakəl aña azlatatak matsay kà aña marəzlay tsi, bokuba talakway bañaw ŋizin, baña masla matsay la masla madəfəy tava kuda aňha aw ma kakay dza asəl mahabal à tsəh lela ma? ⁸ Bañaw, baña masla mats mazlazljin aña guvəl atsay lela aw ma, uwa ada à guvəl uwa? ⁹ Kiya uwaga la slaka aňkul babay, baña kapəhaw gay mələk gə, uwana dza asəl aw, kakay dza atsən uwana kapəhaw ma? Aña kiya uwaga, kà gay aňkul uwana kapəhaw kà, adagay gay deyday bokuba madəfəy aña afaf. ¹⁰ Aga la ahəñ azlagay gərgəgər la gudəñ la vok, kəla tsəhay uwala beyli kà la gay aňha. ¹¹ Ama baña gətsəna gay uwana dza apəh à gi aw kà, dza uwana apəh à gi gay uwaga kà gədəpakin ala kà, kà dza mələk gə la slaka gulo, ŋgaha gi babay gədəgay mələk gə la huma aňha suwañ. ¹² Tsa akul kà, kavəw ndzəfa à azlamavəy uwaga zlə kà, yəhəw aña magay gorobu kà aña azlauwana tadala maham à ahəñ məna gay Zəzagəla à huma à gay la madiñal gəl à vok la abə zlə.

¹³ Kà uwaga baña dza la maslay kà mavats gay la azlagay mələk gə, uwana azladza anik tasəl aw kà, say dza uwaga anav maslay la slaka Zəzagəla, kà mav maslay kà masəlla godega aña azlagay uwaga à uda kəla babay suwañ. ¹⁴ Baña gədəv kuɖa la gay mələk gə uwaga kà, ləv gulo adəv kuɖa ndzer, ama hañkəli gulo adəv kuɖa aw. ¹⁵ Tsa baña kiya uwaga ma, mana gəfəhəñ zlə ma? Gədəv kuɖa la masasəfok gulo, gəhab uwaga kà la hañkəli gulo babay aya. ¹⁶ La kitā, baña kadəv kuɖa à Zəzagəla la masasəfok ma, kakay dza masla matsəbal sləm uwana la maham gay vok aňkul la abə, adəslala vok à magəfəy: 'Amen!' à madəv kuɖa aňak ma? Kà uwana asəl à uwana

kapəhay tetuwa aw. ¹⁷ Amiyaka madəv kuɗa anjak adagay dzəba anja səla aw babay kà, akəsa la vok aw.

¹⁸ Kikay gəgəf à Zəzagəla kà uwana gəɗuwa akul gesina la masəl gay mələk gə, uwana azladza anik tatsənəŋ aw. ¹⁹ Ama la huma maham à ahəŋ mənə gay Zəzagəla kà, asa à gi mapəh gay zlo uwana tatsəna, kà gi anja madzadzan azladza anik ala, à kà mapəh gay dəbow dəbow, uwana azladza anik tsəl aw.

²⁰ Azladedə, kadzugwaw bokuba akul azlabəza aw, à uwana dzùgwaw bokuba akul azlamagol dza. Kà madàh mawisiga kà, gaw bokuba azlabəza uwana tsəl madàh mawisiga aw. ²¹ Agay uwana tatsetsər à wakità Zəzagəla à abà:

'La azlagay mələk gə uwaga à uwana gəɗasahla à tsəhay gulo à uda. Ama bə la uwaga kà, tatsiŋgəŋ la ahəl aw',^{*}

Sufəl Zəzagəla agəf. ²² Kà uwana mabəɗma la azlagay mələk gə kà, adəpakay kà bokuba nadzipo la slaka azladza uwana tadinjal gəl à vok aw, kà atà anja masəlay kà, atà la maham gay à vok la abà, la azlaməna madiŋal gəl à vok aw. Ama maz gay Zəzagəla, kà mapəhla panjə anja Zəzagəla ala la slaka anja azlaməna madiŋal gəl à vok, ama kà anja azladza gesina suwan babay aw.

²³ Bokuba magəɗay kà, maham à ahəŋ mənə gay Zəzagəla gesina adahama gay à vok, ŋgaha gesina anjatà tadzəka mavats gay kà la azlagay mələk gə pəra: Banja azladza deydayga, uwana tadinjal gəl à vok aw, tada à awtəy à maham gay à vok anjul à abà, ŋgaha tatsən uwaga kà, tanəroz akul kà bokuba akul azlakusonju aw, takay? ²⁴ Ama banja kəla uwabeyuwi az sayda anja Zəzagəla, ŋgaha dza deydayga, uwana masla madiŋal gəl à vok aw, ada à awtəy babay kà, kiya uwaga kà, kəla gay uwana adətsənəŋ kà, adəpəhla tsakana anja. Gay uwaga gesina kà, adəkəsəy lakəl. ²⁵ ŋgaha madzugway uwana la tsəh ləv anja gesina, adəsa à uda à uɗaka ala, ŋgaha adəwulla à gəl à wəɗah kà masləkaw Zəzagəla la magəɗay kà: 'Ndzer, Zəzagəla la ahəŋ la tataka anjul la abà!', agəɗay.

Uwana akəsa vok la maham gay à vok la abà.

²⁶ Azladedə, mana à uwana gəpəh à akul lagwa ma? Mok uwana khamaw gay à vok la slaka gə, dza anik azəb mahabay, ahəb. Dza anik atapla gay Zəzagəla à azladza anik. Dza anik atsala à atà tatak uwana à uda, Zəzagəla apəhla. Dza anik aya à masla mabəɗma la azlagay mələk gə, ŋgaha dza anik atsala godega anja gay uwaga à uda apəhay. Kəla tatak uwana kadəhawwanj kà, say agay delga, azlaməna gay Zəzagəla tazigəna la masla kəla. ²⁷ Kà anja azlagay mələk gə kà, səkəw kà azladza səla pəra tapəh, ama dza awulla à uda uwana tapəhay, ŋgaha la manəf vok lela, aɗuwa dza makər anja mapəhay aw. ²⁸ Ama banja masla mawulla gay uwaga à uda la ahəŋ aw kà, masla mabəɗma uwaga adza à ahəŋ titi, apəh uwaga kà la ləv anja la tsəh, atà la Zəzagəla anja pəra. ²⁹ Ama kà anja azlaməna maz panjə anja Zəzagəla, uwana apəh à atà kà, azladza səla banjəw makər tapəh gay uwaga, ama say azladza taməɗzedəŋ ala uwana tapəhay. ³⁰ Zlahaw kà, la kaslə uwana dza abəɗma la uwana, dza anik uwanay abəza gay la slaka Zəzagəla kà, ŋuləm matera adza à ahəŋ dadəŋ. ³¹ Akul gesina kaslawulla wok anja maz gay anja panjəw anja Zəzagəla la manəf vok la tekula tekula, ŋgaha azlaməna madiŋal gəl à vok gesina anja masəlay, ŋgaha madiŋal gəl à vok anja uwabeyuwi anja mazigənanj. ³² Azlaməna mazəh panjəw anja Zəzagəla tanəŋla gəl anjatà la huma anja Masasəɗok, uwana Zəzagəla avə à atà. ³³ Zəzagəla kà asal anu məɗza à ahəŋ la sehseh la abà aw, ama məɗza à ahəŋ la lapiya la abà.

Bokuba uwana adapaka zagəla à azlaməna madiŋal gəl à Zəzagəla à vok gesina, ³⁴ kiya uwaga la maham gay à vok anjul la abà babay. Say azlamis tadza à ahəŋ titi, atà la tetəwi kà mavats gay aw, bokuba uwana tatsetsər à wakità mapəhay anja Zəzagəla à abà: Say tasləkaway pəra. ³⁵ Banja asa à atà matsən tatak anik kà, say tanəvəh à zil anjatà la mtəga, kà uwana uwaga kà, ziruwi kà anja mis anja mavats gay la huma maham à ahəŋ mənə madiŋ gəl à Zəzagəla à vok.

³⁶ Iyay, awma la slaka anjul la uwana gay Zəzagəla asa à uda kagəɗaw takay? Awma kà anjul pəra à gay uwanay kagəɗaw ay? ³⁷ Banja dza adzugw kà masla anja magay masla maz sayda anja Zəzagəla, banjəw adzugw kà, kà adabəza ndzəɗa anja Masasəɗok Zəzagəla, delga, masla asəlay kà uwanay gətsətsər à akul, kà mapəhay anja Sufəl Zəzagəla. ³⁸ Ama banja asəw aw kà, kafaw sləm à masla aya aw.

³⁹ Kiya uwaga azladedə gulo, mawoyəŋ anjul kà aga kà anja maz sayda anja Zəzagəla. Ama kasakawwalla tsəh ala anja mapəh azlagay mələk gə aw. ⁴⁰ Say tatak gesina ada à vok la tetəwi anja, bokuba uwana akəsa vok lela.

* 14:21 14.21 Yesayya 28.11-12

15

Mawul à uda aña Kristu

¹ Azladedda gulo, vaw gi tetövi kà gi aña mawulla à akul ala gay marabəñ uwana à gəl gəzakullan, kakasaw uwaga, madiñal gəl à vok ankul atsiñl kà à uwaga à afik. ² La uwaga la uwana kabələw, baña kakəsawwan bokuba uwana gəzakulan aw kà, madiñal gəl à vok ankul apakay kà tatak deyday pəra.

³ Gay uwana aga la gi lakəl kà, gədapəha à akul à vok à abà suwan. Aganay gay uwana gəpəh à akul dadən: Kristu kà aməts kà, kà à ahəl tsakana gami bokuba uwana tatsetsər à wakitə à abà.* ⁴ Tallə masla, ngaha awul à uda la mamətsay la mahənay maməkər, bokuba uwana tatsetsər à wakitə Zəzagəla à abà aya.* ⁵ Masla apəhla vok à Piyer, ngaha à azlaməna matapla kulo gəl anha səla uwatə bay. ⁶ La lig la ahəñ apəhla vok à azlaməna asik, uwana aduwa dadərmokw zlo. Azlaanik anətə kà atə la ahəñ tsərəh à lakana, ama azlaanik anətə kà tamatsay. ⁷ La lig aña uwaga la ahəñ, apəhla vok à Yakuba, ngaha à azlaməna matapla gesina.

⁸ Ngaha la lig anətə la ahəñ gesina, apəhgəla vok bay, à gi uwana gəga bokuba bəzi mahənay aw gə. ⁹ Aya gəga matsihila gə aña azlaməna matapla anik uwanay gesina. La dziriga kà, gəsla aña magay masla matapla anha aw, kà uwana gi la uwana gətərəbàhà azlaməna matsalah sləm aña Sufəl Zəzagəla à gay gesina. ¹⁰ Ama la vok mahamay aña Zəzagəla adapakagəla, à dza uwana kanəñawwan lagwa, la vok mahamay anha lakəl gulo kà apakə deyday aw. Gəfahà sləray anjuvaw dafuwa à gay aña azlaməna matapla anik gesina, uwaga kà gi gəfahən aw, ama vok mahamay aña Zəzagəla uwana la gi la abà. ¹¹ Adagay gi, adagay atə, anu azlaməna matapla gesina, anu məzə gay marabəñ bokuba uwana gəpəh à akul, kiya uwana kadiñawwalla gəl à vok babay.

Mawul à uda gami la mamətsay

¹² Aganay maz sayda gami uwana məpəhay. Zəzagəla awulla Yesu à uda la mamətsay. Ngaha ma kakay azlaanik ankul tagodəy kà: Azlamazimnekid tadawul à uda aw, tagodə ma? ¹³ Baña mawul à uda la mamətsay la ahəñ aw kà, kitə kà Yesu Kristu babay kà awul à uda zlə ma aw. ¹⁴ Baña Kristu awul à uda aw kà, məpəhay gami babay kà apakə tatak deyday, ngaha madiñal gəl à vok ankul babay kà deyday suwan. ¹⁵ Uwana azay aduwa uwaga kà, madəh fida gami à Zəzagəla à vok, à uwana məgodə kà, awulla Kristu à uda la mamətsay. Hadəy, baña azlamazimnekid tawul à uda aw kà, kitə kà awulà à uda suwan zlə ma aw. ¹⁶ Kà uwana baña azlamamətsay tawul à uda aw kà, kitə kà Kristu kà awulà à uda babay aw. ¹⁷ Kà uwana baña Kristu awulla à uda aw kà, madiñal gəl à vok ankul akəs sləray aw, akul azlamazəhla gə la tsakana ankul la abà, tsərəh à lakana. ¹⁸ Tsa kitə kà, azlauwana taməts à madiñal gəl à vok à abà babay kà, tazəhla. ¹⁹ Baña manewəñ gami kà lakəl aña Yesu, kà aña sifa uwanay anu la abà lakana kà, kitə kà, anu la uwana vok ahamə azladza anik uwanay gesina, kà anu.

²⁰ La dziriga kà, Kristu awulà à uda la mamətsay, kà uwaga à uwana azladza gesina tadawul à uda. ²¹ Kiya uwaga à uwana mamətsay asə à wanj à gudəñ à vok kà dza tekula, kiya uwaga babay mawul à uda la ahəñ kà dza tekula aya suwan. ²² Azladza gesina tamatsay, kà uwana anu tekula la Adama. Gesina anətə tadawul à uda kà maham gay à vok anətə la Yesu suwan. ²³ Ama kəla mana beymi la tetövi anha: Kristu la uwana aga matera aña mawul à uda. La mok uwana adəsa à wanj, azlaməna madiñal gəl à vok gesina tadawul à uda. ²⁴ Kiya uwaga kà, makəd gəl à ahəñ adəsa à wanj: Kristu adəkalah azlandəfə ala la maslay gesina, ngaha la azlamaslay aña azlaməna məzam aña Zəzagəla gesina bay. Ngaha adəvə makoray à ahəl aña Zəzagəla Baba, ²⁵ kà uwana leri Kristu adəkoray kà say baña Zəzagəla adəbək azlaməna məzam à tsəh anha dən.* ²⁶ Masla məzam makəd gəl à ahəñ, kà uwana Zəzagəla adəkalah à ahəñ, kà uwaga kà mamətsay. ²⁷ Kà uwana tatsetsər à wakitə Zəzagəla à abà, tagodə kà: 'Zəzagəla abək tatak gesina à tsəh asik, kà maf asik à afik anha.*

Baња tagodə kiya uwanay kà, ndzer kà, Zəzagəla kà aga la tsəh aña Kona anha aw, kà uwana masla la uwana abək azladza à tsəh asik aña Kristu. ²⁸ Baña Kona aña Zəzagəla adagay masla makoray à azlatatak gesina kà, masla aga la tsəh aña Baba anha, uwana afəl tatak gesina à ahəl, kiya uwaga kà Zəzagəla Baba adəkoray tatak gesina

²⁹ Dzuğwaw lakəl aña azlagay anik tsi. Azladza anik la ahəñ la maham à ahəñ ankul la abà, uwana tadəhà à atə batem kà aña azlamazimnekid uwana tamatsay tsi. La dziriga, baña azlamazimnekid tadawul à uda aw, ma mana madəh batem uwaga akəs vok ma? ³⁰ Anu ma, kà mana məda à huma à gay koksikoksi la ahəl aña mamətsay zlə ma? ³¹ Azladedda gulo, gəzləb akul kà, kà uwana akul la ahəl aña Sufəl gami Yesu

* 15:3 15.3 Yesayya 53.5-12 * 15:4 15.4 Mahabay 16.8-10 * 15:25 15.25 Mahabay 110.1 * 15:27 15.27

Kristu, ama gi kà, kèla mavakay gesina kà, gi la kuda mamòtsay. ³² La gudəŋ Efesus kà, gəpà slagəla mənŋa bokuba map slagəla la azlatatak fəta makəsafərga. Agayŋa gəgay la manewəŋ aŋa mawul à uda aw kà, naka uwaga akəs gi vok aw, haɗay! Baŋa azlamazimnekid' tadàwul à uda aw kà, ŋuləm mənəfa tetəvi uwanay:

'Məzùw, mèsà kà uwana lebəŋ kà mamòtsay atsa à waŋ.'³³
Gay la gay la abà agod.

³³ Kapapataw gəl ankul aw, mədza à ahəŋ la dza mawisiga awis madz à ahəŋ delga ankul ala. ³⁴ Wùlāw à waŋ à dziriga à abà bokuba uwana Zəzagəla ayahay, ŋgaha sàkàw à madfah tsakana, gəpəh uwaga kà ziruwi aŋa makəs akul, uwana gəpəh uwanay kà, azladza anik la ahəŋ la tatak ankul la abà tasəl Zəzagəla aw.

Vok aŋa azlauwana tawul à uda la mamòtsay

³⁵ Zlahaw dza anavay: 'Kakay azlamamatsay tadàwul à uda ma? Vok ma uwala tadàkoray la?' ³⁶ Kayyà, kak la hanjəli aw! Baŋa kaslək fofulo, ŋgaha fofulo uwatà amòtsay dadəŋ, la uwana à uwana atsa à uda. ³⁷ Fofulo uwana kasləkay adagay hi, adagay uwala beyli, kasləka kà fofulo gə pəra, awkà kasləka kà mas à uda gə aw. ³⁸ ŋgaha Zəzagəla atsalla à uda, av tsəhay à fofulo gesina tsəhay bokuba uwana asal. Kəla fofulo gesina abəza tsəhay vok aŋa.

³⁹ Sləb vok aŋa azlatatak uwana la sifa kà gərgəgər. Vok aŋa azladza kà gərgər la vok aŋa azlatatak fəta, ŋgaha babay vok aŋa azlatatak mahoyay kà gərgər la vok aŋa azlatatak fəta, ŋgaha babay vok aŋa azlatatak mahoyay kà gərgər la aŋa azlakilfi.

⁴⁰ Azlatatak uwana la zagəla la afik la azlauwana la wəfah babay la ahəŋ. Mazləbay aŋa azlatatak uwana la zagəla kà gərgər la aŋa azlatatak uwana la wəfah babay. ⁴¹ Afats kà la mahəday aŋha kokuɗa gəl aŋha, təla babay la aŋha, ŋgaha azlatsetsilin babay la aŋatà, ama azlamahəday aŋatà kà gərgəgər.

⁴² Kiya uwaga la uwana adapaka vok la azlaməna mawul à uda la mamòtsay. Uwana tala kà azinla, ama uwana awul à uda kà azinla aya aw. ⁴³ Uwana talà kà manjəratata gə ŋgaha mawisiga. La mok uwana adawul à uda kà la ndzəɗa ŋgaha la mahəday kaykay. ⁴⁴ Uwana talà kà vok uwana la sləb vok, ama uwana awul à uda, kà vok aŋa Masasəɗok. Baŋa sləb vok aŋa vok la ahəŋ, vok aŋa Masasəɗok la ahəŋ babay. ⁴⁵ Kà uwana wakitə Zəzagəla agod kà:

'Adama teraŋa, aga la sifa',⁴⁶

ama Adama masəla, uwaga kà Kristu, aga Masasəɗok uwana avà sifa. ⁴⁶ Uwana aŋa Masasəɗok la uwana atsa vok à waŋ aw, ama aŋa vok. La lig la ahəŋ aŋa Masasəɗok asa à waŋ. ⁴⁷ Adama matera kà, agə manjalay gə kà la kiriniŋ aŋa kutso, ama Adama masəla kà, asà à ahəŋ kà la zagəla. ⁴⁸ Azladza aŋa wəfah kà kalkal bokuba Adama, uwana asa à uda la kiriniŋ aŋa kutso la abà. Azladza aŋa zagəla kà, atà kalkal la dza uwana asà à ahəŋ la afik babay suwaŋ. ⁴⁹ Lagwa kà mədebani à vok la dza uwana tanjəl la kutso, kiya uwaga bay mədədebani à vok la dza uwana asà à ahəŋ la zagəla la afik.

⁵⁰ Aganay uwana asa à gi mapəhay azladedə: Tatak uwana tadəhəŋ la sləb vok, ŋgaha la aŋiz taslala vok aŋa mad à makoray aŋa Zəzagəla aw, ŋgaha vok uwana amòtsay babay, aslala vok aŋa madz à ahəŋ la sifa aw.

⁵¹ Gəpəh à akul nasiri anik: Gesina gami mədəmòts à gay aw, ama mədəgohla vok pəra. ⁵² La katskats, la kirim yewdi, à mok uwana mazlazliŋ adətsəŋay, haɗay, la mok uwana adətsəŋay, azlamazimnekid' tadəwal à uda kà aŋa sifa la vok, uwana amòtsay aya aw. ŋgaha anu uwana la sifa bay mədəbədla vok. ⁵³ Bokuba magodəy kà, vok gami mamòtsay gə uwanay, kà adətsokw vok, uwana à abà amòtsay aya aw. ⁵⁴ Baŋa uwaga adapaka vok kiya uwanay kà, gay aŋa masla mapəhal gay ahəl adagəd à afik:

'Mamòtsay la ahəŋ aya aw, takəfasl à mamòtsay adagay, tsewwa.

⁵⁵ Kak mamòtsay aŋala ndzəɗa aŋa uwana la?

Kak mamòtsay aŋala ndzəɗa aŋa matsəh gi aŋak uwana ala?'⁵⁶

⁵⁶ Ndzəɗa aŋa mamòtsay kà la tsakana la abà, ŋgaha ndzəɗa aŋa tsakana kà asa à uda, kà la mapəhay la abà. ⁵⁷ Ama mazləbay aga la Zəzagəla uwana avà à anu maɗuwiŋ la Sufəl gami Yesu Kristu.

⁵⁸ Kiya uwaga zlə, azladedə gay ləw gulo, tsizlləw à ahəŋ lela lela, rəɗ kagodəw aw, fəw gəl à sləray aŋa Sufəl Zəzagəla koksikoksi, kà uwana kasələw kà, mabasiniŋ ankul uwana la Sufəl Zəzagəla la abà kà, adətəɗ à wəfah deyday aw.

16

Matsatsəh sili

kà mazlakla azlaməna madiŋal gəl à vok la Urusalima

¹ Lagwa kà, gəzalanj à gəl gay ŋuv, lakəl aŋa sili uwana mətsatsàh kà aŋa azladedə gami la Urusalima: Bokuba uwana gəpəh à azlaməna manəfay la kutso Galatiya bay. ² Kəla ladu gesina, delga, kà kəla uwabeyuwi aŋkul afa sili à fəta à awtəy bokuba uwana asla. Dahəwwanj à ahəj lela tsərəh à uwana gədà à awtəy. Kiya uwaga kà, mədānəkudə aŋa mahamala gay à vok la kaslā uwatà aya aw. ³ Baŋa gədāda à awtəy gədāsləl azladza aŋkul uwana katsatsamawani atà à Urusalima la wakità la ahəl, kà madla sili uwana kazlakawla atà. ⁴ Baŋa mazlakay aŋkul kà asla kà gi aŋa maday la gəl gulo kà, mədāday anina pəra zlà.

Manewəj aŋa Pol

⁵ Kà mabəz à slaka aŋkul kà, gədzugw maguway la Makeduniya dadəj, kà manəj azladedə anik à gay la abata. ⁶ Zlahaw gədādzan à ahəj la slaka aŋkul ŋodəgi la təla awkusa gesina, kiya uwaga kà, kadāztrakaw gi la tatak uwana gənəkudə aŋha gesina, asa à gi maday. ⁷ Gi kà, asa à gi aŋa madz à ahəj la slaka aŋkul, awkà asa à gi aŋa manəj akul la tetəyi la ama pəra aw. Gədzugw madz à ahəj la tataka aŋkul la abà, à baŋa asa à Zəzagəla.

⁸ Kəla kà, asa à gi madz à ahəj la abanay la Efesus tsərəh à mavakay aŋa Pentakosta, ✧ ⁹ kà uwana la abanay kà, gəbəzà maslay kà madfəh sləray uwana akəs vok. Bə amiyaka azlaməna məzam la ahəj aŋuwaw babay.

¹⁰ Baŋa Timotawus adāda à awtəy kà, kəsəw masla la ahəl səla, kà masla aŋa madz à ahəj la tataka aŋkul la abà kokudə guba. Kà uwana masla babay masla sləray aŋa Sufəl Zəzagəla bokuba gi. ¹¹ Kamkam, dza apəsew aw, zlakəw tsərəh à uwana adəv mauguzahay aŋha à gay gesina, ŋgaha kà masla aŋa mawul à wanj à slaka gulo la marabay. Gi, la azladedə la abanay kà, məkud mas à wanj aŋha.

¹² Ama kà aŋa deda gami Apolos kà, gədādzərədəŋla kaykay, kà masla la azladedə anik aŋa mad à awtəy à slaka aŋkul, ama asəl mad à awtəy lagonay aw, say la huma à gay ŋuv, à baŋa adəbəza kaslā.

Ayyi aŋa makəd gəl à gay

¹³ Kadzewhal aw, dzəw à ahəj la adi lela la madiŋal gəl à vok la abà. Gəw mabəlafə la ndzəfə. ¹⁴ Uwana kadəhawwanj gesina kadəhawwanj kà la masal.

¹⁵ Azladedə kasəlaw Estefanas la huɸ gəy aŋha. Atà kà azlaməna madiŋal gəl à vok teraŋa la kutso Akayya. ŋgaha atà tadəh sləray aŋa Sufəl Zəzagəla la ləv tekula, kà mazlak azlaməna madiŋal gəl à vok. ¹⁶ Kamkam azladedə, gədəv akul kudə, kà akul aŋa makəs azlaməna sləray uwaga la ahəl səla. Atà la azladza uwana tadəh sləray atà nna kaslakawaw atà.

¹⁷ Gi la marabay mənŋa kà mas à wanj aŋa Estefanas la Fortunatus, ŋgaha Akayyikus à slaka gulo. Baŋa gədanəj atà, kà bokuba akul gesina aŋkul la slaka gulo. ¹⁸ Atà tadukwəj ləv à ahəj, bokuba uwana tadukwəkullanj à ahəj babay. Kəsəw tsəhay dza uwaga la ahəl səla.

¹⁹ Azlaməna madiŋal gəl à vok la makoray aŋa Asəya gesina 'Ayyi', tagod à akul. Akilas la Pərəskila, la maham à ahəj mənə gay Zəzagəla, uwana tahaməh gay à vok atà nna tadəhakulla 'Ayyi', la sləm aŋa Sufəl gami Yesu. ²⁰ Azladedə uwana la abanay gesina tadəhakulla 'Ayyi'.

Dahəhəw vok 'Ayyi', kà akul à akul gesina la mənŋa mənŋa, ŋgaha la ahəl səla.

²¹ Aganay uwana gətseteray la ahəl gulo à gi Pol, 'Ayyi', gəgod à akul.

²² Baŋa dza awoya Sufəl Yesu aw kà, matsafla gə!

Marana tha, (Asal magodəy: Sufəl gami: Sà à wanj!) ²³ Sufəl Yesu Kristu avà à akul vok mahamay aŋha.

²⁴ Mawoy akul gulo gesina agay koksikoksi la akul, akul uwana la Yesu Kristu la abà.

MASƏLA AŇA WAKITÀ UWANA POL ATSETSÈR À AZLA KORINTIYA Deuxième Lettre de Paul aux Corinthiens

Ayyi

¹ Gi Pol uwana Zəzagəla akəsàni gi, kà gi aña magay masləlay aña Yesu Kristu kà, gi la uwana gətseter wakità uwanay la ahàl gulo, anu la deda gami Timotawus, à akul məna gay Zəzagəla uwana la Korintiya, ɲgaha à azlaməna masla madiɲal gəl à vok anik anik gesina, uwana la kutso Akayya la abà. ² Zəzagəla Baba gami, atà la Sufəl gami Yesu Kristu tapis akul gay à vok la mav à akul lapiya.

Zəzagəla adzərəðf anu ala

³ Kikay à Zəzagəla Baba, la Yesu Kristu, Sufəl gami. Masla Baba aña vok mahamay, masla madzərəðfah azladza ala koksikoksi la mataslaha atà ləv ala. ⁴ Amiyaka mədàgay la ɲgərpa mənɲa la abà kà, masla kà adzərəðfahanula koksikoksi. Kà uwaga à uwana məslala vok aña madzərəðfah azladza anik uwana ala, atà la azlanɲərpa anik anik la abà suwan, mətaslatala bokuba uwana anu məbəzəl la slaka Zəzagəla. ⁵ Aganay uwana gəpəh à akul: Kristu kà asà ɲgərpa kà mənɲa, kiya uwaga anu babay kà, məsa ɲgərpa mənɲa. La kità kà, Zəzagəla adzərəðfahanula kaykay, kà uwana anu la maham gay à vok la Kristu la abà. ⁶ Baña məsa ɲgərpa kà, kà akul aña madzərəðfah ala, ɲgaha Zəzagəla aña mabəl akul. Baña Zəzagəla adavà à anu mawad vok à uda kà, kà akul aña madzərəðfah vok ala, kà akul aña mabas tsəhay ɲgərpa uwanay məsay. ⁷ Məsəl ndzer kà, akul la maday kokudə maruw vok à ahən la tetəvi aña Zəzagəla la tsəh, ɲgaha mədahama à ɲgərpa à abà anina la slaka tekula, ama bə la uwaga bay kà, Zəzagəla adzərəðfah akul ala bokuba anu suwan.

⁸ Azladedə, la kità bay kà, asa à anu kasəlaw lakəl aña tsəhay ɲgərpa, uwana məsà la kutso Asəya la abà. ɲgərpa uwatà kà, azà à anu haday, kà uwaga aga kà bokuba mən dzəgla la kuda gami, ndzer, uwatà kà mədzugw kà mətəfay la abà aw. ⁹ La abatà mədzugw la ləv gami la tsəh kà mavakay gami adadəv à gay la abanay lakana, məgəðf. Ama uwaga atəp à anu kà, kà anu aña maf mədzugway gami à gəl gami à afik aw, ama kà anu aña maf mədzugway gami kà à Zəzagəla uwana à afik, masla mawulla azladza à uda la mamətsay. ¹⁰ Kà uwana masla la uwana apəlla à anu ala la zlamtsa aña mamətsay zlazladəga la abà, ɲgaha bay kà, masla la uwana adəpəlla anu ala aya gotənan. Ndzer, à masla la uwana adəpəlla anu ala. ¹¹ Akul kà, kadəztrakaw anu kiya uwaga, kà azladza aɲuwaw tadəv kudə kà anu, kiya uwaga kà, la mok uwana Zəzagəla adatsən madəv kudə uwaga kà: 'Kikay', azladza aɲuwaw, tadəgodal, kà vok mahamay aña uwana avà à azladza aɲuwaw.

Pol abəðla mədzugway aña

¹² Mədzugway aña ləv gami az sayda lakəl aña madz à ahən gami la gudən uwanay la vok, agay la ləv tekula la maduwal Yesu, ɲgaha ma baməraaka la tatakə aɲkul la abà zlə ma ay? La dziriga, uwana akəs Zəzagəla à gəl kà, mənəfa masləlay aña dza aw, say vok mahamay aña Zəzagəla uwana azlaka anu. ¹³⁻¹⁴ La haday gə, kà tatak mahadən à ahən gə la ahən la matsetseray gami la abà aw, uwaga bokuba uwana kadzenəw pəra, amiyaka katsənawwan babay aw kà. Mədzugw kà, la huma la gay kà, kadatsənawwan lela gesina, bə uwana katsənawwan gəl gə gəl gə lagonay babay kà. Ama mok uwana Sufəl gami Yesu Kristu adəsà à wan kà, akul kadəsəlaw tatak gesina, ɲgaha kadərabaw kà anu, bokuba anu uwana mədərabay kà akul.

¹⁵⁻¹⁶ Haday la terəna kà, gəyàh mad à awtəy à slaka aɲkul dadən, ɲgaha kà gi aña mad à Makeduniya. Mok uwana gədətsizlla ala la Makeduniya, naka gəwul à slaka aɲkul, kà aɲkul aña mazlak gi la mauguzahay gulo la abà, baməraaka la mana beymi gesina, kà maday à kutso Yahudiya. Kiya uwaga kà, naka asik səla gəpis à slaka aɲkul, la abatà kà naka gəzlake akul kà masəla. Ama gəbəzà à awtəy aw. ¹⁷ Mok uwana gədzugw uwaga, ma gədzugw ma la hanjəli gulo aw takay? Awma la paɲaw deyday, bokuba aña azladza gudən à vok pəra takay? Awma 'Iyay', gəgod tsa 'Awan', tatak? ¹⁸ Ndzer kà, Zəzagəla kà, masla masəlay, masla dziriga. Uwana gəpəh à akul kà, 'Iyay' la baɲaw la 'Awan', gəpəh tatak la paɲaw səla kəla ay. ¹⁹ Yesu Kristu Kona aña Zəzagəla uwana məpəhakulla, Silas, Timotawus ɲgaha gi babay kà, 'Iyay', məgod, baɲaw 'Awan', aw, məgod aw, say 'Iyay' pəra. ²⁰ Haday gə kà, masla aga 'Iyay', à Yesu uwana agəðf à map à ahən aña Zəzagəla

à afik gesina. Tsa kità kà, la Yesu Kristu la uwana, 'Amen' mægoday, kà anu aña mazlëb Zëzagëla. ²¹ Zëzagëla la gël anha la uwana adzërëd'fahànula la tetëvi aña Yesu Kristu la tsëh, ngaha adzërëd'fahakulla babay, masla la gël anha la uwana atsatsàmàni anu, abëk anu à fëta à awtày, ²² kà anu magay azlaanha. Dadàn kà, avà à anu Masasëd'ok anha kà anu masëlay kà masla adavà à anu azlatatak anik anik gesina à uwana afà à ahøj, kà masla aña mav à anu.

²³ Baña fida la uwana gëdfehøj kà, Zëzagëla la uwana masla masëlay, ad'aha à gi seriya à gël, à baña fida gëpëhay. Kà mana à uwana gëdada à awtày à Korintiya aw mi, kagoday takay? Kà uwana agayña gëdada à awtày kà, naka gëbasakullan aw. ²⁴ Kà uwana asa à anu aña maf leri à madinjal gël à vok ankul à gël aw, ndzer katsizlaw kà à madinjal gël à vok à afik had'ay. Ama asa à anu mäd'fah slëray anina kà akul aña mabëz namnam la lëv ankul la tsëh.

2

¹ Kà uwaga à uwana gëyàh kà mad à awtày à slaka ankul, kà matazakulla iyaw tugwi à adi aya aw. ² Baña gëdatazakulla iyaw tugwi à adi kà, gi babay kà iyaw tugwi adataz à gi à adi suwan, kiya uwaga kà, dza la ahøj adadzërëd'gëla aya aw, kà uwana akul gesina akul la iyaw tugwi la adi. ³ Kà uwaga à uwana gëtsetser à akul bokuba uwana gëd'fahàn. Uwana asa à gi mad à awtày à slaka ankul la kaslã uwatà, awkà naka iyaw tugwi ataz à gi à adi kà akul. Tsa naka akul la uwana karabaw gi, la dziriga, uwana gëfã madzugway gulo à afik gesina, kà uwana gësöl kà baña gi la marabay la abà kà, akul gesina babay kà akul la marabay la abà. ⁴ Iyay, wakità gulo uwatà kà, gëtsetser kà la iyaw tugwi la adi møjga, la matërëb'ay møjga, lëv aza à gi kaykay. Ama gëtsetser kà, kà matazakulla iyaw tugwi à adi aw. Këla kà, kà akul aña masëlay kà gëwoya akul kaykay.

Mamatsin' à masla mad'fah mawisiga ala

⁵ Baña dza abëk mazaw la gël à azladza kà, abëk mazaw la gël kà à gi aw, ama à akul gesina, awma az à azladza anik anik la tataka ankul la abà. Ama asa à gi aña mapëh uwaga møjga aw. ⁶ Gay møjga ankul, tad'fahalla seriya à gël kiya uwaga kà diga adagay. ⁷ Lagonay kà, say kamatsawwalla kà taslawla gay à ahøj kà lëv aña mavalal à gay aw, kà masak tetëvi la tsëh aw. ⁸ Kà uwaga à uwana, kamkam gëgod' à akul kà: Pëhãwwalla mawoy vok ankul! ⁹ Uwana gëtsetser à akul kà, kà akul aña masël dziriga anha, kà gi aña masëlay à baña kakësaw gay gulo aña tetuwa. ¹⁰ Baña akul kadamatsawwan à zil uwaga ala kà, gi babay gëdãmatsalan ala suwan, -à baña gi la gay aña mamatsin' ala- la dziriga, gëmatsallan ala la dziriga, kà madegolay akul, uwana la huma aña Sufël Yesu Kristu. ¹¹ Kà seteni aña makëd'as anu aw, kà uwana mësöl kà, la azladabaray anik anik gesina.

Pol apëh gay lakël aña madz à ahøj anha la Tërowas

¹² Gëtsizlla ala la abatà kà mad à Tërowas, kà maz gay marabøj lakël aña Yesu Kristu. Mok uwana gëbëzà à abatà kà, gënjøj kà Sufël Yesu adad'fahøj tetëvi à ahøj, kà maz gay marabøj. ¹³ Ama la abatà kà, gëdzà à ahøj la titi aw, kà uwana gëbëzà Titus la abatà aw. Kà uwaga à uwana: 'Mad anjulo', gëgöd' à azlamëna madinjal gël à vok la abatà, ngaha gëhäd à kutso Makeduniya.

Mad'uwijn la Yesu Kristu

¹⁴ Kiya uwaga mazlëbay agay la Sufël Zëzagëla, kà uwana masla adàla anu à maday aña mad'uwijn anha à abà, ngaha kikay kà maham gay à vok gami la Kristu la abà, kà uwaga abëk anu à slëray anha à abà, kà anu aña mapähla gay lakël aña Kristu ala, la azlaskala gesina. Masëlay anha adahën gudøj à vok ala bokuba tatak uwana slaslërra azinay. ¹⁵ Mëdagay bokuba tatak mazinay gä uwana slaslërra, Kristu adakëd' à Zëzagëla. Slaslërra aday à slaka azladza la tetëvi aña mabëlay la tsëh, azladza uwana atà la tetëvi aña mazilla la tsëh gesina. ¹⁶ Kà aña azladza uwana Zëzagëla adabël atà kà, slaslërra uwaga kà delga, tabëzà sifa uwana adëv à gay aw la abà. Ama kà aña azladza uwana tazähla kà, slaslërra uwaga kà delga aw, atsa à atà ala kà mamëtsay à wan. Lagwa ma uwa à uwana asla kà aña slëray uwaga uwa? ¹⁷ Azladza anjuvaw tanëzëz gay Zëzagëla kà bokuba tatak matsakalay, uwana tabëza riba la abà, ama anu kà kiya uwaga aw. Kà uwana Zëzagëla la uwana aslël anu aña mapëhay kà la lëv tekula la huma anha, kà uwana anu mëdahama gay à vok la Kristu la abà.

3

Makës vok slawda mawga

¹ Lagwa ma mēdzēka mazlēb gəl gami takay? Awma mēnēkufa bokuba azladza anik uwana tapōhakulla wakitā aṅa sayda, uwana apōhla dza ala ay, awma mēbēz tsōhay gā uwaga la slaka aṅkul dadāṅ takay? ² Akul la gəl aṅkul la uwana kadapakaw azlawakitā sayda gami, uwana matsetseray gā la lōv gami la tsōh, ṅgaha kà azladza gesina aṅa masel madz à ahēṅ gami gesina la Sufəl la abà. ³ Iyay, uwaga kà adzad' ala kà, akul la uwana akul azlawakitā gami, uwana Kristu atsetsēr à lōv gami à tsōh, ṅgaha aslōlla anu. Atsetsēr uwaga la tatak matsetseray aw, ama la Masasēdok aṅa Zēzagēla uwana la sifa. Atsetsēr uwaga à akur kēsatsats gā à adi aw, ama à lōv aṅa azladza à tsōh.*

⁴ Mēpēh uwaga kà, kà uwana mēgōdāṅ à afik la huma Zēzagēla kà madegolay Yesu Kristu. ⁵ Haday, kà anu la gəl gami kà, mēsla kà madāh slēray uwanay aw, kà uwana maslay gami gesina kà, atsà à waṅ kà la slaka Zēzagēla. ⁶ Kà uwana masla la uwana avà à anu maslay kà mapōhla ala makēs vok slawda mawga aṅha ala la slaka gesina. Uwaga agōd' kà à mapōhay uwana à afik tatsetsēr aw, ama à Masasēdok aṅha à afik, kà uwana mapōhay uwana tatsetsēr kà adāla dza kà à mamōtsay, ama Masasēdok kà adala dza à sifa à abà.

⁷ Uwarà kà, tatsetserāh mapōhay kà à akur kēsatsats gā à adi, la mok uwana adāhāhāṅ uwaga kà, azladza tanaṅā mazlēbay aṅha kà, uđaka aṅha à uwana audā huđ adi aṅa Musa ala, kà uđaka uwatā kà, azla Isērayel taslāla vok aṅa manērēz huđ adi aṅha aw, kà uwana aṅrēzāl atā à adi. Tekeđika kà, uđaka uwatā asāf aw. Mapōhay kà adāla azladza kà à mamōtsay à abà. Baṅa mapōhay uwaga adāla azladza à mamōtsay à abà, apōhla à mazlēbay mēṅṅa aṅa Zēzagēla kà à azladza ala, à mok uwana adapōhla vok ala.* ⁸ Adamēraka slēray aṅa Masasēdok, uwana adala dza à sifa à abà takay, masla adāpōlla mazlēbay uwana ala adūwa uwanay gesina. ⁹ Mapōhay kà, asal kà Zēzagēla akēs azladza la seriya. Tsa baṅa tatak uwaga adāla anu à seriya, la uwana apōhanula mazlēbay aṅa Zēzagēla, ma adamēraka makēs vok slawda mawga, uwana agēṅ anu dziriga la huma aṅa Zēzagēla ay, apōhanula mazlēbay aṅa Zēzagēla, uwana adūwa uwana gesina aw takay? ¹⁰ Mazlēbay aṅa mapōhay maviya gā kà ndzōda aṅha la ahēṅ aya aw, kà uwana mazlēbay aṅa mapōhay mawga adapōhla vok ala, uwana adūwa aṅa maviyaga. ¹¹ La dziriga kà, makēs vok slawda maviyaga kà, Zēzagēla avà kà aṅa kaslā ṅuv pēra, à uwana apōhla mazlēbay aṅha ala. Tsa baṅa kiya uwaga zlā ma, makēs vok slawda mawga, uwana adza à ahēṅ aṅa koksikoksi ma adūwaṅ aw ay?

¹² Mēpōhay la dazuwaya la huma azladza gesina, kà uwana mēfa manewēṅ gami à azlatatak uwanay à afik kà, uwaga kà dziriga. ¹³ Anu kà mōdehēṅ bokuba aṅa Musa, uwana ahadā huđ adi aṅha à ahēṅ la gabaga, kà azla Isērayel aṅa manēṅ madōv à gay aṅa mawutsēday la huđ adi aṅha aw. ¹⁴ Bā haṅkēli aṅatā kà aslāla vok kà matsēnēṅ aw. Baṅa tadzēṅ gay aṅa makēs vok slawda maviyaga kà, gabaga uwatā atsāk atā à ama tsērāh à lakana. Uwaga kà, adōv à gay aw, say baṅa tagōla vok à slaka Kristu. ¹⁵ Bā tsērāh à lakana babay, bamēraka mbaw, uwana tadzēṅ mapōhay aṅa Musa kà, tatsēnēṅ aw, kiya gabaga uwatā adzakāhā atā à haṅkēli aṅatā à ama. ¹⁶ Ama bamēraka mbaw, baṅa dza apōh gay la lōv ala, atsà à waṅ à slaka Sufəl kà, gabaga uwaga adōv à gay la adi aṅha.* ¹⁷ Kà uwana kà Sufəl Kristu, kà atā tekula la slaka gā, la kēsaw tekula la abà, la Masasēdok Zēzagēla. La slaka uwana Masasēdok aṅa Sufəl la ahēṅ kà, azladza uwana la abatā kà, atā la makor gəl la abà, awkà azlamayā aya aw. ¹⁸ Haday, anu gesina uwana mēdiṅ gəl à masla à vok kà, mōwad gabaga uwaga à adi aw. Mēnēṅ mazlēbay aṅa Sufəl Yesu, ṅgaha mazlēbay uwaga abōdla anu koksikoksi tsērāh à uwana mēgay bokuba masla. Sufəl la uwana adāh slēray uwanay la Masasēdok aṅha tsikaslaga.

4

Anu kà anu azlagubgub, ama Zēzagēla kà, masla ndzōda

¹ Kà uwaga kà mēy vok aw, kà uwana la dziriga aṅa vok mahamay aṅha, la uwana avà anu slēray uwanay. ² Mōdakweska slēray à gəl la ziruwi gā gesina; mōdāh slēray la đēmđem, mōgola gay Zēzagēla babay aw. Ama mēpōhla godega aṅa dziriga aṅha ala, kà kēla uwabeyuwi uwana av lōv aṅha à Zēzagēla kà, adāgōd' anu à afik. ³ Azladza anik kà, tatsēnā gay marabēṅ uwanay mēzātāṅ aw. Kiya gabaga atsakā atā à yewdi à ama. Sōlāw kà, uwaga kà, kà aṅa azlauwana la tetōvi aṅa mazila la tsōh. ⁴ Atā kà, seteni sufəl aṅa gudēṅ à vok uwanay, adagulēfāh atā ala la madzugway aṅatā la abà, ṅgaha kà atā aṅa makēs uđaka uwana audāy lakəl aṅatā aw. Uđaka uwaga kà, apōhla kà mazlēbay aṅa Kristu ala. La Kristu la abà kà, Zēzagēla apōhla vok ala. ⁵ Mēpōhay kà gay aṅa aslasl gəl gami aw, say gay aṅa Yesu Kristu. Masla la uwana Sufəl, anu kà, anu

kà azlaməna madāhal à akul sləray, kà madegolay Yesu Kristu. ⁶ Mok uwana Zəzagəla adāhà gudəñ à vok kà, agòd' kà: "Udfaka apaka vok, aza mələs ala." Bə Zəzagəla gə la uwaga, asək udfaka anjha anja maudəy la ləv gami la tsəh bay. Udfaka uwaga apəhanula mazləbay anja Zəzagəla la huđ adi anja Yesu Kristu.

⁷ Anu kà bokuba anu azlaməsik abisl deydayga pəra, ama tatak dzəba anjha səla aw gə uwaga kà, aga la anu la abà. Uwaga apəhla ala kà maslay mənğa, uwaga atsa à wan kà la slaka anjha, awkà la slaka gami aw. ⁸ Məs nğərpa anik anik, ama tađuw anu aw, gəl akəđ anu à vok, ama məbas ləv. ⁹ Azladza tatəərb anu, ama Zəzagəla asakənula à ahəl la tsəh ala aw, tasəpərah anu la vədah, ama takəđanula aw. ¹⁰ Koksikoksi kà mokfak anja mamətsay anja Yesu uwana aməts kà, aga la anu la vok, nğaha sifa anjha anja mapəhla vok ala la anu la abà la dziriga. ¹¹ La madz à ahəñ gami la abà gesina kà, anu la zlamtsa anja mamətsay aga anu la vok, kà uwana mənəfa Yesu. Vok gami kà guđguđ, ama məmətsay dadəñ aw, nğaha uwaga la uwana apəhla à azladza ala kà, Yesu la ahəñ la sifa. ¹² Uwaga asal magođay kà mamətsay anja Yesu adāhà sləray la anu la abà, ama sifa anjha adāh sləray la akul la abà.

¹³ Tatsetsər à wakità Zəzagəla à abà, agòd' kà:

'Gəđin gəl à Sufəl Zəzagəla à vok, kà uwaga à uwana gəpəh gay marabəñ!'^{*}

Məđin gəl à Zəzagəla à vok babay kà, kitə anu babay kà maz gay marabəñ. ¹⁴ Məsəl kà Zəzagəla awulla Sufəl Yesu Kristu à uda la mamətsay, adəwulla anu à uda babay, kà uwana mədagay tekula la Yesu. Masla la uwana adəpəhla anu ala la huma anja Zəzagəla la gəl anjha. ¹⁵ Uwaga gesina kà adapaka vok kà anjkul, nğaha vok mahamay anja Zəzagəla anja məbəz à slaka azladza gesina, nğaha kà matugway anja azladza anja mazala vok à gəl kaykay. Kiya uwaga à uwana, azlauwana 'Kikay', tagođay à Zəzagəla, tasləkaw masla anja maziğəñay.

Madza à ahəñ la madiñal gəl à vok la abà

¹⁶ Kà uwaga à uwana madzugway gami aruw vok à ahəñ aw. Məsəl kà vok gami kà agogolay la njuv njuv, ama sifa uwana Zəzagəla avà à anu kà, aday kəla mavakay la anu la abà. ¹⁷ La dziriga kà, nğərpa uwana lagonay kà, adədəv à gay vərđi anik, uwanay kà anja disa pəra. La lig anja azlanğərpa uwaga la ahəñ kà, adədəh anu à mazləbay mənğa uwana à ahəñ, uwana adədəv à gay aw kà madegolay azlanğərpa uwanay. Mazləbay uwaga kà, aduwa tatak gesina. Banja mədzugway lakəl anja mazləbay uwatà kà, nğərpa kà bokuba tatak deyday la gay yewđi gami. ¹⁸ Məfa madzugway gami à azlatatak anja vədah uwanay à gəl aw, azlatatak uwana mənəñà atà la vədah kà, tadəzda à ahəñ aw, ama azlauwana mənəña atà aw kà, atà la uwana tadəzda à ahəñ anja koksikoksi.

5

¹ Məsəl kà, banja gəy gami anja lakana, uwana vok kutso adəkəl à ahəñ kà, gəy gami anik la ahəñ la zagəla uwana Zəzagəla la gəl anjha la uwana anjəl. Gəy uwatà kà adəzda à ahəñ anja koksikoksi. ² Mok uwana la gudəñ uwanay la vok kà, məbas vok la madzugway la abà, mətuw à gəy gami uwatà à tsəh kà mad à agu la zagəla. ³ Banja mədəbəza vok mawga kà, nğaha masasəđok gami auguzahay kokudə sləb vok aw. ⁴ Mok uwana məzda à ahəñ la vok kutso aləg anu la vok kà mətəərbəy, məbas vok, kà huma à gay asà à anu vok uwanay aw, ama asà à anu, kà avà à anu vok mawga, nğaha kà vok mawga uwaga adugw vok maviyaga à gay. ⁵ Zəzagəla la uwana adāh sləray la anu la abà la gəl anjha kà uwaga anja mapak vok kiya uwanay, avà à anu Masasəđok tsikasłaga anjha kà mapəh à anu à vok à abà kà, adədəh dzəba anjha səla aw anjha uwana apəh à ahəñ.

⁶ Kà uwaga à uwana, anu mərurw vok à ahəñ aw. Məsəl kà mok uwana anu la sləb vok uwanay la abà dadəñ kà, anu kərkər la Sufəl Zəzagəla. ⁷ Məslala vok anja manəñ masla dadəñ aw, ama məda à huma à gay kà la madiñal gəl à vok. ⁸ Ama mədahanla la məbəlafa, nğaha asa à anu masak sləb vok uwanay à ahəñ, kà mad à madz à ahəñ nekwa la Zəzagəla. ⁹ Ama terəña dadəñ kà, asà à anu kà məkəsəl à gəl, amiyaka mədəgəy la abanay amiyaka mədəgəy la slaka anjha. ¹⁰ Kà uwana uwaga kà leri gami, kà anu anja magay la huma anja Kristu, kà madāhla à anu seriya à gəl, kà kəla uwabeyuwi anja məbəz humà masik anjha, lakəl anja uwana adāhəñ gesina, adagay mawisiga, adagay delga, à mok uwana agə la vok uwanay la abà.

Kristu la uwana asəlla anu vok la Zəzagəla

¹¹ Kà uwaga kà, məhoy guba anja Sufəl Zəzagəla, nğaha məyah məbəz azladza à tsəh, la gay dziriga uwanay məzətəñ babay. La paraka kà, Zəzagəla asəl anu, nğaha gədzugw kà, bə akul la madzugway anjkul kà, kasəlaw anu babay. ¹² Asà à anu məzləb gəl gami la

* 4:13 4.13 Mahabay 116.10

huma anjuk aw. Asa à anu kà katsənwaw godega aŋa tatak uwana asa à akul masləkawla anu, ŋgaha kà akul aŋa mawulla à azlauwana tadzidziŋ akul, la tatak uwana la vok tanəŋəŋ la uda gə, awkà uwana la ləv la tsəh aw. ¹³Uwana anu azlakusəŋu, kagodaw kà, kà uwana mədavà vok gami à Zəzagəla. Ama anu azlakusəŋu aw, kà uwana asà à anu mazlak akul pəra. ¹⁴Kristu apəhanula masal aŋha, masal uwaga kà lakəl aŋa sləray gami gesina. La dziriga kà, baŋa dza aməts kà ahəl aŋa azladza gesina kà, ¹⁵gesina aŋatà kà tagahay kà bokuba azlamamatsay gə. Aməts kà, kà aŋatà, kiya uwaga atà takor sifa la gəl aŋatà aya aw. Ama tadza à ahəŋ la sifa kà, kà ahəl aŋha, aməts babay kà aŋatà, awul à uda la mamətsay bay kà aŋatà.

¹⁶Tsa baŋa kiya uwanay kà, məkàsəni dza makasay la manərozay huɖ adi aya zlə ma aw. Uwarà kà, məpakà Kristu ala kà kiya uwaga, ama lagonay kà, mədahəŋ kiya uwatà aya aw. ¹⁷Baŋa dza la Kristu la abà kà, adapakay maŋalay mawga, madəhəŋ maviyaga adada à lig, dəwdəw tatak adapaka mawga. ¹⁸Tatak uwaga gesina kà, atsà à waŋ kà la slaka Zəzagəla, uwana asəlla anu vok la Kristu la abà la masla. Avà à anu sləray à ahəl, kà anu aŋa madla à azladza anik à masəlla atà vok à abà la masla. ¹⁹Bokuba magodəy kà: Zəzagəla asləl Kristu à waŋ, kà masəlla anu à vok, anu azladza gesina, la masla. Atugw tsakana aŋatà aya aw. Afà anu sləray matsidəyga uwanay à ahəl kà maziŋ à azladza.

²⁰Kà uwaga à uwana mədapakah azlaməna masləlay aŋa Kristu. Zəzagəla azəl azladza la magoy la paŋaw gami la awtəy. Kamkam, mədəv akul kuɖa, la sləm aŋa Yesu Kristu: 'Kəsəw makəs vok slawda, uwana Zəzagəla adəhəŋ la akul!' ²¹Kristu kà adəhəŋ tsakana tetuwa aw. Ama Zəzagəla adükwla tsakana gami à gəl gesina, kà anu aŋa mabəz vok mahamay la maham gay à vok la Kristu, la uwana Zəzagəla agəŋ anu azladziriga.

6

Sləray aŋa Pol

¹Iyay, anu kà anu azlaməna madəh sləray la Zəzagəla, lagwa kà məgodɖ à akul kà: 'Kabəzəw vok mahamay aŋa Zəzagəla, ama dāhəw haŋkəli kà uwaga aŋa matəfa kà akul aw.' ²Tatsetsər à wakitə Zəzagəla à abà, agodɖ à tsəhay aŋha kà: 'Mok uwana kaslə adaslay kà, gi aŋa madəh delga à azladza kà, gətsəb à ka sləm, ŋgaha la mok uwana kaslə asla kà, mabəl azladza kà gəzлак à ka.'³ Azladedə, lagonay la uwana kaslə uwana asà à Zəzagəla kà madəha à anu delga, lagonay la uwana asal mabəl azladza.

³Asa à anu kà dza atsəɖ gay à sləray gami à tsəh aw, kà uwaga à uwana mədəh haŋkəli, kà anu aŋa madəɖ gay à madiŋal gəl à vok aŋa dza à ahəŋ aw. ⁴Ama la tatak la abà gesina kà, məpəhla ala, kà anu azlaməna sləray aŋa Zəzagəla. Mədəgay la matərəbəy la abà, mədəgay la mazaw la gəl la abà amiyaka azlaŋgərpə taduw à anu bay kà, məbasin kiya uwaga pəra. ⁵Azladza taslahahanula, tawats anu à danəy, tamaham à anu azladza à gəl. Sləray babay kà aduwa anu, vərđi anik babay kà mədze-hahal aw, məbaza tetəvi kà mazuw tatak may babay aw. ⁶Mapəhla uwaga ala, kà anu azlaməna madəh sləray aŋa Zəzagəla la ləv tekula, məsəl dziriga, anu azlaməna mabasin, anu azlahayhay. La mazlakay aŋa Masasədok tsikaslay kà, məwoy azladza anik la ləv tekula. ⁷La maz sayda dziriga, Zəzagəla avà à anu ndzəda aŋha. Maday lela gami kà bokuba kazlaŋa guvəl, uwana məpalla guvəl la huma azlaməna məzam gami, kà mahəlla à ahəŋ. ⁸Azladza anik tasləkaw anu, ŋgaha azlaanik tapəsew anu babay. Tapəh gay delga lakəl gami, ŋgaha tapəh mawisiga babay aya. Azladza anik tanəroz anu bokuba anu azlaməna fida, baməraka dziriga məpəhay. ⁹Tanəroz anu kà bokuba tasəl anu aw, ama la dziriga kà, tasəl anu. Tanəroz anu bokuba anu azlamazimnekid, ama anu la sifa. Tasləhəhanula, ama taslala vok aŋa makadənula aw. ¹⁰Amiyaka mədəgay la mazaw la gəl la abà məŋga kà, məda à huma à gay la marabay. Məkor tatak məŋga la gudəŋ uwanay la vok aw, ama anjəwaw məpak azladza ala kà azlagorəbu la tetəvi aŋa Zəzagəla la tsəh. Hadəy kà, bokuba məkor tatak aw, ama tatak gesina kà, anu məkoray la huma aŋa Zəzagəla.

¹¹Akul azla Korintiya, məpəh à akul uwanay, kà bə la paraka, tatak la ahəŋ məhadəŋ à ahəŋ la tsəh ləv gami aw. ¹²Anu kà məwoy akul la ləv tekula, ama akul la uwana kawoyaw anu aw. ¹³Gəpəh à akul gay bokuba akul azlabəza gulo: Dāhəwnəŋ bokuba uwana mədahakullanə suwan, pəkəwəw ləv anjuk la paraka.

Məham gay à vok la azladza à uda aw

¹⁴ Azladza, uwana tasel Zəzagəla aw kà, kahamaw à sləray à abà akul nna aw, maham gay à vok uwaga kà akəsa vok aw. Kakay dziriga aham gay à vok la mawisiga ma? Kakay uđaka aham gay à vok la mələs ma? ¹⁵ Kakay azla Kristu la seteni taslala vok aña matsən vok gay la slaka gə ma? Tsa baña kità ma, kakay masla madiŋal gəl à vok, atsən vok gay la dza uwana adiŋal gəl à vok aw ma? ¹⁶ Mana ma à uwana aham gay à mən gəy Zəzagəla, uwana la sifa à vok, la gəy mazlazlay ma? La dziriga kà, anu kà, anu azlamən gəy aña Zəzagəla. Kà uwana Zəzagəla agòđ:

'Gədàdza à ahəŋ la tataka aŋatà la abà, gədàgay la atà, gədàgay Zəzagəla aŋatà, tadàgay azladza gulo.'^{*}

¹⁷ Kà uwaga à uwana Sufəl Zəzagəla agòđ à azladza aŋha:

'Saw à uda la tataka aŋatà la abà, kadzaw à ahəŋ akul la atà nna aw. Katapaw ahàl à tatak àlähga aŋatà, uwana à vok tadəhəŋ aw, kiya uwaga kà, gədəkəs akul.

¹⁸ Gədàpaka Baba aŋkul, akul babay kadàpakaw azlakohana gulo la azladəgam gulo.'^{*} Kiya uwaga à uwana Zəzagəla uwana asla à tatak gesina à vok, agòđ à atà.

7

¹ Azlamanalay gulo, Zəzagəla apəh à anu tatak uwanay à ahəŋ gesina, kà uwaga kà, məgà gəl gami sətaka, məbəđ tatak uwana à uda, adəhànula àläh à vok. Madzugway gami la abà kà say məgay kà azlasətaka aña ndzer, kà uwana məsləkaw Zəzagəla.

Marabay la mazaw la gəl aña Pol

² Wöyàw anu la ləv tekula. Kà uwana mədadəh à mawisiga à dza anik aŋkul à vok aw, mədàtsla matekwid à dza anik aŋkul aw, ŋgaha kà mədapapat tekula aŋkul à bada à abà babay aw. ³ Uwana gəpəh kiya uwaga kà, kà mapuwakulla gudzi à gəl kà makəlakulla ziruwi à gəl, kagodəw aw. Awan, bokuba uwana gəgòđ à akul kà, məwoy akul kà aŋjuvaw. Tatak la ahəŋ avahanula anina aw. Mədàmətsay, mədàgay la sifa kà anu la slaka gə. ⁴ Gənwàw akul manaway aw, gi la marabay mənğa kà akul. Gədasa ŋgərpa mənğa, ama ləv adaval gi à gay aw, bə la uwaga bay kà, gi la marabay mənğa.

⁵ Uwana asa à gi mapəhay kà, amiyaka mok uwana mədabəza à Makeduniya kà, məbəza kaslā kà anu aña maduw ləv aw. Məgagaməh la azlənğərpa anik anik uwana tabəzà anu la azlaslaka gesina. Azladza tadzəh kà magazlay, ŋgaha vok gami bay kà adzà à ahəŋ la huyuk huyuk, guba akəs anu. ⁶ Ama Zəzagəla uwana atasläh gay à azladza uwana à ahəŋ, gəl adəkəđ atà à vok kà atəsl anu ləv à ahəŋ la mas à waŋ aña Titus. ⁷ Mas à waŋ aŋha pəra atəsl anu gay à ahəŋ aw, ama masla la uwana apəh à anu gay madzərəđəhla aŋkul. Masla la uwana apəh à gi kà katəwəw gi à tsəh kà manəŋəŋ gi babay, ŋgaha bay kà kadzikwəw madəhəŋ aŋkul uwana uwarà, kawəđəw vok à uda, kà mazlak gi babay, uwaga la uwana arəb gi kaykay.

⁸ Gəsəl kà, wakitə gulo uwana gətsetsər à akul kà, abək à akul mazaw la gəl la dziriga, naka gədzugway nəma. Ama, dagəđ à uwali gəgəđ aw, kà uwana gəsəl kà gəbək à akul mazaw la gəl la wakitə uwatə, kà aña kaslā ŋuv. ⁹ Ama lagonay kà, gi la marabay la abà, kà uwana gətsetsər à akul wakitə uwaga, gərabay kà, kà uwana gəbək à akul mazaw à gəl aw, gərabay kà, kà uwana katūwəw lakəl aña madəhəŋ mawisiga aŋkul, ŋgaha kà kadapəhaw gay la ləv ala. Mazawla gəl aŋkul kà, apakà kà mawoyəŋ aña Zəzagəla, kà akul aña mapəh gay la ləv ala, kiya uwaga kà wakitə gami adəhakulla mawisiga à vok aw. ¹⁰ Kà uwana baña anu la mazaw la gəl uwana la abà, asà à Zəzagəla kà, mazaw la gəl uwaga kà adàla anu à mapəh gay la ləv ala à abà, kiya uwaga kà Zəzagəla atəfà dza la tsakana uwana la abà adəhəŋ. Tsəhay mazaw la gəl uwaga kà, aza anu aw, ama tsəhay mazaw la gəl aña azladza gudəŋ à vok uwanay kà adala dza à mamətsay la huma yewdi aña Zəzagəla. ¹¹ Nəŋəw uwana Zəzagəla adəhəŋ la mazaw la gəl aŋkul tsi. Nəŋəw məbəđla vok aŋkul tsi, nəŋəw maval vok aŋkul la madzugway aŋkul tsi. Lagonay kà, asa à akul mapəhla ala kà kakwesaw kà mawisiga aŋkul kà, kapakəhəw vok ləv à gəl kà akul à akul. Guba adəkəs akul kà azlatatak uwana adapaka vok lakəl aña uwana naka abəzà akul. Asa à akul manəŋəŋ gi la iyaw tugwi aya, kavəw vok aŋkul kà madəhəŋ uwana asa à Zəzagəla, ŋgaha kadəhəw seriya à mawisiga à gəl, ŋgaha kapəhəwla ala kà kadapallow ahàl aŋkul la mawisiga la abà.

¹² Gətsetser wakitə uwanay kà, kà dza uwana adəhà tsakana, baŋaw kà aña masla madəh tsakana magay aw. Ama gətsetser uwanay kà, kà masləhakulla sləm ala, kà mapəhla masəlay aŋkul ala kà kawəđəw vok à uda la huma Zəzagəla kà aŋami. ¹³ Kà uwaga à uwana madəhəŋ akul adzərəđənula.

Iyay, uwana adzərəđənula kaykay kà uwaga pəra aw. Mərəb kaykay kà la manəŋ Titus, uwana agə la marabay, kà uwana akul gesina kà kadzərəđəwla ləv ala. ¹⁴ Gətsà

zlapay lakəl aŋkul la huma aŋha, akul babay kà kakəlāw à gi ziruwi à gəl aw. Uwana mēpàh à akul gesina kà dziriga. Kiya uwaga tatak uwana gətsàlla zlapay la huma aŋa Titus kà, agà dziriga, apakà vok kiya uwaga. ¹⁵ Mok uwana adà à awtāy à slaka aŋkul kà, kakəsāw masla la ahəl sēla, kasləkàwāw gesina aŋkul, kakəsāw gay aŋha. Baŋa adzugway lakəl aŋa uwaga kà, mawoy akul aŋha kà azalà vok à gəl. ¹⁶ Gi la marabay kà akul kà, kà uwana gənwà akul manaway aw.

8

Mav sili aŋa azlaməna madiŋal gəl à vok la Urusalima

¹ Azladedà, asa à anu mapəhakulla vok mahamay aŋa Zəzagəla uwana apakà vok la slaka azladza la kutso Makeduniya. ² Madiŋal gəl à vok aŋatà kà adzəkà vok kà la matap atà aŋa azlangərpa la afik mənŋa, ama bā la uwaga bay kà, tagà la marabay mənŋa mənŋa, baməraka takor tatak aw babay kà tahamà gay à tatak à vok mənŋa. ³ La dziriga kà, tavà bokuba uwana taslāla vok. Uwana tavà kà, aduwà à vok; kà uwana tavà kà, kà la mawoyəŋ aŋatà. ⁴ Kamkam tagəf à anu, tadəv à anu kuɖa kà atà aŋa mabəz tetəvi aŋa mad maham gay à vok aŋa mazlakay à abà babay kà aŋa azlaməna madiŋ gəl à Zəzagəla à vok, la kutso Yahudiya. ⁵ Tatak uwana tahāmla gay à vok kà, aduwà madzugway gami uwana mədžūgw. Terəŋa dadəŋ kà tavà vok aŋatà à Sufəl Yesu, ŋgaha takəs kà anu aŋa maham gay à vok babay, uwana Zəzagəla ayāh babay. ⁶ Kà uwaga à uwana mədžərəfà Titus ala kà maf sləm à sləray uwaga, adzəkà la tataka aŋkul la abà, lagwa masla adadəv sləray uwaga à gay la tataka aŋkul à sləray dzəbā aŋha sēla aw uwaga. ⁷ Akul kà kagaw azlagorobu la azlatatak gesina la abà, akul la madiŋal gəl à vok, la maslay aŋa azlagay anik anik, la maslay la mawaf vok à uda, ŋgaha la mawoy anu aŋkul. Asa à anu kà, kà kagaw azlagorobu la sləray uwanay la abà babay.

⁸ Gəpəh à akul uwanay kà, bokuba la leri aw, ama la gay mawaf vok à uda aŋa azladza anik, la uwana asa à gi: Magur sətaka aŋa masal aŋkul. ⁹ Kasələw vok mahamay aŋa Sufəl gami Yesu Kristu. Masla kà gorobu, ama akəs magay kuɖa kà akul. Uwana adahà, uwaga apakà gəl aŋha ala, kà masla kuɖa kà, kà akul aŋa magay azlagorobu la madiŋal gəl à vok la abà gesina.

¹⁰ Iyay, uwanay gəpəh à akul kà madzugway aŋa gəl gulo, koksì kà kagaw azlaterəŋa la sləray aŋa sili uwaga la abà, lagonay kà. hənāw sləray gā uwana ala. ¹¹ Dahāwwəŋ la marabay uwana kadzaw kəla, bokuba uwana kawafaw vok à uda la madzəka, kiya uwaga babay kà wafaw vok à uda kà madəvla à gay, vāw bokuba uwana ndzəfā aŋkul aslay. ¹² Baŋa kawafaw vok ala kà aŋa mav tatak à Zəzagəla la marabay kà, Zəzagəla akəs mavāy aŋkul la ahəl sēla, bokuba uwana kakoraw kà mavāy. Ama baŋa tatak la ahəŋ aw kà, Zəzagəla kà asəl.

¹³ Ama asa à gi aŋa magofay kà, kapakahaw azlaməna kuɖa magay aw, ŋgaha azladza aŋa mabəz gəl gəgod aw. Ama asa à gi kà kagaw kalkal gesina. ¹⁴ La kaslā uwanay kà, azlayla vok kazlakaw atà la kuɖa aŋatà la abà. La huma la gay kà, baŋa kadānawkuɖa suwəŋ kà, tadəzlak akul. Kiya uwaga la uwana kadəgaw tekula la slaka gā. ¹⁵ Uwaga kà kalkal la uwana tatsetsər à wakitā à abà:

'Dza uwana ahāmla gay à vok mənŋa kà, aduwà vok aw, ŋgaha dza uwana ahāmla gay à vok ŋuv babay kà aslā.'^o
tatsetsər.

Titus la azlaslagama aŋha

¹⁶ Kikay, məgod à Zəzagəla uwana avà mabəlafā à Titus kà mazlak akul, bokuba uwana mēyāh bay. ¹⁷ Titus akəs manavay gami kà mawulay à slaka aŋkul. Ama kà uwaga pəra aw, kà mawaf vok à uda aŋha à uwana akəs mawulay à slaka aŋkul la gəl aŋha. ¹⁸ Məsləl à awtāy, atà la deda anik à uwana azlaməna madiŋal gəl à vok tasəl gesina, kà uwana az gay marabəŋ la tetəvi aŋha, ¹⁹ kà uwaga pəra uwana məsləl à awtāy aw, ama maham à ahəŋ mənā madiŋal gəl à vok la uwana akəsāni masla, kà masla aŋa mauguzahay anina, la kaslā uwana mədala sili uwanay à Yahudiya. Sləray delga uwaga adəpəhla mazləbay aŋa Sufəl Zəzagəla ala, ŋgaha adəpəhla ala kà məwoya azladza hafay.

²⁰ Hafay kà, sili uwana tavà à anu à ahəl kà mənŋa, say məfal sləm kà azladza aŋa matsəf anu gay à tsəh lakəl aŋha, la madz à ahəŋ gami la abà babay aw. ²¹ Asa à anu madəhəŋ kà uwana delga la huma aŋa Sufəl Zəzagəla, ŋgaha la huma aŋa azladza gesina babay.

²² Məsləl atə deda anik à tsəh aya. Masla kà mədagur mawaf vok à uda anha asik dən, ngaha mənəñən kà masla kà azlaka dza. Lagonay kà, asal mazlak akul aya babay, kà uwana afła kà gəl à ahən la akul. ²³ Titus kà, masla kà manalay gulo la sləray la abà, kà masla anja mazlak akul. Ama azladza anik səla uwanay tanəfa Titus à awtəy kà, maham à ahən mənə gay Zəzagəla la uwana tasləl atə à awtəy, kà uwana banja azladza tanəvəz sləray anjul kà, tazləb Zəzagəla la Yesu Kristu. ²⁴ Pəhəw atə ala mawoy atə anjul la ləv tekula, ngaha maham à ahən mənə gay Zəzagəla tasləl atə à awtəy anja magəfən à afik ndzer, ngaha kà atə anja masəlay kà azlayla anu mats zlapay la akul la afik, kà uwana məpəh dziriga.

9

Zəzagəla awoya dza uwana avəy la ləv tekula.

¹ La madzugway gulo la bə kà, gay la ahən anja matsetser akul lakəl anja mazlakay, uwana tazlakla azlaməna madiñal gəl à vok la kutso Yahudiya aya aw, kà uwana kasəlaw uwaga gesina. ² Gəsəl kà, akul la gəl anjul babay kà, asə à akul mazlak atə. Lakəl anjul la uwana gəts zlapay la huma azlaməna Makeduniya, la magod à atə: Azladeda la gudən uwana la kutso Akayya kà, tadəh vok à ahən kà dagay koksı, kà mazlak azlaməna madiñal gəl à vok la Yahudiya. Mawaf vok à uda anjul uwaga, kà atsənə azladza ala kaykay la tataka anjatə la abə aya. ³ Lagonay bay kà, gəsəl azladeda makər uwaga à awtəy, kà maham gay à tatak à vok, bokuba uwana: ‘Dahəwvəñ’, gəgod à azladza anik, kà atə anja mədəbəza à awtəy kà, kà tatak uwana gətsə zlapay lakəl anha kà adəpaka vok. ⁴ Agaynə azlaməna Makeduniya tanəfa gi à awtəy, ngaha məbəza akul à vok kà kadəfahaw vok à ahən aw kà naka anjdz ahama anu à gəl la huma anjatə, kà uwana məgod kà mənawa akul manaway aw, tadəh vok à ahən, məgod kaykayga, ma kakay adəpaka vok la akul ma? Akul babay kà anjdz adəhama à akul à gəl. ⁵ Gədzugw dziriga kà, azladeda uwaga tatsa vok à awtəy à slaka anjul, kà tatak gesina uwana à ahən tavə la ləv tekula. Ngaha kà, la mok uwana mədəda à awtəy tatak uwaga adəfah vok à ahən lela, kà bə la dziri kà mavəy la ləv tekula anja dza, awkə la leri aw.

⁶ Gəpəhakulla la gay la gay la abə uwanay: Dza uwana asləkay nıv yewdi kà, adətsəday babay kà nıv yewdi, ama dza uwana asləkay mənğa kà, adətsəday mənğa babay. ⁷ Tsa banja kiya uwaga kà, dza avə bokuba uwana ləv anja arab kà mavəy. Vəw la ləv tekula awkə la leri aw, kà uwana Zəzagəla arabay lakəl anja dza, uwana avəy la marabay, ngaha la ləv tekula. ⁸ Zəzagəla la maslay kà mav à akul tatak gesina, kà akul anja mabəz kəla tatak, uwana kanawkuđa anha gesina, ngaha atəm akul à ahəl aya anja madəhla sləray dzəba anha səla aw gə kiya uwanay. ⁹ Uwaga kà bokuba uwana tatsetsər à wakitə Zəzagəla à abə:

‘Dza delga av tatak à azlaməna kuđa la ləv tekula. Mawoy dza anha kà, aga la ahən koksikoksi.’⁹

¹⁰ Zəzagəla la uwana masla mav fofulo à masla masləkay, ngaha la tatak may anja madzadzarla akul. Adavə à akul fofulo gesina uwana kanawkuđa anha, ahənən kà fofulo masigla, ngaha masəl dza anjul anja magay mənğa. ¹¹ Adəpis akul gay à vok la tatak gesina la abə kà masəl dza anjul, ngaha azladza anıvav anja ‘Kikay’, kà magod à Zəzagəla, kà sili uwanay kafəw anu à ahəl, mədala. ¹² Ndzer, mavəy anjul uwanay kà, adəzlaka azladza anıvav la sləray anja Zəzagəla la abə. Ama uwana adıwa uwaga kà, ‘Kikay’, azladza anıvav tadəgod à Zəzagəla. ¹³ Kà uwana mavəy uwanay kà, adəpəhla madz à ahən dziriga anjul ala, kiya uwaga kà, azladza tadəsləkaw Sufəl Zəzagəla, kà uwana kakəsaw mapəhay anja gay marabən anja Yesu Kristu, ngaha tadəsləkaway aya kà masəl dza anjul, uwana katsakaw tatak la slaka gə la azladza gesina. ¹⁴ La mok uwana tadənən vok mahamay anja Zəzagəla adəgay mənğa lakəl anjul kà, tadədəv kuđa kà anjul, ngaha tadəwəy akul mənğa. ¹⁵ Lakəl anja uwanay gesina kà, ‘Kikay’, məgod à Zəzagəla kà mavəy anha, uwana adıwa vok gesina.

10

Gay uwana Pol awulla

à azlaməna matsəf gay à mapəhay anha à tsəh

¹ Gi Pol la uwana asa à gi mapəh à akul gay anja aslasl gəl gulo lagwa, azladza anik kà: ‘Gi tələmna à banja gi la tataka anjatə la abə’, tagod, ama: ‘Gi dzanjdzan’, tagod, ‘A banja gi kərəkər la atə.’ Kamkam gədəv à akul kuđa la sləm anja Yesu Kristu à masla uwana tələmna, ngaha dziriga. ² Kamkam bədfəwla madzugway anjul kadəfaw gi leri à gəl,

kà gi anja madàpòhla à akul ala ndzèdà gulo à baŋa gèdàda à awtày à slaka ankul aw. Kà uwana anjwaw azladza la slaka ankul tagod kà, gèdàh sléray kà bokuba anja dza uwana asèl Zèzagèla aw, tasèl kà, gèsla kà mapèhatàla ndzèdà gulo nòma. ³ La dziri kà, anu kà anu azladza asik nòma pèra, ama mèpay kiya anja azladza asik aw, say la tetèvi anja Zèzagèla la tsèh. ⁴ Kà uwana kazlaŋa guvèl uwana mèpala guvèl kà anja slèb vok aw. Ama kazlaŋa guvèl anja Zèzagèla, uwana la ndzèdà. La masla la uwana mèbazlèhla azlazlagam uwana à ahèŋ, azlamèna mazam anja Zèzagèla tahàdàh vok à abà, ŋgaha la azlamadzugway fidaŋa anja azladza gesina. ⁵ Uwana dza atsalla zlapay lakèl anja matsihila anja Zèzagèla kà, mèdàkwèŋ à ahèŋ gesina, mèdàtsèrkwah azlamadzugway mawisiga anja azladza gesina anja makòs gay anja Kristu. ⁶ Anu kà mèdàdàh vok à ahèŋ kà matsèrkwàh azlauwana takòs gay aw, à baŋa akul kà akul azlamèna makòs dziriga anja Zèzagèla.

⁷ Nèrèzàw dadàŋ tsi. Baŋa dza afa gèl anja à azladza anja Kristu à adi kà, say adzugway lèla kèla zlà, kà uwana anu babay kà, anu azladza anja Kristu. ⁸ Ndzer, kà uwana ziruwì akòs gi aw, gèdats zlapay la Sufèl Yesu Kristu kà, kà uwana masla la uwana avà à gi ndzèdà, kà madla akul à huma à gay la madinjal gèl à vok la abà, awkà kà mazàhakulla aw. ⁹ Ama asa à gi kà kadzugwaw kà gètaw akul la wakità gulo aw, ¹⁰ kà uwana azladza anjwaw tagod kà, wakità anja Pol kà zlazladà ŋgaha dzandzan. Ama baŋa gèl masla la tataka gami la abà kà, arùw vok à ahèŋ, asèl mapèh gay aw. ¹¹ Dza uwana adzugw kiya uwaga kà, aganay à uwana gèpèhal: Tatak gesina uwana gètsetsèr à akul kà, gèdàpèh à akul aya, à mok uwana gèdàgay la tataka ankul la abà.

¹² La dziriga kà, mèslala vok anja magazlèla gèl gami la azlamèna mazigèŋ gèl anjatà, uwana tagur gèl anjatà kà la aslasl gèl anjatà aw, uwana tagur gèl anjatà kà la aslasl gèl anjatà kà azlakusòŋu. ¹³ Ama anu kà, mèts zlapay kiya uwaga aw, anu kà mèdùw makwi uwana Zèzagèla akèdèw à anu à ahèŋ aw. Abèzla anu à slaka ankul la gay marabèŋ anja Yesu Kristu, uwaga la uwana makwi anja sléray gami. ¹⁴ Baŋa kità kà, mèdùwla makwi aw, kà uwana la dziriga mèbèzàwàŋ kà la tetèvi anja gay marabèŋ lakèl anja Yesu Kristu. ¹⁵ Ama anu kà, mèts zlapay lakèl anja azladza anik uwana tadzèkà aw, kà uwana uwaga kà gay gami aw. Ama kèla kà, madzugway gami kà, kadàw à huma à gay la madinjal gèl à Yesu à vok la abà, ŋgaha kà sléray gami, uwana la tataka ankul la abà anja mad à huma à gay, la makwi gami uwana la abà Zèzagèla akèdèw à anu à ahèŋ babay. ¹⁶ Zlahaw la huma la gay kà, mèdàbèza tetèvi kà maz gay marabèŋ à kuto anik, uwana la abà kèrkèr la akul. Uwaga kà mèslala vok anja mats zlapay la slaka uwatà aw, kà uwana slaka uwatà adagay guf anja dza anik.

¹⁷ Ama bokuba uwanay à uwana tatsetsèr à wakità Zèzagèla à abà:
'Baŋa dza asal mats zlapay kà, atsa zlapay kà la azlatatak uwana Sufèl adfahàŋ kèla.'^{*}
¹⁸ Iyay ndzer kà, dza agay masèlay gè la huma anja Sufèl kà, kà uwana Zèzagèla awoyà masla, awkà la mazlèb gèl anja la gèl anja aw.

11

Pol la azlamèna matapla fida gà

¹ Lagwa kà, asa à gi kà basàwngèŋ, kavàw à gi tetèvi gèbàdàma ñw makusòŋu kusòŋu gulo uwatà. La kità kà, kankam basàwngèŋ. ² Maŋor aza à gi lakèl anja akul, azlauwana tavavàr akul bokuba uwana azà à Zèzagèla, kà uwana gèdadà akul mawdà à ahèŋ la Kristu, ŋgaha asa à gi kà kadzaw à ahèŋ la sètaka, kà gi anja mapèhla akul ala, kiya dahalay uwana tavà à zil sètaka. ³ Gi la guba vok la abà, kà uwana gèdugway lakèl ankul, kà dza anja marèhla akul à uda, kà masak à Yesu Kristu la tsèh ala aw. Dzùgwàw lakèl anja uwana bebi asà à waŋ arèhèla Hawwa à uda la dèmdèm anja tsi. ⁴ Baŋa masla matapla fidaŋa anik asà à waŋ à slaka ankul, kà mapèhakulla Yesu anik, gèrgèr la uwana mèzàkulàŋ, ayyà kagodaw. Ama masasèdok uwana apèhay kà uwaga kà, masasèdok Zèzagèla uwana kàbèzàwàw uwàr aw, ŋgaha babay kà, azàŋ kà gay marabèŋ uwana kadinjawwal gèl à vok aw. Ama bà la uwaga kà katsèbàwwal slèm!

⁵ La madzugway ankul la abà kà, dza uwanay kà: 'Mèŋ dza' kagòdàw, ndzer. Ama la dziriga kà, aduwa gi aw. ⁶ Iyay, zlahaw kà gèsèl mabàdàma kiya anja aw. Ama kà anja dza hanjèlègà kà, gi la hanjèlè, kà uwana asik dèŋ dèŋ, gèdapèh à akul uwaga la dazuwaya.

⁷ Dagay uwàrà, mok uwana gèzàkulla gay marabèŋ anja Zèzagèla kà, gèràv akul tatak bà ñw babay aw. Gèzìgèrà gèl aw, kà uwana asa à gi kà akul kazìgèràw, gègod. ŋgaha ma uwaga ma, gèdàhàŋ ma mawisiga takay? ⁸ Mok uwana gèdàh sléray la tataka ankul la abà kà, gèbàzà à tatak uwana gènuकुदà anja la slaka anja azladza gudèŋ anik ndzer,

^{*} 10:17 10:17 Yeremiya 9:24

gödäla atä ä küda ä abä kâ akul. ⁹ Mok uwana gi anina la abä gâ kâ, gëfâ mahanay ä dza anik ankül ä gël aw, kâ uwana azladedä mäna madiñal gël ä vok dagay la Makeduniya tanañäh ä gi ä adi la küda gulo la abä, kâ uwana asä ä gi maf ä akul mahanay ä gël aw, bâ tsëräh ä huma ä gay babay kâ, asä ä gi tetuwa aw. ¹⁰ La dziriga kâ, gëgodf ä akul kâ, gi la madëd gay lëv, kâ uwana gëfâ tatak ankül ä gay, ankül uwana la kutso Akayya tetuwa aw. La dziriga kâ, fida gëpëh aw, kâ uwana Kristu la gi la abä ñgaha masla kâ fida aw. ¹¹ Kâ mana ä uwana apëh uwaga mi kagodaw takay? Kâ uwana gëwoya akul aw, kagodaw ay? Awan! Zëzagëla kâ asël kâ, gëwoya akul la lëv tekula.

¹² Lagonay kâ, gëda ä huma ä gay la madëhëñ kiya uwaga, kâ maham anjiz ä azlamëna matapla fida gâ uwaga ä gël, uwana asa ä atä mazëb ä anu humä ala, la mazlëb gël anjata, ñgaha kâ atä anja masëlay kâ slëray gami kâ gërgër la anjata. ¹³ Kâ uwana atä kâ, azlamëna maslëlay dziriga aw, azlamëna fida, ñgaha azlademdem uwana tapäkäh gël anjata ala bokuba azlamëna maslëlay dziriga anja Kristu. ¹⁴ Uwaga kâ nadzipo aw, kâ uwana seteni babay kâ, apaka gël anja ala kâ malika anja udeka. ¹⁵ Uwaga kâ, apaka tatak maval anu lëv ä gay aw, ä banja azlamëna slëray anja tagodfay kâ: 'Anu azlamëna maslëlay dziriga'. Ama la vudf makëd gël ä ahëñ kâ, tadäbëza seriya këla anja slëray anjata uwana tadahän.

Pol adëdf gay lëv kâ ñgërpa anja

¹⁶ Bâ götënan gëpëhay aya, asa ä gi kâ dza anja manërez gi bokuba gi kusonju aw. Ama banja asa ä akul kâ anja mapakgëla kiya kusonju, kitä zlä kâ, fäw ä gi ä ahëñ bokuba gi kusonju, kâ gi anja mats zlapay makusonju kusonju suwan zlä. ¹⁷ La dziriga kâ, uwana gëpëh la abanay kâ, mapëhay anja Sufël aw. Banja gëdäkës mats zlapay, gëbadma makusonju kusonju zlä. ¹⁸ Tsa azladza anjvaw tats zlapay kâ azlatatak uwana la gudëñ uwanay la vok kâ, tsa këtä gi babay kâ, gëts zlapay suwan kiya anjata. ¹⁹ 'Anu kâ anu azlamëna hanjëli', kagodfaw, kâ uwaga ä uwana kabasawwan azlakusonju aw ay! ²⁰ Iyay, akul kâ kakësaw kâ azladza tafa ä akul asik ä gël, bokuba akul azlamayä, tazaw akul ä gay tsëräh ä aslasl adi, tatakf ä akul demdem ä gël, tapësew akul ñgaha tadäfa ä akul ahäl ä gël, taterëb akul. ²¹ Hadfay, la dziriga kâ, anjiz ahama gi ä gël kâ mapëhay kiya uwaga, ndzer kâ, gi gußguß.

Ama lagonay kâ, tsa anjiz aham azladza ä gël anja mapëhay makusonju kusonju aw, kâ gi babay kâ, kitä gëdäpëhay suwan. ²² Tadagay azla lberanëñkowen, gi babay kâ bâ gi atä, tadagay azla Isërayel, gi babay bâ gi atä aya, tadagay mayyi ä tsëh ala anja Abëraham, gi babay kâ bâ gi mayyi ä tsëh ala anja suwan, ñgaha ma taduwa gi ma la mana zlä ma? ²³ 'Anu azlamëna slëray anja Yesu Kristu', tagodf. Gi babay kâ, gëdäh slëray anja bay, gëdäh slëray uwaga la maduw atä aya. Iyay, uwaga gëpëhay kâ, kamkam bokuba gël ä gi la vok aya aw. Ama ndzer kâ, gëdähä slëray dafuwa ä atä zewk ä zewk, tadaw gi ä danay dafuwa ä atä. Tazlabäh gi dafuwa ä atä, mamëtsay kâ gi gëuzuzähla kâ la gay gël ahäl. ²⁴ Asik zlo azlamasiga anja azla Yahudiya taslähgëla la kurpi, këla maslahgëla kâ, tapäs gi la kurpi dzik makër gël anja ladëga, ladëga.* ²⁵ Asik makër azla Rom tazlab gi la azëva. Tatsäh gi la akur kâ makëd gi asik tekula. Asik makër këslah iyaw aguwhgëla ä gël ä abä aya. Asik tekula gëvæk ä iyaw ä abä gëhën ä abä. ²⁶ La mauguzahay gulo uwana la abä, anjvaw kâ gësäh ñgërpa la azlamukwä la abä, la ahäl anja azlamëna gëna, la ahäl anja azlatsëhay anik anik, amiyaka bâ la ahäl anja tsëhay gulo babay. Gësäh ñgërpa la azlaslaka gesina, la azlahudf gudëñ gesina la abä, ñgaha la ahäl anja azlauwana: 'Anu azladedä anak', tagodf ä gi, ama kâ anja gay gâ. ²⁷ Gëdähäh slëray dëgdëgga tsëräh ä uwana naka gëmëts ä abä, bâ madzëhal babay kâ, gëdzëhähäl aw. Gëbäz tatak may la tatak masay aw, zwek ä zwek gëkas nëlay, anasl akädäh gi, kâ uwana gëgäh la vok deyday. ²⁸ Nofegi kâ, azlatatak anik anik la ahëñ babay kâ, gëslala vok anja matugw uwaga ä uda aya aw. Ama tatak tekula la ahëñ atëreb gi këla mavakay: Gi la madzugway la abä kâ lakël anja azlamëna madiñal gël ä vok la këla maham ä ahëñ mäna gay Zëzagëla, kâ masla gâ. ²⁹ Magay gußguß anja dza kâ, apakgëla kâ gußguß suwan. Banja dza atëd ä tsakana ä abä kâ, lëv aza ä gi mëñga.

³⁰ Azlayla vok kâ gëts zlapay, ama këla kâ, gëts zlapay kâ lakël anja tatak uwana apëhla gußguß gulo ala. ³¹ La hadfay kâ, Zëzagëla Baba anja Sufël gami Yesu Kristu asël kâ gëdäh fida aw, mazlëbay agay kâ la masla koksikoksi. ³² Mok uwana gi la Damas kâ, lawan anja mëñ sufël Aretas, abäk azladza ä gay gamagäy anja hudf gudëñ gesina, kâ atä anja makës gi. ³³ Ama la abatä kâ, azladedä anik tafä gi ä takosä ä abä, tadzilä gi ä ahëñ la gël zlagam uwana takësla gay ä hudf gudëñ ä adi. Kiya uwaga la uwana gëtëf la ahäl anjata.

* 11:24 11.24 5Musa 25.3

12

Uwana Sufəl Zəzagəla apəhla à Pol la masesinay

¹ Amiyaka bà akəsa vok la slaka azladza aw, babay kà say gəts zlapay kà mapəhay lakəl anja tatak uwana Sufəl apəhgəla ngaha la azlauwana masesinay apəh à gi gesina. ² Gəsəl masla madiŋal gəl à vok anik uwana la Kristu la abà, dagay uwatà kà adafəh mavay kulo gəl anja ufad, masla kà ahàd à zagəla mamakər matsekakadafay gə uwatà à afik. (Adà à afik ma la sləb vok kà, à bi masesinay pəra asasiŋla à mənŋa kà, gəsəl aw, say Zəzagəla kokufə gəl anja pəra asəl) ³ La dziriga kà, dza uwatà kà ahàd kà à slaka mazləbay uwana à abà la slaka Zəzagəla. (Bi la sləb vok à uwana Sufəl adala masla à abà kà, gəsəl aw, masla masəl uwaga kà say Zəzagəla pəra) ⁴ La abatà la uwana atsanà azlagay nasiriga, uwana azladza taslala vok anja mabəfal à tsəh aw, uwaga kà tetəvi la ahən kà anja dza la sləb vok anja mapəhay babay aw. ⁵ Lakəl anja dza uwatà la uwana gəts zlapay, awkà la ndzəfa anja gəl gulo aw. Kiya uwaga la uwana kà, gəpəhla guŋguŋ gulo ala. ⁶ Baŋa asa à gi mats zlapay aw, gəhəl à ahən kà uwaga, kà uwana asa à gi kà, dza asləkaw gi lakəl anja tatak uwana anənənŋ la uwana atсэнəŋ la slaka gulo aw.

⁷ Naka azlayla gi gətsa zlapay, kà uwana Zəzagəla apəh à gi azlatatak dzəba anja səla aw gə anjwaw. Kiya uwaga babay kà avà à gi tatak anik aya, uwana azà à gi, kà gi anja magay zlapay aw. Tatak uwaga kà Zəzagəla agòlla la ahəl anja seteni kà matsəhla gi yəs kà gi anja magay zlapay aw. ⁸ Asik makər gədəv kufə à Sufəl Zəzagəla lakəl anja dıvats uwaga, kà masla anja mapəlgəla la uwaga la abà. ⁹ Ama masla awulgəla agod: 'Vok mahamay gulo kà diga kà anjak gesina. Mok uwana kak guŋguŋ kà, ndzəfa gulo adafəh slaray la kak la abà.' Lagonay kà, gi la marabay kà mabas guŋguŋ gulo kà uwana ndzəfa anja Kristu la gi la abà. ¹⁰ Kà uwaga à uwana, gəvaləh à zagəla lakəl anja guŋguŋ gulo, amiyaka azladza tatsək à gi magodafay à gəl, tatərəb gi babay kà, gəbasin kà Kristu. Baŋa azlamatərəbay anik la mazaw la gəl tawəfəh gi à ahən kà, la mok uwatà la uwana gəbəza ndzəfa.

Madzugway anja Pol lakəl anja azla Korintiya

¹¹ La dziriga kà, gəpəh kà gay makusonju kusonju, ama akul la uwana kafaw gi gasa à gəl anja mapəhay kiya uwaga. Kà uwana naka akul la uwana katsəw zləbəw gi, amiyaka bà gədagay tatak aw, babay kà azlaməna masləlay mawga uwaga kà tadıw gi la magay nəma aw. ¹² Sləray uwana apəhla ala kà gi masləlay kà, adafəhəhə vok la tataka anjul la abà, gəpəhakulla la mabasiŋ uwana akəf gəl à ahən aw, gəfahəhə azlanadzipo la azlatsəhay tatak anik anik, uwana la ndzəfa gesina la huma anjul. ¹³ Awma tatak anik la ahən gəfahəhə à azlaməna masla gay Zəzagəla anik, masla gəfahəkulləŋ aw takay? 'Vəw gi tatak', gəgod à akul magay aw: 'Basəwŋəŋ kamkam!'

¹⁴ Lagwa kà, gəzlàdà à awtəy à slaka anjul ka mamakər adagay. Baŋa gədàda à awtəy kà, gədàfa à akul mahanay à gəl aw. Akul la uwana gəyàh akul awkà sili anjul aw. La hadafay gə kà, azləbəza la uwana tadzadzar baba aw, ama baba la uwana adzadzar azləbəza. ¹⁵ Gi kà la marabay, gəvə à tatak uwana gəkoray gesina, adagay aslasl gəl gulo babay, kà gi anja mazlak akul. Lagwa ma katetuwwaw mawoy gi, à kà uwana gəwoya akul kaykay takay?

¹⁶ Gəfa à akul mahanay à gəl aw gadzewi la abà aw. Zlahaw kà, dza gə agod à akul kà, gəfahəkulla dəmdəm à vok, la mabəz akul à tsəh, la dabaray agodafay kà, hadafay zlə ma aw. ¹⁷ Azladza gulo uwana gəslələh atà à awtəy ma, tazawəh akul à uda kəla ay? ¹⁸ Gəsləl Titus la azladedə anik à slaka anjul. Lagwa ma, Titus la uwana azıw akul à uda zlə ma ay? Tsa, gəgod kà, anu səla kà mədəh sləray kà tekula, madzugway la manəfay gami kà tsa tekula ma, kakay zlə ma aw gə ma?

¹⁹ Zlahaw dagay uwarə kà akul la madzugway uwaga, 'Asa à anu matsəf gəl gami ala la huma anjul', kagodaw. Awan! Kiya uwaga aw. Məpəh uwaga kà la dziriga anja Zəzagəla, kà uwana anu azlaanja Kristu. Azladedə gami, uwana mawoya akul uwaga gesina kà, kà uwana asa à anu kazigənwaw la madiŋal gəl à vok la abà. ²⁰ Guba aza à gi kà, kà mok uwana gədàda à awtəy à slaka akul babay, kadənəwaw gi bokuba uwana kayahaw babay kəla. Guba aza à gi, kà mabəz akul à gəl la magazlay, la manor, la mapak ləv, la matsən vok a gay aw, la azlagay wadzaw wadzawga, la azlakaskas, la azlazlapay ngaha la azlamasəh gəl anik anik la abà gesina, à uwana asa à gi aw. ²¹ Baŋa gədàda à awtəy kà, asa à gi kà Zəzagəla gulo awulgəla gəl à vədəh, kà gi anja matuway lakəl anja azlaməna madz à ahən la tsakana la abà, kà uwana, la hadafay gə kà, tapəh gay la ləv ala aw. Tasak tatak mawisiga la tsəh ala aw, tadfəh mabila la dəwdəw tatak mawisiga.

13

Gay makəf gəl à ahəŋ, la Ayyi

¹ Mamakər anha la uwaga gəda à awtày à slaka ankul. Iyay, bokuba uwana tatsetsər à wakità Zəzagəla à abà kà:

'Kəla dza uwana apuw gudzi kà, say agay la azlaməna sayda səla banjaw makər.'*

² Gay anja mapəh à azladza uwana à vok à abà tadəhən tsakana la tataka ankul la abà, ŋgaha azlamətəm à ahəŋ gə gesina kà, gəpəh à akul bokuba uwana gəpəh à akul dagay la madzəka à mok, uwana gəgà la slaka akul kà masəla. Banja gədàda à awtày kà, gədàdaha à atà seriya à gəl la paraka. ³ Kiya uwaga kadəbəzaw sayda uwana kayahaw. Kasəlaw kà Kristu apəh gay la gi la abà təga aw uwa. Ŋgaha səlāw kà, Kristu uwana adəh sləray la tataka ankul la abà kà, guḅguḅ aw, ama apəhla maslay anha ala la akul la abà. ⁴ La mok uwana tatatəsl à ahəf à adi kà, la mok uwatà kà, agə guḅguḅ. Ama lagwa kà, aga la ahəŋ la sifa kà ndzəda anja Zəzagəla. Kà maham gay à vok gami la Kristu, anu bay kà anu azlaguḅguḅ, ama kà maslay anha kà anu la sifa bay, ŋgaha la mok uwana mədàda à awtày la slaka ankul kà, mədədah sləray la maslay anja Zəzagəla.

⁵ Lagonay kà gürəw gəl ankul dən zlə. Akul la madiŋal gəl à vok la abà nəma ay? Say kasəlaw uwaga la aslasl gəl ankul: Kasəlaw ma, Yesu Kristu ma aga la akul la abà nəma ay? Tsa banja kità aw kà, kazawla. ⁶ Ama la hadəy kà, banja akul kagədafwwan afik kà kadiŋaw gəl à Yesu à vok kà, gəsəl la dziriga kà, kadəsəlaw kà anu azlaməna masləlay anja Kristu hadəy. ⁷ Mədəw kuḏa à Zəzagəla kà akul anja madəh mawisiga aw. 'Ama məyah magəf dziriga gami à afik pəra', kagəfaw aw. Awan, ama kəla kà, asa à anu kadəhawwan kà say uwana akəs à vok pəra, amiyaka məsla kà madəh delga babay aw. ⁸ Anu kà məsəlala vok anja matsak dziriga anja Zəzagəla à ama aw, say mədza à ahəŋ kà, kà ahəl anha pəra. ⁹ Anu kà, anu la marabay à banja anu azlaguḅguḅ, ŋgaha akul la ndzəda. Kà uwaga à uwana mədəw kuḏa à Zəzagəla, kà masla anja mapakakulla kà azlazil. ¹⁰ Wakità uwanay gətsetser kà, la mok uwana gələg mabəz à slaka ankul dadən. Kà uwana banja gədàda à awtày kà, asa à gi anja matsətsəhakulla la gay dzanɗzanɗa aw. Kà uwana Sufəl Zəzagəla avà à gi ndzəda anha kà makaləhla akul à vədah aw, ama say kà matsizlla akul ala pəra.

Ayyi

¹¹ Iyay zlə azladedə, lagonay kà: 'Dzàw à ahəŋ wurwur zlə', gəgəf à akul. 'Gàw azlamahanay gə la tetəvi anja Zəzagəla la tsəh, kəsəw gay gulo uwana gəpəh à akul, tsənəw vok gay, dzàw à ahəŋ la lapiya la abà, kà Zəzagəla uwana awoya dza, ŋgaha avəh lapiya, adza à ahəŋ la akul la abà anja tsərəh à awtày!'

¹² Dahəw vok 'Ayyi', kà akul à akul, la ləv tekula! 'Ayyi!' azlaməna madiŋal gəl à vok la abanay gesina tagəf à akul.

¹³ Vok mahamay anja Sufəl gami Yesu Kristu, la masal anja Zəzagəla, ŋgaha la maham gay à vok anja Masasəfok Zəzagəla agay la akul gesina.

WAKITÀ UWANA POL ATSETSÈR À AZLA GALATIYA Lettre de Paul aux Galates

¹ Wakità uwanay asa à uda kà la ahàl gulo à gi Pol, maslèlay anja Yesu Kristu. Dza asik taslèl gi aw. Zèzagèla Baba, uwana awùlla Yesu Kristu à uda la mamètsay, la Yesu Kristu la gèl anja, la uwana taslèl gi. ² Gi la azladede uwana la abanay gesina, 'Ayyi', mægòf à akul, akul azlamèna masla madijál gèl à vok la kutso Galatiya gesina. ³ Zèzagèla Baba gami, la Sufèl Yesu Kristu tava à akul vok mahamay, la lapiya. ⁴ Yesu Kristu avà sifa anja kà tsakana gami, ngaha kà Zèzagèla anja mamatsinèjla. Kà tatak mawisiga anja gudèj à vok uwanay anja magay la ndzèda lakèl gami aw. Adàhàn kiya uwana asa à Baba Zèzagèla kà madèhèj. ⁵ Mazlèbay agay la Zèzagèla anja koksikoksi. Amen.

Gay marabèj anik la ahèj aw

⁶ Kà kadàw gi gèl à vok. Zèzagèla azalà akul la vok mahamay, kà akul anja magay azlaanja. Ama katskats kasàkàw uwaga la tsèh ala, kanèfaw tetèvi anik uwana: 'Delga kà la uwatà', kagòdaw. ⁷ La dziriga kà, tetèvi delga anik la ahèj aw. Ama azladza anik la ahèj, à uwana takàd akul ala gèl vok. Tayàh mabèdla gay marabèj anja Kristu kiga. ⁸ Baña dza anik azakulla gay marabèj gèrgèr, la uwana mèzàkullèj kà, masla kà matsaflaga la slaka Zèzagèla. Adagay anu, adagay malika anik uwana asa à ahèj la zagèla bay. ⁹ Mèdapèh à akul tèga aw kà, lagonay gèwulla akul ala à tsèh aya: Baña dza azakulla gay marabèj gèrgèr la uwanay mèpèhakulla ala kà, Zèzagèla asafila ala seriya à gèl. ¹⁰ Haday, la matsetser gay uwanay kà, asa à gi kà, azladza tazlèb gi aw. Asa à gi, kà Zèzagèla pèra azlèb gi. Awma kadzugaw ma, kà gi anja mahòf azladza à adi takay? Awan, agay asa à gi kà azladza anja mazlèb gi kà, naka gègay masla slèray anja Kristu aw.

Pol abèz tetèvi kà magay maslèlay anja Kristu

¹¹ Azladede gulo, asa à gi mapèhakulla ala la paraka kà, gay marabèj uwana gèzàkullèj kà, aguwà à wanj la slaka dza asik aw. ¹² Gèbèza uwaga la slaka dza aw, dza atàpgèla uwaga babay aw. Ama Yesu Kristu la uwana apèhgèla, ngaha afètàgèla uwaga à ama ala.

¹³ Kasèlaw madz à ahèj anja uwarà gulo, à mok uwana gènéfa tsèhay manèfay anja azla masla Yahudiya. La kaslà uwatà la uwana, gètèrèbàhà azlamèna gay Zèzagèla kaykay. Gèyàh mazàh atà ala gesina. ¹⁴ Gènéfa mapèhay anja makoray, ngaha la mapèhay anja azlababa gami madzidziga la lèv tekula, dàduwa à gay azlamanalay gulo gesina.

¹⁵ Ama vok ahamà à Zèzagèla, akèsà gi dagay uwana talèg mayyi gi. Azala gi, kà gi anja madàhla slèray, bokuba uwana akèsal à gèl. ¹⁶ Kiya uwaga apèhgèla Kona anja, kà gi anja maz gay anja la tataka azladza uwana azla Yahudiya aw. La kaslà uwatà kà, gèhàd à slaka dza kà manav matsihila la slaka anja aw. ¹⁷ La kità, gèhàd à Urusalima babay, kà madz à ahèj la azlamèna maslèlay teranja à gi aw, ama gèvà vok kà mapiyay kà à kutso Arabiya, dagay la abatà la uwana gèwùl à Damas. ¹⁸ Uwana mavay makèr adada à lig kà, gèwùl à Urusalima kà gi anja manèj à Piyer à gay. Kasukwa sèla mèdzà à ahèj anu sèla pèra. ¹⁹ La abatà kà, gènéj à azlamèna maslèlay anik aw, say Yakuba à deda anja Sufèl Yesu pèra.

²⁰ Uwanay gètsetser akul kà fida la abà aw, Zèzagèla asèl kà gèdàh uwaga aw.

²¹ La lig anja uwaga la ahèj, gèhàd, gèuguzàh la kutso anja Sèriya, ngaha la Sèlisèya. ²² La mok uwaga, azlamèna madijál gèl à Kristu à vok la makoray anja Yahudiya, tasèl huf adi gulo dadèj aw. ²³ Tatsènj kà uwana azladza tapèhay pèra: 'Kay, masla matèrèbàh anu uwana uwarà, lagwa kà, masla az madijál gèl à vok, uwana lakèl anja Yesu à azladza adagay, kay kà, ayàh mabèzljèj à abà uwarà.' ²⁴ Kà uwaga kà, tazlèbà Zèzagèla kà azlatatak uwana gèdàhàn.

2

Pol la mèj maham gay à vok la abà la Urusalima

¹ Kiya uwaga à uwana, mavay kulo gèl anja ufad adada à lig, gèwùl à Urusalima aya, Barnabas anèfà gi, ngaha gèkès Titus à tsèh aya babay. ² Gèwùl à abatà kà, kà uwana Zèzagèla agòf à gi: 'Hàd à abatà.' Mèhamà gay à vok kokudà gèl gami la azlamadzahaga anja azlamèna manèfay, gèpèh à atà gay marabèj uwana gèzàh à azladza, uwana azla

Yahudiya aw, kà uwana asa à gi kà sléray gulo aña mawis à wəfah aw. ³ Masla mazlak gi, Titus, masla kà zil Gərək, ama tafəl ndzəfə à gəl, kà makədəv à uda aw. ⁴ Ama azlaməna magolla dza la ahəñ tasà à tataka gami à abà la dabaray la magodfay: 'Masla mamakədəv à uda gə takay?' Asà à atà masəl madz à ahəñ gami, uwana anu la makor gəl la abà, kà uwana mədagay tekula la Kristu. Asà à atà aña mawulla anu à mayà aña mapəhay aña à abà. ⁵ Ama məkəs atà gəl à ahəñ, amiyaka ŋuv aw, kà uwana asa anu kà gay marabəñ dziriga, adza à ahəñ kiya uwanay kà akul aña masəlay.

* ⁶ Iyay, azlauwana tazala atà ala azlaməŋga uwarà ndzer, -gay gulo la abà aw, kà uwana Zəzagəla avàh azladza ala aw-, uwana tazala atà ala azlaməŋga, uwaga abəfəla madiŋal gəl à vok gulo aw, ŋgaha matapla gulo kà uwala delga aw, tagodf aw.* ⁷ Tasəl pəra kà, kà Zəzagəla afà à gi à gay marabəñ à ahəl kà mazin azladza uwana makədəv atà à uda gə aw, bokuba uwana Zəzagəla afa à gay marabəñ à Piyer à ahəl kà mazin à azla Yahudiya babay. ⁸ Zəzagəla agəfə Piyer à afik, kà masla aña magay masləlay à tataka azla masla Yahudiya à abà, bokuba uwana agəfə à gi afik kà gi aña magay masləl gi à tataka azlatsəhay anik à abà suwan. ⁹ Haday, Yakuba, Piyer ŋgaha Yuhana, -tanərəz atà kà bokuba azlaməŋləv gə la tataka azlamaham à ahəñ la abà-, atà tasəl kà Zəzagəla la uwana avà à anu sléray uwanay. Gay gə la uwaga tavà à anu matsən vok gay la Barnabas, kà anu aña madəh sléray la tataka azlatsəhay anik la abà, ŋgaha atà aña madəh sléray la tataka azla Yahudiya la abà. ¹⁰ Ama tadəv à anu kudfa kà madəhəñ kà tatak tekula pəra: Maf sləm à azlaməna kudfa, uwana la maham à ahəñ dza la abà la Urusalima. Uwaga la uwana məwəf vok à uda kà madəhəñ.

Pol aslèh vok à Piyer la Antiyews

¹¹ Mok uwana Piyer adasa à waŋ à Antiyews, gəsləhal mələ à gəl la huma aña azladza, kà uwana adəhà sléray la tetəvi aña aw. ¹² Teraja dadəŋ, tazùw tatak may la slaka gə, la azladza uwana kokufta makadav atà à uda gə. La lig la ahəñ, mok uwana azladza aña Yakuba tasà à waŋ, atà uwana tadàla slilih la makədəv vok à uda la abà, guba akəs Piyer, avahà ala la azladedə uwatà, asək à mazuw tatak may atà nna. ¹³ La abata azla Yahudiya anik tafək gəl à ahəñ səla səla, bokuba aña Piyer babay. Baməraka Barnabas bay kà, anəfə madəhəñ aña. ¹⁴ Mok uwana gəŋəŋəŋ, kà tawis tetəvi aña gay marabəñ ala kà, gəgəf à Piyer la huma aña azladza uwatə gesina: 'Kak, uwana kak zil Yahudiya, kadzà à ahəñ la abanay kà bokuba kak zil Yahudiya aw, kadzà à ahəñ kiya kak zil Yahudiya aw, kayyà, kà mana kagodf à azladza uwana azla Yahudiya aw kà tadza à ahəñ bokuba azla Yahudiya zla ma?'

Mabəlay kà say la madiŋal gəl à vok pəra

¹⁵ Ndzer, anu kà, anu azla Yahudiya dziriga, kà uwana azlababa gami kà azla Yahudiya dagay la slilih, anu azlatsəhay dza à uda aw, anu azlaməna masəl tetəvi aña Zəzagəla aw aw. ¹⁶ Amiyaka adagay bokuba uwaga, məsəl kà, dza uwana dziriga la huma Zəzagəla kà, say dza uwana adiŋ gəl à Yesu Kristu à vok, awkà dza uwana anəfa mapəhay aña azla Yahudiya aw. Mədiŋ gəl à Yesu Kristu à vok bay kà, kà Zəzagəla aña mav à anu tetəvi kà anu magay sətaka la huma aña kà, kà uwana mədiŋ gəl à masla à vok, awkà, kà uwana mənəfa mapəhay aña azla Yahudiya aw. Dza aslala vok aña magay sətaka la huma Zəzagəla la manəf tetəvi aña mapəhay aw.* ¹⁷ Kiya uwaga babay anu azla Yahudiya, məhoy guba aña Kristu bay, anu məbəz dziriga la huma Zəzagəla kà uwana anu la maham gay a vok la Kristu la abà, ama anu azlaməna tsakana kalkal la aña azlatsəhay anik gesina. Baña kiya uwaga ma, Kristu adzərədə tsakana ala takay? Awan, tetuwa kiya uwaga aw! ¹⁸ Naka agay kiya uwaga nəma, ama mapəhay aslala vok kà mag gi sətaka aw, ŋgaha gəgəla aya, gənəf mapəhay bokuba tatak uwana akəsa vok aya, aña kità kà, gədəfah mawisiga la huma aña Zəzagəla. ¹⁹ Ama kà aŋulo kà, lakəl aña mapəhay kà, gi mamətsay gə. Mapəhay kà, kà aŋulo kà, adapaka tatak deyday, uwaga gesina kà adada à lig, kà gi aña magay la sifa la huma aña Zəzagəla. Dagay uwana tatatəsl Kristu à ahəf à adi, gəga tekula la masla, məməts à slaka gə à abà anu səla. ²⁰ Gi kà, sifa uwanay gəzda la ahəñ kà, la gəl gulo aw, Kristu la uwana adza à ahəñ la gi la abà. Sifa uwana gəzda la ahəñ la gudəŋ uwanay la vok kà, gədalla kà la madiŋ gəl à Kristu à vok, à masla uwana Kona aña Zəzagəla, uwana awoya gi, ŋgaha uwana avà vok aña kà aŋulo. ²¹ Tetuwa, gədəpəsew delga aña Zəzagəla dikidiki la mawulay à mapəhay à abà aw. Baña dza adagay dziriga la huma aña Zəzagəla kà, kà uwana adəh tatak uwana mapəhay apəhay la manəf mapəhay kà, baña kiya uwaga kà, Kristu kà aməts kà deyday pəra zlə.

3

Mapəhay banjaw madiŋal gəl à vok

¹ Azla Galatiya, kusuŋu aŋkul uwanay haɗay! Uwa adasləb akul aresl lakəl ala uwa? Tsa gəpəhakulla Yesu Kristu, uwana aməts à ahàf à adi uwi? ² Wùlāw gi ala gay tekula pəra: Zəzagəla avà à akul Masasəɗok aŋha ma kà uwana kanəfaw mapəhay ay, awma kà uwana katsənāw gay marabəŋ, ŋgaha la madiŋ gəl à Kristu à vok takay? ³ Kà mana katsənāw sləm aw ma? Uwana Masasəɗok adzəkà la vok aŋkul ma, asa akul madəv uwaga à gay la ndzəɗa aŋa vok aŋkul takay? ⁴ Uwana apàkakulla vok gesina ma, uwaga ma deyday takay? Tetuwa tatak məŋga bokuba uwanay apakay deyday aw! ⁵ Zəzagəla avà à akul Masasəɗok aŋha, ŋgaha adàh azlanadzipo la tataka aŋkul la abà babay. Adàh uwaga ma, kà uwana kakəsāw gay aŋa mapəhay ay? Awma kà uwana katsənāw gay marabəŋ ŋgaha kadiŋāw gəl à Kristu à vok ay?

⁶ Iyay, dzùgwāw lakəl aŋa Abərahām bokuba uwana wakità apəhay, agòɗ: 'Abərahām afà madzugway aŋha à Zəzagəla à afik, kà uwaga à uwana agà dziriga la huma aŋha.'*

⁷ Tsa banja kiya uwanay kasəlaw kà, say azladza uwana tadiŋ gəl à Zəzagəla à vok la dziriga, la uwana tadəgay mayyi à tsəh ala aŋa Abərahām. ⁸ Dagay uwarà tatsetsèr à wakità Zəzagəla à abà kà, azlauwana azla Yahudiya aw, tadəpaka dziriga la huma aŋha, kà la madiŋal gəl à vok aŋatà. Gay gà la uwaga mapəhiya à Abərahām à vok à abà dagay uwarà à gay marabəŋ:

'Zəzagəla adəpis gay à azladza gudəŋ à vok gesina kà, kà kak à kak Abərahām.'*

⁹ Abərahām adiŋ gəl à Zəzagəla à vok. Azlaməna madiŋ gəl à Zəzagəla à vok bokuba aŋa Abərahām tadəbəza mapis gay à vok bokuba aŋha uwana abəzəl babay.

¹⁰ Ama kà aŋa azlauwana tadzugway kà tadagay dziriga la huma Zəzagəla kà, kà uwana tadəh uwana mapəhay apəhay kà, Zəzagəla adàkas atà la seriya. Kiya uwaga tatsetsèr à wakità Zəzagəla à abà kà:

'Kəla dza, uwana anəfa azlamapəhay gesina uwana tatsetsèr à wakità Zəzagəla à abà aw kà, seriya aŋa Zəzagəla adətəɗ à atà à gəl.'*

¹¹ Ama bə la uwaga gesina kà, dza la ahəŋ dziriga la huma Zəzagəla la manəf mapəhay aw, kà uwana wakità agod babay:

'Masla madiŋ gəl à Zəzagəla à vok abəza dziriga, adza à ahəŋ la sifa.'*

¹² Ama mapəhay kà, abəza kà madiŋal gəl à vok aw, bokuba uwana matseserayga:

'Dza uwana akəs mapəhay lela kà, adàdza à ahəŋ kà la masla.'*

¹³ Kiya uwaga kà, Zəzagəla adukwəŋ seriya à gəl, kà uwana məkəs gay aŋa mapəhay tetuwa aw. Ama Kristu asà à ahəŋ, abəɗ à slaka gami à abà, kà Zəzagəla aŋa madukw ala seriya à gəl. La madəhəŋ kiya uwanay, avavàrà anu la seriya uwaga la abà. Uwaga bokuba uwana tatsetsèr à wakità Zəzagəla à abà:

'Dza uwana tatatəsl à ahàf à adi kà, matsafla gə.'*

¹⁴ Kristu adahəŋ kiya uwanay kà, kà azlatatak delga uwana Zəzagəla apəh à Abərahām à ahəŋ, kà azladza uwana azla Yahudiya aw aŋa mabəzal la ahəl aŋha suwəŋ. ŋgaha kà anu aŋa mabəzal Masasəɗok, uwana Zəzagəla apəhàh à ahəŋ aŋa mav à anu, kà uwana mədavəl ləv gami.

Mapəhay awis tatak uwana ala Zəzagəla apəh à ahəŋ aw

¹⁵ Azladeda, say gəpəh à akul la gay la abà, bokuba uwana zagəla aŋa azladza. Banja azladza səla tahamà gay à vok ŋgaha tatsən vok gay, ŋgaha tafà à ahəl à afik, kiya uwaga kà, dza aslāla vok aŋa mazalan à gəl babay aw. ¹⁶ Haɗay, Zəzagəla akəs vok slawda la Abərahām kà aŋha, ŋgaha la mayyi à tsəh ala aŋha. Ama wakità Zəzagəla agod: Azladza dəŋ, agod aw, ama à mayyi à tsəh ala aŋha, dza tekula pəra: Kristu. ¹⁷ Tatak uwana asa à gi aŋa mapəhay kà, bokuba uwana Zəzagəla akəs vok slawda la Abərahām, agəɗəŋ à afik. Mavay dadərmokw ufaɗ bəzi aŋha dzik makər la lig aŋha la ahəŋ, la uwana mapəhay azlāŋal. Uwaga aslāla vok aŋa mapəl makəs vok slawda uwaga ala, ŋgaha la tatak uwana Zəzagəla apəh à Abərahām à ahəŋ aw.* ¹⁸ Agayŋa Zəzagəla avà tatak à azladza, kà uwana tanəfa mapəhay kà, uwaga asal magoday kà: Avà kà, kà uwana apəh à ahəŋ aw, tsa tekeɗik kà, Zəzagəla apisà gay à Abərahām à vok, kà uwana apəhal à ahəŋ kiya uwaga pəra.

Godega aŋa mapəhay

* 3:6 3.6 1Musa 15.6 * 3:8 3.8 1Musa 12.3 * 3:10 3.10 5Musa 27.26 * 3:11 3.11 Habakuk 2.4 * 3:12 3.12 3Musa 18.5 * 3:13 3.13 5Musa 21.23 * 3:17 3.17 1Musa 12.7; 2Musa 12.40

¹⁹ Tsa baŋa kiya uwanay ma, kà mana Zəzagəla avà mapəhay à azla Yahudiya ma? Zəzagəla avà à anu, kà anu aŋa masəlay azlatatak ma, uwala mawisiga la huma Zəzagəla la? Avà kà aŋa dəŋŋa pəra, tsərah à uwana mayyi à tsəh ala aŋa Abəraham tatsaw à waŋ à masla à uwana Zəzagəla apəhal azlatatak uwaga à ahəŋ. Zəzagəla apəh uwaga à azlamalika, tazəŋ à azladza, masla masəlla anu vok la ahəŋ la tataka gami la abà la Zəzagəla. ²⁰ Masla masəlla vok à azladza kà, adza à ahəŋ kà, la tataka aŋa azladza səla la abà. Ama la mok uwana Zəzagəla apəh à azlatatak uwaga à Abəraham, masla la gəl aŋha adəhəŋ bokuba masla masəl vok à azladza.

Kà mana mapəhay asà à waŋ ma?

²¹ Iyay, uwaga ma asal magodəy, kà mapəhay kà awoya tatak uwana Zəzagəla apəh à ahəŋ aw, takay? Tetuwa kiya uwaga aw! Agayŋa mapəhay tekula uwana naka aslala vok, avà sifa à azladza kà, naka agəŋ dziriga la huma Zəzagəla babay. Ama mapəhay la ahəŋ kiya uwaga aw. ²² Tekedika wakità Zəzagəla agod kà: Azladza gudəŋ à vok gesina kà, atà la tsəh aŋa tsakana, uwaga bokuba makəd gəl à ahəŋ aŋha, à uwana Zəzagəla apəh à azlauwana à ahəŋ, tadin gəl à Yesu Kristu à vok. Avà à atà kà, kà uwana tadin gəl à masla à vok.

²³ Dagay uwarà, mok uwana tetəvi la ahəŋ dadəŋ kà azladza aŋa madin gəl à Kristu à vok dadəŋ aw kà, mapəhay aga bokuba masla manəŋla, uwana anəŋla anu la danəy aŋha la abà. Mənəfà masla tsərah à uwana Zəzagəla apəhanula tetəvi kà anu aŋa madin gəl à Yesu à vok. ²⁴ Kiya uwaga mapəhay aga masla manəŋla anu, tsərah à uwana Kristu asà à waŋ. Zəzagəla agəhà anu azladziriga la huma aŋha, kà uwana madin gəl à masla à vok. ²⁵ Lagonay kà, tetəvi la ahəŋ, kà anu aŋa madin gəl à Kristu à vok, anu la tsəh aŋa mapəhay aya aw.

²⁶ Akul gesina kà, akul azlabəza aŋa Zəzagəla, kà uwana kadinəw gəl à Yesu Kristu à vok, bokuba magodəy kà, akul la ahəl aŋa Yesu Kristu adagay. ²⁷ Tadəhəkulla batem, kà akul aŋa maham gay à vok la Kristu. Lagonay kà, kazəbaw madz à ahəŋ aŋa Kristu babay. ²⁸ Kadəgay zil Yahudiya, kadəgay zil Yahudiya aw, kadəgay mayà, kadəgay mayà aw, kadəgay zilga, kadəgay misga, -gay la ahəŋ aw-, akul kalkal gesina. Akul gesina kà, kahamaw à Yesu à abà, kapakaw tekula. ²⁹ Baŋa akul azlaaŋa Kristu, akul azlamayyi à tsəh ala aŋa Abəraham. Kità kà, kadəbəzaw azlatatak uwana Zəzagəla apəh à ahəŋ gesina, uwana: 'Gədəvə à Abəraham la mayyi à tsəh ala aŋha', agod.

4

¹ Uwana asa à gi aŋa mapəhay kà kiya uwanay: Bəzi uwana adəzuw gəy baba aŋha, mok uwana aləg bəzi dadəŋ, kà bokuba mayà, baməra ka masla adəzuw gəy. ² Mok uwana aləg bəzi dadəŋ kà, atsəb sləm à gay aŋa azlaməna mafal sləm uwana tanəŋla azlatatak tsərah à kaslā, uwana baba aŋha akədəval à ahəŋ. ³ Kà aŋami babay kà, apakà vok kiya uwaga, mok uwana məgə bokuba azlabəza dadəŋ, mədza à ahəŋ la ahəl aŋa azlamasəsədok mawisiga, uwana takor gudəŋ à vok uwanay. ⁴ Kaslā uwana Zəzagəla anəts à ahəŋ adaslay, Zəzagəla asləl Bəzi aŋha à ahəŋ à gudəŋ à vok, agəlla la huđ aŋa mis, kà masla aŋa makəs mapəhay aŋa azla Yahudiya. ⁵ Ŋgaha kà masla aŋa mapəlla azlauwana ala, atà la tsəh aŋa mapəhay uwaga, kà Zəzagəla aŋa mapakanula kà azlabəza aŋha.

⁶ Iyay, tatak uwaga apəhanula, kà akul azlabəza aŋha. Zəzagəla asləl Masasədok aŋa Kona aŋha à ləv gami à tsəh, awiya: 'Abba, Baba gulo!' ⁷ Uwaga kà asal magodəy kà: Akul azlamayà aya aw, akul kagaw azlabəza aŋa Baba. Tsa kagaw azlabəza aŋha kà, adəvə à akul tatak gesina, uwana afà à ahəŋ kà aŋa azlabəza aŋha.

Pol adzugw à azlaməna gay Zəzagəla la kutso Galatiya

⁸ Uwarà, à mok uwana kasəlaw Zəzagəla dadəŋ aw kà, kagahaw mayà aŋa azlamazlaway. ⁹ Ama lagonay uwana kadasəlaw Zəzagəla, bokuba uwana Zəzagəla asəl akul, kayyà, kà mana kawulaw à azlatatak deydayga aŋkul uwana à abà, kadəhəwəwəŋ aya ma? Kà mana asa à akul magay azlamayà aŋatà aya, tsa ndzəda aŋatà la ahəŋ aw ma? ¹⁰ Kafaw madzugway aŋkul kà azlamavakay anik à afik, la azlatəla, ŋgaha azlamavay anik à afik babay. ¹¹ Kay, guba akəs gi kà akul, kà sləray gulo aŋa mapakay deyday la tataka aŋkul la abà.

¹² Azladedə, gədəv akul kuđa kamkam, pəkaw bokuba gi, gi babay gəpakay bokuba akul. Tetuwa kadəhəw à gi mawisiga à vok aw. ¹³ Kasəlaw, à mok uwana gədza à ahəŋ la tataka aŋkul la abà kà, dūvats akəd gi. Bə la kità bay kà, gəzəkulla gay marabəŋ. ¹⁴ Iyay kay kà, kasaw gi la madəkgəla vok ala aw. Ama kakəsaw gi kà la ahəl səla, bokuba uwana kakəsaw malika aŋa Zəzagəla, ŋgaha kakəsaw gi bay bokuba uwana kakəsaw Yesu Kristu. ¹⁵ La kaslā uwatà kà, kahənəwla la marabay. Lagwa ma aŋala zlə

à ama la? Gësəl la dziriga kà agay, kabəzàw tetəvi kà, naka bà yewdi anjul babay kà naka kabəfàw à gi. ¹⁶ Nğaha ma lagwa ma kapakəwğəla ma, bokuba gi masla məzəm anjul, kà uwana gəpəh à akul dziriga takay?

¹⁷ Azladza uwaga kà, asa à atà kà akul anja manəf madəhənj anjata. Ama madzugway anjata kà delga aw. Asa à atà kà mavəhanula anina, kà akul anja makəs gay anjata. ¹⁸ Delga kà, azladza takəs vok gay la azladza anik, à banja madzugway anjata kà delga. Gədəgəy la akul, baməraka gədəgəy la akul aw, kà uwana gəpəhay la uwana dziriga pəra. ¹⁹ Azlabəza gay ləv gulo, gəs ngərpa bokuba mis uwana huđ bəzi adakəsəy, say gəsə ngərpa kiya uwanay tsəràh à uwana asa à gi kà kagaw azlaməna masləlay anja Kristu. ²⁰ Lagonay asa à gi madz à ahənj la slaka anjul, kà ma uwala kà vok gay à gəl. Gəl adakəđ gi à vok, gəsəl uwana gədfahakullanj aya aw.

Gay lakəl anja Agar atà la Sara

²¹ Iyay, akul kà, asa à akul anja madz à ahənj la tsəh anja mapəhay, gənava akul: Katsənàw uwana mapəhay anja Musa apəhay aw takay? ²² Tatsetsər à wakitə Zəzagəla à abà kà:

'Abərahəm kà, azlabəza anja kà atà səla. Bəzi tekula kà anja dugu mayà, anik uwanay kà anja mis makor gəl gə.

²³ Bəzi anja dugu mayà kà, ayyà kà bokuba uwana tayyàh azlabəza anik, ama mis makor gəl gə uwanay kà, ayyà kà kiya uwaga aw. Zəzagəla apəhal gay mayyi bəzi anja à ahənj dagay uwarà.[✠]

²⁴ La gay uwaga la abà, Zəzagəla asal mapəhanula gay anik bokuba uwanay, azlamis səla uwaga, Agar atà la Sara, apəhanula gay makəs vok slawda gərgər səla uwana Zəzagəla adəhənj. Agar dugu mayàgə, apəhla ala kà makəs vok slawda uwana Zəzagəla adəhənj la Musa la gudənj Sənyayi la afik, bəzi anja kà ayyà kà à mayà à abà. ²⁵ Banja tapəhay lakəl anja Agar kà, tapəhay kà lakəl anja gudənj Sənyayi la kutso anja Arabiya la abà, masla babay kà, bokuba Urusalima anja lakana. Kà uwana azladza uwana tadza à ahənj la abà gesina kà, azlamayà anja mapəhay. ²⁶ Ama Urusalima dziriga anja Zəzagəla, uwana la zagəla la afik kà, masla la makor gəl la abà, masla la uwana bokuba iyə gami. ²⁷ Bokuba uwana wakitə Zəzagəla agod:

'Ràb, à kak dəgər, uwana kadaslah godega ala aw, wiyà la marabay à kak, uwana katsən mazay anja huđ bəzi à adi aw, kà uwana mis makudəkəy gə, adəgay la azlabəza anjuwaw dəfəwə à gay anja mis uwana la zil la tsəh.[✠]

²⁸ Azladedə, akul kà, akul azlabəza uwana tayyàh atà à tsəh anja makəs vok slawda anja Zəzagəla, akul gesina bokuba Isak. ²⁹ Dagay uwarà, bəzi uwana Agar ayyà bokuba azlabəza anik kà, atərəb bəzi uwana Sara ayyà, la ndzəfa anja Masasəfok. Lakana babay kà bà kiya uwaga aya gətənanj. ³⁰ Ama mana wakitə agod ma?

'Kudək dugu mayàgə la bəzi anja gesina, kà uwana bəzi anja dugu mayàgə kà, azu w gəy aw, say bəzi anja mis makor gəl gə pəra.[✠]

³¹ Azladedə gulo, anu, anu azlabəza anja dugu mayàgə aw, ama kà anu azlabəza anja mis makor gəl gə.

5

Makor gəl anja masla madijal gəl à vok

¹ Kristu apəlla anu ala la tsəh anja mapəhay anja azla Yahudiya, kà anu anja madz à ahənj la makor gəl la abà anja tetuwa. Kitə kà, wəfəwə vok à uda, kavəw tetəvi à dza awulla akul à mayà à abà aya aw.

² Lagwa, gi Pol gəpəh à akul la paraka, kà banja dza asal makədəw vok à uda kà, kà uwana Kristu adəhənj kà anjul kà, adəpakay kà deyday zlə! ³ Gəpəh à akul aya kà, kəla dza uwana asal makədəw vok à uda kà, akəsə vok kà manəf mapəhay la tetəvi anja gesina. ⁴ Iyay, akul azladza, uwana kadzugwaw kà Zəzagəla adaga akul dziriga la huma anja, à kà uwana kanəfaw mapəhay anja azla Yahudiya kà, akul la Kristu kà kavəhəw ala, kaslawalla vok anja mabəz tatak delga anja Zəzagəla aya aw. ⁵ Ama anu kà, məfa manəwənj gami kà à Zəzagəla uwana à afik adaga anu dziriga la huma anja, la ndzəfa anja Masasəfok tsikaslaga, uwana adəh sləray kà madijal gəl à vok gami. ⁶ Tatak uwana agəf à anu njuləm kà, say madij gəl à masla, madij gəl à vok uwaga la uwana, avà à anu ndzəfa kà mawoy azladza anik babay.

⁷ Haday, kadzəw kà tetəvi anjul delga. Uwa adəf à akul gay à ahənj anja manəf dziriga uwa? ⁸ Uwana tapəh à akul kà mabəz akul à tsəh uwaga kà, agu wà à wanj kà la slaka Zəzagəla, uwana azalà akul, aw. ⁹ Tatak makəslinj njuv akəsł pəhəw, bokuba uwana

azladza tapahay. ¹⁰ Kà uwana anu gesina kà, anu la Sufel Yesu Kristu la abà. Ndzër, ñodëgi kà, kadädzugwaw bokuba anjulo, ñgaha gësöl babay kà, dza uwana akädakulla gël à vok, adägay uwi kà, Zëzagëla adädukw ala seriya à gël.

¹¹ Azladedä, kà anjulo kà, gëda à huma à gay kà maziñ gay makëdëv à uda ñgaha kà Zëzagëla anja makës anu aw. Agayña gëziñ kà kiya uwaga kà naka azladza tatëwëb gi aw, ñgaha naka takweska mamëtsay anja Kristu la ahäf la adi aw. ¹² Azladza uwaga takäd à akul ala gël à vok la makëdëv vok à uda kà, tadädfëslah vok anjatà, vähàwla akul nna tetuwa.

¹³ Azladedä, akul kà, tazalà akul, kà akul anja madz à ahëñ la makor gël la abà. Baña akul la makor gël la abà, kiya uwanay kà, kadzugwaw kà madäh tatak uwana asa à vok anjul përa aw, ama wòyàw vok kà akul à akul, ñgaha zlakàw vok kà akul à akul.

¹⁴ Mapëhay gesina ahamà mafäh akur ahëñ tekula à afik:

'Wòyà masla magay anjak, bokuba gël anjak.'^{*}

¹⁵ Ama baña katsahaw vok, kapadähaw vok à gay bokuba akul azlatatak fëta kà, dähàw hanjëli kà akul anja mawas vok ala kà akul à akul aw.

Vàw tetëvi à Masasëdök Zëzagëla adala akul

¹⁶ Aganay à gay uwana asa à gi mapëh à akul: Säkàw à Masasëdök Zëzagëla akor akul, kanëfaw mabila anja vok anjul aw. ¹⁷ Tatak uwana asa à slëb vok anja dza adëhëñ kà, asa à Masasëdök Zëzagëla aw, ñgaha tatak uwana Masasëdök adëhëñ bay kà, asa slëb vok anja dza aw. Guvël la ahëñ la tataka anjatà la abà, kiya uwaga kà, mësala vok mëdäh, uwana asa gël gami aw. ¹⁸ Ama baña Masasëdök Zëzagëla adala akul kà, mapëhay aga la ndzëda lakël anjul aya aw.

¹⁹ Azlatatak uwana asa à slëb vok anja dza kà madëhëñ kà, adzäd ala: Mabila, slëray àläh gä, këla slëray mawisiga, ²⁰ taslökaw azlamazlazlay, tasäh nalkokodzi, fäh vok guvël à adi, tagazlay, azlamajor, azlamëna lëv, tadzugw kà à gël anjatà përa, tatsakla, tatsëna vok à gay aw. ²¹ Ñgaha azlamëna à adi, azlamëna guzu, azlamëna marazlay mawisiga la azlaslëray anik tsëhay gä uwaga. Gëpëh à akul à vok à abà bokuba uwana gëdapëh à akul dagay uwarà kà: Azlamëna madäh tsëhay gä uwaga kà, tadäbëzla slaka la makoray anja Zëzagëla aw.

²² Ama mayyay anja Masasëdök tsikasla kà: Masal, marabay, lapiya, mabasiñ delga, dzëba anja sëla aw, madäh delga à dza anik, azladza dziriga, ²³ lëv tëlëmna, makës lëv. Mapëhay adëf gay à uwaga à ahëñ aw. ²⁴ Azladza uwana azlaana Kristu kà, azlatatak mawisiga gesina uwana tatuwal à tsëh, uwaga bokuba tatatasl à ahäf anja Kristu à adi. ²⁵ Masasëdök Zëzagëla avà à anu sifa, say mëkës gay anja Masasëdök uwaga, la sifa gami babay gesina. ²⁶ Mëdähà zlapay aw, mëtafädähà lëv à azladza anik aw, mëfà manjor à azladza anik à adi aw.

6

Mazab vok mahanay

¹ Azladedä gulo, baña kanëñaw dza anik uwana adada madäh mawisiga à abà kà, akul uwana akul la Masasëdök Zëzagëla kà zlakàwwàñ, kà masla anja mawulay à tetëvi à tsëh ala, ama dähàwwàñ kà la lëv tëlëmmaga. Gëgod à këla uwabeyuwi anjul, dähàw hanjëli kà akul la gël anjul anja matëdal à tsëh bay suwan aw. ² Zäbàw vok mahanay kà akul à akul, kiya uwanay la uwana kà, kakësay mapëhay anja Kristu. ³ Baña dza anëwëz gël anja 'Gi mëñga', agodäy, ama dza mëñga aw, kiya uwaga kà adaz gël anja ala. ⁴ Say këla uwabeyuwi anëwëz slëray anja. Baña ada à vok kà, aslala vok azlëb uwana adähàn la gël anja. Manëkuä magagazlëla la ahëñ la slëray anja dza anik aw, ⁵ kà uwana leri, këla uwabeyuwi azëb mahanay anja.

⁶ Dza uwana atapla gay Zëzagëla, aslala vok mav à ahëñ dëwdëw tatak delga la masla matapla.

⁷ Kapapataw gël anjul aw! Zëzagëla kà, asaka dza uwana adähla marazlay aw. Këla tatak uwana dza aslëka, la uwana atsëdäy suwan. ⁸ Baña dza aslëka mawoyëñ anja vok anja kà, mawoyëñ anja vok anja uwaga la uwana adätsëdäy, uwaga mamëtsay. Ama baña aslëkay kà uwana asa à Masasëdök kà, adätsëdäy kà sifa adëv à gay aw, Masasëdök avà uwana. ⁹ Tetuwa mësak à madäh delga la tsëh ala aw, kà uwana baña mëwad vok à uda kà, mëdätsëdäy la vuä uwana kaslà adäslay. ¹⁰ Lagonay kà, mëdähà delga à azladza gesina, ama kaykay kà, à azlauwana azlaana Yesu Kristu.

Makëf gël à gay anja Pol

¹¹ Nərèzàw uwana gətsetsèr akul lagonay, gətsetseray kà mənğa mənğa la ahàl gulo dziri. ¹² Azladza uwana asa à atà mahəfay à azladza à adi la sləray anja vok deyday, la uwana tatərəb akul la gay anja makadav vok à uda, ama tadàh uwaga gesina kà, kà azla Yahudiya anja matərəb atà, à baņa taza Kristu uwana la ahàf la adi aw. ¹³ Baməraka tadagay azlamakadav à uda gà bay kà tadiņal gəl à mapəhay à vok aw. Asa à atà kakadav vok à uda kà, kà atà anja mamats ala zlapay la akul pəra. ¹⁴ Gi kà, gəts zlapay, kà la ahàf anja Sufəl Yesu, uwana amətsal à adi. Gəts zlapay la tatak anik aw. Kà mamətsay anja uwana aməts à ahàf à adi kà, tatak anja gudəņ à vok gesina kà, adapakay kà mamətsay gà la slaka gulo, gi bay kà, gədapakay kà bokuba mamətsay gà la huma tatak anja gudəņ à vok. ¹⁵ Baņa dza makadəv à uda gà, adagay makadəv à uda gà aw kà, gərgər la ahəņ aw. Tatak mənğa kà, magay dza mawga, uwaga la uwana aduwa à vok. ¹⁶ Dəwdəw dza, uwana tanəf maw tetəvi uwaga, ŋgaha azladza uwana tsəhay anja Zəzagəla la dziriga babay kà, Zəzagəla avà à atà lapiya, ŋgaha adaha à atà delga.

¹⁷ La huma la gay kà, dza adəpapata gi aw. Gi kà gi mayà anja Yesu, azlamokfak, uwana la vok gulo kà, tapəhla uwaga ala.

¹⁸ Azladedə gulo, vok mahamay anja Sufəl gami Yesu Kristu, agay la akul gesina. Hadfay gà! Amen.

WAKITÀ UWANA POL ATSETSÈR À AZLA EFESƏYA Lettre de Paul aux Ephésiens

Ayyi

¹ Gi Pol la uwana gətsətsər wakitə uwanay, à gi uwana Zəzagəla akəsəni gi, kà gi ana magay masləlay anja Yesu Kristu. Gəsləl à akul à awtəy, akul azlaməna masla gay Zəzagəla la Efesus, akul uwana kadiŋaw gəl à Yesu Kristu à vok, ŋgaha akul uwana kagaw tekula la masla la abà. ² Zəzagəla Baba gami, la Sufəl gami Yesu Kristu tapisakulla gay à vok ŋgaha la mav à akul lapiya.

Tatak delga uwana Zəzagəla avà à tsəhay anja.

³ Məzləbà Zəzagəla Baba anja Yesu Kristu gami! Uwana apis à anu gay à vok la mav à anu tatak gesina, uwana la zagəla, la makoray anja la abà, avà à anu uwana kà, kà uwaga mədahama gay à vok la Yesu Kristu. ⁴ Zəzagəla atsatsəmāni anu la Yesu Kristu dagay uwarà, à mok uwana aləg madəh gudəŋ à vok kà, kà anu anja magay azlaanja, kokufa mawisiga la huma anja bay. ⁵ Kà uwana awwoya anu, akəs kà mapakanula kà azlabəza anja kà sləray uwana Yesu Kristu adəhəŋ. Akəsəl à gəl, à uwana adəhəŋ kiya uwaga. ⁶ Adəhəŋ kiya uwanay kà, kà anu anja mazləbay kà vok mahamay anja, kà uwaga dzəba anja səla aw. Avà à anu kà deyday pəra, kiya uwaga kà, uwana mədagay tekula la bəzi gay ləv anja ndzer.

⁷ Kà uwana adapalla anu la aniz anja Kona anja uwaga, adamatsan tsakana gami ala, ŋgaha apəhanula məŋ vok mahamay anja. ⁸ Avà à anu vok mahamay la mahənla la pawasla, bokuba magodəy kà, apakənula kà azlaməna matsihila gə, adəhəŋ kiya uwaga kà, kà anu anja masəlay hanjkəli anja à tsəh. ⁹ Apəhanula tatak mahadə vok à ahəŋ gə, uwana uwarà asəl madəhəŋ, tatak uwana adzūgw madəhəŋ la Yesu Kristu. ¹⁰ Madzugway anja kà, mok uwana kasla adəsəy kà, adahama gay azlatatak uwana à vok la zagəla la uwana la vədah, kà Yesu Kristu anja magay Sufəl lakəl anja.

¹¹ Zəzagəla adəhəŋ azlatatak gesina bokuba uwana asal madəhəŋ, kiya uwaga atsatsəmāni anu dagay uwarà, bokuba uwana asa à gəl anja, kà anu anja magay azlaanja. Kiya uwanay mədahama gay à vok la Kristu, mədabəza humà mazuw gay gami, ¹² kà azladza anja mazləb mənğa anja. Anu, anu azladza matera uwana məvə ləv gami à Yesu Kristu, ¹³ kà anjul kà, kiya uwaga babay. Katsənaw gay dziriga, uwana gay marabəŋ, la uwana Zəzagəla abəlla akul, kavəw ləv anjul à Yesu Kristu, kadəhəwəŋ kiya uwaga kà, kà uwana kahaməw gay à vok la masla. Zəzagəla adənah à akul masəlay anja à vok, masəlay uwaga kà, kà Masasədok tsikasla uwana apəh à ahəŋ uwarə. ¹⁴ Avà à anu Masasədok dagay uwarə, ŋgaha apəlla ala kà mədabəz dəwəw tatak, uwana apəh à azlatsəhay anja à ahəŋ. Mədabəzal la vuɸ uwana Zəzagəla adəbəl anu anja tetuwa. Məzləbà Zəzagəla uwana mənğa!

Madəv kuɸa anja Pol

¹⁵ Kà uwaga à uwana, kikay gəgodəy à Zəzagəla kà anjul. Gətsənə mad à huma à gay anjul la madiŋ gəl à Sufəl Yesu Kristu à vok à abà, gətsənə mawoy azlaməna madiŋ gəl à Zəzagəla à vok anjul bay. ¹⁶ 'Kikay', gəgodəy à Zəzagəla koksikoksi kà anjul, à baŋa gədəval kuɸa. ¹⁷ Gədəv kuɸa à Zəzagəla Baba mənğa, Zəzagəla gə, la uwaga à uwana Sufəl Yesu Kristu adəhəla sləray anja, gədəval kuɸa, kà masla anja matapakakulla matsihila anja, ŋgaha masla anja mav à akul maslay la ŋuləm anja masəl masla. ¹⁸ Gədəv kuɸa à Zəzagəla kà masla mapəzl akul hanjkəli anjul la uɸaka anja, kà akul anja manəŋ makəd gəl à ahəŋ anja tetəvi, uwana akul kadəbəzəw à abatə, katsənaw magay mənğa anja makoray anja, la azlanadzipo uwana adəhəŋ à ahəŋ, kà anja azladza anja gesina. ¹⁹ Asa à gi babay kà, kasəlaw mənğa anja ndzəɸa anja, kà aduwa tatak gesina, bokuba uwana ndzəɸa anja adəhə sləray la anu la abà, anu uwana madiŋ gəl à masla à vok. Ndzəɸa kà bə uwatə. ²⁰ A uwana adəhə sləray la Yesu la abà, awulla à uda la mamətsay. Mok uwana adawulla à uda la mamətsay kà: "Adzə madzay la ahəl kaf gulo lakəl", Zəzagəla agədəfal "la zagəla." ²¹ Kagay Sufəl lakəl anja azlatatak gesina, lakəl anja azlaməlika la azlasufəl anjatə, ŋgaha lakəl anja azlatatak gesina, uwana atə la ndzəɸa la zagəla bay." Masla la uwana aduwa atə. Aga Sufəl lakəl anja azladza gesina, bamərakə tadəgay azlauwi, aga lakəl anja azlauwana la gudəŋ uwanay la vok babay, ŋgaha lakəl anja gudəŋ à vok, uwana adəsə à wanj la huma aya bawbaw. ²² Zəzagəla abək tatak gesina à tsəh

asik anha, apakən ala kà Sufəl lakəl anja tatak gesina, ngaha agən madzahaga anja azlaməna gay Zəzagəla.[✧] ²³ Maham à ahən mənə gay Zəzagəla kà, vok anja Kristu, la uwaga la abà la uwana, masla apəhla vok ala la paraka, ngaha azlatatak delga gə gesina kà, aga kà la masla la abà.

2

Dagay mamətsay tsərəh à sifa

¹ Mok uwana uwarà kà, akul kà bokuba akul azlamamatsayga la sifa ankul la abà, kà uwana kadahàhəwəwən kà tsakana. ² Kanəfəw madəhəŋ anja azladza gudəŋ à vok uwanay, kanəfəw sufəl anja azlamasasəfək mawisiga uwana seteni, aga la ndzəda la tataka anja zagəla la abà la kutso. Masla la uwana adəh sləray la azladza uwana la abà takweska Zəzagəla. ³ Anu gesina kà, mөгə bokuba atà babay à uwarà, mədahən kà dēwdēw tatak mawisiga, uwana asà à ləv gami koksikoksi. Məzləbəh kà gəl gami pəra. Kà uwana mөгə kiya uwaga kà, anaka seriya anja Zəzagəla atəf à anu à gəl bokuba à azladza anik babay.

⁴ Ama lagwa kà, kiya uwaga aya aw. Hərəz kà, vok ahamà Zəzagəla mənğa kà, anu kà mapəlla vok mahamay anha ala. ⁵ Baməraka mədagay bokuba azlamamatsayga la tsakana gami la abà, masla kà avà à anu sifa adəv à gay aw, uwana la Yesu Kristu la abà. Abəl akul kà deyday pəra. ⁶ Kà uwana mədagay tekula la Yesu Kristu, awulla anu à uda la mamətsay, abək anu à zagəla, kà anu anja makoray la slaka gə la Kristu. ⁷ Adəhən dzəba anha səla aw, kiya uwanay kà, kà ahəl anja Yesu Kristu, kà mapəlla ala la azlakasla uwana la abà, adəsa à wəŋ la huma la gay, kà vok mahamay anha kà mөгə. Aduwa tatak gesina. ⁸ Zəzagəla abəl akul, kà uwana kadiŋaw gəl à masla à vok. La madəhəŋ kiya uwaga, abəl anu deyday, awkà kà madəhəŋ ankul aw. Avà à akul mapis gay à vok anha deyday aya. ⁹ Zlahaw kagođaw kà, kà uwana mədahən sləray delga, kagođaw zlə kà. Avà kà deyday, dza atsa zlapay aw. ¹⁰ Aga kiya uwanay, kà uwana masla la uwana adəhà à anu. Avà à anu sifa mawga la Yesu Kristu, kà azlatatak delga la sifa gami la abà, delga uwana adəhən à ahən kà dagay uwarà kà anu anja madəhəŋ.

Mədahama gay à vok la Yesu la abà

¹¹ Kà uwaga kà, gəwulla à akul à gəl, akul azladza uwana azla Yahudiya aw, dagay la mayyi akul, à akul, azladza uwana makadav atà à uda gə kà, tazala à akul ala kà: Akul azlamakadav à uda gə aw. Ama tapəhay kà lakəl anja tatak uwana la uda gə pəra, à uwana azladza tadehəŋ à vok anətà à vok pəra. ¹² Anul akul à gəl kà, la kasla uwatà, kagəw kərkər la Kristu, uwana mafal dzakwa à gəl gə, kagəw azla Isərayel aw. Zəzagəla akəs vok slawda la tsəhay anha, la uwana la abà apəh à atà à ahən kà anja madəfehəŋ, ama akul kà, tatügw la akul aw, kà uwana akul azladza à uda, tatak la ahən, à uwana kafawal yewdi à tsəh la uwaga la abà aw. Kagəw la gudəŋ la vok, ama kasələw Zəzagəla aw. ¹³ Uwarà kà, kagəw kərkər la Zəzagəla. Ama lagonay kà, kahamaw gay à vok la Kristu. A masla uwana asəkw anjiz anha à vədəh kà akul, kità kà, akul kərkər la masla aya aw. ¹⁴ Kikay kà masla à uwana masəl vok la ahən la tataka gami la abà. Dagay uwarà azla Yahudiya la azladza uwana azla Yahudiya aw tavəhəla. Ama masla la uwana apakənula tsəhay tekula, madəguva la ahən uwarà la tataka gami la abà, bokuba zlagam. Masla akaləh à ahən, la mamətsay anha. ¹⁵ Mapəhay anja azla Yahudiya agod: ‘Dahən uwanay, uwanay’, ama masla azəŋ ala. Adəhən kiya uwaga kà, kà masla anja maham gay azla Yahudiya à vok la azladza uwana azla Yahudiya aw. Tagay tekula la masla la abà tadəsəl vok, ¹⁶ kà uwana aməts à ahəf à adi, madəguva la ahən la tataka anətà la abà aya aw, adazəb à uda. Kikay kà masla adapakatəla kà tsəhay anha, ngaha adəsəl atə vok. ¹⁷ Asà à wəŋ à gudəŋ à vok, kà mazakulla gay marabən, akul uwana akul azla Yahudiya aw kagəw kərkər la Zəzagəla uwarà, lagonay kà kabəzəwəwəl lapiya. Ngaha à anu azla Yahudiya, uwana mөгə nekwa la slaka Zəzagəla mədəbəz lapiya babay.[✧] ¹⁸ Gəgəf kà anu azla Yahudiya, la akul uwana azla Yahudiya aw, kà anu ngaha akul bay, mədəbəz tetəvi la Kristu la abà kà anu anja maz vok à slaka Zəzagəla. Masasəfək tsikasla azlak à akul, bə Masasəfək gə la uwaga azlak à anu babay.

¹⁹ Kità kà, akul azlaməlok aya zlə ma aw. Akul azlaməna mas à wəŋ la uda aya aw. Akul azladza gudəŋ adagay, bokuba azladza anik, uwana azla anja Zəzagəla, akul la huf gəy anha adagay. ²⁰ Akul kà bokuba akul azla akur uwana tahazla gəy, matatukw gəy kà azlaməna asik, la azlaməna mapəh à atə gay ahəl kà mapahəh à azladza, ngaha Yesu Kristu la gəl anha kà, akur mawad gəy, akəs azlaanik. ²¹ Kà masla la uwana, gəy adza à ahən la afik, ngaha azala vok à gəl akul la azladza anik babay kà, kagaw kà bokuba

gây uwanay Sufəl Zəzagəla adza à ahəj la aku. ²² Kà uwana kahamaw gay à vok la Yesu Kristu, akul babay la azladza anik kà, bokuba gâj uwanay la uwana la aku Masasəfok Zəzagəla adza à ahəj la aku.

3

Zəzagəla ayàh kà Pol az gay marabəj à azladza uwana azla Yahudiya aw

¹ Kà uwaga à uwana gəpəh à akul kà, gi Pol gədav kuđa à Zəzagəla kà ankul. Gi la danaj kà Yesu Kristu, tawəđa gi kà akul, uwana azla Yahudiya aw. ² Təga kà, katsənəwəwəj kà Zəzagəla afə gi à ahəj, kà gi anja madəh sləray kà ankul. Kà vok mahamay anja à uwana gəđehəj kiya uwanay. ³ Zəzagəla apəhgəla tatak mahadəj à ahəj gə, nasiri uwana uwarə, kà gi anja masəlay. Gədatsetser à akul lakəl anja nasiri uwaga juv. ⁴ Anja, kadzenaw uwaga kà, kadatsenaw nasiri uwana gəsəl lakəl anja Yesu Kristu. ⁵ La məl uwana la abə, adada à lig kà, Zəzagəla apəhla tatak uwaga à azladza aw. Ama lagonay kà, adasləl Masasəfok anja à wan kà mapəhla à azlaməna maz gay anja, la à azlaməna mapəh à ata gay ahəl kà mapəh à azladza uwana abək atə à fəta à awtəy kà azlaanja. ⁶ Aganay tatak uwana mapəhla ala gə: Uwana Zəzagəla avə à azla Yahudiya bokuba ləmana kà, akul uwana akul azla Yahudiya aw kà, kadəbəzawwal babay suwanj: Akul la azla Yahudiya kà, kagaw tekula. Tatak uwana Zəzagəla apəh à ahəj, kà mav à azladza, uwana azlaanja Yesu Kristu kà, adavə à akul babay. Azlatatak uwaga kà, tasə à uda kà la gay marabəj la abə.

⁷ Vok ahamə Zəzagəla, azəb gi à sləray anja à abə, kà gi anja maz gay marabəj uwanay à azladza. Adahə uwaga kà la maslay anja. ⁸ Gi masla mazəb dagum anja azlaməna madiñal gəl à vok anik gesina, bə la uwaga bay kà, Zəzagəla akəs à gi, kà gi anja maz gay marabəj, uwana asə à uda la ahəl anja Yesu Kristu, à azladza uwana azla Yahudiya aw. Ləmana uwaga kà, mənğa zəjzəj, kà matsənəj à uda anja azladza. ⁹ Masla la uwana avə à gi tetəvi kà mapəhla à azladza gesina lakəl anja tatak mahadəj à ahəj gə, uwana uwarə Zəzagəla apəh, adapaka vok. Zəzagəla la uwana anjaləh azlatatak gesina, adahə tatak uwaga à ahəj la yewdi anja azladza, tsərəh à lakana. ¹⁰ Lagonay kà, Zəzagəla adapəhla ala la tataka azlaməna madiñal gəl à vok la abə, kà azlamənika la azlasufəl anjatə tadənəj azlaməna madiñal gəl à vok, nğaha atə anja masəl matsihila anja Zəzagəla. Kà uwana matsihila anja kà gərgər la azlatetəvi anik anik. ¹¹ Kiya uwaga adahəj bokuba uwana ayəh madəhəj, à mok uwana gudəj à vok aləg madzəka à vok dadəj. Apəhla uwaga ala la magola la ahəl anja Sufəl gami Yesu Kristu. ¹² Kà uwana anu azlaanja Yesu Kristu, nğaha mədiñ gəl à masla à vok kà, mədəza vok à slaka Zəzagəla la kokuđa kurit yewdi. ¹³ Tsa Zəzagəla adadəhəj kiya uwanay kà, gədəv à akul kuđa, kà ləv anja mavalay akul à gay, kà uwana gəs nğərpa kà akul, aw. Azlauwala kà à vok, kà akul karabaw kà dza uwana as nğərpa kà akul, hadaj.

Masal anja Yesu

¹⁴ Kà anja azlatatak uwanay gədəpəh à akul kà, gədəv kuđa à Zəzagəla la makədəf à ahəj, nğaha la iyaw tugwi kà ankul. ¹⁵ Ndzer, Baba uwanay kà, Baba anja azladza gesina uwana la zagəla, nğaha la azlauwana la vədah. ¹⁶ Ndzer kà, masla kà la mazləbay, akoray gesina. Kitə kà, gədəval kuđa kà, kà Masasəfok anja anja mav à akul ndzəđa, kà akul anja magay la ndzəđa la ləv ankul la tsəh. ¹⁷ Gədəval kuđa babay, kà Yesu Kristu anja madz à ahəj la ləv ankul la tsəh, kà uwana kadiñaw gəl à masla à vok. Gədəval kuđa babay, kà akul anja mawoy vok akul à akul. Banja kawoyaw vok kà akul à akul, mawoy vok ankul adəgay la ndzəđa, bokuba ahəf uwana adahəla sliləh anja à tsəh iyaw, nğaha bokuba gâj uwana atsizl à matatukway à afik lela. ¹⁸ Kiya uwaga akul, la azlaməna gay Zəzagəla anik gesina kà, sələw kà Yesu Kristu awoya anu kaykay. Baməraka kadədaw à uwali, kadədaw à zagəla, kadədaw à afik à agu kà, mawoy akul anja kà, bə aga la ahəj la abata. ¹⁹ Gədəv kuđa à Zəzagəla kà, kà akul anja masəl mawoyəj anja, uwana məslala vok anja matsənəj la paraka dadəj aw. Kà azlatatak uwana tahəj Zəzagəla ala, anja mahəj ləv gami ala suwanj.

²⁰ Zəzagəla kà, aslala vok anja madəh tatak gesina. Aduwa gesina, uwana mənawal kà madəhəj, aduwa madzugway gami gesina, adəhəj kà la maslay anja, uwana adəh sləray la anu la abə. ²¹ Məzləbə masla, anu azlaməna maham à ahəj mənə gay Zəzagəla gesina, nğaha Yesu Kristu bay. Məzləbə masla koksikoksi anja tsərəh à awtəy! Amen.

4

Vok anja Yesu Kristu kà tekula

¹ Tsa kiya uwanay kà, gødøv à akul kufa, kà uwana tadùw gi à danjaj kà sløray anja Suføl Yesu Kristu, uwana gødehøn. Kamkam gøtuwa à akul à vok kà matuway kà, nəfaw maday delga à uwana Zəzagəla azaləkulla. ² Gəw tələmma lela, gəw azladza delga, gəw azlaməna mabasiñ, wòyàw vok akul à akul, ngaha basəwwəñ vok kà akul à akul babay. ³ Wədfəw vok à uda kà madz à ahəñ la tekula la abà, bokuba uwana Masasəfok apakànula tekula, ngaha dzəw à ahəñ la lapiya la abà la tataka anjul la abà, kà akul anja magay tekula. ⁴ Maham à ahəñ məna madiñal gəl à vok bokuba vok anja Kristu, vok tekula pəra. Ngaha Masasəfok bay, kà tekula pəra. Tatak uwana Zəzagəla azalànula kà, anu anja maduwal à adi kà tekula pəra babay aya. ⁵ Suføl gami Yesu kà tekula, madiñal gəl à vok gami kà tekula, ngaha tetəvi anja batem bay kà tekula. ⁶ Zəzagəla kà tekula pəra, uwana masla Baba anja azladza gesina. Akoray lakəl anja tatak gesina, aga la slaka gesina, aga la azlatatak gesina la abà babay.

⁷ Kəla uwabeyuwi gami gesina abəzal mavəy la anja la anja, bokuba uwana asa à Yesu Kristu, avà à anu. ⁸ Uwaga bokuba uwana tatsetsər à wakità Zəzagəla à abà, tatsetsər lakəl anja Kristu kà:

'Mok uwana adada à afik à zagəla kà, akəfəsl azlaməna məzam anja, ahahay atà à tsəh, adala atà à afik bay. La lig la ahəñ avəh azlamavəy à azladza la gudəñ la vok.'^{*}

⁹ Haday, la magodəy: Maday à zagəla, mana asal magodəy ma? Uwaga asal magodəy kà, asà à vədah tsəràh à kutso à abà dadəñ. ¹⁰ Dza uwana asà à abanay à vədah kà, bə dza gə la uwana ahəd à zagəla. Amatsikakadəy anja zagəla à afik, kà masla anja makoray lakəl anja azlatatak gesina. ¹¹ Masla la uwana avəh azlamaslay à azladza. A azlaməna masləlay anik avà à atà maslay, kà mad maz gay anja. A azlaanik mapəh à atà gay ahəl anja Zəzagəla, kà mapəh à azladza, à azladza anik bay, avà à atà maslay kà maz gay anja à azladza uwana tasəl Zəzagəla aw. A azladza anik bay, avà à atà maslay kà manəñla azlamaham à ahəñ məna gay Zəzagəla, ngaha azlaanik babay kà, avà à atà maslay kà matapla azladza anik. ¹² Avəh sløray uwaga kiya uwaga, kà masla anja madəh azlaməna gay Zəzagəla à ahəñ, kà madəh sløray anja, kà maham à ahəñ məna gay Zəzagəla uwatà à vok anja Kristu anja mad à huma à gay. ¹³ Ada à huma à gay la mawaf vok à uda kà, tsəràh à uwana anu mədəgay tekula, kà uwana mədav ləv gami à Yesu gesina, ngaha gesina gami məsəl masla. Kiya uwaga mədəgay azlazil, mədəgay sətaka bokuba Kristu bay. ¹⁴ Kità kà, la kaslā uwaga mədəgay azlabəza aya aw. Azlaməna mapapatəh dza uwana tapapatəh à azladza la demdəm anjatà kà, la azlagay anjatà uwana tapapatənula, tadəza anu à tetəvi à tsəh la matapanula anjatà aw, bokuba uwana afad abəlak kəslah iyaw, wùlā à abanay, wùlā à abanay lakəl iyaw aw. ¹⁵ Məga kiya uwaga aw, məwoya vok kà anu à anu, ngaha məpəh vok dziriga la tataka gami la abà, kà anu anja magay bokuba Yesu ndzer, à masla uwana lakəl gami la afik gesina. ¹⁶ Masla la uwana abək azladza à ahəñ gesina, kà atà anja magay tekula bokuba vok anja dza uwana atsà vok la azlaamil. La vok anja dza kà kiya uwaga babay. Banja azlamanabay anja vok tadəh sløray anjatà lela kà, vok gesina azigənay lela. Kiya uwaga babay la maham à ahəñ məna gay Zəzagəla, banja azladza tawoya vok kà atà kà atà kà, maham à ahəñ uwana vok anja Kristu kà, agay la ndzəfa kayakay.

Sifa mawga la Kristu la abà

¹⁷ Tatak uwana asa à gi mapəhay kà gəpəhay la sləm anja Suføl, gi gəfanj à afik la magodəy kà, kanəfaw tetəvi uwana azlauwana tasəl Zəzagəla aw tanəfay aw, kà uwana atà kà tadzugway kà azlatatak deydayga pəra. ¹⁸ Madzugway anjatà kà mələs gə. La huma anja sifa mawga, uwana Zəzagəla avəy kà, atà kà bokuba azlaməlokga, kà uwana atà la gəl dzanjdzanja hawhahaw, ngaha kiya uwaga kà tasəl tetəvi anja Zəzagəla aw. ¹⁹ Ziruwī anjatà la ahəñ aw, tavà vok anjatà kà azlatatak mawisiga pəra, ngaha tatsizl à ahəñ aw.

²⁰ Kà anjul kà, Kristu atəpakulla kiya uwanay aw. ²¹ Masla la uwana kakəsəwwalla gay la ahəl ala aw takay? Akul uwana kahaməw gay à vok la Kristu kà, tatəpakulla azlatatak delga, uwana apəhànula uwaga aw takay? ²² Tsa banja kiya uwanay kà, kanəfaw tetəvi, uwana kanəfəhəw uwarə aya aw. Tsəkəw vok ala, kiya matsokw makatsekatsa la vok ala, kà uwana tetəvi anjul kà awis akul ala, kà uwana kawòyàhəw azlatatak mawisiga la mapapat gəl anjul. ²³ Vəw tetəvi à Zəzagəla, kà mazəb madzugway anjul, ngaha la ləv anjul anja magay mawga. ²⁴ Nəfaw tetəvi mawga uwana Zəzagəla adəhəñ à ahəñ kà anja magay kiya masla. Kiya matsokw lukut mawga à vok, kà uwana tetəvi uwatà kà dziriga, akəs à Zəzagəla à gəl.^{*}

²⁵ Kiya uwaga kà, kadahaw fida aya aw, pèhàw kà dziriga la azladza anik pəra, kà uwana anu gesina mədagay tekula.* ²⁶ Baŋa kapakàw ləv kà, dāhàw hanjəli kà mapak ləv adala akul à madəhəŋ mawisiga à abà aw. Baŋa kadapakaw ləv, kadzaw à ahəŋ tsərah à matəf à ahəŋ afats aw.* ²⁷ Kavàw tetəvi à seteni aw. ²⁸ Azlaməna gəl tasaka à gəl, tadaha sləray la ahəl anjətà, kà atà anja mazlak azlauwana tanəkuda tatak babay. ²⁹ Pèhàw kà azlagay uwana tazigəŋ azladza anik, awkà kapəhaw azlagay deydayga aw; la tetəvi anja Zəzagəla la ama kà, pèhàw kà azlagay uwana azladza taslay kà anja matsəbəl sləm lela. ³⁰ Kavàw nğərpa à Masasəfok Zəzagəla, uwana la ləv anjul la tsəh aw. Masasəfok uwaga kà, masəlay uwana Zəzagəla afà à akul à vok, kà masla mapəhla ala kà akul azlaanja. Apəhla ala babay kà bawbaw, kà adəbəl anu anja tetuwa. ³¹ Səwla azlatatak dəhakakga à uda la ləv anjul la tsəh gesina la maf dza à ləv à abà la mapak ləv. Kabayaw vok gay aw, katsakaw vok magodəhay à gəl aw, nğaha bay, kagaw azlaməna makəsafər aw. ³² Gəw tələmna la slaka azladza anik, dāhàw delga à azladza anik babay aya, matsahawwanj à vok ala, kà à akul à akul, kà tatak uwana Kristu adahəŋ kà anjul.

5

Maday la ufaka la abà

¹ Lagonay, kagaw azlabəza anja Zəzagəla, uwana awoya akul. Tsa kiya uwanay kà, gəw bokuba masla. ² La azlatatak gesina uwana la abà kadahaw à wanj kà, wəyàw azlaməna magay anjul bokuba uwana Kristu awoya anu. Mamətsay uwana akəs kà, kà masla mapakay bokuba tatak matuwulla à anu à gəl, uwana akəs à Zəzagəla à gəl.*

³ Lagwa kà, kagaw azladza anja Zəzagəla. Kadahaw mabila la azlatatak mawisiga anik anik babay aya aw. Kafaw yewdi à tatak anja azladza à tsəh aw. Baməraka bə mapəh gay lakəl anja kà, kapəhaw aw, ziruwi. ⁴ Delga kà anja mapəh azlagay ziruwigə aw, kusoŋu, nğaha la azlamatsakasl à gay deydayga kà delga aw. 'Kikay', gəfəw kà à Zəzagəla pəra kà tatak uwana adahəŋ. ⁵ Sələw kà, azlaməna mabila, nğaha la azlaməna madəh tsəhay tatak mawisiga uwaga, azlauwana tafa yewdi à tatak anja azladza à vok, la azlaməna masləkaw mazlazlay, la azlaməna hunja kà atà babay, tadəbəza makoray anja Zəzagəla la anja Kristu tetuwa aw, kà uwana azlatatak uwaga tahəd à atà à adi daduwa gay Zəzagəla.

⁶ Azladza tavavara akul la azlagay deydayga aw, kà azlatatak mawisiga uwaga la uwana Zəzagəla apakà ləv, nğaha apaka ləv gesina lakəl anja azlauwana takweska gay anja. ⁷ Kità kà, katapaw ahəl à kəsəf à abà akul nna aw. ⁸ Uwarà kà akul la mələs la abà. Ama lagonay kà, akul la ufaka la abà, kà uwana akul azlaanja Sufəl Yesu. Kiya uwaga kà, nəfəw maday anja azlauwana atà la ufaka la abà. ⁹ Uwana gəgəf uwaga kà, kà uwana ufaka kà avà azlatatak delga gesina, azlatatak dziriga, nğaha azlatatak dzəbə anja səla aw gə. ¹⁰ Wəfəw vok à uda, kà akul anja masəl azlatatak uwana akəs à Sufəl Zəzagəla à gəl. ¹¹ Kafaw ahəl anjul à sləray anja azladza uwana à abà, tadəh sləray mələs aw. Ama pèhəwatəla sləray mawisiga anjətà, uwana tadəhəŋ la dazuwaya. ¹² Azlatatak uwana tadəhəŋ la gəl la gəl kà kiya katsal à gay aw, ziruwi. ¹³ Baŋa tapəhla azlatatak uwaga ala gesina la paraka kà, kanəjaw madz à ahəŋ anjətà. ¹⁴ Kà uwana dəwdəw tatak uwana adapəhla vok ala, kà ufaka. Gay gə la uwaga à uwana tagəd: 'Tsən ala à kak uwana kadzəhəl,

Sà à afik la mamətsay la abà,

Kà Kristu anja mav à ka ufaka!'

¹⁵ Kiya uwaga kà, akul kà dāhəwwəŋ kà delga pəra, kəla kaslə gesina, dāhàw hanjəli la maday anjul, kadaw bokuba maday anja azladza uwana tasəl tatak aw aw, ama dāw kà bokuba azladza matsihilaga. ¹⁶ La mələ uwanay azladza tadəh azlatatak mawisiga anjuvaw kà, akul kà, dāhəwəŋ kà delga pəra kəla kaslə gesina. ¹⁷ Kagaw azlakusəŋu aw, ama fəw sləm à ahəŋ kà matsən tatak uwana asa à Sufəl gami kà madəhəŋ.

¹⁸ Guzu akad à akul aw, kawisaw vok anjul ala aw. Gəw kà say mahənlaga la Masasəfok Zəzagəla pəra. ¹⁹ Həbəw azlamahabay anja Zəzagəla, nğaha azlamahabay anik, uwana Masasəfok avà à akul. Həbəw uwaga à Sufəl gami, zləbəw masla la ləv anjul gesina. ²⁰ Kikay, gəfəw à Zəzagəla Baba, kà azlatatak gesina la sləm anja Sufəl gami Yesu Kristu. Kikay, gəfəwwal la kaslə gesina.

Azlamis la azlazil

²¹ Akul uwana kadiŋaw gəl à Yesu Kristu à vok, kəsəw vok gay la ahəl ala kà akul à akul, bokuba uwana kadahəwwəŋ à Kristu.

²² Akul azlamis, kəsəw gəl à ahəñ la huma aña azlazil añkul, kiya uwana kakəsaw gay aña Sufəl Yesu. ²³ Kà uwana zil kà sufəl aña mis aña, bokuba Kristu uwana Sufəl aña maham à ahəñ məna madiñal gəl à vok. Kristu la uwana gəl gə, maham à ahəñ məna madiñal gəl à vok kà, kà vok aña, ñgaha masla la uwana masla abəl atà. ²⁴ Tsa baña kiya uwanay kà, azlamis takəsə gəl à azlazil aña atà à ahəñ lela bokuba maham à ahəñ məna gay Zəzagəla, uwana akəs à gəl à Yesu Kristu à ahəñ.

²⁵ Akul azlazil, wòyàw azlamis añkul babay, bokuba Yesu Kristu uwana awoya azladza aña, ñgaha aməts kà aña atà. ²⁶ Aməts, kà maham à ahəñ məna gay Zəzagəla aña magay aña Zəzagəla aña tetuwa. Apalləñ ala la iyaw ñgaha la gay aña. Kiya uwaga taga tsikaslaga kà Zəzagəla. ²⁷ Kà uwana asal kà atsa à wañ à huma aña, la mazləbay kokudfa aləh, tsidfaña lela, kokudfa mawisiga, sərđaka kokudfa madəbani à tatak anik. ²⁸ Azlazil à bay kà kiya uwaga. Akul azlazil, wòyàw añkul bokuba uwana kawoyaw gəl añkul, dza uwana awoya mis aña kà, awoya gəl aña babay. ²⁹ Dza la ahəñ, aslala vok apəsew vok aña aw, say avəl tatak may, afal sləm lela bokuba uwana Kristu afa sləm à azlaməna maham à ahəñ məna gay Zəzagəla. ³⁰ Kà uwana anu gesina, mədagay bokuba vok aña, bokuba uwana tatsetsər à wakitə Zəzagəla à abə: ³¹ 'Kà uwaga zil asak baba aña la iyə aña, kà atà aña maham gay à vok la mis aña, atə səla aya aw, tapakà vok tekula.'* ³² Gay uwanay kà atapanula tatak dzəba aña səla aw gə. Apəhay kà lakəl aña Kristu la maham à ahəñ məna madiñal gəl à vok aña. ³³ Kiya uwaga kà, añkul babay. Kəla uwabeyuwi añkul awoya mis aña, bokuba uwana awoya gəl aña. Azlamis kəsəw gay aña azlazil añkul.

6

Azlabəza la azlababa aña atà

¹ Azlabəza, kəsəw gay aña azlababa añkul la azlaiyə añkul. Delga kà azlauwana tahamə gay à vok la Sufəl Yesu tadəhəñ kiya uwanay. ² Tekula aña azlamapəhay agodf: 'Kəs gay aña baba la iyə aña!'

Mapəhay uwaga kà mapəhay matera, uwana Zəzagəla azəñ à uwana à adi, apəh à ahəñ. ³ Uwaga agodf kà:

'Baña kasləkaw atà kà, adagay delga kà aña, kadəsafay məñga la gudəñ uwanay la vok.'*

⁴ Akul azlababa aña azlabəza, kadəhawla ləv à azlabəza añkul à huđ aw, dzadzaraw atə lela. Tapawatəla azlatatak, tsetsehawatəla, bokuba uwana Sufəl Yesu apəh à akul ala tetəvi.

Azlamayə la azlaməñga aña atà

⁵ Azlamayə kəsəw gay aña azlaməñga añkul la gudəñ uwanay la vok. Tsənəw atə. Ñgaha hòyàw yewdi aña atə, səkləw la huma aña atə, dəhəw sləray la ləv tekula. Aña kiya uwaga kà, kakəsaw Kristu. ⁶ Kadəhaw sləray kà huma yewdi aña atə pəra bokuba aña azlauwana asa atə kà azladza aña mazləb atə aw. Sələw kà, akul azlaməna sləray aña Kristu, ñgaha dəhəw azlatatak uwana asa à Zəzagəla gesina la ləv tekula. ⁷ Dəhəw sləray la ləv tekula bokuba uwana naka kadəhaw sləray aña Kristu, awkə bokuba uwana kadəhaw sləray aña azladza aw. ⁸ Sələw kà, kəla azlatatak delga, uwana dza adəhəñ kà, Sufəl Yesu Kristu adəpəlal. Adəgay mayə, adəgay masla makor gəl. ⁹ Akul azlaməñga aña azlamayə, dəhəw delga à azlamayə añkul babay, kafaw atə gasa à gəl aw, kà uwana kasələw kà, gesina añkul kà, akul aña madzahaga tekula uwana la zagəla la afik. Masla kà awah dza mavəhay aw.*

Kazlanja aña guvəl

¹⁰ Gay gulo uwana asa à gi makəđalla gəl kà, gəw la ndzəđa la ahəl aña Sufəl gami, la ndzəđa məñga aña la abə. ¹¹ Hələw kazlanja aña guvəl uwana Zəzagəla abək à akul gesina, kəsəwwəñ la ahəl, kà akul aña mapalla guvəl la seteni, kà aña seteni aparat akul, kà akul aña mahəl la ahəñ la masla. ¹² Guvəl uwana məpay kà, məpay kà la azladza aw, məpay kà la azlamasəsəđok mawisiga, ñgaha la azlasufəl aña atə, uwana takor gudəñ à vok mawisiga uwanay, məpa guvəl la azlatatak mawisiga gesina, uwana atə la ndzəđa la afad la abə la zagəla. ¹³ Hələw kazlanja aña guvəl, uwana Zəzagəla abək à akul gesina, baña guvəl uwana akəl akəl gə, kà akul aña mahəl la ahəñ. Atə aña magəđ ndzəđa à afik, ñgaha kà añkul aña masakala slaka aw. ¹⁴ Kitə kà, dəhəw vok à ahəñ, gəw azladza dziriga, azlatatak dziriga kà kalkal la parapara, uwana kawadla vok ala nəts, kà akul aña madəhə vok à ahəñ lela. Dəw la tetəvi dziriga aña Zəzagəla la ama,

kà uwana baña kacfaħawwaŋ kiya uwaga kà, adapakay kà bokuba slarapay makəla, uwana kawadfaħawla vok ala, kà madz akul à ama. ¹⁵ Zàw gay marabəŋ, uwana av lapiya à azladza kokudfa may vok, uwaga kà kalkal bokuba uwana kabəkaw kwimik à asik kà maday la lela la tetəvi aña Zəzagəla la tsəh. ¹⁶ Vəw ləv aŋkul à Sufəl Yesu la kaslə gesina, bokuba uwana guloku aga akul la ahəl, kà godam uwana seteni amal à waŋ, aña maḃəz akul aw. Baməraka magur adagay la godam uwaga lakəl bay, kà guloku adzalla à ama. ¹⁷ Tatak uwana Zəzagəla atəfla à akul kà kalkal huməz gəl aña guvəl, uwana tafa à gəl kà madz à gəl à ama, ŋgaha zəḃəw katsakar aña Masasəḃok, uwana Zəzagəla avà à akul babay, uwaga kà gay Zəzagəla.[☆] ¹⁸ Dəvəw kudfa à Zəzagəla la ləv tekula la kaslə gesina, kələw gay la ndzəḃa aña Masasəḃok. Dzəw à ahəŋ la adi, karuwaw vok ahəŋ aw, dəvəw kudfa koksikoksi, kà azladza aña Zəzagəla gesina. ¹⁹ Dəvəw kudfa à Zəzagəla kà aŋulo babay, kà Zəzagəla aña mav à gi gay dziriga uwana gədəpəhay, ŋgaha kà gi aña maz gay marabəŋ kokudfa guba, kà gi aña mafətəl à adi ala la paraka. ²⁰ Kà gay marabəŋ uwaga Yesu Kristu afà gi à ahəŋ, kà masla masləl gi aŋha, kà gi aña mad maziŋ à azladza anik, baməraka gədagay la daŋay bay kà, kà guba aña makəs gi aw, kà gi aña mapəhay la dazuwaya, bokuba uwana asa à Zəzagəla gəpəhay.

Ayyi makəḃ gəl à ahəŋ

²¹ Tisik, deda gami uwana məwoyaŋ, adəh sləray aña Sufəl gami la ahəl səla, adəpəh à akul madz à ahəŋ gulo, kà akul aña masəl uwana gəḃəheŋ gesina. ²² Uwana gəsləl masla à slaka aŋkul kà, kà akul aña masəl madz à ahəŋ gami, ŋgaha kà masla aña madzərəḃəh akul à uda babay.

²³ Zəzagəla Baba, la Sufəl gami Yesu Kristu tavà à akul lapiya, à akul azladedə gesina kà, kasəlaw mawoy vok kà akul à akul, ŋgaha kadiŋaw gəl à Yesu Kristu à vok. ²⁴ Vok mahamay aña Zəzagəla aŋay la azladza uwana tawoya Sufəl gami Yesu Kristu, la masal uwana adəv à gay aw.

☆ 6:17 6.17 Yesayya 11.5; 52.7; 59.17

WAKITÀ UWANA POL ATSETSÈR À AZLA FILIPIYA Lettre de Paul aux Philippiens

Ayyi

¹ Gi Pol anu la Timotawus uwana anu azlamèna sléray anja Yesu Kristu, à uwana mètsetser à akul wakità uwanay.

Mètsetseray kà akul azlamèna madiñal gəl à Zəzagəla à vok la Filipiya, akul gesina uwana akul la ahəl anja Yesu Kristu. Mètsetser babay à azlamasiga, ngaha à azlauwana tadəh sléray la tataka ankul la abà, à akul mēna madiñal gəl à vok babay. ² Zəzagəla Baba la Sufəl gami Yesu Kristu tapisakulla gay à vok la mav à akul lapiya.

'Kikay', Pol agod' à Zəzagəla kà anjatà

³ Kəla uwana gədzugw à akul, 'Kikay', gəgofəh à Zəzagəla kà akul. ⁴ Kəla uwana gədəv kufa à Zəzagəla kà ankul kà, gəvaləh à zagəla. ⁵ 'Kikay', gəgod' à Zəzagəla, kà uwana mədaham gay à vok anina dagay la madzəka à mok uwana kapakaw azlaməna manəfay tsərəh à lakana. ⁶ Ndzer, gəsəl kà Zəzagəla, uwana adzəkà madəh sléray delga la ləv ankul la tsəh, adakədəl gəl à ahəñ, adahənəñ ala la mavakay, uwana Yesu Kristu adəwul à wan. ⁷ Delga à uwana gədzugway kiya uwanay lakəl ankul, kà uwana gəwoya akul la ləv tekula, kà uwana anina kà, Zəzagəla adəhəñ delga kà akul anja mazlak gi la kaslə uwana gəga la danay, à mok uwana gəpəh gay marabəñ la huma anja masla seriya, gəgəd' à dziriga à afik. ⁸ Zəzagəla asəl kà gəpəh fida aw, gəwoya akul kaykay, Yesu Kristu la gəl anha, uwana la gi la abà, la uwana awoya akul.

⁹ Gədəv kufa à Zəzagəla kà akul anja mawoy vok kà akul à akul kaykay, ngaha kà kadəsəlaw dziriga, kà akul anja masəl azlatatak delga gə la azlatatak mawisiga. ¹⁰ Kasà-wani azlatatak delga gə kiya uwaga, ngaha kadəgaw sətaka, ngaha dza anja masləh à akul ala vok la mavakay uwana Kristu adəwul à wan aw. ¹¹ Kadəfahahaw azlatatak delga gə la ndzəda anja Yesu Kristu pəra. Azladza uwana tadənəñ uwaga kà, tadəzləb Zəzagəla tadəsləkaway babay.

Tatak uwana aduwan gesina kà: Say Yesu Kristu

¹² Azladeda gulo, asa à gi kà kasəlaw, kà azlatatak uwana tabəz à gi, adala gay marabəñ à huma à gay haday, uwaga kà akəsəñ à ahəñ aw. ¹³ Kà uwaga à uwana azlaslodzi uwana tanañla gəy anja sufəl anja azla Ròm, la azladza anik gesina tasəl kà: Gi la danay kà Yesu Kristu. ¹⁴ Ngaha aya adzərədəh azlaməna madiñal gəl à vok ala anuwaw la tetəvi anja Sufəl gami Yesu la tsəh, kurit yewdi agod' à atə aw, taslala vok anja mapəh gay Zəzagəla la dzuwaya.

¹⁵ Azladza anik anjatà tapəhay lakəl anja Yesu Kristu kà, kà uwana mañor aza à atə kà gi, asa à atə mas à gi ngərpa. Ama kà anja azladza anik kà, taza gay Zəzagəla la ləv tekula. ¹⁶ Təfəhəñ kiya uwanay kà, kà uwana tawoya gi, kà uwana tasəl kà Zəzagəla la uwana asləl gi à wan à abanay, kà maz gay marabəñ à azladza la dziriga. ¹⁷ Ama azladza anik uwaga kà, tapəh gay anja Yesu Kristu kà, kà uwana asa à atə magay mənğa kà gi, tapəhay kà la matsəp gay à gay, tayəh maz à gi à ngərpa à abà la danay.

¹⁸ Kà madəhəñ kiya uwanay kà, aza à gi aw. Amiyaka tadəpəhay la ləv delga, baməraka la ləv mawisiga, taziñ kà gay anja Yesu Kristu: Ngaha gərabay kà uwaga. Bə la dziri gəda à huma à gay la marabay kà uwaga. ¹⁹ Kà uwana gəsəl kà azlatatak uwaga gesina adəpaka à vok, Zəzagəla adətəf gi la uwaga, kà uwana kadəvaw kufa kà gi, ngaha aya Masəsədok anja Yesu azlak gi babay. ²⁰ Tatak uwana gəfa madzugway gulo à afik, à gəkuday kà, kà makəlla gi ziruwi à gəl tetuwa aw, ama kà gi anja madzərəd ala la abà, ngaha asa à gi kà lagonay, banaw la kaslə gesina, banə gi la sifa, baməraka gədəmətsay, azladza anja masləkaw Yesu Kristu kà gi. ²¹ Kà anulo kà, baməraka gədəgay la sifa, Yesu Kristu aduwan, ngaha mamətsay kà masik gulo. ²² Banə gədza à ahəñ la sifa kà, gədəfəh sléray uwana adəzlaka azladza. Lagwa kà, gəsəl tetəvi uwana gəkəsani aw. ²³ Azlatatak səla uwaga tagazlla gi à gəl. Gi kà, gəwoyan kaykay kà say mamətsay, kà gi anja mad manəñ Yesu Kristu uwaga la uwana aduwa vok kà madz à ahəñ la sifa. ²⁴ Ama banə gədza à ahəñ la sifa, uwaga akəsə vok kà akul. ²⁵ Gəgədanj à afik kà kiya uwanay gəgod' à gi, gəsəl babay kà gədədzə à ahəñ la sifa, ngaha mədədzə à ahəñ anina. Ngaha madz à ahəñ la tetəvi anja Zəzagəla la tsəh anja mad à huma à gay, ngaha kà akul anja marabay. ²⁶ Kità kà, banə gədəsa à uda la danay, la mok uwana mədəgay anina aya kà, kadəzləbaw Yesu Kristu mənğa kà gi.

²⁷ Aganay à tatak uwana akësa à vok, nêfaw tetëvi bokuba uwana gay marabøn anja Kristu apöh. Bamëraka gëdäda à awtây à slaka ankul, bamëraka gëdäda à awtây aw, gëtsenøn kà kadzaw à ahøn la pañaw tekula, ngaha kà kadahaw slëray la lëv tekula, kà gay marabøn anja mad à huma à gay. ²⁸ Guba akës akul kà azlamëna mëzam ankul aw. Baña guba aza à akul aya aw kà, atà tadäsëlay kà tadäzila, ama akul kà, Zëzagëla adaßel akul, masla la uwana adapöhataäla uwaga. ²⁹ Zëzagëla avà à akul tetëvi kà madin gël à Yesu Kristu à vok, ngaha kà mas ngërpa kà Yesu. ³⁰ Kanønjaw guvël uwana gëpäh. Lagonay aya katsënowwanj kà gëpay aya, ngaha akul babay kadadaw à abà anja mapay.

2

Nëfaw madz à ahøn anja Yesu

¹ Tsa kahamaw gay à vok la Yesu, kà akul la ndzëfa, tsa awoya akul kà, akul la ndzëfa. Tsa kahamaw gay à vok la Masasëfök Zëzagëla la abà kà, wöyäv vok kà akul à akul, ngaha vok ahamà akul kà akul à akul babay. ² Tsa baña kiya uwanay kà, wöyäv vok kà akul à akul, gäv la madzugway tekula, hamäv gay à vok, ngaha gäv la pañaw tekula, baña kadahawwanj kiya uwaga, gëdädef gay lëv. ³ Kadzugwaw kà à gël ankul përa aw, kadahaw zlapay aw, wüläwla gël à vëfah, nønjawwanj azladza anik kà bokuba taßuwa akul. ⁴ Këla uwabeyuwi adaha delga à azladza anik, awkà kanërozaw gël ankul përa aw. ⁵ Dzäv à ahøn bokuba uwana Yesu Kristu adzà à ahøn.

⁶ Haday kà, masla kà tekula la Zëzagëla, ama mañor akës, kà masla anja magagazlëla gël anja la Zëzagëla aw.

⁷ Asäk à uwaga gesina, apakà mayà la tatak gesina la abà, apakà dza. Uwana adapaka dza kà,

⁸ awülla gël à vëfah, akës mapëhay anja Zëzagëla, akës mamëtsay zlazladaga, amëtsay à ahäf à adi.

⁹ Gay gä la uwaga, Zëzagëla afä à slaka mazlëbay gä à abà, aväl slëm uwana aduwa azlaslëm anik gesina.

¹⁰ Kà azlatatak uwana la zagëla, la azlauwana la vëfah, la azlauwana la tsöh iyaw gesina, la mok uwana tadätsën slëm anja Yesu, gesina anjatà tadäsa à wanj, tadäkëdefäl à ahøn.

¹¹ Ngaha gesina anjatà tadapëhay la dazuwaya, kà Yesu Kristu kà Sufël lakël anja tatak gesina. Kiya uwaga tadäzläb Zëzagëla Baba.*

Ufäv bokuba azlatsetsilij la gudøn la vok

¹² Azlamëna gay lëv gulo, kësäv gay Zëzagëla. Uwarà, mok uwana mägä la slaka gä, kakësaw gay anja. Lagwa kësäv gay anja taßuwa à gay, uwana gi la slaka ankul. Uwaga asal magoday, kà Zëzagëla adahël akul, dhäv slëray la masëkulay, la dziriga. ¹³ Kà uwana Zëzagëla adadzëka madäh slëray la akul la abà, kà akul anja mawoy azlatatak uwana akës à masla à gël, ngaha kà akul anja madäh atà.

¹⁴ Këla slëray gesina uwana kadahawwanj kà, kanjonuzaw, kagazlaw aw. ¹⁵ Kà akul anja magay sëtaka, lela, ngaha akul anja magay azlabëza anja Zëzagëla kokudfa tatak mawisiga la akul la abà. Akul la tataka anja azlamëna fida la abà, la azlamawisiga, gäv la tataka anjatà bokuba azlaudaka uwana taßuwa.* ¹⁶ Baña kadahawwanj kiya uwaga kà, akul kapëhaw atà gay uwana av sifa. Ngaha la mavakay uwana Yesu Kristu adäsa à ahøn kà, gëdädef gay lëv la huma anja kà akul, kà uwana apëhla slëray dzandzanja uwana ala, gëdfahän kà apaka deyday aw.

¹⁷ Lëv uwana kaväv à Yesu, kà kalkal bokuba makëf tatak uwana kakëdaw à Zëzagëla: Zlahaw tadäkëf gi, ngaha aniz gulo adähama à makëf tatak delga ankul uwaga à abà. Baña apaka kiya uwaga kà, gëdägay la marabay, mëdädef gay lëv la slaka gä. ¹⁸ Gäv la marabay ngaha mërüb anina babay.

Timotawus atà la Epafërodit

¹⁹ Baña 'Ayyà', Sufël Yesu agod kà, gëdäslël Timotawus à awtây à slaka ankul, ngaha masla adädzëfëgëla bokuba uwana adzëfëfakulla bay. ²⁰ Dza la ahøn la slaka gulo, uwana adzugway bokuba anjulo aw, say masla përa. Masla kà, adzugway kà akul përa.

²¹ Azladza anik kà, tadzugway kà à gël anjatà përa, awkà tadzugwaw lakël anja azlatatak anja Yesu Kristu aw. ²² Timotawus kà masla kà, kasëlaw maday anja kà delga. Anu, anu sëla kà mëfah slëray la slaka gä kà anja gay marabøn, masla azlaka gi à azlaslëray à abà, bokuba uwana bëzi azlaka Baba anja à slëray à abà. ²³ Gëfa këla gël à ahøn, kà seriya gulo adädëv à gay, kà gëdäslëlla à awtây à slaka ankul katskats. ²⁴ Gi babay kà, baña asa à Zëzagëla kà, gëdäda à awtây à slaka ankul zewk.

²⁵ Deda gulo Epafērodit, maslōlay ankul, uwana kaslōlāw à gi à wanj, kà mazlak gi la azlatatak uwana gēnēkudā aŋha, mēdāh slōray la slaka gā, mēpa gōvəl la tsēh ala, gēdzugw lagonay kà delga, kà gi aŋa mawul à akul à awtāy aya. ²⁶ Kà uwana atūw akul à tsēh kà manōj akul. Gəl adakadfal à vok, kà uwana asəl kà, katsēnāwwanj kà agā la dūvats. ²⁷ Hadāy kà, dūvats akēd kudā kudā, awkà naka amētsay. Vok ahamā à Zēzagēla kà aŋha, ama kà masla pēra aw, ama kà gi babay, à uwana awurānj ala kà gi aŋa mazaw la gəl aw. ²⁸ Kà uwaga à uwana asa à gi kaykay kà gēwulla à slaka ankul, kà akul aŋa manōj masla la marabay, ŋgaha lōv gulo aŋa mataslla. ²⁹ Baŋa adāda à awtāy kà, kēsāw masla la ahāl sēla, kà uwana masla kà, deda ankul la tetēvi aŋa Sufəl gami la tsēh. Slēkāvāw tsēhay dza uwaga. ³⁰ Kà uwana alog kà ŋuv ŋuv, awkà naka amētsay à slōray aŋa Kristu à abā. Atūw sifa aŋa aw kà, kà masla aŋa mahēn uwana ala atēm à ahōj la slaka ankul la abā kà anjulo.

3

Tetēvi uwana adala dza à dziriga aŋa Zēzagēla à abā

¹ Azladedā gulo, aganay tatak uwana gēkōdla gəl à gay gulo, vālāhāw à zagēla, kà uwana akul azlaaŋa Sufəl Yesu. Gēy vok aw, gay uwana gēpēh à akul uwarā gēwūllal à tsēh aya, ŋgaha uwaga adāzlaka à akul kà tatak madahakullanj mawisiga à vok aw. ² Dahāv hanjēli la azlakēda, kà uwana azladza uwaga tadēhōj kà slōray mawisiga, takad gəl à azladza à vok. Tadzugway kà lakəl aŋa makadav azladza à uda pēra. ³ Anu la uwana, anu azlamēna makadav vok à uda dziriga, awkà atā aw. Kitā kà, anu la uwana anu tsēhay aŋa Zēzagēla. Anu la uwana mēdōv kudā à Zēzagēla la ndzōdā aŋa Masasēdōk tsikasla, ŋgaha mēzlōb Yesu Kristu, mēfā madzugway gami à madz à ahōj aŋa azladza à abā aw. ⁴ Agayŋa azlatatak aŋa ahōj à vok uwanay akēs vok kà, naka gēsllala vok aŋa maf madzugway gulo à uwaga à afik bay. Baŋa dza asllala vok aŋa madāh, uwana azladza gudōj à vok tadēhōj, gi kà, gēsəl kà, dziriga gulo aduwanj aŋha. ⁵ Gi kà, kà uwana gēgōdāj à afik kà, gi zil Ibēranēŋkōwen slilihga, uwana azla Ibēranēŋkōwen tayyā gi. Ŋgaha aya kà, gi zil Isērayel, gēsā à uda la tsēhay aŋa Benyamīn. Mok uwana tayyi gi, la lig mahēnay mtōgis, takōdōv gi à uda, mayahudiya à Yahudiya. Gi tekula aŋa azla Farisēya. ⁶ Gēnōfā mapōhay gami lela, tsērāh à uwana gētōrēbāhā azlamēna madījal gəl à Yesu à vok, ama mapōhay aŋa azla Yahudiya kà, gēpēsēw amiyaka tekula aw, ndzer, gēgā matsizlla à ahōj gā la uwaga la abā la lela. ⁷ Gēnērēz kà azlatatak uwaga kà apakā kà bokuba mazēb sili tēla gulo, ama lagonay kà, kà Yesu Kristu gēdasēlay kà, uwaga apakay bokuba azlatatak deyday. ⁸ Ndzer gēpakā azlatatak uwaga ala gesina kà deyday, kà uwana gēdasəl Sufəl gulo Yesu Kristu uwana aduwanj azlatatak anik gesina. Kà masla la uwana gēdakweska uwaga gesina. Gēdapaka azlatatak uwaga ala, bokuba azlālāh, kà gi aŋa mabēz Yesu Kristu, ⁹ ŋgaha kà gi aŋa magay aŋha aŋa tetuwa. Gi dziriga la huma Zēzagēla, kà uwana ‘Gēkēs mapōhay aŋa azla Yahudiya’, gēgōd aya aw. Tatak uwana agā à gi dziriga la huma aŋha kà, kà uwana gēdīj gəl à Yesu Kristu à vok. Zēzagēla la uwana apakagēla dziriga, kà uwana gēdīj gəl à masla à vok. ¹⁰ Uwaga asa à gi kà tatak tekula pēra, uwaga kà masəl Kristu, ŋgaha ndzōdā aŋha uwana awūlla à uda la mamētsay, kà asa à gi babay kà, gēsa ŋgērpa bokuba uwana asāh, ŋgaha gēkēs gəl à ahōj bokuba aŋha uwana akēsā gəl à ahōj, akēsa mamētsay. ¹¹ Baŋa asa à Zēzagēla kà, awulla gi à uda la mamētsay bokuba aŋha bay.

Mahoyay à gay kabaw

¹² Gēgōd magay kà: ‘Gēdabēza azlatatak uwana gēkuday’, gēgōd aw ŋgaha: ‘Gi masla tsakana aya aw’, gēgōd aw, ama kà aŋa uwaga kà: ‘Gēda à huma à gay kà azlatatak uwaga aŋa magay azlaanjulo. Kà uwana Yesu Kristu adazēba gi à ahāl aŋha.’ ¹³ Azladedā, gēgōd kà: ‘Azlagulo gēdabēzal adagay’, gēgōd aw. Tatak tekula uwana gēdāhōj kà, tatak uwana la lōv gulo gesina avika gi, gēwad vok à uda, kà mabēz tatak uwana akud gi la huma. ¹⁴ Gēda à huma, kà mabēz à gay kabaw, kà gi aŋa mabēz masak, uwana Zēzagēla azalla anu aŋa mabēzal. Masik uwaga madz à ahōj la zagēla la masla, kà Yesu Kristu. ¹⁵ Anu uwana mēdapakāh makoz la tetēvi aŋa Zēzagēla la tsēh kà, delga mēdzugway kiya uwanay. Baŋa mēdzugway anik la lōv ankul la tsēh, kà Zēzagēla adāpēhakulla la dazūwaya. ¹⁶ Tatak mēŋga kà, mēda à huma à gay la tetēvi uwana la tsēh anu la ama, tsērāh à lakana.

¹⁷ Azladedā gulo, nērēzāv maday gulo, nērēzāv kà azladza uwana taday lela, bokuba uwana kanōjāw maday gami. ¹⁸ Azladza anjūvaw la ahōj, à uwana maday anjātā apēhla ala kà, kà atā azlamēna mēzam aŋa Kristu, uwana amēts à ahāf à adi. Gēdapēh à akul uwanay kà asik dēnj, lagwa kà gēpēh à akul aya, gēpēh à akul kà la iyaw tugwi la adi.

¹⁹ Baŋa kaslâ anjata adâdêv à gay kâ, tadâda à akâl à abâ, kâ uwana tanêfâ tatak ziruwî gâ, ama tarabay lakêl anja uwaga, tadzugway kâ azlatatak anja gudêj à vok uwanay përa. ²⁰ Ama anu kâ, anu azlamëna gay anja Zëzagëla, mækud Sufêl gami Yesu Kristu, masla maêl anu, uwana atsa à ahêj la zagëla. ²¹ Baŋa adâsa à ahêj kâ, adâbêdla vok gami guêguêbga uwanay, kâ vok gami anja maêz ndzêdâ bokuba anja. Adâfah uwanay kâ la ndzêdâ anja masêlay, uwana abêk tatak gesina à tsêh à asik anja.

4

Sawaray makêf gël à ahêj

¹ Azladedâ gay lëv gulo, baŋa kiya uwanay kâ, dzâw à ahêj la titi la abâ, tsa akul azlaanja Sufêl. Azladedâ gëwoya akul kâ kayak, asa à gi mêtânêhêj akul aya. Gêdêf gay lëv kâ akul, akul la uwana kapêhawla kâ slêray gulo ala kâ delga, à uwana gêt zlapay.

² Evodiya atâ la Sëntis, kamkam gëgod' à akul tsa akul azlaanja Sufêl Yesu kâ, tsênâw vok gay lela. ³ Kak deda gulo uwana mêtâhâw slêray la slaka gâ, kamkam, zlakâ azlamis uwana anina, kâ mêtâh slêray mênja la mës ngërpa kâ gay marabêj anja mad à huma à gay. Anina la azla Këlement ngaha la azlamëna slêray anik, mêtâh slêray la slaka gâ. Zëzagëla atsetserâh slêm anjata à wakitâ anja sifa adêv à gay aw à abâ. ⁴ Tsa akul azlaanja Sufêl Yesu kâ: Vâlâhâw à zagëla la kaslâ gesina! Gëgod' à akul aya: Vâlâhâw à zagëla!

⁵ Pêhâwla dzêba anja sêla aw ankul ala la huma, kâ azladza anja masêlay kâ Sufêl kâ nekwa atsa à ahêj! ⁶ Kadzugwaw à azlatatak deyday aw, ama lakêl anja tatak uwana aga la ahêj aw kâ, pêhâwla à Zëzagëla à uwana asa à akul la madêv kufa kâ mazlak akul, 'Kikay', gêtâhwal bay. ⁷ Baŋa kadâhawwanj kiya uwaga, Zëzagëla adâvâ à akul lapiya. Lapiya uwaga kâ, adûwa azlatatak uwana azladza tatsênâ. Adânêjla lëv ankul la madzugway ankul, ngaha kâ tatak anja maêz akul aw, kâ uwana akul azlaanja Yesu Kristu.

⁸ Azladedâ, tatak uwana gækêdla à gël kâ aganay: Dzùgwâw kâ lakêl anja azlatatak uwana delga kâ azladza maslêkaway. Uwaga kâ azlatatak dziriga à uwana mêkas atâ, azlatatak uwana dziriga la tetêvi anja, sêtaka, la azlatatak uwana akas à azladza à gël mëslekaw kâ atâ përa. ⁹ Azlatatak uwana gêtâpakulla, ngaha kakêsâw atâ, uwana katsênâwwânj la paŋaw gulo, ngaha uwana kanêjâwwânj kâ gêtêhêj, fâhâwwânj kiya uwaga! Ngaha Zëzagëla uwana avâh à anu lapiya adâdâ à ahêj la akul.

'Kikay', Pol agod' à azla Filipiya kâ tatak uwana tazlakâ

¹⁰ 'Kikay', gëgod' à Sufêl Yesu la marabay mênja, kâ uwana kadzùgwâw à gi gotênaj. Ndzer dagay uwarâ kâ, kadzùgwâw à gi, ama kabêzâw à tetêvi kâ mazlak gi aw, la kaslâ uwana ada à lig. ¹¹ Uwana gêpêh uwaga kâ, kâ uwana azlatatak anik talêg kâ gi à waŋ aw, ama kâ uwana gêtâppla madz à ahêj la marabay la abâ, bamêraka adagay bâ la kaslâ uwala beyli. ¹² Gêsêl uwana gêtza à ahêj, à baŋa tatak adadêv à gay, gêsêl madz à ahêj babay, à baŋa tatak gulo la ahêj. Gêtâppla madz à ahêj la kufa la abâ, gêtâgagay la tatak may, amiyaka gêtâgagay la may aw, bamêraka taslêka gi aw, amiyaka adâslêka gi. ¹³ Gêslala vok anja madêhêj à azlatatak uwanay gesina, la ndzêdâ anja Yesu Kristu, uwana adzêrêdêgêla. ¹⁴ Ama kadâhawwanj kâ delga, kâ uwana kazlakâw gi, la matêrêbay gulo la abâ.

¹⁵ Akul azla Filipiya, kasêlaw la kaslâ uwana gêtzêkâ mazakulla gay marabêj la kutso ankul la abâ, la Makeduniya, ngaha gêwul anjulo la slaka ankul, kâ akul la uwana kazlakâw gi përa. Akul mahêm à ahêj mênâ madiŋal gël à vok, à uwana mêtâdla kâ vok tatak uwana mênâhkufa anja përa. ¹⁶ Mok uwana gi la Tesaloniki kâ, kaslâlâw gi azlatatak uwana à waŋ gênâhkufa anja kâ asik dênj. ¹⁷ Uwaga asal magoday kâ, asa à gi maêz tatak ankul përa aw. Gi la marabay kayak kâ, kâ uwana gêsêl kâ Zëzagëla adâpisakulla gay à vok kâ azlatatak uwana kavâhâw. ¹⁸ Gêbêzâ tatak gesina uwana kaslâlâw gi à waŋ dâduwa à gay uwana gênâkufa anja. Mok uwana gadâbêzal tatak uwaga Epafêrodit asegëla à waŋ kâ, tatak gesina uwana gênêkufa la ahêj. Ngaha bay kâ, azlatatak ankul kâ bokuba tatak uwana takêd' à Zëzagëla slaslara, azinal lela, akêsâl à gël.* ¹⁹ Zëzagëla uwana gêslekaway kâ, akor lëmana anjûwaw. Adâvâ à akul kêla tatak uwana kanâwkufa anja, adâvâ à akul la magola la ahâl anja Yesu Kristu. ²⁰ Mazlêbay agay la Zëzagëla Baba gami, tsêrâh à awtây! Amen.

Ayyi makêf gël à ahêj

* 4:18 4.18 2Musa 29.18

²¹ 'Ayyi', gòdàw à maham à ahəŋ məna gay Zəzagəla, uwana azlaaŋa Yesu Kristu. Azladza uwana la abanay anina tadəhakulla 'Ayyi' babay. ²² Azlaməna madiŋal gəl à vok gesina 'Ayyi', tagod' à akul, azlauwana tadəhakullaŋ 'Ayyi' kaykay kà, azlaməna hud' gəy məŋ sufəl aŋa azla Rom.

²³ Sufəl gami Yesu Kristu apisakulla gay à vok.

WAKITÀ UWANA POL ATSETSÈR À AZLA KOLOSƏYA Lettre de Paul aux Colossiens

Ayyi

¹ Gi Pol uwana Zəzagəla akəsəni gi, kà gi aña magay masləlay aña Yesu Kristu, gətsətsər à akul wakitə uwanay, wakitə aguwa à uda la ahəl aña Timotawus, uwana masla bay kà deda gami la madiñal gəl à vok la abà. ² ‘Ayyi’, mөгodf à akul, akul tsəhay aña Zəzagəla, uwana akul la ahəl aña Yesu Kristu, uwana kanəfaw la ləv tekula. Zəzagəla Baba gami apis à akul gay à vok, ñgaha avà à akul lapiya.

Pol adəv kuɗa à Zəzagəla kà aña azla Koloseya

³ ‘Kikay’, mөгodf, à Zəzagəla, Baba aña Sufəl gami Yesu Kristu, kəla kaslə gesina uwana mədəv kuɗa kà akul. ⁴ Kikay mөгodf, kà uwana mətsənəñ kà kavəw ləv añkul à Yesu Kristu, ñgaha kawoyaw azlatsəhay aña gesina babay. ⁵ Kadahawwanñ kiya uwanay kà, kà uwana kafəw yewdi à tatak delga uwana à gay, Zəzagəla adadehəñ à ahəñ kà añkul la zagəla, uwana katsənəwwəñ ñgaha adabəzawwanñ tsərəh à slaka añkul. ⁶ Gay marabəñ uwaga asləh gəl à ahəñ gesina la gudəñ la vok, apakay bokuba məñ ahəf uwana av mayyay, ñgaha añazilə kaykay. Kiya uwaga à gay marabəñ uwaga, ada à huma à gay la tataka añkul la abà, dagay la mavakay teraña uwana katsənəw tapəh lakəl aña gay aña vok mahamay aña Zəzagəla dadəñ la dziriga, tsərəh à lakana. ⁷ Katapawla tatak uwaga kà la slaka aña Epaferas, uwana məwoyan. Anina kà, anu azlaməna madəh sləray aña Yesu Kristu. Adəh sləray la ləv tekula, adəh sləray la slaka añkul kà madegolay anu. ⁸ Masla la uwana apəh à anu gay añkul, bokuba uwana Masasədok Zəzagəla avà à akul ndzəɗa kà mawoy azlaməna magay añkul.

⁹ Kà uwaga, dagay mavakay uwana mətsənə uwaga, mədavəh kuɗa à Zəzagəla kà añkul la kaslə gesina. Mədəv kuɗa à Zəzagəla kà akul aña masləlay la paraka, uwana akasal à gəl, ñgaha kabəzaw matsihila uwana Masasədok aña avəy, ñgaha akul aña matsən azlatatak la tetəvi aña la tsəh. ¹⁰ Kà uwaga kadəbəzaw maday delga, uwana akasa à vok kà aña Sufəl Yesu Kristu, ñgaha kadədahawla uwana akasal à gəl gesina, maday añkul adada à huma à gay la madəh delga, ñgaha kadəsəlaw Zəzagəla kaykay. ¹¹ Mədəv kuɗa babay kà masla adzəwəfəhakulla aña deyday, ñgaha akul aña madz à ahəñ la mabasiñ la abà la ləv tələmma. ¹² ‘Kikay’, gödəw à Zəzagəla Baba, uwana apəzl à akul tetəvi, kà akul aña mabəz tatak uwana adəhəñ à ahəñ, kà aña tsəhay aña la zagəla la afik babay, la slaka uwana udəka aña la ahəñ. ¹³ Zəzagəla Baba atəfanula à makoray aña mələs la abà, masla la uwana abək anu à makoray aña Kona aña uwana à abà, awoyan. ¹⁴ Masla la uwana apəlla anu ala, ñgaha amatsən tsakana gami ala.

Yesu kà Sufəl lakəl aña tatak gesina

¹⁵ Dza adanəñ Zəzagəla la yewdi aw, ama Yesu Kristu uwana azladza tanəñəñ kà, masla la uwana maftsa vok aña Zəzagəla, à masla uwana malkwoy aña, uwana aduwa azlatatak gesina, uwana Zəzagəla adəhəñ. ¹⁶ Zəzagəla adəhəñ tatak gesina kà la ahəl aña, azlatatak uwana la zagəla la afik, la azlatatak uwana la kutso la abà la wəɗah, la azlatatak uwana yewdi anəñəñ, la azlauwana yewdi anəñəñ aw babay. La ahəl aña Yesu adəhəñ uwaga, kəla azlatatak gesina, uwana atə la ndzəɗa la zagəla, baməraka sufəl aña azlamalika bay. Kəla azlatatak gesina uwana tasafay, la azlauwana tasafay aw. Zəzagəla adəhəñ atə la magolla à uda la ahəl aña Kona aña, ñgaha abək atə à ahəl aña. ¹⁷ Masla kà, aga la ahəñ dagay uwarə, à mok uwana gudəñ à vok adzəka à vok dadəñ aw, tatak dəwdəw kà la ahəl aña, masla la uwana akəs atə la slaka aña atə la abà. ¹⁸ Masla la uwana madzahaga aña maham à ahəñ məna gay Zəzagəla gesina. Maham à ahəñ məna gay Zəzagəla kà, apakà kà bokuba vok aña. Masla la uwana adzəkə sifa mawga. Babay kà, masla la uwana matera aña mawul à uda la mamətsay, kà masla aña maduwoy azladza gesina, la azlatatak gesina. ¹⁹ Akəs à Zəzagəla à gəl kà madz à ahəñ aña kà, agay kà madz à ahəñ aña Kona aña. ²⁰ Zəzagəla akəs kà, masləl Kona aña à ahəñ, kà masla aña masəl vok, à masla la azlatatak gesina, azlatatak uwana la wəɗah la azlatatak uwana la zagəla la afik, ñgaha afə masəl vok à tataka aña à abà la azladza, adəhəñ uwaga kà la aña aña Kona aña uwana akəlla à ahəñ la ahəf la adi.

²¹ Uwarə kà, akul kərkər la Zəzagəla, kagəw azlaməna məzam aña, kà uwana kadzugaw kà azlatatak mawisiga, kadəhəwwəñ kà azlatatak mawisiga babay aya. ²² Ama lagonay kà, Zəzagəla adasəl vok la anu la mamətsay aña Kona aña, uwana

apakà dza sləb vok anja, uwana akəs mas ngərpa, kà akul anja magay azladziriga. Ngaha kà masla mapəhla à akul ala la huma anja Zəzagəla, kokudfa mawisiga, sətaka, kà dza anja madukw à akul ala seriya à gəl aw. ²³ Iyay, dāw à huma à gay la mav ləv anjul à Yesu, dzāw à ahəj titi kà fafālāw aw. Fāw sləm kà azlagay uwana à afik katsənāwwāj la gay marabəj la abā. Gay marabəj uwaga kà, tazāj à kəla dza la gudəj la vok gesina. Gi Pol babay, sləray gulo kà maz gay marabəj uwaga babay.

Pol azlak azlaməna madijal gəl à vok

²⁴ Lagonay, gi la marabay la ləv gulo la tsəh, kà ngərpa uwana gəsay kà anjul, bokuba uwana uwarā Yesu Kristu asā. Gəsa ngərpa la vok gulo babay kà maham à ahəj mənə gay Zəzagəla, uwana vok anja. Gəs ngərpa kiya uwanay kà, kà sləray anja anja mahənla. ²⁵ Zəzagəla afā gi à ahəj, kà masla sləray anja azlaməna anja, kà gi anja mazlak akul. 'Zà gay uwanay à azladza gudəj à vok gesina!', agōd à gi. ²⁶ La məl uwarā kà, ahadā gay uwaga à ahəj dadāj, azladza tasəl aw. Ama lagonay kà, adasəlla à azladza uda la dazuwaya. ²⁷ Asā à Zəzagəla mapəhla à azladza kà uwana asal madfehəj, kà adūwa azlatatak gesina. Gay mahad à ahəj gā uwaga, adasa à uda la dazuwaya, kà uwana Yesu Kristu la ləv anjul la tsəh. Kà uwana kasəlaw kà, Zəzagəla adādala akul à mazləbay anja à abā. ²⁸ Uwaga ka Yesu Kristu uwana məpəhla à azladza, məpəh à azladza à vok à abā gesina. Mətəpatāla tatak la matsihila uwana Zəzagəla avā à anu. Asa à anu kà azladza gesina uwana la tetəvi anja Yesu Kristu la tsəh kà, tadəgay azlazilja. ²⁹ Kiya uwaga gədəgədəj à afik kà, gəwad vok à uda la ndzəfa uwana Yesu Kristu avā à gi, kà gi anja madəvla sləray uwanay à gay.

2

¹ Asa à gi, kà kasəlaw kà, gədadfah sləray mənəga kà anjul azla Koloseya, ngaha kà anja azla Lawodikiya babay, ngaha kà anja azladza anik gesina, uwana tanəj gi la yewdi aw bay. ² Gədehəj kiya uwanay, kà ləv anjul anja magay la ndzəfa, ngaha kà akul anja mawoy vok akul à akul, la ləv tekula. Asa à gi babay kà, kasəlaw dziriga uwana Zəzagəla afətāl à ama ala, lakəl anja Kristu, kà akul anja madz à ahəj la abā lela, ngaha Zəzagəla anja mapisakulla gay à vok kà anja uwaga. Tatak uwana Zəzagəla afətānula à ama ala kà, kà Yesu Kristu. ³ Yesu Kristu uwaga kà apəzl à anu tetəvi, kà anu anja magay anu azlamatsihilaga, ngaha kà anu anja matsən tatak uwaga. Matsihila uwaga kà bokuba ləmana.

⁴ Gəpəh à akul kiya uwanay kà, kà dza anja mavavar akul la azlagay namnamga aw. ⁵ Baməraکا gədəgay kərəkə akul, koksikoksi gədzugway kà akul. Gi la marabay kà uwana à uwana kadahāwwāj gesina kà la tetəvi anja, ngaha la uwana kavāw ləv anjul à Kristu, kadzāw à ahəj lela.

Sifa anja azlauwana tahamā gay à vok la Yesu Kristu

⁶ Lagonay kà, kakəsāw kà Yesu Kristu kà Sufəl anjul. Kiya uwaga kà, dāw la maham gay à vok la abā la masla. ⁷ Dzāw à ahəj la ahəl anja bokuba ahāf uwana adāla slilih à kutso à agu kərəkə: Dāw kà à huma à gay. Gəfāwāj à afik à maval ləv anjul bokuba uwana tatəpakulla. Kikay gōfāw à Zəzagəla koksikoksi babay.

⁸ Dahāw hanjəli kà dza anja mavavar akul la matsihila deydayga aw. Matsihila uwaga kà, asa à uda kà la madzugway anja dza la abā, ngaha la azlamasasəfok mawisiga, uwana atā la wəfah la gudəj uwanay à vok. Asa à wanj kà la slaka Kristu aw. ⁹ Katsəbaw à atā sləm aw, kà uwana madz à ahəj anja Zəzagəla kà, aga la Yesu Kristu la abā gesina. Ndzer madz à ahəj anja Zəzagəla gesina, Yesu Kristu adzā à ahəj kiya uwaga babay hadāy. ¹⁰ Tsa akul kahamāw gay à vok la masla kà, akul kafəzaw sifa anja la dziriga babay. Masla kà, aga lakəl anja tatak gesina, la azlamasasəfok uwana atā la maslay bay.

¹¹ La maham gay à vok la masla la abā kà, Zəzagəla adafa à akul masəlay anja à vok, uwana apəhla à azladza kà akul azlaanja. La zamana uwarā kà, agōd à azla Yahudiya kà takadav vok à uda, kà masəlay kà azlaanja Zəzagəla. Ama kà anjul kà, masəlay uwana afā à akul à vok kà, asa à uda kà la ahəl anja dza aw, asa à uda kà la ahəl anja Yesu Kristu, səlāw kà, masla la uwana azəb à akul à vok ala madz à ahəj anja uwarā. ¹² Mok uwana tadāhəkulla batem, uwaga apəhla ala kà talā akul, akul la Kristu la slaka gā. Mok uwana kasāw à uda la iyaw la abā, uwaga apəhla ala, kà akul la Kristu, akul kawūllaw à uda la slaka gā la masla aya, kà uwana kadinjāwwal gəl à vok, kà Zəzagəla à uwana awūlla Yesu à uda la mamətsay, kà masla la maslay kà mawulla akul à uda babay. ¹³ Dagay uwarā kà, kagāw bokuba azlamazimnekič kà uwana kadāhāhāw tsakana, kà uwana kagāw azladza anja Zəzagəla aw. Lagonay kà, Zəzagəla adavā à akul sifa mawga la Yesu Kristu, ngaha adamatsan tsakana ala, adamatsakulla anja, ngaha adamatsanuj ala suwanj. ¹⁴ Uwarā kà, seriya akəs anu, kà

uwana mœdâhà uwana 'Dahàwwàn', Zëzagëla agòd aw, la lig la ahøj Zëzagëla azëb anu tsakana lakël ala. Apël guma, uwana agà la anu lakël, afà uwaga à gël anja Yesu Kristu, à mok uwana amëts à ahàf à adi. ¹⁵ Mok uwana Yesu Kristu amëts à ahàf à adi kà, azëbà maslay anja azlamasædøk mawisiga ala, ngaha la azlasufël anjatà gesina babay, akœdâsl atà, ahahay atà à tsøh, apàhla atà ala la slaka azladza, la paraka kà, aduwa atà gesina.

¹⁶ Tsa banja kiya uwaga kà, dza aslèha à akul à vok lakël anja azlatatak uwana kazuwaw la uwana kasaw aw, dza aslaha à akul à vok aya bay la magodây: 'Slëkàwàw madøvaday la azlamavakay anik anik, ngaha la azlamanøjla tëla la azlavud maduw løy aw.' ¹⁷ Azlatatak uwaga kà maftsa à vok anja uwana apahàh à azladza tatak uwana adàpaka vok. Ama dziriga anja tatak uwaga kà Yesu Kristu la gël anja. ¹⁸ Kavàw tetøvi à azladza kà mafukw akul à uda la masak anjul la abà aw. Azladza uwaga tagòd kà, say mawoy mas ngørpa, ngaha la maslëkaw azlamalika. Atà tapøhay kà azlatatak uwana tanøjnj la masasøjay la abà. Azlatsøhay dza uwaga kà azlazlapay deyday, tadzugw lakël anja azlatatak anja gudøj à vok uwanay pøra. ¹⁹ Atà la maham à gay à vok la abà la Sufël Kristu aw. Kà uwana masla kà gël gà, ngaha maham à ahøj mœna gay Zëzagëla la uwana vok anja. Azlauwana tahamà gay à vok la masla, avà à atà azlatatak uwana tanàkudfa anja, kà masla la uwana tahamà gay à vok tekula, kiya uwaga tazigønay la tetøvi anja la tsøh, bokuba uwana asa à Zëzagëla. Masla ahama gay azladza uwaga à vok la slaka gà, kà masla la atà anja magay tekula, bokuba vok anja dza, uwana tadza à ahøj la slaka gà la azlaamil ngaha la slëb vok.

Mamøtsay la Kristu

²⁰ Kasølaw kà, akul gesina kamatsàw la Kristu. Kiya uwaga kà akul la tsøh anja azlamasædøk uwana la gudøj la vok aw. Kayyà, tsa banja kiya uwanay kà, kakay à maday anjul ma? Kiya anja azladza uwana tasël Yesu Kristu dadøj aw takay? Kay, kà mana kanøfaw mapøhay anjatà uwana apøhay: ²¹ 'Katap ahàl à azlatsøhay tatak uwaga à abà aw, katap tatak uwaga aw, kadøbani tatak uwaga aw', ma? ²² Tsøhay mapøhay uwaga kà matapla deyday anja azladza, azlatatak uwaga gesina azladza tadàhla sløray kà tadàzahla. ²³ La madzëka, say madøv kudà à Zëzagëla, la manaf maslhay anja, ngaha la mawoy slëb vok aw, ngaha la mas ngørpa à vok. Ama bà la uwaga manøfay anja mapøhay uwatà, azlaka dza tetuwa aw, kà dza anja magay la maslay lakël anja azlatatak mawisiga uwana abiy dza aw.

3

Mawul à uda la Kristu

¹ Kasølaw kà, akul gesina kawùllaw à uda la mamøtsay la Kristu. Tsa kiya uwanay kà, faw yewdi anjul kà à azlatatak uwana agay la zagëla la slaka uwana Yesu Kristu adza à ahøj, adadza madzay la ahàl kaf anja Zëzagëla.* ² Koksikoksi dzügwàw kà à azlatatak uwana la zagëla la afik, awkà azlatatak uwana la gudøj la vok aw. ³ Kasølaw kà akul kamøtsàw. Zëzagëla awùlla akul à uda, avà à akul sifa mawga, uwaga à ahàl anja Yesu Kristu, uwaga kà Zëzagëla anøjla la slaka anja. ⁴ Kristu la uwana sifa, ngaha masla dziriga anjul. Mok uwana adàwul à wanj aya kà, akul bay, kadàpøhawla vok ala la masla, këla uwabeyuwi adànøj mazløbay uwana avà à akul.

Madz à ahøj mavivaga la mawga

⁵ Kiya uwaga kà, kanøfaw tsøhay maday mawisiga anjul, uwana la gudøj la vok aw, azlatatak uwaga kà tapakàh kà bokuba azlatatak deyday la yewdi anjul. Sàkàw à mabila, kagaw la maday mawisiga aya aw, azlatatak mawisiga uwana takœd à akul ala à yewdi, atà tadza à ahøj la akul la abà aya aw, kayhaw azlatatak mawisiga aw, kakœdaw yewdi à azlatatak à abà aw, kà uwana banja kakœdaw yewdi à abà kawoyaw, atà dæduwa Zëzagëla. ⁶ Kà azlatatak mawisiga uwaga à uwana Zëzagëla apakà løy lakël anja azladza uwana takøs gay anja aw. ⁷ Uwarà, à mok uwana kadzàw à ahøj la azlatatak uwaga la abà, maday anjul kà agàh kà kiya uwaga babay.

⁸ Lagonay kà, sàkàw azlatatak uwaga gesina. Kapakaw løy aw, kaslahaw mël la tsøh ala aw, kadàhaw mawisiga à azladza anik à vok aw, kadawla slëm anja azladza la gay aw. Azlagay mawisiga tasa à wanj la gay anjul aya aw. ⁹ Kavavarahaw vok kà akul à akul aw, kà uwana kasakaw maday mawisiga anjul uwana uwarà, ngaha la azlatatak uwana kadàhàhàwwàn uwarà. ¹⁰ Nøfàw madz à ahøj mawga. Zëzagëla la uwana avà à akul maday mawga, adàhla sløray koksikoksi, kà masla anja mapakøj ala kiya anja, kà akul anja masël masla la dziriga. ¹¹ Kiya uwaga kà, tatak la ahøj avàh azla Yahudiya

* 3:1 3.1 Mahabay 110.1

ala la azlatsehay anik aw, ngaha tatak la ahøj avàh azlauwana takadav atà à uda ala la azlauwana kokuđa makadav atà à uda gà, ngaha azladza uwana la kəsaf la abà, ngaha azladza uwana tasəl tatak aw, ngaha azlamayà la azlauwana takor gəl aňatà, gesina aňatà kà kalkal, gərgər la ahøj la huma Zəzagəla aw, kà uwana mənğa aňatà kà say Yesu Kristu tekula pəra, ngaha aga la ləv aňa azlauwana la tsəh azlaaňha gesina.

¹² Awul akul à gəl kà, Zəzagəla atsatsəmàni akul, kà akul aňa magay azlaaňha, awoya akul. Tsa kiya uwanay kà, dāhàw azlatatak uwanay: Vok ahamà akul kà azladza anik, gàw la ləv delga, gàw tələmma, la mabasinj gesina babay. ¹³ Tsəhəw vok gay kà akul à akul. Baňa dza adahàkulàň mawisiga à vok matsawallaň ala. Matsahawwaň à vok ala kà akul à akul, bokuba uwana Sufəl gami amàtsàkullàň ala. ¹⁴ Tatak uwana aduwa azlaanik gesina kà, wòyàw vok kà akul à akul, kà uwana mawoy vok akəs azlatatak delga gesina. ¹⁵ Vəw tetəvi kà à lapiya uwana Kristu afà à akul à ləv à tsəh, akòr ləv aňkul. Awul akul à gəl kà Zəzagəla azalà akul, kà akul aňa magay tekula, ngaha akul aňa magay la lapiya. 'Kikay', gòđàwwal koksikoksi babay. ¹⁶ Fəw gay aňa Kristu à ləv à tsəh lela, dzùgwàw kà à gay aňa Kristu. Tapawla kà vok akul à akul, wulàwla kà vok matsihila kà akul à akul. Zlèbàw Zəzagəla la ləv aňkul gesina la azlamahabay anik anik. ¹⁷ Uwana kadāhawwaň la uwana kapəhaw bay, dāhàw uwaga la sləm aňa Sufəl Yesu. 'Kikay', gòđàw à Zəzagəla Baba kà Yesu babay.

Maday aňa azlaməna madiňal gəl à vok la huma azladza anik

¹⁸ Gəpəhay kà akul azlamis, gəgod' à akul kà: 'Kəsaw gay aňa azlazil aňkul, bokuba azlauwana tanəf Sufəl gami tādəhəň.'

¹⁹ Akul azlazil bay kà: 'Wòyàw azlamis aňkul, kagaw dzaňdzaň la atà aw.'

²⁰ Akul azlabəza uwana gəpəh à akul kà à aganay: 'Tsəbàw sləm à paňaw aňa azlababa aňkul la tatak gesina la abà, kà uwana akəs à Sufəl à gəl, kà kadāhawwaň kiya uwanay.'

²¹ Kà aňkul azlababa kà: 'Kadawla ləv à azlabəza à huđ, kà atà aňa mapak ləv aw.'

²² Akul azlamayà: 'Kəsaw gay aňa azlaməňga aňkul la ahəl ala la gudəň uwanay la vok la azlatatak gesina la abà, kakəsaw atà gay la ahəl ala la huma yewdi aňatà pəra, kà atà aňa masləkaw akul aw. Ama dāhàw sləray la ləv tekula, kà uwana kasləkawaw kà Sufəl Yesu. ²³ Kəla sləray gesina uwana tavà à akul, dāhàw uwaga la ləv tekula, kà uwana sləray aňa Sufəl la uwana kadāhawwaň, awkà aňa dza asik aw. ²⁴ Səlàw kà Sufəl la uwana adanəň akul à adi, adàvə à akul tatak uwana adadəhəň à ahøj la zagəla kà aňa azladza aňha. Madzahaga aňkul uwana kadāhawla sləray, uwaga kà Yesu Kristu.'

²⁵ Ama azladza uwana tādəhəň mawisiga, Zəzagəla adàwulla à atà ala mawisiga uwana tadāhəň. Adāh tatak à azladza gesina la ləv tekula.

4

¹ Gəpəhay kà à azlaməňga babay, gəgod' à akul kà: 'Gàw dziriga la huma aňa azlamayà aňkul, dzàw à ahøj la atà, bokuba uwana akəsà à vok, səlàw kà, akul azlaməňga la azlamayà gesina kà: Madzahaga aňkul aga la zagəla la afik, aduwa akul gesina.'

Azlamapəhay anik

² Dəvəw kuđa à Zəzagəla koksikoksi, kadəvaw kuđa la guđguđ aw. 'Kikay', gòđàw à Zəzagəla babay. ³ Dəvəw kuđa kà aňami babay, kà Zəzagəla aňa mapəzl anu tetəvi delga, kà maz gay aňha à azladza, ngaha məpəhatàla godega aňa gay aňa Kristu la makor gəl la abà, kà gay marabəň uwaga à uwana gi la daňay. ⁴ Dəvəw kuđa à Zəzagəla kà gi aňa mapəhla ala la paraka bokuba uwana akəsà à vok lela.

⁵ Dāhàw hāňkəli la madz à ahøj aňkul la tataka azladza uwana la abà, tasəl Zəzagəla aw, dzùgwàw la kaslā gesina kà mazlak atà. ⁶ Səlàw kà say kagaw la gay namnamga, uwana akəs à vok. Ngaha səlàw babay gay uwana kadāwulawla à azladza, uwana tanava akul manavay gesina.

Ayyi makəđ gəl à ahøj

⁷ Tisik, deda gay ləv gami uwana la tetəvi aňa Sufəl la tsəh, masla adāh sləray aňha la ləv tekula. Anu səla, anu azlaməna masləlay aňa aňha. Masla adəpəh à akul gesina lakəl gulo. ⁸ Kà uwaga à uwana gəsəl à akul à awtəy kà masla mapəh à akul gay gami, ngaha kà masla madzərəđahakulla babay. ⁹ Onesəm, deda gay ləv gami ada à awtəy atà səla. Masla babay anəfa Yesu Kristu la ləv tekula, masla, tsəhay aňkul. Atà səla nna tadəpəh à akul azlatatak uwana ada à vok la abanay.

¹⁰ Arəstarkus, uwana anu la daňay anu səla, adāha à akul ala: 'Ayyi'. Mark duguməň aňa Barnabas adāha à akul ala 'Ayyi', babay. Baňa tabəz à awtəy à slaka aňkul kà, kəsaw atà la ahəl səla. Dagay uwarà gədapəh à akul uwaga. ¹¹ Yesu uwana tazaləl ala

Yustus adfahakulla 'Ayyi' bay, azla Yahudiya makər uwaga pəra, à uwana mədfəh sləray anina la abanay kà aña makoray Zəzagəla. Atà la uwana tadzərèdfəhəgəla kaykay.

¹² Epafəras, uwana tsəhay aņkul adfahakulla 'Ayyi' babay, masla kà, masla sləray aña Yesu Kristu. Koksikoksi adav kudə à Zəzagəla kà aņkul, kà akul aña madz à ahəj lela, kà akul aña magay azlazil la tetəvi aña Zəzagəla la tsəh, ŋgaha kà akul aña masəl uwana akəs à Zəzagəla à gəl ndzer. ¹³ Haday, gəsəl kà, masla as ŋgərpa la sləray la abà kà akul, ŋgaha kà azla Lawodikiya, ŋgaha kà azla Hiyerapoləs bay. ¹⁴ Luka, dokwtar uwana məwoya, atà la Demas tadfahakulla: 'Ayyi'.

¹⁵ 'Ayyi', gòdàw à azladza la Lawodikiya. 'Ayyi', gòdàw à Nimfa, ŋgaha la azlaməna madiņal gəl à vok uwana tahamàhəh gay à vok la mtəga aņha, kà ahəl gulo.

¹⁶ Baņa kadadzeņaw wakità uwanay kà, sləlàw à azlaməna madiņal gəl à vok la Lawodikiya, kà atà aña madzeņay babay. Ŋgaha atà azla Lawodikiya bay tasləl à akul à waņ wakità uwana gətsetser à àtə kà, akul aña madzeņay suwaņ. ¹⁷ Gòdàw à Arsip kà: 'Wədf wok à uda kà madəv sləray uwana à gay Sufəl Yesu Kristu afal à ahəl.'

¹⁸ Gi Pol, la ahəl gulo la uwana gətsetseray kà madəhəkulla 'Ayyi' la abanay. Avika akul aw kà gi la daņay.

Zəzagəla apis à akul gay à vok.

MATERA AŃA WAKITÀ UWANA POL ATSETSÈR À AZLA TESALONIKI Première Lettre de Paul aux Thessaloniens

¹ Gi Pol la uwana gøtsetser wakità uwanay, anu la Silas ŋgaha la Timotawus bay. Møtsetser à maham à ahøj mēna gay Zøzagøla la Tesaloniki, uwana azlaaŋa Zøzagøla Baba, ŋgaha aŋa Suføl Yesu Kristu. Zøzagøla apis à akul gay à vok la lapiya aŋha.

Madiŋal gøl à vok aŋa azla Tesaloniki

² Koksikoksi, 'Kikay', mægof à Zøzagøla la matsal akul à gay la madøv kuða gami la abà babay. ³ Baŋa mødøv kuða à Zøzagøla Baba gami, mødzugw à madàh sløray aŋkul, uwana kaðaahàwwàŋ, kà uwana kaðiŋaw gøl à Yesu Kristu à vok la sløray dzaŋ-dzaŋga, kà uwana kawoyaw masla la mawaf vok à uda aŋkul la abà lela la Suføl Yesu Kristu. ⁴ Kiya uwaga akul azladede, mēsøl kà, Zøzagøla awoya akul, ŋgaha atsatsàmāni akul, kà akul aŋa magay azladza aŋha. ⁵ Haðaŋ, mok uwana mēzākulla gay marabøj, uwaga apakà gay deyday pøra aw. Ama Zøzagøla apøhla ndzøða aŋha ala la gay uwaga, la mazlak anu aŋa Masasøfok tsikasla, ŋgaha la uwana mēsøl kà gay gami kà ndzer. Kasølaw madz à ahøj gami, à mok uwana mødza à ahøj la tataka aŋkul la abà. Møfahà uwaga kà, kà mazlak akul. ⁶ Akul, kanøfaw madz à ahøj gami, ŋgaha la aŋa Suføl Yesu babay, kasaw ŋgøpma møŋga kà gay uwaga, ama kakøsav gay aŋa Zøzagøla la løv aŋkul la tsøh la marabay uwana Masasøfok tsikasla avà à akul. ⁷ La kità kà, akul kapakaw maftsa vok aŋa azlamøna madiŋal gøl à vok la kutso Makeduniya, la kutso Akayya gesina. ⁸ Kà akul la uwana, gay aŋa Zøzagøla atsøn ala la slaka gesina, la Makeduniya ŋgaha la Akayya pøra aw. Azladza gesina tasøl gay madiŋ gøl à Zøzagøla à vok aŋkul. Kiya uwaga kà, mønøkuða à mapøh gay uwanay aya aw. ⁹ Atà tapøh à anu gay manøjla anu aŋkul, la uwana kakwesàwkà azlamazlazlay, kà akul aŋa manøf Zøzagøla uwana la sifa ŋgaha dziriga, ¹⁰ la makud mas à ahøj aŋa Kona aŋha la zagøla. Yesu uwana Zøzagøla awulla à uda la mamøtsay, masla adætøf anu la mapak løv aŋa Zøzagøla la vuf seriya, uwana adasa à wanj.

2

Sløray uwana Pol aðaahøj la Tesaloniki

¹ Azladede, sèlāw kà madz à ahøj gami la slaka aŋkul kà deyday aw, kà uwana kakøsav gay marabøj. ² Mok uwana møløg mabøz mtøga aŋkul kà, azlamøna mēzam gami tatørøb anu møŋga la matsøk anu magoðaahay à gøl la Filipiya. Akul kà, kasølaw uwaga babay. Mok uwana mødabøz à slaka aŋkul la Tesaloniki kà, azlamøna mēzam gami la ahøj babay. Ama Zøzagøla adzørøða anu à uda, kà anu aŋa mapøh à akul gay marabøj aŋha. ³ Møpøhla à azladza kà tetøvi delga kà manøfay, mepøh fida aw ŋgaha mepøh mawisiga aw. Møpapatà azladza babay aw. ⁴ Ama mepøh kà gay uwana Zøzagøla apøh à anu à ahāl, kà aŋa mapøhay à azladza pøra. Kà uwana mok uwana Zøzagøla agür anu, akøs anu ndzer, ŋgaha avà à anu maz gay marabøj. Møyah kà anu aŋa mahøday à azladza à adi aw, ama à Zøzagøla à adi, masla uwana asøl madzugway aŋa løv gami. ⁵ La lela kasølaw kà, mepøh gay aŋa mavavar akul, ŋgaha gay aŋa mayah tatak la slaka aŋkul aw, Zøzagøla à masla masølay. ⁶ Møyah maslækaw anu aŋa azladza aw, møyah maslækaw anu aŋkul aw, amiyaka aŋa azladza anik aw. ⁷ Møslāla vok aŋa mapøhla gøl gami ala kà anu azlamagolga, kà uwana anu azlamøna masløyay aŋa Yesu Kristu nøma, ama mødzugw kiya uwaga aw. Møfà à akul sløm bokuba iyà, uwana af sløm à azlabøza aŋha. ⁸ Kiya uwaga la mawoy akul gami kà, møgà nekwa aŋa mazakulla, kà gay marabøj aŋa Zøzagøla pøra aw, ama sifa gami babay kà møvà à akul, kà uwana kagaw azlabøza gay løv gami. ⁹ Haðaŋ azladede, kasølaw la mok uwana mēzākulla gay marabøj kà, møyahà vok la sløray zlazlaðaŋa uwana la abà møfahàhàŋ mahøny la mavakay kà, kà anu aŋa maf mahanay à azlamøna gay Zøzagøla à gøl aw.

¹⁰ Iyay zlà, akul azlamøna madiŋal gøl à vok kasølaw, ŋgaha Zøzagøla asøl uwaga babay: Maday gami la tataka aŋkul la abà kà delga, tørra, ŋgaha sètaka. Dza la ahøj asløha à anu à vok lakøl aŋha aw. ¹¹ Kasølaw kà møfahàkullāŋ bokuba uwana baba aðaehøj à azlabøza aŋha. ¹² Ama mødøv akul kuða koksikoksi, kà akul aŋa maday bokuba uwana akøs à Zøzagøla à gøl. Zøzagøla uwana azalà akul, kà akul aŋa mad à makoray aŋha à abà, ŋgaha à mazløbay aŋha à abà.

¹³ Kikay, mægodf à Zëzagëla koksikoksi babay, kà uwana mok uwana katsënàw gay Zëzagëla, uwana mæzàkullàn, kakësàw uwaga bokuba gay anja azladza aw, ama bokuba gay Zëzagëla. Uwaga ndzer, gay Zëzagëla, uwana adafah slëray la tataka ankul la abà, akul azlamëna madinjäl gël à vok. ¹⁴ Uwana apakà vok la maham à ahøj mëna gay Zëzagëla la kutso Yahudiya, uwaga apakà vok la akul bay, akul azladedä kabàsaw matërëbay bokuba uwana tasà la ahàl anja tsøhay anjatà, azla Yahudiya bay. ¹⁵ Kiya uwaga azladza uwaga takëd Sufël Yesu, ngaha la azladza uwana tapäh gay Zëzagëla à azladza uwarà, atà bay tatërëbà anu, kiya uwaga tahëd à Zëzagëla à adi aw, atà kà azlamëna mëzam anja azladza gesina. ¹⁶ Gay gä la uwaga tayäh madëd anu gay à ahøj, kà anu anja maz gay mabëlay à azladza uwana tasël Zëzagëla aw, gay gä la uwaga tsakana anjatà adahën ala, seriya anja Zëzagëla aböz atà.

Pol ayah manøj azla Tesaloniki aya

¹⁷ Azladedä, mok uwana mävahà vok ala anina kà, gël gami adà akul à tsøh, kà manøj ankul. Mëdà anjami pära, ama gël gami agöd à akul à tsøh. ¹⁸ Møyäh mawul à slaka ankul aya. Gi Pol la gël gulo gøyäh tetëvi anjувaw kà mad à awtày, ama seteni adëd gi gay à ahøj. ¹⁹ Mëdzugway kà lakël ankul, akul azlamëna madinjäl gël à Zëzagëla uwana à vok kadzërëdähàwanula, ngaha apëhanula kà gay marabøj kà la ndzëdä. Akul bay kà, akul la tataka anja azladza uwaga la abà. Akul la uwana karäbàw lëv gami babay. Akul la uwana kapëhàwla ala, kà slëray gami kà delga à uwana mëdzà à ahøj hahalakanna, kà masla la huma anja Sufël gami Yesu, la kaslä uwana adäsa à ahøj. ²⁰ La haday gä kà akul la uwana kavàw anu madz à ahøj la hahalakanna ngaha la marabay.

3

Mawoyøj asal magodfay: Mas ngërpa kà anja azladedä

¹ La kiya uwaga kà, gël akädf anu à vok, kà uwana mæbözà à wakità ankul aw. Gay gä la uwaga, mësälala vok anja mabasiñ aw, maslä mëdzügw anja maslël akul Timotawus à awtày à slaka ankul, ngaha anu anja madz à ahøj la Atena disa. ² Kiya uwaga mësäläl akul deda gami Timotawus à awtày, uwana mëdäh slëray anja Zëzagëla la slaka gä anina, kà uwana anu mëziñ gay marabøj lakël anja Yesu Kristu la slaka gä. Kiya uwaga mësälëlla akul à awtày kà masla anja madzërëdäh akul à uda la madinjäl gël à vok la abà. ³ Ngaha kà dza ankul anja mawul à lig, kà ngërpa aw. Kà uwana uwaga kà, agay tatak gami, anu azlamëna manëfay bay. ⁴ Ndzer, mok uwana mëlög la tataka ankul la abà kà, mëpëh à akul gay anja ngërpa uwaga à vok à abà dagay uwarà, lagwa kà masla gä la uwaga adabözä akul. Sëlàw la lela! ⁵ Gay gä la uwaga à uwana, mësälala vok anja mabasiñ aya aw, à uwana mësäläl Timotawus à awtày kà masëlay lakël anja madinjäl gël à vok ankul, ngaha kà gi anja masëlay babay. Guba azà à gi kà seteni anja madukw akul à ahøj, ngaha slëray gami anja mapakay deyday.

Lëv gami adatas ala, kà uwana akul la tetëvi delga la ama

⁶ Kay, ama lagonay kà Timotawus adawul à wan, adaraba à anu lëv, la gay madinjäl gël à vok ankul, la masal ankul uwana kapëhàwla ala. Agöd à anu kà, kadzugwaw kà lakël gami koksikoksi, asa à akul manøj anu bokuba uwana asa à anu manøj akul. ⁷ Haday azladedä, mëdzà à ahøj la iyaw tugwi la adi mënga, ama à mok uwana mëdatsën gay ankul kà, kadiñaw gël à Yesu à vok kà adzërëdäh anu à uda. ⁸ Lagonay kà, bà uwana akul la tetëvi anja Zëzagëla la tsøh kà, lëv gami adatasl ala adagay. ⁹ Iyay zlä, madëv kudfa gesina la kikay uwana mëgodf à Zëzagëla kà ankul ma asla takay? Mëdëval kudfa kà marabay mënga uwana karäbàw anu la huma anja. ¹⁰ La mok uwana mëdëv kudfa mahëny la mavakay kà, kà masla anja mav à anu tetëvi anja mad manøj akul à gay. Asa à anu kà anu mëtapakulla gay uwana alög à akul, à gay anja mataplä la madinjäl gël à vok la abà.

¹¹ Gay gä la uwaga mëdëv, kudfa à Zëzagëla Baba gami la Sufël gami Yesu, kà atà anja mapëzl anu tetëvi anja mad à awtày kà manøj akul à gay. ¹² Delga kà Sufël azigøn mawoy vok ankul, ngaha kawoyaw azladza gesina kalkal bokuba uwana mëwoya akul. ¹³ Kiya uwaga masla adävà à akul ndzëdä à lëv ankul à tsøh, kà akul kadägaw sëtaka la huma Zëzagëla Baba, la mok uwana Sufël Yesu adawul à wan à gudøj à vok la azlañha.

4

Maday uwana akës à Zëzagëla à gël

¹ Ngaha zlä, azladedä, aganay gay uwana atëm kà anu à ahøj aya anja mapëhakulla. Mok uwana anu la slaka ankul kà, katapawla gay maday dziriga uwana akës à Zëzagëla à gël la slaka gami, kà kiya uwaga la uwana kadfahàwwan. Lagonay kà, gëdëv akul

kudfa: 'Kamkam', gëgod' à akul la slëm anja Sufël gami Yesu, kà akul anja mad à huma à gay koksikoksi la manëfay la abà aya. ² Mëdatapakulla tatak uwana mëtäpla la slaka Sufël Yesu lagwa zlà, ngaha babay kà kadasëlaw adagay ³ Uwana asa à Zëzagëla kà, delga kà akul anja magay sëtaka, ngaha akul anja makës gël anjul kà mabila. ⁴ Gay gä la uwaga gëgod' à akul gesina: 'Tsenàw vok à gay la azlamis anjul. Banja katsënaw vok à gay kà, kagaw sëtaka la tetëvi anja Zëzagëla la ama, ngaha azladza tatsëd' akul gay à tsëh aw. ⁵ Kà uwana banja kadzaw à ahënj la mabila la abà kà, kapakaw bokuba azladza uwana tasël Zëzagëla aw.' ⁶ Tsa bà kiya uwaga kà, dza adäha tsakana à masla magay anja à vok lakël anja azlamis aw, kà uwana ndzer, kasëlaw kà, Zëzagëla adah seriya à tsëhay dza uwaga à gël, kà uwana mëdapëh à akul à vok à abà lakël anja uwaga. ⁷ Zëzagëla azalà anu à mabila à abà aw, ama anja madz à ahënj la sëtaka la abà. ⁸ Gay gä la uwaga, azladza uwana takweska la mapësew gay uwanay kà, takweska kà dza aw, ama takweska kà Zëzagëla, uwana avà à akul Masasëd'ok tsikaslaga anja.

⁹ Azladedä, banja lakël anja mawoy vok kà, anu la gay anja matsetser à akul, akul azlamëna madiñal gël à vok, aw, kà uwana Zëzagëla adapëhakulla tsëhay tetëvi uwaga adagay. ¹⁰ Iyay ndzer, kiya uwaga la uwana kadähawwän à azlamëna madiñal gël à vok la kutso Makeduniya gesina. Ama akul kà, 'Duwäwla uwanay aya', mëgod' à akul azladedä. ¹¹ La kità kà akul kà, yähaw madz à ahënj la lapiya la abà, faw gël à uwana kanawkudfa anja, kà akul anja madzadzär gël anjul, bokuba uwana mëpëh à akul à vok à abà uwarà. ¹² Ngaha banja akul azlamëna gay Zëzagëla kà, dähawwän kiya uwanay, kà azladza uwana la uda tasël Zëzagëla aw, tadäkës gay anjul, ngaha kà akul anja mahan dza anik aw.

Kaslà mawul à wanj anja Sufël Yesu

¹³ Azladedä, asa à anu kà kasëlaw azlatatak lakël anja azlauwana tamatsay, kà akul kagaw la mazaw la gël la abà aw, bokuba azladza anik uwana tasël gay lakël anja mawul à uda anja Yesu aw. ¹⁴ Ama anu kà mësel kà Yesu amëts, ngaha Zëzagëla awulla à uda la mamëtsay, kiya uwaga babay mësel kà azlauwana tamäts à tetëvi anja à tsëh akul, Zëzagëla adäwulla atà à uda la mamëtsay babay, ngaha adähama atà gay à vok la Yesu. ¹⁵ Anu uwana mëlög la sifa dadän, à mok uwana Sufël Yesu adäwul à wanj kà, azladza uwana tamäts à madiñal gël à vok à abà kà, tadätsëvka magagamay la Yesu kà anu. Hadäy, gay uwaga gëpëh à akul lagonay kà, gay uwana asä à wanj la slaka Sufël.

¹⁶ Kiya uwaga la mavakay uwatä, mëdätsën maslëh mël anja dza uwana akoray, kuda anja sufël anja azlamalika, la mahohumay anja mazlazlinj anja Zëzagëla, ngaha Sufël gami Yesu Kristu la gël anja adäsa à ahënj la zagëla. Ngaha teranj azlauwana tamäts à madiñal gël à vok à abà tadätsëv vok à uda la mamëtsay. ¹⁷ Ngaha la lig la ahënj, anu uwana mëlög la sifa aya la mok uwaga, Zëzagëla adähël anu à habaga à abà, kà anu anja magagamay la Sufël Yesu à tataka zagëla à abà. Ngaha mëdädza à ahënj koksikoksi la masla. ¹⁸ La gay uwanay kà, taslahaw vok gay à ahënj kà akul à akul.

5

Madz à ahënj la adi

¹ Azladedä, lakël anja mavakay banjaw la kaslè anja azlatatak uwanay adäpaka vok kà, mënëkudfa anja anja matsetser à akul aw. ² Mavakay uwatä kà, akul la gël anjul bay kà kasëlaw lela, kà uwana Sufël adäsa à ahënj la magorëh azladza, bokuba masla gël, uwana atsa à wanj la wëd. ³ Mok uwana azladza tadägoday: 'Gudënj à vok la lapiya, magogutsay la ahënj aw', tadägoday. Katskats la mok uwaga la uwana matërëbay mënga adädzëka à vok, bokuba mis uwana huft bëzi agur à ahënj. Ngaha azladza tadätëfay la uwaga la abà dikidiki aw.

⁴ Azladedä, kà anjul kà, akul azlamëlok anja gay uwanay aw. La kità kà, mavakay uwatä adägorëh akul bokuba masla à gël uwana agorëh azladza aw. ⁵ Gesina anjul, akul azlamëna maday la ufäka anja mavakay la abà, awkä anu azlamëna maday la mëlës anja wëd la abà aw.

⁶ Tsa banja kiya uwanay kà, mëdzehäl bokuba anja azladza anik uwana tasël gay uwanay aw aw, ama say mëdza à ahënj la adi la manënjla gël gami. ⁷ Iyay zlà, la wud la uwana azladza tadzehäl aw takay? Ngaha aya kà, guzu akëd' atà la wëd bay. ⁸ Ama anu kà, anu azladza anja wëd aw, anu azlamëna anja mavakay, kà uwaga say mënënjla vok gami, mëduw madiñal gël à vok la mawoyënj bokuba slarapay. Mëf manewënj anja mabëlay gami à gël, bokuba humëz gël. ⁹ Mëdzugw lela, Zëzagëla afä à anu à ahënj, kà anu anja matap ngërpa anja mapak lëw anja aw. Ama kà anu anja mabëlay, kà à ahäl anja Sufël Yesu uwana mafal dzakwa à gël gä. ¹⁰ Masla amëts kà anu. La mok uwana

adàwul à waŋ baŋa anu la sifa, amiyaka baŋa mēdamatsay kà anu aŋa madz à ahēŋ la sifa la masla. ¹¹ Kà uwaga ndzērēdāhāw vok ala, taslahaw vok gay à ahēŋ bokuba uwana kacfahāhāw wāŋ.

Gay makēd gəl à ahēŋ

¹² Azladedā azlauwana Sufəl Zəzagəla apakatāla kà azlamēŋga lakəl aŋkul kà aŋa matapakulla sləray kà, sləkāwāw atā, la makəs atā gay la ahəl ala. ¹³ Sləkāwāw atā, ŋgaha pēhāwatāla mawoy atā aŋkul, kà sləray mēŋga uwana tadēhēŋ, tsənāw vok gay kà akul à akul.

¹⁴ Azladedā, kamkam, slēhāw məl à azlaməna mas à gəl, kà atā aŋa madāh sləray, ndzērēdāhāw azlaməna guba gā ala, ŋgaha zlakāw azlaməna kokudā ndzēdā, basāw wāŋ azladza gesina. ¹⁵ Dahāw haŋkəli kà akul aŋa mawulla matsak vok mawisiga à adi koksikoksi aw, yāhāw madz à ahēŋ la delga la abā kà akul à akul, ŋgaha la azladza à uda babay.

¹⁶ 'Rābāw koksikoksi! ¹⁷ Dēvāw kudā à Zəzagəla kokudā masakal.' ¹⁸ 'Kikay', mēgod à Zəzagəla kà kəla tatak uwana avā à anu gesina. Aganay tatak uwana sifa gami la abā, anu azladza aŋa Yesu Kristu.

¹⁹ 'Kadēdāw gay à Masasēdōk Zəzagəla à ahēŋ aŋa madāh sləray aw. ²⁰ Kapəsewaw gay aŋa azladza, uwana Zəzagəla apēh à atā à ahəl aŋa mapāh à azladza aw. ²¹ Ama mēdzēdāw nērēzāw lela, kəsāw kà uwana la tetəvi aŋa Zəzagəla la ama.' ²² ŋgaha nēŋāwla gəl aŋkul lakəl aŋa tatak mawisiga gesina.

²³ Zəzagəla uwana avā à anu lapiya agēŋ akul sətaka. ŋgaha kà Zəzagəla aŋēŋla vok aŋkul gesina, masasēdōk aŋkul, sifa aŋkul la sləb vok aŋkul gesina kà aŋa kaslā uwana Sufəl Yesu Kristu adāwul à waŋ kà kadāgaw kokudā tsakana. ²⁴ Zəzagəla uwana azalā akul kà akul aŋa magay azlaaŋha, adfaha uwaga kà aŋa magēd gay aŋha à afik.

Ayyi makēd gəl à ahēŋ

²⁵ 'Dēvāw kudā kà aŋami, azladedā.' ²⁶ 'Ayyi', gēgod à azladedā gesina. ²⁷ 'Kamkam', gēgod à akul la sləm aŋa Sufəl kà. 'Dzēŋāw wakitā uwanay la huma aŋa azlaməna madiŋal gəl à vok gesina.'

²⁸ Vok mahamay aŋa Sufəl gami Yesu Kristu agay la akul.

MASƏLA AŇA WAKITÀ UWANA POL ATSETSER À AZLA TESALONIKI Deuxième Lettre de Paul aux Thessaloniens

Ayyi

¹ Gi Pol la uwana gətsetser wakità uwanay, anu la Silas ngaha la Timotawus bay. Mətsetser à maham à ahəŋ məna gay Zəzagəla la gudəŋ Tesaloniki, uwana azlaaŋa Zəzagəla Baba, ngaha aŋa Sufəl Yesu Kristu. ² Zəzagəla Baba la Sufəl Yesu Kristu tapis à akul gay à vok, la lapiya.

Aganay seriya uwana adàpaka vok

la kaslà uwana Yesu adàsa à waŋ

³ Azladedə, ‘Kikay’, məgod à Zəzagəla kà akul koksikoksi, mədāh uwaga ndzer, kà uwana madiŋal gəl à vok aŋkul, uwana kadiŋawwal gəl à vok, adāla silih məŋga, ngaha mawoy vok aŋkul uwana kawoyaw vok adā à humā à gay. ⁴ Gay gā la uwaga, baŋa anu la humā à azlaməna gay Zəzagəla anik kà, hahalakanna à gāy ləv gami, kà uwana amiyaka azladza tasa à akul ngərpa, tapəsew akul kà, kabasawwaŋ, katsizllaw à delga à afik, ngaha kadiŋawwal gəl à vok, amiyaka la matərəbay uwaga la abā gesina.

⁵ Azlatatak uwanay gesina apəhanula, kà Zəzagəla adādah seriya la dziriga. Kasaw ngərpa kà makoray Zəzagəla, la uwaga la uwana adāzlayla akul aŋa mad à slaka makor gəl à abā. ⁶ Ndzer, Zəzagəla adāgəf dziriga à afik. Bokuba magodāy, adātərəb azladza uwana tatərəb akul suwaŋ. ⁷ Lagonay kà kasaw ngərpa, ama Zəzagəla adāzəb akul ngərpa lakəl ala, amiyaka anu babay. Adādah uwaga la wud uwana Sufəl Yesu adāsa à ahəŋ la zagəla, la azlamaliika aŋha, uwana tazləb masla. ⁸ Kiya uwaga Sufəl gami Yesu adāsa à ahəŋ la magol akāl la abā, kà madācfahla seriya à azladza uwana à gəl tapəsew Zəzagəla, ngaha azlauwana à gəl takweska gay marabəŋ lakəl aŋha. ⁹ La abatā la uwana tadācfah à atā seriya dzaŋdzaŋga à gəl, tuwiz tadānəŋ huđ adi aŋa Zəzagəla tetuwa, amiyaka mazləbay, ngaha la ndzəda aŋha aw.* ¹⁰ Uwaga adāpaka vok la mavakay uwatā, adāsa à waŋ kà, kà masləkaway aŋa azladza aŋha, azlaməna madiŋal gəl à vok tadawoy masla. Akul bay kadāgaw la atā, kà uwana kadiŋawwal gəl à gay gami uwana à vok, məpəh à akul.

¹¹ Gay gā la uwaga mədəv kuđa koksikoksi kà aŋkul. ‘Kamkam’, məgod à Zəzagəla gami, kà mapakakulla sətaka, kà akul aŋa madz à ahəŋ la sifa uwana azalā akul, ngaha ahən sləray aŋa madiŋal gəl à vok aŋkul ala, mənəval kà masla aŋa mazlak à akul la maslay aŋha. ¹² La kiya uwaga kà, sləm aŋa Sufəl gami Yesu adāgay masləkaway gā la slaka aŋkul, ngaha akul kadāgaw masləkaway gā kà masla. Uwaga gesina adāpaka vok kà vok mahamay aŋa Zəzagəla, ngaha la Sufəl gami Yesu.

2

Gay lakəl aŋa masla məzam aŋa Zəzagəla

¹ Azladedə, gəpəh à akul lakəl aŋa mavakay aŋa mas à waŋ aŋa Sufəl gami Yesu, ngaha la maham gay à vok gami la slaka aŋha. ‘Kamkam’, məgod à akul azladedə, ² kiya uwaga kà baŋa dza adāgod à akul kà, afats mas à waŋ aŋa Sufəl kà adāslay kà, gəl adākad akul à vok katskats aw, guba adākəs akul babay aw. Zlahaw, dza adāpəhla uwaga ala bokuba gay aŋa azladza uwana Zəzagəla apəh à atā gay à ahəl aŋa mapəh à azladza anik, baŋaw aza akul gay Zəzagəla, baŋaw agof à akul kà anu la uwana mətsetser uwaga. ³ Amiyaka la kakay maŋ kà, kasakaw dza apapatakula gay aw. Kà uwana mavakay uwaga adāsa à waŋ kiya uwaga pəra aw. Say azladza tadāzigəŋ gəl aŋatā lakəl aŋa Zəzagəla dadəŋ, ngaha masla məzam uwana masla kà aŋa mazila tetuwa, adāpəhla vok ala. ⁴ Masla kà kəla tatak uwana azladza tanəfay la masləkaway kà, adācfəfal gay à ahəŋ amiyaka à Zəzagəla, la tatak uwana tasləkaway gesina kà adācfəfal gay à ahəŋ. Adāzigəŋ gəl aŋha lakəl aŋa tatak gesina, adāday kà madz à ahəŋ la məŋ gāy Zəzagəla la aku. La abatā kà: ‘Gi la uwana gi Zəzagəla’, adāgodāy.*

⁵ Awul akul à gəl à uwana gəpəh à akul uwaga gesina, à mok uwana gələg la tataka aŋkul la abā aw ay? ⁶ Kà uwana lagonay kà, tatak anik la ahəŋ adəfal gay à ahəŋ kà mas à waŋ. Kasələw uwana adəfal gay à ahəŋ: Kà uwana baŋa kaslə aŋha adāslay

kà, masla mēzam uwaga adāpēhla gəl aŋha ala. ⁷ Iyay, lagonay ndzēfa aŋa mazīgəŋ gəl uwaga adah sləray la slaka azladza, mētəsen tatak uwaga kà la mapəhanula aŋa Zəzagəla. Ama tatak uwaga kà apaka vok la dazuwaya aw, say baŋa dza uwana adzala à ama, az vok aŋha la uwana adābəza tetəvi. ⁸ La lig aŋa uwaga la ahəŋ kà, masla mēzam uwaga adāpēhla vok ala. La vuŋ uwana Sufəl Yesu adāsa à ahəŋ la mazlēbay aŋha, adākəday la afad gay aŋha, adāziŋ ala la mapəhla vok aŋha ala la abà.* ⁹ Masla mēzam uwaga adāsa à waŋ la ndzēfa aŋa seteni, adācfahàh azlatsəhay sləray mavalàh ləv à azladza à gay anik anik, ŋgaha la azlanadzipo fida gə. ¹⁰ Adāpapatah azlamazehlaga gesina, la azlagay la azlasləray mawisiga aŋha anik anik gesina. Tadāzehla, kà uwana takweska gay marabəŋ, uwana naka abəl atà, la uwaga takweska dziriga. ¹¹ Gay gə la uwaga, Zəzagəla la gəl aŋha adāvà à atà ndzēfa, kà atà aŋa madīŋal gəl à fida uwaga à vok. ¹² Kiya uwaga kəla dza uwana adiŋ gəl à dziriga à vok aw, ama arab la mawisiga la abà, Zəzagəla adācfahalla seriya à gəl.

Zəzagəla atsatsāmāni akul kà magay azlaaŋha

¹³ Say 'Kikay', məgof à Zəzagəla koksikoksi lakəl aŋkul azladedə. Zəzagəla awoya akul, atsatsāmāni akul kà dagay madzəka gudəŋ à vok kà aŋa maβəl akul. Kabəlāw kà la Masasəfok aŋha, uwana apākakulla kà azladza aŋha, ŋgaha kabəlāw kà, kà uwana kakəsəw dziriga babay. ¹⁴ Zəzagəla azalà akul à uwaga à abà la gay marabəŋ uwana mēzakulaŋ. Azalà akul kà akul aŋa magay la mazlēbay, uwana Sufəl gami Yesu Kristu agà la abà la gəl aŋha. ¹⁵ Tsa baŋa kiya uwaga kà, azladedə, wādāw vok à uda la gay Zəzagəla la abà. Kiya uwaga kəsəwwāŋ la ləv azlatatak uwana mətəpakulla amiyaka uwana mətəpakulla la gay amiyaka uwana mətsetser à akul matsetseray.

¹⁶ Sufəl gami Yesu Kristu la gəl aŋha, ŋgaha Zəzagəla Baba uwana tawoya anu, tapis à anu gay à vok, ŋgaha tavà à anu ndzēfa, kà anu aŋa manəfay kà uwana delga pəra, la mapəhay kà uwana dziriga pəra. ¹⁷ La vok mahamay aŋha, adzərəfəkulla koksikoksi, ŋgaha masla azlaka akul aŋa maf manewəŋ à tatak uwana à afik adāsa à ahəŋ.

3

Dəwəw kuŋa à Zəzagəla kà aŋami

¹ ŋgaha zla, azladedə, aganay à uwana atəm, kà anu à ahəŋ aya aŋa mapəh à akul: 'Dəwəw kuŋa à Zəzagəla kà gay aŋha aŋa mad à huma à gay katskats, ŋgaha azladza aŋa masləkaway bokuba uwana apakà vok la tataka aŋkul la abà babay. ² ŋgaha aya, dəwəw kuŋa à Zəzagəla kà masla aŋa manəŋla anu, kà azlaməna madāh mawisiga la azlaməna makasafər, kà uwana azladza gesina takəs dziriga aw!'

³ Ama Sufəl gami kà, masla kà dziriga, adādzərəfəh akul à uda ŋgaha adānəŋla akul la azlamawisiga la abà. ⁴ Gay gə la uwaga kà, Sufəl gami avà à anu manewəŋ lakəl aŋkul babay, kà uwana məsəl kà, kadācfahaw uwana məpəh à akul, bə la huma la gay bay kà, kadācfahaw uwaga.

⁵ Awoyaŋ kà Sufəl Zəzagəla, azlaka akul, kà akul aŋa mawoyəŋ kaykay, kà akul aŋa mabas matərəbay bokuba uwana Yesu Kristu abasəŋ.

Makəs vok aŋa sləray

⁶ Azladedə, 'Kamkam', məgof à akul la sləm aŋa Sufəl Yesu Kristu, kadzaw à ahəŋ la azlaməna masa la slaka gə aw, kà uwana takəs matapatla gami uwana mēzətəŋ aw. ⁷ Hadəy, akul la gəl aŋkul kasələw madz à ahəŋ gami, uwana mēdzà à ahəŋ la tataka aŋkul la abà lela, nəfəw slaka asik gami, kà uwana anu azlaməna masa aw. ⁸ Kiya uwaga mēzəw tatak may aŋa azladza deyday aw. Məyà vok məkəs aŋuf la adi ala mēfahàh sləray mahənaŋ la mavakay, kà anu aŋa madzadzər gəl gami, ŋgaha kà anu maf mahənaŋ à azlaməna gay Zəzagəla à gəl aw. ⁹ Ndzər, mēslà mazlak anu aŋkul nəma. Ama mēfahàh kiya uwanay kà, kà akul aŋa manəfay madz à ahəŋ gami. ¹⁰ La dziriga kà, mok uwana mələg la tataka aŋkul la abà kà, məpəh à akul la dazuwaya kà, dza uwana asal sləray aw kà, azuw tatak may suwaŋ aw.

¹¹ Uwana məpəh à akul kiya uwanay kà, kà uwana mətəsenəŋ kà aŋuwaw la tataka aŋkul la abà kà azlaməna masa, tadāh sləray aŋatà aw, say mavalàh à gəy aŋa azladza anik à abà pəra. ¹² Tsəhay dza uwaga kà, gənav à akul, ŋgaha gəfaha à akul akur à lig la sləm aŋa Sufəl Yesu Kristu: 'Kà atà tadāh sləray aŋatà la tetəvi aŋha, kà atà aŋa madzadzər gəl aŋatà!'

¹³ Azladedə, akul kà kayəw vok aŋa madāh delga dīkidīki aw. ¹⁴ Kiya uwaga baŋa dza akəs matapla gami, uwana mətsetser à akul à wakitə uwanay à abà aw kà, dūwəwwalla

à adi, kafawwal sləm aw, kà ziruwi aṅa makəsay. ¹⁵ Ama kanərəzaw masla bokuba masla məzam aw, say kawullawla matsihila bokuba deda aṅkul.

Ayyi makəf gəl à ahəṅ

¹⁶ Sufəl, masla aṅa makor lapiya, avà à akul lapiya la kaslà gesina. A bà la mana beyimi bay. Awoyaṅ kà Sufəl adza à ahəṅ la akul gesina.

¹⁷ Gi Pol, la uwana gətsetsər wakità uwanay la ahəl gulo: ‘Ayyi’. Nəṅàwwàṅ bokuba uwana gəfà ahəl à wakità gulo uwana à afik gesina.

¹⁸ Mapis gay à vok aṅa Sufəl Yesu Kristu agay la akul gesina.

MATERA ANA WAKITÀ UWANA POL ATSETSÈR À TIMOTAWUS Première Lettre de Paul à Timoth'ee

Ayyi

¹ Gi Pol, la uwana gøtsetser wakità uwanay, gi maslèlay anja Yesu Kristu, bokuba uwana asa à Zøzagøla Baba. Masla maβøl anu, ngaha la Yesu Kristu uwana møfa madzugway gami à masla à afik.

² A kak Timotawus, kak kona gulo dziriga, uwana la madiñal gøl à vok la abà. Zøzagøla Baba gami, atà la Yesu Kristu Suføl gami, tapis à ka gay à vok la mabasakanj, ngaha la mav à ka lapiya.

Mahøl à ahøj kà azlamatapla uwana akøs vok aw

³ Uwana gønava ka, à mok uwana gødà à kutso Makeduniya, 'Dzà à ahøj la Efesus', gøgøf à ka, kà uwana azladza tapàhla azlamatapla mawisiga ala la ahøj la abatà, ngaha kà asà à gi kà: 'Dzàw à ahøj', kagøf à atà. ⁴ Gøf à atà kà: 'Sàkàw mapøh azlagay anja azlababa ankul maviyaga, ngaha la azlawakità anja azlasløm anjatà deydayga. Kà uwana azlagay uwaga kà, tatsalla magazlay à wanj deyday pøra, uwaga kà adfah sløray à Zøzagøla la uwana la abà, møsøl la madiñal gøl à vok la abà aw. ⁵ Uwana akøs vok!' Kapøh à atà, kà tawoy azladza anik, ngaha la masal uwana asa à uda la løv øetaka la tsøh, la madzugway delga, ngaha la madiñal gøl à vok, uwana kaskas la tsøh aw. ⁶ Azladza anik tasæk à tetøvi dziriga la tsøh ala, ngaha tanøfa à azlatatak deydayga, kusoñuga. ⁷ Tanørez gøl anjatà kà kiya atà, kà azlamøna matapla azladza anik lakøl anja Zøzagøla. Ama tasøl uwana tapøhay aw, tasøl tatak uwana tawafda gøl à afik aw.

⁸ Anu kà, møsøl kà mapøhay anja Zøzagøla kà delga, à bana dza adfahla sløray bokuba uwana akøs vok. ⁹ Bana uwaga avika ka aw: Mapøhay kà tafahàn kà anja azladza dziriga aw, ama kà anja azlamøna tsakana, la azlauwana tapøsew Zøzagøla, la azlauwana takøs gay Zøzagøla aw, la azlauwana takweska Zøzagøla, la azlauwana tafah mawisiga, la azlauwana taväl à Zøzagøla à ahøj lakøl à adi, la azlauwana takaf azlababa anjatà la azlaiya anjatà, ngaha la azlamøna makaaf dza gesina. ¹⁰ Ngaha aya kà anja azlamøna à gøl gaw, la azlamøna matsatsøl vok kà atà kà atà zil zil, la azlamøna madaw dza ala, la azlamøna fida, la azlamøna mazaw mawafay fida gä, ngaha la azlamøna mafah tatak gesina uwana la tetøvi anja aw. ¹¹ Matapla uwanay kà, asà à uda kà la gay marabøj uwana la abà kafä à gi à ahäl, ngaha uwana lakøl anja Zøzagøla, uwana mazløbay gä, uwana barka gesina atsa à uda la masla la abà koksikoksi.

Kikay kà vok mahamay anja Zøzagøla

¹² 'Kikay', gøgøf à Suføl gulo Yesu Kristu uwana ahønagøla la ndzøfa gesina kà anja sløray anja. 'Kikay', gøgøføl kà uwana anøn gi à adi, ngaha afä à gi à sløray anja à abà. ¹³ Kay, nøma kà, gøpäh mawisiga lakøl anja, dagay uwarä gødatørebøj la matsøkäl magøfahaj à gøl babay. Ama kà, vok ahamä à Zøzagøla kà gi, kà uwana mok uwatä kà, gi la madiñal gøl à vok aw, ngaha bay kà, gøsøl uwana gødfahàn aw aya. ¹⁴ Suføl gulo adapis à gi gay à vok møjga møjga, ayyä agøf à gi, kà mav à gi madiñal gøl à vok, ngaha la masal uwana ahamä à anu gay à vok la masla. ¹⁵ Aganay à gay uwana akøs vok kà azladza gesina takøsay: Yesu Kristu kà asà à wanj à gudøj à vok kà maβøl azladza gesina uwana azlamøna tsakana. Gi la uwana gødüw à atà gesina la tsakana la tataka anjatà la abà. ¹⁶ Uwaga à uwana, vok ahamä à Zøzagøla kà gi: Asal kà Yesu Kristu apøhla ala la gi la abà, kà gi la uwana gi masla tsakana kaykay. Mabasinj anja gesina uwana adfehøj lakana kà, kà anja à huma à gay gesina babay, azlauwana tadiñ gøl à masla à vok, tadäbøza sifa adøw à gay aw. ¹⁷ Zøzagøla la uwana Suføl uwana amøtsay aw, dza anøjøn aw, masla kokufda gøl anja, la uwana maslay la maslökaway la mazløbay agay la masla anja koksikoksi. Amen.

¹⁸ Timotawus, kona gulo, gøpøh à ka gay uwanay à ahäl: Awul à ka à gøl à gay uwana azlamøna mapøh à atà gay à ahäl tapäh lakøl anjak uwarä. Gay anjatà kà apakä ka tatak mapalla guvøl delga. ¹⁹ Køsä madiñal gøl à vok la madzugway delga. Ama azladza anik kà takweska manøf madzugway delga anjatà, ngaha kà uwaga à uwana tadiñ gøl à azlatatak dziriga à vok aya aw. ²⁰ La tataka anjatà la abà Himene atà la Alekøsender la ahøj, uwana gøbæk atà à seteni à ahäl kà atà anja maguray, ngaha kà atà anja maβøz tetøvi anja mawisiga lakøl anja Zøzagøla aya aw.

2

Matapla lakel anja madov kufa

¹ Teranja dadan, gəfaha à akul akur à lig, kà akul anja manavay la slaka Zəzagəla la madov kufa, la 'Kamkam', ngaha la 'Kikay' kà anja azladza gesina. ² Say madov kufa kà anja azlamənj sufəl, ngaha kà anja azlaməna makoray gesina, kà anu anja madz à ahənj la titi la abà la lapiya, la manəb vok gami la Zəzagəla, la maday delga ngaha mawoyənj gə, kà la muwulla gəl à vədah la huma Zəzagəla, ³ aganay tatak uwana ahəf, ngaha akəs à Zəzagəla gami masla mabəl anu à gəl. ⁴ Asal kà azladza gesina tabəlay, tatsa à wanj kà masəl gay dziriga anja, ⁵ uwana apəh à azladza kà, kà Zəzagəla kà tekula pəra, ngaha masla masəl anu vok la Zəzagəla kà tekula pəra, uwaga kà Yesu Kristu, uwana apakà dza la sləb vok. ⁶ Uwana asà à wanj, avà gəl anja, kà anu gesina anja magay azlaanja la makor gəl la abà. Kiya uwaga agəfà madzugway anja Zəzagəla à afik la kaslā uwana Zəzagəla akəfəv à ahənj, asal mabəl azladza gesina. ⁷ Kà uwaga à uwana Zəzagəla apakəgəla kà masləlay anja. Gi masla matapla à maham à ahənj dza, kà gi anja mazəh gay matsidəyga à azlauwana azla Yahudiya aw, kà atà tadinjal gəl à vok. Gəpəhay kà dziriga, gəfəh fida aw.

⁸ Asa à gi kà, kəla slaka gesina azladza tadov kufa, tadziiyla ahəl anətà à slaka Zəzagəla kà madov kufa la ləv tekula, la kokufa mapak ləv ngaha la kokufa magazlay.

Azlamis la maham à ahənj mənə gay Zəzagəla la abà

⁹ Asa à gi babay kà azlamis taduw lukut uwana à vok akəsə à vok, la mazlayla kà vok, ngaha la mawulla gəl à vədah, awkà tadaha vok la zlazlafa, la azlamatsaha à gəl dzadzakwaga aw, banəw la kəsaf sləm luwəluwə gə, banəw la azlatatak bəfə anik anik, banəw la lukut uwana tsakalay anja mənəyga aw. ¹⁰ Ama tatak uwana ahəf à atà kà, tadahla sləray dzəba anja səla aw gə. Azlamis uwana: 'Məkəs Zəzagəla' tagod kà, say tadehənj kiya uwaga. ¹¹ Say azlamis takəs matapla la titi ngaha la mawulla gəl à vədah. ¹² Gəvə tetəvi à mis kà matapla banəw anja makoray lakel anja azlazil aw, say tadza à ahənj titi. ¹³ Kà uwana teranja kà tanjal kà Adama dadan, ngaha la lig la ahənj Hawwa.* ¹⁴ Ngaha aya kà, seteni apapət kà Adama aw, ama apapət kà mis. Kiya uwaga à uwana mis akweskà mapahay anja Zəzagəla.* ¹⁵ Ama mis adəbəlay kà la mayyi bəzi, à banja awəf vok à uda la madinjal gəl à vok la abà, la masal, la tsikasla ngaha la mawulla gəl à vədah.

3

Azlamisiga anja maham à ahənj mənə gay Zəzagəla

¹ Aganay à gay uwana akəs vok: Banja dza ayəh kà masla anja magay masla manənjla azlaməna manəfay anik kà, ayahani kà sləray delga gə. ² Masiga anja azlaanik kà, say agay kà dza uwana dza aslala vok anja matsəfal gay à tsəh aw kəla. Agay zil anja mis tekula, agay dza tələmmaga, agay masla makəs gəl anja, agay dza uwana sləm anja la ahənj, agay masla makəs azlaməlök dza la ahəl səla, agay masla masəl matapla à azlaanik babay. ³ Aga masla guzu aw, masla magazlay aw, ama aga kà masla mabasinj, agay masla gay banəw masla mawoy sili aw. ⁴ Kəla kà, agay la maslay kà manənjla huđ gay anja lela, agay masla mawulla hanəkəli à azlabəza anja, kà atà anja matsən gay anja, ngaha kà atà anja mazləb masla. ⁵ Uwana gəpəh kiya uwanay kà: Kà uwana banja dza aslala vok anja makoray huđ gay anja aw, ma kakay aslala vok anja manənjla maham à ahənj mənə gay Zəzagəla ma? ⁶ Dza mawga la madinjal gəl à vok la abà kà, kapakawwanj ala kà masiga la katskats aw, kà uwana banja mawga kà, zlahaw zlapay adal à gay, ngaha seriya atəfal à gəl bokuba anja seteni uwana aga. ⁷ Say agay mawoyənj gə la huma à azladza, uwana tasəl Zəzagəla aw babay, kà masla anja magay mapəseyaw gə aw, ngaha masla anja matəf à melkaw anja seteni à abà aw.

Azlaməna mazlakay la maham à ahənj mənə gay Zəzagəla la abà

⁸ Azlaməna mazlak maham à ahənj mənə gay Zəzagəla kà, say tagay mawoy atə gə, tagay azlaməna magolla dza la mas guzu aw, banəw azlaməna mawoy sili la tetəvi mawisiga aw. ⁹ Say tatsizllay kà à dziriga anja madinjal gəl à vok uwana à afik, Zəzagəla apəhatəla, takəsay uwaga la madzugway dziriga la ləv tekula. ¹⁰ Kəla kà, say maham à ahənj anərəz atə dadan suwanj, à banja gay aga à atə la vok aw kəla, ngaha tada à sləray à abà. ¹¹ Azlamis anətà babay kà taga azlamis delga, taga azlaməna masəh gəl aw, taga azlatələmmaga, taga azladziriga la azlatatak gesina la abà. ¹² Say azlaməna mazlak à maham ahənj mənə gay Zəzagəla, tagay la mis tekula tekula, tagay azlaməna manənjla azlabəza anətə lela, la huđ gay anətə gesina. ¹³ Kà uwana banja tadəh sləray anətə kà

* 2:13 2.13 1Musa 2.7,21-22 * 2:14 2.14 1Musa 3.1-6

tafæza gəl anətà la madz à ahəj lela la abà, nḡaha tadàpəhay la magəfəhəj à afik anja madiḡal gəl à vok, uwana anu la abà la maham gay à vok la Yesu Kristu.

Godega anja madiḡal gəl à vok

¹⁴ Amiyaka gi la manewəj la abà kà mad à awtəy, kà manəj ka nekwa kà, gətsetser à ka wakità uwanay aya. ¹⁵ Kà uwana amiyaka gəda à awtəy katskats aw babay kà, wakità uwanay adàtapakalla madz à ahəj delga, lakəl anja huɔf gəy anja Zəzagəla, uwana maham à ahəj mənə gay Zəzagəla, uwana azlaanə Zəzagəla uwana la sifa. Maham à ahəj uwaga kà maḡuləv anja matapla dziriga. ¹⁶ La tetəvi anja matapla uwaga, Zəzagəla apəhlanj ala, nḡaha apəhanula maday gami la tetəvi anja la tsəh.

Gay uwaga kà aduwa tatak gesina ndzer, uwaga lakəl anja dza, uwana apəhla vok ala, bokuba dza la sləb vok.

Masasəfok tsikasla apəhla masla ala, kà dza dziriga, nḡaha azlamalika tanəḡəj.

Azladza tatsəḡəj maḡəhay anja, tazàhà gay anja à azladza uwana tasəl Zəzagəla aw, nḡaha azladza gudəj à vok tadiḡ gəl à masla à vok.

La lig anja uwaga la ahəj kà, Zəzagəla azəb à zagəla à slaka mazləbay gə à abà.

4

Azlaməna matapla fida

¹ Masasəfok Zəzagəla apəhay la paraka kà, la makəf gəl à ahəj kà, azladza anik tadəsaka madiḡal gəl à vok la tsəh ala. Tadəsakay kà gay anja azlamasasəfok mavavar dza, la azlatatak uwana azlamasasəfok mawisiga, tapəhla ala. ² Azlaməna matapla uwaga kà, azlaməna magolla dza, à uwana tadəzah dza ala. Madzugway anətà kà mamatsay. ³ Azladza uwaga kà tadəvarah gay kà mazəb mis la mazuw azlatatak anik anik. Tekedika Zəzagəla adəhàhà azlatatak uwaga kà, kà azlaməna madiḡal gəl à vok, uwana tasəl dziriga anja mazuway. A banja: 'Kikay', tagodal kà uwaga gesina kà, mawisiga aya aw. ⁴ Kà uwana dèwdèw tatak uwana Zəzagəla adəhəj kà delga. Tatak məzla gə la abà amiyaka tekula aw, ama say məbəza uwaga kà la 'Kikay', la magof à Zəzagəla. ⁵ Kà uwana gay Zəzagəla la madəv kuɔa gami la uwana taguwaga tsikasla.

Masla sləray dziriga anja Yesu Kristu

⁶ Banja katapla azlatatak uwanay à azladeda gami anik kà, kadəgay masla sləray dziriga anja Yesu Kristu, la uwaga kadəpəhla vok ala, kà kadzadzar vok la masasəfok dziriga anja madiḡal gəl à vok, nḡaha la matapla dziriga uwana kanəfa gesina. ⁷ Ama matugway anja azladza deydayga, uwana akəs à Zəzagəla à gəl aw kà, wùts ala. Nəḡla gəl anjak la guba anja Zəzagəla la abà, la mawaf vok à uda. ⁸ Makəs uwana asa à vok, kà la azlaslaka anik kà, akəs vok nɔv nɔv, ama mahoy guba anja Zəzagəla akəs vok kayak, kà uwana uwaga kà adala anu à sifa à abà lagonay, nḡaha bawbaw la huma la gay bay aya. ⁹ Uwaga la uwana gay makəs vok gə, à uwana naka kəla uwabeyuwi akəsay la ləv tekula. ¹⁰ Kà uwaga à uwana mədāh sləray la mawafəh vok à uda, kà uwana məfa manewəj gami kà à Zəzagəla uwana à afik la sifa, kà masla məbəl kà kayak, kà azladza uwana tadiḡ gəl à masla à vok gesina.

¹¹ Sləhalla vok à azlaməna madiḡal gəl à vok tatak uwanay kà, tàpatàla uwaga lela. ¹² Kak bəzi dāj nəma, ama kasak à dza apəsew ka aw. Gə la huma anja azlaməna madiḡal gəl à vok gesina la gay anjak uwana la abà kapəhay, kà bokuba kak tetəvi anətà la maday anjak la abà, la madz à ahəj anjak la abà, la masal anjak la abà, nḡaha la madiḡal gəl à vok anjak la abà gesina. ¹³ Waf vok à uda kà matapatàla kà uwana la wakità Zəzagəla la abà la maḡəh à atə gay matsidəyga, tsərah à mok uwana gədàda à awtəy. ¹⁴ Kapəsew mavəy anja Zəzagəla, uwana avà à ka la məbəkla ahəl à gəl anja azlamasiga, uwana tapəh à atə gay ahəl lakəl anja mavəy, uwana kabəzal kà anja sləray, aw. ¹⁵ Fə sləm à sləray uwaga la tetəvi anja, kà uwabeyuwi anja manəj kà, kà kaday kà à huma à gay pəra. ¹⁶ Kəsà gəl anjak, dəhà hanəkəli la matapla anjak babay. Banja kanəfa madəfəhəj delga kà, kadəbəlay, nḡaha la azladza uwana tatsəb à ka sləm.

5

Maday anja azlaməna madiḡal gəl à vok

¹ Iyay zlə, gəgod à ka aya kà, kaslah məl à makoz zil à gəl la ndzəfa aw, ama kapəhal gay, kà bokuba uwana kapəh à baba anjak. Nḡaha aya kasləha vok à azlamədəga babay kà bokuba uwana kadəfəhəj à azladeda anja gəl anjak. ² Kəs azlagəl mis babay, kà bokuba azlaiyà anjak, nḡaha azlaiyaw mis babay, kà bokuba azladeda anjak dəgam gə la ləv sətaka.

³ Fà slēm à azlamis kuḏa deŋdaŋga, slèkàw atà! ⁴ Ama kèla kà, baŋa mis kuḏa anik la bēzi amiyaka la bēzi aŋa bēzi aŋha bay kà, say asòl maḏàh slēray, manəfay aŋha la huma azlaməna huḏ gày aŋha, akəs iyà aŋha la ahàl sèla, baŋaw iyà madzidziga aŋha, kiya uwaga la uwana akəs à Zəzagəla à gəl. ⁵ Mis kuḏa deŋdaŋga ndzer, uwana masla mafal slēm la ahəŋ aw, afà madzugway aŋha kà à Zəzagəla à afik pəra, asak à madəv kuḏa à Zəzagəla mavakay la mahanay aw, kà masla aŋa mazlakay. ⁶ Ama mis kuḏa, uwana adza à ahəŋ la matsiḏay la abà kà, masla kà bokuba mamətsay gà, amiyaka adagay la sifa aŋa lakana. ⁷ Maslà gà la uwaga à uwana kapəh à atà, kà dza aŋa maḓəz atà à tsəh la gay anik anik la abà aw, kà masləh à atà ala vok. ⁸ Baŋa dza afa à slēm à mayyi à tsəh ala aŋa baba aŋha aw, ŋgaha kaykay gà à mənə huḏ gày aŋha aw kà, masla kà akweska maḏiŋal gəl à vok, masla kà ŋuləm dza uwana aləg maḏiŋal gəl à vok.

⁹ Lagwa kà, katsetser slēm aŋa mis kuḏa à slēm aŋa azlamis kuḏa anik à adi la wakità la abà, kà say à baŋa adagay la mavay dzik mukwa dadàŋ. Ŋgaha bay kà, say baŋa adà à zil kà asik tekula à ahàl pəra. ¹⁰ Ŋgaha babay kà, say agay masəlay gà la azlaslėray delga uwana la abà, aḏahàŋ, aziğənà azlabəza aŋha la tetəvi delga la tsəh, ŋgaha akàs azlaməlok dza uwana tasàh à mtəga aŋha la ahàl sèla, ŋgaha apalàh asik à azlaməna maḏiŋal gəl à vok, ŋgaha à baŋa azlakàh à azlauwana la matəpəy la abà, ŋgaha la madz à ahəŋ aŋha la abà kà, aḏahàhà kà say slēray delga pəra, kà tsetsèr slēm aŋha.

¹¹ Ama kweskà matsetser slēm aŋa azlamis kuḏa meḏəga à wakità aŋa slēm à afik, kà uwana la kaslà uwana madzugway aŋatà adàda à zil à tsəh kà, tadəgola vok à tetəvi aŋa Kristu la tsəh ala kà mad à zil. ¹² Kiya uwaga kà, tadəgay azlamawisiga, kà mapəz makəs vok aŋatà uwana ala la maḏiŋal gəl à vok la abà. ¹³ Ŋgaha aya kà, tadəzah kaslà aŋatà ala, kà madahay gày la gày. Ama uwana zlazlada kà: Tagay azlaməna gay zlawzlaw, ŋgaha la mavalàh à gay uwana à abà, abəza kà atà aw aya, bokuba azlamavdzagotur, ŋgaha la azlagay uwana azlayla atà aŋa mapəhay aw, bay kà tapahay. ¹⁴ Kà uwaga à uwana gəgof à ka: Asa à gi kà azlamis kuḏa meḏəga kà tadah à zil, tayyàh bəza, ŋgaha taf slēm à huḏ gày aŋatà suwan. Ŋgaha kà anu aŋa mav tetəvi à masla məzam gami, kà masla aŋa mapəh mawisiga lakəl gami aw. ¹⁵ Gəpəh kiya uwanay kà, kà uwana azlamis kuḏa meḏəga la ahəŋ, tawulla à tetəvi dziriga la tsəh ala kà manəf seteni. ¹⁶ Baŋa azlamis kuḏa la ahəŋ la tsəhay aŋa mis maḏiŋal gəl à vok gà kà, say masla la uwana azlaka à atà. Awkà ayahla mazlakay aŋa maham à ahəŋ mənə gay Zəzagəla aw, kà uwana uwaga kà mahanay mənəga. Say maham à ahəŋ mənə gay Zəzagəla kà azlakay kà uwana dza aŋha la ahəŋ aw.

¹⁷ Azlamasiga uwana tanəŋla maham à ahəŋ mənə gay Zəzagəla lela kà, azlayla à atà aŋa maḓəz mazləbay huḏ sèla, zləbàw azlauwana taziy gay Zəzagəla kaykay, la azlauwana tatapla tatak à azladza anik, ¹⁸ kà uwana wakità Zəzagəla agof kà: Kafa zagoma à kokur uwana à gay à baŋa azlab hi aw. Kà uwana masla slēray kà azlayla kà vok, abəza masik aŋha. ¹⁹ Baŋa tapuwa gudzi à masiga à gəl kà, kakəs la katskats aw, say baŋa azladza sèla tapəh baŋaw mənə sayda makə dāŋ kəla. ²⁰ Slèh à atà à vok la dazuwaya à azladza uwana tadàh mawisiga, kà guba akəs azlaanik kà maḏàh mawisiga uwaga.

²¹ 'Kamkam', gəgof à ka la huma aŋa Zəzagəla, ŋgaha la huma aŋa Yesu Kristu, ŋgaha la huma aŋa azlamalika uwana matsatsamanatà gà, kəs mapəhay uwanay, kà kasani azladza makasay, la slēray aŋak uwana la abà kadəhəŋ gesina aw. ²² 'Kamkam', kavà vok aŋa maḓək ahàl aŋak à dza à gəl, kà masla aŋa maḏàh slēray aŋa masla mazlakay aw. Kada à tsakana aŋa azladza anik à abà aw, nəŋla gəl aŋak la sətaka la abà.

²³ Kasah bə iyaw pəra aw, ama ŋuləm kasah iyaw matavərük ŋuv ŋuv babay kà, kà huḏ aŋak uwana akad kà.

²⁴ Tsakana aŋa azladza anik kà, adəpəhla vok ala batsewya kokuḏa maḓəz maḏàh seriya. Ama aŋa azladza anik kà adəpəhla vok ala kà bawbaw la huma la gay vuḏ seriya. ²⁵ Kiya uwaga babay à uwana, slēray dziriga adəpəhla vok ala. Amiyaka uwana dza anəŋaŋ lakana babay aw kà, ndzer adəpəhla vok ala.

6

¹ Azlamayà gesina kà, takəs gay aŋa azlaməŋga aŋatà la masləkaw atà lela, kà dza aŋa mapəh mawisiga lakəl aŋa Zəzagəla, ŋgaha lakəl aŋa matapla gami babay aw. ² Kəla mayà uwana mənəga aŋha kà masla maḏiŋal gəl à vok kà, apəsew masla kà uwaga aw, la magoḏay kà: Anu sèla kà tekula, kà uwana anu la deda. Ama bə la uwaga kà, aḏahà

sléray uwana dafúwa à gay uwana uwarà, kà uwana adaha sléray kà anja dza uwana adav lèw anja à Kristu, ngaha awoya masla.

Matapla fidaga

Aganay tatak uwana katapla à azladza anik. Dzerəfàhàtála kà madehəj. ³ Baŋa dza asəla matapla anik à waŋ, à baŋa anəfa kà azlagay dziriga anja Sufəl gami Yesu Kristu aw, ngaha akəs matapla gami lakəl anja madz à ahəj delga la huma anja Zəzagəla aw, ⁴ masla kà adazigəj gəl anja, asəl tatak aw, masla kà, asəl kà matsigay, ayah kà magazlay lakəl anja azlagay. Aganay tatak uwana atsa à uda la uwaga la abà: Maŋor, magazlay, la azlagay matafad lèw, la madzugway mawisiga lakəl anja azlaməna magay. ⁵ Masla kà agazlahay pəra, kà uwana madzugway anja kà mawisiga, asəl dziriga aya aw. Adzugw kà baŋa anəfa tetəvi anja Zəzagəla kà: ‘Gədəgay gorobu’, agod.

⁶ Ndzer kà, manəf tetəvi anja Zəzagəla kà uwaga riba mənğa à baŋa dza akəsə madz à ahəj anja. ⁷ La dziriga kà, tatak la ahəj məsəlla à waŋ la ahəl à gudəj uwanay à vok aw, ngaha tatak la ahəj mədādala la ahəl aya babay aw. ⁸ Baŋa anu la tatak may, ngaha la lukut kà, uwaga kà dən anami. ⁹ Ama kà anja azlauwana tayah magay gorobu kà, azlamavavaray tavavar atà, tasokw à madinay anja mavavaray à abà. Tawoya azlatatak kusonuga uwana tadala azladza à mazila ngaha à akəl à abà. ¹⁰ Kà uwana adi anja sili kà slilih anja tsakana gesina. Azladza tafa yewdi à uwaga à gay, kà uwaga à uwana tazahla la tetəvi anja madiŋal gəl à vok la tsəh, tabiya matərəbay à gəl anjatà kaykay.

Sawaray makəd gəl à ahəj

¹¹ Ama kak, à kak dza anja Zəzagəla, həl à ahəj la azlatatak uwaga la abà gesina. Yàh kà dziriga, la masləkaw Zəzagəla, la madiŋal gəl à vok, la masal, la mabasiŋ, ngaha la tələmna anja lèw. ¹² Pà slagəla dziriga anja madiŋal gəl à vok, kà kak anja mabəz sifa adəv à gay aw. Zəzagəla la uwana azalà à ka à sifa uwaga à abà, la mok uwana kazà gay sayda anja madiŋal gəl à vok anjak, dzəba anja səla aw, la huma anja azladza anjuvaw. ¹³ La huma Zəzagəla uwana av sifa à azlatatak gesina, ngaha la huma anja Yesu Kristu uwana azà sayda dziriga la huma anja PontsəyusPilatus, à uwana, gəfahakala akur à lig: ¹⁴ Kəs mapəhay, ngaha gəj sətaka la kokudə ŋazla anja àləh tsərah à mavakay uwana Sufəl gami Yesu Kristu adəzlanjalay, hazlan. ¹⁵ Adəwul à waŋ, la kaslə uwana Zəzagəla akədəv à ahəj. Masla Zəzagəla kà, aga la maslay gesina, masla kokudə gəl anja la uwana Zəzagəla. Adza à ahəj la marabay la abà. Masla la uwana Sufəl anja azlasufəl, ngaha Mənğa anja azlamənğa. ¹⁶ Masla kokudə gəl anja la uwana amətsay diki diki aw. Masla adza à ahəj la udfaka uwana la abà, dza aslala vok anja mad à awtəy aw. Dza la ahəj adanəj huf adi anja tetuwa aw. Mazləbay la maslay, uwana adəv à gay aw, aga la masla anja koksikoksi. Amen.

¹⁷ Fàhà à akur à azlaməna gorobu anja gudəj à vok uwanay à lig, kà atà anja magay azlazlapay aw, sləh à atà à vok la magod à atà kà, tafa madzugway anjatà à ləmna uwana à afik, adədəv à gay pəra aw, ama kikay tagod à Zəzagəla, uwana avà à anu tatak uwaga gesina la maduw vok, ngaha kà anu anja magay la marabay. ¹⁸ Fàhà à atà à akur à lig, kà atà anja madəh delga la ləmna anjatà, kà atà anja magay azlagorobu la sləray delga anjatà uwana la abà tadəhəj. Say tavəh tatak anjatà la azladza anik, taga azlahunwa aw. ¹⁹ Kiya uwaga kà, tadəhad ləmna anjatà à ahəj la slaka delga, kà atà anja mabəz sifa dziriga. Uwaga kà bokuba dza uwana atadukw gəy anja à ahəj.

²⁰ Kak, Timotawus, nənja tatak uwana tafà à ka à ahəl lela. Həl à ahəj kà azlagay deydayga, ngaha à uwana la tetəvi anja madiŋal gəl à vok aw, la azlamatsigay badaga, la azlauwana azladza tazalalla masəlay zənəzənğa, ama tsa uwaga kà, masəlay dziriga aw. ²¹ Azlaanik tasləkaw uwaga la huma azladza, ama tasak à tetəvi anja madiŋal gəl à vok la tsəh ala.

Vok mahamay anja Zəzagəla aga la akul.

MASƏLA AŇA WAKITÀ UWANA POL ATSETSÈR À TIMOTAWUS Deuxième Lettre de Paul à Timoth'ee

Ayyi

¹ Gi Pol, la uwana gətsetser wakità uwanay, gi la uwana masləlay aŇa Yesu Kristu bokuba uwana asa à Zəzagəla Baba. Masla asləl gi à waŇ, kà gi aŇa mapàh à azladza, lakəl aŇa sifa uwana Zəzagəla apəh à ahəŇ, kà aŇa azlauwana azlaanĥa, la Yesu Kristu la abà.

² A kak Timotawus, uwana kak bəzi gay ləv gulo. Zəzagəla Baba la Sufəl gami Yesu Kristu tapis à ka gay à vok la mamatsakanĥ ala, la mav à ka lapiya aya.

Pol adzərəf Timotawus ala

³ 'Kikay', gəgod à Zəzagəla gulo kà kak. Gəsləkaw masla bokuba uwana azlababa gulo madzidziga tasləkāwāh. Gədəv kudfa mavakay la mahəna gesina. La madəv kudfa gulo la abà gesina kà gədzugway kà à kak pəra. ⁴ Awula gi à gəl à iyaw tugwi aŇak, ŋgaha gədāya aŇa kə gəl à tsəh kà kaykay kà aŇa manəŇ, kà gi aŇa magay la marabay. ⁵ Gədzugway lakəl aŇa madinjal gəl à vok aŇak, uwana kaskas la tsəh aw la Yesu Kristu la abà. TerəŇa kà, iyà aŇak madzidziga Loyəs, la uwana adinjal gəl à vok dadəŇ, la lig la ahəŇ iyà aŇak Yuniya adinjal gəl à vok aya babay. Ŋgaha gəsəl ndzer kà, kak la madinjal gəl à vok uwaga la abà suwanĥ. ⁶ Kà uwaga à uwana, gəgod à ka kà, kəsəŇ lela, kasakal à tsəh ala à mavāy uwana Zəzagəla avà à ka ndzəda kà madəhəŇ aw. Zəzagəla avà à ka uwaga la mok uwana gəbək à ka ahəl à gəl. Dahà uwaga la ləv tekula. ⁷ Kà uwana Masasədok, uwana Zəzagəla avà à anu kà, agubgubanula aw, ama Masasədok aŇha la uwana ahənəŇnula la ndzəda, la masal ŋgaha asləhà anu vok babay.

⁸ Kiya uwaga zlə kà, guba akəs ka kà maz sayda lakəl aŇa Sufəl gami aw, ziruwi akəs ka kà gi, uwana la danĥay bay aw, gi la danĥay kà Yesu. Ama kəs mas ŋgərpa kà gay marabəŇ bokuba aŇulo babay, dāhəŇ kiya uwaga la ndzəda uwana Zəzagəla avà à ka. ⁹ Masla la uwana abəl anu, ŋgaha azalà anu, kà anu aŇa magay tsəhay aŇha, awkà la sləray uwana mədāhəŇ aw, ama la dabaray aŇa gəl aŇha, la vok mahamay aŇha bay. 'Ayyà', agod à anu, kà vok mahamay aŇa Yesu Kristu, la mok uwana gudəŇ à vok aləg madzəka vok dadəŇ. ¹⁰ Lagonay kà, vok mahamay uwaga kà, adasa à uda la paraka, kà uwana masla mabəl anu, Sufəl gami Yesu Kristu, adasa à waŇ. Azəb anu ndzəda aŇa mamətsay la kəl ala. La maz gay marabəŇ uwana apəhla ala kà sifa uwana adəv à gay aw.

¹¹ Zəzagəla afà à gi à gəl kà maz gay marabəŇ uwanay, à gi uwana gi masləlay aŇha, ŋgaha gi masla matapla à azladza uwana la uda. ¹² Kà uwaga à uwana gəs ŋgərpa məŇga la danĥay uwanay la abà. Ama bə la uwaga kà, ləv aval à gi à gay aw, kà uwana gəsəl ndzer kà, masla la ndzəda kà manəŇla gay marabəŇ uwana afà à gi à ahəl, tsərah à makəf gəl à ahəŇ. ¹³ Kəsà gay uwaga katsənəŇ la slaka gulo, nəfà uwaga, bokuba maftsa à vok kà mapahla ala kiya uwaga, dzà à ahəŇ la madinjal gəl à vok la abà, ŋgaha la masal la abà, kadəhəŇ kiya uwaga, kà uwana kahamà gay à vok la Yesu Kristu la abà. ¹⁴ Kəsà azlatatak delga uwana tafà à ka à ahəl, la mazlak aŇa Masasədok Zəzagəla, uwana adza à ahəŇ la anu la abà.

¹⁵ Bokuba uwana kasəl kà, azlaməna gay Zəzagəla la kutso Asəya takweska gi gesina, Fizel la Hermozen la tataka aŇatà babay. ¹⁶ Ama Onisəfor kà, koksikoksi adzərəfāhà gi à uda, ziruwi akəs la huma azladza kà uwana gi la danĥay aw. Gədəv kudfa à Sufəl Zəzagəla kà madāh delga à huđ gāy aŇha. ¹⁷ Ama bə la uwaga kà, mok uwana adabəza à Rom kà, adzəkà mayāh gi la abatà la ləv tekula, tsərah à uwana abəzà gi. ¹⁸ Sufəl Zəzagəla azlakəŇ la mavəl vok mahamay aŇha la vud seriya. Mok uwana gi la gudəŇ Efesus kà, azlakà gi məŇga, kak bay kà, kasəl uwaga lela.

2

Mafay madzugway à Yesu Kristu à afik, kà magay slodzi aŇha

¹ Iyay, kà kak bəzi gulo kà, wāf vok à uda kà Yesu Kristu aŇa mav à ka ndzəda, la vok mahamay aŇha, la maham gay à vok la masla la abà. ² Uwana katsənəŇ kà gay Zəzagəla, uwana gəzəŇ la paŇaw gulo, gay uwaga gəzəŇ la huma aŇa azladza aŇuwaw

kà, hël, dâla à azladza dziriga anik, uwana atà la maslay kà matapla à azladza anik babay suwanj.

³ Kùdà masik anjak la ngërpa la abà, bokuba slodzi dziriga anja Yesu Kristu, uwana abas ngërpa. ⁴ Baña dza ada à guvël, à baña asal kà makès à môngga anja à gël, kà ada à gay anja azladza à uda à abà aw, bà kà kiya uwaga kà kak babay. ⁵ Dzùgw babay à baña dza agur mahoyay, kà à baña ahoy la tetövi la tsøh ala aw, masla adàbøz masik aw. ⁶ Masla mapøs guf babay kà as ngërpa môngga. Kiya uwaga kà akøs vok, kà masla atsa à vok à mazuw mayyay anja guf anja kèla. ⁷ Dzùgw lakël anja uwana gøpèh à ka la abanay, kà uwana Sufël Zøzagëla adavà à ka maslay kà matsøn uwaga gesina.

⁸ Awul à ka à gël lakël anja Yesu Kristu, mayyi à tsøh ala anja sufël David. Masla amèts, ngaha awul à uda la mamøtsay. Bokuba uwana gay marabøn uwana gøzån agodf. ⁹ Kà gay marabøn uwanay gøziñ, la uwana tatsèrkwà gi, à gøsa ngërpa bokuba masla madàh mawisiga. Ama gay Zøzagëla kà matsèrkwønga aw. ¹⁰ Kà uwaga à uwana gøkøs mabasiñ gesina. Gøbasiñ kà, kà azladza uwana Zøzagëla atsatsàmàni atà, kà atà babay anja mabøz tetövi uwana Zøzagëla adàbëla à atà, ngaha kà atà mad à abà anja madz à ahøn la slaka mazløbay anja uwaga à abà anja koksikoksi. ¹¹ Ndzer, gay uwana gøpøhay kà dziriga:

Søl kà, baña mømøts la masla kà, mødàdza à ahøn la sifa la masla aya.

¹² Baña anu møbasiñ la magødøn à afik kà, mødàkoray la slaka gà la masla.

Baña anu mækweska masla kà, masla babay kà, adækweska anu.

¹³ Ama baña anu azladza dziriga la huma anja aw, tsa masla kà adza à ahøn kà la dziriga la abà.

Kà uwana masla aslala vok anja mawis gël anja ala aw, masla kà agødf uwana à afik apèh.

Mədàh sløray kà anu anja makès à Zøzagëla à gël

¹⁴ Wulà uwana gøpèh à ka à azlamønà madiñal gël à vok, kà atà anja madzugway, pèh à atà à vok à abà la huma Zøzagëla, kà atà anja magazlahay lakël anja azlagay deydayga aw, kà uwana azlamagazlay uwaga kà, azlaka anu aw, ama awis løv anja azlauwana ala tatsøbal sløm. ¹⁵ Ama kak kà, wàdf vok à uda, kapèhla vok ala la huma Zøzagëla, kiya uwana akøs à Zøzagëla à gël, bokuba masla sløray uwana ziruiw azøn kà sløray anja aw. Tàpla gay dziriga à azladza anik bokuba uwana akøsa vok. ¹⁶ Ama kà azlagay deydayga uwana akøs à Zøzagëla à gël aw, kada à abà aw, kà uwana azladza uwana tapøhay kiya uwaga kà tawis vok ala la tetövi anja la tsøh kaykay. ¹⁷ Matapla anjatà kà, adagay kà bokuba gorodzu uwana akufla aya aw, ahadz sløb vok. La tataka azladza uwaga la abà kà, Himene atà la Filet la abà, ¹⁸ tasàk à tetövi dziriga la tsøh ala, ngaha tawàs madiñal gël à vok anja azladza anik ala, la magodfay kà: Mawul à uda la mamøtsay kà tsewwa adagay. ¹⁹ Tekedika matatukway uwana Zøzagëla atatukw kà, aga la ahøn la ndzøda lela. Aganay uwana matsetseray gà lakël anja: Sufël Zøzagëla asøl azladza anja. Ngaha bay kà: Kèla uwabeyuwi uwana agodfay kà: 'Gi anja Zøzagëla, asakà à madàh mawisiga.'

²⁰ La møn gày la aku kà, azlatasà luwàluwà la azlaanja gursu pøra la aku aw, uwana tapødf mapaday la ahàf la ahøn, ngaha la uwana tanjàläh manjalay la abisil. Matera kà anja madøvaday pøra, ama azlaanik kà anja kèla mavakay. ²¹ Baña dza ag gël anja tsidanja la azlatatak mawisiga uwanay la abà, gøpøh kà, masla kà tadàdfahla sløray kà anja løvamay. Kiya uwaga adàgay anja mønnga anja anja tetuwa, masla kà akøsla vok, masla aga nekwa anja madàhla sløray delga gesina. ²² Høy à azlamadzugway bøzi anjak à ahål, yàh magay tørra, madiñal gël à vok, masal ngaha lapiya, la azlauwana la løv tekula tazalà à Sufël Zøzagëla. ²³ Ama kweskà azlagay deydayga la azlagay kusonuga, kà uwana uwaga kà atsala magazlay à wanj. ²⁴ Hadfay, masla sløray anja Sufël Zøzagëla kà aga masla magazlay aw. Masla aga mawoyøn gà la slaka azladza gesina, aslala à vok kà matapla azladza, ngaha aga masla mabasiñ bay. ²⁵ Matapla à azlamønà matsødf gay la løv tølømmaga, ngaha zlahaw kà, Zøzagëla adavà à atà ndzøda kà anja mabødfa vok la madz à ahøn anjatà la abà, ngaha kà atà anja masøl dziriga. ²⁶ Kiya uwaga kà, tadàbøz hanjëli anjatà, ngaha tadàtøf à malkaw anja seteni uwanay la gay ala, adækøs atà à gay, adàpakatàla kà azlamønà manøf masla.

3

Makødf gël à ahøn gudøn à vok

¹ Søl azlagay uwanay gøpèhkala lela: La makødf gël à ahøn gudøn à vok kà, azlakaslà zladzadaga adàgahay la ahøn. ² La hadfay gà kà, azladza tadàgahay azlamønà mawoy gël

anjatà përa, azlamëna mawoy sili, azlamëna mazigën gël, azlamëna zlapay. Tadávatsah gay à Zëzagëla à vok, ngaha tadàkasah gay anja azlababa anjatà aw. 'Kikay', tadàgöf à azladza uwana tazlak atà aw, atà tadàsëlkaw azlatatak dziriga anja Zëzagëla aw. ³ Tadàgahay dzanđzan, vok mahamay anjatà adàgay la ahënj aw, tadàgahay azlamëna masàh gël, ziruwi anjatà adàgahay la ahënj aw, tsetsi dadàn anjatà la ahënj aw, tadàgay azlamëna mëzam anja dziriga. ⁴ Tadàtah kaf à azladza anik à gël, tadàfahah azlatatak kusionj gä, tadàgahay azlamëna zlapay, tawoya à ahënj kà uwana asa à vok anjatà përa kà Zëzagëla. ⁵ La huma yewdi anja azladza kà: 'Anu azlamëna manëf Zëzagëla', tagöf. Ama tsa tadàpësew ndzöfa anja. Höy à azlatëhay dza uwaga à ahäl. ⁶ Azladza anik anjatà tadàha à huf gày anja azladza, ngaha tatapahla azlamis gußgußga anjatà, kà manëf atà. Azlamis uwaga tadaha tsakana mënnga, tanëfa à azlatatak mawisiga gesina uwana tatawwal à tsöh. ⁷ Azlamis uwaga, asa à atà matapla azlatatak, ama tasla anja masel tatak dziriga tetuw aw. ⁸ Kà uwana azladza mawsiga uwaga kà, tatsëf gay à dziriga à tsöh, kiya uwana uwarä Yanes atà la Yambërës tadàhàn à Musa à vok. Madzugway anjatà kà mawisiga, tavà lëw anjatà à Zëzagëla la dziriga aw.* ⁹ Ama tadada à huma kërker aw, kà uwana azladza gesina tadàsël atà azlakusionj. Kiya uwana apakà vok kà la Yanes atà la Yambërës uwaga.

Sawaray makëf gël à ahënj

¹⁰ Ama kak kà, kanëfa gi la matapla gulo la abà, la maday, la madz à ahënj, la madinjal gël à vok, la mabasiñ, la masal ngaha la matsizlla à ahënj gulo la abà gesina, ¹¹ la matërëbay ngaha la mas ngërpa gulo la abà babay. Kak, kasël gesina tatak uwana aßzà à gi, mok uwana gi la Antiyews, la Ikoniyum, la Lisotëra, à ngërpa uwana gësàh. Ama Sufël Zëzagëla apëlla gi ala la uwaga la abà gesina. ¹² Haday gä, këla uwabeyuwi uwana asal madz à ahënj la dziriga, la maham gay à vok la Yesu Kristu la abà kà, agay la ahäl anja azladza kà matërëbënj. ¹³ Ama azlamëna magolla dza tadàda à huma à gay kà kaykay, kà mavavarah azladza anik à bada à abà, atà la aslasl gël anjatà, kà tadàvavarah gël anjatà. ¹⁴ Ama kak kà, dzà à ahënj la uwana la abà katapla, la uwana kabözal la lëw tekula. Nëfa azlatatak uwaga, kà uwana kasël dza uwana atapakala kà masla atapakala ala lela. ¹⁵ Dagay la bëzi gä, kasël wakità Zëzagëla lela, masla la uwana atà à ka hanjëli uwana adala ka à mabëlay à abà la madinjal gël à Yesu Kristu à vok. ¹⁶ Dëwdëw uwana tatsetsër à wakità Zëzagëla à abà kà, uwaga kà afad gay anja Zëzagëla, kà mapëhla dziriga ala, kà madukwla mawsiga la vok ala kà matsizlla anu ala, ngaha kà mapëhanula maday dziriga uwana akës à Zëzagëla à gël. ¹⁷ Uwana Masasëdok Zëzagëla adfahàn kiya uwanay kà: Kà këla dza uwana anëfa Zëzagëla anja magay madàh vok à ahënj gä, ngaha mahënla gä, kà anja slëray delga gesina.

4

¹ Gënava ka la huma anja Zëzagëla, ngaha la huma anja Yesu Kristu uwana adàfah seriya à azladza uwana à gël talög la sifa la azlauwana tadamatsay, gënavà ka la slëm anja Sufël Yesu uwana adawul à wanj kà makoray la dziriga. ² Kà uwaga pëh gay Zëzagëla à azladza la magëfanj à afik, amiyaka adàgay la kaslà matsidäyga, amiyaka la matërëbay la abà kà. Pëhla mawisiga anjatà à azladza, dzërëdfahatàla, kà madàh delga koksikoksi ngaha tatapàla la mabasiñ dziriga. ³ Kà uwana kaslà adàsa à wanj à uwana azladza tadàdinj gël à dziriga uwana à vok, uwana tatàpatàla aw, kà tadàwoyënj kà madàh mawisiga, kiya uwaga kà, tadàkësa azlamëna matapla fida anjuvaw, tadàtsën uwana asal lëw anjatà. ⁴ Tadàtsëb slëm à dziriga aya aw, tadàgola vok kà anja maf slëm à mapëhay anja azladza fida gä à abà. ⁵ Ama kak kà, dà à huma à gay la maslëh vok à vok anjak koksikoksi, basà azlanjërpa, zàn gay marabënj à azladza, hënà slëray anjak ala la tetëvi anja Zëzagëla la tsöh.

⁶ Kà anjulo kà, kaslà adaslay kà anja mamëtsay, adaslay kà makëf gi, bokuba tatak uwana takëf à Zëzagëla. ⁷ Gëdfah slëray anja Yesu Kristu kà la lëw tekula, bokuba dza uwana ap slagëla lela. Gëdävla uwana: 'Dahàn', Zëzagëla agöf à gi, bokuba dza uwana adäv magur mahoyay à gay. Ama kà anja azlatatak uwana mëdinjal gël à vok kà, gënëfà la dziriga. ⁸ Lagonay kà, gësël kà, Zëzagëla adafaha à gi tatak anja masik gulo à ahënj la zagëla, kà uwana gëdfahàn kà uwana dziriga. Sufël uwana adfah seriya à azladza la tetëvi anja, la uwana adävà à gi masik uwatà, la vuđ seriya. Adävay kà à gi përa aw, ama adävà à azlauwana asa à atà makuday gesina babay.

Madz à ahënj anja Pol

⁹ Wäd vok à uda kà kak anja maböz à gi à vok katskats. ¹⁰ Kà uwana Demas kà amëlgëla, kà uwana masla kà asäl matsidäy anja lakana uwanay, adiy anja à Tesaloniki.

Kərəsan, masla kà ahàd à Galatiya, Titus ahàd à Dalmatiya bay. ¹¹ Luka pəra la abanay. Mok uwana kadàsa à wañ kà, kadàsella Mark à wañ la tsəh, kà uwana masla kà adəkəs gi vok la sləray aña Sufəl Zəzagəla la abà. ¹² Tisik kà gədasləl à Efesus. ¹³ Mok uwana kadàsa à wañ kà, dāguwà la Tərowas, la mtəga aña Karpus, kadàhəl gi lukut anasl gulo, uwana gəsàkal à ahəñ la abatà, la azlawakità gulo babay, kaykay gà, kà azlawakità zlap uwana matsetseray la vok.

¹⁴ Alekəsander, masla gəzla adfàh à gi mawisiga à vok kà mənğa. Sufəl Zəzagəla adà-dfahalla seriya à gəl kəla aña mawisiga aña, uwana adfahəğəñ à vok suwañ. ¹⁵ Hòyal à ahàl à kak, kà uwana awoyà gay gami aw kà aña tetuwa.

¹⁶ Teraña uwana gəpəh gay gulo la huma seriya kà, dza la ahəñ kà mazlak gi aw, azladza gesina, takweskà gi. Delga kà Zəzagəla amàts à ata tsakana añaatà ala. ¹⁷ Ama Sufəl Zəzagəla adzà à ahəñ la gi, avà à gi ndzəfa, kà gi aña madəv sləray gulo uwana maz gay marabəñ à gay, kà azladza gudəñ à vok gesina tatsənəñ. Zəzagəla la uwana gətəf à sikalaveri la gay ala. ¹⁸ Gəsəl kà, Sufəl Zəzagəla adəpəlgəla, la azlatatak mawisiga la abà gesina, nğaha adənəñla gi, kà gi aña mad à makoray aña à abà la zagəla babay. Məzləbà masla koksikoksi! Amen.

Ayyi makəf gəl à ahəñ

¹⁹ Dàh gi 'Ayyi' gulo à Pərəskila atà la Akilas. 'Ayyi', gəğod babay à huf gay Onisəfor. ²⁰ Erasətus kà, agəf à Korintiya, nğaha gəsək Tərofim à ahəñ la Milet, kà uwana dıvats azən. ²¹ Mərà vok kà mas à wañ à abanay à mok uwana təla awkusa aləğ madzəka à vok dadəñ.

Ebulus, Pudın, Linus nğaha Kələdiya uwana misga la azladza uwana la abanay gesina, dafahà à ka: 'Ayyi'.

²² Sufəl Zəzagəla anəñla ka!

Mapis gay à vok agay la akul gesina!

WAKITÀ UWANA POL ATSETSÈR À TITUS Lettre de Paul à Tite

Ayyi

¹ Gi Pol, la uwana gøtsetser wakità uwanay, gi mayà anja Zøzagøla, ngaha gi masla matapla la slaka Yesu Kristu. Zøzagøla asløl gi, kà gi anja mazønj azladza, uwana Zøzagøla adatsatsamani atà, kà atà anja madinj gøl à masla à vok, ngaha tatapla dziriga kà mapøhanula maday, uwana akøs à Zøzagøla à gøl. ² Gødfahànji kiya uwanay kà, kà azladza anja masølay kà atà la sifa adøv à gay aw la Zøzagøla, uwana adàh fida aw. Amiyaka gudøj à vok kà adadzøka vok dadàn, à uwana Zøzagøla apøh gay anja sifa uwaga à azladza à ahøn aw. ³ La kaslà uwana anàts à ahøn, apøhanula sifa uwaga, uwana la gay anja la abà. Zøzagøla uwana masla maføl anu, afà à gi gay uwaga à ahàl, afà à gi à gøl, kà gi anja matapla à azladza.

⁴ Gøtsetseray kà à kak Titus, kà uwana kagay kà bokuba kak bæzi huç gulo, kà uwana anu søla nna mødinjaw gøl à Yesu Kristu à vok. Zøzagøla Baba, la Yesu Kristu, uwana abøl anu, tapis à ka gay à vok la mav à ka lapiya.

Sløray uwana Titus adøhøn la Køreta

⁵ Gøsakà ka la Køreta la gudøj uwana la tataka iyaw la abà, kà kak anja madfàhàh azlatatak uwana taløg madfàhàh vok à ahøn la tetøvi anja. Ngaha kà kak anja matsatsamani azlamasiga, kà atà anja magay mønà manønja mønà gay Zøzagøla, la køla huç gudøj gesina, bokuba, uwana gøtåpkala.

Uwa à uwana azlayla kà magay masiga uwa?

⁶ Dza uwana kakøsani kà magay masiga kà, say agay zil gày, uwana taslòhàla vok aw, agay zil anja mis tekula, azlabøza anja tagay azlamønà madinj gøl à Yesu Kristu à vok, maday anjatà agay delga kà azladza anja manørez atà, tadfàh mawisiga aw, ngaha tagay azlamønà makøs gay anja azlababa anjatà koksikoksi. ⁷ Masiga anja azlamønà gay Zøzagøla kà mayà anja Zøzagøla. Kiya uwaga kà, say agay kokudà mawisiga tetuwa. Agay zlapay aw, agay masla løv aw, agay masla guzu aw, agay masla mayàh gay aw, ngaha bay, agay masla mawoy sili aw. ⁸ Ama agay kà masla makøs azlamølok dza la ahàl søla, awoyan kà madfàh azlatatak delga pøra, aga masla masløh vok à vok anja agay dzirirga, aga dza anja Zøzagøla lela, aga masla mabasinj. ⁹ Say adfàh hanøkøli la gay marabøn, uwana møtapla à azladza. Banja adøhønji kiya uwanay kà, adabøz tetøvi kà matapla gay uwaga à azladza anik, ngaha adàdzørfah atà à uda la gay uwaga babay. Ngaha adåpahla ala la paraka, kà azlamønà maf gasa à gay marabøn à gøl kà, azlayla atà aw.

¹⁰ Bøk azlamasiga à ahønji kiya uwaga, kà uwana azladza anjuvaw tadàdzadzanah gøl ala, koksikoksi tapøhay kà azlatatak uwana takøs vok aw, tavavar azladza babay. Azla-uwana tadøhønji kiya uwaga kà kaykay gà, kà tsøhay Yahudiya, uwana kadavaw vok à uda tagodf. ¹¹ Delga kà, azlamasiga anja azlamønà gay Zøzagøla tadødf à atà gay à ahøn, kà anja matapla azlatatak uwaga à azladza aw, kà uwaga la uwana tawis huç gày anja azladza anik ala, la tatak uwana tatapla à azladza, tasla nønà aw, ama asa à atà maføz sili la tsøhay matapla ziruwì gà uwaga. ¹² Dza anik la ahøn, uwana zil gudøj Køreta bokuba atà, apøh à ahøn uwarà, uwana adåpaka vok, apøh la panjaw anja: 'Koksikoksi azlamønà gudøj Køreta tapahay kà fida, tasøl gøl aw, bokuba azlatatak føta, azlamønà masa, tadzugw kà à huç anjatà pøra.' ¹³ Ndzer kà, gay uwanay kà dziriga, kiya uwaga kà, sløh à atà à vok la mapøh à atà à vok à abà lela, kà atà anja manøf tetøvi anja Zøzagøla lela. ¹⁴ Pøh à atà à vok à abà lela kà atà anja manøf azlagay deydayga anja azla Yahudiya, uwana tapahay aw, ngaha tanøfa gay anja azladza uwana takweska dziriga aw. ¹⁵ Banja la løv tsødanja la huma Zøzagøla, dèwdèw adagay søtaka kà anja. Ama kà anja azladza uwana la løv søla, ngaha tadinj gøl à Zøzagøla à vok aw kà, tatak la ahøn søtaka kà anjatà aw. Kà uwana atà kà tadzugway kà azlatatak mawisiga anja madøhøn pøra, ziruwì aza à atà aw. ¹⁶ Tagodf la paraka kà: 'Møsøl Zøzagøla', ama tatak mawisiga uwana tadøhøn apøhla ala, kà tasøl masla aw. Tadzadzånah gøl anjatà ala kaykay la azlamawisiga, taslala vok kà madøhøn tatak delga aya aw.

2

Kakay à sləray aña masla mapəh gay Zəzagəla ma?

¹ Ama kà anjak kà, kapəl à azladza kà tatak uwana akəs vok kà aña tetəvi aña Zəzagəla. ² 'Guzu akad' akul aw', gōd' à azlamakoz zilga. 'Dahāw tatak gesina kà la tetəvi aña, sləhāw vok à vok ankul, diñāw gəl à Zəzagəla à vok lela, wōyāw azladza anik la ləv tekula, basāwwāñ azlanğəpa koksikoksi!' ³ Pəh à azlamakoz mis bokuba uwanay babay: 'Dahāwwāñ kà uwana la tetəvi aña Zəzagəla la tsəh lela. Kakalāhāw sləm aña azladza anik ala aw, kagaw azlamayā aña guzu aw, ñgaha tapawla azladza anik, uwana akəs vok lela!' ⁴ Baña tadəhəñ kiya uwanay kà, tadātpla azlaiyaw mis babay, kà mawoyəñ azlazil anjatā, la azlabəza anjatā. ⁵ Ñgaha tatapla azlaiyaw mis uwaga, kà masləh vok à vok anjatā, ñgaha kà atā aña mazaḅ zil aw, ñgaha tadfāh sləray lela la huf gāy anjatā la madfāhāz azlatatak delga, ñgaha la makəs gay aña azlazil anjatā. Baña tadfāhāñ kiya uwaga, azladza tadātugw mawisiga lakəl aña gay Zəzagəla aw.

⁶ Pəh à azlabəza kohana kiya uwaga babay. Gōd' à atā kà: 'Sləhāw vok à vok ankul lela!' ⁷ Gəpəh à ka babay kà kadāh tatak delga pəra, kà azlabəza kohana anik aña matapla tatak la uwaga la abā. Baña katapatāla tatak, tāpatāla la ləv tekula, kapah azlatatak deydayga aw. ⁸ Tāpatāla kà azlagay uwana tagəd' à afik, dza aslala vok aña matsədal gay à tsəh aw, ñgaha kà azladza uwana asa à atā matugw à ka mawisiga à vok kà, atā aña maḅəz mawisiga la abā aw, ñgaha zirui makəs atā.

⁹ Kà aña azlamayā kà, gōd' à atā kà: 'Kəsāw gay aña azlaməngga ankul koksikoksi, dāhāwwāñ kà uwana akəs azlaməngga ankul à gəl, kabayaw vok gay akul nna aw. ¹⁰ Ñgaha babay kà, katsatsakw ahāl la azlatatak ankul la vok aw, dāhāwwāñ kà azlatatak delga pəra, kà azlaməngga ankul aña masəlay kà akul azladza dziriga haday', pəh à atā. Baña azlamayā tadəhəñ kiya uwaga kà, azladza tadāsləkaw azlatatak uwana mətapla à azladza lakəl aña Zəzagəla, masla maḅəl anu.

¹¹ Delga kà azlaməna gay Zəzagəla tadfāh uwanay gəpəh lagwa, kà uwana Zəzagəla adapəhla ala la paraka, kà vok mahamay aña à azladza gesina, kà masla aña maḅəl atā. ¹² Bā uwana Zəzagəla adadəhəñ kiya uwanay kà, məsəl kà, mənəfa tetəvi mawisiga aya aw, mənəfa azlatatak aña gudəñ à vok, uwana takəd' à anu à adi aya aw. Uwaga kà mok uwana anu la gudəñ la vok la uwana, məslala vok kà masləh vok à vok gami. Mədāha uwana akəs vok, ñgaha mənəfa tetəvi uwana akəs Zəzagəla à gəl. ¹³ Mədāhāñ kiya uwanay, kà maf gəl gami à mavakay uwana à afik, Yesu Kristu Sufəl gami adāzlanjalay la mazləḅay aña, uwana adəpəhanula Yesu masla Sufəl Zəzagəla gami məngga. ¹⁴ Avā gəl aña, aməts à slaka gami à abā, kà masla aña mapəlanula la tsakana la abā, ñgaha kà masla aña magəñ anu sətaka la huma aña, kiya uwaga kà anu aña magay azladza aña, kà anu aña madfāh azlatatak uwana delga koksikoksi.*

¹⁵ Tāpla à azladza azlatatak uwanay tadzərədāhatāla, pəh à atā à vok à abā, kà uwana asa à atā matsəñəñ aw, pəh à atā la maslay uwana Zəzagəla avā à ka. Ayā kagod' à azladza kà mapəsew ka aw.

3

Maday delga aña masla madiñal gəl à vok

¹ Wulā à azlaməna gay Zəzagəla à gəl kà, takəs gay à azlasufəl la ahāl ala, la azlagumna anjatā la madfāh uwana tapəhatāla. Tawoya madfāh azlatatak delga. ² Gōd' à atā babay kà tatsəf gay mawisiga à azladza à tsəh aw, tagazlla aw, taga təlomma, takəs gay à azladza anik la ahāl ala babay. ³ Pəh à atā kiya uwaga, kà uwana anu babay uwarā məga azlakusonju babay, madzadzāñhāh gəl gami ala. Tetəvi dziriga aña Zəzagəla azā anu à adi, kà uwana mətawāh kà madfāh azlatatak mawisiga à tsəh pəra, məgā kà azlamawisiga, tetuw tetuw məfāhā à adi à tatak aña azladza anik à tsəh. Azladza tapəsəwāh anu, ñgaha anu babay məpəsəwāh atā suwan. ⁴ Baməraka mədāh kiya uwanay kà, kaslā anik, Zəzagəla uwana aḅəl anu, apəhla ala kà adfāh delga à azladza, ñgaha awoya anu kaykay. ⁵ Aḅəl anu kà deyday, awkā aḅəl anu kà kà sləray delga gami uwana mədāhāñ aw, ama aḅəl anu kà, kà vok mahamay uwana akəs kà anu. Azəḅ anu tsakana gami lakəl ala, adfāh uwaga kà la ndzəda aña Masasəḅok tsikasla, kiya uwaga məgā mayyi vok mawga la maḅəz sifa mawga. ⁶ Zəzagəla ahənānula pawaslwasi la Masasəḅok tsikasla, la ahāl aña Yesu Kristu uwana maḅəl anu. ⁷ Adfāhāñ kiya uwaga kà, kà anu aña maḅəz sifa, ñgaha məsəl kà masla adāvā à anu sifa uwana adəv à gay aw, uwana apakā vok kiya uwanay kà, Zəzagəla adfāh delga, ñgaha apakānula tsidāña la huma aña. ⁸ Gay uwanay gəpəh à ka, kà dziriga.

* 2:14 2.14 2Musa 19.5; 5Musa 4.20; 7.6; 14.2; Mahabay 130.8

Ngaha asa à gi kà katapla à azladza uwaga koksikoksi, kà azlauwana tadinj gəl à Zəzagəla à vok makəs azlatatak delga uwanay. Gay uwana məpəhla ala kà dzəba anha səla aw, azlaka azladza babay. ⁹ Baŋa azladza tabay vok gay deydayga kà, kada à abà aw, kabay vok gay lakəl anja məpəhay anja Musa bay aw, kagazllaw akul nna aw, uwaga kà tatak kusoŋuga deyday gə pəra. ¹⁰ Baŋa dza atsalla mavəhla à tataka azlaməna gay Zəzagəla à abà kà, sləhal ala vok asik tekula, baŋa atsənà aw kà, kafal sləm aya aw, gòlla à lig à gay. ¹¹ Kasəl kà azladza uwana tavəh azlaməna gay Zəzagəla ala kiya uwaga kà, atà kà, tasakà tetəvi mawisiga, tsakana anjatà adəpəhla vok ala la paraka.

Ayyi makəf gəl à ahəŋ

¹² Gədəsləl dza anik à slaka ankul, zlahaw Arətemas, baŋaw Tisik, à uwana gədəsləl à awtəy. Baŋa adəbəzà à awtəy kà, wəf vok à uda la katskats kà mad à mabəz gi vok la Nikopoləs. Gədzugw kà, la təla awkusa kà, gədəday kà madz à ahəŋ la abatà. ¹³ Zlakà Senas masla masəl məpəhay, ŋgaha zlakà Apolos babay, və à atà tatak uwana akəs vok kà anja mauguzahay anjatà uwana tadəday lagwa, kà atà anja manəkudə anja tatak aw. ¹⁴ Azlauwana tadinj gəl à Yesu à vok bokuba anu tasəlay babay, kà atà anja maƒaƒəh azlatatak dzəba anha səla aw gə uwaga kà, atà mazlakəh azlauwana la kudə la abà. Baŋa taƒəhəŋ kiya uwaga kà, madz à ahəŋ anjatà adəgay deyday aw.

¹⁵ Azladza uwana anina la abanay, taƒaha à ka: 'Ayyi' gesina. 'Ayyi', məgəf à azladedə uwana tawoya anu la madiŋal gəl à vok la abà, ŋgaha vok mahamay anja Zəzagəla apis à akul à gay à vok gesina.

WAKITÀ UWANA POL ATSETSER À FILEMON Lettre de Paul à Phil'emon

Ayyi

¹ Gi Pol, la uwana gøtsetser à ka wakità uwanay, gi la danjay kà Yesu Kristu. Gi Pol, anu la deda gami Timotawus, la uwana møtsetser à ka wakità uwanay, à kak slawda gami Filemon, uwana mæfàh sløray gami anina. ² Møtsetser à maham à ahøj mønà gay Zøzagøla, uwana tasaha à wanj à mtøga anjak kà madøv kudfa à Zøzagøla, ngaha à deda gami duguga Appia la Arsip, uwana møpay anina kà anja Suføl gami Yesu. ³ Zøzagøla Baba gami, la Suføl gami Yesu Kristu tapis à akul gay à vok, ngaha tavà à akul lapiya aya.

Masal la madiñal gøl à vok anja Filemon

⁴ Baña gødøv kudfa à Zøzagøla kà anjak, 'Kikay' gøgøfahàh à Zøzagøla koksikoksi, ⁵ kà uwana gøtsønaj kà kawoyàh azlamønà gay Zøzagøla ndzer, ngaha bay kà, kadiñ gøl à Suføl Yesu Kristu à vok. ⁶ Gødøv kudfa à Zøzagøla babay kà, kà maham gay à vok anjak la azladza anik uwana tadiñ gøl à Yesu Kristu à vok mad à humà à gay, ngaha kà kak anja masøl azlatatak delga gesina, uwana møbøzal kà masløkawla Kristu. ⁷ Deda gulo, tsøhay mawoyøj uwana kawoya azlamønà gay Zøzagøla anik arabà gi, ngaha adzørdgøla bay, kà uwana kà kak à uwana løv anja azlamønà gay Zøzagøla anik atàsilla ala.

Pol awula Onesøm à slaka Filemon

⁸ Bokuba uwana kawoya azlamønà madiñal gøl à vok anik kà, 'Kamkam', gødøv à ka kudfa kà madfah uwana gøpøh à kà. Tsa gi masla matapla la slaka Kristu kà, gi la maslay kà mapøh à ka, 'Dahøj kà azlatatak delga!' ⁹ Ama gøpøhay bokuba uwanay aw! 'Kamkam', gønàv à ka, kà madfehøj uwanay, kà uwana kawoya azlamønà gay Zøzagøla. Gi Pol, uwana gi makoz zil, la uwana gøpøh uwaga, ngaha lagwa bay kà, gi la danjay kà Yesu Kristu. ¹⁰ 'Kamkam', gøgøf à ka lakøl anja Onesøm. Agay masla madiñ gøl à Yesu Kristu à vok, masla kà adagay bokuba bøzi huð gulo. Gi, gødagay baba anja la danjay. ¹¹ Uwarà kà, akøs ka vok aw, ama lagonay kà, akøs gi vok, ngaha akøs ka vok bay

¹² Gøwulakala à awtày, ama madzugway gulo kà lakøl anja. ¹³ La kaslà uwana gi la danjay kà gay marabøj kà, asa à gi kà madz à ahøj anu sèla la abanay, kà masla maðøf à slaka anjak à abà, kà mazlak gi. ¹⁴ Ama asa à gi madfehøj kiya uwanay aw. Asa à gi, kà uwana asa à ka dadøj suwanj, ngaha la lig la ahøj asa à gi. Asa à gi maf à ka gasa à gøl, kà madahgøj delga aw. Uwana gøwoya kayak kà, kazlaka gi la løv tekula.

¹⁵ Zlahaw kà, Zøzagøla avà tetøvi kà Onesøm mad madz à ahøj la slaka gà kà anja kaslà njuv, ngaha kà masla anja mawul à slaka anjak, ngaha kà akul anja madz à ahøj la slaka gà, akul sløka anja koksikoksi. ¹⁶ Lagonay masla kà mayà pøra aya aw, dadüwà à gay mayà, kà uwana masla kà bøzi gay løv gami. Gi kà, gøwoya Onesøm kayak, ngaha nðøfegi kà mawoyøj anjak kà adüwa anjulo, kà uwana mayà anjak, ngaha aya kà, kà uwana deda anjak la Kristu la abà.

¹⁷ Baña kanørez gi bokuba manalay anja madiñal gøl à vok anjak kà, kès à mtøga anjak, bokuba uwana naka kakøs gi suwanj. ¹⁸ Baña awis à ka tatak ala, baña kanøfay la goder, pøh à gi, kà gi anja mapølla à ka. ¹⁹ Gi Pol, la uwana gøtsetser uwanay la ahål gulo, kà gødápøl à ka. Ama naka kaslala vok kà manav gi anja mapøl à ka nøma aw, kà uwana kikay kà mapøh à ka sayda gulo à uwana kabøzà sifa adøv à gay aw, uwaga kakoray lagwa. ²⁰ Kità kà, deda kà, gødøv à ka kudfa la sløm anja Suføl Zøzagøla: 'Dahøj tatak dzøða anja sèla aw gà, uwana atasl à gi løv ala, kà uwana anu sèla nna mødahamaw gay à vok la Yesu Kristu la abà.'

²¹ La matsetser wakità uwanay, gøsøl la dziriga kà, kadàfah uwana gønàv à ka madfehøj. ²² Baña kadækøs Onesøm à mtøga anjak dhøj slaka à ahøj babay, kà uwana gøsøl kà Zøzagøla adàtsøn tatak uwana kanavawwal, ngaha adàv à gi tetøvi kà mad à awtày à mtøga anjak.

Ayyi makøf gøl à ahøj

²³ Epaføras uwana aga la danjay anu sèla kà Yesu Kristu kà: 'Ayyi', agøf à kak. ²⁴ Mark, Arøstarkus, Demas, Luka ngaha gi uwana mæfàh sløray anja Zøzagøla la slaka gà, mæfaha à ka: 'Ayyi'.

²⁵ Vok mahamay anja Suføl Yesu Kristu agay la kak.

**WAKITÀ UWANA MASLA
MATAPLA ANIK ATSETSER
À AZLA IBƏRANƏŇKOWEN
Lettre aux H'ebreux**

Yesu la uwana aduwa azlaməna mapəh à atà gay à ahəl

uwana uwarà gesina

¹ Dagay uwarà, anjwaw Zəzagəla apəhəhəh à azlababa gami madzidziga, aslələh à atà azlaməna mapəh à atà gay à ahəl à wan, apəh à atà gay la azlatetəvi anik anik gesina. ² Zəzagəla apəhay tsərəh à lakana uwana makəf gəl à ahəŋ anja mas à wan anja Yesu. Ama lakana avà à anu Kona anja. Aguwà à uda kà la ahəl anja Kona anja, à uwana Zəzagəla apəh à anu, adəfahəŋ gudəŋ à vok. Zəzagəla afà à ahəŋ agəfəŋ à afik kà masla anja makoray lakəl anja tatak gesina, ³ kà masla la uwana mənəŋa mazləbəy anja ndzəfə anja Zəzagəla. Masla kà kalkal la Baba anja Zəzagəla. La gay anja tsikaslagə akəs dəwdəw tatak uwana la gudəŋ la vok. Adəfahə tetəvi anik à ahəŋ la uwatà la uwana Zəzagəla azəb tsakana à azladza lakəl ala gesina, kà atà anja magay sətaka. La lig anja uwaga la ahəŋ, ahəd, adzà madzay la ahəl kaf anja Zəzagəla lakəl, kà makoray la masla.

Yesu kà aduwa azlamalika gesina

⁴ Gay gə la uwaga, Zəzagəla adəfahəŋ Kona anja, aduwa azlamalika gesina, kà uwana sləm uwana avà à Kona anja kà, aduwa anja azlamalika uwanay gesina. ⁵ Tetuw tetuw Zəzagəla apəh à azlamalika kiya uwanay aw:

"Kak Kona gulo, dagay lakana azladza tadəsəlay la paraka."*[†]

Malika la ahəŋ tetuwa à uwana:

"Gədəgay Baba anjak, ŋgaha kadəgay Kona gulo",

agədəl aw. ⁶ Ama la kaslə uwana Zəzagəla asal masləl Kona anja à wan, uwana lakəl anja tatak gesina la gudəŋ la vok agəd:

"Akul azlamalika gulo gesina sləkəwəw masla!"

⁷ Lakəl anja azlamalika kà, Zəzagəla agəd:

"Adəfahə atà kà afad gə, ŋgaha azlamayə anja, azlaaləh akəl aya babay."

⁸ Ama lakəl anja Kona anja Zəzagəla kà, tatsətsər à wakitə Zəzagəla à abà lakəl anja kà:

"Kak la uwana Zəzagəla, kadəkəray anja koksikoksi, kadəkəray tsəhay anjak lela.

⁹ Azlatatak dziriga gə uwana awoyən, ama azlamawisiga kà, asa à ka atà aw, kapəsew atà anja tetuwa. Gay gə la uwaga, Baba anjak Zəzagəla azalə ka, ŋgaha apakəkala mənəŋa gə la mav à ka maslay mənəŋa dafəduwa à gay anja azladeda anjak."*[†]

¹⁰ Zəzagəla agəd aya lakəl anja Kona anja:

"Kak Sufəl dagay la madzəka, kak la uwana kadəfahə gudəŋ à vok la ahəl anjak, la uwana kadəfahəŋ zagəla babay.

¹¹ Dəwdəw tatak uwana kadəfahəŋ kà, adədəv à gay, ama kà anjak kà, kadədza à ahəŋ bokuba uwana kak la ahəŋ la uwaga kiya uwaga uwanay anja koksikoksi. Azlatatak uwaga gesina tadəpakəhay makoz bokuba azlalukut uwana atsəkəway.

¹² Bokuba uwana kakəl lukut à abà, kiya uwaga la uwana kadəkəl à abà anja mafay aslələf à gəl. Ama kak kà, kak la ahəŋ bawtawta madz à ahəŋ anjak adəkəf gəl à ahəŋ aw."*[†]

¹³ Aga la ahəŋ amiyaka tekula anja azlamalika à uwana Zəzagəla apəhal gay kiya uwanay aw:

"Dzà madzay la ahəl kaf gulo lakəl, tsərəh à uwana gəduw azlaməna məzam anjak! Gəpaka azlaməna məzam anjak bokuba azlatatak maf asik à afik anjak."*[†]

¹⁴ Azlauwa azlauwana tapakà azlamalika uwa? Atà kà azlaməna slərəy anja Zəzagəla. Zəzagəla asləl atà kà mad mazlak azladza uwana adəbəl atà.

2

Məpəsew tatak uwana Zəzagəla apəh à anu aw

¹ Tsa Zəzagəla abəfanumə la Kona anja kà, məpəzl sləm gami à gay uwana apəh à anu à ahəŋ, kà anu anja maz à tetəvi delga la tsəh ala dogdogog aw. ² Məsəl kà gay uwana azlamalika tasəlla à wan kà, agəd à afik. Azlauwana tafəl sləm aw, ŋgaha

* 1:5 1.5 2 Samuyel 7.14; Mahabay 2.7 * 1:9 1.9 5Musa 32.43; Mahabay 45.6-7; 104.4 * 1:12 1.12 Mahabay 102.25-27 * 1:13 1.13 Mahabay 110.1

la azlawuana takòs aw kà, seriya uwana Zəzagəla adùkwatəŋ à gəl, kà azlawla atà ndzer. ³ Kakay mətəfay à baŋa mapak gay aŋa maβəlay ala kà gay deyday ma? Gay aŋa maβəlay uwana Sufəl Yesu azəŋ kà, azlaməna mazonə la uwana tagəđəŋ à afik: 'Fida la abà aw', Zəzagəla agòđ. ⁴ Zəzagəla la gəl aŋha babay apəhla ala kà gay uwaga kà ndzer, la madəhəŋ azlamasəlay anik anik, ŋgaha la azlatatak nadzipo gə, avà maslay kà à Masasəđok tsidəŋa, kà atà aŋa madəh azlatatak bokuba uwana asal.

Yesu apəhanula tetəvi uwana anaka məβəl ala

⁵ Uwaga kà azlamalika à uwana Zəzagəla aβək atà à ahəŋ, kà aŋa makor gudəŋ uwana adàsa à waŋ aw, ŋgaha à uwana məpəhay babay la abanay aw. ⁶ Tekedika la wakità Zəzagəla la abà kà tatsetsər kà:

'Mana à dza asik kà mafal sləm la mazlakəŋ ma.

⁷ Kazəŋ à vədah la tsəh aŋa azlamalika, kà aŋa kaslā ŋuv la lig la ahəŋ kà, kavàl masləkaway bokuba uwana tasləkawla məŋ sufəl.

⁸ Kà madəgolay uwaga à uwana, tafà tatak gesina à tsəh asik aŋha.^{10*}

Uwaga kà apəhay kà lakəl aŋa Yesu uwana Kona aŋa dza. Kà uwana tapəh kà kiya uwanay, Zəzagəla afà tatak gesina à tsəh aŋha. Uwaga asal magəđay kà, tatak gesina kà la tsəh aŋha pəra. Ama aŋa lagonay kà, mənəŋa akor azlatatak uwaga la dazuwaya dadəŋ aw. ⁹ Ama məsəl kà Yesu akor azlatatak gesina uwarà. Kà aŋa kaslā ŋuv, Zəzagəla afà à tsəh aŋa azlamalika kà, la vok mahamay aŋa Zəzagəla aməts kà aŋa azladza gesina, kà mas ŋgərpa. La mamətsay aŋa Yesu la uwana, Zəzagəla avàl mənəŋa, kiya masləkaw sufəl. ¹⁰ Tatak gesina kà aguwa à waŋ kà la slaka Zəzagəla, adəhà à atà kà kà aŋha. Kiya uwaga asal kà mapakYesu ala sətaka la ŋgərpa uwana asà, ŋgaha azladza anuvaw aŋa magay azlabəza aŋha, ŋgaha kà atà aŋa mad à slaka mazləbay aŋha à abà. Uwaga kà Yesu la uwana aga atà la huma kà maβəl atà.

¹¹ Yesu la gəl aŋha apaka azladza ala sətaka, atà la Baba tekula, Zəzagəla la uwana Baba aŋatà. Gay gə la uwaga Yesu azala atà ala: Azladedə. Ziruwì azəŋ kà aŋa uwaga aw. ¹² Gay gə la uwaga agòđ:

"Gəđəpəhla sləm aŋak ala la slaka azladedə gulo, ŋgaha la huma maham à ahəŋ aŋa tsəhay aŋak kà mazləb ka."

¹³ ŋgaha kà:

"Gəđəfa vok gulo à kak Zəzagəla à afik."

ŋgaha aya kà:

"Gi la uwanay la azladza uwana asakà, kà gəβəl atà."^{10*}

¹⁴ Azladza uwana apəhay la abanay kà, uwaga kà anu uwana la sləb vok. Kà uwaga Yesu la gəl aŋha adapakay babay bokuba dza la sləb vok, ŋgaha kà la mamətsay aŋha kà aslāla vok aŋa makaləh ndzəđə aŋa seteni à ahəŋ, uwana aga la maslay kà makad azladza. ¹⁵ Yesu adəhəŋ kiya uwanay, kà guba makəs azladza kà mamətsay aya aw. Dagay uwarà tadzadzərəhà vok la guba aŋa mamətsay la abà, la abà gə kà, masla azəb guba uwaga ala. ¹⁶ Ndzer, wakità Zəzagəla apəh kà azlamalika la uwana tasà à waŋ kà aŋa mapəhay aw, ama asà à waŋ aŋa mazlak mayyi à tsəh ala aŋa Abəraham. ¹⁷ Baməraka akəs vok kà apakay kiya azladedə aŋha gesina, kà magay məŋ madzahaga uwana adəh sləray kà aŋa Zəzagəla, kà masla aŋa mazəb tsakana à azladza lakəl ala, ŋgaha asəlla atà vok la masla. Uwaga məŋ madzahaga delga gə ŋgaha masla vok mahamay gə. ¹⁸ Lagwa aslala vok azlak azlawuana mapapatay apapat atà, kà uwana asà ŋgərpa, ŋgaha agə mapapatayga.

3

Yesu kà aduwa Musa

¹ Azladedə, la kità Zəzagəla babay atsatsəmàni akul kà akul aŋa magay tsəhay aŋha. Baməraka la uwaga kà, fəw vok aŋkul à Yesu à afik, masla la uwana Zəzagəla asləl à waŋ kà masla aŋa magay məŋ madzahaga aŋa madiŋal gəl à vok gami, uwaga masla la uwana, masla masəlla anu vok la Zəzagəla, uwanay la uwana məziŋ la dazuwaya. ² Yesu kà dza delga la slaka Zəzagəla, uwana akəsàni kà madəhəŋ sləray uwanay, bokuba Musa uwana agə delga la sləray aŋha la abà uwana adəhəŋ, kà aŋa azladza huđ gəy aŋa Zəzagəla babay. ³ Tazləb dza uwana aŋəl gəy adəfuwa à gay gəy la gəl aŋha. Lakəl aŋa Yesu la Musa babay kà kiya uwanay. Masləkaway uwana məsələkaw Yesu kà, aduwa aŋa Musa. ⁴ Ndzer, azlagəy gesina kà, dza la uwana aŋaləh atà, ama dza uwana adəhà tatak gesina kà Zəzagəla. ⁵ Hadəy, Musa kà aŋa masla sləray aŋa Zəzagəla uwana adəhəŋ lela la huđ gəy aŋha gesina kà, sləray aŋha kà apahla à azladza azlatatak uwana

Zəzagəla adəpəhay la huma la gay. ⁶ Ama aña Kristu kà, ndzer masla Kona aña, uwana anəŋla huɗ gày aña Baba, bokuba magoɗay, masla kà lela la tsəhay sləray aŋatà uwana la abà, aɗeɗeɗəy babay. Anu tsəhay aña, anu babay kà anu azlaməna huɗ gày aña, à baña mēda à huma à gay la mawad vok à uda, mēfa madzugway gami à azlatatak uwaga à afik la marabay, tsərəh à makəɗ gəl à ahəy

Zəzagəla adav maduw ləv à tsəhay aña

⁷ Gay gà la uwaga Masasəɗok Zəzagəla agɗɗ:

'Lakana baña katsənaw kuda aña Zəzagəla kà,

⁸ Tsəbàwwal sləm. Kadzadzəŋaw gəl ala, bokuba uwana uwarà azlababa aŋkul madzidziga taɗfahàhàŋ aw, la kasl à uwatà, atà la fəta la abà, tadzà à ahəy la abà mavay dzik uɗaf. Atà kà, tapəsəw Zəzagəla, ŋgaha tagür masla.

⁹ Tanəŋà azlatatak dzəba aña səla aw gà uwana aɗahàhàŋ, dagay mavay dzik uɗaf bay, tagùrla.

¹⁰ Gay gà la uwaga, ləv azàŋ à gi lakəl aña azladza uwaga. Gəl adakad à atà à vok, tatsən tetəvi gulo dadàŋ.

¹¹ Kà uwaga à uwana gəfàh akur à ahəy, la magoɗ à azladza uwaga kà: Tetuw kadàdiya à slaka maduw ləv gulo à abà aw!'[✧]

Zəzagəla agɗɗ. ¹² Azladedə gulo, ɗahàw haŋkəli kà dza la tataka aŋkul kà aña magay la ləv mawisiga, ŋgaha kokuda maɗiŋal gəl à Zəzagəla à vok aya, kà masla aña masakiya à masla uwana la tsəh ala la sifa aw. ¹³ Ama tsatsəhàhàw vok ala kà akul à akul koksikoksi, kà seteni aña mavavar akul à mawisiga à abà aw, ŋgaha kà akul aña magay azlaməna mapəsəway babay aya aw. Dàw à huma à gay la maɗeɗeɗəy kiya uwanay koksikoksi, kà uwana lakana kà, Zəzagəla asal maɗadma à anu à ama aya. ¹⁴ Baña anu mēda à huma à gay la makəs azlatatak uwana maɗiŋal gəl à vok, dagay la madzəka tsərəh à makəɗ gəl à ahəy kà, kiya uwaga haɗay, mēdàgay azladza aña Kristu.

¹⁵ Aŋanay à uwana tatsətsər à wakità Zəzagəla à abà:

'Baña katsənaw kuda aña Zəzagəla lakana kà, kadzadzəŋaw gəl ala, bokuba uwana kadadzadzəŋawwanla uwarà.'[✧]

¹⁶ Azlauwa azladza uwana tatsənà kuda aña, ŋgaha tapəsəw uwa? Ndzer, azladza gesina uwana dagay uwarà Musa aguwa à atà à huma kà masəlla atà à uda la gudəy Misəra. ¹⁷ Kà madəgolay ma, uwa à uwana Zəzagəla agə magurayga mavay dzik uɗaf uwa? Ndzer kà, atà azladza uwana taɗahà tsakana. Kà uwaga à uwana tamàts à fəta à abà. ¹⁸ Kà azlauwa? Kà azladza uwaga à uwana: 'Gəfàha akur à ahəy kà la tetuwa taɗəbək asik à slaka gulo uwana à abà gəɗàduw ləv aw', agɗɗ. Ndzer uwaga kà, kà azlauwana takweska gay aña. ¹⁹ La kiya uwanay kà, azladedə gulo, mənəŋar kà taɗəbək asik à slaka maduw ləv à abà aw kà, kà uwana taɗiŋ gəl à Zəzagəla à vok aw.

4

¹ Dagay uwarà, Zəzagəla apəh à azladza kà adəv tetəvi à azladza kà madla atà à slaka maduw ləv aña uwana apəh à ahəy kà agɗɗ à afik, kiya uwatà kà uwaga kà, məɗàh haŋkəli kà tekula la tataka aŋami aña magoɗ à lig, ŋgaha kà masla aña mad à abà aw aw. ² Tapəh à anu gay matsiɗayga, bokuba uwana uwarà à azlababa madzidziga tatsənəy babay. Ama gay matsiɗayga, uwaga azlakà atà aw, tadà à slaka maduw ləv uwatà à abà aw, kà uwana takəs gay uwatà aw. ³ Uwaga kà anu la uwana mēdàda à slaka maduw ləv uwatà à abà, anu uwana məkəs gay uwaga. Agɗɗ lakəl aña azlauwana takəs gay uwaga aw kà:

'Gəpàk ləv lakəl aŋatà, gəfàha akur à ahəy kà tetuwa taɗàdiya à slaka maduw ləv uwatà à abà aw!'[✧]

Zəzagəla adəv sləray aña à gay dagay uwarà, à mok uwana aɗahà gudəy à vok. Kiya uwaga kà, maduw ləv kà aga la ahəy ndzer. ⁴ La azlaslaka anik, la wakità Zəzagəla la abà, tapəh lakəl aña mahənay məɗəf:

'Zəzagəla adəvə sləray aña à gay la mavakay mukwa. La maməɗəf gə kà, aduw ləv.'[✧]

⁵ La azlaslaka anik Zəzagəla agɗɗ aya babay:

'Tetuwa taɗàdiya à slaka maduw ləv gulo à abà aw.'

⁶ Azladza uwana tatsənà gay matsiɗayga terəŋa bay, tadà à abà aw, kà uwana takəs gay uwaga aw. Uwaga kà adzàɗla: Slaka maduw ləv kà aga la ahəy, ŋgaha azladza anik taɗàda à abà. ⁷ Gay gà la uwaga, Zəzagəla aɗahà zamana anik uwana anu la abà lakana. Uwaga aɗahà mavay dəy la lig la ahəy, mok uwana apəh azlagay uwanay à David à ahəl kà, azlagay uwana məɗatsetəray adagay kà:

'Lakana baŋa kadatsənawwanj kuda anja kà, fàwwal sləm, kadzadzanzaw gəl anjul ala aw.'*

⁸ Agayŋa Josu'e abəzla azlababa gami à slaka maduw ləw uwaga à abà, ndzer kà, naka Zəzagəla apəhay lakəl anja zamana maduw ləw anik aya aw. ⁹ Uwanay asal magoɔfay kà, azladza anja Zəzagəla kà, atà la tetəvi la ama anja madiya à slaka maduw ləw anja Zəzagəla à abà, bokuba uwana aduw ləw mahənay maməɔf. ¹⁰ Dza uwana adiyà à slaka maduw ləw anja Zəzagəla à abà kà, masla kà aɔfah sləray aya aw, masla kà sləray anja adadəv à gay, aduw ləw suwanj, bokuba uwana Zəzagəla aduw ləw la sləray anja la abà bay. ¹¹ Tsa baŋa kiya uwanay kà, məwad vok à uda, kà anu anja madiya à slaka maduw ləw uwatà à abà. Məɔfaha haŋkəli kà anu anja magəɔf à lig bokuba azlababa madzidziga uwana takweska Zəzagəla aw.

¹² Kà uwana Zəzagəla avà sifa dziriga gə à azladza, aɔfah sləray la ndzəɔa. Gay uwana atsa à wanj la paŋaw anja la awtəy kà la ndzəɔa, ŋgaha kiya katsakar uwana azuway gay səla nna. uwana aday tsərah à aslasl à adi. Masla kà bokuba katsakar uwana anats aslasl ala tsərah à tsəh zəməw, uwana asa à dza kà madəhəŋ. ¹³ Tatak la ahəŋ ahəɔf vok à Zəzagəla à adi aw. Tatak gesina uwana aɔfahəŋ kàdazlazla lela la huma anja. La huma anja la uwana mədàsəlla à uda tatak uwana məɔfahəŋ gesina.

Yesu məŋ Madzahaga gami

¹⁴ Anu la məŋ Madzahaga, uwaga kà Yesu, Kona anja Zəzagəla, uwana adà à zagəla à afik. Kà uwaga kà, məwad vok à uda lakəl anja azlatatak uwana məɔfah gəl à vok ŋgaha məzahəŋ uwaga la dazuwaya. ¹⁵ Məŋ Madzahaga gami kà, vok ahəmal kà maruw vok à ahəŋ gami. Asà ŋgəpa tsəhay anik anik gesina bokuba anjami, tapapət masla, ama atəɔf à tsakana à abà aw. ¹⁶ Kà uwaga kà: Səw à wanj à slaka Zəzagəla uwana avəhəh vok mahamay anja à azladza. Məzà vok à slaka anja la ləw tekula, kà anu anja məbəzal vok mahamay, ŋgaha kà masla mav à anu dziriga anja uwana adəzlaka anu la mok anja ŋgəpa!

5

¹ Kəla məŋ madzahaga gesina kà, Zəzagəla atsatsamahani la tataka azladza la abà. Masla afà à ahəŋ kà masla anja madəh sləray anja Zəzagəla kà anja gəl anja, ŋgaha kà masla anja mavəl tatak kà anja mazəbatəla tsakana lakəl ala. ² Azladza uwana tasəl tetəvi delga aw, ŋgaha la azlauwana tawul tetəvi la tsəh ala kà, məŋ madzahaga kà asəl kakay à madəh delga la atə mi, kà uwana masla babay kà guɔguɔ, bokuba atə. ³ Kà madəgolay uwaga kà, say atsa anjiz à wəɔfah kà anja tsakana anja azladza anik pəra aw, ama kà anja gəl anja babay. ⁴ Dza azəb vok la gəl anja kà magay məŋ madzahaga aw, say Zəzagəla la uwana azələlla bokuba uwana uwarà azalə Haruna.

⁵ Kiya uwanay la Kristu babay. Masla azəb gəl anja la gəl anja kà magay məŋ madzahaga aw. Zəzagəla la uwana azaləl, agəɔɔal:

'Kak bəzi gulo, dagay lakana azladza tadasəl kà ndzer.'*

⁶ La azlaslaka anik anik aya, la wakitə Zəzagəla la abà tagəɔf kà:

'Kak kadəgay Məŋ Madzahaga anja tetuwa bokuba anja Melkisdaka.'*

⁷ Mok uwana Yesu aləg la gudəŋ la vok kà, masla kà asəl, kà Zəzagəla la maslay kà mawulla à uda la mamətsay, adəval kuɔa la iyaw tugwi, ŋgaha azà kuda à zagəla. Zəzagəla atsənəŋ, ŋgaha awulla à uda la mamətsay kà akəs gay anja. ⁸ Ama ku bə masla bəzi anja Zəzagəla kà, atəpla kà makəs gay à Zəzagəla ala la ahəl, la mas ŋgəpa. ⁹ Mok uwana adəɔfah sləray anja kà, apakə masla məbəl azladza, uwana takəs gay anja, ŋgaha abəl atə kà anja tetuwa. ¹⁰ Zəzagəla afà masla à ahəŋ Məŋ Madzahaga bokuba Melkisdaka.

Dahəw haŋkəli

kà akul anja masak tetəvi anja Zəzagəla la tsəh ala aw

¹¹ Anu la gay lakəl anjuvaw, kà məpəh à akul lakəl Melkisdaka. Ama zlazlafa kà məpəh à akul, kà uwana sləm aga la akul lakəl aw. ¹² Akul lagwa kà, kasləwwalla vok anja magay azlaməna matapla azladza anik, kà uwana kadatapawla azlatatak dagay uwarà, ama kay kà, kasəlaw azlatatak uwaga lela dadəŋ aw kà, akəs vok kà azladza anik tatsawanj anja matapakulla aya azlatatak uwana katəpəwla dagay la madzəka lakəl anja gay Zəzagəla. Kasəlaw mazuw tatak may dzanɔzanga dadəŋ aw, akul kalkal la azlabəza wərna uwana tasa awə dadəŋ. ¹³ Ama kəla kà, dza uwana asa awə kà, masla kà bə bəzi wərna, asəl mavəh delga ala la mawisiga dadəŋ aw. ¹⁴ Tatak may dzanɔzanga

kà aŋa azlamagol dza tasəl madzugway adagay, atà kà tatapla mavàh tatak delga ala la mawisiga.

6

¹ Tsa kiya uwanay zlà kà, məhàd à huma à gay, mətapla tatak uwana aŋa azlamagol dza, məduwa tatak teraŋaga, uwana mətapla lakəl aŋa Kristu, mōdà à huma à gay la tatak mənğa, bokuba dza uwana adadzəka matatukw gəy, mətatukw aya aw, ama mənjal à zagəla la madla à huma à gay. Mapəh gay la ləv ala, madəh azlatatak mawisiga uwana adala dza à mamətsay à abà aya, la madiŋ gəl à Zəzagəla à vok aya, mōdāpa à akul aya aw. ² Məslala vok matapakulla matapla akul teraŋa aya aw. Uwaga la uwana batem dziriga, kakay à mapəs gay à dza à vok la maβək atà à ahəl à gəl la sləm aŋa Zəzagəla mi? Nğaha Zəzagəla adəwulla azladza à uda la mamətsay mi, nğaha kakay adədəha atà seriya à gəl, la kaslà makəf gəl à ahən mi? ³ Məsak azlatatak uwaga gesina, mōhad à huma à gay la mazlak anu aŋa Zəzagəla nğaha mōdəfəhəŋ kiya uwanay.

⁴ La dziriga ma, kakay akəs vok à azladza uwana tasōkw à tetəvi mawisiga à ama mi? Kay kà, tadzà à ahən la udaka aŋa Zəzagəla la abà. Tatəp mavəy aŋa Zəzagəla, nğaha tabəzal Masasəfok Zəzagəla tekedik. ⁵ Atà tatapən kà gay Zəzagəla kà delga, tatəp maslay aŋha uwana adəgay la zamana uwana la abà adəsà à waŋ. ⁶ Nğaha tawul à lig, tetəvi la ahən kà mawulla atà à waŋ aŋa mapəh gay la ləv ala aw, kà uwana azladza uwanay tatatəsl Kona aŋa Zəzagəla, à ahəf à adi kà masəla tatsəkəl magodəhay à gəl la dazuwaya.

⁷ Dzūgwəw lakəl aŋa kutso, baŋa iyaw asuw à guf à abà kà, tatak may atsa à uda, nğaha azlaka azlaməna mapəsəy, uwaga asal magodəy kà Zəzagəla apis gay à guf uwatà à vok. ⁸ Tekedika la guf la abà kà, atək la kəsaf mawisiga atsa à uda la abà, kutso kà tatak deyday. Zwek la huma la gay kà Zəzagəla adətsafəla adəgay mababəh gay gə aŋa tetuwa.

⁹ Akul, uwana akul azlaməna gay ləv gulo kà, amiyaka məpəh kiya uwanay kà, məsəl akul, məsəl kà kanəfaw tetəvi delga gə, nğaha kà Zəzagəla adabəl akul. ¹⁰ Masla kà dziriga, haďay gə, kà sləray aŋkul uwana kaďahawwan kà avikaŋ aw, bokuba magodəy, uwana kazlakahaw azladeda aŋkul məna gay Zəzagəla, nğaha zləkəw atà kiya uwaga aya, nğaha uwaga apəhla ala kà: Kawoyaw Zəzagəla. ¹¹ Uwana mətuwal à tsəh kayakay kà, kawadaw vok à uda, kà kadaw à huma à gay kà akul aŋa məbəzal tatak uwana kaďuwawwal yewdi. ¹² Asa à anu kà kagaw azlaməna may vok aw, kiya uwaga kà: Gəw kà bokuba azlauwana tadiŋ gəl à Zəzagəla à vok, tafa manewəŋ aŋatà kà à Zəzagəla à afik. Atà la uwana tadəbəzal tatak uwana Zəzagəla apəh à ahən.

Uwana Zəzagəla apəh à ahən kà, agədīŋ à afik

¹³ Kasəlaw kà, dagay wararà kà Zəzagəla apəh à Abəraham à ahən. Mok uwana apəh uwaga kà, afahà akur à ahən la dziriga. Dza la ahən aďuwan Zəzagəla aw. Kà Zəzagəla aŋa mazuwal mawadəy aw, kiya uwaga afahà akur à ahən kà la gəl aŋha. ¹⁴ Agod:

“Ndzer, gəpis à ka gay à vok, gədàvə à ka mayyi à tsəh ala uwana dza atugway aw.”[✧]

¹⁵ Abəraham awadə ləv ala la tsetsi dadəŋ aŋa Zəzagəla, nğaha la mabasiŋ. Kiya uwaga akudà azlatatak uwana Zəzagəla apəhal à ahən. ¹⁶ Baŋa azladza tazūw mawadəy kà la sləm aŋa dza mənğa uwana aďuwa atà. Mawadəy kà uwana adəv à gay la tataka azladza la abà. ¹⁷ Gay gə la uwaga à uwana, Zəzagəla azūwal mawadəy. Asəl kà azladza uwana apəh à atà gay à ahən kà, tatsən tatak uwana apəh à ahən kà madagədīŋ à afik. Gay gə la uwaga apəhal à ahən dadəŋ à tatak uwana adavəl, la lig la ahən azūwal mawadəy.

¹⁸ Kiya uwaga azlatatak səla la ahən uwana dza asləla vok maβəfəla aw, uwana Zəzagəla apəh à ahən, nğaha la uwana afəhəh akur à ahən lakəl aŋha kà, aďəh fida aw, uwana məyahaŋ la slaka Zəzagəla, kà anu aŋa məbəzal slaka, kà anu aŋa mahad vok à ahən, uwaga adzərəď anu à uda kayakay, kà anu aŋa maf manewəŋ gami kà à tatak uwana à tsəh Zəzagəla afà à anu à huma à gay. ¹⁹ Tatak uwana məfa manewəŋ gami à afik kà, Zəzagəla akəs anu dzəkka, kà anu aŋa madz à ahən titi la huma Zəzagəla, bokuba kəslah iyaw uwana tawadəŋ à ahən lela la iyaw la abà la gay dərəv. Gay gə la uwaga à uwana, bafta uwana atsək à slaka tsikaslaga, ama afətamalla ala la huma gami, kà anu aŋa mad à gəy à huď gə, à slaka uwana Zəzagəla la ahən. ²⁰ Yesu kà adagay la abatà la huma gami, masla la uwana abəď à huma kà anu, kà uwana masla apək Mən Madzahaga mənğa gə, bokuba Melkisadaka adagay mən madzahaga aŋa koksikoksi.

7

Melkisdaka madzahaga aña Zëzagëla

¹ Melkisdaka uwaga uwarà kà agà sufël aña gudëj Salem, agà babay madzahaga la huma Zëzagëla uwana kërker la afik. La zamana anik Abëraham ahàd à guvël, akäcf azlasufël anik anik à gay. Mok uwana adawul à wanj la guvël kà, Melkisdaka ahàd kà magagamay la masla, apisalla gay à vok. ² Abëraham avà à Melkisdaka makulo aña këla tatak uwana azüw la guvël la abà. Melkisdaka uwaga kà, slëm aña asal magodfay kà, teraňa kà: Sufël uwana dziriga. Ngaha babay agà sufël aña lapiya kà uwana agà sufël aña Salem, ngaha Salem asal magodfay kà: Lapiya. ³ Dza la ahëj asël baba aña la iyà aña bay aw, bamëraka azlababa aña madzidziga bay aw. Mësël mok mayyay aña bay aw, amiyaka bà mamëtsay aña babay. Masla agà magagazlëlaga la Yesu, Kona aña Zëzagëla, kà uwana slëray aña mav tatak aña akëf gël à ahëj aw.

⁴ Dzügwàw lakël aña mënnga aña tsi. Abëraham baba gami madzidziga kà, ahël tatak uwana azüw la guvël la abà gesina, avähàn ala madziga kulo kulo, avàhal tekula tekula la gay aña kulo kulo gesina. ⁵ Azlaanik la mayyi à tsëh ala Levi kà, mëna makäf tatak à Zëzagëla la tataka aňatà la abà, atà kà azlamadzahaga aña wakitë seriya aña Musa. Tagodf à atà: 'Dàw à slaka azladza, kà tavàhà à akul tekula la gay aña këla tatak kulo, kà akul aña madzadzarlaka vok.' Hadfay, mësël kà tabëzàhal tatak uwaga la ahàl aña azladeda aňatà, bà atà dagay mayyi à tsëh ala aña Abëraham bay. ⁶ Ama Melkisdaka kà agà mayyi à tsëh ala aña azlamëna mavàh tatak à Zëzagëla uwaga aw, bamëraka la kità bay kà, abëzal tatak la ahàl aña Abëraham. Abëraham kà masla kà Zëzagëla apëhal azlatatak uwaga à ahàl. Melkisdaka uwaga la uwana apis gay à Abëraham à vok. ⁷ Hadfay, mësël kà banja dza apis gay à dza anik à vok, kà masla la uwana mënnga. Kità kà, Melkisdaka la uwana aduwa Abëraham. ⁸ Azlamadzahaga uwana la hudf gày aña azlamëna makäf tatak à Zëzagëla, uwana tabëzàh à makulo aña tatak la ahàl aña azladeda aňatà tamàtsàhàh. Ama Melkisdaka kà amëts aw, agà la ahëj aña koksikoksi, bokuba uwana wakitë Zëzagëla agodf à anu. ⁹ Lagwa mësëla vok aña magodfay kà, Levi uwana abëzàhà tatak la slaka azladza anik kà, atà babay kà tavà makulo aña tatak à Melkisdaka suwanj, kà uwana baba aña Abëraham avà tatak à Melkisdaka la gël aña. ¹⁰ Bokuba magodfay kà, mok uwana Abëraham avà tatak à Melkisdaka, kà Levi kà tayyay dadàn aw, la lig la ahëj mayyi à tsëh ala aña avàhal babay. Uwaga adzadfanëj ala kà Melkisdaka aduwanj hudf gày aña Levi gesina la kayak.

Yesu kà aduwa Melkisdaka

¹¹ Slëray aña azlamëna mav tatak à Zëzagëla la hudf gày aña Levi kà, taslala vok kà mahënj ala uwana asa à Zëzagëla aw. Agayna taslala vok kà mahënj ala kà, naka delga kà aña mas à wanj aña Mëj Madzahaga anik uwana aduwanj Melkisdaka aya aw, naka azlamënj madzahaga tagay kà mayyi à tsëh ala aña Levi përa bokuba Haruna. Uwaga kà aga kà la ahàl aña madzahaga aña azlamëna mav tatak à Zëzagëla, uwana tagà la hudf gày aña Levi à uwana Zëzagëla avà mapëhay aña à azlamëna gudëj Isëräyël à ahàl. ¹² Banja Zëzagëla abëdla azlamadzahaga kà, mësëlay bay kà mafàh akur à ahëj aña abëdla vok babay. ¹³ Lagonay kà, mësël kà tsëhay madzahaga abëdla vok. Masla à Sufël gami Yesu, uwana mëpëhay la abanay kà, asà à uda kà la tsëhay anik. Masla kà tsëhay aña Levi. Dza la ahëj la tsëhay aña la abà madzahaga, uwana masla makäf tatak aw, ngaha à uwana tetuwa adakëf tatak à Zëzagëla, kà tsakana aña azladza aw. ¹⁴ Hadfay, masla à Yesu kà, asà à uda la tsëhay aña Yahuda la abà. Mok uwana Musa apàhàh lakël aña azlamëna makäf tatak à Zëzagëla kà, apàh kà lakël aña tsëhay uwaga aw.

¹⁵ Azlamëna makäf tatak la hudf gày aña Levi kà, taslala vok kà madla azladza à slaka Zëzagëla aw. Aganay à tatak uwana adzäcf gay uwaga ala: Madzahaga anik aña azlamëna mav tatak à Zëzagëla, uwana bokuba Melkisdaka kà adazlanjalay. ¹⁶ Dza uwatà kà mën madzahaga aña makäf tatak à Zëzagëla la mapëhay aña azladza aw. Ama masla kà Mëj Madzahaga, kà uwana aga la maslay kà madz à ahëj la sifa aña koksikoksi. ¹⁷ Lakël aña dza uwaga tatsetsër à wakitë Zëzagëla à abà kà:

"Kak kà, kadàgay Mëj Madzahaga aña koksikoksi bokuba Melkisdaka."*

¹⁸ Zëzagëla abëdla azlamapëhay aña uwarà, kà uwaga tagà la ndzëdä aw, tazlakàh azladza babay aw. ¹⁹ Mapëhay aña Musa kà aslala vok magëj azladza sëtaka la huma Zëzagëla aw. Lagonay kà tatak anik la ahëj, à uwana aduwa mapëhay aña dza uwaga. Mëfa manewëj à uwana à afik, avà masëlay kà maz vok à slaka Zëzagëla.

²⁰ Nğaha aya kà: Mok uwana Zəzagəla asal maf Yesu à ahəj kà Məj Madzahaga kà, afàhà akur à ahəj dadən, à mok uwana tsəhay Levi apakà məj madzahaga kà Zəzagəla, afàhà akur à ahəj kiya uwanay aw. ²¹ Ama Zəzagəla azùw mawafay à Yesu la magodfay kà:

“Gi, gi Sufəl Zəzagəla gədàbədfla tatak uwanay aw: Gədàzuw à ka mawafay, kà kadəgay Məj Madzahaga anja koksikoksi.”[✧]

²² Uwanay kà asal magodfay, kà makəs vok slawda uwana Zəzagəla adfahən la anu kà, uwaga dafuwa à gay makəs vok slawda maviyaga uwatà uwarà. Yesu la uwana adzadà tatak uwaga ala.

²³ A babay kà tatak anik la ahəj aya, kà azlamadzahaga anja makad tatak la huf gay anja azla Levi kà tagàh dən, kà uwana tamàtsàh, banja anik adamətsay kà, anik abəd à slaka anja à abà. ²⁴ Ama Yesu kà kiya uwaga aw, masla kà amətsay aw anja koksikoksi, sləray anja magay madzahaga anja kà adəkəf gəl à ahəj anja tetuwa aw. ²⁵ Kà uwaga à uwana aga la maslay lakəl anja tatak gesina kà maβəl azladza uwana tatsa à wanj à slaka Zəzagəla, kà madegolay masla uwana aga la ahəj la sifa anja koksikoksi. Abàdfàh à huma kà madəv kudfa à Zəzagəla kà anu.

²⁶ Masla kà Məj Madzahaga uwana məwoyanj. Masla kà tsikaslaya, mawisiga anja la ahəj à masla aw, adfàh tsakana aw. Masla kà kiya azlaməna tsakana aw, Zəzagəla afà à fəta à awtəy tsikasla. Afà aslələf anja à gəl la zagəla la afik, ²⁷ kà anja azlamadzahaga anik, uwana kà say takadafay tatak à Zəzagəla kəla mahənay. Banja taday kà makad tatak kà, say takəday kà anja gəl anjatà dadən, nğaha atà anja makadafay kà anja tsakana anja azladza anik. Ama kà anja Yesu kà, adfahən kiya uwaga aw. Masla kà, avà kà asik tekula pəra, nğaha asla kiya uwaga. Mavəy uwaga kà vok anja uwana avà. ²⁸ Azlamadzahaga uwana mapəhay anja Musa abək atà à ahəj kà, tagà kà azladza deydayga. Tadafahà tsakana. Ama mok uwana Zəzagəla afàha akur à ahəj kà, abədfla Kona anja à abà kiya Məj Madzahaga, uwana akəf gəl anja bokuba uwana asal. Adadza à ahəj kiya uwanay anja koksikoksi.

8

Yesu kà Məj Madzahaga gami

¹ Gay uwana aduwa à vok kà aganay: Mədadzəka mapəhay: Məj Madzahaga gami uwana adadza madzay la kəslah asik la afik la ahəl kaf anja Zəzagəla lakəl la zagəla, uwana akor tatak gesina, ² masla kà Məj Madzahaga la slaka tsikaslaya, uwana la Zəzagəla la abà. Azlamadzahaga tadafahà sləray anjatà la gay lukut uwana la aku, ahəl anja azladza adfahən. Ama slaka uwana Yesu adfàh sləray anja kà la zagəla, slaka dziriga uwana Zəzagəla adfahən.

³ Azlaməj madzahaga gesina kà tabək atà à ahəj, kà atà anja mavàh tatak à Zəzagəla, nğaha bay kà atà makadaf tatak. Gay gə la uwaga, Məj Madzahaga gami akor tatak kà mavəy suwanj. ⁴ Mədzugw, mok uwana agə la ahəj la gudən la vok kà, apakà Məj Madzahaga aw. Kà uwana azlamadzahaga anja azlaməna mav tatak à Zəzagəla la ahəj, uwana takadafal tatak bokuba uwana mapəhay anja Zəzagəla agodf à azla Yahudiya. ⁵ Azlaməna mav tatak à Zəzagəla uwaga kà tadafahà sləray anjatà kà la məj gay madəv kudfa à Zəzagəla la aku. Ama gay uwaga kà maftsa vok anja gay dziriga uwana la zagəla la afik. Mok uwana Musa ahəd kà madfàh gay lukut uwatà kà Zəzagəla agodfal:

“Nə̀ez lela, nğaha həd, kadañal bokuba uwana gəpəhkala la gudən uwanay la afik.”[✧]

⁶ Kətà hadafay, mənənən kà sləray anja Yesu Kristu aduwanj sləray anja azlamadzahaga anik gesina la kaykay, makəs vok slawda uwana akəs anu vok slawda la Zəzagəla, nğaha la azladza kà, aduwanj makəs vok slawda anja uwarà, uwatà bay, kà uwana tatak uwana Zəzagəla apəhən la makəs vok slawda uwanay la abà kà, aduwanj azlatatak uwana məbəzal uwarà.

⁷ Agayja makəs vok slawda terəyaga agay delga kà, naka Zəzagəla adfàh makəs vok slawda anik aya aw. ⁸ Ama mənənən kà aslè aw, kà uwaga Zəzagəla apəhla tsakana anjatà à azladza, nğaha agodf à atà:

“Fəw sləm à abà. Zamana anik adàsà à wanj à uwana gədfàh makəs vok slawda mawga la Isərayel, nğaha à azladza tsəhay Yahuda.

⁹ Dagay mok uwana gəkəs ahəl anja azlababa anjatà madzidziga kà masəlla atà à uda la gudən Misəra la abà kà, gəkəs vok slawda la atà.

Ama makəs vok slawda mawga uwana gədəfəhən lagwa, adəgay kà bokuba makəs vok slawda uwatà aya aw.

Tawisà makəs vok slawda maviyaga ala, à uwana gədfahən.

Gay gà la uwaga à uwana, gəguwatàla à lig à gay. Gi Sufəl Zəzagəla aŋkul la uwana gəpəhay kiya uwanay.

¹⁰ Makəs vok slawda uwana gəðàfehəŋ la azladza Isərayel la zamana uwatà kà aganay:

Gəðàfa à atà mapəhay gulo à ahàl,
Gəðàtsetserah mapəhay gulo à ləv aŋatà à tsəh babay.
Gəðàgay Zəzagəla aŋatà,
Ŋgaha tadàgay azladza gulo suwaŋ.

¹¹ Dza la ahəŋ adàda à slaka azladedə aŋha kà matapatàla gay gulo matapay aya aw, Kà magod à atà kà:

Səlàw Sufəl Zəzagəla aya aw,

Kà uwana dza gesina tadəsəl gi azlabəziga bamərika azlamagolga bay.

¹² Vok adàhama à gi kà tsakana aŋatà, gəðàmatsatəŋ ala adàgay.

Gəðàfa à atà à ləv à abà aya aw.^{1*}

Kiya uwaga Sufəl Zəzagəla agod.

¹³ Uwana Zəzagəla apəh kiya uwanay kà lakəl aŋa makəs vok slawda mawga, uwaga asal magodfay kà, uwana adahəŋ teraŋa kà, apakà maviya tatak. Məsəl hadfay kà, tatak uwana adapaka maviya tatak kà, uwaga kà azlaka dza aya aw, iyaw aŋha adadəv à gay adagay.

9

Tətəvi delga kà masləkaw Zəzagəla

¹ La makəs vok slawda teraŋa la abà kà, mafàh akur à ahəŋ aŋa Zəzagəla la ahəŋ à uwana naka azladza tasləkaw masla. Agà la ahəŋ babay slaka uwana azladza taŋàl, kà masləkaway la aku. ² Azladza tadàhà gày lukut huɸ səla, mad à gày teraŋa slaka tsikaslağa, la gày uwatà la aku kà fənəs la aku, table la aku, uwana tabək kaf aŋa Zəzagəla à afik. ³ La gay gamagay aŋa gày uwatà tanəlaŋ ala la bafta kà huɸ gày uwatà kà, slaka tsikaslağa kaykay. ⁴ Tabək tatak mabək ahaf matərsin luwəluwəga à agu. Tafà sahar aŋa makəs vok slawda à agu la abatà. La sahar uwatà la abà, tatak may uwana Zəzagəla aslalah à ahəŋ la zagəla kà agàh la abà la abatà, sləm aŋha Manu. Azəwa aŋa Haruna uwana awuratət bay kà, agà la sahar uwatà la abà, ŋgaha azlaakur səla uwana Zəzagəla atsetsəral mapəhay kulo aŋha à adi babay kà agà la abà la abatà.⁵ ⁵ La sahar uwatà la afik kà, maftsa à vok aŋa azlamaliika səla la ahəŋ, uwana asa à atà kà mapəhla à azladza, kà Zəzagəla la ahəŋ la abatà, tabatàhà gogozläh à sahar uwatà à gəl, kà matsak à slaka uwana à ama takad tatak à Zəzagəla kà aŋa mamats tsakana ala. Ama asa à gi kà mapəh gay uwaga à uda lagonay la dazuwaya aw.

⁶ Mok uwana sləray adafah vok à ahəŋ gesina kà, azlaməna makad tatak tadafahàhə sləray aŋatà la gày teraŋaga la aku koksikoksi. ⁷ Huɸ gày masəla kà, say məŋ madzahaga aŋa azlaməna makad tatak à Zəzagəla, la uwana adàh à agu pəra, kəla mavay kà asik tekula pəra adàhà à agu, say la aŋiz la ahàl kà mav à Zəzagəla, kà aŋa gəl aŋha, ŋgaha kà, kà aŋa azladza babay kà mamats tsakana aŋa azladza, uwana ala tadafahəŋ gesina kà, kà uwana atà azladza asik pəra. ⁸ Masasədok Zəzagəla apəhanula, kà tətəvi uwana adala dza à slaka tsikaslağa kaykay kà adapəzl vok dadəŋ aw, uwana huɸ gày matera à lig dadəŋ. ⁹ Uwaga kà maftsa à vok, uwana apəhanula uwaga kà, asal magodfay kà azlatatak uwana adapaka vok, la uwaga la mas à waŋ aŋa Yesu uwana tavàh, ŋgaha la uwana takad à Zəzagəla kà aslala vok aŋa mag ləv aŋa azladza uwana tanəfa tətəvi uwaga sətaka aw. ¹⁰ Atapatàla kà lakəl aŋa tatak may, ŋgaha lakəl aŋa azlatatak masay, ŋgaha lakəl aŋa mapalàh tatak may, ŋgaha lakəl aŋa azlatatak masay, ŋgaha lakəl aŋa mapalàh tatak pəra. Uwaga kà azlatatak aŋa gudəŋ à vok, uwana tadza à ahəŋ kà aŋa dəŋŋa pəra, tsərəh à uwana Zəzagəla adəbədla azlatatak gesina à ahəŋ.

¹¹ Lagonay kà, ndzer Kristu kà adasa à waŋ. Masla kà Məŋ Madzahaga uwana asəlla azlamapis gay à vok à waŋ, la azlatatak delga uwana mədabəzal la ahàl aŋha. Adàh sləray aŋha la gày anik la kay, uwana dafuwa à gay azlagay lukut, uwana tadafahəŋ uwarà, ŋgaha dzəba aŋha səla aw. Uwaga maŋalayga la ahàl aŋa azladza aw, Zəzagəla la uwana aŋal la gəl aŋha, gày uwaga kà la gudəŋ uwanay la vok babay aw. ¹² Ama adàla kà aŋiz aŋa gəl aŋha à gày la ahàl, ŋgaha avà kà asik tekula pəra, la uwaga la uwana abəlla anu à uda la tsakana gami la abà aŋa tetuwa. ¹³ Dagay uwarà kà, takadəl azlabahu ŋgaha la azlakokur, takotsekwàh aŋiz à azladza, uwana azlasətaka la huma aŋa Zəzagəla aw. Takàsàh vèlik tatàläh à gay, ŋgaha masəka akəl akəlga kà tatsàh à azladza aya babay. Kiya uwaga azladza uwana tawisà mapəhay aŋa Zəzagəla ala

* 8:12 8.12 Yeremiya 31.31-34 * 9:4 9.4 2Musa 30.1-6; 3Musa 17.8-10; 5Musa 10.3-5

kà, tapakàh sətaka la huma aŋa mapəhay aŋa Zəzagəla. ¹⁴ Kayyà, baŋa kiya uwanay kà, aniz aŋa Kristu aduwanj gesina, kà uwana aniz aŋa Kristu kà d'aduwa à gay aŋa azlatatak asik, kà uwana masla adfahà tsakana aw. Masla kà avà gəl aŋha à Zəzagəla la ndzəfa aŋa Masasəfok tsidəŋa, kà anu aŋa mafàh azlatatak mawisiga uwana adala anu à mamətsay à abà aw, ama məfah sləray aŋa Zəzagəla uwana avà à anu sifa adəv à gay aw.

¹⁵ Kà uwaga à uwana apakà masla makəsa anu vok slawda la Zəzagəla. Ngaha kà azladza uwana Zəzagəla azalà atà kà, tadàbəza tatak delga uwana Zəzagəla apəh à atà à ahəŋ, kà atà tadəkoraŋ aŋa koksikoksi. Uwaga adfahàhà vok kiya uwaga kà, kà uwana Kristu aməts, la mamətsay aŋha asükw azladza à uda la tatak mawisiga aŋatà uwana la abà tafahàhəŋ la mok uwana atà la tsəh aŋa makəs vok slawda maviyaga.

¹⁶ Məsəl kà dza azuw gày, kà say dza amətsay dadəŋ, la uwana dza azuw gày aŋha. ¹⁷ Baŋa dza la sifa kà, mapəhay uwana apəh kà, mavàh tatak kà godega aŋha la ahəŋ dadəŋ aw, say baŋa adamətsay la uwana pəra. ¹⁸ Kità bay, uwana Zəzagəla adfahà makəs vok slawda maviyaga baməra ka la mawga kà, say la mats aniz à vədəh. ¹⁹ Dagay uwarà Musa apəh mapəhay aŋa Zəzagəla à azladza gesina dadəŋ. La lig la ahəŋ atsàh aniz aŋa azlavəlik, la azlabahu ngaha ahohodfa la iyaw uwana tatacfàh. Aslähàni babasl à ahàl dats babay, ngaha la sləwzi aŋa padfa tuwanj mativga kize akotsekwàh à wakità aŋa Zəzagəla, ngaha à azladza gesina babay. ²⁰ Ngaha agòd: 'Uwanay kà aniz uwana Zəzagəla akəsla vok slawda la akul. Tsizllàw à makəs vok slawda uwanay à afik', agòd à akul. ²¹ Musa akotsekwàh aniz à gày lukut babay, ngaha à azlatatak gesina uwana adfàhla sləray à Zəzagəla. ²² La mapəhay aŋa Zəzagəla la abà kà, gay məniga aŋa azlatatak kà, tagahəŋ sətaka kà la aniz, kokudfa aniz kà, Zəzagəla aməts tsakana à azladza ala aw, say baŋa aniz adanəd à vədəh.

Aniz aŋa Yesu aməts tsakana aŋa azladza ala

²³ Tetəvi uwana Musa atəpla à azladza dagay uwarà kà, agà kà bokuba maftsa vok aŋa azlatatak dziriga la zagəla pəra. Naka magəhəŋ azlatatak uwaga gesina tsidəŋa, kiya uwaga à uwana mapəhay aŋa Musa apəh. Ama baŋa kà aŋa manəfay dziriga kà, asal makəfal tatak uwana aduw aniz aŋa azlatatak, uwaga kà mavày uwana Yesu Kristu akòd, avà gəl aŋha. ²⁴ Məsəl kà masla kà ahàd à huf gày tsikaslagə uwana à agu, azladza tanjəl la ahàl aw. Uwaga kà maftsa vok aŋa slaka uwana Zəzagəla la abà pəra. Ama ahàd kà à zagəla, à slaka uwana Zəzagəla la ahəŋ, kà masla mawulla anu à tsəh la slaka Zəzagəla. ²⁵ Azlaməŋ madzahaga aŋa azla Yahudiya tadahàhà à agu à slaka tsikaslagə kaykay gə à agu, kà asik tekula kəla mavay, tadahàhà à gày la aniz la ahàl, aniz aŋa gəl aŋatà aw. Ama Kristu kà avà kà aniz aŋa gəl aŋha, masla kà avà gəl aŋha kà asik tekula, awkà asik dəŋ aw. ²⁶ Agayŋa agay kiya uwanay, awkà naka asa ngərpə məniga dagay uwana gudəŋ à lig madzəka vok. Ama asà ngərpə kà asik dəŋ aw. Asà à wanj kà asik tekula, nekwa la mok makəf gəl à ahəŋ pəra. Avà vok aŋha à Zəzagəla kà mazəb tsakana à azladza lakəl ala aŋa koksikoksi. ²⁷ Azladza gesina tamətsay kà asik tekula pəra. La lig la ahəŋ kà, kəla uwabeyuwi tada à huma Zəzagəla kà masla mafàh à atà seriya à gəl. ²⁸ Kristu kà agà kiya uwaga babay, asik tekula pəra, asòkw aniz aŋha à vədəh kà masla aŋa mazəb tsakana aŋa azladza anjvaw. Adàwula à wanj kà masəla aya. Ama la kaslā uwatà kà, adàsa à wanj kà, kà mazəb tsakana aŋa azladza aya aw, ama kà maβəl azladza uwana takud masla.

10

¹ Azlamapəhay aŋa Musa kà, tagà kà maftsa vok aŋa azlatatak delga uwana tadəsa à wanj la huma la gay pəra. Atà kà azlatatak makəf gəl à ahəŋ aw. Azlamadzahaga aŋa azlaməna mav tatak takəcfàh tatak à Zəzagəla kà kəla mavay. Azladza uwaga asà à atà maz vok à slaka Zəzagəla la tetəvi uwaga, ngaha ma la tetəvi ma uwala makəf tatak uwaga apakatàla sətaka la? ² Agayŋa tapakà sətaka kà uwana takəf tatak asik tekula kà, anaka tsakana aŋatà kà avikanj, naka takəfal tatak aya aw. ³ Ama kiya uwaga aw. Baməra ka la makəf tatak uwaga bay kà, tapəhatàla tsakana aŋatà kəla mavay. ⁴ Kà uwana aniz aŋa azlabahu la azlavəlik la azlakokur aslāla vok kà mazəb atà tsakana aŋatà lakəl ala aw.

⁵ Kà uwana mok uwana Kristu asal mas à wanj à gudəŋ à vok kà, agòd à Zəzagəla kà: "Asa à ka məkad à ka azlatatak aw, baməra ka mav à ka azlatatak aw. Ama kadfahà à gi, kà gi aŋa mawulkala.

⁶ Azlatatak uwana takəfay aŋa maβakay la uwana akəs à ka gəl aw, mats aniz à vədəh kà aŋa tsakana kà, akəs à ka gəl babay aw. Kawoyanj kà: Makəs gay aŋak pəra.

⁷ Haday gəgəf à ka: Iyay, gi la uwanay Zəzagəla, gəda à awtəy à gudəŋ à vok, kà gi madfəh uwana asa à ka, gədədəhəŋ bokuba uwana tatsetser lakəl gulo la wakità mapəhay la abà”,^{*}

agədəl. ⁸ Gay teranəgaga uwana Kristu apəh kà aganay:

“Haday, Zəzagəla gulo, asa à ka kà takəf à ka tatak kà mav à ka aw, baməraka mav à ka azlatatak anik bay aw. Asa à ka babay anja mafak à ka azlatatak aw, ŋgaha asa à ka tatsàhà à ka aniz kà mamats tsakana ala babay aya aw.”

Apəh uwanay kiya uwaga kà, kà uwana azlatatak uwaga tanəfa slaka asik anja mapəhay.

⁹ Agòd: ‘Gi la uwanay, gəda à awtəy à gudəŋ à vok, kà gi anja madfəh uwana akəs à kak à gəl.’ Uwaga apəhla ala, kà Zəzagəla akweska madz à ahəŋ maviyaga la matsàh aniz à vədah, ŋgaha abəfəla à abà la mamətsay anja Yesu Kristu. ¹⁰ Kà uwana Yesu Kristu kà, adfahà uwana akəs à Zəzagəla à gəl, avà vok anja deyday, mədəgay tsikasla la huma Zəzagəla. La azlamanəfay anik anik kà, akəs vok aya tetuwa aw.

¹¹ Azlamadzahaga anja azla Yahudiya tadafahà sləray anjətà kəla mahəŋay la slaka matsizilla koksikoksi, takədəhəhəl tatak, ama azlatatak uwaga kà aslala vok anja mazəb tsakana anja azladza aw. ¹² Ama Yesu Kristu kà, kà akəf gəl anja, uwana agà la maslay kà mazəb la tsakana anja azladza gesina anja tetuwa. Ŋgaha adzà madzay la ahəl kaf anja Zəzagəla lakəl. ¹³ Lagwa kà akuday kà kaslà uwana Zəzagəla adəbək azlaməna məzam anja à tsəh asik anja.^{*} ¹⁴ La mav gəl anja asik tekula apakà azladza anja ala dzandzanga la huma Zəzagəla, abək atà à slələf à gəl, apəkətəla sətaka anja koksikoksi.

¹⁵ Masasəfok tsikasla babay kà, apəhanula azlatatak uwaga la dazuwaya, uwaga kà dziriga, agòd kà:

¹⁶ “Sufəl Zəzagəla gami agòd kà: Makəs vok slawda, uwana mədəfəhəŋ anina kà, la mok uwatà kà gədafa mapəhay gulo à ləv anjətà à tsəh. Gədətsetser à ləv anjətà à tsəh aya babay.”^{*}

¹⁷ Ŋgaha agòd aya: ‘Gədədzugway lakəl anja tsakana anjətà à tsəh aya aw, baməraka lakəl anja azlatatak mawisiga uwana tadəhəŋ gesina.’ ¹⁸ Tsa baŋa Zəzagəla adamats tsakana anja azladza ala kà, azladza tanəkudə anja makəf tatak anik anik aya kà mazəbay mawisiga anja azladza aw.

Makəs gay Zəzagəla lela

¹⁹ Azladedə gulo, tsa baŋa kiya uwanay kà, kà mamətsay anja Yesu la makəlay anja aniz anja kà anu mənəfa tetəvi delga anja mad à slaka tsikasla, uwana Zəzagəla la abà. ²⁰ Yesu akwohà bafta uwatà ala, à uwana məpəh gay anja uwarə, apəzlla anu tetəvi la uwatà, kà mad à huf gə gə. Uwaga kà tetəvi mawga uwana məbəz sifa la ama. Bafta uwana akwohəŋ ala kà, asal magəfay kà vok anja, uwana tatətəsl à ahəf à adi. ²¹ Anu la Məŋ Madzahaga uwana af sləm à azlaməna gay Zəzagəla. ²² Kà uwaga à uwana, maf madzugway gami à Yesu à afik anja deŋdeŋ, məzà vok à slaka Zəzagəla la ləv tekula, kà uwana aniz anja Yesu Kristu adag ləv gami sətaka, ŋgaha adapal anu la iyaw tsidafaga. ²³ Zəzagəla apəh à anu, kà mav à anu tatak anik uwana apəh à ahəŋ. Məhad à huma à gay la mapəhay la dazuwaya, kà anu anja madin gəl à uwana à vok, Zəzagəla agòd: Mədzərükwəw! ²⁴ Məfà vok sləm, kà anu anja madfəh delga koksikoksi. ²⁵ Məkwekə maham gay à vok la slaka gə bokuba anja azladza anik, uwana takwesahay aw. Mədzədəhəhə vok ala kà anu, anu dafuwa à gay uwaga aya, kà uwana kasələw, kà kaslà uwana Yesu Kristu adəsa à wanj kà nekwa à dagay.

²⁶ Baŋa məsəl dziriga anja Zəzagəla nəma, masla məda à huma à gay la madfəh tsakana kà, məsəl kà, dziriga, makəf tatak anik adəgay la ahəŋ aya à uwana adəg anu sətaka la huma anja Zəzagəla aw. ²⁷ Dza uwana adəhəŋ kiya uwaga kà guba akəs, kà uwana Zəzagəla adədukwlə seriya à gəl, seriya uwaga kà adəgay kà bokuba akəl nədəh nədəhga, uwana adəbafəh azlaməna məzam anja Zəzagəla à gay. ²⁸ Kasələw kà, baŋa dza uwana awis mapəhay anja Musa ala kà, baŋa azladza səla, baŋa aw makər tatsəl yewdi à vok kà, baməraka takəf babay kà vok, ahamà à azladza kà masla aw. ²⁹ Tsa kiya uwanay la mapəhay anja Musa la abə ma, aməraka dza uwana akweska Kona anja Zəzagəla la uwana as ŋgərpa aw ay? Baŋa adakweska kà Baba, akweska aniz anja Zəzagəla uwana akəsətəla vok slawda la mapəkəŋla tsidafə babay, uwaga kà adagəfah à Masasəfok Zəzagəla uwana av mapəs gay à dza à vok, dzəfa dza uwaga kà, adəsa ŋgərpa kaykay. ³⁰ Zəzagəla la gəl anja agòd: ‘Gədəpəlay lakəl anja azladza uwana takweska gi, gədəwulla à atà ala azlatatak mawisiga anjətà uwana tadafəgəŋ à vok.’ Ndzer, məsəl kà adəfah uwana apəh. Agòd aya kà: ‘Gi Sufəl Zəzagəla, gədəfah seriya à azladza gulo à gəl.’ Apəh uwaga kà la gəl anja. ³¹ Zəzagəla uwana aga la ahəŋ anja

koksikoksi, baña aďàh seriya à dza à gël, ñgaha anëñàñ kà, azlawla aw kà, zlazlada kà aña dza uwaga.

³² Awul akul à gël, bokuba uwana agà la akul dagay uwarà, kanëñàwwàñ teraña ufaka aña Zëzagëla. Kasàw ñgërpa mënña la mok uwatà la huma aña azladza, ama kabà-sàwwàñ. ³³ La azlakaslà anik tatsëk akul magoďahay à gël, la huma azladza añuwaw. La azlakaslà anik kazlàw à ñgërpa à abà la azladza anik kiya uwanay. ³⁴ Kagàw la slaka gà la azladza uwana tagà la dañay kà Yesu. Mok uwana azladza takàsàh tatak aňkul, bà la uwaga kà karàbàw, kà uwana kasèlàw kà kadàkoraw tatak anik uwana delga aduwa tatak gesina, ñgaha uwana adàdza à ahëñ aña koksikoksi. ³⁵ Kà uwaga: Dàw à huma à gay, la maf madiñal gël à vok aňkul à Zëzagëla à afik, baña kadaw à huma à gay la madëhëñ kiya uwanay koksikoksi kà, kadàbëzaw masik aňkul mënña gà. ³⁶ Delga kà mabasinj aňkul agay la ahëñ, kà akul aña madàh uwana akès à Zëzagëla à gël, kiya uwaga la uwana kà, kadàbëzaw tatak uwana apëh à akul à ahëñ. ³⁷ Gay gà la uwaga Zëzagëla agòď:

‘Kaslà ñuv kà, dza uwana adàsa à wanj kà adàsafay aya aw.

³⁸ Dza uwana aďàh dziriga la huma gulo kà, adàdza à ahëñ la sifa aña koksikoksi à baña adiñ gi gël à vok aña tsëràh à awtày. Ama baña dza awula à lig, masla kà akès gi à gël aw.’[✧]

³⁹ Ama anu kà, anu azlamëna mawul à lig kà mazila aw, mëga kà anu azladza uwana tadinj gël à Zëzagëla à vok përa. Kiya uwaga kà mädàbëza sifa adëv à gay aw.

11

Mëfa madiñal gël à vok gami à Zëzagëla à afik

¹ Maf gël à afik, asal magoďay kà: magoďëñ à afik à tatak uwana takuday adàpaka à vok tanëñëñ la yewdi aw, tadinj gël à vok kà aga la ahëñ ndzer. ² Azladza uwana uwarà tadinj gël à Zëzagëla à vok, kà kiya uwanay à uwana takəsàl à gël.

³ La madiñ gël à Zëzagëla à vok la uwana mäsëlay kà Zëzagëla adahà gudëñ à vok la afad gay aña. Uwaga asal magoďay kà, këla tatak gesina uwana kanëñawwanj la gudëñ la vok kà, Zëzagëla adahàn uwaga la gay aña, uwana mënëñan aw.

⁴ Kà uwana Abel afà madiñ gël à Zëzagëla à vok, avàl tatak delga gà, dafuwa à gay aña Kaynu, kà uwana adiñ gël à Zëzagëla à vok. Zëzagëla anëñà masla kà bokuba dza dziriga la huma aña. Abel asèl uwaga kà Zëzagëla akès tatak uwana akèďfal. Lagwa kà, Abel adamëtsay à uwana Zëzagëla apëh à anu gay lakël aña, kà uwana adiñ gël à Zëzagëla à vok à uwana apëh à anu gay lakël aña gotënanj.

⁵ Kà uwana Henok afà madiñ gël à Zëzagëla à vok à uwana amëts aw, Zëzagëla azëb à zagëla la adi. Dza la ahëñ anëñàñ aw, Zëzagëla azëb. La wakità Zëzagëla la abà tatsësër kà: Mok uwana Zëzagëla alëg mazëb à zagëla kà, masla kà, akès à Zëzagëla à gël. ⁶ Dza la ahëñ akès à Zëzagëla à gël bokuba madiñal gël à vok aw, say məkës masla dadàn, kà uwana baña asa à anu maz vok à slaka Zëzagëla kà, say mëfa gël à masla à afik kà aga la ahëñ. Delga kà dza avàl madzugway aña babay, av masik à azladza uwana tayàh masla.

⁷ Kà uwana Nuhu afà madiñ gël aña à Zëzagëla à vok kà, atsëb slëm à gay aña, apëhal lakël aña azlatatak uwana adapaka vok. Azlatatak uwaga kà adanëñ atà la yewdi aña dadàn aw, ama akès gay aña. Adahà magol këslah iyaw, bokuba uwana agòďal: ‘Hàd à këslah iyaw à agu la azlahud’ gày aňak.’ La kità, Zëzagëla atafà atà. Apëhla ala kà madz à ahëñ aña azladza anik kà agà mawisiga, kà uwana atà kà tadinj gël à masla à vok aw. Masla la gël aña kà, Zëzagëla apakà masla ala bokuba dza dziriga kà uwana afà gël à masla à afik.

⁸ Kà uwana Abëraham adiñ gël à Zëzagëla à vok, akès gay aña à mok uwana: ‘Hàd à gudëñ anik à abà’, Zëzagëla agòďal, à uwana asàl mavàl. Ahàd à abatà bamëraka asèl slaka uwatà babay aw. ⁹ Kà uwana adiñ gël à Zëzagëla à vok lakël aña tatak uwana Zëzagëla apëhal à ahëñ kà aña mavàl, bamëraka adagay mëlökga bay, amiyaka adzà à ahëñ la gày uwana la aku tadahànj la lukut bay. Isak, Yakuba mayyi à tsëh ala aña, uwana Zëzagëla avà à atà gudëñ uwatà babay kà, tadzà à ahëñ la gày lukut la aku, bokuba masla babay. ¹⁰ Abëraham aďahànj kiya uwanay kà, kà uwana akuda, gudëñ, uwana Zëzagëla aďahànj, uwana matatukway gà lela. Masla la gël aña la uwana anëh, ñgaha aňàlàh.

¹¹ Kà madiñal gël à vok aña Abëraham à uwana, agà baba aña azlabëza gurdza gurdza. Ama mis aña Sara ayyàl bëzi zilga, amiyaka masla dëgërga, manatslaga bay. Uwaga apakà vok kà, kà uwana Abëraham asèl kà Zëzagëla aďaha fida aw. Aďaha tatak uwana

apèh à ahøj uwarà. ¹² Kà uwana masla kokufa anha kà, apakà makoz gurdza gurdza, kaslà anja mayyi bëzi adèkàn à lig, ama ayyà bëzi tekula, uwana ayyà à tsøj anuvaw bokuba azlatsetsilij uwana la zagèla, ngaha bokuba wuyyan uwana la mukwà la tsøj, uwana dza aslala vok anja matugway aw.

¹³ Azladza uwaga gesina tadij gël à Zèzagèla à vok, tsøràh à mamòtsay anjàtá. Atà kà tabèzà tatak uwana Zèzagèla apèh à ahøj aw, ama tasøl kà tatak uwaga adàpaka vok, ngaha taràb kà uwaga. Tapèh la dazuwaya, kà tagà azlamèlokga, slaka madz à ahøj anjàtá la ahøj la gudøj uwanay la vok aw. ¹⁴ Azladza uwana tapèh kiya uwanay kà, tapèhla ala la dazuwaya, kà tayàh slaka kà anjàtá. ¹⁵ Tadzùgaw lakèl anja slaka uwana tasa à uda la abà aya aw. Agayña tayàh slaka uwana tasa à uda la abà kà, naka tabèzà tetøvi mawul à abata. ¹⁶ Ama aga kiya uwaga aw. Atà tawoyà mayàh slaka uwana aduwan uwana tasàkal à ahøj la lig, bokuba magoðay kà zagèla, kà uwaga à uwana akès à Zèzagèla à gël kaykay. Gay gà la uwaga à uwana Zèzagèla azalàtála azlamèna anha la dazuwaya. Nøjàwwanj bokuba uwana adfah à atà slaka à ahøj babay tsi.

¹⁷ Zèzagèla apèh gay à Abèraham à ahøj, agòðal kà: 'Mayyi à tsøj ala anjak adàguwa à uda la Isak la abà.' Lagonay kà asàl magur Abèraham. ¹⁸ 'Kèð à gi Isak', agòðal, 'Bèzi anjak tekula gà uwaga', agòðal. Kà uwana masla adij gël à Zèzagèla à vok, azèb bëzi uwata, adàlla à makòðal. ¹⁹ Asèl kà Zèzagèla la maslay kà mawulla Isak à løy. Hafay, apakà vok kiya uwanay, Isak kà, agà bokuba mamòtsay gà, ngaha awulà à uda la mamòtsay.

²⁰ Kà uwana adij gël à Zèzagèla à vok, à uwana Isak apis gay à azlabèza anha sèla à vok, Esaw atà la Yakuba. Apèhatàla gay uwana adàbèza à atà la huma la gay.

²¹ Kà anja Yakuba kà, aga kiya uwanay babay, kà uwana masla adij gël à Zèzagèla à vok, la kaslà uwana azlamòtsay kà, apis gay à azlabèza anja Yusufu à vok sèla nna, asà à afik, atsizilla à agèla anha à gay dzawwa, azlèbà Zèzagèla.

²² Kà uwana Yusufu babay kà adij gël à Zèzagèla à vok, mok uwana azlamòtsay kà, apèh gay à azla Isørayel, agòð à atà la huma la gay, kà tadàsa à uda la gudøj Misèra la abà. Tatak uwana anaka tafèhøj la azlaaslasl anha, à mok uwana adamòtsay kà apèh à atà gay anha.

²³ Kà uwana azlababa anja Musa tadij gël à Zèzagèla à vok, mok uwana tayyi Musa kà, tahàðføj à ahøj tèla makør. Tanøjàn bay kà bëzi kà ahèðf, guba akès atà aw, tafà gël à mapèhay anja sufèl møjga anja azla Misèra uwana: 'Gøkafay', tagòð, aw. ²⁴ Mok uwana Musa adazigønay, asàl kà tazalàlla kona anja dugu anja sufèl møjga anja azla Misèra aw, kà uwana masla kà adij gël à Zèzagèla à vok. ²⁵ Akès kà mas ngørpa la azlamèna gay Zèzagèla, awkà asàl marabay la azlamèna madàh mawisiga aw, kà uwana tsøjhay marabay uwaga kà asafay aw. ²⁶ Ahikà mapèseyaw anja azladza la manof Kristu uwana Zèzagèla adàfal dzakwa à gël, kà aduwa lèmana uwana la gudøj Misèra gesina. Kiya uwaga à uwana adij gël à Zèzagèla à vok, la masik uwana naka masla aval.

²⁷ Kà uwana Musa afà madzugway anha à Zèzagèla à afik, à uwana asà à uda la gudøj Misèra. Sufèl anja Misèra apakà løy, ama guba akès aw. ²⁸ Kà uwana afà madzugway anha à Zèzagèla à afik, apèhalla ala madòvaday uwana tazalalla Paska. Agòð à azla Isørayel kà tasafàhàh aniz anja azlatatak à gamagay anjàtá, kà malika anja Zèzagèla uwana atsàlla mamòtsay à wan anja makad azlamalkwoy anjàtá aw. Kà uwana mamòtsay uwaga la ahàl kà anja makadla azlamalkwoy à gay.

²⁹ Kà uwana azla Isørayel tafà madzugway anjàtá à Zèzagèla à afik, à uwana dørøv uwana tazalalla dørøv mativga, adèzlla ala la huma anjàtá, bërta, ama azla Misèra kà, mok uwana: 'Møduw à uda suwan kà', iyaw akès atà gël à abà, tuwiz.

³⁰ Kà uwana azla Isørayel tafà madzugway anjàtá à Zèzagèla à afik à uwana tanuðhà gudøj Yeriko à abà, bokuba uwana Zèzagèla apèh à atà. Mok uwana tanuwið Yeriko à abà, mavakay mæðf, zlangam anja gudøj abàz à ahøj gesina. ³¹ Kà uwana Rahab, mis masla mazað zil gà, afà madzugway anha à Zèzagèla à afik, ngaha akès azlamèna matsèb sløm à mtaga anha, ahàðf à atà à ahøj, kà uwana mok uwana azlamèna gudøj Isørayel takàð azladza uwana takweska gay Zèzagèla kà, tasakà masla kà makòðay.

³² Mana gèslala vok anja mapèhay lakèl anja azladza anik ma? Dabaray la ahøj aw, kaslà la ahøj kà mapèh à akul lakèl anja Gideyyon, Barak, Samson, Yafet, David, Samuyel bokuba anja azlamèna mapèh à atà gay à ahàl anik anik anja Zèzagèla aw. ³³ Kà uwana tadij gël à Zèzagèla à vok, à uwana tapàh guvèl la azladza gudøj anik, ngaha tafawà atà, takør azladza la tetøvi anha, tabèzà tatak uwana Zèzagèla apèh à atà à ahøj, takàs, ngaha tatsàkàh à gay anja azlasikalaveri à ama, kà madàh à atà amik à vok aw. ³⁴ Tamàtsàhà akàl uwana ala abafèhà gømgagøm. Mok uwana asà à azladza kà makad atà la katsakar bay kà tatàf. Tagà la ndzèda anja gël anjàtá aw, ama Zèzagèla avà à atà maslay. Tapakàh azlamèna guvèl møjga, tafawà azlamèna guvèl mèlokga, azlamèna guvèl

uwatà tahòyàh atà à ahàl. ³⁵ Kà uwana azlamis tadiŋ gəl à Zəzagəla à vok babay, à uwana tanəŋjà azladza anjatà mamətsay gə, uwana tawùl à uda.

Azladza anik tasàhàh ngərpa anjuvaw. Agayŋa tadiŋ asik à gay anja Zəzagəla à gəl kà naka tasakà atà, ama takəs tetəvi anja matəfay aw. Takəs mamətsay à ngərpa à abà pəra, kà Zəzagəla anja mawulla atà à uda la mamətsay, ngaha kà atà anja maβəz sifa dafuwa à gay uwanay. ³⁶ Azladza anik kà, tatsàk atà magodəhay à gəl, ngaha taslàhàh atà ala. Tawàdàhà atà la mazakazak, tadawàh atà à danjay, tabasàhàn kiya uwaga. ³⁷ Azladza anik takəf atà la akur, azladza anik tanatsàhà atà ala denela denela, azladza anik takəf atà la katsakar. Azladza anik aya gày anjatà agàh la ahəŋ aw, tauguzàhàh kəla slaka gesina, tagàh azlaməna kudfa tadawàh kà zlap à vok. Azladza tatəbàhàh atà, ngaha tadəfa à atà mawisiga à vok. ³⁸ Tadzàh à ahəŋ la kəsaf la abà, ngaha la gudəŋ la afik, tahanàh à tsakur à agu la azlaafək uwana talàh. Azladza uwaga kà, azladza delga. Akəs vok kà atà anja madz à ahəŋ la mawisiga la abà aw.

³⁹ Azladza uwaga gesina kà, takəsà Zəzagəla à gəl, kà uwana tadiŋ gəl à masla à afik. Ama atà kà tabəzà tatak dzəba anja səla aw gə, uwana Zəzagəla apəh à azladza anja à ahəŋ, uwaga kà Yesu. ⁴⁰ Kà uwana Zəzagəla agodə à anu gesina kà, naka avà à anu tatak uwana aduwa uwanay. Masla kà asàl mahən atà ala, uwatà kokudfa anjatà pəra aw, say anu gesina gami la slaka gə.

12

Zəzagəla Baba gami

¹ Kà anjami kà, azladza uwaga gesina tahamà anu à adi, tapəhanula madiŋ gəl à Zəzagəla à vok babay, kà uwaga delga kà məkəs kà tetuwa azlatatak uwana adala à anu à gay à ahəŋ kà mad à huma à gay la azlatatak mawisiga, uwana akəs anu à ahəŋ, məhoy bokuba uwana Zəzagəla agodə à anu, kà mahoyay, məya vok aw. ² Mənəŋ à huma à slaka Yesu, kà uwana masla adəhəŋ kà anu anja maf madzugway gami à masla à afik, masla la uwana adala anu tsərah à makəf gəl à ahəŋ. Masla akəs kà makəf à ahàf à adi, ziruwì akəs kà mamətsay à ahàf à adi aw, kà uwana adzùgw lakəl anja marabay uwana Zəzagəla adàvəl. Lagonay kà adadza madzay la ahàl kaf anja Zəzagəla, akoray lakəl anja tatak gesina.

³ Mədzugw lakəl anja Yesu uwaga, kakay azladza mawisiga tapəsəw tak ma? Bokuba uwana abasà magol ngərpa uwana tadəhàllàn à vok kà, mədzugw lakəl anja kà anu anja maruw vok à ahəŋ aw, ngaha kà akul anja may vok aw. ⁴ Hadəy, akul kà, pəw slagəla la tsakana, ama dza la ahəŋ la tataka anjul adamətsay dadàn kà uwaga aw. Kità ma, kà mana karuwàw vok à ahəŋ ma? ⁵ Avika akul azlagay uwana Zəzagəla adzərədàhla akul ala ay? Azalàakulla azlabəza anja.

'Bəzi gulo, baŋa Sufəl Zəzagəla atapakla à azlangərpa kà, kazəb uwaga bokuba tatak deyday aw. Baŋa agur kà, kà kararəbɫa aw.

⁶ Zəzagəla awula matsihila kà à dza uwana awoyan. Dza uwana adapaka bəzi anja la uwana atsetsihəŋla.*

⁷ Kità kà, say kaslawwal vok mas ngərpa kà akul anja mataplà tatak ala uwaga la abà. Ngərpa uwaga apəhla ala, kà Zəzagəla adakəs akul bokuba azlabəza anja. Bəzi la ahəŋ baba anja awulalla matsihila aw tatakay? Awan, aga la ahəŋ aw. ⁸ Zəzagəla adəhəŋ kiya uwaga gesina la azlabəza anja. Kiya uwaga baŋa atàpakulla à ngərpa aw, kà kasəlaw kà akul azlabəza anja aw, akul azlabəza gəl gaw. ⁹ Tatak anik la ahəŋ aya, azlabəba gami la gudəŋ la vok tatəpanula matsihila, məkəs gay anjatà, ngaha ma sakoraka Baba gami uwana la zagəla la afik ay? Baŋa məsləkaw gay anja, adàvə à anu sifa adəv à gay aw. ¹⁰ Azlabəba gami la gudəŋ la vok kà tatəpanula kà anja kaslà ŋuv, bokuba uwana akəs à atà à gəl. Ama Baba gami uwana la zagəla kà atəpanula, kà anu maham gay à vok la tsikasla anja la abà anja koksikoksi. ¹¹ La kaslà uwana tatəpanula uwaga kà aza à anu, uwaga kà akəs anu à gəl bokuba dal tatak aw. Ama baŋa ngərpa adada à lig, azlauwana tataplà tatak la abà la abatà kà, madz à ahəŋ anjatà kà adahəfay la ləv tələmmaga.

Məkəwəka vok mahamay uwana Zəzagəla atapanula aw

¹² Tsa baŋa kità kà, biyàw ahàl anjul ala, ngaha bəyàw azlaasik guβguβga ala babay aya.* ¹³ Azladza anik la ahəŋ la tataka anjul la abà kà, azlaguβguβga, kiya uwaga kà nəfaw tetəvi tərrega, kà asik anjul anja mapiyay à tetəvi la tsəh ala aw, kà anja uwaga kanəfaw Zəzagəla lela, kà azlauwana azladeri anja mawur ala kəla.

¹⁴ Wad̄aw vok à uda ŋgaha kà lapiya aŋa madz à ahəŋ la akul la abà la azladza gesina. Wad̄aw vok à uda, akul babay, kà akul aŋa magay sətaka la huma Zəzagəla, kà uwana baŋa dza aga tsidfaŋa, awkà, adənəŋ Zəzagəla aw. ¹⁵ Dahàw haŋkəli kà dza aŋa makweska mapis gay à vok aŋa Zəzagəla aw! Dahàw haŋkəli babay kà dza la tataka aŋkul la abà aŋa magay d̄əhakak aw, aŋa kità aw kà, adala d̄əhakak à azladza anik à vok babay. ¹⁶ Dahàw haŋkəli kà dza aŋa magay mabila gə aw, kà masla aŋa makweska azlatatak delga aŋa Zəzagəla bokuba Esaw, uwana akweska magay malkwoy aŋha gesina, kà maβədlà tatak may à gay aŋa mavakay tekula. ¹⁷ Kasəlaw kà la lig aŋa uwaga la ahəŋ kà, asal kà baba aŋha akəs aw. Atuw babay, ama dabaray la ahəŋ kà maβədlà tatak uwana ad̄ahàlən à ahəŋ aya aw.

¹⁸ Səlàw, kà slaka uwana akul katsizllaw à abà la huma Zəzagəla kà, uwaga kà bokuba gudəŋ Sənyayi, kiya aŋa azla Isərayel uwana tatsəzllah à abà uwarà. Taslala vok aŋa maβəbani gudəŋ uwatà la ahàl aw. Tanaŋàhà akàl uwana ababəhàh la afik ŋadzaŋa ŋadza mələs agàh tabadamma, tanaŋàhà kular. ¹⁹ Tatsənà matsənəy aŋa mازلزliŋ ŋgaha tatsənà kuda aŋa Zəzagəla kà Zəzagəla aŋa maβad̄atàma aya aw.* ²⁰ Kà uwana tatak uwana apəh à atà kà aduwà ndzəda aŋatà. Agəɔf à atà kà: 'Baŋa dza adəbani gudəŋ uwanay amiyaka bə tatak fəta adəbani kà, kəd̄aw la matsahay la akur!' ²¹ Azlatatak uwana tanaŋəŋ la abatà ararabàh atà la kaykay. Musa la gəl aŋha agəɔf: 'Guba aza à gi, gəsukulay.'

²² Ama kà aŋkul kà kiya uwanay aw, akul kà kazàw vok à slaka gudəŋ uwaga à uwana sləm aŋha Siyon, la abatà gudəŋ aŋa Zəzagəla uwana la sifa. Tazalalla Urusalima: Gudəŋ la zagəla la afik. Azlamalika aŋuwaw tahamà gay à vok la abatà, dza aslala vok aŋa matugway aw, dəmdadəm. ²³ Akul la maham gay à vok aŋa azlabəza aŋa Zəzagəla la abà, uwana tahàb maβəvadəy, Zəzagəla adatsetser sləm aŋatà à wakitə aŋa sifa aŋa azladza à abà. Kabəzàw à huma aŋatà uwana atà dziriga la huma Zəzagəla, ŋgaha Zəzagəla masla la uwana masla seriya aŋa azladza gesina. Ŋgaha apakatàla sətaka. ²⁴ Kasàwwəŋ à slaka Yesu, kà masla la uwana Zəzagəla ad̄ahəŋ makəs vok slawda mawga la azladza aya, Akul kazàw vok à waŋ kà makotsekw akul aŋiz aŋa Yesu, uwana apakakulla sətaka. Aŋiz uwaga apəh à anu lakəl aŋa tatak uwana ad̄uwanə gesina, aŋiz aŋa uwana Abel apəh à anu.

²⁵ Tsa baŋa kiya uwanay kà: 'Dahàw haŋkəli, kakwesàwkà paŋaw aŋa Yesu aw. Zamana uwarà kà azladza takweska kà matsəb sləm à dza uwana apəhatàla mapəhay aŋa Zəzagəla la vəd̄ah. Kiya uwaga tabəzà dabaray kà matəfay la ŋgərpa la abà aw. Anu uwana mətəb sləm à kuda aŋa Yesu, uwana asà à ahəŋ la zagəla aw, baŋa məkweska kà, məd̄aslala vok aŋa matəfay la abà aw. ²⁶ Zamana uwarà kà, maβad̄ma aŋa Zəzagəla abələkàhà kutso, ama lagonay kà apəh à ahəŋ kà: 'Asik tekula aya gəd̄abədlà gudəŋ à vok la zagəla babay.' ²⁷ Gay uwaga: 'Asik tekula aya, apəhanula kà dēwdēw tatak uwana ad̄ahəŋ ad̄abəlakə vok, ŋgaha ad̄azahla, kà azlatatak uwana abəlakə vok aw aŋa madz à ahəŋ tsəràh à awtəy.'

²⁸ Kiya kà, kikay məgoɔf à Zəzagəla kà uwana avà à anu makoray uwana abəlakə vok aw. Məzləba Zəzagəla bokuba uwana akəsəl à gəl, məsləkaw, ŋgaha məhəy yewdi aŋha, ŋgaha məd̄aha sləray aŋha bokuba uwana ahəɔfəl à adi. ²⁹ Had̄ay gə kà, Zəzagəla uwana mədəval kuɔa kà masla kà bokuba akàl, uwana ababəh tatak uwana à gay, akəsà gəl aŋha aw.

13

Maday uwana akəs à Zəzagəla à gəl

¹ Akul uwana akul azladeda la Kristu la abà, dāw à huma à gay la mawoy vok kà akul à akul. ² Avika akul aŋa makəs azladza anik aw, azladza anik tad̄ahəŋ kiya uwaga, takəs azlaməlok dza, ŋgaha azlaməlok dza uwaga kà azlamalika. Uwala tasəl atà aw. ³ Dzùgwəw lakəl aŋa azladza uwana la daŋay, gəw kà bokuba akul nna, la uwana kadzàw à ahəŋ gesina la slaka gə. Dzùgwəw babay lakəl aŋa azladza uwana tasà atà ŋgərpa, bokuba uwana kasàw ŋgərpa la slaka gə akul nna.

⁴ Kasaw gay lakəl aŋa mis la zil aŋha. Kak mis kazaβ zil aw. Kak zil kad̄aha à gəl gaw babay aw. Səlàw kà Zəzagəla ad̄ad̄ah seriya à azladza uwana à gəl, tad̄fehəŋ kiya uwaga, ŋgaha ad̄ad̄ah seriya à azladza mabilaga à gəl gesina.

⁵ Kawoyaw sili pəra aw. Delga kà tatak uwana kakoray asla akul, karabawwal la kəl, kà uwana Zəzagəla: 'Kad̄avika gi aw, gəd̄aməlkala d̄ikid̄iki aw.' ⁶ Gay gə la uwaga, kəla uwabeyuwī awaf vok à uda, kà kəla dza anik gami aŋa magəɔfay kà: 'Sufəl masla kà uwana azlaka gi,

* 12:19 12.19 2Musa 19.16-22; 5Musa 5.22-27

Guba akəs gi, kà tatak anik aya aw.

Ma dza asik adəhəŋ aya ma?''*

⁷ Dzügwəw lakəl aŋa azladza uwana tadàla akul la tetəvi aŋa Zəzagəla la tsəh. Teranə uwana tazəkulla gay Zəzagəla. Dzügwəw lakəl aŋa madz à ahəŋ aŋatà la mamətsay aŋatà uwana taməts. Diŋəw gəl à Zəzagəla à vok bokuba aŋatà uwana tadinəŋ gəl à vok. ⁸ Bokuba Yesu uwana dagay uwarə, lakana bay bə masla, masla aya adəbədla vok aw, adədza à ahəŋ uwaga aŋa tsərəh à awtəy. ⁹ Dahəw hanəkəli kà uwana azlatsəhay dza anik tapahla azlatatak anik ala gərgər. Zlahaw tadəzakulla tetəvi à adi. Tadəgodəy: 'Nəfəw azlatatak anik la azlaməpəhay anik lakəl aŋa mazuw tatak may, kà ləv ankul aŋa magay ndzəda ndzəda.' Kadətsəbaw sləm à uwana tadəpəhay aw, kà uwana uwaga kà mapəs gay vok aŋa Zəzagəla, uwana adzadzəŋ ləv aŋa azladza ala kà uwaga kà la tatak may aw. Akəs vok, kà apaka vok kiya uwanay: Azladza uwana tanəfa mapəhay kà madegolay tatak may kà, tadəbəza tatak delga gə aŋa mapəhay uwaga tetuwa aw.

¹⁰ Yesu Kristu avə vok aŋha deyday, tekedika azlaməna mav tatak à Zəzagəla aŋa aŋa Yahudiya, uwana takədəhəh tatak la gəy lukut la aku kà, mav vok aŋa Yesu uwana avə vok aŋha kà, akəs à atə vok aw. ¹¹ Kasəlaw ndzer kà, baŋa mənğa aŋa azlaməna mav tatak à Zəzagəla aŋa azla Yahudiya ats aŋiz kà aŋa mav à Zəzagəla kà, adə à gəy, kà la aŋiz la ahəl pəra, à slaka tsikasla kaykay gə, ŋgaha gəl sləb gə uwana kà tazəb à uda la huđ gudəŋ kà madla matəl gay. ¹² Yesu kà kiya uwaga babay à uwana takədəf à lig gudəŋ Urusalima à uda. Kiya uwaga asə ŋgərpa bay la ahəl la adi kà masla aŋa mazəb tsakana à azladza lakəl ala la aŋiz aŋha. ¹³ Tsa baŋa kiya uwanay zlə kà, mədza à ahəŋ bokuba aŋa Yesu uwana adza à ahəŋ zlə, məhəd à uda à slaka aŋha. Ŋgaha tapəsəw anu la slaka gə la masla. ¹⁴ Kà uwana anu la gudəŋ uwana adədza à ahəŋ aŋa koksikoksi aw. Məfə madzugway gami à gudəŋ aŋa Zəzagəla uwana à afik adədza à ahəŋ aŋa koksikoksi. ¹⁵ Kitə kà, məzləba Zəzagəla aŋa koksikoksi, kà uwana Yesu adəhəŋ kiya uwanay kà, mahabay uwana məzləbla kà apaka bokuba tatak uwana məkədəf. La dzəba gə uwanay, gay gami adəzləb sləm aŋha koksikoksi la huma azladza. ¹⁶ Dahəw delga à azladza anik, vāhəw uwana kakoraw la azladza anik. Gay uwaga kà avika akul aw, kà uwana tsəhay mavəy uwaga la uwana akəs à Zəzagəla à gəl.

¹⁷ Həyəw yewdi aŋa azlamənğa ankul, kəsəw gəl à vədəh la huma aŋatə, kà uwana tafə akul sləm, kà uwana tadəpəhay lakəl ankul la huma Zəzagəla lakəl aŋa tatak uwana tanəfla akul. Baŋa kà, kəsəw gay aŋatə, tadəfəh sləray aŋatə la marabay. Tsa baŋa kitə aw kà, tadəgay la mapak ləv gə. Baŋa atə la mapak ləv gə kà, adəkəs akul vok tetuwa aw.

¹⁸ Dəw à huma à gay la madəv kuđa à Zəzagəla kà masla aŋa mazlak anu. Məsəl kà seriya akəs anu deyday aw, məwoya madəfəhəŋ kà uwana delga koksikoksi pəra. ¹⁹ Uwana gənavə akul kaykay kà, dəvəw kuđa à Zəzagəla, kà la masla aŋa mav à gi tetəvi kà mawul à slaka ankul katskats.

Gay makədəf gəl gəl à ahəŋ

²⁰ Zəzagəla uwana av lapiya à azladza à ləv aŋatə à tsəh, awulla Yesu à uda la mamətsay, adəhəŋ bokuba mənğa aŋa masla manəŋla azlatuwan, uwana afə anu sləm. Kà uwana aməts kà aŋami, anu azlatuwan aŋha. Zəzagəla azəb aŋiz aŋha, akəsà anu la vok slawda mawga, uwana adəv à gay aw. ²¹ Tsa baŋa kitə kà, Zəzagəla avə à akul ndzəda, kà akul aŋa madəhə uwana akəsəl à gəl, kà masla aŋa madəhə sləray aŋha la anu la abə la ndzəda aŋa Yesu Kristu, kà anu aŋa mapakay bokuba uwana asal. Mazləbay aga la Yesu Kristu aŋa koksikoksi. Amen.

Ayyi makədəf gəl à ahəŋ

²² Azladeda gulo, gətsetser akul wakitə uwanay, kà madzərədəhəkulla, ŋgaha bay, gətsetser akul kà ŋv pəra. Hadəy, gəgodəf à akul, kà akul aŋa makəs azlagay uwanay à gəl ankul.

²³ Sələw kà, deda ankul Timotawus kà, aga la daŋay aya aw, tadəwal gəl adagay. Baŋa abəz gi à vok katskats kà, gədədalla à awtəy la tsəh, à mok uwana gədada à awtəy à slaka ankul.

²⁴ Dahəw 'Ayyi' gulo, à azlaməna manəŋla akul. Ŋgaha la azladza anik ankul babay. Azlaməna madinəŋ gəl à Yesu à vok la gudəŋ Italiya tadəhəkulla: 'Ayyi' babay.

²⁵ Vok mahamay aŋa Zəzagəla aga la akul gesina. Amen.

WAKITÀ UWANA YAKUBA ATSETSÈR Lettre de Jacques

Ayyi

¹ Gi Yakuba, uwana gi mayà anja Zəzagəla, la Sufəl Yesu Kristu, la uwana gətsetser wakità uwanay la ahəl gulo: “Ayyi”, gəgəf à akul, akul azladza tsəhay anja Zəzagəla uwana kasləhaw gəl à ahəŋ gesina.

Zəzagəla atapla matsihila anja à azladza

uwana tafa gəl à masla à afik

² Azlabəza gay ləv gulo, baŋa azlamaguray anik anik taβəza à akul kà, rabàw kaykay. ³ Kà uwana kasəlaw lela, kà baŋa tagur madiŋal gəl à vok anikul, ŋgaha atsizilla à afik lela kà, madiŋal gəl à vok anikul adàvə mabasiŋ. ⁴ Tsižllàw à ahəŋ lela kà mabasiŋ anikul anja mapəhla vok ala tsərah à makəf gəl à ahəŋ, kà akul anja mapak sətaka anja tetuwa, ŋgaha ləv anikul anja magay kokuđa mawisiga. ⁵ Baŋa dza uwana matsihila anja la ahəŋ aw kà, anava à Zəzagəla uwana avəhahay la ləv tekula, uwala akwesla à dza aw. Ndzər kà, av matsihila à dza, uwana anaval kokuđa masləhal à vok. ⁶ Ama baŋa dza anava tatak anik la slaka Zəzagəla kà adiŋal gəl à vok ndzər, kà Zəzagəla avəl, kokuđa maβək gəl à ahəŋ səla. Kà uwana dza uwana aβək gəl à ahəŋ səla kà, bokuba magan̄tsay anja iyaw, uwana afađ aβələkəŋ la dərəv la afik. ⁷ Kà anja tsəhay dza uwaga adzugw kà: “Gedəbeza tatak la slaka Zəzagəla”, aɡođ aw. ⁸ Kà à uwana aβək gəl à ahəŋ səla, anəfa tetəvi anja.

Gay lakəl anja ləmana la kuđa

⁹ Dza kuđa gə uwana anəfa Yesu Kristu, uwana tafa à matugway à abà aw kà arab, kà uwana Zəzagəla atugw à makoray anja à abà. ¹⁰ Ama dza uwana galepi gə, aɡa la matugway uwana la abà, masla bay kà arab kà uwana. Zəzagəla apəhla ala kà ləmana anja kà uwana asafay aw. Ŋgaha amətsay la vərđi anik, bokuba azlamawuratatay uwana tanisay. ¹¹ Afats avəđay la ndzəđa, ŋgaha aɡul azlakəsaf ala. Azlamawuratatay tanisla, mahəđay anjatà adəv à gay. Dza galepi gə adəmətsay bokuba azladza anik gesina la sləray anja la abà bay suwan.✧

Gay lakəl anja azlamatərebəy

¹² Marabay aɡay la dza uwana abasa azlamaguray uwaga lela gesina, adəβəza sifa adəv à gay aw, uwana Zəzagəla apəh à ahəŋ kà anja azlauwana tawoya masla. ¹³ Dza atəf à mapapatay à abà kà, adzug kà: “Zəzagəla la uwana apapat gi”, aɡođ aw, kà uwana dza aslala vok mavavar Zəzagəla kà mađəh mawisiga aw, ŋgaha bay Zəzagəla apapat dza bay aya aw. ¹⁴ Madzugway mawisiga uwana la ləv anja dza la tsəh, la uwana ađək dza à mađəh mawisiga à abà. ¹⁵ Azlatatak mawisiga uwana adzugway la ləv anja la tsəh kà, la huma la gay ŋv kà, ađehəŋ la dazuwaya. Mok uwana tsakana uwaga adanjazila kà ayyi mamətsay.

¹⁶ Azlabəza gay ləv gulo, dza avavar akul aw. ¹⁷ Azlatatak dziriga gə kà, tatsa à ahəŋ la slaka Zəzagəla Baba gami, uwana ađahà uwaga gesina la zagəla la afik. Azlatatak dzəβa anja səla aw gə kà, uwaga tatsa à ahəŋ la slaka Zəzagəla Baba, uwana ađahà afats, təla la azlatsetsiliŋ. Maβəđla vok la ahəŋ aw. Aday bokuba afats uwana aday kà maβəđla vəf à waŋ la afats aw. ¹⁸ Avà anu sifa kà la gay anja dziriga gə. Gesina ađaha uwaga la mawoyəŋ anja, kà anu anja magay azlateranja la azlatatak uwana la abà ađahàhəŋ.

Məkəs gay anja Zəzagəla lela

¹⁹ Azlabəza gay ləv gulo, dzügwàw à uwanay. Kəla kà, kəla uwabeyuwi anikul afa sləm à gay anja azladza anik, uwana tapəhay kà, tapəh katskats la zlawzlaw aw, tagəh azlaməna mapak ləv katskats babay aw. ²⁰ Kà uwana dza masla ləv gə kà, aslala vok anja mađəh tatak uwana akəs à Zəzagəla à gəl aw. ²¹ Tsəhay gə uwaga kà, sàw à uda la abà, kađahaw tsakana aya aw, məsləkaw Zəzagəla ŋgaha məfa sləm à gay uwana afa à ləv gami à tsəh. Gay uwaga kà la ndzəđa, kà mabiy akul à tsakana anikul la gay ala. ²² Say kađahaw tatak uwana wakità Zəzagəla apəhakulla, awkà katsəβawwal sləm pəra aw, kà uwana baŋa katsəβawwal sləm pəra la kokuđa mađehəŋ kà, kavavaraw gəl anikul. ²³ Baŋa dza atsəβ sləm à gay uwaga pəra, ŋgaha masla ađaha uwaga aw, kà masla kà adəpakay kalkal la dza uwana anəŋə huđ à adi anja la kutərum la abà,

ngaha anørøz vok anha. ²⁴ La lig manørøz huf à adi anha la ahøj, adiy anha, ngaha katskats madz à ahøj anja huf à adi anha avikanj. ²⁵ Ama kà anja dza uwana anørøz azlamapøhay anja Zøzagøla, uwana tavà à anu makor gøl kà, ngaha anøfa tetøvi anja mapøhay uwaga lela, Zøzagøla adàpìsla gay à vok kà sløray uwaga. Dza uwana atsøb sløm à azlamapøhay uwaga ngaha avikanj aw kà, akøs gay anha lela. Kità kà, Zøzagøla apìsla gay à vok la sløray uwana la abà, adefhøj gesina.

²⁶ Baña dza adzugw kà masla kà masla manøf Zøzagøla, ama baña asløh vok alàh anha aw, ngaha baña azlagay mawisiga pøra, tatsa à wanj la pañaw anha la awtày, kiya uwaga kà, avavar gøl anha, manøf Zøzagøla anha kà deyday pøra, gay anha kà kalkal la madøday afad. ²⁷ Manøfay delga uwana akøs à Zøzagøla Baba gami à gøl kà, maf sløm à azlabøza matawanj, ngaha la azlamis kuða, uwana tasa ngørpa. Ngaha dza la gøl anha asløh vok à vok anha babay, kà tatak mawisiga anja gudøj à vok uwanay anja mavavaray, ngaha madahalla mawisiga à vok aw.

2

Azladza gesina kà kalkal la huma Zøzagøla

¹ Azladede gulo tsa kadiñawwal gøl à Suføl gami Yesu Kristu à vok, kà uwana masla kà møjga, aduwa azlatatak gesina la mazløbay kà. Kità kà akul kà, kayahawani dza mayahay aw! ² Zlahaw azladza sèla tatsawanj à maham à gay à vok anjul à abà. Tekula anjata atskow à lukut delga gà à abà, la azladzede anja luwàluwà la ahàl aya. Dza anik uwanay kà kuða gà, azlamakatsekate pøra adadaw à vok. ³ La abata: 'Ayyi', kagodaw kà à masla madaw à lukut delga gà à vok, kagodawwal: "Sà anjak à abanay, dzà anjak à madzay la kursi la afik!" Ama masla kuða kà: "Tsižla à abà gè", bañaw kagodawwal, "Tsehür à makøla asik gami la abanay." ⁴ Baña kadahawwanj kiya uwanay kà, kayàhàwàni dza mayahay aw takay? Kay kaziñaw vok à dza anik uwanay ala, azlatatak uwana kadzugwaw kà mawisiga. ⁵ Azlamøna gay løv gulo, fàwal sløm lela, kasølaw kà Zøzagøla atsatsamàni azlamøna kuða anja gudøj à vok uwanay, kà atà anja madinj gøl à Yesu à vok aw, takay? Ngaha kà atà anja mabøzal lømàna dziriga gà. Atsatsamàni atà, kà atà anja mabøzal makoray, uwana apøh à ahøj kà mavày azlauwana tawoya masla. ⁶ Ama akul ma, kà mana à uwana kaziñaw vok à azlamøna kuða ala ma? Azlagorobu la uwana tasàhàh tatorøbàh akul aw takay? Ngaha atà la uwana tabayàh akul à huma seriya aw, uwà? ⁷ Atà la uwana tatsàf gay à sløm anja Yesu Kristu uwana à tsøh, Zøzagøla avà à akul aw takay?

⁸ Makøs mapøhay anja makoray uwana aduwa azlaanik dèwdèw, uwana tatsetsèr à wakità Zøzagøla à abà kà, kà delga. Mapøhay uwanay agod:

'Wòyà masla magay anjak kalkal bokuba uwana kawoya gøl anjak.'⁸

Anja kiya uwaga kà, delga kadahawwanj. ⁹ Ama baña kayàhàwàni dza kà mayahay kà, kadahawwanj kà mawisiga, mapøhay adàslinjif akul, kà uwana kapøsewaw masla. ¹⁰ Amiyaka baña dza akøs mapøhay anja Zøzagøla gesina, ama apøsew kà tekula anjata pøra, dza uwaga kà adàpøseway kà gesina anha la huma anja Zøzagøla. ¹¹ Kà uwana masla uwana agod: "Kada à gøl gaw aw", agod aya babay: "Kakøf dza aw." Bamøraka kada à gøl gaw aw, kakøf dza, kà bà kakweska mapøhay anja Zøzagøla.⁸ ¹² Kà uwaga gøgod à akul, la azlatatak uwana la abà kapøhaw gesina, ngaha la azlatatak uwana la abà kadahawwanj gesina bay: Sølàw kà: Zøzagøla adàhakullanj seriya à gøl. Adàguray à baña kakøsew mapøhay uwana avà à anu makor gøl. ¹³ Baña dza la vok mahamay kà azladza anik aw, la mok seriya kà, vok adàhama à Zøzagøla kà masla babay suwanj aw. Ama baña vok ahama à ka, kà azladza anik, Zøzagøla adàdukw à ka seriya à gøl suwanj aw.

Dza uwana avà løv anha à Yesu kà, adahaha sløray babay

¹⁴ Azladede, baña dza apøhay la gay kà: "Gødiñ gøl à Zøzagøla à vok", agodfay, uwala adàh uwana: "Dahàwwànj", Zøzagøla agodf aw kà, gay anha kà akøs vok aw. Madinj gøl à vok tsøhay gà uwaga kà abøløj aw, dabaray la ahøj aw. ¹⁵ Zlahaw masla gay Zøzagøla la ahøj, uwana anøkuða anja lukut ngaha anøkuða anja tatak may babay. ¹⁶ Baña dza la ahøj la tataka anjul la abà agodf atà: "Zøzagøla apìs à akul gay à vok. Anasl akøf akul aw, may azakul aw", uwala avà à atà tatak, uwana tanøkuða anjata aw, gay anha ma akøs à atà vok takay? Awanj. ¹⁷ Madinj gøl à Zøzagøla à vok kà kalkal la uwaga babay suwanj. Baña dza agodf kà: Gødadiñ gøl à Zøzagøla à vok, ama uwala adàhàh uwana Zøzagøla anavay aw, kiya uwaga kà, madinj gøl à vok anha kà mamøtsay gà. ¹⁸ Zlahaw baña dza agodfay kà: Gødiñ gøl à Zøzagøla à vok, dza anik agodfay aya kà: Gødàhàh

sléray delga delga gà. Tatak uwana gèdàpèh à ka kà kiya uwanay: “Pèhgèla tsèhay mav lèw anjak à Zèzagèla, ngaha sléray delga gà anjak uwana kadahàhàn tsi!” Ngaha gèdàpèhkala azladal sléray gulo, kà kak anja manèhèn kà, gèwà lèw gulo à Zèzagèla kà, uwana sléray uwaga apèhla ala kà, gèwà lèw gulo à Zèzagèla. ¹⁹ Kasèl kà Zèzagèla kà tekula pèra. Delga. Amiyaka azlamazlazlay babay kà tasèl masla babay, ngaha guba akès atà kà uwaga. ²⁰ Gèl anjak kà dzanjdzan, tsèb gi slèm: Gèpèh à ka, baña kadiñ gèl à Zèzagèla à vok, ngaha kadahàh sléray delga gà aw kà, uwaga kà tatak uwana akès vok aw, deyday pèra. ²¹ Baba gami madzidziga Abèraham agà dziriga la huma Zèzagèla. Agà dziriga kà la azlatatak uwana adahàn, uwana akès bèzi anja Isak kà makèday à Zèzagèla aw uwà? ²² Lagonay kasèl kà Abèraham adin gèl à Zèzagèla à vok, ngaha adahà azlaslèray delga gà babay. La madèhèn kiya uwanay avà lèw anja à Zèzagèla anja tetuwa. ²³ Tatak uwaga kà adàbèza à wan bokuba uwana tatsetsèr à wakità Zèzagèla à abà:

'Abèraham afa madzugway anja à Zèzagèla à afik, kà uwaga à uwana Zèzagèla apakàn ala dziriga la huma anja.' ^{*}

Abèraham apakà slawda anja. ²⁴ Iyay zlà, kanèhèn aw ay? Dza aga la dziriga la huma Zèzagèla kà madegolay sléray anja uwana adahàn babay, awkà la madiñal gèl à vok pèra babay aw.

²⁵ Dzùgwàw lakèl anja Rahab, masla mazañ zil gà babay tsi, agà kiya uwaga babay. Mok uwana azlamèna matsèb slèm anja azla Isèrayel tahàd à slaka anja kà, azlakà à atà, apèhatàla tetèvi anik kà atà manèfay. Kà uwana adahàn kiya uwanay la uwana, Zèzagèla agàn dziriga la huma anja. ^{*} ²⁶ Baña sifa la dza la vok aya aw kà, dza uwaga kà adàmètsay. Madiñ gèl à Zèzagèla à vok babay kà kiya uwaga. Baña sléray delga la tsèh aw, kà uwaga kà tatak uwana akès vok aw, deyday pèra.

3

Nèhàwla alàh anjul lela!

¹ Azladedà gulo. Mèsèl kà azlauwana tatapla azladedà anik tadàbèza seriya dafuwa anja azladza anik. Gay gà la uwaga kà, kawoyaw mapakahay azlamèna matapla azladza mènja aw. ² Anu mèdahàn mawisiga anjuvaw. Baña dza adàn mawisiga la mabàdma la abà aw kà, masla kà dza dziriga, masla kà aslèha vok à vok anja lela. ³ Dzùgwàw lakèl anja pèlis tsi, uwana mèfahàn zagoma à pèlis à gay kà, kà masla anja makès gay gami, ngaha kà manèf tetèvi uwana asa à anu. ⁴ Dzùgwàw babay lakèl anja mèn kèsleh iyaw. Kèsleh iyaw uwaga kà mènja gà, ama bèzi tatak ñuvga la ahèn à uwana adala, amiyaka bà afad awul atà à adi babay, kèsleh iyaw kà aday à slaka uwana asa à masla madalla. ⁵ Alàh anja azladza bay kà kiya uwaga. Adagay bèziga babay kà, atsa zlapay hazlak hazlak. Kasèlaw kà, kà bèzi akàl kà, ababèh mèlèm mènja à gay gesina, bèhbabèh. ⁶ La alàh anja dza babay kà kiya akàl. Mawisiga anja gudèn à vok uwanay kà, aga la abà, la vok gami la abà. Awis dza ala gesina, masla la uwana tatak maz sifa anja dza ala. Akàl uwaga la gèl anja, mavats vok gà la gudèn akàl la abà, uwana azàh dza ala tetuw tetuw. ⁷ Azladza takor azlatatak gesina, takor azlatatak asik, la azlatatak mahoyay la zagèla, la azlatatak maday la huf, la azlatatak uwana la iyaw la abà. ⁸ Ama azladza taslala vok anja makor alàh anjatà aw, uwaga kà bèzi tatak mawisiga, uwana dza aslala vok anja madèfàl gay à ahèn aw. Ahèn ala la magur uwana akèf dza. ⁹ Mèslèkaw Sufèl Zèzagèla Baba gami la alàh uwanay, ngaha mètsafla azladza bà la alàh uwaga aya gotènan. ^{*} ¹⁰ Gay mazlèbay la gay matsafay tatsa à wan bà la gay uwaga la awtày. Azladedà azlawla kà vok kà madèhèn kiya uwanay aw. ¹¹ Iyaw matsidayga, la iyaw zazèmzèmga atsa à uda la suwa tekula la abà aw. ¹² Azladedà, gudèn ayyi kuvu aw, matavèruk ayyi gudèn babay aw. Bay aya kà, iyaw matsidayga atsa à uda la iyaw zazèmzèmga la abà aw.

Matsihila uwana atsa à ahèn la slaka Zèzagèla

¹³ Aga la ahèn dza matsihila gà la tataka anjul la abà ay? A uwana atsèna azlatatak ay? Adahà azlatatak delga, ngaha azà gèl à vadah babay aya, uwaga apèhla ala kà, aga la matsihila. ¹⁴ Ama baña kadahaw manor à azladza anik à vok, ngaha akul la lèw sèla, ngaha kadzugwaw kà lakèl anjul pèra, kiya uwaga kà, katsaw zlapay deyday aw, ngaha kapèhaw mawisiga à dziriga à gèl bay aw. ¹⁵ Tsèhay hanjèli uwaga kà, atsa à ahèn kà la slaka Zèzagèla aw, atsa à uda kà la gudèn à vok uwanay la abà. Matsihila anja Zèzagèla aga la abà aw, uwaga asa à uda kà la ahàl anja seteni. ¹⁶ La slaka uwana azladza manor gà la ahèn kà, tadzugway kà à gèl anjatà pèra, azlatatak tada à vok la tetèvi aya aw, ngaha azlatatak mawisiga gesina tadàyyi à tsèh lakèl anja uwaga. ¹⁷ Ama

^{*} **2:21** 2.21 1Musa 22.1-14 ^{*} **2:23** 2.23 1Musa 15.6; Yesayya 41.8 ^{*} **2:25** 2.25 Josu'e 2.1-21 ^{*} **3:9** 3.9 1Musa

matsihila uwana atsà à ahøj la afik kà gørgør. Dza tsøhay matsihila uwaga kà sətaka, masla kà tølomma, adzadzaja gəl ala aw, masla vok mahamay, koksikoksi masla kà adəhøj kà azlatatak delga gə pəra. ¹⁸ Azladza uwana atà la løv tekula, la uwana tavà lapiya à azladza anik, sløray uwana tadəhən kà, adàvə mayyay delga gə, adəkəsa vok. Uwaga kà bokuba uwana taslək tatak à guf à abà ngaha tatsəđ uwana tasləka. Atà kà, azladziriga la yewdi aña Zəzagəla.

4

Azlaməna mawoy tatak aña gudəñ à vok

¹ Kà mana kapahaw gay la magazlay koksikoksi ma? Hadfay aw ay? Kagazlahaw kà, kà uwana madzugway mawisiga ankul apa slagəla la løv ankul la tsəh. ² Kakəđaw yewdi à azlatatak à abà, ama kabəzawwal aw, gay gə la uwaga à uwana akul kakađaw dza. Kakəđaw yewdi à azlatatak à abà, ama kaslawwalla vok mabəzal aw. Gay gə la uwaga à uwana, kagazlahaw la map slagəla. Kabəzawwal tatak uwana asa à akul bay aw kà, kà uwana kanawaw kà à Zəzagəla kà masla aña mav à akul aw. ³ Amiyaka baña kadəvwaw kuđa à Zəzagəla kà, masla mav akul kà kabəzawwal aw, kà uwana kadəvwaw kuđa la tetəvi aña aw. Kanawaw kà azlatatak uwana akəđ akul à adi pəra. ⁴ Ndzər, akul kagagahaw bokuba azlamis məna mazađ zil gə, uwana tadza à ahøj la slaka la abà titi aw. Bə la hadfay kà, kasəlaw kà, baña dza awoya tatak aña gudəñ à vok kà, masla kà masla məzam aña Zəzagəla. Dza uwana akəs, anəfa azlatatak aña gudəñ à vok kà, apaka masla məzam aña Zəzagəla. ⁵ Kadzugwaw kà gay uwana tatsətsər à wakitə Zəzagəla à abà kà akəs vok aw, kagəđaw aw. Tagəđ: 'Kà Zəzagəla kà mañor aña Masasəđək, uwana avà à anu.'

⁶ Dəduwa à gay uwaga aya kà apis anu gay à vok, tatsətsər à wakitə Zəzagəla abà:

'Zəzagəla akweska azlaməna zlapay, ama apis gay à azlauwana à vok atà tølomma.'

⁷ Gay gə la uwaga hōyàw yewdi aña Zəzagəla koksikoksi. Kwesəwkà seteni, ngaha adəhøj akul à ahəl. ⁸ Səw à wan, zəw vok à slaka Zəzagəla, ngaha masla adəza vok à slaka ankul babay. Akul, uwana akul azlaməna tsakana, səwla ahəl ankul à uda la tsakana la abà. Akul azladza uwana la løv səla, dēđəw mawisiga ankul la løv ala tetuwa. ⁹ Zəwəwla gəl kə tsakana ankul, bəkəw ahəl à kuđa, ngaha tsəhəw hulolo. Kakəđaslaw aw, ama tawaw. Karabaw aya aw, ama zawawla gəl. ¹⁰ Wuləwla gəl à vəđah la huma Zəzagəla, kà masla aña makəs akul à afik.

Katsəđaw vok gay à tsəh kà akul à akul aw

¹¹ Azladedə, kapəhaw mawisiga à azladza anik à vok aw, dza uwana apəh mawisiga lakəl aña masla magay aña, ngaha atsədal gay à tsəh, kiya uwaga kà, apəh mawisiga lakəl aña mapəhay aña Zəzagəla. Masla kà, atsəđ gay à mapəhay à tsəh babay. Kayyà, baña katsəđ gay à mapəhay à tsəh, kak kanəfa masla aw, katsədal gay à tsəh pəra. ¹² Dza tekula la uwana avà mapəhay à azladza, uwaga kà Zəzagəla, masla kà masla seriya. Masla kokuđa gəl aña la uwana aslala vok kà mabəl azladza, ngaha masla kokuđa gəl aña la uwana akəđay aya. Kà anjak ma: "Gi uwa?", kagəđ, à uwana katsəđ gay à masla magay anjak à tsəh uwa?

Kagaw azlaməna zlapay aw

¹³ Tsəbəw gi sləm, akul azladza uwana kagəđaw: Lakana bañaw lebəñ, mədàda à gudəñ anik mədàdza à ahøj la abatə mavay tekula, kà mədəbəza sili. ¹⁴ Akul azladza uwana kapəhaw kiya uwaga kà, kasəlaw uwana adəpaka vok lebəñ aw. Sifa ankul kà kalkal la kəsək uwana akəsalla, apəhla vok ala, ngaha la lig la ahøj kà, adəsahla aya.

¹⁵ Uwana naka kapəhaw kà: Baña asa à Zəzagəla madədza à ahøj la sifa, mədəđəhøj tatak uwanay bañaw tatak uwahə. ¹⁶ Ama baña kiya uwaga aw kà, akul azlazlapay, gay uwana kapəhaw kà, say gay zlapay. Madəhøj kiya uwaga kà delga aw, mawisiga. ¹⁷ Kitə kà, awul akul à gəl, baña dza asəl madəh delga, ngaha adəhan aw, kiya uwaga kà masla adəđəh tsakana.

5

Akul azlaməna gorobu dəhəw hañkəli

¹ Akul azlaməna gorobu tsəbəw gi sləm, kà uwana naka akul katawaw la matsəh hulolo, kà azlangərpa uwana kadəsahaw. ² Kà uwana ləmana ankul adəzinla, ngaha maməñ adəzaw lukut ankul à gay. ³ Luwəluwə ankul la gursu ankul kà, marzaw adəkəsay, ngaha marzaw adəgay bokuba sayda lakəl ankul, ngaha adəpəđay vok ankul à gay, bokuba akəl. Kahamaw ləmana à ahøj kà la makəđ gəl à ahøj gudəñ à vok.

⁴ Uwanay la uwana masak anja azlaməna sləray, uwana tapəs guf ankul, ngaha mapuw gudzi anja dziriga anja azlaməna sləray adaday à huma Zəzagəla uwana la zagəla la afik, ngaha masla uwana akoray lakəl anja tatak gesina adatsən atə. ⁵ Kadzəw à ahən la matsiday la abà la gudən à vok, kadahaw tatak uwana asà à akul. Kazùwəw lela, kagagəsəhəw dadafaktorra bokuba azlasla uwana tagagəsəh atə anja makaday. ⁶ Kaka-dəwəw seriya à azladza uwana à gəl tadfahən mawisiga aw, kakəfəw atə babay, atə kà takweskə akul aw.

Basəwwəŋ ngaha dəwəw kufə

⁷ Azladedə, kə uwaga gəgod à akul, basəwwəŋ tsərəh à kaslā uwana Sufəl gami awul à ahən. Dzùgwəw lakəl anja masla mapəs guf, akud matsəd tatak anja la mabasiŋ. Akud iyaw madzəba iyaw tsərəh à madiy anja anja iyaw. ⁸ Akul babay basəwwəŋ kiya uwaga, wəfəw ləw ala, kə uwana mawakay uwana Sufəl gami adəwula à wəŋ kə nekwa. ⁹ Azladedə gulo katsetseslaw vok gay à vok kə akul à akul aw, ngaha kə Zəzagəla anja makəs akul la seriya aw. Tsəbəwwəl sləm, masla seriya kə atsa à wəŋ, aga la gay gamagəy. ¹⁰ Azladedə gulo, dzùgwəw à azlaməna mapəh à atə gay à ahəl uwana uwarə, tapəhəh sləm anja Zəzagəla. Tapəwla azlatatak la atə la afik, bokuba uwana tasəh ngərpa, ngaha tadzə à ahən la mabasiŋ la abà. ¹¹ Məgod kə, azladza uwaga tasə à afik la ahəl, kə uwana tabasən. Katsənəwwəŋ lakəl anja Job. Kakay abasən azlatatak uwaga la mok uwana asə ngərpa ma? Akul kasəlaw babay kə Zəzagəla adfahəlla delga la lig anja mas ngərpa anja la ahən. Hafay, vok ahəmə à Zəzagəla kə azladza uwata, adfahə à atə delga. ^{*}

¹² Azladedə gulo, gay kaykayga kə aganay: Baŋa kapəhaw gay anik kə, kazuwaw mawafay aw, kazuwaw mawafay la zagəla aw, kazuwaw mawafay la gudən à vok aw kazuwaw mawafay la tatak anik aw. Baŋa kagəfawwəŋ à afik gəfəw: “Iyay”, pəra. Baŋa kagəfawwəŋ à afik aw: “Awan”, gəfəw pəra. Pəhəw kə kiya uwanay pəra, kə seriya anja Zəzagəla anja matəd à akul à gəl aw.

¹³ Dza la ahən la tataka ankul la abà as ngərpa ay? Adəw kufə à Zəzagəla. Dza la ahən la tataka ankul la abà la marabay ay? Masla azləba Zəzagəla la mahabay. ¹⁴ Dza la ahən la tataka ankul la abà la dūvats ay? Masla azala azlamasiga anja gay Zəzagəla, kə atə anja madfahəlla aməl à gəl, la sləm anja Sufəl gami Yesu. Ngaha tadəw kufə à Zəzagəla kə masla. ¹⁵ Baŋa tadinjal gəl à vok kə, madəw kufə anjətə uwana tatsizlla à afik kə, adəbəl masla dūvats, ngaha Zəzagəla adətsizlləŋ ala aya. Baŋa adafəh tsakana kə, Zəzagəla adəmətsalanəŋ ala babay. ¹⁶ Kə madegolay uwaga gəgod à akul: Pəhəw gay ləw ala kə akul à akul, ngaha kadəwəw kufə à Zəzagəla kə mawurla. Madəw kufə anja dza dziriga la huma Zəzagəla aga la ndzəfə lakəl anja azlatatak gesina. ¹⁷ Dzùgwəw à Eliya uwana uwarə tsi. Eliya kə dza bokuba anu babay, kiya uwaga dagay kaslā uwata adəw kufə à Zəzagəla tsərəh mavay makər la tenma, iyaw asùw à makoray uwata à abà aw. ¹⁸ La lig anja uwaga la ahən, adzəkə madəw kufə aya, kə iyaw anja masuway aya, kiya uwaga Zəzagəla avə iyaw aya, ngaha azlatatak tadzəkə mas à uda aya. ^{*}

¹⁹ Azladedə, baŋa dza la ahən la tataka ankul la abà az à tetəvi dziriga anja Zəzagəla la tsəh ala dogdogogga, ngaha dza anik awùlla à tetəvi à tsəh, ²⁰ sələw kə, dza uwana awùlla masla tsakana à tetəvi à tsəh kə, masla anja mas à uda la tsakana la abà kə adə-biyən à mamətsay la gay ala. Bamərakə tsakana anja mənəga, kə Zəzagəla adəmətsalanəŋ ala, hafay. ^{*}

^{*} 5:4 5.4 5Musa 24.14-15

^{*} 5:11 5.11 Job 1.21-22; 2.10; Mahabay 103.8

^{*} 5:18 5.18 1 Sufəl 18.42-45

^{*} 5:20

MATERA ANJA WAKITÀ UWANA PIYER ATSETSÈR Première Lettre de Pierre

Ayyi

¹ Gi Piyer, uwana gi masla matapla la slaka Yesu Kristu, gi gètsetser à akul wakità uwanay, akul uwana Zəzagəla atsatsəmàni akul, kà anja magay azlatsəhay anja. Gètsetser à akul, akul uwana kaslèhàw gəl à ahən, la azlakutso uwana la abà sləm anjatà: Pontiya, Galatiya, Kapadotşeya, Asəya ngaha Bitiniya. Kadzaw à ahən la abata bokuba akul azlaməlok gə. ² Iyay, dagay uwana Zəzagəla, Baba gami, apèh à ahən kà kadəgaw tsəhay anja la Masasəfok anja, apakakulla kà azlatsehay anja, kà akul anja matsəb sləm à Yesu Kristu, ngaha kà makotsekwàh akul aniz anja, kà akul mapak sətaka la huma Zəzagəla, kà Zəzagəla anja mapisakulla gay à vok, la vok mahamay anja, la lapiya anja, la madz à ahən la wurwur kaykay.

Məzləba Zəzagəla uwana abəl anu

³ Məzləba Zəzagəla Baba anja Yesu Kristu gami, kà uwana vok ahamà à Yesu kà anu. 'Ayyà', agòd à anu, kà mav à anu sifa maswga la ahəl anja Yesu Kristu. Kà uwana Zəzagəla awùlla Yesu à uda la mamətsay. Kà mawul à uda uwaga, məfa manewəhə gami à ahən, lakəl anja, mədàwulla à uda la sifa aya. ⁴ Ndzər, məsəl babay kà, kadəkora watakat delga, uwana Zəzagəla adəfehən à ahən kà anjul la zagəla, akul tsəhay anja, uwana abədlə vok aw, awis ala aw, atatuway aw. ⁵ Akul uwana kadijawwal gəl à vok kà akul la maslay anja ndzəfa anja, kà azladza gesina anja masəlay kà adabəl akul la paraka, la kaslè uwana gudəhən à vok adədəv à gay.

⁶ Iyay zlə, kà azlatatak uwana Zəzagəla adəhən kà akul katsekaw, baməraka lagonay kasaw azlanğərpa anik anik kà anja kaslè njuv pəra. ⁷ Kasəlaw kà azlamaguray, la azlanğərpa uwana kasaw, kà akul anja masəlay kà ləv uwana kavəw à Zəzagəla kà akəs vok ndzər. Azladza taguray madzərədəy anja luwəluwə la akəl la abà, tekedika madzərədəy anja adəv à gay. Kiya uwanay la madijal gəl à vok gami babay zlə, uwana aduwa luwəluwə la kaykay. Tsəhay madijal gəl à vok magurayga uwanay, adəv à akul məzləbay, la masik, la masləkaway la wuf uwana Yesu adəsa à ahən. ⁸ Baməraka kanəhəw masla dadəhən aw kà kawoyawwan. Kadijaw gəl à masla à vok kà uwaga à uwana katsekaw kaykay, matsəkay uwana aduwan uwana tapəhay la panjaw. ⁹ Kà uwana kà, gəfawwan à afik ndzər kà, kadabəlaw.

¹⁰ Azladza uwana uwarə, Zəzagəla apəh à atə gay ahəl kà mapəh à azladza, tayəhəh la manərəzay lela kà matsənəhə godega anja, uwana anaka Zəzagəla abəla à azladza. Tapəh à azladza à vok à abə dagay uwarə, lakəl anja tatak matsidəyga, uwana Zəzagəla adəhən à ahən kà anjul. ¹¹ Bokuba uwana Masasəfok Kristu agə la atə la abə, apəh à atə à vok à abə kà, Kristu adəsa ngərpa, la uwana masla anja məbəzal məzləbay. Azlaməna mapəh à atə gay ahəl uwaga tayəhə masəlay la mələ, ma uwala à uwana naka azlatatak uwanay tapaka vok, ngaha la magay la ahən anja zlə. ¹² Zəzagəla apəhatəla azlatatak uwana naka tapaka à vok la mələ anjatə aw, ama uwaga kà anjul. Lagonay, azlauwana tazəhə gay matsidəyga tapəh à akul azlatatak uwaga. Uwaga kà Masasəfok uwana Zəzagəla asləl à wan, la uwana atsə à wan la gay anjatə. Amiyaka azlaməlika tayəhəh kà masəlay godega anja azlatatak uwaga babay.

Madz à ahən sətaka uwana ahəf à Zəzagəla à adi

¹³ Kà uwaga wəfəw madzugway anjul ala, kà akul anja manəf masla la dziriga, fəhəw akur à vok anjul à lig, fəw manewəhə anjul kà à mabasən à afik, uwana adəvə akul la kaslè uwana Yesu Kristu adəwula à wan. ¹⁴ Kəsəw koksikoksi gay anja Baba anjul uwana la zagəla la afik. Uwarə, mok uwana kasəlaw gay matsidəyga aw, kanəfaw mabila anja vok anjul gesina, ama lagonay kà, kanəfaw aya aw. ¹⁵ Kiya uwaga: Dzəw à ahən la sətaka la abə, kà uwana Zəzagəla azalə akul, kà akul anja magay azlatsəhay anja, kà uwana masla kà tsikasla la tatak gesina la abə. ¹⁶ Dagay uwarə tatsətsər à wakità Zəzagəla à abə kà:

'Gəw sətaka, kà uwana gi babay kà, gi kiya uwaga.*

¹⁷ Banja kadəvaw kudfa à Zəzagəla kà kagəfəhawwal: "Baba, Baba". Tsa banja kiya uwaga kà, say kahoyaw ziruwə anja, la mahənay, uwana akul la gudəhən la vok anja

dønja. Nønàwla vok lela, kà uwana masla adàh seriya à dza kokufa mahoy à adi, say la kèla sləray anjata, uwana tadahàhàn pəra. ¹⁸ Səlāw kà Yesu Kristu apəlanula gəl à ahən la tsakalay mənğa aw takay! Kà akul anja masak manəfay anja azlababa ankul deydayga, uwana tatəpakulla. Kà magur la azlanğəra uwana kasaw kà, kà akul anja masəlay kà ləv uwana kavəw à Zəzagəla kà, akəsà vok ndzer, baməraka azladza tagur luwəluwə uwana adədəv à gay vərđi anik, kà maguray à banja delga. Kiya uwanay la madiŋal gəl à vok ankul babay zlə, uwana aduwa luwəluwə la ndzəda, la uwana apəlanula gəl à ahən. ¹⁹ Ama tsa tekeđika, apəlla akul gəl à ahən la aniz gəl anja, uwana la ndzəda mənğa mənğa. Masla Kristu apakà bokuba magadzaw uwana kokufa mawisiga, sətaka. ²⁰ La kaslə uwana aləg madəh gudən à vok, Zəzagəla akəsəni masla, ŋgaha lagonay la kaslə uwana gudən à vok adəv à gay, Zəzagəla adəfətalla à ama ala, la dazuwaya, kà masla anja maβəl akul. ²¹ Kà madegolay Yesu la uwana kafawla kà gəl à ahən la Zəzagəla la ləv ankul. Zəzagəla awulla à uda la mamətsay, ŋgaha avəl mazləbay. La kità kà, gəđaw madiŋal gəl à vok ankul à Zəzagəla à afik, ŋgaha fəw manewəŋ kà à masla à afik.

²² Kiya uwaga, akul kagaw sətaka, kà uwana kakəsəw gay Zəzagəla, ŋgaha wòyəw azladeda ankul mənə manəfay. Kiya uwaga gəgəđ à akul: “Wòyàhəw vok kà akul à akul la ləv tekula.” ²³ Akul kasələw kà kadayyaw vok mawga, la gay Zəzagəla uwana avə sifa, uwana asafay, akəđ gəl à ahən aw. La abatà kà, kapakəw azlabəza anja dza, uwana amətsay tetuwa aw, kà uwana sifa uwaga kabəzəwwal kà, la slaka dza uwana amətsay aw. ²⁴ Tatsetsər à wakitə Zəzagəla à abà:

'Azladza gesina kà atà bokuba azlakəsaf, marabay anjata gesina kà bokuba azlamawuratatay anja kəsaf; kəsaf agulla ala, mawuratetay anja asakway.

²⁵ Ama gay anja Sufəl Zəzagəla masla adəv à gay aw.*

Gay uwanay kà, gay marabən gə uwana katsənawwan.

2

Zəzagəla atsatsəmàni akul, kà akul anja magay azlaanja

¹ Tsa ndzer Zəzagəla adavà à akul sifa mawga uwanay kà, wùtsəw mawisiga ala gesina, katsəđaw gay aya aw, kagaw azlaməna magolla dza aya aw, kadəhaw à adi aya aw, kazuwaw vok anja dza aya aw. ² Pakəw bokuba azlabəza vərna, uwana tawoya awà koksikoksi la slaka azlaiyà anjata, uwaga akul babay, kà akul anja mazigənay. Kawoyaw gay Zəzagəla koksikoksi tsərah à kaslə uwana Zəzagəla adəfətala à ama ala, kà masla adəβəl akul ndzer. ³ Akul say kayahaw mad à huma à gay la mawoyəŋ, kà uwana kasələw kà Zəzagəla kà atsid.*

⁴ Zəw vok à slaka Sufəl Yesu Kristu, kà uwana av sifa à azladza, masla kà akur uwana azladza tapəsəw, tekeđika masla la uwana Zəzagəla adəfal à ahəl, kà masla la uwana akur mawad gəy gesina. ⁵ Akul babay, akul la sifa, gəw bokuba akur uwanay, kà Zəzagəla anja makəs akul kà anja maŋalla akul gəy, kà Masasədok anja anja madz à ahən la aku. La gəy uwatà la aku, kadəgaw azlaməna mav tatak à Zəzagəla, kà akul anja madəhalla sləray la ləv tekula, à uwana ahəfal à adi, kà madegolay Yesu Kristu. ⁶ Kiya uwanay tatsetsər à wakitə Zəzagəla à abà:

'Nənəwəwəŋ, gəfa akur tekula à gudən uwana sləm anja Siyon, kà anja maŋal gəy gulo, azlaakur anik tadədal à gəl. Gəyàhəni kà uwana dzəba anja səla aw, kəla dza uwana adiŋ gəl à masla à vok ziruwı, adəkəsay tetuwa aw.'

⁷ Kà akul uwana kadiŋaw gəl à masla à vok kà, masla dzəba anja səla aw, ama kà anja azladza uwana tadiŋal gəl à vok aw kà, kiya uwanay tatsetsər à wakitə Zəzagəla à abà, Zəzagəla agəđ:

'Akur uwana azlaməna maŋal gəy tapəsəw kà, adapakay akur mawad gəy gesina.'

⁸ ŋgaha agəđ aya:

'Akur uwanay la uwana atsahla matekwid à azladza, à uwana tatəđ à ahən.*

Matekwid ətsàhla atà kà la masla, kà uwana tadiŋ gəl à gay Zəzagəla à vok aw, uwana dagay uwarà Zəzagəla apàhàh kà, say apakà vok kiya uwanay. ⁹ Tekeđika, kà ankul azlatsəhay uwana Zəzagəla akəsəni akul, akul maham à ahən mənə mav tatak à Zəzagəla, akul tsəhay tsikasłaga anja. Masla atsatsəmàni à akul, kà akul anja mazin à azladza anja azlatatak mənğa, uwana la abà adəhàhàn. Masla la uwana ahəl akul à uda la mələs la abà, ŋgaha aβək akul à udəka anja à abà, uwana apəhla à akul ala, kà akul dzəba anja səla aw gə.* ¹⁰ Dagay uwarà kà, akul tsəhay anja Zəzagəla aw, ama

* 1:25 1.25 Yesayya 40.6-8 * 2:3 2.3 Mahabay 34.8 * 2:8 2.8 Mahabay 118.22; Yesayya 8.14-15; 28.16 * 2:9 2.9 2.9 Musa 19.5-6; Yesayya 43.20-21

lagonay kà kadapakaw azlaan̄ha, dagay uwarà kasèlâw vok mahamay an̄a Zəzagəla aw, ama lagonay kà, adagay mav à akul gâ.*

Madz à ahəj bokuba azlaməna sləray an̄a Zəzagəla

¹¹ Azlamanalay, səlâw kà akul azlaməlok la gudəj la vok, kà uwaga gədəv à akul kudfa: Kamkam katapaw ahəl à azlatatak mawisiga à vok, ngaha kà adiya an̄a makəs akul aw, kà uwana azlatatak uwaga adədəfəd à akul gay à ahəj an̄a madəhəj uwana ahəd à Zəzagəla à adi. ¹² Lagonay, akul la tataka azladza uwana la abà tasəl Zəzagəla aw, tsizllâw à ahəj lela la maday an̄kul la abà, amiyaka tatsəf akul gay à tsəh, ban̄a tanəna madəhəj an̄kul lela, tadəzləb Zəzagəla la kaslâ uwana adâwula à wan̄.

¹³ Kiya uwaga kanəfaw Sufəl gami Yesu Kristu, tsəbâw sləm à paŋaw an̄a azladza, uwana tanəjla akul la gudəj la vok, uwana atà la ndzəda. Høyâw yewdi an̄a azlaməj sufəl uwana takoray lakəl an̄a tatak gesina. ¹⁴ Høyâw yewdi an̄a azlaməna manəjla akul, uwana mən̄ sufəl abək atà à ahəj kà madəh seriya à azlaməna madəh mawisiga, ngaha an̄a mazləb azlaməna madəh delga. ¹⁵ Asa à Zəzagəla kà kadaw lela, kà azladza kà masəl akul, ngaha tadza à ahəj titi kà matsəd à akul gay à tsəh. ¹⁶ Gâw bokuba azladza makor gəl gâ, ama kagodaw kà akul la makor gəl la abà, kà kadahawwan̄ mawisiga la masal an̄kul aw. La kità, gâw azlamagamza an̄a Zəzagəla. ¹⁷ Kəsâw azladza gesina, wøyâw azladedə an̄kul mən̄a manəf gay Zəzagəla, guba akəs akul kà Zəzagəla, kəsâw gay an̄a mən̄ sufəl babay. Nəfâw slaka asik an̄a Yesu uwana anəfa.

Kristu apəlla à anu ala, kà anu mas ngərpa

¹⁸ Gəpəhay kà akul azlamagamza, uwana kadahaw azlasləray, kəsâw gəl à ahəj la humə azlaməngə an̄kul, høyâw guba kà an̄atà. Kasləkawaw azlauwana tasəl akul pəra aw, ama sləkâwâw azlauwana tadahakulla mawisiga à vok bay. ¹⁹ Ban̄a dza anik abas ngərpa kà madəgolay Zəzagəla, amiyaka ngərpa uwatà kà lakəl an̄a deyday kà, uwaga la uwana tatak uwana ahəd à Zəzagəla à adi. ²⁰ Iyay, ban̄a kadahaw mawisiga, ngaha tazlabâh akul, ngaha kabasawwan̄ ma, uwa adəzləb akul uwa? Ama ban̄a kadahaw delga, ngaha tasa à akul ngərpa, lakəl an̄a uwaga kabasawwan̄ kà, uwaga tatak uwana ahəd à Zəzagəla à adi. ²¹ Kà an̄a kiya uwaga à uwana Zəzagəla azàlla akul. Yesu uwana mafal dzakwa à gəl gâ, kà masla la gəl an̄ha, kà adahəj kiya uwanay kà mabəl akul. Apəhâkulla tetəvi, kà akul an̄a manəf slaka asik an̄ha. ²² Masla adahəhə mawisiga tetuwa aw, avavərə dza dikidiki aw. ²³ Iyay, amiyaka tatsakal magodahay à gəl babay kà, masla awulatàla azlamagodahay aw. Amiyaka tasəl ngərpa, masla adzūgw madəh mawisiga à azladza uwatà à vok aw. Ama masla kà avà vok an̄ha kà à Zəzagəla uwana à afik, adəh seriya la mahoy adi aw. ²⁴ Yesu Kristu la gəl an̄ha, masla azəb tsakana gami à gəl an̄ha, à mok uwana tatatəsl à ahəf à adi, kà anu an̄a magay bokuba azladza uwana tamətə kà ahəl tsakana, ama kà anu an̄a madz à ahəj la sifa, kà madəgolay dziriga. Kawürâw ala, kà uwana taslahəjla. ²⁵ Dagay uwarà kagâw bokuba azlatuwan̄ uwana tetəvi adazah atà à adi, ama lagonay kà, kadabəzaw vok aya, nəfâw masla manəjla akul, uwana afa à akul sləm, masla asal kà mawisiga adəbani akul babay aw.*

3

Madz à ahəj an̄a azlazil la azlamis

¹ Akul azlamis, høyâw yewdi an̄a azlazil an̄kul. Ban̄a kadahawwan̄ kiya uwanay, azlazil an̄kul uwana tasəl gay Zəzagəla aw, tadəbədla madz à ahəj, tadədiŋ gəl à Zəzagəla à vok kà madz à ahəj delga an̄a azlamis an̄atà. ² Tadənəhəj maday an̄kul sətaka, ngaha bay, la mawoy atà an̄kul. ³ Kayahaw bədəfə an̄a vok an̄kul aw, bokuba magoday mats gəl anik anik, kà mapəhla vok ala, ngaha bay, kakay mabək tatak bədəfə luwâluwâga à vok mi, ngaha aya kakay à maduw dzersay à vok mi. ⁴ Ama delga kà, uwaga aguwa à uda kà la ləv an̄kul la tsəh, delga kà ləv an̄kul agay mabasiŋ gâ, ngaha tələmmaga, kà uwana tsəhəy bədəfə uwana aguwa à uda la ləv, awis ala dikidiki aw, uwaga la uwana tatak uwana ahəd à Zəzagəla à adi, aduwa azlaanik gesina. ⁵ Azlamis uwana uwarà tanəfah Zəzagəla tagəh kiya uwanay, tahøyâh yewdi an̄a azlazil an̄atà ⁶ Kiya uwaga nərəzâw Sara, akəs gay an̄a zil an̄ha Abərahəm, azalâlla kà Baba, ban̄a ziruwı akəs akul aw kadahaw uwana delga gâ, akul babay kapakaw bokuba masla suwan̄.* ⁷ Akul azlazil bay, say kadzaw à ahəj la matsən vok gay la abà la azlamis an̄kul. Atà kiya akul aw, kà uwana atà kà azlagubgub. Nəŋâw atà à adi bokuba uwana kanəŋaw à vok an̄kul à adi, sifa uwaga Zəzagəla avà à akul kà deyday, ngaha avà à akul, ngaha avà atà babay la slaka gâ. Ban̄a kadahawwan̄ kiya uwanay, Zəzagəla adətsəb sləm à madəv kudfa an̄kul, tatak la ahəj adədəfal gay à ahəj aw.

* 2:10 2.10 Hosəya 2.23 * 2:25 2.25 Yesayya 53.5-9 * 3:6 3.6 1Musa 18.2

Amiyaka kadahawwanj delga kà à azlaməna madiŋal gəl à vok

tadasa ŋgərpa.

⁸ Iyay zlà, aganay gay madəvla à gay: Akul gesina dzàw à ahəŋ la ləv tekula. Vok mahamay agay la akul gesina. Wòyàw vok kà akul à akul la tetəvi aŋa Zəzagəla la ama, gàw tələmna, wòyàw vok. ⁹ Baŋa dza adəhəkulla mawisiga à vok kà kawulawla aw. Baŋa dza agòdàh à akul, kagòdahawwal aw. La abata kà: Pisàwla gay à vok, kà uwana la kaslà uwana Zəzagəla azalà akul kà magay tsəhay aŋha kà, apəh à akul à ahəŋ kà adapisakulla gay à vok. ¹⁰ La wakità aŋa Zəzagəla la abà tatsətsər kà:

'Dza uwana asal kà aŋa madz à ahəŋ la matsidəy la abà kà, say asakiya mawisiga la fida, uwana atsa à uda la ləv aŋha.

¹¹ Delga kà, azəb ahàl aŋha à uda la mawisiga la abà, ŋgaha adəh delga la mayàh tetəvi matsən vok gay la Zəzagəla, ŋgaha la azladza anik pəra.

¹² Sufəl anəŋla azlauwana tadəh delga, afa à atà sləm la matsən madəv kudə aŋatà.

Ama kà aŋa azlauwana tadəh mawisiga kà, atsəb à atà sləm tetuwa aw',^o Zəzagəla agòd. ¹³ Baŋa kayahaw madəh delga la ləv aŋkul la tsəh gesina, uwa à dza uwana adədahakulla mawisiga uwa? ¹⁴ Amiyaka kasaw ŋgərpa lakəl aŋa azlatatak delga uwana kadahawwanj lakəl aŋa uwaga kà Zəzagəla adapisakulla gay à vok, kiya uwaga ləv aval akul à gay, kà azladza uwana tadəhakulla mawisiga à vok aw. ¹⁵ La kità kà sləkàwàw Kristu la ləv tekula, masla apakà madzahaga aŋkul. Gàw nekwa koksikoksi kà akul aŋa mawulla ala lakəl aŋa à uwana anava akul gesina lakəl aŋa uwana kafàw manewəŋ aŋkul kà à masla à afik. ¹⁶ Baŋa kawulawatàla, dəhàwwəŋ kà la ləv tələmma, sləkàwàw atà babay, kadahaw mawisiga diki diki aw kà uwana baŋa azladza tatugw mawisiga lakəl aŋkul kà ziruwì, kà uwana tatsək magòdahay à delga aŋkul uwana à gəl la tetəvi aŋa Kristu la tsəh. ¹⁷ Nuləm kasaw ŋgərpa kà madəh delga, kiya uwaga la uwana Zəzagəla awoyan; uwaga la uwana aduwa à vok, kà akul kasaw ŋgərpa, à kà madəh mawisiga. ¹⁸ Yesu Kristu la gəl aŋha aməts asik tekula kà madəgolay tsakana aŋkul, adəwà sləray aŋha à gay la mamətsay aŋha. Masla, uwana dza dziriga, aməts kà aŋa azladza uwana azladziriga aw, kà masla aŋa madla anu à slaka Zəzagəla. Atà takəd masla, ama Zəzagəla awùlla à uda la sifa la Masasədok aŋha. ¹⁹ Mok uwana Zəzagəla adəhəŋ, uwanay ahàd, azàŋ à azladza uwana atà la dajay mamətsay la abà, la mezewi. ²⁰ Uwaga kà azladza uwana uwarà takweska mapəhay aŋa sufəl Zəzagəla, Zəzagəla akudà atà la mabasinj mok uwana Nuhu adəhà kəslah iyaw, ama takweska. Azladza uwana tahàd à kəslah iyaw à abà kà atà dəŋ aw, atà mtəgis pəra à uwana Zəzagəla atəfà atà kà iyaw.^o ²¹ Iyaw uwatà apakà magagazləla la batem uwana abəl akul la tsakana aŋkul la abà. Batem uwaga kà mapal vok pəra aw. Ama uwana adala anu à maham gay à vok à abà la Zəzagəla la ləv tekula, kà uwaga à uwana Sufəl Yesu Kristu awulà à uda la mamətsay. ²² ŋgaha awulà à zagəla, adadza madzay la ahàl kaf aŋa Zəzagəla. Masla akoray lakəl aŋa azlamalika, ŋgaha la azlatatak anik gesina uwana atà la ndzəda la abata.

4

Zəzagəla akoray lakəl aŋkul

¹ Nəŋàwwəŋ kà Yesu Kristu asa ŋgərpa la vok aŋha, kà uwaga à akul babay: Gàw nekwa aŋa masay ŋgərpa bokuba aŋha bay, kà uwana dza uwana as ŋgərpa la vok aŋha, adəh tsakana aya aw. ² Lagonay mədzəka la madla à huma à gay la kəla kaslà uwana kadzaw à ahəŋ la gudəŋ uwanay la vok kaslawwalla vok aŋa madəh uwana ahəd à Zəzagəla à adi, awkà azlatatak mawisiga uwana asa à ləv aŋkul aw. ³ Kaslà uwana kadazawwanjla adagay diga. Azlatatak uwana kadəhəwəŋ kà, aganay azlatatak uwana kadəhəwəŋ uwarà, kadəhəwəŋ kà uwana asa à vok aŋkul pəra: Kagəhəw azlaməna guzu, kahabəhəw azlamədəvaday kəla mavakay, kahaməhəw gay à vok kà mas guzu, kasləkəwəhəw azlamazlazlay atà uwana tawis mapəhay aŋa Zəzagəla ala ndzer. ⁴ Ama lagonay kà, kagagəməwla vok à ahàl la azladza uwana tasəl Zəzagəla aw, aw. Kà uwaga ləv adaval atà à gay, ŋgaha tatsəka à akul magòdahay à gəl. ⁵ Ama vud tekula tadətsizilla à huma aŋa Zəzagəla kà aŋa seriya. A masla kà nekwa aŋa madəh seriya à azladza uwana à gəl atà la sifa, ŋgaha azlauwana à gəl tamatsay babay. ⁶ Makəs vok aŋa uwana Kristu azàŋ gay marabəŋ kà, azlauwana la mezewi bay kà atà aŋa madz à ahəŋ la sifa bokuba Zəzagəla uwana la sifa. Kay kà, Zəzagəla adəhà à atà seriya à gəl bokuba uwana adəhəŋ à azladza la gudəŋ la vok gesina nəma.

Maday aŋa azlaməna madiŋal gəl à vok

⁷ Gudəŋ à vok kà nekwa adəv à gay. Gay gà la uwaga kəsaw gəl anjul, ŋgaha gaw nekwa kà akul anja madəv kuɗa à Zəzagəla. ⁸ Iyay, tatak mənŋa gà kà, say kawoyaw vok kà akul à akul la ləv anjul gesina, kà masal kà, aslaslad maham à ahəŋ tsakana ala.⁹ ⁹ Kiya uwaga kəsaw azladza la ahəl səla kokuɗa maŋonuzay. ¹⁰ Zəzagəla adəfahakulla delga la azladabaray anik anik. Avà maslay à kəla uwabeyuwi anjul, kà madfah azlatatak anik anik, say kəla uwabeyuwi adfah dziriga, masla azəb maslay anja Zəzagəla uwana avəl kà masla mazlakla azladza anik. ¹¹ Dza uwana la maslay kà mapəh gay anik apah azlagay uwaga à uwana asà à waŋ la slaka Zəzagəla, dza uwana la maslay kà mazlak azladza anik, azlaka atà la ndzəɗa uwana Zəzagəla avəl. Dahəwwəŋ kiya uwanay kà azladza anja mazləbəy Zəzagəla la tatak gesina la abà, kà madegolay Yesu Kristu, masla uwana la maslay la mazləbəy anja koksikoksi! Amen.

Marabay la masla madiŋal gəl à vok uwana as ŋgərpa

¹² Azladedə gulo, ləv avalla akul à gay, kà manəŋ azlamətərəbəy anik anik aw. Azlatatak uwaga abəzà à akul kà anja maguray madiŋal gəl à vok anjul, kadzugwaw kà azlatatak uwaga kà azlatatak mavalakulla à ləv à gay aw. ¹³ Kahamaw à ŋgərpa uwana à abà Kristu asà, kà uwaga kà, vəlähəw à zagəla la kaslā uwana azladza tadənəŋəŋ kà masla mənŋa la yewdi anatà, akul kadəvalahaw à zagəla la ləv anjul gesina. ¹⁴ Baŋa azladza tatsəka akul magodahay à gəl kà, kà uwana akul azlaanja Kristu, Zəzagəla adapisakulla gay à vok kà uwaga, kà uwana Masasəɗok anja Zəzagəla uwana ndzəɗa, ŋgaha aduwan gesina adza à ahəŋ la akul. ¹⁵ Baŋa dza la ahəŋ la tataka anjul aw, fəw à atà asa ŋgərpa, kà uwana adfah mawisiga baŋaw akəɗ dza, baŋaw adà à gəl anja azlatatak anik, baŋaw kamavəlah à gay anja azladza anik à abà bokuba mavdzagogor kà, dza azləbà kà uwaga aw, apakà vok kiya uwaga la akul aw. ¹⁶ Ama baŋa dza asa ŋgərpa, kà uwana masla anja Kristu, ziruwī akas kà uwaga aw. Kiya uwaga kà, 'Kikay', agod à Zəzagəla, kà uwana azladza tazalla ala kà masla dza anja Kristu.

¹⁷ Kaslā kà adaslay à uwana Zəzagəla adfah seriya à azladza à gəl. Adəfah seriya kà azlaanja à gəl dadəŋ. Kayyà, baŋa adəfəhəŋ kà azladza anja à gəl dadəŋ, ma kakay adəpaka vok la azladza uwana tatsəb sləm à gay marabəŋ aw ma? ¹⁸ Bokuba uwana tatsətsər à wakitā Zəzagəla à abà:

'Baŋa Zəzagəla adakəsəy azlaanja la seriya, atà uwana azladziriga, mana adəpaka vok la azladza mawisiga uwana tasəl Zəzagəla aw ma?'

¹⁹ Kà humà à gay uwaga, azlauwana tasa ŋgərpa kà uwana Zəzagəla awoyəŋ, kiya uwaga kà tada à huma à gay la madfah delga, ŋgaha tavà vok anjatà gesina à Zəzagəla à ahəl, masla uwana adfahà à atà, ŋgaha masla uwana dziriga.

5

Azlamasiga anja azlatuwan anja Zəzagəla

¹ Lagonay gəpəhay kà à akul azlamasiga uwana la tataka anjul la abà. Gi babay kà, gi masiga bokuba akul: Mok uwana tasà ŋgərpa à Kristu kà, gənəŋəŋ, gətəp gay gəl à ahəl à abà, məkaləŋ mazləbəy anja Kristu uwana Zəzagəla apəhanula, kà uwaga à uwana 'Kamkam', gəgod akul: ² Fəw sləm à azladza anja Zəzagəla, uwana abək à akul atà à ahəl: Dahəwwəŋ kiya uwana masla manəŋla azlatuwan af sləm à azlatuwan anja; fəw à atà sləm la ləv tekula, bokuba uwana asa à Zəzagəla. Kadfahəwwəŋ la ləv səla aw, kadfahaw sləray kà məbəzal sili pəra aw. Dahəw sləray uwaga la ləv anjul gesina. ³ Kakoraw la ndzəɗa lakəl anja azladza uwana Zəzagəla abək à akul atà à ahəl anjul aw, fəw à atà sləm. Ama kà nəfəw maday delga kà mapəhatàla maday delga. ⁴ Baŋa kadfahawwan kiya uwanay kà, la kaslā uwana mənŋ Sufəl anja azlaməna manəŋla azlatuwan adəsa à waŋ, akul, azladza uwana kaɗuwaw atà kadəbəzawwal la ahəl anja masik mənŋa gə, uwana aduwa azlatatak anik gesina, uwana akəl atsal à adi ala aw, adəɗa à ahəŋ anja koksikoksi. ⁵ Gəgod à akul azladza meɗega: Hòyàw yewdi anja azlamasiga anjul, kapakaw azlaməna zlapay aw, dfaħəw vok sləray kà akul à akul, uwaga kà bokuba uwana tatsətsər à wakitā Zəzagəla à abà:

'Zəzagəla kà apəşew azlaməna zlapay, ama adfah delga à azladza tələmmaga.'

⁶ Kà uwaga à uwana gəgod à akul: Wuləwla gəl à vəɗəh la huma anja Zəzagəla, uwana akoray lakəl anja tatak gesina, baŋa kadfahawwan kiya uwaga kà, la mok uwana kaslā adəsa à waŋ, masla adəzigən akul. ⁷ Azlatatak gesina uwana azlazlazlāɗa kà anjul kà, bəkəw atà à ahəl anja Zəzagəla, kà uwana masla afa à akul sləm. ⁸ Dzəw à ahəŋ mazil à zil, kadzewhal aw. Masla məzəm anjul, seteni kà, masla la uwaga auguzahay, ayəh dza kà makəsəy bokuba sikalaveri uwana awiyay, ayəh tatak may. ⁹ Kiya uwaga kavəwwal

tetəvi aw, dāw à huma à gay la mav ləv aṅkul à Zəzagəla. Səlàw, kà azladedə aṅkul uwana la tetəvi aṅa Zəzagəla la tsəh la gudəṅ la vok gesina tasa ṅgərpa babay bokuba aṅkul. ¹⁰ Baṅa kasaw ṅgərpa kà aṅa kaslà ṅuv kiya uwaga, Zəzagəla uwana adafahaha delga koksikoksi, masla, la gəl aṅha adafahaha akul à ahəṅ, adàvə à akul ndzəfə kà akul aṅa masakiya à tetəvi la tsəh ala aw. Azalà akul, aṅa maday à mazləbay aṅha à abà, uwana adəv à gay aw, la ahəl aṅa Kristu. ¹¹ Masla la uwana la maslay aṅa tsəràh à awtəy. Amen.

Gay makəf gəl à ahəṅ

¹² Silas azlakà gi matsetser bəzi wakità uwanay. Gəsəl kà masla dza dziriga la tetəvi aṅa Zəzagəla la ama. Gətsetser à akul kà gədzərəfəh akul à uda, ṅgaha bay aya, gəgəf à akul la paraka ndzer, mazləbay aṅa Zəzagəla kà bokuba uwana gəpəh à akul. Wādāw ləv ala la azlatatak uwaga la abà gesina. ¹³ Maham à ahəṅ məna gay Zəzagəla la abanay la Babila, uwana Zəzagəla atsatsəmàni atà, bokuba uwana atsatsəmàni akul babay, 'Ayyi', tagəf à akul. Mark uwana Kona gulo, avà à akul 'Ayyi' aṅha babay suwan. ¹⁴ Dahàw vok 'Ayyi', kà akul à akul, la mawoy vok la abà.

Zəzagəla avà à akul lapiya, à akul gesina, uwana akul la ahəl aṅa Kristu.

MASƏLA ANJA WAKITÀ UWANA PIYER ATSETSÈR Deuxième Lettre de Pierre

Ayyi

¹ Gi Səmon Piyer, gi uwana gi mayà anja Yesu Kristu, gi masla matapla la slaka anja bay, à uwana gətsətsər à akul wakità uwanay, akul uwana kadiñaw gəl à Yesu à vok kalkal bokuba uwana mədiñal gəl à vok babay, anu gesina məbəzà à tatak uwaga la slaka gə. Yesu Kristu adahà uwaga kà anjami gesina, kà uwana masla kà dziriga. Masla kà Zəzagəla la gəl anja, ngaha masla məbəl anu babay. ² Awoyən kà mapis gay à vok anja Zəzagəla agay la akul kaykay, la lapiya, kà akul anja masəlay kaykay Zəzagəla la Yesu, Sufəl gami.

Maday anja azlaməna madiñal gəl à vok

³ Yesu Kristu apəhanula Zəzagəla uwana azəlla anu, kà anu anja maham à mazləbay anja à abà, ngaha kà anu anja manəf maday anja, uwana aduwa gesina, kiya uwaga masla avà à anu ndzəda anja maslay anja, azlatatak gesina uwana anu mənəkuda anja, kà anu anja məbəzal sifa mawga, ngaha kà anu anja manəf maday uwana ahəf à Zəzagəla à adi. ⁴ La azlatsəhay tetəvi uwanay à uwana avà à anu azlatatak uwanay, uwana apəh à ahəñ uwarà kà anja mav à anu azlatatak uwana dzəba anja səla aw kà anjami. Adahən kiya uwanay kà, kà madegolay azlatatak uwanay, kà azlatatak mawisiga anja gudəñ à vok uwana akəf à adi anja mabiy akul aw, kà akul anja maf gəl à azlamadzugway anja Zəzagəla. ⁵ Lakəl anja azlatatak uwanay, gəgod akul kà: Wəfəw wok à uda! Diñaw gəl à Yesu Kristu à wok lagonay, kanəfaw maday delga! Dəw à huma la maday delga! Yəhəw kà masəl azlatatak babay! ⁶ Kà uwana kasəlaw azlatatak uwanay, dzəw à ahəñ titi babay, kà uwana kadafahaw akur à vok anjul à lig, tsizləw à ahəñ la ndzəda la azlamatərbəy la abà la mawadəh wok à uda. Nəfəw bokuba uwana ahəf à Zəzagəla à adi. ⁷ Kà madla wok kà akul à akul bokuba uwana ahəf à Zəzagəla à adi. La madz à ahəñ uwana bokuba akul la azladedə, wəyəw azladza gesina babay. ⁸ Baña kadafahaw azlatatak uwanay koksikoksi kà, masəl Yesu Kristu anjul adakəsakulla wok, ngaha maday anjul adavə mayyay lela. ⁹ Ama kà anja azladza uwana tadəh uwaga aw kà, tapakahay bokuba azlaguləf. Adavika atà à tsakana uwana tadəhəhən uwarə, Zəzagəla amətsatən ala. ¹⁰ Azladedə, tsa baña kiya uwanay kà, wəfəhəw wok à uda, kà uwana Zəzagəla azalə akul, ngaha atsatsəmənəni akul kà madəhəñ kiya uwanay. Baña kadafahawwən kiya uwanay, tetuwa tetəvi anja Zəzagəla adəvika akul aw. ¹¹ Kiya uwanay la kokudə matsigay, Zəzagəla adəpəzlla akul gamagəy, kà akul anja mad à makoray anja Sufəl gami Yesu Kristu à abà, uwana abəl anu. Makoray uwatə adədzehəñ anja koksikoksi. ¹² Kà uwaga kà, gədəwulakulla à gəl koksikoksi, tekedika kà, sələw nəma kà akul anja matsizl à ahəñ la ndzəda la azlagay dziriga uwanay la abà, katapawla. ¹³ La mok uwana gi la ahəñ la sifa dadən la gudəñ la wok, gəsəl kà dzəba anja səla aw kà gi anja mawulakulla tatak uwanay à gəl, kà akul anja madz à ahəñ la adi. ¹⁴ Gəzləmətsay à dagay, bokuba uwana Sufəl Yesu Kristu apəh à gi à vok à abà. ¹⁵ Uwana gəwad wok à uda lagwa, kà baña gədamətsay kà, kadəbəzaw à tetəvi anja mawul akul à gəl anja azlagay uwanay.

Azlawana tanəñà mazləbay anja Kristu

¹⁶ Dagay uwarə məpəh à akul mas à wan anja Yesu Kristu la maslay anja à gudəñ à vok. La məpəh à akul kiya uwanay, məpəh à akul azlagay maviyaga, uwana asəhəh à uda la madzugway anja azladza la abə aw. Ama mənəñən ndzəda anja mazləbay anja, la yewdi gami. ¹⁷ La kaslə uwana abəzà à masləkaway ngaha la mazləbay la ahəl anja Zəzagəla, məgə la abatə, mətsənən kà Zəzagəla uwana aduwan gesina la mazləbay, apəh gay uwanay:

'Uwaga kà bəzi gay ləv gulo, uwana gəwoyən kaykay',

Zəzagəla agəf. ¹⁸ La mok uwana məgə la gudəñ tsikaslağa la afik, la Sufəl gami Yesu Kristu, à uwana mətsənə azlagay uwanay, atsən à ahəñ la zagəla

¹⁹ Uwana azlaməna məpəh à atə gay à ahəl anja Zəzagəla tapəh kà, apakə wok la huma yewdi gami babay, kà uwaga mədiñ gəl à məpəhay anjatə à vok. Delga kà kadafahaw hanəkəli la məpəhay anjatə, kà uwana sayda anjatə kà, aga bokuba fənəs, uwana auday la mələs la abə. Dəw à huma à gay la matsəbal sləm, tsərəh à kaslə

mavakay uwana adàpèhla vok ala la paraka. La mavakay uwatà kà, ñuzla bebèh, uwana Kristu, adàpèhla vok ala, ñgaha kadàñjaw azlatatak gesina la paraka. ²⁰ Azlatatak uwana aduwa vok gesina, à uwana gèpèh à akul, kà gay aña azlamèna mapèh à atà gay à ahàl uwarà tapàh, ñgaha tatsetsèr à wakità Zèzagèla à abà babay, gay uwaga kà matsihila aña azladza aw. ²¹ Gay aña azlamèna mapèh à atà gay à ahàl uwaga kà matsihila aña azladza aw, Masasèfok tsikaslaga la uwana avà à atà maslay, kà atà aña mapàh panjaw aña Zèzagèla, uwana apèh à atà.

2

Gay lakèl aña azlamèna matapla fida à azladza (Yahuda 4-13)

¹ Kiya uwaga à uwana azlamèna mapèh à atà gay ahàl fida gà tasa à uda la tataka aña azla Isèrayel la abà. Kiya uwaga babay, azlamatapla fida gà tadàsah à uda la tataka aña kul la abà bay. Tadàtapla à azladza gay mazàhatàla, tadàdzedzin Sufèl masla maèbèl atà tetuwa. La madèhèh kiya uwanay kà, magol seriya adàtèf à atà à gèl katskats. ² Azladza aña uwaw tadàtèf madàh mawisiga aña. Kà uwaga à uwana azladza tadàpàh mawisiga lakèl aña dziriga aña Zèzagèla. ³ Azlamèna matapla fida à azladza uwaga, tadàkad yewdi à tatak aña azladza anik à abà, tadàpàh fida kà mavavarla akul, kà aña maèz tatak. Dagay uwarà Zèzagèla apèh à ahèh kà madàha à atà seriya à gèl. Masla seriya adàzahatàla gesina, adzèhal aw! ⁴ Amiyaka azlamalika uwana tadàhà tsakana uwarà. Tsakana aña à avikè Zèzagèla aw. Adawadàh atà à mèlès à abà la mazakazak, kà madawits atà à akàl à abà la vuf seriya. Tadàdza à ahèh la mèlès tabàdammaga la abà tsèràh à vuf uwana Zèzagèla adàdàh seriya à azladza gesina à gèl. ⁵ La kità la azladza aña uwarà babay. Zèzagèla asàk atà kiya uwanay aw, adàh à atà seriya à gèl la iyaw. Iyaw ahèl azladza à gay, la gudèh la vok gesina. Abèlàn kà Nuhu, uwana apàh dziriga aña Zèzagèla à azladza, ñgaha la azladza mèdèf uwana la huf gay aña pèra.* ⁶ Gudèh, uwana tazalalla Sodom la Gomor kà, Zèzagèla akès azladza uwana tadzà à ahèh la huf aña la seriya, abafèh atà à gay la akàl, agèf à ahèh kà say masèk à akàl akàl pèra. Kiya uwaga apèhla ala kà azladza uwana takès gay aña aw kà, adàdukwa atà seriya à gèl kiya uwaga babay suwan. ⁷ Lot kà, agà dza delga, ñgaha Zèzagèla asèlla à uda la gudèh Sodom la abà. Lèw azèh kà tatak aña azladza uwaga tadàhàhèh.* ⁸ Dza delga uwatà adzà à ahèh la tataka aña azladza mawisiga uwaga la abà, kèla mahènanay anàpàh azlatatak mawisiga uwana tadàhàhèh, atsànàhà gay mawisiga uwana tapàh, ñgaha azàhèh la lèw la tsèh mènnga, kà uwana masla kà, agà dza dziriga. ⁹ Iyay la dziriga, Sufèl Zèzagèla asèl tetèvi uwana abèlla azladza uwana tanèfà masla, la magoray uwana la abà atèrèb atà, ñgaha asèl tetèvi aña manèhla azladza mawisiga uwana adàdàha à atà seriya à gèl la vuf makèf gèl à ahèh. ¹⁰ Haday, gèpèh à akul kà, ñgèrpa uwaga kà, Zèzagèla adàvè à azladza uwana tadàhàh mawisiga à vok aña, ñgaha kà uwana takès mapèhay aña Zèzagèla aw.

Azlamèna matapla fida à azladza uwaga kà, gèpèh à akul, kà kurit yewdi agèf à atà aw, ñgaha tafa à gèl azladza babay aw, tahoy yewdi aña azlamalika uwana atà la mazlèbay aw, kiya uwaga takèfasl à atà. ¹¹ Bamèraka azlamalika uwana taduwa azlamèna matapla fida à azladza la tetuwa bay kà, tapèh à atà gay à vok la huma aña Zèzagèla aw. ¹² Azladza uwaga tadàh tatak deydayga, kà madz à ahèh aña kà bokuba azlatatak fèta, uwana takàs atà kà makaf atà. Atà tapèh gay à azlatatak deydayga uwana à vok tatsènà slèm aw. Ndzer, Zèzagèla adàzahatàla bokuba azlatatak fèta. ¹³ Zèzagèla adàvè à atà matèrèbay, bokuba uwana tatèrèbà azladza anik suwan. Asa à atà kà aña mazuw gudèh pèra, tadàh uwaga gesina la dzuwaga, amiyaka la afats. Banya tadza à ahèh la akul, ñgaha kazuwaw kà, ziruwu kà aña kul, ñgaha tarabay à banya tavavara akul. ¹⁴ Madzugway aña kà say lakèl aña azlamèna madaw gaw ala pèra, tayi vok kà madàh tsakana diki diki aw. Banya tanèh azladza uwana azlagubgubga la tetèvi aña Zèzagèla la tsèh kà, tavavar atà, ñgaha tudukw atà à tsakana à abà. Kòksikòksi takaf yewdi à tatak aña azladza à vok. Zèzagèla adàtsafàla atà, la makès atà la seriya. ¹⁵ Tasakiya à tetèvi aña Zèzagèla la tsèh ala, tanèfay kà aña gèl aña, tadèhèh kà uwana Balam kona aña Bosor adàhèh, uwana awoyà madàh mawisiga, kà azladza aña mavèl sili. ¹⁶ Haday, vèrdi anik Zèzagèla abèzal à tsèh la tsakana aña la abà. La kaslè uwatà ziwngwu uwana adàdàfma à dza didi aw, abadma bokuba dza. A masla mapèhal gay ahèl aña Zèzagèla uwatà, kà masla aña manèf azlatatak deydayga uwaga aw.* ¹⁷ Lakèl aña azlamèna matapla fida uwaga à azladza kà, atà kà tagay bokuba azlamukwà uwana

* 2:5 2.5 1Musa 6.1-7.24; 19.24

* 2:7 2.7 1Musa 19.1-16

* 2:16 2.16 4Musa 22.4-35

takakəzehay aya aw, tagahay bokuba azlahabaga uwana afaɗ adadasinjla. Zəzagəla adəfah slaka à ahəŋ kà aŋatà la mələs taɓaɗammaga la abà. ¹⁸ Tats zlapay la ndzəɗa la azlagay deydayga. La kità babay, taɓəza azladza uwana à tsəh la uwana la abà, tasəl tetəvi aŋa Zəzagəla dadəŋ aw, azlaməna matapla fida uwaga à azladza, asa à atà kà azladza tadiya à maɗàh mawisiga à abà, bokuba uwana atà taɗeəhəŋ suwaŋ. ¹⁹ Tapah à azladza à vok à abà, kà atà tadəbəz makor gəl, tekeɗfika atà la gəl aŋatà kà azlamaya aŋa tsakana, kà uwana kəla tatak uwana akor dza, uwaga kà mayà aŋa tatak uwana akoray. ²⁰ Baŋa dza asəl kà Sufəl Yesu Kristu kà masla maɓəl anu, ŋgahaa asak à azlatatak mawisiga aŋa gudəŋ à vok uwanay à tsəh ala awis dza ala, ŋgaha takor masla ayà. Haɗay, kà aŋatà kà, kaslā uwaga adəgay zlalzadā kà aŋatà, ɗaɗuwa à gay uwana uwarà. ²¹ Baŋa kiya uwaga kà, agayŋa tadza à ahəŋ aŋa masəl tetəvi delga kà ŋuləm, à kà uwana tasəl tetəvi lela ŋgaha tawullal à tsəh ala ayà, takəs mapəhay aŋa Zəzagəla ayà aw. ²² Tatak uwana adəbəz à azladza uwaga kà, apəhànula kà gay la gay la abà uwana tagoɗ kà:

'Kəda avelàh tatak may uwana à uda, azuw, ŋgaha awullal à tsəh à mavələhay aŋha aya.'

Tagoɗ aya kà:

'Tapal namzi kà masla magay kuzekaka, ama awulla à dzabay à abà.'[✧]

3

Yesu Kristu adawul à waŋ

¹ Azlaməna gay ləw gulo, aganay wakità masəla uwana gətsetser à akul. La wakità səla uwaga la abà, gətsetsər à akul kà, gawulla à akul à tsəh kà azlatatak uwana kasələw adagay kà aŋa mawulla à akul à gəl aŋa azlatatak uwaga la dziriga. ² Iyay, asa à gi kà gay uwana azlaməna mapəhàh azlagay uwana Zəzagəla apəhatàla mapəh à akul kà avika akul aw, ŋgaha bay, la mapəhay uwana Sufəl Yesu Kristu uwana abəl anu, apəh à azlaməna matapla la slaka aŋha à ahəl, aŋa azlaməna matapla uwana asləl atà à waŋ. ³ Tatak uwana asa à gi aŋa mapəh à akul kaykay kà: La kaslā uwana gudəŋ à vok adədəw à gay kà, azladza tadəpəhahlā vok ala uwana tadəfah dəwdəw mawisiga, uwana asa à atà gesina. Azladza uwaga tadəkəɗaslah akul. ⁴ Hahayyà kà, kà mana Yesu Kristu kà atsa à waŋ, bokuba uwana tapəh aw mi, tadəgoɗay? Azlababa gami madzidziga tamàts à gay, azlatatak uwana la gudəŋ la vok kà bawtawta bokuba uwana Zəzagəla aŋəl pəra. ⁵ Azladza tadəpəhay kiya uwanay, asa à atà kà matsənəŋ kà dagay uwarà Zəzagəla apəh à ahəŋ, ŋgaha kiya uwana aŋəl zagəla ŋgaha kutso. Kutso aguwa à uda kà la iyaw la abà, ŋgaha avaha à atà ala. Zəzagəla adəhà uwaga gesina la afaɗ gay aŋha.[✧] ⁶ Ama vərđi anik, la tsəhay afaɗ gay aŋa Zəzagəla uwaga, madz à ahəŋ aŋa uwarà kà akalaha à ahəŋ, iyaw azà gudəŋ à vok ala gesina.[✧] ⁷ Zəzagəla agoɗ aya babay kà, zagəla la kutso uwana mənəŋ atà lakana kà, tadza à ahəŋ tsərah à mavakay uwana akəl adəpaɗah à gay, la mavakay aŋa seriya uwatà aya kà, adəkəɗ azladza uwana takəs gay aŋha aw bay.

⁸ Azlaməna gay ləw gulo, tatak uwanay gəpəh à akul kà avika akul aw! Kà uwana la huma Zəzagəla kà mavay dəbow kà kalkal la mavakay tekula la yewdi aŋha.[✧] ⁹ Azladza aŋuwaw uwana tagoɗay kà: "Zəzagəla kà aduw à tsəh kà kaykay, kà mas à waŋ aŋa maɗàh tatak uwana apəh à ahəŋ!", tagoɗ. Ama kiya uwaga aw. Kà uwana masla kà abasakullaŋ la makud à akul la abà pəra. Asa à Zəzagəla kà kaɓəzaw tetəvi kà akul aŋa mapəh gay la ləw ala, kà uwana asal kà, dza azila bā tekula aw. Hərez kà aŋa asal, kà azladza gesina taɓəɗla vok.

¹⁰ Tekeɗfik baŋa kaslā adəslay kà, Sufəl gami Yesu Kristu adàsa à waŋ, ndzer, ama dza la ahəŋ asəl mavakay uwana adàsa à waŋ aw. Adàsa à waŋ kà bokuba masla à gəl uwana agurùh dza gurùh. La mavakay uwatà, azladza tadətəŋ magol kuda mənəga bərəm, ŋgaha zagəla adàzila tuwiz. Akəl adəbaɓəh tatak uwana à gay, la zagəla la afik gesina. Adəpaka masəh à akəl akəl, kutso la tatak uwana la huɗ aŋha gesina adədəw à gay. ¹¹ Tsa baŋa azlatatak uwanay gesina adədəw à gay gesina la kiya uwanay zlà kà, akul kà, dāw à huma à gay la maday delga la abà, dāw bokuba uwana akəs à Zəzagəla à gel la azlatatak gesina la abà. ¹² Fəw madzugway aŋkul kà à mavakay uwana à afik. Zəzagəla adəwulla à waŋ, ŋgaha ɗahàw uwana kaslawwala vok babay, kà mas à waŋ aŋa mavakay uwaga la katskats. La mavakay uwatà, akəl adəbaɓəh zagəla à gay, la azlatatak uwana la afik gesina. ¹³ Ama Zəzagəla apəh à anu à ahəŋ kà adəŋal zagəla

mawga, ngaha la kutso mawga aya. La abatà kà, azlatatak dziriga la uwana tadàdza à ahəj la abà. Uwaga kà tatak uwana məkuday lagwa pəra.*

¹⁴ Azlaməna gay ləv gulo, kà uwaga à uwana gəgod à akul bokuba uwana kakudaw mas à waŋ aŋa Sufəl kà, wàdāw vok à uda kà akul aŋa maday la lela la abà, kà uwana baŋa adāsa à waŋ kà, kadāgaw la tataka la abà kokudā mawisiga, ngaha ləv aŋa madz à ahəj la titi la abà la huma Zəzagəla. ¹⁵ Awulla à akul à gəl kà mana mi kagodāw ay? Uwana Sufəl Yesu Kristu atsa à waŋ katskats aw kà! Kà uwana asal kà akul kabəzaw tetəvi kà aŋa maḃəlay dadāŋ. Tatak uwana Pol, uwana akəs ləv gami, atsetsər à akul, atapakulla kiya uwanay babay. Atsetsər kà la matsihila, uwana Zəzagəla avàl, ¹⁶ la azlawakità aŋha la abà gesina, baŋa atsetsər kà lakəl aŋa azlatatak uwanay, kiya uwanay à uwana apəh. Azlatatak anik la ahəj la wakità uwanay la abà, uwana zlazladā kà matsənəj. Azladza uwana la matsihila aw, azlauwana tawàc ləv ala aw, uwana gay uwanay asal mapəhay kà tagola à tetəvi anik à tsəh, bokuba tabədlā azlagay anik anik la wakità Zəzagəla la abà babay. La madəhəj kiya uwaga kà, tabiy seriya aŋa Zəzagəla à gəl aŋatà.

¹⁷ Azlaməna gay ləv gulo, tatak uwanay kà kasəlaw adagay. Kà uwaga à uwana gəgod à akul kà: Dahāw haŋkəli, kà azladza uwaga takəs gay aŋa Zəzagəla aw, aŋa madukw akul, ngaha aŋa mazəḃakulla la slaka uwana katsizlāw à afik aw. ¹⁸ Kà aŋa uwaga kà: Dāw à huma la manəf Sufəl gami Yesu Kristu, masla maḃəl anu, ngaha masla aŋa mapisakulla gay à vok kaykay, ngaha aya, kà akul aŋa masəl masla kaykay aya suwan. Delga kà, azladza tazləḃ masla lagonay, ngaha aŋa tsərəh à awtāy. Amen.

* **3:13** 3.13 Yesayya 65.17; 66.22

MATERA ANJA WAKITÀ UWANA YUHANA ATSETSÈR Première Lettre de Jean

Gay anja sifa

¹ Mòtsetser à akul lakèl anja gay anja sifa, uwana agà la ahèj dagay la madzèka gudèj à vok. Mòtsənàj, mənənàj la yewdi gami, ngaha mòtsəkàl yewdi à gay, ngaha bay mədəbani la ahàl gami aya. ² La mok uwana sifa uwaga adasa à wanj à gudèj à vok, mənənàj, gay gà la uwaga məpəh à akul lakèl anja, ngaha məkəkulla sifa uwana adəv à gay aw, nekwa la slaka Zəzagəla, Baba gami, sifa uwatà apəhanula vok la paraka. ³ Tatak uwana mənənàj, ngaha la uwana mòtsənàj, mətəpakulla, kà akul anja magay tekula la maham gay à vok la abà, la Baba, ngaha la Kona anja Yesu Kristu. ⁴ Mòtsetser à akul tatak uwanay kà anu anja mavalàh à zagəla la marabay.

Zəzagəla kà masla uƒaka

⁵ Aganay uwana Yesu atəpanula, ngaha uwaga la uwana mətəpakulla babay, Zəzagəla kà uƒaka, tetuwa mələs la ahèj la masla la abà aw. ⁶ Baŋa məgəday kà mədahama gay à vok la masla, ama mada à huma à gay la madz à ahèj la mələs la abà kà, mədəfah fida la gay la abà, ngaha la sləray la abà. ⁷ Ama baŋa mədza à ahèj la uƒaka la abà, bokuba uwana Sufəl gami adza à ahèj la uƒaka la abà, anu la maham gay à vok la azladza anik, kiya uwaga kà, aniz anja Yesu, Kona anja, apalla tsakana gami gesina.

⁸ Baŋa: ‘Anu azlaməna tsakana aw’, məgəɔf kà, mədəvavar gəl gami, ngaha kà dziriga la ahèj la anu la abà aya aw. ⁹ Ama baŋa məpəhla tsakana gami à Zəzagəla, məsłala vok, məfa gəl à afik. Kà uwana adəhà sləray kà la tetəvi anja. Dziriga, adəmats tsakana gami ala, ngaha adəpalanula mawisiga gami ala gesina. ¹⁰ Baŋa: ‘Anu azlaməna tsakana aw’, mədəpaka Zəzagəla ala bokuba masla fida, gay anja azlak anu aya aw.

2

Kristu kà masla mazlak anu

¹ Azlabəza gay ləv gulo, gətsetser à akul uwanay, kà akul anja madəh tsakana aya aw. Baŋa dza anik adəh tsakana, anu la masla mazlak anu anik, uwana nekwa la slaka Baba, Yesu Kristu, masla uwana dziriga, ² azlaka anu. Takəɔf masla kà madəgolay tsakana gami. Adəhà uwaga kà anjəmi pəra aw, kà anja azladza gudèj à vok gesina, kà tsakana anjətà anja mamats ala.

³ Kiya uwaga, baŋa məkəs mapəhay anja, kiya uwaga məsəl masla la dziriga. ⁴ Dza uwana: ‘Gəsəl Zəzagəla’, agəɔf, ngaha akəs mapəhay anja aw, dza uwaga kà, masla fida, dziriga la ahèj la masla la abà aw. ⁵ Ama dza uwana afa mapəhay anja à ahèj la ləv, masla kà dza uwana la masal dziriga. Aganay masəlay uwana apəhanula maham gay à vok gami la Zəzagəla. ⁶ Dza uwana agəɔfay la dazuwaya: ‘Gi la maham gay à vok la Zəzagəla la abà’, say adza à ahèj bokuba madz à ahèj anja Yesu.

Mapəhay mawga

⁷ Azlaməna gay ləv gulo, gətsetser à akul mapəhay mawga aw, kà uwana uwanay gətsetser à akul kà mapəhay maviyaga, kabəzəwwal uwaga dagay la madzèka. Mapəhay maviyaga uwaga kà gay Zəzagəla uwana katsanəwwəj. ⁸ La azlaslaka anik gətsetsər à akul, bokuba azlamapəhay mawga dziriga anja. Apəhla ala la Kristu la abà, ngaha apəhla vok ala la akul la abà babay. La haday, mələs anja madiy anja, ngaha uƒaka dziriga anja maudfay adagay.

⁹ Dza uwana: ‘Gi la uƒaka la abà’ agəɔf, ama adzedzin deda anja bə gətənəj kà, dza uwaga kà aga la mələs la abà aya. ¹⁰ Dza uwana awoya deda anja, adza à ahèj la uƒaka la abà, masla aga la zlamtsa kà madukw dza anik à tsakana à abà aw. ¹¹ Ama dza uwana apəsew deda anja, adza à ahèj la mələs tabəɔfammaga la abà, ngaha asəl slaka uwana aday aw, adapaka guləf.

¹² Azlabəza, gətsetser à akul uwanay kà, kà uwana tsakana anjul adəmatsila. Zəzagəla adəmatsakullanj ala kà uwana Yesu avà gəl anja kà anjul. ¹³ Azlababa gətsetser à akul, kà uwana kasəlaw masla agà la ahèj dagay madzèka. Azlabəza kohana, gətsetser à akul kà uwana kafūwəw seteni.

¹⁴ Azlabəza gətsetser à akul kà kasəlaw Baba. Azlababa, gətsetser à akul kà uwana kasəlaw masla agà dagay la madzəka. Azlabəza kohana, gətsetser à akul kà uwana akul azlandzəda ndzəda, ngaha gay Zəzagəla aga la akul la ahəl, ngaha babay kà uwana kadūwaw seteni.

¹⁵ Kawoyaw gudəŋ à vok aw, kawoyaw azlatatak uwana la gudəŋ à vok la abà babay aw. Masal anja Baba Zəzagəla aga la ləv anja dza uwana la tsəh, awoya gudəŋ à vok aw. ¹⁶ Kəla tatak uwana anja gudəŋ à vok, kà madzugway mawisiga anja sləb vok, makəf yewdi à uwana à vok mənəŋəŋ kà maβəzal, magay zlapay lakəl anja uwana məkoray, azlatatak uwaga gesina kà, tatsa à waŋ kà la slaka Baba Zəzagəla aw, ama tatsa à waŋ kà la gudəŋ la vok pəra. ¹⁷ Gudəŋ à vok uwanay kà, masla la uwaga adəv à gay. Ngaha kəla tatak uwana dza adzugway la gudəŋ la vok, adədəv à gay babay suwaŋ. Ama dza uwana adəh uwana akəs à Zəzagəla à gəl kà, adədza à ahəŋ anja koksikoksi.

Masla məzam anja Kristu

¹⁸ Azlaməna gay ləv gulo, makəf gəl à ahəŋ kà adəgay nekwa nekwa. Katsənaw uwana tapəh kà: Leri masla məzam anja Kristu atsa à waŋ. Ama lagonay, anjuvaw azlaməna məzam anja Kristu tasəhəh à waŋ, haday. Uwana apəhanula kà, makəf gəl à ahəŋ kà nekwa nekwa. ¹⁹ Tetuw tetuw, azladza uwaga taga la akul la dziriga aw. Kà uwaga à uwana, tasak anu vok ala. Haday ndzer, agayŋa tagay la anu kà, naka tadza à ahəŋ la anu. Ama taga azlaanəmi kà anja gay gə pəra, gay gə la uwaga tasaka anu à ahəŋ kà uwaga anja madzəda kà bamərika tekula anəta kà, adəb à anu à vok aw.

²⁰ Kà anjul kà, kabəzəw Masasəfok Zəzagəla. Kristu adzadzəb akul à gəl, kà uwaga à uwana kasəlaw dziriga gesina. ²¹ Baŋa gətsetser à akul kà, kà uwana kasəlaw dziriga, awkà kà uwana kasəlaw dziriga aw aw, ama gətsetser à akul kità kà, kà uwana kasəlaw babay, fida atsa à waŋ la dziriga la abà, tetuwa aw.

²² Uwa à masla fida uwa? Dza uwana agofay la paraka kà: Yesu kà Kristu aw. Dza uwaga la uwana, masla məzam anja Kristu, masla akweska atə səla nna, Baba Zəzagəla atə la Kona anja. ²³ Haday, kà dza uwana akweska Kona, kà akweska Baba babay aya. Kà anja dza uwana asəl Kona kà, aga la Baba babay suwaŋ.

²⁴ Ama akul katsənaw uwaga dagay madzəka, tatak uwanay kasəkəwwal adza à ahəŋ la akul la abà. Baŋa tatak uwana katsənəwwəŋ dagay madzəka adza à ahəŋ la akul la abà, kà akul babay kadzaw à ahəŋ la Kona la abà, ngaha la Baba la abà babay suwaŋ. ²⁵ Aganay tatak uwana Kristu apəh à anu à ahəŋ, kà mav à anu sifa uwana adəv à gay aw.

²⁶ Gətsetser à akul tatak uwanay, kà lakəl anja azladza uwana tayəh mavavar akul. ²⁷ Baŋa kà anjul kà, Kristu adadzəb à akul Masasəfok tsikaslaga anja à gəl, kà Masasəfok uwaga anja madz à ahəŋ la akul la abà, akul kà manəkuda anja matapakulla tatak anja dza aw. Haday ndzer, Masasəfok Zəzagəla atapakulla azlatatak gesina. Uwana Masasəfok apahla ala kà dziriga, awkà fida aw. Gay gə la uwaga, məkəs uwana Masasəfok atapənula, uwaga asal magofay: Dzəw à ahəŋ tekula la Kristu.

²⁸ Iyay, azlabəza gay ləv gulo, dzəw à ahəŋ la Kristu la abà, kà anəmi kà məgəfaŋ à afik, ndzer baŋa adəwul à waŋ, kà ləv gami anja mahənla la ziruwil, la huma anja, la mavakay uwana adəwul à waŋ aw. ²⁹ Kasəlaw kà Kristu kà dziriga, kità babay kà, kəla dza uwana akəs, uwana akəs dziriga kà, masla kà dziriga babay suwaŋ, dza uwaga kà, masla dza anja Zəzagəla.

3

Azlabəza anja Zəzagəla

¹ Nəŋəw mawoy anu anja Baba tsi, mawoyəŋ anja aga la ahəŋ kaykay, azaləkulla azlabəza anja, ngaha uwaga kà dziriga, anu azlabəza anja Zəzagəla. Baŋa gudəŋ à vok awoya akul aw kà, kà uwana asəl Zəzagəla babay aw. ² Azlaməna gay ləv gulo, lagonay kà, anu azlabəza anja Zəzagəla adagay. Ama Zəzagəla adapəhla ala la dazuwaya dadəŋ à uwana mədəbəzal vərđi anik, aw. Ama mədəbəza uwaga la kaslə uwana Kristu adəpəhla gəl anja ala la paraka, mədəgay kiya masla, kà uwana anu mədənəŋəŋ huđ adi anja la yewdi gami. ³ Kəla dza uwana asal manəŋ Kristu, say adəhəŋ haŋkəli, kà masla anja mədəbani tsakana aw, kiya uwaga gagaw sətaka, bokuba Kristu uwana sətaka babay.

⁴ Kəla dza uwana adəhəŋ kà tatak mawisiga pəra, uwala adəh məpəhay anja Zəzagəla aw, akweska məpəhay anja Zəzagəla, kà masla anja madəh tsakana. ⁵ Ama kasəlaw kà, Yesu, Sufəl gami asə à waŋ à gudəŋ à vok, kà mazəb tsakana à azladza la kəl ala. La masla la abà kà, tsakana la ahəŋ aw. ⁶ Kəla dza uwana adza à ahəŋ kà la masla la abà

kà, adàh azlatatak mawisiga aya aw, ngaha dza uwana ada à humà à gay la madàh azlatatak mawisiga kà, adanəŋ Kristu la tetuw tetuw aw. Asəl masla dikiidiki aw.

⁷ Azlabəza gulo kavàw vok ankul à azladza tapapat akul aw! Dza uwana adàh dziriga, masla kà dziriga babay suwan, bokuba Kristu uwana dziriga. ⁸ Dza uwana ada à humà à gay la madàh azlatatak mawisiga, masla kà aga la ahàl anja seteni; seteni kà akweska Zəzagəla dagay madzəka, Kona anja Zəzagəla asà à wan, kà masla makalàh tatak uwana à ahəŋ, seteni adahəŋ.

⁹ Dza agay bəzi anja Zəzagəla la mayyi vok mawga, dza uwaga aslala vok anja madàh azlatatak mawisiga aya aw, kà uwana ndzəda anja Zəzagəla, uwana ayyà vok mawga, adza à ahəŋ la masla la abà, aslala vok kà madahàh azlatatak mawisiga aya aw, kà uwana adapaka kona anja Zəzagəla. ¹⁰ Dza uwana adàh tatak uwana dziriga aw, ngaha awoya deda anja aw, dza uwaga kà kona anja Zəzagəla aw, anja seteni. Azlasləray anjətà tapəhanula la paraka, kà uwana tavàhla la Kona anja Zəzagəla, kà atà azlaanja seteni.

Wòyàw vok kà akul à akul

¹¹ Haday dziriga, uwana katəpawla terəŋa kà: Wòyàw vok kà akul à akul, tatak uwaga kà kadatapawla dagay madzəka. ¹² Kità kà, dza anəfa tsəhay gà anja Kaynu aw, kà uwana masla kà agà kona anja seteni, akədf deda anja. Kà mana akədf deda anja ma? Kà uwana Kaynu adahàhà azlatatak mawisiga. Ama tatak uwana deda anja adahàhəŋ agàhàh dziriga.*

¹³ Azladedà, ləv aval akul à gay à banja azlaməna gudəŋ à vok uwanay tapəsew akul aw. ¹⁴ Ama məsəl kà mədasa à uda la mamətsay la abà, ngaha mədada à sifa à abà. Gay gà la uwaga à uwana məslala vok kà mawoy azladedà gami. Dza uwana awoya deda anja aw kà, aga la ahàl anja seteni. ¹⁵ Kà anja dza uwana awoya deda anja aw kà, masla makədf dza haday, adəbəza sifa adəv à gay aw, tetuw tetuw aw. ¹⁶ Yesu Kristu kà, avà sifa anja kà anjami, uwana adahəŋ kà, masla mapəhanula mawoyəŋ dziriga. Kità kà, anu babay məvə sifa gami kà anja azladedà gami suwan zlà. ¹⁷ Banja dza gorobu anəŋa deda anja la kufa la abà, ama asal mazlakay aw, kakay dza uwaga agodəy kà: ‘Gəwoya Zəzagəla la ləv gulo’, agodəy ma? ¹⁸ Azlabəza gulo, asla kà magodəy ‘Gəwoyan’, pəra aw, kapahaw azlagay namnamga pəra aw, masal dziriga kà apəhla vok ala kà la uwana la abà mədəhəŋ.

Guba akəs anu aw

¹⁹ Aganay à tatak uwana apəhanula kà manəf tetəvi anja dziriga. Ngaha aganay tatak uwana apəhanula kà guba anja makəs anu, kà mad à humà Zəzagəla aw. ²⁰ Haday, banja ləv gami apuwa à anu gudzi à gəl, məsəl kà Zəzagəla gami kà aduwa ləv gami, ngaha məsəl babay kà, masla gami asəl tatak gesina. ²¹ Kità kà, azlaməna gay ləv gulo, banja ləv gami apuw à anu gudzi à gəl aw, guba akəs anu kà mad à humà Zəzagəla aw. ²² Zəzagəla kà adavà à anu tatak uwana mənəvay gesina, kà uwana mədàh tatak uwana: ‘Dahàwwəŋ’, masla agədf, la uwana akəsəl à gəl. ²³ Aganay tatak uwana: ‘Dahàwwəŋ’, agədf: Fəw madzugway ankul à Kona anja Yesu Kristu à afik, ngaha wòyàw vok akul à akul, bokuba uwana Kristu apəh à anu. ²⁴ Dza uwana akəs mapəhay anja Zəzagəla, ngaha adədah slaka madz à ahəŋ anja à ahəŋ la ləv anja la tsəh, masla adədza à ahəŋ la masla la abà. Uwaga kà Masasədfok uwana Zəzagəla avà à anu à uwana apəh à anu, Masasədfok uwaga aga la ləv gami la tsəh.

4

Azlaməna matapla mawisiga à azladza

¹ Azlaməna gay ləv gulo, kafaw madzugway ankul à azladza uwana à afik gesina: ‘Anu la Masasədfok uwana atsà à wan la slaka Zəzagəla’, tagədf aw. Ama nərəzəw atà dadəŋ, kà akul anja masəl: atà la Masasədfok anja Zəzagəla ndzer. Haday ndzer, azlaməna mapəh à atà gay ahàl fidaga la ahəŋ, uwana tadəsa à wan à gudəŋ à vok, tasləh gəl à ahəŋ gesina. ² Aganay tetəvi uwana kasəlawla à banja dza uwaga la Masasədfok anja Zəzagəla ndzer. Kəla dza uwana agodəy kà: ‘Yesu kà Kona anja Zəzagəla, asà à gudəŋ à vok, apakà dza bokuba anu’, dza uwaga kà, akor kà Masasədfok, uwana atsà à ahəŋ la slaka Zəzagəla. ³ Ama kəla dza uwana agodəy kà: ‘Yesu kà Kona anja Zəzagəla aw, ngaha ndzer apakà dza bokuba anu aw’, dza uwaga aga la Masasədfok uwana asà à ahəŋ la slaka Zəzagəla aw. Ama dza uwatà kà la masasədfok anja masla məzam anja Kristu. Haday, katsənəwwəŋ kà masla adəsa à wan. Lagonay kà, mədanəŋəŋ la gudəŋ la vok adagay zlà.

* 3:12 3.12 1Musa 4.8

⁴ Ama kà aṅkul azlabəza gay ləv gulo, akul azlaaṅa Zəzagəla, ṅgaha kaḍuwàw azlaməna mapəh à atà gəy à ahəl fidaga uwaga. Masasədok Zəzagəla uwana aga la akul la abà aduwa masasədok aṅa azladza uwaga tetuw tetuw, kà uwana aṅatà kà aṅa gudəṅ à vok uwanay. ⁵ Azladza uwaga tapəhay kalkal la gudəṅ à vok uwanay, kà uwaga tapəhay lakəl aṅa gudəṅ à vok uwanay, ṅgaha gudəṅ à vok akəs gay aṅatà. ⁶ Ama anu, anu azlaaṅa Zəzagəla, kəla dza uwana asəl Zəzagəla, atsəb à anu sləm, ama kà aṅa azlauwana azlaaṅa aṅha aw, tatsəb à anu sləm aw. Kiya uwaga à tetəvi kà masəlay Masasədok dziriga aṅa Zəzagəla, ṅgaha masasədok mazila, kà kità ndzer.

Zəzagəla masla mawoyəṅ

⁷ Azlaməna gay ləv gulo, məwoya vok kà anu à anu. Kà uwana masal kà atsà à ahəṅ kà la slaka Zəzagəla, ṅgaha kəla dza uwana awoyaṅ deda aṅha kà, masla kona aṅa Zəzagəla, ṅgaha asəl Zəzagəla. ⁸ Dza uwana awoyaṅ Zəzagəla aw, masla asəl Zəzagəla aw, tekefika Zəzagəla masla mawoyəṅ. ⁹ Kiya uwaga à uwana, Zəzagəla apəhanula masal aṅha: Asləl Kona aṅha tekula gə uwatà à waṅ à gudəṅ à vok, kà masla aṅa mav à anu sifa adəv à gay aw. ¹⁰ Godega aṅa mawoyəṅ uwanay kà, Zəzagəla awoya anu, asləl à anu Kona aṅha à waṅ, kà aṅa mapis à anu gay à vok, ṅgaha amatsən tsakana gami ala. Anu la uwana məwoyaṅ Zəzagəla teraṅa aw, ama masla la uwana atsà à vok à mawoy anu dadəṅ.

¹¹ Azlaməna gay ləv gulo, bokuba uwana Zəzagəla awoya anu kaykay kà, say məwoya vok kà anu à anu babay suwaṅ. ¹² Dza la ahəṅ adanəṅ Zəzagəla didi aw, ama baṅa məwoy vok kà anu à anu, Zəzagəla adza à ahəṅ la anu, ṅgaha azladza tanəṅəṅ la paraka masal aṅa Zəzagəla, uwana la anu la abà.

¹³ Kiya uwanay la uwana, anu la maham gay à vok la Zəzagəla, masla adza à ahəṅ la anu la abà, masla awà à anu Masasədok aṅha. ¹⁴ Mənəṅəṅ, ṅgaha məpəh uwaga la kuda zləkkà: Baba asləl Kona aṅha à waṅ à gudəṅ à vok, kà masla aṅa məbəl anu. ¹⁵ Kəla dza uwana apəhay la paraka kà Yesu kà: Kona aṅa Zəzagəla kà, masla adza à ahəṅ la Zəzagəla la abà. ¹⁶ Anu məsəl masal uwana Zəzagəla awoya anu, ṅgaha mədakəs masal uwaga.

Zəzagəla masla masal. Dza uwana aga la masal uwaga la abà, masla la maham gay à vok gə la Zəzagəla, ṅgaha Zəzagəla la masla la abà bay. ¹⁷ Aganay tatak uwana apəhanula kà masal aṅa Zəzagəla mahənlaga la anu la abà, guba akəs anu, kà kaslā aṅa seriya aw, kà uwana sifa gami adagay magagazləlaga la aṅa Yesu Kristu. ¹⁸ Dza uwana adakəs masal ndzer, dza uwaga, guba azəṅ dikiḍiki aw, masal dziriga ahəlal guba la vok ala. Ama dza uwana guba azəṅ kà mahənlaga la masal aw, kà uwana guba kà tatak tekula la seriya. ¹⁹ Ama anu kà, məwoya Zəzagəla, kà uwana Zəzagəla atsà à vok à mawoy anu teraṅa. ²⁰ Dza uwana agoday: ‘Gəwoya Zəzagəla’, awoya deda aṅha aw, dza uwaga kà: Masla fida. Kayyà, kakay awoya Zəzagəla à masla uwana anəṅaṅ aw ma, ṅgaha kà awoya deda aṅha uwana anəṅaṅ la yewdi aw ma? ²¹ Uwanay kà mapəhay uwana Yesu apəh à akul: Dza uwana awoya Zəzagəla, say awoya deda aṅha babay suwaṅ.

5

Madiṅal gəl à vok gami aduwa gudəṅ à vok

¹ Kəla dza uwana adiṅal gəl à vok, kà Yesu kà dza, uwana Zəzagəla afəl dzakwa à gəl, agoday kà, masla kà mayyay aṅa Zəzagəla. ṅgaha kəla dza uwana awoya Baba, awoya mayyay aṅha babay suwaṅ. ² Kakay məsəlay kà masal gami la ahəṅ, anu azlabəza aṅa Zəzagəla la dziriga ma? Baṅa məwoya Zəzagəla la gəl aṅha, ṅgaha à baṅa məḍəh uwana masla apəhanula. ³ Ndzer, dza uwana awoya Zəzagəla, masla kà adəh tatak uwana masla apəhla ala babay. Uwana Zəzagəla apəh à akul kà, zlazladā aw. ⁴ Haḍay, kà uwana dza uwana mayyay aṅa Zəzagəla aslala vok kà maḍuw gudəṅ à vok. Tetəvi uwana aduwa gudəṅ à vok kà, uwaga kà madiṅ gəl à Yesu Kristu gami à vok. ⁵ Uwa aslala vok aṅa maḍuw gudəṅ à vok uwa? Say dza uwana akəs Yesu Kona aṅa Zəzagəla.

Sayda lakəl aṅa Yesu Kristu

⁶ Yesu Kristu kà masla uwana asà à waṅ. Asà à waṅ la iyaw aṅa batem aṅha, ṅgaha la aṅiz aṅa mamətsay aṅha bay. Agà maḍahalla batem gə la iyaw pəra aw, ama la aṅiz aṅa mamətsay aṅha bay. Masasədok tsikasla aza sayda lakəl aṅha kà uwaga dziriga, kà uwana Masasədok aṅa Zəzagəla kà masla fida aw. ⁷ Kità kà, tatak makər la ahəṅ à uwana taza sayda aṅha. ⁸ Masasədok tsikasla, la iyaw ṅgaha aṅiz aya. Azlatatak makər uwaga kà tapəhanula lakəl aṅa tatak dziriga tekula: Yesu kà, masla Kristu, Kona aṅa Zəzagəla. Masla uwana apakà dza. ⁹ Məkəs uwana azladza taziṅ, ama uwana Zəzagəla apəh kà, aduwa gay aṅa azladza uwana tapəh. Aganay uwana Zəzagəla apəh lakəl aṅa

Kona anha Yesu: ¹⁰ 'Dza uwana adiŋ gəl à Kona anja Zəzagəla à vok, abəza sayda uwaga la ləv anha la tsəh. Ama dza uwana adiŋ gəl à Zəzagəla à vok aw, apaka Zəzagəla ala kà masla fida. Kà uwana akəs sayda anja Zəzagəla uwana masla afà à gəl anja Kona anha aw.' ¹¹ Mana gay uwaga agodf à anu ma? Zəzagəla avà à anu sifa adəv à gay aw, sifa uwaga kà avà à anu, kà la Kona anha la abà. ¹² Dza uwana la Kona, masla la sifa uwaga, ama dza uwana la Kona anja Zəzagəla aw kà, masla la sifa mawga aw.

Sifa uwana adəv à gay aw

¹³ Gətsəter à akul, kà akul anja masəlay kà, akul kà, akul la sifa uwana adəv à gay aw, ndzer, kà uwana kadiŋəw gəl à sləm anja Kona anja Zəzagəla à vok. ¹⁴ Aganay makəs vok anja uwana məslala vok anja maz à vok à slaka Zəzagəla. Guba akəs anu aw, kà uwana məsəl kà, baŋa mənava tatak à masla la tetəvi anha, kà masla: 'Ayyà', agodf à anu. ¹⁵ Kà uwana məsəl kà atsəb sləm à baŋa mənava tatak la matsizl à afik ndzer, uwana mənava kà, adəv à anu, ndzer.

¹⁶ Baŋa dza anəŋa deda anha anik adəh tsakana, uwaga adala à mamətsay aw, dza uwaga adəv kudə kà anja deda anha uwaga, ŋgaha Zəzagəla adəbasallaŋ la maval sifa. Tatak uwaga kà ndzer, kà anja tsakana uwana adala dza à mamətsay aw pəra. Tsakana uwana adala dza à mamətsay la ahəŋ. Gənava akul, kà akul anja madəv kudə lakəl anja tsəhay tsakana uwaga aw. ¹⁷ Dəwdəw tatak uwana kadəhawwanəŋ la tetəvi uwana Zəzagəla apəh aw, uwaga gesina kà tsakana. Ama azlatsakana la ahəŋ, uwana tadala dza à mamətsay aw.

¹⁸ Məsəl kà mayyay anja Zəzagəla kà, adəh tsakana aya aw, kà uwana Kona anja Zəzagəla anəŋla, ŋgaha ndzəfa anja seteni la ahəŋ lakəl anha aya aw.

¹⁹ Amiyaka gudəŋ à vok gesina la ahəl anja seteni kà, ama anu kà, anu azlaməna hucf gəy anja Zəzagəla.

²⁰ Məsəl babay kà Kona anja Zəzagəla asà à wanəŋ à gudəŋ à vok. Masla avà à anu matsihila, kà anu anja məsəl Zəzagəla la dziriga. Anu mədahama gay à vok la Zəzagəla la abà la dziriga, kà madegolay Kona anha Yesu Kristu. Yesu Kristu kà masla Zəzagəla la gəl anha, masla bay sifa, uwana adəv à gay aw.

²¹ Azlabəza gay ləv gulo, dəhəw hanəkəli kà azlamazlazlay fidaga.

MASƏLA ANJA WAKITÀ UWANA YUHANA ATSETSÈR Deuxième Lettre de Jean

Ayyi

¹ Gi masiga, gətsetser à kak iyà anja azlabəza, uwana Zəzagəla akəsàni, ngaha à azlabəza anha, uwana gəwoya atà kaykay. Gi kokuɗa gəl gulo pəra à uwana gəwoya akul aw, ama la azlauwana tasəl dziriga gesina babay. ² Məwoya akul kà, kà uwana dziriga la ahəj la anu la abà, ngaha adagay la anu la tsəràh à awtày.

³ Zəzagəla Baba la Yesu Kristu, Kona anha, uwana mədahama gay à vok la dziriga, ngaha la masal, tavà à anu vok mahamay la dzəba anha səla aw, uwana amatsənuŋla tsakana, ngaha la mav à anu lapiya la ləv la tsəh. Kà akul anja məbəzal tatak makar uwaga la dziriga la abà, ngaha la masal anha la abà bay.

Dziriga ngaha masal

⁴ Gərab mənğa, kà magagamay la azlabəza anək anik, ngaha la manəj atà uwana tadza à ahəj la dziriga la abà, ndzer, atà tadza à ahəj bokuba uwana: ‘Dzàw à ahəj’, Zəzagəla Baba gami agɔɗ. ⁵ Lagonay kà: Gənav à ka, kak iyà anja azlabəza uwana Sufəl akəsàni kà, məwoya à vok kà anu à anu, mapəhay uwana gətsetser à kak kà mapəhay mawga aw, ama mapəhay anja Zəzagəla, uwana məkəs dagay la madzəka. ⁶ Madàh uwana Zəzagəla apəh kà uwaga masal. Aganay uwana: ‘Dahàwwàn’, Zəzagəla agɔɗ dagay madzəka, kà akul anja manəf tətəvi anha, ngaha kà kadzaw à ahəj la masal la abà.

⁷ Anjvaw azlaməna fida tasà à waŋ à gudəj à vok, taslèh gəl à gudəj à abà gesina. Takəs kà Yesu Kristu masla adapaka dza ndzer aw. Dza uwana apəhay kiya uwanay kà: masla fida, masla kà, masla məzam anja Kristu. ⁸ Dahàw haŋkəli, tsizllàw à ahəj lela kà gəl ankul, kà akul anja maz masik ankul ala aw, uwaga kà mayyay anja sləray ankul uwana kadàhàwwàn, kà akul anja məbəz masik ankul mahənlaga, pawasla.

⁹ Kəla dza uwana adəh uwana Kristu apəhakulla aw, ama azalà azlatatak anik anik à gəl aya, dza uwaga kà, maham gay à vok gà la Zəzagəla aw. Ama dza uwana anəfa tatak uwana Kristu apəhla, masla la maham gay à vok la Baba, ngaha la Kona babay.

¹⁰ Kəla dza uwana atsà à waŋ à slaka ankul, ama atapakulla kiya uwanay aw, ‘Ayyà’, kagɔɗawwal kà madz à ahəj aw. Təfà, kagɔɗawwal kà mapisla gay à vok la mapis gay à vok anja Zəzagəla aw. Baməraka ‘Ayyi’ bay kà, kagɔɗawwal, la ‘Ayyi’ anja maham gay à vok la azladedə aw, ¹¹ kà uwana dza uwana ‘Ayyi’, agɔɗay à tsəhay dza uwaga, apisla gay à vok kà, tahamà gay à vok la slaka gà la sləray mawisiga uwaga la abà, uwana dza uwanay adəhəj.

Ayyi makəɗ gəl à ahəj

¹² Gay aga la gi lakəl anjvaw, nəma kà mapəh à akul. Ama asa à gi gətsetser à akul matsetseray aya aw, gəɗàda à awtày à slaka ankul la gəl gulo, ngaha gəɗəpəh à akul kà ləv gami anja mahənlə la marabay.

¹³ Azlabəza anja deda anək misga tadəfa ka: ‘Ayyi’, atà uwana Zəzagəla atsatsəmàni atà babay.

MAMAKƏR ANJA WAKITÀ UWANA YUHANA ATSETSÈR Troisième Lettre de Jean

Ayyi

¹ Gi masiga, gətsəter à kak Gayyus. Kak slawda gulo, uwana gəwoya kak kaykay.
² Slawda gay ləv gulo, asa à gi kà dèwdèw tatak ada à vok lela la slaka anjak. Nğaha kà kak anja magay wurwur, nğaha madiŋal gəl à vok anjak maŋazila koksikoksi. ³ Mok uwana azladede tasà à waŋ à slaka gulo kà, tapèh à gi dziriga anjak gesina, bokuba magofay, kà kanəfàh dziriga la lela kà madegolay uwaga à uwana, ləv gulo aràb kaykay.
⁴ Mok uwana gətsənàŋ kà azlabəza gulo kà taday la dziriga la abà kà, ləv gulo aràb. Tatak anik la ahəŋ azigən marabay gulo kiya uwaga aw.

Gayyus kà dziriga

⁵ Slawda gulo, gəwoya ka kà kaykay, kadàh sləray lela gesina kà anja azladede gami, amiyaka kà anja azlaməlok gə bay. ⁶ La dazuwaya, azladza uwaga tapèh la huma à azlaməna madiŋal gəl à vok à mawoy atà anjak. Lagonay: Kamkam zlakà atà kà mad à huma à gay, kà tsəhay mauguzahay anjata, uwaga anja magay makəs vok gə à Zəzagəla. ⁷ Azladza uwaga taday zlà, asa à atà mapəhla Sufəl Yesu Kristu ala. Ama asà à atà mazlak atà anja azladza uwana tasəl Zəzagəla aw aw. ⁸ Uwaga kà sləray gami, anu azlaməna gay Zəzagəla, say məkəs mazlak à tsəhay azladza uwaga gesina, kà madàh sləray la slaka gə, kà maz gay dziriga la slaka gə.

Diyotəref atà la Demetəriyus

⁹ Gətsəter bəzi wakità à azlaməna madiŋal gəl à vok, ama Diyotəref atsəb sləm à mapəhay gulo aw, asal magay sufəl lakəl anja azlaməna madiŋal gəl à vok uwaga. ¹⁰ Gay gə la uwaga, gədəpəhay la paraka azlatatak mawisiga gesina uwana adəhàŋ à azladede gami à vok, à mok uwana gədəgay la tataka ankul la abà. Masla apəh à anu azlagay maksafer à vok, azlafida gesina uwana apəhay lakəl gami. Ama bə uwaga pəra aw. Kaykay aya kà, akəs azladede gami uwana tadà à awtəy aw, nğaha adəf gay à azladza à ahəŋ, kà makas atà aya, la tataka azlaməna gay Zəzagəla la abà, nğaha akəs atà à uda la gəy Zəzagəla la abà.

¹¹ Slawda gulo, gəwoya ka kaykay, kamkam, kanəfa tetəvi uwaga aw, ama dəhàŋ kà uwana delga, akəsa vok pəra. Dza uwana adəh uwana delga kà, masla kà dza anja Zəzagəla. Ama dza uwana adəh azlatatak mawisiga kà, adanəŋ Zəzagəla dikiđiki aw.

¹² Azladede gesina tapəhay lakəl anja sləray delga anja Demetərius, nğaha uwana tapəhay kà dziriga. Anu babay kà, məpəhay kà lakəl anja azlatatak delga babay. Kak, Gayyus, kasəl uwana məpəhay kà uwaga dziriga gesina pəra.

Ayyi makəf gəl à ahəŋ

¹³ Gay aga la gi lakəl anjuvaw, kà anja mapəh à ka, ama asa à gi anja matsetser à ka matsetseray aw. ¹⁴ Nekwa gəda à awtəy kà mabəfma la slaka gə lakəl anja, kà anu anja mapəh vok à adi la yewdi la yewdi. ¹⁵ Zəzagəla avà à ka lapiya. Azlaslawda anjak uwana la abanay kà: 'Ayyi', tagof kà ka babay. 'Ayyi', gəf à azlaslawda la tekula tekula gesina.

WAKITÀ UWANA YAHUDA ATSETSÈR Lettre de Jude

Ayyi

¹ Gi, Yahuda la uwana gøtsetser wakità uwanay, gi mayà anja Yesu Kristu, gi mabøziga bæzi gá anja Yakuba uwana Baba gami tekula la iyà tekula.

'Ayyi', gəgəɔɔf à akul, akul azlaanja Zəzagəla Baba, uwana awoya akul la ləv tekula. Atsatsamàni akul kà magay azladza anja, anəŋla akul la Yesu Kristu.

² Zəzagəla avà à akul mamatsila, lapiya la masal anja kaykay.

Seriya anja azlaməna matapla fida

(2 Piyer 2.1-17)

³ Azlaməna gay ləv gulo, gədawaf vok à uda kà matsetser akul gay anja mabəlay uwanay, mədahamay à masla à abà. Lagwa kà, gøtsetser à akul kà madzəɔɔɔfəh akul à uda, kà akul anja mapay la madiŋal gəl à vok, kà azlatatak uwana kadiŋawwal gəl à vok uwana la abà, Zəzagəla avà à azladza anja anja koksikoksi. ⁴ Gəpəh uwanay kà, kà uwana azladza uwana tasəl Zəzagəla aw, taguɔ akul à tsəh la maham gay à vok anjul la abà. Atà tagor mawis gay ala lakəl anja tatak uwana Zəzagəla avà deyday, la magoɔɔɔfay kà Zəzagəla avà à tetəvi kà madfəh mawisiga uwana asà à anu gesina, tagoɔɔf. La madfəhəŋ kiya uwaga kà, takweska Yesu, uwana madzahaga, ŋgaha Sufəl gami. Dagay uwarà la wakità Zəzagəla la abà tatsətsər kà: Zəzagəla adadukw seriya à azlatsəhay dza uwaga à gəl.

⁵ Iyay, amiyaka kadasəlaw tatak uwana gəpəh à akul kà, ama bə gotənanj kà, gəpəh à akul aya. Kiya uwaga, la zamana uwarà Sufəl abəlla azlatsəhay anja, asəlla atà à uda la gudəŋ Misəra. ŋgaha akəɔɔf azladza uwana à gay la tataka anjatà, uwana tadiŋal gəl à vok aw.* ⁶ Azlamalika babay, uwana tazigənà gəl la kokuda mav à atà anja Zəzagəla, atà tazà vok la slaka uwana Zəzagəla abək atà à abà, kà Zəzagəla ahəl atà, awaɔɔfəh atà, ŋgaha abək atà à mələs tabadammaga à abà anja koksikoksi, tsəràh à kaslā uwana Kristu adàsa à wanj kà madfəh seriya à azladza gesina à gəl. ⁷ ŋgaha aya kà, dzūgwəw lakəl anja gudəŋ Sodom atà la Gomor babay, ŋgaha la azlagudəŋ anik la azlakutso uwatà la abà. Azladza anja azlagudəŋ uwatà tadəhàhà azlamabila babay, tadəhàhà azlatsəhay tatak anik mawisiga, uwana naka dza la sləb vok aɔɔfəhəŋ aw. Zəzagəla afà à atà à gəl kà akəl uwana adəmətsala didi aw. Uwanay apəhanula, kà kiya uwanay la uwana Zəzagəla adəfəhəŋ à azlatsəhay dza uwaga à gəl.*

⁸ Azladza uwana tasà à wanj à tataka anjul à abà, tadfəhəŋ kiya uwanay babay. Baməraka masesinay uwana asesinla atà kà, tadəh mabila, asa à atà kà Zəzagəla akor atà aw, ŋgaha tatsəɔɔf gay mawisiga à azlamalika uwana à tsəh, atà la mazləbay.

⁹ Amiyaka Misel, uwana mənŋga anja malika anik gesina kà, agoɔɔɔfəh à seteni aw, mok uwana tabayà vok gay la seteni lakəl anja Musa kà, adəhà zlapay lakəl anja sləb vok anja aw, ama afà kà à ahəl anja Zəzagəla pəra. Agəɔɔɔfəh pəra kà: 'Say Zəzagəla la uwana adəhà à ka seriya à gəl!', agəɔɔɔfəh.* ¹⁰ Ama kà anja azladza uwana tatsək magoɔɔɔfəhəŋ à azlatatak uwaga à gəl kà, tasəl godega anja aw. Tadfəhəŋ kà say tatak uwana asa aresl anjatà pəra, bokuba azlatatak fəta, azlatatak uwaga la uwana awisatàla. ¹¹ Uwaga kà ŋgəpəra uwana anəfa tetəvi anja Kaynu, ŋgaha babay tadfəh mawisiga kà mabəz sili bokuba anja Balam uwana adəhəŋ uwarà. Taməts à gay kà uwana tadzadzəŋəŋ gəl anjatà ala lakəl anja Zəzagəla, bokuba uwana Kora adəhəŋ.* ¹² Digiya banja kadzaw madzay kà mazuw tatak may akul nna kà, ziruwi kà anjul, tahabəh madəvaday, tafa à gəl kà à vok anjatà pəra, ziruwi bay əza à atà, tapakahay kà bokuba habaga uwana asal masa à afik, ama aɔɔf adadasinja, tapakahay kà bokuba azlaahəf uwana amiyaka kaslā mayyay anjatà babay kà tayyay aw, tagahay kà bokuba azlaahəf mabəɔɔf à ahəŋ gə. ¹³ Tagahay kà bokuba azlaiyaw uwana taganjsay la dərəv la afik, atà la titi aw. Falfafal, tagoɔɔɔfəhəŋ bokuba iyaw uwana la dərəv la afik, tsakana anjatà kà apəhla à vok ala, la ufaka la abà, bokuba mahərapapay anja iyaw, uwana amətsal à tsəh ala. Tagahay bokuba azlatsəsilin uwana tabəɔɔfəhəŋ vok. Zəzagəla adadəhəŋəŋ slaka mələs gə à ahəŋ tabadamma. La abatà la uwana tadədz à ahəŋ anja tsəràh à awtəy.*

¹⁴ ŋgaha aga la ahəŋ dagay uwarà Enok, uwana mayyi à tsəh ala mamukwa la lig anja Adama la ahəŋ, apəh à ahəŋ uwarà lakəl anja azladza uwanay: 'Tsəbəwwal sləm', agəɔɔɔfəhəŋ.

* 1:5 1.5 2Musa 12.51; 4Musa 14.29-30 * 1:7 1.7 1Musa 19.1-24 * 1:9 1.9 5Musa 34.6; Daniyel 10.13,21; 12.1; Zakari 3.2 * 1:11 1.11 1Musa 4.3-8; 4Musa 22.1-35 * 1:13 1.13 1Musa 5.18,21-24

'Sufël atsa à wañ, la azlamalika aña aṇuvaw, ¹⁵ ama azlãtsa à wañ kà madãh seriya à azladza gudəñ à vok à gəl, adãdukw seriya à azladza uwana à gəl, takəs gay aña aw gesina, kà tatak mawisiga uwana tadãhãhãñ à vok gesina, ñgaha la azlagay mawisiga uwana tatagòl à vok', Enok agòf. ¹⁶ Azladza uwanay tañonjuzay à tsəh ala kiya uwanay koksikoksi. Tarabay didi aw, tadfehəñ kà say tatak uwana asa à ləv añaatà, tapəhay kà bəlaslaslaga, ñgaha tapapàt azladza, tavavàràh azladza, kà azladza aña makəs gay añaatà.

Yahuda adzərəfãh azlaməna madiñal gəl à vok ala

¹⁷ Akul, azlaməna gay ləv gulo, avika kul gay uwana azlaməna matapla aña Sufël gami Yesu Kristu tapəh à kul à vok à abà dagay uwarà aw. ¹⁸ Tagòfãh à kul kà la madəv à gay gudəñ à vok kà, adãgahay la ahəñ azladza uwana tadãkəfãslah azladza uwana tanəfa Zəzagəla. Atà kà, tasəl masla aw, tadfehəñ kà azlatatak mawisiga uwana asa à ləv añaatà pəra. ¹⁹ Ñgaha aya kà atà la uwana tatsala mavãhla à wañ. Atà kà azladza uwana takor gəl añaatà, atà la Masasəfok Zəzagəla aw. ²⁰ Ama kul kà, kul azlaməna gay ləv gulo kà, wãdãw vok à uda la ndzəfa, zlakãw vok kà kul à kul, kul gesina vaw ləv aña kul kaykay à gay marabəñ uwana katsənãwwãñ. Zəzagəla la gəl aña apəhakulla, dävãhãw kufa à ndzəfa aña Masasəfok Zəzagəla. ²¹ Dzãw à ahəñ la dziriga la abà, ñgaha səlãw kà Zəzagəla awoya kul, fãw madzugway aña kul kà à kaslã uwana afik, Sufël Yesu adãpəhla ala, vok ahamàl aña uwana ala kà anu, ñgaha avà à anu sifa uwana adəv à gay aw.

²² Gãw la vok mahamay kà azladza uwana ləv añaatà matasləla gã aw. ²³ Bãyãw azladza anik à akàl la gay ala. Kà aña azladza anik aya kà, gãw la vok mahamay. Høyãw atà à ahàl kà tsakana añaatà, amiyaka bã lukut añaatà uwana tadaw à vok kà madãhla tsakana la vok kà, kadəbãwni aw.

Məzləba Zəzagəla

²⁴ Məzləba Zəzagəla, uwana masla la maslay kà manəñla kul kà tetəvi aña maz à kul à adi aw. Adazəb kul à kəl ala tsakana, uwana kadãhãwwãñ gesina, ñgaha adãtsizl kul à huma aña, kadãnəñaw mazləbay aña, kadãhənwla la marabay. ²⁵ Məzləbã Zəzagəla la gəl aña, asləl à wañ Sufël gami Yesu Kristu kà masla aña mabəl anu. Mazləbay agay la masla, azladza gesina tatataslã ahàl. Masla la uwana məñ Sufël gami, maslay aña adza à ahəñ aña tsərãh à awtãy. Kiya uwaga dagay madzəka ñgaha tsərãh à lakana, ñgaha aña tsərãh à awtãy bay. Amen.

WAKITÀ ANJA AZLATATAK UWANA YESU AFƏTÀLA À YUHANA À AMA ALA Apocalypse

Azlatatak uwana Yesu afətala à Yuhana à ama ala

¹ Aganay uwana Yesu Kristu afətala à azlamayà anja Zəzagəla la kəl ala. “Iyay, fətalla ama ala Zəzagəla”, agòdal, kà atà anja masəlay uwana adəpaka vok la huma la gay. Kà uwaga Yesu Kristu aslèl à wañ malika anja à slaka mayà anja Yuhana, kà mapəhalla azlatatak uwaga. ² Kiya uwaga Yuhana azàñ la huma azladza gesina uwana anəñàñ, agòd la magədən à afik, ndzer uwaga kà gay anja Zəzagəla, ngaha babay kà baməraka Yesu kà agədən à afik, kà uwaga kà dziriga. ³ Mapis gay à vok agay la azladza, uwana tadzen wakitə uwanay la huma azladza la kuda zlèkkà, azlagay uwanay kà atsa à wañ kà la pañaw anja Zəzagəla la awtəy, kà anja azladza uwana tatsəb sləm à azlagay uwanay, ngaha takəs kà, Zəzagəla adəpis à atə gay à vok. Haday kà, kaslā uwana azlatatak uwanay adəpaka vok kà, adəgay nekwa nekwa.

Madàh ‘Ayyi’ anja Yuhana,

uwana adahàñ à azlaməna gay Zəzagəla slaslaka mədəf

⁴ Gi Yuhana, la uwana gətsetser à akul wakitə, ‘Ayyi’ gəgod à akul, akul maham à ahəñ mənə gay Zəzagəla slaslaka mədəf, uwaga la kutso anja Asəya la abà.

Zəzagəla apisakulla gay à vok, ngaha adzala akul à ahəñ la lapiya la abà. Masla uwana agà la sifa dagay uwarà, mok uwana gudəñ à vok gesina la ahəñ dadəñ aw, ngaha lakana aga la ahəñ la sifa aya, ngaha adàsa à wañ à gudəñ à vok. Azlamasəđok mədəf tapis à akul gay à vok, ngaha tadzala akul à ahəñ la lapiya la abà. Azlamasəđok mədəf uwaga tadza à ahəñ la huma kursi anja Zəzagəla, tapis à akul gay à vok. ⁵ Yesu Kristu masla sayda dziriga, apis à akul gay à vok la mav à akul lapiya. Masla la uwana terəña anja mawul à uda la tataka azlamazimnekid la abà, ngaha masla Sufəl anja azlasufəl anja gudəñ à vok gesina.

Yesu uwaga awoya anu, amətəs kà anjami, kikay kà aniz anja, ndzəda anja tsakana lakəl gami aya aw, atəfà anu.* ⁶ Masla mapakanula kà tsəhay anja, kà uwana masla Sufəl gə gə. Masla adahàñ kiya uwanay, kà anu anja magay azlaməna makad tatak babay, kà mazlak Zəzagəla Baba anja, dza atəm à ahəñ anja mazləbay aw, zləbàw masla gesina. Maslay atsa à wañ kà la slaka anja koksikoksi. Amen.*

⁷ Nəñəwwəñ aganay atsa à ahəñ la habaga la abà. Yewdi anja azladza gesina adə-nəñəñ baməraka azlauwana tatsàh la atsəkad babay. Azladza gesina tadətsah hulolo, kà uwana guba adàza atə, kà uwana taweskà masla. Ndzer. Amen.*

⁸ Sufəl Zəzagəla agòd:

‘Gi la uwana Alfa, ngaha gi la uwana Omega.’* (Uwana asal magođay kà: Gi la uwana gi matera anja tatak gesina, ngaha gi la uwana makəđ gəl à ahəñ anja tatak gesina aya)

Masla la maslay gesina la ahəl. Aga la sifa dagay uwarà, mok uwana gudəñ à vok la ahəñ dadəñ aw, lakana aga la ahəñ la sifa, ngaha adàsa à wañ à gudəñ à vok haday.

Kristu apəhla vok à Yuhana

⁹ Gi Yuhana, deda ankul la uwana gətsetser wakitə uwanay. Anina gesina gami mədahama gay à vok la Yesu la abà. Kiya uwaga məhama à ngərpa uwaga à abà, ngaha à makoray anja, uwana à abà məbasəñ gami. Kà anja gulo tekedika taduw à matəkukuruh uwana à afik, la tataka dərəv la abà, uwana sləm anja Patmos, kà uwana gəpəh gay Zəzagəla la magođəñ à afik kà Yesu la uwana dziriga, gəgòd. ¹⁰ La wud ladu anik Masasəđok Zəzagəla akəs gi, ngaha gətsənəñ kuda la lig gulo la ndzəda, bokuba matsənay anja mazlazliñ. ¹¹ Uwana agòd: “Uwana kanəñəñ la uwana katsetser à wakitə à abà, sləl à slaka maham à ahəñ mənə gay Zəzagəla slaslaka mədəf uwana la Efesus, la Səmirna, la Pergə, la Tiyatir, la Sardəs, la Filadelfiya, ngaha la Lawodikiya”, agòd à gi. ¹² Mok uwana gətsənəñ, kiya uwaga gəgòlə vok kà manəñəñ dza uwana awətəs à gi gay uwaga, ngaha gənəñəñ fənəs slaslaka mədəf uwana madəhəhəngga la luwəluwə. ¹³ La tataka anjətə la abà gənəñəñ maftsa à vok anja dza babay. Masla la lukut zinjizñga

* 1:5 1.5 Mahabay 89.27; Yesayya 55.4 ✧ 1:6 1.6 2Musa 19.6 ✧ 1:7 1.7 Daniyel 7.13; Mata 24.30 ✧ 1:8 1.8 2Musa 3.14

la vok, tsəräh à dğadğaga, mawad vok ala gà la gay ləv la gabaga luwàluwà. ¹⁴ Anjdz anha kà, mēdekuga sayya, bokuba slewzi. Yewdi anha awutsəday bokuba alàh akàl. ¹⁵ Asik anha wutsawwuts bokuba ada vəržeganiga, uwana taf akàl à abà, kuda anha kalkal la mahohumay anja iyaw uwana la mukwà la afik. ¹⁶ Tsətsilij mēdēf la ahàl kaf anha, katsakar mazuwayga gay sēla nna, asà à waŋ la gay anha la awtày. Hud adi anha njarazl à adi bokuba afats anja tataka afats. ¹⁷ Kay, mok uwana gənəŋəŋ, gətēd à makēla asik anha bokuba gi mamətsay gà. Ama la lig la ahəŋ abək gi ahàl kaf anha à gəl, agōd à gi: “Guba akəs ka aw. Gi uwana gəga la ahəŋ dagay uwarà, ŋgaha gi uwana gədəgay la ahəŋ aya. ¹⁸ Gi, gi uwana la sifa. Gēməts ama gədza à ahəŋ la sifa anja tsəräh à awtày. Gi la ndzəda lakəl anja mamətsay, ŋgaha gi la tsəkurəm anja slaka uwana azlamazimnekid tadza à ahəŋ aya. ¹⁹ Kiya uwaga kà uwana kanəŋəŋ lagonay la uwana adəpaka vok bawbaw gesina kà: Tsətsèr! ²⁰ ŋgaha lakəl anja azlatsetsilij mēdēf uwana kanəŋəŋ la ahàl kaf gulo, ŋgaha la azlafənəs mēdēf uwana madēhəŋ gà la luwàluwà kà, gəpəhakalla godega anja azlatatak uwaga. Godega anja azlatsetsilij mēdēf kà apəhla ala azlamalika mēdēf uwana Zəzagəla abək atà à azlaslaka mēdēf anja maham à ahəŋ mēna gay Zəzagəla. Azlafənəs mēdēf uwanay apəhla ala azlamaham à ahəŋ mēna gay Zəzagəla uwatà aya pəra”, masla agōd.

2

Wakità uwana Yesu atsetsèr à azla Efesus

¹ Yesu agōd: “Tsətsèr gay uwanay à malika, uwana anəŋla mēna madiŋal gəl à vok la Efesus. Aganay gay anja dza uwana la tsətsilij mēdēf la ahàl kaf anha, akəsij, ŋgaha uwana auguzahay la tataka anja azlafənəs mēdēf uwaga la abà. ² Gəsəl sləray anjak uwana kadəhəŋ gesina, kabasəŋ ŋgərpa uwaga. Kavà tetəvi à azlaməna makəsafər anja matapakala azlatatak aw. Azladza uwana tagōday: ‘Anu azlaməna masləl anu à waŋ gə anja Yesu’, tagōd, tekedika azlaanulo aw, gür atà, kabəza atà à tsəh kà azlaməna lida. ³ Kà gi à uwana kabasəŋ ŋgərpa, ŋgaha kasakawal à tsəh ala aw. ⁴ Ama gi la gay lakəl anjak, kà uwana kawoya gi bokuba uwana uwarà aya aw. ⁵ Dzūgw slaka uwana katēd à ahəŋ, pəh gay la ləv ala, dzà à ahəŋ aya bokuba madz à ahəŋ anjak uwana uwarà, tsa banja kiya uwaga aw, kà gədàda à awtày, ŋgaha gədəwula fənəs anjak à tsəh. ⁶ Ama la ahàl anik kadəhà delga, kà uwana kakweskà uwana azla Nikolayya tadēhəŋ bokuba uwana gəkweskà suwanj. ⁷ Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahəŋ mēna gay Zəzagəla. Azlauwana taguwà à uda la abà la makəfaslay kiya uwanay, gədəvə à atà tetəvi kà mazu mayyay anja ahəf uwana la gəy aləl anja Zəzagəla la abà uwana avà sifa à azladza”, Yesu agōd.*

Wakità uwana Yesu atsetser à azla Səmırna

⁸ Yesu agōd aya: “Bà gotənanj tsətsèr gay uwanay à malika uwana anəŋla azlaməna madiŋal gəl à vok la Səmırna. Aganay gay anja dza uwana agà la ahəŋ dagay uwarà, ŋgaha masla adəgay la ahəŋ aya. Aməts, ŋgaha awulà à uda la mamətsay.* ⁹ Gəsəl matərebəy uwana katərebəy, gəsəl kà kak masla kuda anja gudəŋ à vok. Ama la slaka gulo kà kak gorobu. Gəsəl mawisiga uwana azladza tapəh à kak à vok babay. Məna mapəh à ka uwaga à vok kà: ‘Anu azla Yahudiya’, tagōd. Ama tsa, azla Yahudiya kà anja gay gə pəra, maham à ahəŋ anjatà kà anja seteni. ¹⁰ Guba akəs ka, kà ŋgərpa uwana kadəsay la huma aw. Səl kà, seteni adədaw azlaanik ankul à danja la tataka ankul la abà kà magur akul, ŋgərpa uwaga kà kadəsaw anja mahəny kulo. Bamərakə tafa akul makits à kuda babay, kabasawwan pəra. Kiya uwaga gədəvə à akul sifa adəv à gay aw, bokuba masik ankul. ¹¹ Kəla dza uwana la sləm lakəl, atsəb sləm à uwana Masasəfok Zəzagəla apəhay à maham à ahəŋ mēna gay Zəzagəla, azlauwana taguwà à uda la abà, la makəfaslay, kiya uwanay mamətsay masəla adətəd atà à gəl aya aw”, Kristu agōd.

Wakità uwana Yesu atsetsèr à azla Pergam

¹² Yesu agōd aya: “Bà gotənanj tsətsèr gay uwanay à malika uwana anəŋla azlaməna madiŋal gəl à vok la Pergam. Aganay gay anja dza uwana akor katsakar mazuwayga, gay sēla nna. ¹³ Gəsəl gudəŋ uwana kadza à ahəŋ la abà, uwaga makoray anja seteni. Ama la kaslā uwana azladza takəd magamza gulo dziriga gə Antipas kà, kabəda gay aw, kawaslàhə gi à ahəŋ la madiŋal gəl à vok la abà, takəd masla à gudəŋ ankul à abà, kay kà, kak kadəh sayda gulo la dazuwaya, kà gi Sufəl anjak. ¹⁴ Gəfahà à ka akur à lig babay. Ama azlatatak anik la ahəŋ la tataka anjak la abà uwana asà à atà manəf matapla anja Balam, uwana atapla à Balak uwana apapətla azla Isərayel, kà mapad azlasləb matulay, ŋgaha kà atà anja madəh mabila aya babay. ¹⁵ Kiya uwaga babay azlaanik la tataka

* 2:7 2.7 1Musa 19.1-24 * 2:8 2.8 Yesayya 44.6

anjak la abà, tafèhèhøj bokuba azlauwana tanəfa matapla anja azla Nikolayya. ¹⁶ Tsa banja kità kà, pèh gay la ləv ala. Awkà, gəðà à awtəy à slaka anjak, gəp guvəl la azladza uwaga la katsakar uwana atsa à wanj la gay gulo la awtəy. ¹⁷ Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahøj mənə gay Zəzagəla. La azlauwana taguwà à uda la abà la makəfaslay, kiya uwaga gəðətsəkla kaf, uwana asà à ahøj la zagəla uwana azladza tasəl aw. Gəðàvəha à atà babay akur medfekuga uwana matsetsəral sləm mawga à vok gə. Dza la ahøj asəl sləm uwatà aw, say dza uwana abəzal uwaga pəra”, Yesu agəðf.

Wakità uwana Yesu atsetsər à azla Tiyatir

¹⁸ Yesu agəðf aya: “Bà gotənanj tsetsər gay uwanay à malika uwana anəjla azlaməna madiñal gəl à vok la Tiyatir. Aganay gay anja Kona anja Zəzagəla. Yewdi anja kà awutsəfay bokuba aləh akəl, azlaasik anja tawutsəfay wtsuwawuts bokuba ada vərzeganiga. ¹⁹ Gəsəl uwana kadèhøj. Gəsəl kà kawoya azladeda anjak, ngaha la mad à huma à gay, uwana kadinj gi gəl à vok, ngaha la mabasiñ anjak la sləray la abà, ngaha la masal anjak aya. Gəsəl kà uwana kadèhøj la uwaga kà, dafuwa la uwana kadəhəñ uwarà. ²⁰ Ama gi la gay lakəl anjak: Mis uwaga la tataka anjul, sləm anja Yezabel kà, avavara ka aw. Masla agəðfah kà: ‘Gi masla mapəhal gay ahəl anja Zəzagəla’, agəðf, ngaha kavəl tetəvi kà madz à ahøj la slaka anjak aw. Masla la uwaga atapla fida à azlamayà gulo, kà atà anja masokw à mabila à abà, la mapadəh sləb matulay. ²¹ Gəðəkəðəval kaslā à ahøj, kà masla anja mapəh gay la ləv ala; ama adà à huma à gay kà la madəh mabila anja pəra. ²² Kiya uwaga kà, gəðəmələl gəl à kəslah à afik la dufvats, adəsa ngəpə. Azlaməna matsatsələh vok atà nna tadəsa ngəpə babay, say banja atà tapəh gay la ləv ala, ngaha la masakal à tsəh ala sləray anja mis uwaga gesina bay aya. ²³ Ngaha aya bay kà, kəla dza uwana abəzal masik anja sləray anja, uwana adəhəñ. Gəðəkəf azlabəza anja, kà maham à ahøj mənə gay Zəzagəla anja masəlay, kà gi la uwana gənərez madzugway arel anja azladza, ngaha la uwana tatuwal à tsəh gesina. ²⁴ Lakəl anja azlauwana la gudəñ Tiyatir uwana tanəfà matapla anja mis uwanay aw, tasəl uwana azladza tazalalla godega nasiri anja seteni aw. Gay la ahøj lakəl anjatà aw. ²⁵ Ama gəðəwanj à afik kà, say uwana gətəpakulla pəra, tsərah à kaslā uwana gəðəwul à wanj. ²⁶ Azlauwana taguwà à uda la abà la makəfaslay, ngaha uwana takəs gay gulo tsərah à makəf gəl à ahøj, kiya uwaga gəðəpakatàla kà azlasufəl lakəl anja azlatsəhay gesina uwana tasəl gi aw. ²⁷ Maslay uwana gəðəvə à atà kà, uwana Baba gulo avà à gi babay. Tadəgahay azlasufəl dzanjdzanja, azlaməna madəh mawisiga kà tadədzamahatàla bokuba dza uwana adəf masik à gəl d’ohd’oh. ²⁸ A azladza uwaga gəðəvə à atà aya nuzla bebəñ. ²⁹ Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahøj mənə gay Zəzagəla”, Sufəl gami agəðf.

3

Wakità uwana Yesu atsetsər à azla Sardəs

¹ Yesu agəðf aya: “Aya gotənanj tsetsər gay uwanay à malika uwana anəjla mənə madiñal gəl à vok la Sardəs. Aganay gay anja dza uwana la Masasəfok Zəzagəla məðəf, ngaha la tsətsiliñ məðəf la ahəl bay. Gəsəl madèhøj anjak, ngaha azladza tadzugway kà: ‘Kak la sifa’, tagəf, tsa kak mamətsayga. ² Tsənàla, wəd vok à uda, tsa banja kiya uwaga aw, kadəmətsay tsokwfasl, kà uwana gənəñəñ sləray anjak kà adəhenla la yewdi anja Zəzagəla dadəñ aw. ³ Iyay awula à kak à gəl, uwana katəpla uwarà, la uwana kadà à abà, kapəh gay la ləv ala, ngaha kakəs gay gulo. Banja katənlə aw kà, gəðəda à awtəy la gurəh, la kokudə masəlay anjak bokuba masla à gəl. ⁴ Ama tekedika azlaanik la ahøj la slaka anjul la Sardəs, uwana tadəh ələh à lukut anjatà à vok aw, bokuba magəfay azlasətaka la ləv anjatà la tsəh. Atà azladza uwaga kà, tadəduw à vok lukut medfekuga, anina məðəday la slaka gə, kà uwana azlayla atà. ⁵ Azlauwana taguwà à uda la abà la makəfaslay kiya uwanay, gəðətsokwah atà à lukut medfekuga à abà, gəðəwis sləm anjatà ala la wakitə anja sifa la abà tetuw aw, la mok uwana gəðəgay la huma anja Baba gulo la azlamalika anja. La dzuwaya gəðəpəhay kà, azladza uwanay kà gəðəgəfay ndzer kà: Azlaanjulo. ⁶ Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahøj mənə gay Zəzagəla”, Yesu agəðf.

Wakità uwana Yesu atsetsər à azla Filadelfiya

⁷ Yesu agəðf aya: “Aya bà gotənanj tsetsər gay uwanay à malika uwana anəjla mənə madiñal gəl à vok la Filadelfiya. Aganay gay anja dza uwana asa à wanj la slaka Zəzagəla,

ngaha masla dziriga. Tsəkürəm anja madla à makoray anja sufəl David la ahəl anja. Banja gi gèdapəzl gamagày, dza aslala vok anja matsakalla à ama aya aw, ngaha aya, banja gi gèdatsak à gamagày à ama dza aslala vok anja mapəzllay aya aw.⁸ 8 Gəsəl madfehən anjak. Gəsəl kà kak la ahən la ndzəda aw. Tekedika kakəs gi gay la ahəl ala la dazuwaya, kà kak anjulo. Nəhən gèdapəzl gamagày kà kak, dza la ahən aslala vok kà matsakal à ama aw. 9 Tsəhəl sləm aganay uwana gèdàfehən la maham à ahən dza anja seteni: ‘Anu azla Yahudiya’, tagòd, tsa azla Yahudiya kà anja gay gə pəra. Gèdabay atà à wan, kà atà makədeəd à ka à ahən. Kiya uwaga tadəsəlay kà gəwoya ka.¹⁰ 10 Kak kafà sləm à gay gulo! Kabasan, kà uwaga gi babay gèdàfa à ka sləm, kà kak anja madàdiya à matəbəbay uwana à abà, adàsiya azladza gudən à vok à gəl gesina aw. 11 La katskats gèdàwula à wan. Tsizllaw à afik la makəsən uwana kabəzal, kà dza anja mazəb masak anja maduwij anjak aw. 12 Azlauwana taguwà à uda la abà la makədaslay kiya uwanay kà, gèdàbək atà à ahən, bokuba azlamanjuləv la gày anja Zəzagəla gulo la aku. Tatak la ahən adəkudək atà la uda aya aw. Gi, gèdətsetser à atà sləm anja Zəzagəla gulo à vok, la sləm anja gudən anja Zəzagəla gulo, gudən uwaga kà Urusalima mawga, uwana Zəzagəla adəsəl à ahən la zagəla. Gi la gəl gulo gèdətsetser sləm gulo mawga à azladza uwaga à vok babay. 13 Kəla dza uwana sləm la kəl, atsəb sləm à uwana Masasədok Zəzagəla apəhay à maham à ahən mənə gay Zəzagəla”, agòd.

Wakità uwana Yesu atsetsèr à azla Lawodikiya

14 Yesu agòd aya: “Bà gotənanj aya, tsetsèr gay uwanay à malika uwana anəhla mənə madinjəl gəl à vok la Lawodikiya. Aganay gay anja dza uwana sləm anja: Amen. Masla sayda dziriga, fida atsa à wan la gay anja aw. La ahəl anja la uwana Zəzagəla adəhà tatak gesina.¹⁵ 15 Gəsəl sləray anjak: Uwala kak iyaw akəl akəl magay aw, uwala kak iyaw matesl gə aw. Njələm kaga tekula anətà. 16 Ama bokuba uwana kak la tataka gə la abà kiya uwanay kà, gi gèdàkəsəl kà à vədah, puway. 17 ‘Gi gorobu, gəkor tatak, gèdahama gay à gorobu gulo à vok, gənəkudə anja tatak aya aw!’, kagòd. Tsa tekefika, kak masla kudə uwana vok ahamay, kak la diga, kokudə lukut, kak guləf bay. 18 Dəv gi kudə, kà gi anja matab à ka gay à ahən, sükw luwəluwə mawutsədayga la slaka gulo, kà kak anja magay gorobu. Sükw babay lukut medekuga, kà kak anja matsokw à abà, ngaha kà kak anja mahadla ziruwə anjak à ahən. Bà gotənanj sükw aya yohof yewdi la slaka gulo, kadəb à adi, kà kak anja manəhla ləla. 19 Haday ndzer kà, banja gəwoya dza kà, bà masla la uwana gəslahala vok, ngaha gətsetsehəhəhla. Tsa banja kiya uwanay kà, pəh gay la ləv ala, kapaka bokuba iyaw matesl gə aw.²⁰ 20 Tsəhəl sləm, gi la uwaga gèdatsizl à gay gamagày gəzalahay. Dza uwana atsənə mazalahay gulo, apəzl gi gamagày, gèdàda à gày à slaka anja, ngaha mədàzuw tatak may anu səla. 21 Azlauwana tadəguwa à uda la abà la makədaslay, kiya uwanay gèdàvə à atà tetəvi kà mas à wan anja madədzah madzay la kursi gulo la afik, bokuba uwana gəguwa à uda la abà la makədaslay, ngaha gèdàmadzay la Baba gulo la kursi anja la afik. 22 Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahən mənə gay Zəzagəla”, Sufəl Yesu agòd.

4

Kursi anja Sufəl Zəzagəla

1 Mok uwana gay uwanay akəd gəl à ahən, la lig la ahən, gənəhən anja gamagày mapəzl vok gə la zagəla. Gətsənə kuda anja dza uwana avəts à gi gay uwarə aya, kuda uwaga la uwana atsən bokuba matsənəy anja mazlazlinj. Dza uwatà agòd à gi: “Sà à afik à abanay, kà gi anja mapəhakala uwana adəsə à wan la huma la gay.” 2 Katskats Masasədok Zəzagəla akəs gi, ngaha gənəhən kursi Sufəl la zagəla la afik, dza ndzədfəffa la afik. 3 Mahəday aya anja dza uwatà la afik aw. Huf adi anja kà awutsəday, bokuba akur kuyah kuyahga, uwana tazalalla yaspe atà la saruwan, kursi uwatà makəsəl gay à adi gə la agəla makozakoz dikəts, azlaagəla makozakoz uwatà tawutsəday bokuba azlaakur uwaga babay.⁴ 4 Kursi anik dzik səla gəl anja ufad uwatà la afik azlamadzahaga tadzəh madzay la afik dikəts tatsòkwəh kà azlalukut medekuga à abà, garamusa aga atà lakəl, azlagaramusa uwatà kà madfehən ga la luwəluwə. 5 La kursi sufəl uwatà la afik la tataka la abà kà, mawutsəday la maslən mələ anja habaga asə à uda la abà aya. Aga la ahən la abətà babay azlaakəl mavats à ahən gə mədəf taudəy la huma kursi. Azlaakəl mavats à ahən gə mədəf uwaga kà, apəhla ala kà azla Masasədok mədəf uwana tadza à ahən la

✧ 3:7 3.7 Yesayya 22.22 ✧ 3:9 3.9 Yesayya 49.23; 60.14 ✧ 3:14 3.14 Hanəkəli 8.22 ✧ 3:19 3.19 Hanəkəli 3.12

✧ 4:3 4.3 Hezəkijel 1.26-28; 10.1

huma Zəzagəla. ⁶ Tatak anik la ahəŋ la huma kursi aya, masla aga bokuba takenedəka uwana dzəraŋ dzadzəraŋ.

Aga la ahəŋ azlatatak ufaď uwana taduw kursi la tataka à abà. Atà la sifa, huma la lig aŋatà kà bə yewdi, yewdi gesina. ⁷ Maftsa vok aŋa matera kà bokuba sikalaveri, masəla kà bokuba kokur kaslaga, mamakər kà, huď adi aŋha kà bokuba dza, ŋgaha maufad, kà zulo uwana ahoyay kagoday. ⁸ Atà ufaď nna kà, atà la gogozläh mukwa mukwa. Vok gesina kà, bə yewdi, yewdi tsatsabasla huďga la uda gə, takəs gay kà mahabay aw. Vəď la afats bə mahamay tahabay. Tagod:

'Kak Sufəl Zəzagəla, kak la maslay gesina tsikasla, kak tekula.

Kak la ahəŋ la sifa à mok uwana gudəŋ à vok la ahəŋ dadəŋ aw. Lakana kak la ahəŋ la sifa aya, ŋgaha kadàsa à waŋ à gudəŋ à vok.'

⁹ Kiya uwaga azlatatak ufaď uwaga la sifa tahaba à dza madza madzayga uwaga la kursi Sufəl la afik, masla uwana adzà à ahəŋ aŋa tsərah à awtəy, mazləbay, la maslay, la kikyag ayay la masla. ¹⁰ Bə kəla uwana tadəhəŋ kiya uwaga kà, azlamadzahaga dzik səla gəl aŋha ufaď uwaga kà, takədəc à ahəŋ la huma Zəzagəla, uwana madza madzayga la kursi Sufəl la afik, ŋgaha masla uwana la sifa aŋa koksikoksi, atà tazləba masla, tahaläh garamusa lakəl ala, tabakäh à vədah la huma aŋha. ¹¹ Tagod: 'Haday, kak Sufəl Zəzagəla gami. Kak uwana kadahà tatak gesina, kà uwana asà à ka, à uwana kadahà à atà, ŋgaha atà la ahəŋ lagwa. Ka uwaga à uwana, kaslā kà, kəla uwabeyuwi aŋa mazləb ka, la masləkaw ka, ŋgaha la makəs mapəhay aŋak babay.'

5

Gay aŋa wakità la magadzaw

¹ ŋgaha gəŋəŋə wakità makələbaga la ahəl aŋa dza uwatà la kursi Sufəl la afik. Masla adakəsay la ahəl kaf. Wakità uwatà matseseray gə gay sala nna. Madfahalla masəlay à vok gə slaslaka məďəf, kà dza aŋa mapəzlay aw. ² La lig la ahəŋ gəŋəŋə məŋ malika uwana anavà la kuda zləkkà: "Uwa à uwana azlayla kà mafətäl masəlay uwanay la vok ala uwa? ŋgaha mapəzlay wakità uwanay uwa?", agod. ³ Dza la ahəŋ azlayla aw, adəgay dza uwana la vədah adəgay la zagəla, adəgay la tsəh iyaw, adəguwan mali bay kà, taslala vok aŋa mapəzlay wakità uwanay, ŋgaha aŋa manərəz huď aŋha aw. ⁴ Kà uwana dza la ahəŋ azlayla aŋa mapəzlay, à kà manərəz huď gə gə aw, gətəw mənğa, kà uwatà. ⁵ Kiya uwaga tekula la tataka azlamadzahaga uwaga la abà agod à gi: "Katuw aw, aganay dza uwana bokuba sikalaveri, uwana asa à uda la tsəhay aŋa Yahuda la abà, masla mayyi à tsəh ala aŋa sufəl David, masla akədāslla tatak gesina la maduwəŋ. Masla adəfətalla vok ala masəlay uwaga, ŋgaha adəpəzlay wakità uwaga", agod à gi.

⁶ La mapəh uwaga la gay ala kà, gəŋəŋə dza la slaka matsizlla ala dzawwa la tataka azlakursi la abà. Azlamadzahaga la azlatatak ufaď uwaga la sifa, takəsalla gay à adi. Maftsa à vok aŋha kà bokuba magadzaw, la yewdi gulo kà bokuba takədəy uwarə. Dzadzukwa dərəw məďəf lakəl, ŋgaha yewdi məďəf la vok babay. Azlayewdi uwaga kà azla Masasədok məďəf uwana tadza à ahəŋ la huma Zəzagəla, uwana Zəzagəla aslala atà gesina à gudəŋ la vok. ⁷ Kiya uwaga magadzaw uwaga azà à vok à awtəy, azəb wakità la ahəl kaf aŋa masla madza madzayga uwaga, la kursi Sufəl la afik. ⁸ Mok uwana adazəbay kà, azlatatak ufaď uwaga la sifa, ŋgaha la azlamadzahaga dzik səla gəl aŋha ufaď uwaga takədəc à ahəŋ gesina aŋatà, ŋizir agə atà la ahəl gesina, kəla uwabeyuwi aŋatà azlatasə dewni la ahəl aŋatà, mahənłaga la kidzidzi. Uwaga apəhla ala kà madəv kuďa aŋa azlaməna gay Zəzagəla.* ⁹ Atà tahəb mahabay mawga. Tagod:

'Kak azlayla kà aŋa mazəb wakità uwanay aŋa mapəzlay, kà uwana takəd' ka, ŋgaha kapəzlay gəl à azladza à ahəŋ.

La aŋiz gəl aŋak kà awilla atà à slaka Zəzagəla.

Azladza uwaga tasà à uda la azlatsəhay la azlagay anik anik gesina.

ŋgaha tasà à waŋ la makəd' gəl à ahəŋ gudəŋ à vok gesina.

¹⁰ Kak kapəkətala, kà azlatsəhay aŋak, kà uwana kak, Sufəl gə gə.

Kadahanj kiya uwanay, kà mapəkətala kà azlaməna makad' tatak à Zəzagəla gami.

Atà tadəgay azlasufəl, lakəl aŋa azladza gudəŋ à vok.*

¹¹ La lig la ahəŋ gəŋəŋə azlamalika aŋuwaw, uwana dza aslala vok aŋa matugway aw. Tanudə kursi à abà la azlatatak ufaď uwaga, ŋgaha la azlamadzahaga uwaga gesina dikəts. Kiya uwaga gətsənə mahabay aŋatà. ¹² Tahəb la kuda zləkkà à magadzaw uwana takəd' kà aŋa matulay:

'Ndzer, masla azlayla kà mazəbay la slaka azladza maslay,

La gorobu, la matsihila, la ndzəda,

La mazləbay, la masləkəway, ɲgaha la kikay gesina la ahəl aɲha.

Kay nənəwwəɲ mənɲa aɲha tsi!

tagòd. ¹³ La lig la ahəɲ aya gotənəɲ dèwdèw tatak uwana Zəzagəla adahəɲ kà, tahàb mahabay azlauwana la zagəla, azlauwana la gudəɲ la vok, azlauwana la tsəh iyaw, ɲgaha la azlauwana la iyaw la abà, gesina aɲatà tahàb mahabay tekula:

'Məzləba dza uwana la kursi la afik, ɲgaha la uwana maftsa à vok aɲa magadzaw uwana tadàhla matulay məsləkaw atà.

Masley gesina atsa à waɲ kà la atà la ahəl. Mətatasl atà à ahəl aɲa koksikoksi.'

¹⁴ Mok uwana tahabay kiya uwanay azlatatak ufaɖ uwaga tagòd: "Amen", ɲgaha azlamadzahaga uwaga takədédɖ à azlauwana à ahəɲ la kursi la afik, ɲgaha tasləkəw atà aya.

6

Magadzaw ahəl wakità aɲa mapəzlay

¹ Mok uwana magadzaw azəb wakità masəlay mədɖəf uwaga à ahəl, kiya uwaga gənəɲà adzəkà mapəzl masəlay matera. Mok uwana adafətalla à ama ala, matera aɲa azlatatak ufaɖ uwaga la sifa agòd: "Sà à waɲ", matsəɲay aɲa kuda aɲha bokuba habaga.

² Kiya uwaga gənəɲà pəlis medəkuga asà à uda. La pəlis uwatà la afik kà, dza la afik alək la ahəl, tavəl garamusa. Ahəl la makəfaslay kà mats à atà à ahəɲ.*

³ Magadzaw afətà à masəlay masəla la ama ala. Gətsənà masəla aɲa azlatatak ufaɖ uwaga la sifa agòd aya: "Sà à waɲ." ⁴ ɲgaha pəlis anik asà à uda aya mativga vikuza. Dza uwana la afik aya kà, masla masəlla guvəl à gudəɲ à vok, kà azladza aɲa makad vok kà à atà kà atà. Tavəl magol katsakar à ahəl.

⁵ ɲgaha aya magadzaw afətà masəlay mamakər la ama ala, ɲgaha gətsənà mamakər aɲa azlatatak ufaɖ uwaga la sifa agòd: "Sà à waɲ." Gənəɲəz, ɲgaha gənəɲà pəlis marsiga, dza uwana la afik kà daram la ahəl. ⁶ Gətsənəɲ tatak anik atsən la tataka azlatatak ufaɖ uwaga la abà la sifa, bokuba kuda aɲa dza. Masla agòd: "Sili aɲa sləɲay mavakay tekula aɲa dza kà asukway pəra kà hi tsergi nagoda tekula pəra, ama mərəkala kà, nagoda makər." Agòd à dza aɲa pəlis aya: "Kà aɲa aməl la iyaw aɲa matavərək maməsliga kà, tadzà à ahəɲ kiya uwanay", agòfal.

⁷ ɲgaha magadzaw afətà masəlay maufad la ama ala, ɲgaha gətsənəɲ maufad aɲa azlatatak uwaga la abà la sifa, agòd: "Sà à waɲ." ⁸ Gənəɲəz à awtəy, ɲgaha gənəɲəɲ pəlis uwana kuforuh ruhga. Dza uwana la afik kà, sləm aɲha kà: Mamətsay, ɲgaha mezewi anəfay la tseh. Tavà à atà ndzəda kà aɲa makad à gay tekula aɲa maufad, aɲa gudəɲ à vok à gay. Tadàkadah atà la katsakar, la may, azladza anik tadəmətsah à dɖuvats à abà ɲgaha azlatatak fəta tadàkadah azladza anik aya.

⁹ Kiya uwaga magadzaw afətà à masəlay mazlo la ama ala. ɲgaha gənəɲà azlamasəsədok aɲa azlamamatsay la slaka uwana takadəh tatak à Zəzagəla. Takad azladza uwaga, kà uwana tazà gay Zəzagəla, ɲgaha kà uwana tagòd à gay aɲa Yesu à afik.

¹⁰ Mok uwana gənəɲà atà tawiyà la kuda zləkkà, tagòd: "Sufəl, kak tsikasla, kak dziriga. Azladza uwaga la vədah, la gudəɲ la vok takad anu, ma mana kadəhəɲ aɲa madàh à atà seriya à gəl ma, ɲgaha kà seriya aɲa matəf atà à gəl suwaɲ ma?" ¹¹ ɲgaha tatsòkwàh atà à lukut medəkuga à abà, tagòd à atà: "Basəwwəɲ ɲuv aya, say takad azladedə aɲkul, uwana tanəfa Zəzagəla, bokuba uwana takad akul dadəɲ. Baɲa takad atà bokuba uwana Zəzagəla agòd kà pəra, seriya adəgay la ahəɲ."

¹² ɲgaha aya magadzaw afətà masəlay maməkəwa uwatà la ama ala. Gənəɲà kutso abələkà à vok, afats apakà marsiga. Ama təla kà apakà mativga vikuza bokuba aɲiz.

¹³ Azlatsəsilin tasòkw à ahəɲ la zagəla bokuba mayyay ahəf ɲuwazlaga, uwana magol kular asakwəɲ à ahəɲ. ¹⁴ Zagəla azalà tuwiz, bokuba uwana takəl tatak à abà. Azlagudəɲ uwana iyaw akàs atà à gay à adi tazàhla. Azlagudəɲ gesina tabàdàhà vok la slaka aɲatà la abà. ¹⁵ Kiya uwaga azladza gudəɲ à vok gesina tahàdàhà vok à gudəɲ à afik, ɲgaha tahàdàhà vok à azlatsakur uwana à agu la tataka azladzəgəla la abà. Azlamayà la azlauwana azlamayà aw gesina tahòy kà mahadàh vok à ahəɲ. Amiyaka azlasufəl, la azlamadzahaga, la azlaməɲga aɲa azlaslodzi, la azlagorobu, la azlauwana sləm aɲatà atsən ala, gesina aɲatà tahàd kà mahad vok à ahəɲ. ¹⁶ Atà tadàv kufa à azlagudəɲ la azladzəgəla: "Fətəkəw anu à gəl, kamkam, tsakəw anu à ama, kà dza uwana la kursi la afik aɲa manəɲ anu aw, ɲgaha kà magadzaw aɲa madukw à anu seriya à gəl aw!

¹⁷ Iyay, mavakay aɲa mənɲ mapak ləv aɲha kà adaslay. Uwa à uwana aslay aɲa matəfal à gay ala uwa? Dza la ahəɲ aslay aw", tagòd.

* 6:2 6.2 Zakari 1.8; 6.3,6

7

Malika adäh masölay à azladza anja Zözagöla à vok

¹ Kiya uwaga la lig anja uwaga la ahönj aya, gönönjä azlamalika ufac tatsizlla ala la gay tər gudönj ufac kà makəs azlakular ufac anjatà à ahönj, uwana tadəfay, kà atà anja madəfay à gudönj à abà aw kà mawis kutso amiyaka iyaw ngaha la azlaahäf ala aw.
² Gönönjä malika anik uwana asà à wanj la mas à afik afats, tatak madäh masölay à azladza à madəgay anja Zözagöla, uwana la sifa, la ahäl. Azalà azlamalika ufac uwaga à tsöh azlauwana Zözagöla, avà à atà ndzəfa kà mawis gudönj à vok ala, ngaha la iyaw ala.
³ Agöf à atà: “Kawisaw kutso, iyaw, ngaha la azlaahäf ala dadän aw. Kùdäw tsəräh à uwana anu mənäh masölay anja Zözagöla à madəgay anja azladza anja dadän.”^{*}
⁴ Kiya uwaga la lig la ahönj atà tapəh à gi matugway anja azladza uwana tanahà à atà masölay uwaga à madəgay. Tagà dəbow dzim bəzi anja dzik ufac, gəl anja ufac. Azladza uwanay kà mayyi à tsöh ala anja azlatsəhay Isərayel gesina.
⁵ Aga la ahönj dəbow kulo gəl anja səla mayyi à tsöh ala anja Yahuda, dəbow kulo gəl anja səla la mayyi à tsöh ala anja Ruben, dəbow kulo gəl anja səla la mayyi à tsöh ala anja Gad.
⁶ Dəbow kulo gəl anja səla la mayyi à tsöh ala anja Asər, dəbow kulo gəl anja səla la mayyi à tsöh ala anja Neftali, dəbow kulo gəl anja səla la mayyi à tsöh ala anja Manase.
⁷ Dəbow kulo gəl anja səla la mayyi à tsöh ala anja Səmeyyon, dəbow kulo gəl anja səla la mayyi à tsöh ala anja Levi, dəbow kulo gəl anja səla la mayyi à tsöh ala anja Isakar.
⁸ Dəbow kulo gəl anja səla la mayyi à tsöh ala anja Zabulon, dəbow kulo gəl anja səla la mayyi à tsöh ala anja Yusufu, ngaha dəbow kulo gəl anja səla la mayyi à tsöh ala anja Benyamin bay. Azladza uwaga gesina taga la masölay anja Zözagöla la vok anjatà.

Maham à ahönj dza dagay gudönj à vok gesina

⁹ La lig anja uwaga la ahönj, gönönjä maham à ahönj dza anjувaw, dza aslala vok anja matugway aw. Azladza uwaga tasà à uda la azlatsəhay, la azlagay, ngaha tasà à wanj la makəf gəl à ahönj gudönj à vok gesina. Tatsizlla à ahönj la huma kursi, ngaha la huma anja magadzaw, tatsökwäh lukut medəkuga à abà, ngaha la azlababasl la ahäl anjatà kà mazləbä.
¹⁰ Tawiyà la kuda zləkkä: “Zözagöla uwanay la kursi la afik atà la magadzaw la uwana tatəfä anu”, tagöf.
¹¹ Azlamalika gesina tatsäzl à makəla kursi, ngaha à makəla anja azlamadzahaga, ngaha à azlatatak ufac uwatà la sifa. Atà takədédäh à huma kursi, la makas gəl à vədäh, ngaha tasləkàw Zözagöla,
¹² la magəfay: “Hadəy gä, mazləbəy, la matsihila, la kikay gami, la masləkaway, la ndzəfa, la makoray gesina taga la ahäl anja. Azlauwaga kà Zözagöla gami akoray anja tsəräh à awtày. Amen!”
¹³ Tekula anja azlamadzahaga dzik səla gəl anja ufac uwaga agöf à gi: “Kasəl azladza uwaga tatsökwäh lukut medəkuga à abà ay? Tasà à wanj à ama la?”
¹⁴ Gəgöfal: “Kak, la uwana kasəl mənğa, gi kà, gesəl aw.” Agöf à gi: “Azlauwanay kà, azlauwana tasà ngərpa mənğa, uwana adüwa ndzəfa anjatà la makəf gəl à ahönj. Tadzà à ahönj la dziriga la abà. Atà tapaläh lukut anjatà kuzekaka la anjiz anja magadzaw la abà.
¹⁵ Kà uwaga à uwana tatsizlla à huma kursi anja Zözagöla, tazləb masla la mənğay anja la aku, mavakay la mahənay, dza uwaga la kursi la afik adəhub atà à gəl.
¹⁶ Kà may anja maz atà à aya aw, nəlay anja makəs à atà babay aya aw. Marabak anja maslərnəhatälä aya aw, tatak anik la ahönj adəvəf à atà la maz à atà aya aw. Kà mana ma?”
¹⁷ Kà uwana magadzaw, uwana la tataka anjatà la kursi la afik adəgay masla manənğla atà. Adədahlä atà à gay anja iyaw anja sifa uwana akəlay. La kitä aya, Zözagöla adəslasladäh atà iyaw tugwi la adi ala.”^{*}

8

Magadzaw afəta masölay maməfəf à wakità la vok ala

¹ Bə gotənəy magadzaw afətä masölay maməfəf la ama ala, uwana agə makəf gəl à ahönj. Mok uwana adafətäl la ama ala, tatak gesina la zagöla ‘Məslək’, tagöf aw, tadzà à ahönj titi tsəräh à tenma anja sa.
² Ngaha la lig anja madz à ahönj titi la ahönj, gönönjä azlamalika məfəf uwana tatsäzl à ahönj la huma Zözagöla, tabəzäl mazlazlij məfəf la slaka anja.

³ La abatä aya, malika anik asà à wanj la slaka makəf tatak la abà, la ahäl anja daram madəhənj gə la luwəluwə, taväl kidzidzi anjувaw, kà masla anja mabəkay, la slaka makəf tatak luwəluwə gə uwatà la afik, la huma Zözagöla, ngaha la mavəy la slaka gə azlamadəv kufa anja mənə madinjəl gəl à vok.
⁴ Kəsək anja kidzidzi uwana aduwal à akäl à tsöh, asà à malika uwatà la ahäl ala dzedzika la huma Zözagöla, ngaha la madəv

kudfa anja azladza anja, uwaga adål à sløm à agu aya. ⁵ Mok uwana malika adadehøj kiya uwanay, azøb daram uwaga ahønàn ala la slaslay akål la slaka makad tatak la abå, ngaha aduw à vødfah. Uwaga maslöh mælo anja habaga atsøn azlamawutsødfay tawutsødfah, ngaha kiya uwaga kutso abølakå vok.

*Azlamazlazliñ mødføf**

⁶ La lig la ahøj, azlamalika mødføf uwana mazlazliñ agähå à atå la ahål tadfahå vok à ahøj kå anja matsay.

⁷ Malika matera atså mazlazliñ anja, matsatsay iyaw, la akål mahohødelaga la anjiz asuw à vødfah. Kiya uwaga tekula anja mamakør anja gudøj à vok ababøh à gay, la azlaahåf la azlakøsaf anja gesina, dfenna.

⁸ Malika masøla atsa mazlazliñ anja aya. Azøb møj tatak anik, bokuba møj gudøj dzøgørha, akål ababøhay la afik. Atsål gøl à magol dørvø à abå, ngaha tekula anja mamakør anja iyaw apakå anjiz. ⁹ Azlatatak uwana la iyaw uwaga la abå gesina, tamøts à gay hønats; azlakøslah iyaw tawis ala gesina babay.

¹⁰ Kiya uwaga aya, malika mamakør atså mazlazliñ anja. Magol tsøtsiliñ møjga abødf à vok la zagøla, uwana ababøhay bokuba akål atøf à azlamukwå à tsøh la azlazløløk.

¹¹ Tsøtsiliñ uwatå kå sløm anja kå vøzlmadfiya. Tekula anja mamakør anja iyaw uwatå, apakå dfihakak, mok uwana azladza tas iyaw uwatå, anjvuv la tataka anjatå la abå tamøts, kå iyaw uwatå.

¹² Bå gotønøj aya, malika maufad atså mazlazliñ anja. Mok uwana adatsay, tekula anja mamakør anja afats, ngaha la tøla apakå marsiga tsiktsetsik. Ngaha tekula anja mamakør anja azlatsøtsiliñ apakå marsiga babay. Kiya uwaga tauf aya aw. Tekula anja mamakør anja mavakay anja afats atøf à zagøla, ngaha tekula anja mamakør mahønay vøf anja tøla atøf à zagøla bay.

¹³ La kitå aya, gønøjå zulo uwana ahoyay la løv zagøla la abå la magødfay: "Kayyå, kayyå, ngørpa adågay la azladza uwana la vødfah. A baña mazlazliñ anja azlamalika makør uwanay adåtsønay, ndzer", agødf.

9

¹ Kiya uwaga aya gotønøj malika mazlo atså mazlazliñ anja aya, gønøjå tsøtsiliñ uwana atøf à ahøj la zagøla. Tavål tsøkurøm kå mapøzlla aføk zøjzøjga kå møløs tuwisl la abå. ² Mok uwana tsøtsiliñ uwaga apøzl aføk uwaga, dføhut, køsøk aså à uda la abå bokuba køsøk anja matøl tatak. Køsøk uwatå atsåk afats à ama tabadamma akøl møløs. ³ Dømdadøm dawanagay aså à uda la køsøk uwaga la abå, taslöhå gøl à gudøj à vok. Tavå à atå ndzødfa kalkal la anja aliz. ⁴ Ngaha tagøf à atå kå: "Pådåw azlakøsaf, la azlaahåf uwana atså à uda la kutso la abå aw, ama dåw kå mawisøñla kå azladza gudøj à vok ala pøra, azlauwana kokudfa masølay anja Zøzagøla la madøgay anjatå", tagøf à atå. ⁵ Tavå à atå tetøvi kå anja makad azladza aw, ama pøra kå: "Katørøbaw atå", tagøf atå, taterøb atå kå anja tøla zlo, azlamazay uwaga kalkal la mazay anja aliz. ⁶ La tøla zlo uwatå, azladza tayåh mamøtsay ama tabøzål aw. "Så à wan, så à wan", tagøf à mamøtsay, ama mamøtsay ahøj atå à ahål.

⁷ Nøjåw azladawnagay gå uwana tadøbåni à vok la azlapølis anja guvøl, tapakå tatagå à gøl, bokuba garamusa anja luwåluwå. Huf adi anjatå kå kalkal la huf adi anja azladza.

⁸ Ngaha anjiz anjatå kå bokuba anjiz anja azlamis, slid anjatå kå kiya anja sikalaveri.

⁹ Tawådåh slarapay anja ada à makøla anjatå, ngaha mahohumay anja azlagogozlån anjatå kå, kalkal la mahohumay anja azladørkwa uwana azlapølis tabiyøj, kå mad à guvøl aya. ¹⁰ Gudaz anjatå godam la gay, bokuba anja azlaaliz, gudaz anjatå uwaga la uwana avå à atå ndzødfa kå mamalla azladza tsøråh à tøla zlo. ¹¹ Møjga anjatå kå masla la uwana akoray lakøl anja aføk zøjzøjga uwaga, sløm anja la gay ibøranøjkwøen kå

Abaddon, ngaha la gay gørek kå *Apollyon* (Uwana asal magødfay: masla makalån tatak à ahøj)

¹² Kiya uwanay à uwana, ngørpa matera adå à lig. Aganay azlanjørpa søla tazlanjalay aya zlå.

¹³ Kiya uwaga malika mamøkwa atså mazlazliñ anja, gøtsønøj kuda, atsøn la gay ndzika ufad anja slaka makad tatak, uwana madfehøj gå la luwåluwå la huma Zøzagøla.

¹⁴ Kuda uwaga agøf à masla mats mazlazliñ uwaga la ahål à ahål: "Pålla azlamalika ufad uwaga ala, uwana tawådåh atå à ahøj la gay møj mukwå uwana tazalalla Eførat."

¹⁵ La abatå kå, tapølla atå ala. Zøzagøla adfåh atå à ahøj la mavay uwanay la abå, la tøla uwanay la tsøh, la mavakay uwanay, ngaha la sa uwanay, kå takad tekula anja mamakør anja azladza gesina. Kå anja uwaga à uwana: "Pålla atå ala", kuda agøf à malika uwaga.

¹⁶ La abatà aya tapèhgöla maham à ahönj anja azladza uwana tahàd à pölis guvël à afik, “Million dadèrmokw söla”, tagòd à gi. ¹⁷ Kiya uwaga à uwana gөнөнjä la mafetal la ama ala uwaga la abà. Gөнөнjä azlapölis uwaga, ngaha azlamöna madäh à afik. Tawàdäh vok ala la azlaslarapay anja guvël mativga bokuba akäl, azlaanik makur zagöla kurzagöla, azlaanik mazaybëzi zaybëzi. Akäl kësök ngaha huleli tasà à afik la manjula anjatà dzedzika. Göl anja azlapölis anjatà kà, bokuba göl anja azlasikalaveri. ¹⁸ Akäl, kësök ngaha huleli la uwana tagà azlanjörpa makör uwana tasà à uda la manjula anja azlatatak mapölis pölis gä uwaga, takäcf tekula anja mamakör anja azladza à gay. ¹⁹ Kiya uwaga la manjula kuda anjatà la ahönj, la uwana ndzöda atsà à afik, ngaha aya gudaz anjatà kà bokuba göl bebi, kà matsähla azladza.

²⁰ Ama kà matëm à ahönj anja azladza uwana tamatsäh à njörpa uwaga ahäl aw, tasakà à madfehönj anjatà la tsöh ala aw, tadà à huma à gay la maködédähay à azlamasasödök à ahönj, ngaha la maslökawäh à azlaföla, uwana tadähähän la luwäluwä, la gursu, la ada wörzeganiga, la azlaakur, ngaha la azlaahäf. Tekedika azlaföla uwaga kà, tatak la ahönj tadfehönj aw, taslala vok kà anja manönjla aw, tatsön slöm aw, ngaha taday bay aw. ²¹ Azladza uwaga tadà à huma à gay la makäcf dza babay, tasakäl à tsöh ala aw. Tayähäh azlaahäf anik anik, ngaha tadähähà mabila la mad à göl gesina. Tetuw, tetuw löv aväl à atà à gay kà mawul à lig aw.

10

Malika uwana la bëzi wakità la ahäl

¹ Kiya uwaga la lig la ahönj, gөнөнjäñ magol malika anik, atsà à ahönj la zagöla, lukut anja uwana la vok kà habaga, mafafäcf göl à uda gä la göla maköz aköz, huäf adi anja kà awutsödäy bokuba afats. Asik anja kà bokuba aläh anja akäl. ² La ahäl anja malika uwaga, bëzi wakità mapözlay gä la ahäl. Adüw asik ahäl kaf anja kà, tatak la ahönj tadfehönj aw, taslala vok kà anja manönjla aw, tatsön slöm aw, ngaha taday bay aw. ³ Abädmä la kuda zlökkä, bokuba mawiyay anja sika-laveri uwana atawahay. Mok uwana abädmä, götsönà maslöh mëlö mädöf anja habaga awulälla. ⁴ Ama mok uwana habaga aslöh mëlö mädöf, göwoyà matsetser uwana tapèh, ama götsönà kuda anik asà à ahönj la zagöla agöd à gi: “Kösänj kà anjak pära, à uwana habaga apèh, awkà katsetser aw”, agöd à gi.

⁵ Kiya uwaga malika uwana afä asik anik à döröv à göl, ngaha anik à kutso à abà, adzilä ahäl kaf anja à zagöla. ⁶ Masla azüw mawadäy la slöm anja Zözagöla uwana adöv à gay aw, à masla uwana adähà zagöla, ngaha la azlatatak uwana la afik gesina, adähà kutso la azlatatak uwana la abà gesina, ngaha adähà iyaw aya la azlatatak uwana la iyaw la abà gesina aya gotönanj. ⁷ Agöd aya: “Banja mazlazlinj anja malika mamädöf adätsönay, Zözagöla adähönönj ala madzugway anja nasiri anja, say tatak uwaga gesina kà apakä vok la katskats, bokuba uwaga Zözagöla apèh à azlamöna mapöh à atà gay à ahäl kà mapäh à azladza.”

⁸ Ngaha kuda uwana götsönänj dagay la zagöla, agöd à gi aya: “Häd, zèb wakità mapözlay gä uwaga la ahäl anja malika, uwaga asik tekula la döröv lakël, ngaha asik anik la kutso la abà”, agöd à gi. ⁹ Kiya uwaga, göhäd à slaka malika, gögödäl: “Và à gi bëzi wakità uwanay.” Masla agöd à gi: “Päd, adägay namnam la gay anjak, bokuba zuway mazuway, ama banja kadädugw à gay ala kà, adägay dëhakak la huäf anjak”, agöd à gi. ¹⁰ Ngaha gözèb wakità uwaga la ahäl anja, göpäd. Ndzer, agä namnam la gay gulo bokuba zuway mazuway hadäy. Ama mok uwana gödadugw à gay ala kà, dëhakak, hadäy.

¹¹ Tagöd à gi aya kà: “Say kaz panjaw anja Zözagöla uwana apèh lakël anja azladza uwana tasà à uda la azlatsöhay la azlagay anik anik gesina, uwana tasà à wanj la makäd göl à ahönj gudönj à vok gesina, ngaha la azlasufël anjatà”, tagöd à gi.

11

Azlamöna sayda söla

¹ Kiya uwaga aya, tavä à gi golakay, bokuba azöva magurla tatak, tagöd à gi: “Häd, gür gäy Zözagöla, ngaha slaka makäd tatak aya. Tügw azladza uwana tadöv kufa à Zözagöla la aku babay aya”, agöd à gi.* ² “Ama kagur lig gä aw, säkal kitä”, agöd à gi. “Kà uwana masla kà göv à azladza uwana azla Yahudiya aw. Atà tadähäba à ahönj ala gudönj anja Zözagöla tsikasläga, tsөрäh à töla dzik ufäcf göl anja söla. ³ La lig la ahönj gödäslöl azlamöna sayda gulo söla à awtäy”, agöd. “Uwana tadätsokwah à lukut kufa

* 11:1 11.1 Hezëkiyel 40.3; Zakäri 2.1-2

à abà, ñgaha atà tadàza gay gulo à azladza la kaslà uwatà tsèràh à mavakay dèbow la dadèrmokw sèla bèzi anha dzik mukwà”, kiya uwaga agòd à gi.

⁴ Azlamèna sayda sèla uwaga kà atà sèla nna, tatsizilla à ahøj la huma Sufèl Zèzagèla uwana akor gudøj à vok. Atà azlaaháf sèla uwana tazala atà ala kuvu. Gotènanj azlafènès sèla aya babay. ⁵ Baña dza asal macdàh à atà mawisiga à vok kà, akàl atsa à wanj la gay anjata la awtày, ñgaha ababèh atà à gay. Kiya uwaga tadàkad atà azlauwana tayàh macdàh à atà mawisiga à vok. ⁶ La kità, la mok uwana tadàzah sayda kà, atà la maslay kà matsakay à zagèla à ama, kà iyaw anja manòf à ahøj aw. Gotènanj, atà la maslay anja mapak iyaw ala kà anjiz, ñgaha atà la maslay kà anja mav azlanjèrpa anik anik à azladza gudøj à vok, bokuba uwana asa atà bay.

⁷ Ñgaha mok uwana tadàdèw maz gay anjata à gay, tatak fèta asa à uda la afèk zøjzøjga la abà, akès atà la guvèl, aduwa atà, ñgaha akaf atà. ⁸ Kiya uwaga azlavok anjata kà, tadàdza à ahøj la tetèvi anja møj huf gudøj la slaka uwana tatàsìl Sufèl anjata à aháf à adi uwarà. Gudøj uwatà tazalalla la gay zil kà Sodom banjaw Mìsèra, kà uwana azlagudøj uwaga tadàhàhà mabila, takès gay anja Zèzagèla aw. ⁹ Hadfay, azladza uwaga tasà à uda la azlatsèhay anja azlagay, ñgaha tasà à wanj la makaf gèl à ahøj gudøj à vok gesina. Atà tadànèrèz mazimnekid, mavakay makèr la tenma, tadàvè tetèvi kà mal atà aw. Kà uwana tagòd kà: “Atà sèla nna, tawisà gudøj à vok ala”, tagòd. ¹⁰ Kiya uwaga azladza gudøj à vok tadàbak agèr à abà, kà uwana takàd azladza sèla uwaga. Atà tadàhababah azlamadevaday la mavàhay azlatatak deyday babay. Kà uwana azladza sèla uwaga tasàh zladfa à azladza gudøj. (La maz gay Zèzagèla uwana tazàhàn) ¹¹ Iyay, mok uwana mavakay makèr uwaga la tenma adada à lig, Zèzagèla afeta atà afad à gèl kà mawulla atà ala sifa, ñgaha hahadzàk, tatsazilla ala. Azladza uwaga la abatà gesina guba akès à atà. ¹² Mok uwana tatsizilla, tatsèna kuda atsèna à ahøj la zagèla, agòd à atà: “Sàw à afik à abanay!” Kiya uwaga tada à afik la habaga la abà, la yewdi anja azlamèna mèzam anjata. ¹³ La mok uwatà kutso abèlaka vok møjga, tsèràh à uwana tenma anja makulo anja gudøj uwatà azala tetuwa. Mabèlaka vok anja kutso uwaga kà, azanj ala dza dèbow mèdèf, matèm à ahøj anja azladza uwaga kà, guba akès atà møjga. La vuf uwaga tanèna møjga anja Zèzagèla, taslèkaw.

¹⁴ Kiya uwanay à uwana ñgèrpa masèla uwanay ada à lig. Ama hanjèli, aganay mamakèr uwana azlanjalay aya gotènanj zlà.

Mazlazlij makèfal gèl anja malika

¹⁵ Kiya uwaga malika mamèdèf atsà mazlazlij, azlakuda tatsèna à ahøj la zagèla, ñgaha tagòd: “Sufèl Zèzagèla gami la masla uwana mafal dzakwa à gèl gèl kà: Gudøj à vok adagay la ahàl anjata kà makoray. Makoray anjata adànats à gay ala aw.” ¹⁶ Mok uwana takèd gèl à uwaga, azlamadzahaga dzik sèla gèl anja ufad uwana tadàhà madzay la kursi la afik, la huma Zèzagèla takàsà gèl à ahøj la huma anja, tazlèbà, ¹⁷ tagòd:

“Hadfay, Sufèl, kà uwana kaga la ahøj la sifa dagay uwarà. Ñgaha kak la ahøj la sifa lakana aya. Kikay mègod à ka, kà uwana tatak gesina adada à ka à ahàl, kagay la kèl gèl gesina.

¹⁸ Kiya uwaga azladza uwana tasèl kak aw, atà tapakà lèw lakèl anjak. Ama la uwaga kà, sà anjak adaslay kà kak anja mapak lèw lakèl anjata suwanj. Kaslà adaslay à uwana kadàh seriya à azlamamatsay à gèl. Ñgaha aya kaslà adaslay à uwana kavà masik à azlamayà anjak, uwana kapèh à atà gay à ahàl anja mapàh à azladza. Kak kadàvè masik à azlatsèhay anjak gesina, azlamøjga, bà amiyaka bà la azlabèza gèl bay. Azlauwana takès gay anjak gesina, kadavà à atà masik. Ama kà anja azlauwana tawis gudøj ala kà, kaslà adaslay à uwana kak anja madàzahatàla suwanj!”¹⁹

¹⁹ Mok uwana tadèw uwaga à gay gesina, gày anja Zèzagèla apèzlla vok la zagèla, tsèràh à uwana azladza tanèna sahar makès vok slawda apokwà vok la paraka. Azlamawutsèday tawutsèdàh bèzlabèzìl, habaga aslèh mèlo, kutso abèlakà vok, ñgaha matsatsay iyaw anis à ahøj anjuvaw.

12

Slagèla la zagèla

¹ Kiya uwaga møj nadzipo apèhla vok ala la zagèla. Aganay nadzipo uwaga: Mis tekula uwana adatsokw afats à abà bokuba lukut, abèk asik anja kà à tèla à afik, nalbèt anja babay kà, taga kà azlatsetsilij kulo gèl anja sèla, bokuba garamusa anja sufèl.

✧ 11:18 11.18 Mahabay 2.5; 110.5; 115.13

² Mis uwaga aga la bëzi la huf, azlâsokw à ahøj, ngaha aga la mabas vok la abà, awiyay kà mazøj anha.

³ Ama nadzipo anik apèhla vok ala la zagøla aya. Tatagà møjga gà bokuba kudu, ngaha mativga, uwana akor gøl mœdœf, ngaha dœrew kulo kulo la kœla gøl gesina la garamusa. ⁴ Tatagà uwaga kà la gudaz. Gudaz anha kà abœd tsetsiliñ tenma anja mamakør anja zagøla à ahøj, ngaha awits atà à vœfah. Tatagà uwatà atsilzla à ahøj la huma anja mis uwaga, asàl masokw à ahøj, kà masla anja mapila à gay, à banja adasokw à ahøj. ⁵ Mis ayyà bëzi zilga, uwana adànøjla tsøhay gesina la agøla ada. Mok uwana adayyay, tazøb bëzi uwaga katskats, tadàlla à slaka Zøzagøla uwana la kursi la afik. ⁶ Ama mis kà ahøj à kœsaf à abà, la slaka uwana Zøzagøla adfahällän à ahøj. Masla adzadzaray la abatà tsøräh à mavakay dœbow la dadœrmokw sœla bëzi anha dzik mukwa.

⁷ La lig la ahøj gønøjà à zagøla kà guvøl adadzœka à vok. Misel ngaha la azlamøna anha tapa guvøl la tatagà uwaga la azlamalika anha.* ⁸ La abatà Misel la azlamalika anha taduwà atà, kiya uwaga slaka abözà à vok kà tatagà la azlaanha anja madz à ahøj la zagøla aya aw, ⁹ aga maduw à vœfah gä. Tatagà møjga uwaga, la uwana maviya bebi, masla uwana azahà azladza gudøj à vok gesina ala, sløm anha kà, baba anja mawisiga, sløm anha anik aya kà seteni. Taduw à vœfah, masla la azlamalika anha gesina.

¹⁰ Ngaha la lig la ahøj, gœtsønà kuda atsøn à ahøj la zagøla agød: "Lagonay kà mazløbay anja Zøzagøla kà, adapaka vok, lagonay kà, Zøzagøla adapøhla makoray anha ala. Lagwa Kristu adapøhla maslay anja ndzœfa anha ala, kà uwana masla mœzam gami, uwana atsäzläh à huma Zøzagøla, uwana apapatäh azladedä gami, kà matäh à atà kaf à gøl mavakay la mahønay gesina kà, tamøl à uda la zagøla. ¹¹ Azladedä gami tatsä à ahøj. Kikay kà anjiz anja magadzaw, ngaha kikay kà gay dziriga uwana tazätän, atà takès mav sifa anjatà. ¹² Kà uwaga à uwana, takudœk seteni à ahøj la zagøla. Ngaha akul, azladza uwana la afik, rabaw! Ama kà ankul gudøj à vok la azladœrøv aya, ngørpa la akul, kà uwana seteni kà tadamøl à slaka ankul la vœfah. Apakà lœv, kà uwana asøl kà kaslä anha kà atøm à ahøj kà ñuv pœra."

¹³ Mok uwana tatagà uwaga asøl kà tamøl à vœfah kà, adzøkà manøf mis uwaga la tsøh, ayyà bëzi zilga. ¹⁴ Atà tavà gogozläh à mis, kalkal la anja zulo møjga gä, kà anja mahoyay à huma ala katskats la uwaga, à slaka anha uwana à abà Zøzagøla adädzadzarayla à abatà. Mavay makør la tenma adädza à ahøj la abatà, kà bebi uwaga anja makœsay aw. ¹⁵ La kiya uwaga, bebi adfahøj dabaray la mavøläh iyaw à vœfah kà iyaw anja manøf mis la tsøh anja mazøb mis. ¹⁶ Ama kutso azlæk mis, apøslæk ala, asà iyaw uwana à gay, asà à uda la huf anja tatagà uwaga. ¹⁷ Kiya uwaga tatagà uwaga abözà à mis à tsøh aw, vœdzøgläh agolà vok anja maday anja map guvøl la azlamayyi à tsøh ala anja mis uwaga. Azlamayyi à tsøh ala anha uwaga kà, azlauwana takès gay Zøzagøla, ngaha atà uwana tanøfä dziriga anja Yesu, uwana apøhatåla. ¹⁸ Kiya uwaga tatagà uwaga ahäd, atsizl à gay dœrøv.

13

Tatagà uwana azal azlatatagà anik sœla

¹ Kiya uwaga gønøjà tatagà anik asà à uda la dœrøv la abà, uwana agà la azlagøl dzadzukwa mœdœf, ngaha la kœla gøl anha kà, dœrew kulo kulo la køl. Kœla dœrew anha kà garamusa anja suføl la tsøh. La kœla gøl anha la vok babay kà, sløm mawisiga anja magodfahay à Zøzagøla la vok. ² Tatagà uwatà kà, gøneröz kà, maftsa vok anha kà bokuba zimmøli, azlaasik anha kà bokuba azlaasik anja balagoday. Ngaha gay anha kà bokuba gay anja sikalaveri. Abœdla tatagà uwaga à slaka anha à abà. Tatagà uwana adzà madzay la kursi anja kudu la afik, abözà ndzœfa anha babay. ³ Ama gønøjän kà tekula la tataka azlagøl anha la abà kà, bokuba makœday gä uwarä, ngaha amik anha awür ala, akès nadzipo à azladza gudøj à vok gesina, ngaha abiyä atà la uwaga, tanøfä masla. ⁴ Kiya uwaga, azladza gesina taslækäw tatagà uwana avä ndzœfa anha à tatagà uwaga. Taslækäw tatagà uwaga babay, la magodfay: "Uwa à uwana møjga bokuba tatagà uwanay uwa?", tagød.

⁵ Kiya uwaga tatagà uwaga abözà à tetøvi anja mapøh mawisiga à Zøzagøla à vok, abözä maslay anja madfahøj kiya uwanay kà, kà anja tœla dzik ufad gøl anha sœla pœra. ⁶ Tatagà uwaga adzøkà mapøsew slaka anha la zagøla, la azlauwana tadzä à ahøj la afik, la sløm anha, ngaha bamæraka Zøzagøla la gøl anha, apøsew masla babay. ⁷ Masla abözäl tetøvi aya anja map guvøl la azladza anja Zøzagøla, ngaha la makœfasl atà la gudøj la vok. Aväl ndzœfa aya lakøl anja azladza uwana tasä à uda la azlatøhay la azlagay la abà, ngaha tasä à wanj la makad gøl à ahøj gudøj à vok gesina la ahäl anha

* 12:7 12.7 Daniyel 10.13,21; 12.1; Yahuda 9

aya. ⁸ Azladza gudəŋ à vok gesina tasləkaw tatagà uwaga, bokuba magoɗay, azladza uwana sləm anətà la ahəŋ la wakità aŋa sifa la abà dagay madzəka aw. Say magadzaw uwana takəɗla, la uwana akor wakità uwaga pəra.

⁹ Agòɗ: “Kane kaw à sləm à ama aw, tsənàw gay uwanay gəpəhay!” ¹⁰ Kiya uwaga agòɗ: “Dza uwana mokfak aŋa makəs à danjay la vok, ndzer kà tadəkəs à danjay, tadəkəɗay la katsakar aya dza uwana la mokfak aŋa katsakar la vok. Kay, tsa baŋa kiya uwanay kà, ŋuləm azladza aŋa Zəzagəla tabasəŋ la maday à huma à gay la madin gəl à Zəzagəla à vok, kà atà aŋa madz à ahəŋ la adi.”

¹¹ Kiya uwaga gənəŋà tatagà anik asà à lag la kutso la aku. Masla la dərəw səla lakəl, bokuba magadzaw, apəhay kà la kuda uwana agagazläh azladza ala. ¹² Masla adəhla sləray la ndzəɗa aŋa matera, ŋgaha la masəlay aŋa matera bay. Tatagà masəla uwaga afà leri à azladza gudəŋ à vok à gəl, kà atà aŋa masləkaw matera gà uwaga, à masla uwana la amik mamətsay la vok, awür ala. ¹³ Masəla gà uwaga adəhàhà azlatatak nadzipo mənŋa, azalà akəl à ahəŋ la zagəla la yewdi aŋa azladza gesina. ¹⁴ Masla abəzəl tetəvi kà madəh azlanadzipo la huma aŋa tatagà matera gà uwatà, avavàràhà azladza gudəŋ à vok à bada à abà la magoɗ à atà: “Nàlāw mazlazlay la maftsa vok aŋa tatagà uwaga awurà ala la amik aŋa katsakar la abà, aŋa masləkaw masla.” ¹⁵ Kiya uwaga tatagà uwanay apəh, kiya uwaga kà masla mabəzal ndzəɗa kà mafətay afad sifa à mazlazlay, atà aŋa madzəka mabadma, atà akad azladza gudəŋ à vok à gay gesina, azlauwana takweska gay aŋha. ¹⁶ Tatagà uwaga afà leri à azladza à gəl gesina, azlabəzaga la azlaməŋga, azlagalepi la azlaməna kuda, azlamayəga ŋgaha la azlauwana takor gəl, kà atà mabəz masəlay la ahəl kaf, baŋaw la madagay. ¹⁷ Uwaga aŋa mapəhla ala kà: Dza uwana la masəlay uwaga aw, tetəvi la ahəŋ kà aŋha aŋa masukw tatak, amiyaka bə maduw tatak ala aw. Masəlay uwaga kà sləm aŋa tatagà uwaga. Sləm aŋha bay kà kəzlakula.

¹⁸ Lagonay la uwana anu mədəh matsihila, dza uwana la haŋkəli kà aslala vok aŋa masəl godega aŋa gay uwanay tapəh, la matugway aŋa tatagà uwanay la abà, kà uwana matugway uwaga kà, magazləla gə la sləm aŋa dza, matugway uwaga aga kà dadərmokw mukwa, la dzik mukwa gəl aŋha mukwa.

14

Azladza aŋa Zəzagəla tahab mahabay mawga la zagəla

¹ Mok uwana uwaga adada à lig, gənəŋà tatak anik aya. Gənəŋà magadzaw uwana adatsizilla à ahəŋ la gudəŋ uwana la afik, tazalalla Siyon. Masla la azladza uwana masəlay aŋa sləm aŋa Zəzagəla Baba, la aŋa magadzaw aga la atà la madəgay anətà. Matugway aŋa azladza uwatà kà taga dəbow dzim bəzi aŋha dzik ufad gəl aŋha ufad.* ² ŋgaha aya gətsənà mahohumay la zagəla, uwana adabani vok la mahohumay aŋa iyaw. Mahohumay aŋha babay kà bokuba mahohumay aŋa habaga, ŋgaha bokuba mahohumay aŋa madəɗ ŋziŋ. ³ Kiya uwaga azladza dən uwaga tatsəzl à huma kursi aŋa Zəzagəla la huma aŋa azlatatak ufad uwana la sifa, ŋgaha la huma azlamadzahaga uwatà. Tahəb mahabay mawga. Tetuwa masla masəl mahab mahabay uwatà la ahəŋ aw. Say atà uwatà Zəzagəla abəl atà pəra. ⁴ Azladza uwaga tanəŋla gəl anətà la tsikasla la abà, kà uwana tagagaməh la azlamis aw. Atà tanəfə magadzaw la tsəh à kəla slaka uwana adà à abà gesina. Atà uwana mabək atà gə à fəta à awtəy la tataka azladza anik la abà kà aŋa Zəzagəla la magadzaw. ⁵ Fida asà à waŋ la gay anətà aw, atà sətaka.*

Aganay gay lakəl aŋa azlamalika makər

⁶ Kiya uwaga gənəŋà malika tekula uwana ahoŋay la ləv zagəla la abà. Asà à waŋ kà maz gay marabəŋ gə, uwana adəɗa à ahəŋ aŋa koksikoksi, adəziŋ à azladza uwaga tasà à uda la azlatəhay, la azlagay, ŋgaha tasà à waŋ la makad gəl à ahəŋ gudəŋ à vok gesina. ⁷ Malika uwaga abadətəmà la kuda zləkkà, agòɗ à atà: “Hòyāw yewdi kà aŋa Zəzagəla, zləbāw masla kà uwana kaslā uwana adəɗah seriya à azladza à gəl kà adaslay. Sləkāwāw masla! A masla uwana adəhəŋ zagəla, la kutso la mukwà, ŋgaha la azlamakəzay aŋha gesina.”

⁸ Kiya uwaga aya, malika anik anəfà à tsəh à uwaga à uda la magoɗay: “Babila, mən ŋud gudəŋ adabəzliba, adabəzliba bərəf, tsewwa! Masla atəpla azladza kà madəh mabila aŋha, kiya uwaga azladza gesina uwaga tabiy mapak ləv aŋa Zəzagəla à gəl anətà gesina.”

⁹ Kiya uwaga malika mamakər adəvla à tsəh à uda. Uwatà agòɗ la kuda zləkkà: “Kəla azlauwana tasləkəw tatagà uwatà asà à uda la iyaw la abà, ŋgaha la maftsa vok

anja tatabä uwatä, atä la masölay anja tatabä la madögay, banjaw la ahäl anjatä, ¹⁰ atä tadäsa ngörpa la ahäl anja Zözagöla. Tetuwa namnamga adögay la abä dikiidiki aw. Azladza uwana tadädäy ä akäl ä abä uwana makodä ä ahönj gä la huleli, kiya uwanay ä uwana tadäsa ngörpa la huma azlamalika anja Zözagöla, ngaha la huma anja magadzaw. ¹¹ Tetuwa kösök anja akäl, uwana adäbaföb azladza uwaga kä, adäköf göl aw, kä uwana tsikakaw mazlazlay la azlatatabä uwaga, ngaha atä la masölay anja la wok anjatä. Kiya uwaga atä tadäbözä maduw löv aw, tadäs ngörpa kiya uwanay mavakay la mahönay gesina.”

¹² Kä uwaga akul, uwana kakösaw gay anja Zözagöla, diñaw göl ä Yesu ä vok, akul uwana kabasawwänj ä vok kä uwana akul, akul azladza la ahäl Zözagöla.

¹³ La lig anja, götsönä kuda atsön la zagöla, kuda uwaga agöd ä gi: “Tsetsör uwanay: lakana ngaha tsöräh ä huma ä gay, azlauwana tadinj göl ä Suföl Yesu ä vok, ngaha tamats ä abä, atä la uwana Zözagöla adäpis ä atä gay ä vok.” “Iyay, kiya uwanay”, Masasöfök tsikasla awulä ä uda: “Slöray anjatä kä adadöv ä gay, tasla la vok anja maduw löv adagay, kä uwana mats ä göl anja slöray anjatä kä adäpöhla vok ala la dazuwaya.”

¹⁴ La abatä gönönjä tatak anik aya. Gönönjä habaga medfekuga. Tatak anik la habaga uwatä la afik. Agä bokuba maftsä vok anja dza, laköl anja garamusa anja suföl laköl, uwana madöhönj gä la luwäluwä. Mavaw mazuwayga la ahäl anja aya. ¹⁵ Kiya uwaga malika anik asä ä lag la mönj gäy Zözagöla la aku, azalä la ndzödä ä dza uwana adzä madzay la habaga la afik: “Dahä slöray la mavaw anjak, tsöd tatak, kä uwana sartä anja matsöd tatak kä adaslay, tatak wöfah adahönay kä matsöfay.” ¹⁶ Ngaha dza uwana agä la habaga la afik azöv mavaw, atsöd tatak uwana la wöfah, atsöd gesina.

¹⁷ Ngaha la abatä gönönjä malika anik aya, asä ä uda la gäy Zözagöla la aku. Masla babay agä la mavaw mazuwayga la ahäl aya.

¹⁸ Malika anik aya asä ä wajj kä la slaka makad tatak. Masla kä mönjga anja akäl, asä ä wajj anja mazalay ä malika anik uwana mavaw mazuwayga la ahäl, agöfal: “Zöv mavaw anjak, ngaha häd, dötsöd mayyay tatak la abatä, kä uwana tahönay.” (Gudönj ä vok kä guf) ¹⁹ Kiya uwaga malika azöv mavaw anja, ahäd kä matsöd tatak uwaga la guf la abä, ahäd ä slaka uwana takuditsäh, afötükw ä abä la abatä. Uwaga gesina apöhla ala kä Zözagöla adapaka löv mönjga. ²⁰ Slaka makuditsay kä la lag gudönj la uda. Mok uwana adakuditsay iyaw gä ä uda la abä, iyaw gä uwaga kä anjiz, la uwana asä ä uda, uwaga aköl bokuba mukwä körkör, ngaha makölay anja kä bokuba magur mahodäy pölis dzim bözi anja dzik zlo, ngaha zönzönj anja kä tözlöm dza. Kiya uwaga ä uwana Zözagöla adäkös azladza makösöföga uwaga la mapak löv anja. Tetuwa adapaka atä löv ä göl.

15

Aganay ngörpa mödöf uwana azlamalika tadädala

¹ La lig anja uwaga la ahönj, gönönjänj aya magöl nadzipo, mawal löv ä dza ä gay gä la zagöla. Agä la ahönj malika mödöf la ngörpa la ahäl anjatä. Uwanay kä madövla ä tsöh anja ngörpa, kä uwana uwanay bay kä madövla ä tsöh mapak löv anja Zözagöla uwana adazinal ä göl.

² Kiya uwaga aya gönönjä tatak anik, uwana bokuba döwön, uwana awutsöfay bokuba kutörum, uwana la akäl la abä babay. Aya gönönjä azladza uwana taködäsl ä tatabä uwatä, atä la mazlazlay uwana tafötäl afad ä vok. Atä takweskä masölay anja slöm anja. Atä tatsäzlla ä ahönj la gay döwön uwaga la njizij la ahäl, uwana Zözagöla awä ä atä. ³ Tahäh mahabay uwana Musa magamza anja Zözagöla uwana ahabäh uwarä, uwaga kä mahabay anja magadzaw. Tahäh la magodäy:

Kak Suföl Zözagöla gami uwana kakoray laköl anja tatak gesina,

Slöray anjak uwana kadöhönj kä mönjga, dzöba anja söla aw, aduwanj gesina.

Kak la uwana Suföl anja gudönj ä vok gesina,

Köksiköksi kadöhönj kä dziriga, kak dziriga gä.

⁴ Hadäy Suföl, uwana adähoy yewdi anjak aw kagod uwa?

Uwa ä uwana gözlöv kä aw adögöfay uwa?

Dza tsikasläga, kä kak tekula pära.

Azladza gudönj ä vok gesina tadäsa ä wajj ä huma anjak,

Kä mazlöv ka, kä uwana azladza gesina tanönja uwana kadähänj, kä la tetövi anja.

⁵ La lig anja uwaga la ahönj kä, gönönjänj magöl gäy Zözagöla la zagöla mapözlla ä ama ala gä. Gäy uwatä madöhönj gä la lukut, la slaka uwana Zözagöla agagamahay la azladza.

⁶ Gəneḅà azlamalika mēdēf uwaga, ḡḡerpa agà à atà la ahàl, tasà à lag kà la gày Zəzagəla la aku, tatsòkwàh lukut mēdekuga à abà kuzlatta, tawàdàh vok ala la slarəpay aḅa luwàluwà. ⁷ Kiya uwaga tekula la tataka aḅa azladza ufađ uwaga la abà la sifa, avàh à azlamalika mēdēf uwaga tasà luwàluwà mēdēf. La azlatasà uwatà la abà mapak ləv aḅa Zəzagəla adahən à abà. Zəzagəla gami uwana aga la ahəḅ aḅa koksikoksi, masla la mapak ləv gà lakəl aḅa azladza. ⁸ Kəsək atatùkw, ahənà gày ala. Asà à uda la mazləbəy aḅa la abà ḡḡaha la maslay aḅa la abà. Dza aslalà vok aḅa mad à gày uwatà à agu aw, say ḡḡerpa mēdēf uwaga la ahàl aḅa azlamalika adəv à gay dāḅ.

16

Mapak ləv aḅa Zəzagəla

¹ La lig aḅa uwaga la ahəḅ, gətsənà kuda atsən à lag la gày Zəzagəla la aku. Dza uwatà agòđ à azlamalika mēdēf uwaga: “Dàw kadàsokwahaw mapak ləv aḅa Zəzagəla uwana la azlatasà la abà à vəđah. Sòkwàhàw à vəđah mēdēf nna!”

² Kiya uwaga malika matera ahàđ, asòkw aḅa à vəđah. Azlamagol gorodzu uwana azay tapàhla vok ala, la vok aḅa azladza uwana masəlay aḅa tatagà uwatà aga à atà la vok, atà uwana tasləkàw mazlazlay.

³ ḡḡaha aya malika masəla ahàđ, asòkw aḅa à dərəv məḅḡa à abà. Kiya uwaga mukwà uwaga abəđla vok à aḅiz, bokuba uwana atsà à mazimnekiđ la vok ala. Azlatatak gesina la iyaw uwaga la abà taməts à gay, hənats.

⁴ Malika mamakər ahàđ, asòkw aḅa à azlamukwà uwana à tsəh takəlay, ḡḡaha la azlauwana takakiz à uda la kutso la abà; ḡḡaha atà babay tapakàh kiya aḅiz. ⁵ Kiya uwaga gətsənà malika uwana masla məḅḡa aḅa iyaw agòđ: “Kak, uwana kak tsikasla dagay uwarà, ḡḡaha kak la ahəḅ la sifa lakana aya. Kak uwana kak la ahəḅ la sifa, kak masla manats seriya ala la tetəvi aḅa, ⁶ kà uwana azladza uwanay kà tatsàh aḅiz aḅa azladza aḅak à vəđah, la aḅa azlaməna mapəh à atà gay à ahàl aḅak, lakana kavà à atà aḅiz kà atà aḅa masay, tabəzà uwana azlayla atà abəzal, suwan.” ⁷ ḡḡaha gətsənà kuda atsən la slaka makad tatak, agòđ: “Iyay, kak la uwana kak Sufəl aḅa gudəḅ à vok gesina, kadah seriya à azladza kà la tetəvi aḅa, ndzer.”

⁸ Kiya uwaga malika maufađ asòkw aḅa à afats à adi. Afats adzəkà mavəđay bokuba akàl, kà uwana abəzà tetəvi la slaka Zəzagəla kà mavəđay, kà maslərnàh azladza ala. ⁹ Uwana tanəḅəḅ aslərnàhatàla kà, tatsək magođahay à Zəzagəla à gəl, kà uwana masla la uwana ḡḡerpa uwaga la ahàl. Bà la kità bay, takweskà mapəh gay la ləv ala, tamàts à mawisiga aḅatà à abà. Atà tazləbà sləm aḅa Zəzagəla aw.

¹⁰ Kiya uwaga aya malika mazlo asòkw aḅa à kursi aḅa tatagà uwaga à afik. ḡḡaha mələs apakà vok la makoray aḅa. Azladza tadzəkà mapadàh slid, kà maz atà aḅa. ¹¹ Ama atà tapəh gay la ləv ala aw, tadà à huma à gay la madàh mawisiga aḅatà, tatsək magođahay à Zəzagəla à gəl, kà uwana tasa ḡḡerpa məḅḡa la gorodzu aḅatà la abà.

¹² Kiya uwaga malika mamakwa asòkw aḅa à mukwà məḅḡa gà à abà, uwana sləm aḅa Efərat. Mukwà agəl ala, kà azlasufəl uwana tasà à afik la mas à afik afats aḅa maguwa à uda la abà la abatà. ¹³ La lig aḅa uwaga la ahəḅ, gəneḅà azlamasasəđok mawisiga makər, maftsa vok aḅatà kà bokuba azlagofok. Tekula asà à uda la huđ aḅa kudu, anik aya la huđ aḅa tatagà uwatà, ḡḡaha mamakər asà à uda la huđ aḅa tatagà masla mapəhal gay à ahàl fidaga uwatà. ¹⁴ Gesina aḅatà azlamasasəđok mawisiga uwaga, taguwà à uda kà la seteni la abà, masla uwana avà à atà ndzəđà kà madàh nadzipo anik anik. Tadàh à slaka azlasufəl gudəḅ à vok gesina, kà maham à atà gay à vok, kà atà aḅa mas à wan aḅa map guvəl la Zəzagəla, uwana aduwa gesina, la vuđ uwana adàfəta à maslay aḅa la ama ala.

¹⁵ “Tsəbàwwal sləm”, Yesu agòđ à atà, “Gi la uwaga gəđàda à awtəy bokuba masla à gəl! Mapis gay à vok agay la dza uwana adza à ahəḅ la adi, la maf sləm à lukut aḅa, kà masla maday la godeḡa deyday la vuđ mas à wan gulo, kà ziruwi aḅa makəsay la huma azladza aw.” ¹⁶ Mok uwana azlamasasəđok uwaga taday, tahama gay azlasufəl à vok, tahamà à atà gay à vok la slaka uwana tazalalla la gay ibəranəḅkowen: *Harmagedon*.

¹⁷ ḡḡaha la makəđal gəl, malika maməđəf asòkw aḅa à afad à abà, ḡḡaha kuda atsən la huma kursi aḅa Zəzagəla la magol gày Zəzagəla la aku, agòđ: “Diga, tsewwa.” ¹⁸ Kiya uwaga azlamawutsəđay tawutsəđ, azlahabaga taslàh mələ babay. Kutso abəlakà vok məḅḡa. Didi didi, dagay uwana Zəzagəla adàhà gudəḅ à vok kà, kutso adabəlakà vok kiya uwanay didi aw. ¹⁹ Kiya uwaga məḅ huđ gudəḅ apəslakàhla makər, ḡḡaha azlahuđ gudəḅ, uwana la gudəḅ la vok gesina, tawàsilla babay. Katskats awulà à Zəzagəla à gəl, à mawisiga aḅa gudəḅ Babila. Apakà ləv məḅḡa lakəl aḅa, la mapak ləv aḅa la abà kà, asà à atà azlamagol ḡḡerpa, la magođay: “Sàw à gay.” ²⁰ Kiya uwaga dēwdēw

böza gudəñ uwana iyaw anudähä atä ä gay ä adi, ñgaha la azlagudəñ gesina tazähälla tuwiya. ²¹ Matsatsa iyaw asökw ä ahəñ kà məñga məñga, mahanay aña kà bokuba nəvol. (Kilo aña aslay 40, asal magodəy tasä hi 20) Atä atäcf ä azladza ä gəl. Bə gotənan kà, azladza tapakä löv lakəl aña Zəzagəla, tatsəkäl magodəhay ä gəl kà uwana tatarəb la matsatsa iyaw uwaga la abä. Ñgərpa uwanay kà aduwa azlanğərpa anik uwana adada ä lig gesina la kaykay.

17

Aganay gay lakəl aña mis masla mazab zil gä

¹ La lig aña uwaga la ahəñ, malika tekula la tataka azlamalika məcfəf uwaga la abä, tasä məcfəf la ahäl, asä ä wan, agöd ä gi: “Sä ä wan, gəpəhakalla kakay ä uwana mis masla mazab zilga uwaga adasa ñgərpa mi, mis uwaga kà asal magodəy kà: Huf gudəñ uwana tanäl ä gay mukwä dəñ. ² Kiya uwaga azlasufəl aña gudəñ ä vok tadəhähä mabila la masla, ñgaha atäpla madäh mabila aña ä azladza la mabiy azladza gudəñ ä vok, ñgaha tadä ä madäh uwaga ä abä babay.”

³ Kiya uwaga Masasəcfok Zəzagəla asä ä gəl gulo, ñgaha malika uwatä adäla gi ä föta ä abä. Mok uwana gi la föta la abä, gənəñä mis tekula adadza ä tatagä ä lig. Tatagä uwatä kà mativga, gəl məcfəf la vok, ñgaha la dərəw kulo lakəl. Vok aña kà tsatsabasla matsetser ä ahäl sləm matsəkla magodəhay ä Zəzagəla ä gəl ala ä vok. ⁴ Ama kà aña mis uwatä kà, masla atsök azlalukut seda mativga vikuzaga ä abä. Masla abək tatak bəcfä ä vok, azlaadaga la azlaluwäluwäga, ñgaha la azlaakur uwana sləm anətä la ahəñ, tasä luwäluwä gä la ahäl. Tasä uwatä adahenla la azlatatak vanvanğa, bokuba magodəy kà mabila uwana adəhähän. ⁵ La madəgay aña mis uwaga kà sləm anik la ahəñ. Uwaga kà sləm uwana mahad vok ä ahəñ gä. Sləm uwaga tatsetser kà aga: MƏJ HUD GUDƏJ BABILA, İYÄ AÑA AZLAMƏNA MAZAB ZIL, NGAHA İYÄ AÑA AZLATATAK VANVANĞA MAWISIGA, VANVANĞA UWANA LA GUDƏJ LA VOK GESINA. ⁶ Gənəñä mis uwatä kà, aniz aña azlaməna gay Zəzagəla adawisla gəl ä vok. Kà mana takäcf atä mi kagodəw ay? Kà uwana tazä gay marabəñ aña Yesu.

Uwana gənəñä uwaga kà, löv aväl ä gi ä gay. ⁷ Malika uwatä agöd ä gi: “Kà mana löv aväl ä ka gay ma?” Agöd ä gi: “Tsənən, gəpəhakala godega aña gay mahad vok ä ahəñ gä uwaga, lakəl aña mis uwanay kà, ñgaha lakəl aña tatagä uwana mis aga la lig kà, uwaga kà tatagä uwana gəl aña məcfəf ñgaha dərəw kulo lakəl kà uwaga. ⁸ Tatagä uwaga kanəñän kà, agä la sifa uwarä, ama lagwa kà la sifa aya aw. Zewk kà, adäwula ä uda la afək zənəñğa uwatä la abä aya. Baña adasa ä uda kà, Zəzagəla adəkəcfay tsokwfasl. La mok uwana Zəzagəla adzəkä manäl gudəñ ä vok, atsetser sləm aña azladza uwana tadəbəza sifa ä wakitä aña sifa ä abä, ama azladza anik la ahəñ kà, sləm anətä la wakitä aña sifa la abä aw. La kaslä uwana tadənan tatagä uwaga kà, löv adäval atä ä gay, kà uwana agä la sifa uwarä. Ama lagwa kà la sifa aya aw, ama zewk kà adäwula ä uda.”

⁹ Kiya uwaga agöd ä gi aya: “Kà matsən uwaga kà, say azladza tagay azlamatsihilaga, la hanğeli. Azlagəl məcfəf uwaga kà, apəhla ala kà azladadəgwal məcfəf, uwana mis adza ä afik. Uwaga apəhla ala kà azlasufəl məcfəf babay. ¹⁰ Kiya uwaga azlasufəl məcfəf: Azlasufəl zlo kà makoray anətä kà adada ä lig tsewwa. Maməkwaga aga la sufəl la afik. Ama maməcfəf kà, kaslä aña adasa ä wan dadən aw. Baña kaslä uwaga adəsly kà, adäzuw sufəl kà, kà aña kaslä ñuv pəra. ¹¹ Tatagä uwaga la aslasl gəl aña, uwana agä la sifa uwarä, ñgaha masla la sifa aya aw. Masla tekula la tataka aña azlasufəl məcfəf bay, masla adəpakay sufəl mamtəgis. Baña adəlanğazlay kà, Zəzagəla adəkəcfay aña tetuwa.”

¹² “Kà aña azladərəw kulo aña tatagä uwaga kà, kanəñän kà, masla apəhla ala kà lakəl aña azlasufəl kulo, uwana tadəlanğalay, ama tazuw sufəl dadən aw. Ama mok uwana tadəlanğalay kà, tadəbəza maslay kà aña kaslä ñuv. ¹³ Azlasufəl uwaga gesina tadətən vok gay. Atä tadävä ndzəfa la maslay anətä kà madäh sləray ä tatagä uwaga, ¹⁴ tadəpa guvl la magadzaw. Masla kà, aduwa atä, kà uwana masla kà Sufəl aña azlasufəl. Masla la uwana aduwa azlasufəl gudəñ ä vok gesina, azlaanğa tanəfay la löv tekula. Kà uwana masla la uwana atsatsəmən atä ñgaha azalä atä kà manəfay, kiya uwaga kà tadəduw atä gesina.”

¹⁵ Bə gotənan, malika uwaga agöd ä gi: “Dərəw uwanay kanəñän, ä uwana mis masla mazab zilga uwaga adza ä afik kà, apəhla ala kà azladza tsəhay gay gesina, ñgaha azlauwana tasä ä wan la makäcf gəl ä ahəñ gudəñ ä vok gesina. ¹⁶ Azladərəw kulo uwaga kanəñä atä, ñgaha la tatagä uwaga la aslasl gəl aña la uwana tadəzin vok ä mis masla mazab zilga uwaga ala. Tadəhəl tatak ä mis uwaga ala, tadəməl ä ahəñ la godega

deyday. Matəm à ahøj anja kà tadätel à gay. ¹⁷ Uwaga kà, kà uwana Zəzagəla aguwa la ləv anja azlasufəl kulo uwaga la tsəh, kà madəhøj uwana asal. Kiya uwaga kà, tatsənà vok gay, kà madəh sləray la ndzəda anjatà gesina kà anja tatagà uwaga. Tatagà uwaga adəkəray tsərəh à uwana à gay anja Zəzagəla adəgəf à afik.”

¹⁸ “Nğaha mis uwana kanəñəñ kà uwaga kà mənğ gudəñ, uwana la maslay lakəl anja azlasufəl gudəñ à vok gesina.”

18

Zəzagəla adukwa seriya à gudəñ Babila à gəl

¹ La lig anja uwaga la ahøj, gənəñà malika anik atsà à ahøj la zagəla. Masla agà la maslay mənğga, azladza gudəñ à vok gesina tanəñà udəka la mazləbəy anja. ² Masla awiyà la ndzəda, agəf: “Babila, Babila mabəzl gəl à abà gə, mabəzl gəl à abà gə, bədfəftal, adəpaka slaka mahəf vok à ahøj anja azlamasəsəfək mawisiga, nğaha azlatatak mahoyay tadəzda à ahøj la abatà. ³ Babila, ma kà mana abəzl à abà à mi kagəfaw takay? Kà uwana avà à vok anja à mabila la matapala mabila anja à azladza. Azlasufəl la gudəñ la vok tadəfahàhà mabila la masla. Azlaməna tsakalay tagəh gorobu kà azlatatak dzəba anja səla aw gə, uwana la gudəñ uwaga la abà.”

⁴ Nğaha gətsənà kuda anik atsən à ahøj la zagəla, agəf: “Azladza gulo, səw à uda. Banja kahamaw gay à vok la mawisiga anja la abà, akul babay, kadəzlakaw atà à tsəh!

⁵ Kà uwana tsakana anja adanəzla tsərəh à zagəla. Nğaha babay kà sləray mawisiga anja avika Zəzagəla aw. ⁶ Dahəwəwaləñ à vok bokuba uwana adəhəkulləñ à vok suwan. Banja agər à akul mawisiga tasà tekula gərəwəwal à afik tasà səla. ⁷ Səgəw nğərpa anja ala kà ləv anja mazəñ; bokuba uwana agà la maslay kà madz à ahøj la matsiday la abà. Masla agəf la gəl anja kà: ‘Gi nuha sufəl; awkà: gi mis kufa aw, gi gəsəl mamətsay à gi aw’, agəf. ⁸ Gay gə la uwaga matərəbəy anja adəsakan à wan, kà vuf tekula pəra. Duvats, mamətsay nğaha may, akəl adəbabəh à gay, kà uwana Sufəl Zəzagəla kà, masla la uwana Sufəl anja tatak gesina, masla la uwana adəfahalla seriya à gəl.”^{*}

⁹ Kiya uwaga azlasufəl anja gudəñ à vok uwana tadəfahà mabila la gudəñ uwaga, mok uwana tadənəñ kəsək anja akəl uwana ababəhay kà, tadətaway la mabək ahəl à kufa, kà uwana tadzà à ahøj la matsiday la abà. ¹⁰ Kiya uwaga nğərpa anja gudəñ adəvə à atə guba. Kà uwaga tatsəzl à fəta à awtəy la mabək ahəl à gəl la mataway gəf gə gəf: “Mənğ gudəñ Babila, kakay la kirim yewdi, seriya adatəf à ka à gəl ma!”

¹¹ Kiya uwaga aga la azlaməna matsakalay la gudəñ la vok gesina, tataway la mabəkəh ahəl à gəl babay, kà uwana akələdadəbəh gudəñ à gay, nğaha masuk tatak la ahøj aya aw. ¹² Aganay azlatatak madaw ala anja: Luwəluwə, gursu, azlaakur uwana sləm anjatà la ahøj, kà anja madəhla tatak bədfə, azlaturmi lukut zlazladfaga, azlaseda mativga, nğaha la azlatsəhay lukut mahəfayga. Nğaha aya azlatatak uwana azlaməna tsakalay tadəwəh ala, taga azlatsəhay ahəf anik uwana azinay lela, nğaha la azlatatak uwana tadəfahəñ la azlasif gəwwan, azlatatak anik bay la azlaahəf mapəfay gə delga, azlatatak anik tadəfahəñ la azlaada vərəzaniga, nğaha la azlaakur mikoslaga. ¹³ Azladza uwaga tadəwəh azlatsəhay matərsin anik anik ala, nğaha azlababasl uwana azinay lela. Tadəwəh ala aya iyaw matavəruk, la azlaaməl, nalkama, la azlapəhaw nalkama, nğaha la azlasla, la azlatuwan, la azlapəlīs, la azladərkwa uwana azlapəlīs tabiyəñ, nğaha la azlamayà tadəwah ala; ama masla masukway la ahøj aya aw. Kiya uwaga tataw la magəfay à gudəñ uwatə. Azlaməna matsakalay tagəf à mənğ huf gudəñ uwaga: ¹⁴ “Azlatatak uwana kaval à ləv anjak, akəl adəbabəh à gay lidəfa. Gorobu anjak, la matsiday anjak gesina adazila, kadəbəzəl aya aw.” ¹⁵ Kiya uwaga azlaməna matsakalay, uwana tagəhay gorobu kà masla, nğərpa anja gudəñ uwaga adəvə à atə guba. Kà uwaga tadatsəzl à fəta à awtəy la mabək ahəl à gəl la mataway. ¹⁶ Tadəwits hulolo gay gədgəgəf: “Mənğ gudəñ adəbəzl à abà. Masla agà bokuba mis uwana atsəkəwəh azlaturmi mativga à abà, nğaha la azlaseda zlazladfaga, nğaha la azlatsəhay anik mahəfay gə, masla abək tatak bədfə à vok mənğga, azlaanik tadəfahanəñ la luwəluwə, azlaanik la azlaakur uwana sləm anja la ahøj. ¹⁷ Kay, kakay awma ababəh à gay la gorobu anja la kirim yewdi kiya uwanay ma?”

Azladza uwana tabelək kəslah iyaw la azlamənğga anjatà, nğaha la azlaməna matsakalay uwana tauguzahəhay la kəslah iyaw, nğaha kəla dza uwana la kəslah iyaw la afik, tatsəzl à fəta à awtəy kəkəkər gesina. ¹⁸ Atə tanəzəz mok uwana tanəñà kəsək akəl, uwana ababəh gudəñ, tawiyà la ndzəda: “Tekedik kà gudəñ anik la ahøj, kà anja magəgzala la masla aw!” ¹⁹ Kiya uwaga atə tatəw la mabək ahəl à gəl, tatabəbəlāh la kutso la abà, tawiyà gədfə, tagəf: “Aganay mənğ gudəñ uwanay, adəbəzl à abà à uwana,

^{*} 18:8 18.8 Yesayya 47.7-9; 48.20; Yeremiya 50.8,29; 51.9

azladza uwana takòrah kēslah iyaw gesina tagàh gorobu la ahàl anjha. Uwaga adabēzl à abà kà la kirim yewdi!”

²⁰ Kay, akul azladza uwana la zagèla la afik, rabàw ankul. Akàl adababēh à gay Babila. Akul azladza anja Zèzagèla, akul azlamèna matapla, ngaha akul uwana tapèh à akul gay à ahàl kà mapàh à azladza, rabàw, kà uwana Zèzagèla adacàhalla seriya à gèl kà tatak uwana adàhàkullàn” à vok!

²¹ Uwana uwaga adada à lig, mēj malika anik azèb akur mēnga bokuba vèl, adùw à dèrèv à abà la magoday: “Kiya uwanay à uwana tadàduw mēj gudəŋ Babila ala la ndzèda, adàzila tuwiz, dza adànəŋəŋ aya dikiđiki aw. ²² Mahohumay anja azlanəziŋla dəs, la azlamèna mats talakway, la azlamazlazliŋ adàtsanay la abà aya aw. Tadàbèza azlamèna madàh azlatatak anik anik la abà aya aw. Baməraka matsənay anja madzam tatak, babay adàmatsah à gay gesina hənats. ²³ La abatà ufaka anja azlafənəs adàgahay la abà aya aw. Mawiyay mazaḅ mis la madàh zil adàtsanay la abà aya aw. ‘Gi, zlà’, kagòđ, la maduḅ azlagudəŋ à vok gesina la matsakalay, ngaha kà vavaraha azladza à bada à abà la mēzla anjak. Kà uwaga à uwana seriya adàkəs ka!”

²⁴ “Zèzagèla anəŋə aniz anja azlamèna mapèh à atà gay à ahàl anjha, ngaha la anja azlamèna madinjal gèl à vok, uwana takàđfàh atà la gudəŋ la vok gesina, agà la kuda anjha. Kiya uwaga à uwana Zèzagèla adadukwla seriya à gèl suwan”, malika agòđ.

19

¹ La lig anja uwaga la ahəŋ, gətsənà kuda atsən à ahəŋ la zagèla bokuba kuda anja maham à ahəŋ dza, tagoday: “Məzləḅa Zèzagèla! Mətataslla ahàl à Zèzagèla gami, masla la uwana atəfà azladza. Mazləḅay la maslay gesina kà la ahàl anjha. ² Iyay, masla la uwana, masla seriya dziriga gà, adàh seriya à azladza la asik anjha. Adukw seriya à masla mazaḅ zil uwaga à gèl, masla uwana awisà azladza gudəŋ à vok ala la sləray mawisiga anjha. Zèzagèla adavàl ngərpa, kà uwana akàđal azlamayà anjha.” ³ Ngaha tagòđ aya: “Məzləḅa Zèzagèla! Kəsək anjha adəv à gay tsəràh à awtəy aw!”

⁴ Kiya uwaga azlamadzahaga dzik sèla gèl anjha ufađ uwatà, ngaha la azlatatak ufađ uwatà la sifa, takədèđ à ahəŋ la huma Zèzagèla uwana aga la kursi la afik, tasləkəw Zèzagèla tagòđ: “Məzləḅa Zèzagèla! Amen!”

Madəvaday mazəḅ mis anja magadzaw anja Zèzagèla

⁵ Kiya uwaga kuda atsən à uda la kursi Sufəl la abà agòđ: “Zləḅəw Zèzagèla gami, akul azlamayà anjha; azlaməŋga gà, ngaha la azləḅəzaga gesina, akul uwana kahoyaw yewdi anjha!” ⁶ Ngaha kiya uwaga gətsənà kuda atsən bokuba mavats gay anja maham à ahəŋ dza. Atsən babay bokuba mahohumay anja iyaw mukwà. Ngaha aya bokuba mahohumay anja habaga uwana aslàh mèlo à uwana gətsənəŋ. Matsənay anja kuda gà uwana kà, agòđ kà: “Məzləḅà Zèzagèla, kà uwana Sufəl Zèzagèla gami kà, adazuw Sufəl ala anja tetuwa. ⁷ Məràḅ la marabay, kà uwana kaslà anja mazəḅ mis anja magadzaw kà adaslay, ngaha mawđa anjha adacàh vok. ⁸ Tavà tətəvi à mis kà matsokw à lukut tsidəŋaga à abà, uwana awutsəđay wuzlwawuzl.” (Lukut delga uwaga kà, asal mapəhla ala kà, magay sətaka anja azlauwana tafà gèl anjatà à Yesu à afik)

⁹ Kiya uwaga malika anik agòđ à gi: “Tsetsər à wakità à abà: Marabay agay la dza uwana Zèzagèla azalàl à madəvaday anja mazəḅ mis anja magadzaw à abà.” Bə gotənəŋ malika uwaga agòđ à gi aya: “Azlagay uwanay kà, taga dziriga, kà uwana tasa à wan kà la paŋaw anja Zèzagèla.” ¹⁰ Kiya uwaga mok uwana gətsənà uwaga, gətəđ à makəla asik anjha, kà masləkaway, ama agòđ à gi: “Kadàhəŋ kiya uwaga aw, gi bay kà, gi mayà anja Zèzagèla bokuba kak la azladedà anjak uwana tadinj gèl à gay uwana à vok, Yesu afətətàla à adi ala. Kà anja uwaga kà, kazləḅa gi aw, zləḅà kà Zèzagèla!”

Azlamèna mapèh à atà gay à ahàl tapàh slilih anja gay uwana Yesu afətətàla à adi ala bay, kà uwaga la uwana avàh à atà ndzèda.

Masla mad à pəlis medekuga à afik

¹¹ Kiya uwaga gənəŋə zagèla, kà zagèla mapəzlla à ama ala gà, ngaha pəlis medekuga azlanjal. Dza uwana la afik kà sləm anjha kà Dziriga, kà uwana adəhəhəŋ kà say dziriga. Apa guvəl la tətəvi anjha.* ¹² Yewdi anjha kà awutsəđay bokuba alàh akàl, garamusa kà dəŋ la gèl la kəl. Matsetser à ahàl sləm à vok gà, dza la ahəŋ asəl sləm uwatà aw, say masla pəra. ¹³ Atsòkw à lukut uwana à vok aniz aniz gà. Sləm anjha kà: Gay anja Zèzagèla. ¹⁴ Azlamalika anja guvəl anjuvaw tanəfà masla, gesina anjatà la pəlis medekuga la afik, tatsòkwàh azlalukut medekuga à abà koha babay. ¹⁵ Katsakar mazuwayga asà à wan la gay anjha la awtəy. Adàkadla azladza uwana tavalàhà atà à ahəŋ lakəl à adi.

* 19:11 19.11 Mahabay 96.13; Yesayya 11.4; Hezəkiyel 1.1

Adakor atä la agëla ada. Adähabahatäla bokuba mayyay ahäf uwana takudfäts iyaw ä uda la abä. Kiya uwaga ä uwana adäpöhla ä atä ala, kä Zëzagëla la mapak löv mëngga. ¹⁶ La lukut anja lavok, ngaha la matataba anja kä tatsetsër slëm anja ä abatä: 'Kä Sufël anja azlasufël, Mëngga uwana adüwa azlamëngga anik gesina aya.'

¹⁷ Ngaha aya götsenä malika anik uwana atsizilla ä afats ä afik azalahay la kuda zläkkä, agöd: "Azlakolan, azlakolan uwana tahoyay la löv zagëla la abä, säw ä wanj gesina kazuwaw madëvaday mëngga uwanay Zëzagëla adadähakulan ä ahëj. ¹⁸ Säw ä wanj, kazuwaw slëb vok anja azlasufël, züwäw babay anja azlamëna guvël la azlamëngga anjatä, züwäw anja azlapëlis la azlamëna madäh ä afik, ngaha la anja azladza gesina, azlamayä la azlauwana takor gël, bamëraka azlamagolga la azlabëzaga, züwäw ä gay gesina!" agöd ä atä.

¹⁹ Kiya uwaga gënëjä tatagä uwatä la mokfak mawurlaga la vok, ngaha la azlasufël gudëj ä vok, tahamä gay ä vok kä map guvël la masla mad ä pëlis medfekuga uwatä ä afik, ngaha la azlamëna guvël anja. ²⁰ La lig la ahëj, katskats, takës tatagä uwaga, ngaha la tatagä masëla fidaga, uwana adähähä azlanadzipo la masëlay anja tatagä matera. Apatät atä anja mafëz masëlay la vok anjatä uwana tasläkaw la mazlazlay, uwana la maftsa vok anja matera. Kiya uwaga, mok uwana takës tatagä uwaga la masla fida uwaga, tawits atä ä gudüh akäl, uwana ä abä madfehëj ä abä gä la huleli la adi. ²¹ Ama azlamëna guvël anja, uwana la pëlis la afik kä, aköd ä gay la katsakar uwana asä ä wanj la gay anja. Azlakolan gesina tadëv ä wanj, tazüw.

20

Gay anja mavay dëbow

¹ Kiya uwaga gënëjä aya malika anik atsä ä ahëj la zagëla la tsëkurëm anja afök zënjëngga, la magol mazakazak tadzëbërä la ahäl. ² Ahäd, akës kudu, uwana uwarä kä bebi uwana arahëlla azladza ä uda. Masla la uwana baba anja masasödök mawisiga, ngaha slëm anja anik aya kä seteni. Malika uwaga akës atsërkwanj anja mavay dëbow. ³ Uwana malika adatsërkwanj, adüw masla ä afök zënjëngga ä abä, atsäkalla ä ama la tsëkurëm, ngaha aslëräbal ä tsëh tsëräh ä mavay dëbow, kä masla anja marähla azladza gudëj ä vok ä uda aya aw. Say banja mavay uwaga tafäl ä ahëj, adädëv ä gay. La abatä tadäpëlëj ala anja kaslä nüv aya.

⁴ La lig anja uwaga la ahëj, gënëjä azlakursi sufël. Azladza uwana tadzäh madzay la afik, tabëzä maslay la slaka Zëzagëla kä madäh seriya. Gënëjä babay sifa anja azladza uwana tanätsäh ä atä gël la vok ala uwarä, kä gay dziriga anja Yesu uwana tagadänj ä afik, ngaha la uwana tazänj gay Zëzagëla aya. Atä tasläkaw tatagä uwaga amiyaka bä la maftsa vok anja bay aw, ngaha atä takës masëlay anja tatagä kä manäh ä madëgay banjaw ahäl anjatä aw. Tadz ä ahëj la Yesu lagwa takoray la slaka gä la masla tsëräh ä mavay dëbow. ⁵ Aganay azladza teranja uwana tawul ä uda la mamëtsay. (Ama azlaanik uwanay kä tadawul ä uda dadänj aw, say banja mavay dëbow uwanay adaslay) ⁶ Gay gä la uwaga marabay agay la azladza uwana tawula ä uda teranja. Atä Zëzagëla adapis ä atä gay ä vok kayakay. Ndzëdä anja mamëtsay masëla la ahëj lakël anjatä aya aw, atä tadägah azlamëna mav tatak la huma Zëzagëla la Yesu. Tadäkoray la Kristu mavay dëbow.

Zëzagëla adüwanj seteni

⁷ La mavay dëbow uwaga la abä, seteni kä matsërkwanjga la mazakazak. Banja uwaga adäla ä lig kä tadäpëlëj ala aya. ⁸ Adada ä marähähla azladza anik anik ä uda la gudëj la vok gesina. Slëm anja azlagudëj uwaga kä Gog atä la Magog. Masla adähama ä atä gay ä vok kä map guvël la Zëzagëla tadägay kä anjüwaw bokuba wuyyan uwana la mukwä la tsëh. ⁹ Aganay tazlanalay taslöh gël ä ahëj, tadäh ä slaka gesina, takas gay ä slaka maham ä ahëj anja azlamëna gay Zëzagëla ä adi, ngaha la huđ gudëj uwana Zëzagëla awoyanj bay. Mok uwana takës atä gay ä adi, akäl asa ä ahëj la zagëla, ababëh atä ä gay. ¹⁰ Seteni uwana azähätälä kä, takës, taduw ä gudüh ä abä la masla mapëhal gay ä ahäl fidaga uwatä. Tadäsa ngërpa mavakay la mahënyay la abä la abatä anja tsëräh ä awtäy.

Seriya maköd gël ä ahëj

¹¹ Ngaha aya gënëjä kursi sufël medfekuga, dza la afik, dzëgova. Gudëj ä vok la zagëla tazälla ä huma ala tuwiz, manëj atä la ahëj aya aw tetuwa. ¹² Ngaha aya kä, gënëjä azlauwana tamätsäh gesina, azlamagolga la azlabëzaga, atä tatsäzl ä huma kursi anja Zëzagëla. La abatä azlawakitä mapazl vok gä la ahëj, la azlawakitä uwatä la abä, ä uwana tatsetsëräh madfehëj anja azladza ä abä tadza ä ahëj la sifa anja tsëräh. Mok

uwana tapözlay wakitä, Zözagöla ačahä seriya à azladza uwana à gөл tamätsäh uwarä. Adahä atä seriya la tetövi aňha, kalkal bokuba uwana tadahähänj à uwana tatsetsër à wakitä uwaga à abä. ¹³ Bamëraka azlauwana tazäh à iyaw à abä la azlatsehay anik anik kà Zözagöla adäwulla atä à uda gesina, kà madäh à atä seriya kalkal la uwana tadahähänj suwanj. ¹⁴ Ndzöda aňa mamötsay la mezewi adagay la ahönj aya aw, kà uwana taga la gudüh akäl la abä. Uwaga slaka mamötsay masöla. ¹⁵ Banja dza uwana slöm aňha matsetserayga la wakitä aňa sifa la afik aw kà, tadäduw à gudüh akäl à abä, aňa tetuwa bay.

21

Zagöla mawga la gudönj à vok mawga

¹ Kiya uwaga la lig la ahönj, gөнөнjä zagöla mawga la gudönj à vok mawga. Zagöla maviyaga la gudönj à vok maviyaga adada à lig, ngaha azladөрөv la ahönj aya aw. ² Ngaha gөнөнjä huđ gudönj tsikasläga, huđ gudönj uwatä kà maw Urusalima, uwana atsä à ahönj la zagöla la slaka Zözagöla, atsä à vөdäh. Zözagöla adacähalla vok à uda bokuba dugu uwana ačäh vok kà mad à zil. ³ Ngaha aya gөtsөнä kuda atсөн la ndzөdä la kursi sufel la abä, agөd: “Nөннән Zözagöla adañal gay aňha à tataka azladza à abä, adädza à ahönj la tataka aňatä la abä, tadägay azladza aňha. Zözagöla la gөл aňha adägay la atä. ⁴ Masla adäcähah à atä iyaw tugwi la adi ala gesina. Mamötsay adägay la ahönj aya aw, matuway la mafak ahäl à kuda adägay la ahönj aya aw, mazay adägay la ahönj aya aw, matөрөbay adägay la ahönj aya aw, gesina kà tsewwa adagay, kà uwana azlatatak maviyaga kà adada à lig!”

⁵ Dza uwaga la kursi la afik agөd: “Nөннән, gөpакä azlatatak gesina ala kà mawga!” Ngaha agөd à gi: “Tsetsër uwanay gөpөh à ka, kà uwana azlagay uwanay kà dziriga, fida la tsөh aw.” ⁶ Agөd à gi aya: “Tsewwa adagay. Gi la uwana gi matera aňa tatak gesina, ngaha gi la uwana gi makөd gөл à ahönj aňa tatak gesina aya. Gi uwana gөdzökä tatak, ngaha gi uwana gөdäkөd gөл à tatak gesina. Azladza uwana nölaj aza à atä, gөdätөd à atä iyaw deyday. Iyaw uwaga kà iyaw uwana avä sifa.” ⁷ Aganay azlatatak uwana gөdävä azladza uwana takөdäs! à mawisiga, gөdägay Zözagöla aňatä, ngaha atä tadägay azladza gulo. ⁸ Ama azladza uwana tasakal à tsөh ala, la azladza uwana tadinj gөл à Yesu à vok aw, la azlamөna lөv mawisiga, la azlamөna makad dza, la azlamөna mabila, la azlamөna madäh mözla, la azlamөna manөf mazlazlay, la azlamөna fida kà, tadäwits atä à gudüh akäl uwana à abä madөhөнj à abä gä la huleli. Uwaga la uwana agay mamötsay masöla.”

*Urusalima mawga aňa Zözagöla**

⁹ Kiya uwaga malika anik asä à slaka gulo. Agä tekula la tataka azlamalika mөdөf uwana la abä la tasä la ahäl uwana azlanjөрpа makөd gөл à ahönj agäh la abä. Mok uwana adasa à wanj agөd à gi: “Sä à wanj, gөpөhakala dahalay uwana magadzaw adazөbay tsi.” ¹⁰ La kirim yewdi, Masasөdök Zözagöla asä à ahönj à gөл gulo, ngaha malika uwaga adäla à gi à mөňj gudönj matsөkakacayga à afik. Apөhgöla Urusalima huđ gudönj tsikasläga aňa Zözagöla la zagöla la slaka Zözagöla. ¹¹ Gudönj uwatä awutsөdäy wuzlwawuzl bokuba akur uwana slöm aňha yaspe, slöm aňha la ahönj kà mөňga gä. Awutsөdäy bokuba takenedeka. Uwaga kà mazlөbay aňa Zözagöla la uwana awutsөdäy kiya uwaga. ¹² Gudönj uwaga zlagam mөňga, zinjinga anudä ala gay à adi dөkөts, gamagäy kulo gөл aňha söla la vok. La kөla gamagäy kulo gөл aňha söla uwaga kà tatsetsëräh slöm aňa tsөhay kulo gөл aňha söla aňa azla Isөrayel à adi. ¹³ Kөla makөla tekula kà, gamagäy makөр makөр la vok. Makөр la mas à afik afats, makөр la matөd à ahönj afats, makөр la gөл la aku, ngaha makөр la tsөh la ahönj, bokuba magodäy magadzaw. ¹⁴ Tafä zlagam uwaga kà à azlaakur matatukw gay kulo gөл aňha söla à afik. La kөla akur la adi tatsetsëräh slöm aňa azlamөna matapla la slaka aňa Yesu à adi.

¹⁵ Malika uwana atügw à gi gay uwaga kà, agä la agöla luwäluwä la ahäl, uwaga kà agöla kà magorla tatak. Ahäd kà magor gudönj, la azlagamagäy, ngaha la zlagam aňha. ¹⁶ Huđ gudönj uwaga kà, agä banjuga kiya uwaga gay ufad nna kà kalkal gesina. Malika agür gudönj uwaga la agöla aňha: Zinjizj aňha kà, agä zuwid slewzi dөbow la dadermөkw söla, kөla gay tekula, kiya uwaga gay ufad nna à zinjinj aňha bay. ¹⁷ La lig la ahönj malika agür zlagam aňha mawalay dzim la dzik ufad gөл aňha ufad. Magur aňha kà bokuba uwana anu azladza mögur tatak. ¹⁸ Zlagam gä, uwana kà tahäzl la tsөhay akur uwana tazalalla yaspe. Ama kà aňa huđ gudönj kà tanjal kà la luwäluwä dzөрaň dzadzөрaň bokuba takenedeka medөkuga. ¹⁹ Azlaakur matatukw zlagam kà la

* 21:6 21.6 Yesaya 55.1 * 21:8 21.8 Dzänj Hezөkiyel 40

luwäluwä tadfahähän, kà la azlaakur anik anik mahadäyga. Akur terañja uwana tanjälal zlagam à gəl kà tazalalla kà yaspe, masəla kà safir, mamakər kà agat, maufəd kà emerod, ²⁰ mazlo kà sardonikəs, maməkwa kà saruwan, mamədfəf kà kərisolit, mamtəgis kà beril, maladəga kà topas, makulo kà kərisopəras, makulo gəl anja tekula kà tiwrkəs, ngaha makulo gəl anja səla kà amətəs. ²¹ Kà anja gamagəy kulo gəl anja səla uwaga kà, kəla gamagəy kà, tadfahän kà la Perle, uwaga kà bokuba kololo, tetəvi anja huđ gudəñ kà tadfal kà luwäluwä dzərañ dzadzərañga bokuba takenedəka medəkuga.

²² La huđ gudəñ uwaga kà gəy Zəzagəla la ahəñ aw, kà uwana Zəzagəla la gəl anja abədf à abà, atà la magadzaw. ²³ Kiya uwaga gənəñà afats atà la təla tawudəy aya aw, kà uwana azlaka dza aya aw. Kà uwana la abatà kà, mazləbəy anja Zəzagəla awudəy ngaha magadzaw awədfay kiya fənəs la huđ gudəñ la abà. ²⁴ Azladza gudəñ à vok gesina tadəuguzahahay la ufaka anja la abà. Kikay kà ufaka uwaga, azlasufəl anja gudəñ à vok tadàda à abà kà mav maslay anjatà gesina à Zəzagəla. ²⁵ Azlagamagəy anja huđ gudəñ tadàdza à ahəñ mapazl vok gə kəla mavakay gesina. Matsakalla à ama la ahəñ aw tsərəh à awtəy, kà uwana vədf adəgəy la ahəñ aya aw. ²⁶ Kiya uwaga tadəsahla maslay anjatà à wañ azlatatak zəbzəbga, zəbzəbga uwana la gudəñ la vok. Tadàdalla uwaga à slaka Zəzagəla kà mavəl. ²⁷ Ama kà anja tatak mawisiga kà, adàda à gudəñ uwaga à abà aw. Azladza uwana àläh àlähga, la azlaməna fida tadàda à abà aw. Say azladza uwana tatsetsər sləm anjatà à wakitə anja magadzaw à afik pəra, la uwana tadàdza à ahəñ la sifa anja tsərəh à awtəy.

22

¹ Malika apəhgəla mukwà iyaw uwana avà sifa à azladza aya. Awudəy dzərañja tsərəh à godega bokuba tekenedəka medəkuga, akəl à uda la kursi anja Zəzagəla la abà, la anja magadzaw. ² Masla akəlay la ləv barama anja huđ gudəñ uwaga la ama. Ama ahəf uwana avà sifa à azladza dzərra la gaya mokmak nna, avà mayyay kəla təla asik tekula, bokuba magodəy asik kulo gəl anja səla la mavay la tsəh. Amiyaka babasl anja bay kà, yohof kà mawar azladza gudəñ à vok ala gesina. ³ Ama uwana Zəzagəla adətsafla gesina kà adəbəza vok la abà aw.

Say kursi anja Zəzagəla la anja magadzaw pəra uwana tadəgəy la huđ gudəñ uwaga la abà, la azlaməna sləray anjatà kà masləkaway. ⁴ Tadənəñ huđ adi anja, tadətsetserah sləm anja à madəgəy anjatà. ⁵ Kiya uwaga vədf adəgəy la ahəñ aya aw, azlafənəs, la afats adəzlaka azladza aya aw. Kà uwana Sufəl Zəzagəla la gəl anja adəv ufaka. Atà tadəkoray anja tsərəh à awtəy.

Mas à wañ anja Yesu

⁶ Kiya uwaga malika agodəf à gi: “Gay uwanay kà dziriga, fida la abà aw. Sufəl Zəzagəla uwana avà Masasədfok anja à azlaməna mapəh à atà gay à ahəl kà mapəh à azladza, asləl malika anja à ahəñ kà mapəhla ala uwana adəpaka vok la huma à gay à azlamagamza anja.”

⁷ Yesu agodəf: “Nekwa, gəwula à wañ. Marabay agay la azladza uwana takəs gay uwana la wakitə uwanay la abà, kà uwana Zəzagəla la uwana afətalla à ama ala la Masasədfok anja!”

⁸ Gi Yuhana gətsənà azlatatak uwaga la sləm gulo, ngaha gənəñəñ uwaga gesina la yewdi gulo. Mok uwana gədatsən uwaga gesina la manəñəñ, gəkədədf à makəla asik anja malika, uwana apəhgəla uwaga gesina, kà masləkaway. ⁹ Ama agodəf à gi: “Kadəhan kiya uwanay aw. Gi bay, gi magamza anja Zəzagəla, bokuba kak, ngaha la azladza anjak uwana Zəzagəla apəh à atà gay ahəl la azlauwana tanəfa gay anja wakitə uwanay. Kà anja uwaga kà, kazləba gi aw, zləbà kà Zəzagəla!” ¹⁰ Kiya uwaga agodəf à gi aya: “Zəzagəla afətəka à ama ala à uwana tatsetsər à wakitə uwanay à abà. Kakəsa gay uwanay la ləv anjak pəra aw, kà uwana kaslə anja azlatatak uwanay kà nekwa. ¹¹ Gəgodəf à azlaməna madəh mawisiga, gəgodəf à azlaməna ləv mawisiga kà banja asa à akul magay kiya uwaga kà: ‘Dəw à huma à gay la ləv mawisiga pəra zlə.’ Kà anja dza dziriga bay kà, ada à huma à gay la madəh dziriga anja, dza uwana sətaka, ada à huma la sətaka anja gesina.”

¹² Kiya uwaga Yesu agodəf: “Digiya tsənəwəñ, nekwa gəwul à wañ. Gi gədəsəlla azlatatak à wañ la ahəl, kà gi anja mapəl masik anja à dza. ¹³ Gi uwana gi la ahəñ dagay uwarə, ngaha gi uwana gədəgəy la ahəñ aya. Gi uwana gədzəkà tatak, ngaha gi uwana gədəkədf gəl à tatak gesina.”^{*}

¹⁴ Marabay agay la azladza uwana tapaləh lukut anjatà, atà la uwana la tetəvi anja maday à huđ gudəñ à abà. Atà la uwana azlawla atà, kà mazuw mayyay ahəf, uwana avà sifa à azladza. ¹⁵ Ama azlaməna falay, la azlaməzla, la azlaməna madəh mabila

^{*} 22:13 22:13 Yesayya 40.10; 44.6; 48.12; 62.11

kà, tadàgəf à uda. Azlaməna makəf dza babay, la azlauwana tasləkaw mazlazlay, la azlaməna manəf fida kà, tadàgəf à uda babay, tetuwa tadəbək asik à huɗ gudəŋ à abà aw!

¹⁶ Yesu agòf: “Gi, Yesu uwana gəsləl à akul malika gulo à waŋ kà maz à akul tatak uwanay gesina la azlagəy maham à ahəŋ məna gay Zəzagəla la aku, gi kà, gi dza uwana kakudaw. Gi mayyi à tsəh ala aŋa David. Gi ŋuzla gəl bebəŋ.”[☆]

¹⁷ Masasəfok Zəzagəla, la mawɗa aŋa magadzaw takəs la azlaahəl səla: “Sà à waŋ zlà!” Akul uwana katsənaw gay uwanay babay: “Sà à waŋ!”, kagodaw. Dza uwana nəlay azəŋ kà, asa à waŋ, abəzà iyaw sifa uwanay deyday.[☆]

Makəf gəl à ahəŋ aŋa gay uwanay

¹⁸ Gi Yuhana gəsləhakulla sləm ala. Akul gesina uwana katsəbàw sləm à gay uwanay la wakità la abà, asà à waŋ la slaka Zəzagəla. Gi gəpəh à akul kà, baŋa dza akəɗəvəni gay à wakità uwanay à tsəh kà, Zəzagəla adàzala ŋgərpa à gəl suwaŋ, à uwana masla apəh la wakità uwanay la abà. ¹⁹ Ŋgaha bay, baŋa dza atetuwa uwana Zəzagəla afətàla à ama ala la wakità uwanay la abà kà, Zəzagəla adəzəbal aŋa ala humà mayyay ahəf uwana avà sifa, ŋgaha la humà huɗ gudəŋ tsikaslağa uwanay, wakità uwana adapəhla ala.

²⁰ Masla sayda dziriga aŋa gay uwana la wakità uwanay la abà, agof: “Ndzer, gi nekwa, gəwula à waŋ.”

‘A tsa bə kità! Sà à waŋ, Sufəl Yesu!’

²¹ Sufəl Yesu apis à akul gay à vok kaykay gesina. Amen.